


Noquen hihbaan joi



New Testament in Capanahua (PE:kaq:Capanahua)

Noquen hihbaan joi

New Testament in Capanahua (PE:kaq:Capanahua)

copyright © 2008 Wycliffe Bible Translators, Inc.

Language: Capanahua

Translation by: Wycliffe Bible Translators, Inc.

Capanahua [kaq], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Capanahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files dated 29 Jan 2022

8b744608-7540-59b5-a4b9-20fb46e3f9c5

Contents

MATEO	1
MARCOS	49
LUCAS	77
JUAN	128
HAHNIBO	162
ROMANOBÓ	204
1 CORINTO	226
2 CORINTO	244
GALATABÓ	256
EFESIOBO	263
FILIPOS	271
COLOSAS	276
1 TESALONICABO	281
2 TESALONICABO	285
1 TIMOTEO	288
2 TIMOTEO	294
TITO	298
FILEMON	301
HEBREOBO	302
SANTIAGO	317
1 PEDRO	322
2 PEDRO	327
1 JUAN	330
2 JUAN	335
3 JUAN	336
JUDAS	337
JAYAXIHQUIBO	339

MATEO

Mateonen huishani joi siri

Jesucriston xohtabo

(*Lc 3.23-38*)

¹ Jahuen xohtabo topónpaquexon ta Jesucristo David jaa xohtahi non honanai. Jaton hepa coin ta Abraham janishqui.

² Abrahanen baque ta Isaaque janeya janishqui. Isaaque baque cahen Jacobo. Jacobon baque cahen Judá. Judapan huetsabo rihbi jai.

³ Judapan baque cahen Fares betan Zara. Tamara qui jan baquejani rabe ta jaabo qui. Faresen baque sca cahen Esrom. Esromana cahen Aram.

⁴ Aramana cahen Aminadab. Aminadabena cahen Naason. Naasomana cahen Salmon.

⁵ Salmonena cahen Booz, Rahaba qui jan baquejani. Boozena cahen Obed, Rut qui jan baquejani. Obedina cahen Isaí.

⁶ Isainena cahen David, quiquin hapo. Davidinina cahen Salomon, Uriásnen haibo qui jan baquejani.

⁷ Salomonena cahen Roboam. Roboamena cahen Abías. Abíasnena cahen Asa.

⁸ Asana cahen Josafat. Josafatena cahen Joram. Joramana cahen Uzías.

⁹ Uzíasnena cahen Jotam. Jotamana cahen Acaz. Acacena cahen Ezequías.

¹⁰ Ezequíasena cahen Manases. Manasesena cahen Amon. Amomana cahen Josías.

¹¹ Josíasena cahen Jeconías, Jeconías huetsabo rihbi. Babilonia mai janin hapon hiohah ta jano sca jihuhenishqui.

¹² Babilonia mai janinxon sca ta Jeconíasnen Salatiel baquejanishqui. Salatielnin baque cahen Zorobabel.

¹³ Zorobabelnina cahen Abiud. Abiudena cahen Eliaquim. Eliaquimina cahen Azor.

¹⁴ Azorona cahen Sadoque. Sadoquena cahen Aquim. Aquimana cahen Eliud.

¹⁵ Eliudena cahen Eleazar. Eleazarnena cahen Matan. Matamana cahen Jacobo.

¹⁶ Jacobonena cahen José. José ta Maríán bene janishqui. María cahen Jesusen mama. Jesus cahen Cristo.

¹⁷ Jaa rahsi topónpaquehah ta catorce joni jaiqui, Abraham janinxon David caman topónpaquehah. David janinxon sca Babilonia mai janin caníbo caman topónah ta catorce rihbi qui. Babilonia mai janin caníbo janinhax Cristo caman cahen catorce rihbi.

Jesucristo baquexo cainai

(*Lc 2.1-7*)

¹⁸ Jesucristo ta nescari cainnishqui. Maríán papabaan ta jaton baque hihbojamanishqui, José hinanyahnoxon. Josen bihriyamahiya ta Dios Yoshiman María baque hinannishqui.

¹⁹ Josen hahcama bi jahuen haibo jan bihyaxihqui ma tohoyahi jisxon bihtima shinanscaquin. Bihcatsihyamascaxon bi ponte joni hihxon, jahuen haibojati rabinmacatsihyamaxon, tsoabi yohixonma jenebahinti shinanscaquin.

²⁰ Jascajati shinan shinanxon sca namaquen Papan yonoti jisquin. Sanarenenax jaa yonoti yohuaní:

—Josen. Davidi baquen. Miin haibo María bihresscahue. Bihti qui raqueyamahue. Jahuen xahquin janin nanescái ta Dios baque qui, Dios Yoshiman baquejahan.

²¹ Bebo baque ta bihyaxihqui. Jaa bebo baquen ta jahuen jihuetahbo mahnebohanxon jihuemayaxihqui, jato xahbanen sca jaton tiromajanicabo paquenon. Jaa copi tah min jaa Jesus janeya jayaxihqui —hahquin.

²² Papan jato yohiha jahuen joi yohinicabaan yohini quescabijaquin janon ta Papan jascajanishqui.

²³ Jaabaan huishani ta nea qui:

Jisnahue. Bebaan honanahma bi ta xontaco tohoxon baque bihyaxihqui. Cainscaya ta Emmanuel jaa janeyaxihcanihqui.

Emmanuel ta Papa Díos ta noque betanbi hihqui qui hihcatsihqui.

²⁴ Namacax mohi sca jaax, caxon jahuen haibo bihqui, noquen Hihbaan yonotinin yohihah quescabijaquin bihresscaquin.

²⁵ Haibo bihres sca jaax bi hahbe hoxayamatahbi, jahuen baque janbihnon caman. Cainscaya, jahuen Jane sca Jesus.

¹ Herodes quiquin hapo jai tian ta Judea mai janinxon Jesusen maman jaa bijnishqui, Belen jema janinxon. Jaatian hocho quehax, bari cainai quirihax, jonibo nocoti. Huishi honanmisbo Jerusalen janin nocoti becani.

² Quiquin hapon xoboho mapexon yocacanquin:

—Mato judiobaan quiquin hapo baquexo cainhoh tah non jisi jahui. ¿Jahuerahnon hin? Bari cainai quirixon tah non jahuen huishi jisoqui. Jaa copi tah non hahqui raboxonen tisquihapquehi jahui —hihcani.

³ Jascaraiboya quiquin hapo Herodes rahte rahteti. Jerusalen janin jihuetaibo rihbi rahte rahtecani.

⁴ Jahuen quiquin sacerdoteboya judiobaan quirica honanbo quenamaxon sca Herodesnin jato yocaquin:

—¿Jahuerahnxon Cristo baquexo bihti quin? Yohinahue —hahquin.

⁵ —Judea mai janin, Belen jema janinxon rahan. Jascajaquin ta Papan joi yohinicaton huishanishqui.

⁶ Belen. Mia tah min Judapan mai meha jema qui. Caibo Judea jemabo mia mentan hashoan hani que bi ta mia rihbi jaabo mentan hashoan hani qui. Mia janinhax ta quiquin hapo jayaxihqui qui. Jaan ta heen israel jonibo jihuemayaxihqui qui.

Papan joi yohinicaton ta jascajaquin huishanishqui —hihcani.

⁷ Nocotaibo quenabohanxon sca honaxonbi Herodesnin yocaquin, sirijaquin honancat-sihquin:

—¿Jahuentian man jahuen huishi jisoquin? —hahquin.

⁸ Honanxon sca, jato yohiquin:

—Belen janin bonahue. Nocotax, sirijaquin honannoxon yocacahnoxahnahue, jahuerahnnon hin jaa baquexo. Meraxon hea yohihi sca beribiyaxahnahue, hean rihbi hen jaa bebonxon raboxonen tisquihapquehi canon —jato jaquin.

⁹ Jascajaquin yohihah, boresscacani. Pixon nai bejisahantaibaan bi bari cainai quiri janinxon jisobo huishi xabaribibi. Xabacanahi cahi, jato bebon cahax, baquexo machi sca nihreneni.

¹⁰ Jaa huishi meraribbihax hihti jenimacani. Coin coinscacani.

¹¹ Nocotax xoboho mapexon jahuen mama Maríaya baquexo meracanquin. Rabox-onen nihxon hahqui tisquihapquexon, jaton bohnantibo quehpenxon jaa bexonaibo hinancanquin. Oro, hahan hininjatibo rihbi, hininjanoxon hahan rasquitibho rihbi hinancanquin.

¹² Jaatian sca namaquen joi nincacanquin, Herodes janin catima sca Papan jato yohihah. Jaa copi ta jaton main caribinoxon huetsa bahin sca bocannishqui.

Egipto main cahibo

¹³ Jaton main boresscaiboya sca, noquen Hihbaan yonoti hahqui sanareneni jahui namaquen Josen jisribiquin.

—Catanhue. Jahuen mamayabi baquexo botanhue, Egipto main histon cahax jano jihuehue, hen mia janohax cati yohinon caman. Baquexo rehtenoxon ta Herodesnin benanoxihqui qui —hahquin yonotin.

¹⁴ Huenixon sca baquexoya jahuen mama yamebi hioquin. Egipto main nocoti cahi cahi.

¹⁵ Nocotax janobi jihuetai, Herodes hihnon caman. Jascari ta Papan joi yohinicaton huishani joi jai quesca jaresscanishqui: Egipto mai janinhah tah hen heen baque quena-maniqui hihqui jaa huisha.

Baquebo rehtetannahue hahxon Herodesnin jahuen sontarobo yonohi

¹⁶ Egipto mai janin José cariyamahiya ta hocho quehax jahuibo Herodes janin cayam-ascanishqui. Hea yohihi joyaxahnahue Herodesnin jato jaipi bi huetsa bahin cahi jaa tecayacahini cahi. Jaton main boresscaibohi honanax sca, Herodes sina sinati. Jato yocaca tipixon, jaatihhi basi sca huishi jismenonibo jai honanxon, jahuen sontarobo sca yonoquin.

—Belen jema janin jai baquebo rehtetannahue, rabe bari jaibo, hashoan naman hi-hquiibo rihbi rehtetannahue, Belen senen jai jemabo quiha baquebo rihbi rehtetannahue jatihibi —jato jaquin, Herodesnin.

¹⁷ Jaa copi ta Papan joi yohinica Jeremíasnen huishani joi quesca sca janishqui. Jaa joi ta nescari qui:

¹⁸ Ramá janin ta sai saihihqui qui. Huinihibo, huaohihqui hichahi. Raquel ta jahuen baquebo qui huinihibi qui. Jenquetsahaxon sirijaquin shinanmatimascai, jahuen baquebo yamahiya, rehtenahbo quen hihqui jaa huisha.

¹⁹ Baquebo jascajaquin rehtemanish ta Herodes sca mahuanishqui. Jaa mahuataiya ta Egipto mainxon namaquen Papan yonoti Josen jisnishqui.

²⁰ —Caresscatanhue. Israeli main canoxon miin haiboya jahuen baquexo hiorihbitanhue. Baquexo rehtecatsihqui bo ta mahuascaiqui —yonotin jaquin.

²¹ Mohiyahxon sca jahuen baquexoya jahuen haibo boresscaquin. Israeli main cahi cahi.

²² Nocoxon sca chanihibo nincaquin. Jahuen papa Herodes xohtahi ta Arguelao sca Judea mai quiquin hapo qui, hihqui chanihad Judea mai qui cati raquescai. Namaquen sca, Jano cayamahue yohihi nincacax Galilea main sca cahi cahi.

²³ Nocotax Nazaret janeya jema janin sca jihueta. Jano Jesus jihuescái copi ta Papan huishani joi quescabihi janishqui. Jaa ta Nazareno hihyaxihqui hihqui jaa huishani joi.

3

Nashimanica Juan yohuanai

(*Mr 1.1-8; Lc 3.1-9, 15-17; Jn 1.19-28*)

¹ Jascanihbo cahchiqui sca ta tsoa janu yamahiton nashimanica Juan nihpahonishqui, Judea main. Yohuancanahi cahi nihnichi.

² —Maton shinan tiromabo jenebahinquin shinan siribo sca bihnahue. Papan mato jihuematici nete ta nea pishca sca jaonahiqui.

³ Papan joi yohinica Isaíasnen huishaxon yohini quescáta Juan janishqui.

Jano tsoa jihuetaitonma tah hen yohuancanahi. Noquen Hihbo hahan jonon bahixon-nahue, pontequin bahixonnahue, hih tah hen jai hihqui jaa huisha.

⁴ Juaman ta camelero rani chopajaxon sahuepahonishqui. Histon nihnoxon rihbi yohina bichi quexen jahuen tarí pishnexehti. Champobo res ta pipahonishqui, champoya bona-jene.

⁵ Jaa nincaqui sca ta Jerusalen janin jihuetaibo bocannishqui. Judea main jihuetaibo jatihibi, Jordan huean patax jihuetaibo rihbi jaa nincaqui bocani.

⁶ Juan yohuanai nincaxon, jaton yorabi yohihi jaton hohchabo yohipaqescacanquin, Juaman jato jeneho hihquimatannon.

⁷ Jano jan jato nashimahi janin fariseobo betan saduceobo rihbi hicha hahqui nocohih-nati. Nocohihntaibo jisxon, Juaman jato yohiquin:

—¡Rono baquebon! ¿Tsoan mato neno jabaquihraní joti yohihaxquin, Papan mato casticanmis hihquish man jonon?

⁸ Maton shinan tiromabo potaxon shinan siribo sca bihnahue. Sirijaquin shinanax res sca jihuennahue hih ca hen jahihsen.

⁹ Noque caya tah non Abrahanen baquebo qui hihyamaribinahue. ¡Man yohinani jascamis! Abraham baquebo jacatsihquin ta nea man jisi macanbo Papan jonijati hahtipahiqui, Abraham baquebo sca janon.

¹⁰ Jihui reranoxon hahcajaquin ta jahuen yami bihxon Papan tarescái qui. Bimiyosma ji-huibo reraxon mapojaquin hahcajaquin ta tiroma shinanyahpabo Papan casticanscái qui. Shinannahue.

¹¹ Maton shinan man pontehiya tah hen jenen res mato nashimahi. Huetsa joni rihbi ta joresscái qui. Hea mentan hashoan coshi. Jaa hihti siri copi tah hen jahuen sapato boxonti senenyamahi. Jaan ta jahuen yoshin siri mato hinantihiqui. Chihi rihbi ta mato maracantihiqui.

¹² Bimi berobo tsinquixon, chishpo potaquin hahcajaquin ta Papan xecoscái qui. Jahuen bimi siribo rahsi tsinquixon sca jahuen janu bexojati janin bexojatin hahcajaquin ta Papan jahuen baquebo tsinquihi qui. Chishpo cahen nocayosma chihin mapojayaxihqui qui —jato jaquin Juaman.

Juaman Jesus jeneho hihquimatanaí

(*Mr 1.9-11; Lc 3.21-22*)

¹³ Jaatian ta Galilea mai janinhax Jesus noconishqui. Juaman jaa nashimaquin hihquimatannon hihquish, Jordan huean qui jahuí, janu Juaman nashimahi janin.

¹⁴ Hea nashimahue hahca bi Juan queenayamahi.

—Mian caya hea nashimahue. ¿Mian hea nashimatihi bi min Hea nashimahue hah min hea jai nan? —ihqui Juan.

¹⁵ —Jaabi hea nashimahue. Min hea nashimati ta Papa queenih qui. Papan yohihi jatihibi hean nincanica hihnon hea nashimascahue —Jesusen jascahah, Juaman jeenhahquin. Jeenhahxon, nashimaquin.

¹⁶ Hueaman nashimaha Jesus mapescai. Jaatian ta nai cohin potabohanahcamahi queh pemehtaiya bochiquihax nobex botopaqetai quescari Dios Yoshin hahqui botopaqeti jahui Jesusen jisnishqui.

¹⁷ Naihoh quehax yohuanai rihbi nincacanquin.

—Nea ta hahan hen queenai heen baque qui. Hahan tah hen hihti jenimahi —hihqui.

4

Satanasnen Jesus tanahi

(Mr 1.12-13; Lc 4.1-13)

¹ Jaa pecaho ta jano tsoabi yamahi janin Dios Yoshiman Jesus hionishqui. Jordan huean janinhax cahchiho jan canon, hioquin, janoxon sca tiroma yoshiman jahuen shinan tananon.

² Jano cuarenta neten piyamabahinaxon piyamashinahax hihti picatsihscrai.

³ Hihti picatsihscaya ta tiroma yoshin sca joxon yohinishqui, hohchamacatsihquin:

—Papa Diosen baque hihxon, toa macan toncobo yohihue, piticahinscanon —hahquin.

⁴ —Papan huisha janin ta nea joi jaiqui: Piti res jaax jihuetaima tah man jai. Papan yohihi joi jatihibi nincalqui jihuenahue hih ta Papa janishqui —Jesusen jaquin.

⁵ Jaatian ta Jerusalen janin sca tiroma yoshiman hionishqui, Papa yocati xobo janin. Xobo mamacanya manimaxon sca yohiquin:

⁶ —Papa Diosen baque hihquish, naman paquehue. Jahuen huisha janin ta Papan yohihi:

Jahuen yonotibaan ta mia coirantihiqui. Jaton mequemanbi ta mia bilihnicanticthiqui, macan qui min joxcorohyamanon —hahquin yoshiman.

⁷ —Huetsa Papan quirica janin ta nea jaiqui: Hea cahra hahxoncointihiquin hihxon miin Hihbo Dios tanayamahue —hahquin Jesusen.

⁸ Jaatian, tiroma yoshiman boribiquin, queya mahchi janin sca. Manimaxon sca hocho jismaquin jatihibi jemabo jan jisnon. Jaton jahuaborayabi jato jismaquin. Jismaxon yohiquin:

⁹ —Min hehqui raboxonen tisquihahpaquehiya tah hen jaa jatihibi mia hinantihi —hahquin.

¹⁰ —Catanhue, Satanás. Papan huisha janin ta nea joi jaiqui: Miin Hihbo Dios huesti qui tah min raboxonen tisquihahpaquetihi. Jaa huesti tah min nincatih —Jesusen jaquin.

¹¹ Jascajaquin yohihah ta tiroma yoshin caresscanishqui. Jaa xahbanen cahen Papan yonotibo nocohihnat. Nocohihnxon, piti hinancanquin.

Galilea mainxon Jesusen jato yohimenohi

(Mr 1.14-15; Lc 4.14-15)

¹² Cahchihoh quehax joxon, quiquin hapon sontarobaan Juan bichipi joi nincacax, Galilea main sca Jesus cahi jahui.

¹³ Nazaret jema janinhax Capernaum jema janinbo sca baneti cahi, hian quexa. Jano Zabulonbo betan Neftalího jihuetaibo janin jihuetahbahi.

¹⁴ Jaa copi ta Papan joi yohinica Isaíasnen yohini quescanishqui:

¹⁵ Zabulon mai janinhahbon, Neftalí mai janinhahbon, jaton hian janin jaibo rihbi Jordan huean hoque quexa jihuetaibon, Galilea main jihuetai judiomabon,

¹⁶ Bahquish chian jihuetaibaan bi ta hani xaba jiscannishqui. Mahuati qui raquetaibaanbi ta xaba paquenishqui, mahuapan jatobihpanan hihqui jaa huisha.

¹⁷ Jano ta Jesusen yohimenonishqui:

—Maton shinan pontemabo potaxon shinan siribo bahnahue. Papan mato jihuematici nete ta nea pishca sca jaonahiqui —hahquin.

Yapa bilihnicahbo Jesus betan cahi

(Mr 1.16-20; Lc 5.1-11)

¹⁸ Jaatian sca Galilea hian quetanbahini caquin bi tarrafa pota potahi joni rabe mer- aquin. Huetsa, Simon. Huetsa, jahuen jochica Andres. Yapa bilihnic rabe.

¹⁹ —Hehbetanbi bonahue, jonibo sca hen mato tsinqimanon —jato jaquin.

²⁰ Yohihah ta jaton tarrafa jenebahini caquin chibanhincannishqui, hahbetanbi sca nichí.

²¹ Caribixon sca huetsa rabe rihbi meraquin. Jacobo betan jahuen jochica Juan, Zebedeonen baque rabe. Jaton papa betan nontinxon jaton tarrafa hona honahiton jato merabonaquin. Jaabo rabe sca jascajaribiquin yohiquin.

²² Jan yohihah, jacobini caquin jaton papaya jaton nonti jenebahinxon Jesus chibanhribicanguin.

*Jonibo Jesusen haxemahi
(Lc 6.17-19)*

²³ Galilea mai janinbo yohihi cahi ta bocannishqui. Jema qui nocotax judiobaan tsinquitixoboho hihcoxon Papan joi jato honanmaquin. Papan jato jihuemat nete nea pishca sca jaonahi yohixon, hisinaibo jatihibi rohajaxon, yosmabo rohajaxon coshi jato hinanquin, Jesusen.

²⁴ Jato honanmaxon rohajahiya ta hocho bi res Siria maibo janin jatihibi jaya yohuanchanicannishqui, jano jihuetaibo. Jaa copi ta jaa janin jaton hisinyahpabo hiocannishqui, hihti hisin tenehibo, mesco hisinyahpabo, mahua hisinyahpabo, tiroma yoshiman hihbojabo, mapo masataibo, yora honanyamajaquetaibo rihbi. Jaa rahsiya behiboya jato rohajaquin.

²⁵ Hihti caibo sca jaa chibani becani, Galilea mai mehabo, Decápolis jemabo janinhahbo, Jerusalen janinhahbo, Judea mai mehabo, Jordan huean hoque quexa quehabo rihbi.

5

Mahchinxon Jesusen jato haxemahi

¹ Nocohihnat tax hahqui tsinquiqaquetaibojisish ta mahchi janin Jesus manihihnanishqui. Jano tsahotaiya sca ta jahuen haxenicabojaa patax nincaqui behinihnacannishqui.

² Jato haxemakin ta nescajaquin jato yohinishqui:

*Hahanjenimati jaibo
(Lc 6.20-23)*

³ Caibo ta jahuaborajoma quescapah qui, jaton jahuabora shinanyamahi. Jascapahbo ta hahanjenimati jaiqui, jato jihuemaxon Papan jato jahuen jihue hinanyaxihquibo.

⁴ Caibo ta benatihqui. Jascapahbo ta hahanjenimati jaiqui, Papan jato shinanmaquin sirijathi copi.

⁵ Caibo ta mehcayahpa qui, hahxonnic. Jascapa ta hahanjenimati jaiqui. Papan ta nai naman meha mai jatihibi jato hihbomayaxihquiqui.

⁶ Papa queenai quescajati ta caibo hihti queenihqui. Papan jato jascajaquintih qui quen ta jascapahbo hahanjenimati jaiqui.

⁷ Caibo ta yanapanmisbo qui, huetsahon shinanxon hahxonnicahbo. Jascapahbo ta hahanjenimati jaiqui, jatohon shinanxon Papan rihbi jato hahxonyaxihquibo.

⁸ Caibo ta siri shinanyahpabo qui, hohchati shinanjomabo. Jascapahbo ta hahanjenimati jaiqui. Noquen Papa Dios ta jisyaxihcanihqui.

⁹ Sinataibo sirijaquin yohuanquihnxon ta caibaan jato sina tantimahiqui. Jascapahbo sina tantimanicahbo ta hahanjenimati jaiqui, Mato tah man heen baquebo qui. Papa jaiya.

¹⁰ Papa queenai quescajaquin man hahcai copi mato tiromajahah tah man tiroma tenetijai. Jascajaquin tenehibo ta hahanjenimati jaiqui, jato jihuemanoxon ta jahuen jihue Papan jato hinanyaxihquiqui.

¹¹ Man hea nincacoinaiya quesabaan mato hichacax, mato qui tiromahiy yohuan yohuanxon, mato tiromajanoxon chibonbanahiya tah man hahanjenimati shinanman jatihi.

¹² Jenimanahue. Man tenexonai copi Papan mato jahuen hinantibo naihoh bexojaxonai quen hihti coin coini jihuemanahue. Jascajaquin rihbi ta Papan joi yohinicabot iromajacan-pahonishqui. Jaa copi mato qui tiromabotenahue.

*Non xaba quescajai; tashi quesca rihbi
(Mr 9.50; Lc 14.34-35)*

¹³ Jatihibi jonibaan tashi quesca tah man qui. Tashi jahuijoma sca tah non jenquetsahaxon bi hahquirihbi jahuijatimahi. Jascapa tashin tah non jahuebi tashin hahtimahi. Potati sca tah qui, huinoquin jonibaan jama jamanon.

¹⁴ Mato tah man mai mehabaan xaba qui, jatihxionbi jisti. Mahchi maracahtai jema ta hochoxon jisti qui, jenquetsahax jonetimahi.

¹⁵ Johue quetejaxon rihbi ta tsoanbi quentipan mahpoyamahihqui. Jahuuen tsahotinin tah non johue tsahonai, xoboho jaibo rahsichin jahuen xaba jisnon.

¹⁶ Jascajaquin xabajahibo jihuemanahue, man sirijaquin shinanxon joni huetsahahxonai jisxon jatihibichin mato honannon. Man jascapahbohijisish ta maton naihoh queha Papa qui siripi yohuanyaxihcanihqui.

Moises joi honanahbo jato haxemahi

¹⁷ Papan huishamani joibo hean mato potamahi jahui shinanyamanahue. Moises jan huishamani, texe jahuen joi yohinicabo jan huishamani, jaa joibo mato potamahi tah hen joyamaniqui. Papan joi potamanoxonma bi tah hen jan yohini quescabijanoxon jahui.

¹⁸ Hen mato yohicoinnon nincanahue. Naiyahpa mai queyonon caman ta Papan huisha quiha ni huesti bero pishca, ni huesti reshpi pishca rihbi manotimahiqui. Jan yohini jatihibi janon caman ta jahuen huisha jascabi jatihiqui, queyocahinyamahi.

¹⁹ Jaa copi ta huesti res Papan noque yohihi joibo potaxon caibo rihbi potamahax mia hashoan naman sca hiyayaxihqui. Jascajahax tah man Papan jihuetauhbox bi texe jahuen jihuetauhbo mentan hashoan jahuama sca jayaxihqui. Papan yohihi quescajaxon jaxon caibo rihbi jahuen joi haxemahax tah min hihti siri sca min jatihi, Papan jisi.

²⁰ Fariseoboya jaton haxemanicahbo mentan hashoan nincacoinnica hiyamahax tah man jahuentianbi Papan jihuematii janin nocotimahi. Jaa hen mato yohihi copi Papan joi queyotimahibo shinanbehnayamanahue.

Sinayamatii Jesusen yohihi

(Lc 12.57-59)

²¹ Noquen xenibo ta Papan yohinishqui: Min tah min joni huetsa rehtetimahi, hahquin. Jaa copi ta rehthei joni Papan casticanyaxihqui. Jaa joi tah man honanscái.

²² Man honanyamani joi sca tah hen heanbi mato nincamahi: Miin huetsa qui min sinataya ta jaa copi mia casticanti jatiqui. Jointi xahbanen hah min miin huetsa hichaquin jaiya ta tsiniquixon mia casticanti jaticaniqui. Shinanjoman hah min hichaquin jaiya tah min jaa copi chihi janin sca cati jaresscái.

²³ Jaa copi jahuabora pishca Papa hinancatsihxon shinanhue. Hinani joxon bi jano hinanti janinxon sca miin huetsan mihqui sirijaquin shinanyamahi shinanrenenxon, janobi miin hinanti jenebahinhue.

²⁴ Miin hinanti janobi jenebahini caxon miin huetsa pari sirijaquin yohuanquihnxahbe bexohue, hexohi sirixon sca miin hinanti pishca hinannoxon.

²⁵ Mia demandanaiboya bahin caquin bi histon bi res hahbe bexohue, mia tininti janin bomis. Tinintinin mia policiabihmaxon sipo xoboho mia tsahonah tah min hohmis hohmistihí.

²⁶ Yohicoin tah hen mia jai, jan mia yohihi tihibi copijanoxon caman tah min jano hihtihi.

Tsiniyamahahbo Jesusen yohihi

²⁷ Tsiniyamanahue Papan mato jai tah man honanrihbihi.

²⁸ Hean tah hen nea sca mato yohihi: Haibojisish hahbetan hihcatsihqui tah min miin jointi janin tsini sca jai.

²⁹ Jaa copi miin mecyaho beron mia hohchamahiya jaa miin bero tsecaxon potahue. Jayajoma hihqui siri que ma bi ta mia chihi janin moanma potahah hihti tiroma qui.

³⁰ Miin mecyaho mequeman yometsohtax hohchamis hihxon, mextexon potahue. Jayajoma hihqui siri que ma bi ta mia chihi janin moanma potahah hihti tiroma qui.

Haibo potatima Jesusen yohihi

(Mt 19.9; Mr 10.11-12; Lc 16.18)

³¹ Huetsa yohini joi jai: Miin haibo potaxon jahuen quirica hinanhue, min queenyamas-cái honanahbo.

³² Jascanihbaan bi tah hen hean mato yohihi: Jan tsinihi ma bi miin haibo potaxon tah min mianbi jaa tsinimahi. Huetsa jonin potahi haibo hihquihinax tah min miabi tsiniscai, hohchaya.

Quesatima Jesusen yohihi

³³ Huetsa noquen xenibaan yohini joi rihbi tah man honanscái: Noquen Hihbaan janen quenaxon yohiquin tah min parantimascái. Jahuen janen quenaxon yohihi tihibi tah min hahcointihí.

³⁴ Jasca janibaan bi tah hen hean mato yohihi: Noquen Hihbaan janen quenaxon yohitima tah man jai. Jahuabi quenaxonma yohiti tah man jai. Naihoh quehabo quenayamanahue. Jaa ta janoxon Papan yonohi qui.

³⁵ Mai mehabo quenahaxma rihbi yohuannahue. Jaabo ta jahuen hahqui tapiti qui. Jerusalen jema rihbi quenahaxma yohuannahue. Jaa ta quiquin hapon jema qui, Papan raanyaxihquiton jema.

³⁶ Miin mapo rihbi quenahaxma yohuanhue. Ni huesti boobi tah min joxocahinmatihi. Huisocahinmati rihbi tah min hahtipahyamahi, ni huestibi.

³⁷ Yohicatsihquin tah min yohirestihi. Jeenhihyamahax, Hihyamahi rahan hihreshue hihcoini yohuani. Jahuabora quenati shinanbo ta tiroma yoshiman shinanbo qui.

*Copiyamanahue hihqui Jesus
(Lc 6.29-30)*

³⁸ Huetsa yohini tah man honanrihbibi: Bero copiquin tah min bero poshabahintihi. Xeta copiquin tah min xeta potamatithi.

³⁹ Jascari janibaan bi tah hen hean mato yohihi. Mia tiromajahahbo bi tenereshue. Mecayaho mia bepasah bi ramihio sca jismahue.

⁴⁰ Mi demandanxon miin camiseta mia bichincatsihquiboya, hinanhue. Hinanxon miin coton rihbi hinanhue.

⁴¹ Mia yonoxon, Huesti hora hea papixonhue hahca, rabe hora jaa papixonhue.

⁴² Mia yocacah hinanhue. Hea hinantahhue hahca, Nea tah qui hahhue.

*Maton rahuibohon shinannahue hihqui Jesus
(Lc 6.27-28, 32-36)*

⁴³ Huetsa yohini joi tah man honanrihbibi: Miin hahbe jihuetaibohon queenxon bi tah min miin rahuibo jistahihmatithi.

⁴⁴ Jascari janibaan bi tah hen hean mato yohihi: Maton rahuibohon shinannahue. Mato tiromajahahbo bi jato yocaxonnahue.

⁴⁵ Jascajaquin jaax tah man maton naihoh queha Papan baquebo man jatihi. Jahuen barin ta jatihibi xabajaxonihqui, siriboya tiromabu. Jaan raanah ta hoi rihbi joxonihqui, siriboya betan tiroma jonibaan jenebihnon.

⁴⁶ ¿Matohon queenaibohon res man shinanaiya jahua Papan mato hinantihiquin? Coriqui cobrannicabaan bi ta jascajaquin jatohon queenaibohon res shinanihqui.

⁴⁷ ¿Maton huetsabo res man Johue hahcaya, man jaa copi hihti siriboya quin? Nahuabo ta jascapah qui.

⁴⁸ Hen mato yohihi nincacax shinancoinyahpanahue, maton naihoh queha Papa shinancoinyahpa hihqui quescaji.

6

Sirijaquin hahxoncoinhue hihqui Jesus

¹ Caibo yanapanquin hahcoinnahue. Jonibaan jisnon hihxon res man hahmis. Man hahxoncoinyamahiya ta maton naihoh queha Papan mato jahua hahxontimahiqui.

² Pishinaibo yanapannoxon jato pishca hinancatsihquin, tsoabi yohixonma hinancoinyahue, yanapancoinquin. Shinancoinlhcamhibaan hahcaya quescajayanahue. Jaabaan hinanai ta tsinquit xoboho jahuiho yohixon bahin cahiboh rihbi yohicaniqui, siri joni hihqui shinanahbo hihxon. Nincanahue hen mato yohinon: Jato qui siripi yohuanai pishca res ta jatihibi. Papan ta jato jahua hahxontimahiqui.

³ Jaa copi tsoabi yohixonma hahxoncoinhue, miin huetsa bocabi tah min yohitimihi.

⁴ Tsoan honanahma bi joni huetsa min yanapancoinaiya ta Papan mia jisiqui. Jaan ta mia hashoan siriboya sca hinanyaxihqui qui.

*Papa yocati Jesusen haxemahi
(Lc 11.2-4)*

⁵ Papa yocanoxon tsinquitax, shinancoinlhcamhibaon quescayamanahue. Huetsabaan jato jisnon hihquish ta tsinquit xobohoxon yocati queencaniqui. Jano jonibo huinotai janin nihxon rihbi ta yocati costancaniqui, caibaan jato jisnon hihquish. Nincanahue hen mato yohinon: Papan ta jascapahbo jahua hahxontimahiqui.

⁶ Papa Dios yocacatsihquish, tsoa jano yamahi janin chiqueho hihquish, xehpoti xehpoxon, Papa yocahue. Jaan ta mia jisiqui. Mia ta hahxontihiqui.

⁷ Tsinquixon Papa yocquin, yanca res joi tsamanyamaribinahue. Nincancoinyamahiya hahcaya quescajayanahue. Joi tsamanxon Dios nincamati shinan ta jacaniqui, jascajati que ma bi.

⁸ Jaa copi jaabaan yohihi quescayamanahue. Man yocariyamahi bi ta maton Papan jahua man pishinain hihxon honanscaiqui.

⁹ Jaa copi nescajaquin yocanahue:

Noquen naihoh queha Papan, mia Papa Dios jai honanahbo jahue.

¹⁰ Miin jihuetaiboo non janon, noque hihbojahue. Min nai hoque hahcaya quescajaquin neno rihbi hahhue, mia queenai quescabijaquin.

¹¹ Nea neten piti noque hinanhue.

¹² Noquen hohcha rihbi sohuahue. Noque qui tiromahibaan bi tah non jaa shinanxonma jato sirijaquin yohuanquihni. Jascajaquin rihbi noquen hohcha sohuaxon jaa shinanyamascahue, Papan.

¹³ Satanasneno noquen coshi tanatihi janin noque hioyamahue, Papan. Satanasneno noque bishmayamahue.

¹⁴ Joni huetsa mato qui tiromahi bi jaa tiromahi man shinanxonma sirijaquin yohuanquihniya ta maton naihoh queha Papan rihbi man tiromahi shinanyamahiqui.

¹⁵ Mato qui tiromahibo man shinanparihiya ta maton hohcha rihbi maton Papan shinanparihiqui. Jaa copi hen mato yohihah quescajaquin yocanahue.

Piti tenehibo

¹⁶ Piti tenecatsihquin shinanihcamañibio quescajayanahue. Benati hihcamahax ta behcachacanix huetsapahcaniqui, caibaan jato jisnon hihquish. Nincanahue hen mato yohinon: Papan ta jato jahuabi hahxontimahiqui.

¹⁷ Piti tenecatsihquin jaabaan hahcai quescahaxma bohuexehtax bepanohtax nihnahue.

¹⁸ Man piti tenescái jismaxonma maton Papa huestichin mato jisnon hihxon hahnahue. Jatihibi jisnicahxon ta maton Papan mato hahxonyaxihquiqui.

Naihoh Papan bexojaxonai

(Lc 12.33-34)

¹⁹ Mai meha jahuaborabo hichajanoxon tsinqui tsinquiyamanahue. Mai mehabo ta mahsaman pihiqui, yamibo rihbi ta pohihiqui, texe rihbi ta yometsohbo hihquixon bohancañiqui.

²⁰ Naihoh caya bexojahanahue, janó hicha jayanoxon. Jano ta mahsamanbi pitimahiqui, jahuabi rihbi pohiyamahi, jahuabi rihbi tsoanbi hihquixon bichinyamaquin.

²¹ Jano man bexojahi janin tah man maton shinan camatihi. Jaa copi tah hen mato yohihi.

Noquen jointi xabajahi joi

(Lc 11.34-36)

²² Noquen shinan ta noquen bero quesca qui. Noquen bero siripan jisquin hahcajaquin tah non noquen shinan siripan shinanax nichí. Yohuashiyamahi.

²³ Miin bero tiromayaxon jiscatsihxon min jaamajaquin jisi quescajaquin rihbi tah min tiroma shinaman shinanax yohuashihscai. Jascapa shinanyahpahax tah min bahquish chian baneparihi, hihih yametai janin.

Noquen Hihbo huesti hahxonti

(Lc 16.13)

²⁴ Patoroyapascaxon tah min jaa sirijaquin teexonhanan huetsa patoro rihbi jaatianbi sirijaquin teexontimahi. Huetsa queenxon bi tah min huetsa sca jistahihmatihi. Jascayamaxon tah min huetsa sca hahxonquin sirijaxon bi huetsa rihbi nincayamascatihi. Jascajaquin rihbi tah man jahuaborabo tsamannoxon janó maton shinan camahahnan, maton Papa Dios teexontimahi.

Papan jahuen baquebo coiranai

(Lc 12.22-31)

²⁵ Jaa copi tah hen mato yohihi: Maton piti copi masa shinanyamanahue. Jahua hen piyaxihquin jahua hen xehayaxihquin hihxon masa shinanyamanahue. Jahua hen sahueyaxihquin hihyamaribibi. ¿Pihí res non jihuetaín? ¿Chopa sahuenoxon res non yora Jain?

²⁶ Hihsbabo jai shinannahue. Jaabaan ta banayamahihqui. Tsinquiyamaquin. Piyanoxon jahuenbi rihbi bexojayamaquin. Maton naihoh queha Papan ta jato coiraniqui. Mato rihbi ta hahxontihiqui. Mato tah man pehiyahpabo mentan hashoan copi qui.

²⁷ Heen shinaman bi hashoan queyanihpan hihquish bi tah min jahuabi queyanih-timahi.

²⁸ Jascajaquin rihbi ta chopá copi masa shinanah yanca res qui. Joa siribo jenquetsax hanihiquin hihxon shinannahue. Jahuabi ta teeyamacaniqui. Toroxahcaxma bi ta siri chopayahpa quesca hihi siribo qui.

²⁹ Hen mato yohinon nincanahue: Quiquin hapo Salomon hicha chopá siribo japahonish bi ta jahuen raotiyahpahax huesti joa betan senenyamanishqui.

³⁰ Nihi naman joabo hicha joconax cainipi bi tah non huajaxon jato coharesai, copima copi. ¿Copí que ma bi Papan jato sirijati shinannihxon mato sca jan hashoan sirijaxonti shinantimahiqui? Jaan mato hahxonti honancoinnahue.

³¹ Jaa copi masa shinanyamanahue. Hahrai, jahua non piyaxihquin, Jahua non xehayaxihquin, Jahua non sahueyaxihquin hihxon masa shinanyamanahue.

³² Nincayosmabaan ta jascajaquin masa shinaniqui. Mato tah man jascajatimahi. Man pishinai ta maton naihoh queha Papan jatihibi honanscapiro.

³³ Papan jihuetahbotti pari shinannahue. Jahuen jihuetahxon jaa queenajatibo pari shinannahue. Jaatian ta man pishinaibo jaan mato hinantihiqui, jatihibi.

³⁴ Jaa copi, Bahquish jahua jayaxihqui qui hihxon masa shinanyamanahue. Bahquish jayaxihqui bo nocohihnataya pari tah man jaa tenetihi. Man bahquish teneyaxihqui tah man rahma shinanti pishinyamahi.

7

*Joni huetsa non join namanjatimahi
(Lc 6.37-38, 41-42)*

¹ Min hahcai quesajayamaquin caibaan huetsapahaquin hahcai jisish, Jaa ta tiroma joni qui hiyamahue, min shinanai quescajaquin rihbi Papan mia jascajaribixonnon.

² Man huetsa joni jisxon shinanai shinaman ta Papan rihbi mato jascajaquin rihbi yohitihiqui. Man caibo hahxonan quescajaquin rihbi ta Papan mato hahxontihiqui.

³ ¿Miin bero qui jihui jai bi miin huetsan bero qui jai poto pishca min jistihin? Miin bero qui jai jihui pari shinanhue.

⁴ ¿Miin bero qui jihuinhuan jaiya miin huetsa min yohitihin, Miin bero qui jai poto pishca hen tsecanon tenehue hah min jatihin? Min tah min jascatimahi.

⁵ Jisyamaxon bi jahuen poto tsecacatsihquin tah min hahcoinicamahi. Miin bero qui jai jihuinhuan pari potahue. Jaatian tah min jisti hahtipahscaxon jahuen bero quiha jaa poto pishca tsecatihi.

⁶ Papa qui hinantibo hochiti qui hinanyamanahue. Maton hihti copibo rihbi cochi hinanyamanahue. Man hinanah, jaa jama jamaxon mato sca picamnis.

*Non yocacah Papan noque hinantithi
(Lc 11.9-13; 6.31)*

⁷ Papa Dios yocanahue jan mato hinannon. Manotaibo bena benaquin quescajaquin yocanahue jan mato meramanor. Jahuen xehpoti ton tonhahquin hahcajanahue yocaquin jan mato hinannon.

⁸ Yocanica rahsichin ta bihtihiqui. Benanicaten ta meratihi qui. Ton tonhahnica ta Papan hinantihiqui.

⁹ ¿Miin baquen mia piti yocacah bi macan sca min jaa hinantihin? Jascapa bebo ta yamahihqui.

¹⁰ ¿Min mishquitanai yapa mia yocacah min rono hinantihin?

¹¹ Man tah man jascapahbo hinantimahi. Jaa copi shinancoinnahue. Tiromabxon bi maton baquebo siri jahuaborabo hinanti man honanaiya, ¿maton naihoh queha Papan mato hashoan siribo rihbi hinantimahiquin man yocacah?

¹² Jaa copi nea shinan bihnahue: Hea hahxonnahue jacatsihxon jato pari jascajaquin hahxonhue. Moisesnin huishani ta jascarihi qui. Texe Papan joi yohinicabaan huishani, jascarihihi.

*Papan bahi hexti pishca
(Lc 13.24)*

¹³ Papan bahi qui hihquiti ta hexti pishca qui. Jano hihquinahue. Queyonicabo janin cahi bahi ta hihquiti haniyahpa qui. Jaa bahi ta hihtihosi bahi qui, jahan cahibo rihbi hicha.

¹⁴ Papan jihuetahbilo janin cahi bahi ta hexti pishca cainih qui, jahuen bahi rihbi hanitahma pishca. Jahan cahibo ta hicha yamahiqui.

*Bimi jisxon non jihui yora honanai
(Lc 6.43-44)*

¹⁵ Papan joi yohiquin bi quesajahibo qui coiramenahue. Maton huetsabohihcamahax ta bemacanya mato quescapahbo qui. Mato paranxon ta mato tiromajascatihiqui.

¹⁶ Jaa copi jenquetsih jihuethquin hihxon jaton shinan honanquin sirijanahue. Pani moxa quiha ta tsoanbi xeson bimi bihtimahiqui. Bocon jihui quiha rihbi ta tsoanbi binon bimi bihyamahiqui.

¹⁷ Jascarihihi ta jatihibi siri jihui bimi siriyahpa qui. Xanascai jihui ta tiromabo bimiyahpa rihbi qui.

¹⁸ Siri jihuini ta jahuen bimi tiromajati hahtipahyamahiqui. Xanascai jihui rihbi ta siri bimiyahpatimahiqui.

¹⁹ Bimi sirijoma jihui jatihibi ta Papan reraxon cohayaxihqui qui.

²⁰ Jascajaquin jaton bimi tanaxon jihui yora honanquin hahcajaquin mato qui nocotaibo honannahue, jaton shinan honanquin.

*Papa janin nocoyamahibo
(Lc 13.25-27)*

²¹ Hea Hihbon Hihbon hahcaibo ta caibo Papan jihue janin nocoyamayaxihqui qui. Heen naihoh queha Papa queenai quescajahibo res ta jano nocotihqui.

²² Jato casticanti nete nocotaiya ta hichaxon hea quenayaxihqui qui: Hihbon, Hihbon. Miin janen tah non jonibo miin joi yohinihqui. Tiroma yoshinbaan joni hihbojahiya tah non miin janen sca jaa tiroma yoshinbo camanihqui. Miin janen tah non hicha hahan rahtetibojaniqui, Hihbon.

²³ Jaatian tah hen jato yohiyaxihqui: Mato tah hen jahuentianbi honanyamanihqui. Nenohax botannahue, tiromahibaan.

Xobojahi rabe

(Lc 6.47-49; Mr 1.22)

²⁴ Caibo jascapahbo copi tah hen nea mato yohihi: Hean yohihi joi nincaxon hen yohihi quescabijaquin hahcai joni ta shinanyahpia qui. Shinanyahpaton hahni quescajanica. Shinanyahpaton ta xobo jihuibo nichinnoxon mixan mai caman poquinxon xobojanishqui.

²⁵ Hoi sca ta quexto paquenishqui. Jenenhuan sca jahui. Nihue rihbi coshin bi res jahui. Jene betan niuhuen tsahca tsahcaxon bi ta jaa xobo potayamanishqui, mixan mai caman jahuen xobo jihui nichinipi quen.

²⁶ Hean yohihi nincaxon bi hen yohihi quescayama jaibo ta jascapahmabo qui. Jaabo cahen honanma joni quescapahbo. Honanmanen cahen neminma poquinxon mashin xobojanish.

²⁷ Jaatian ta hoi quexto paquenishqui. Jenenhuan jahui. Nihuenhuan rihbi jahui. Joxon jahuen xobo hueranxon poxabahinquin. Champacahinax ta xobo metisihscanishqui.

²⁸ Jesusen jato jascajaqun haxemaha ta tsinquijaquetaibo rahte rahtenishqui.

²⁹ Jaton haxemanicahbaan haxemaha quescajayamaquin bi ta yohiti shinan Papan hinanah jaanbi honanxon jato yohinishqui. Jaa copi rahtecani.

8

Sipiyah Jesusen rohajani

(Mr 1.40-45; Lc 5.12-16)

¹ Jato haxemahax, mahchi janinhax botopaqetax jahuiya sca ta hicha jonibo hahqui tsinquijaquexon chibancanbihnashqui.

² Jahuiton sca ta huesti sipiyahpa joni behchili cahax jaa bebonbi betihihpaquexon, yohinishqui:

—Hihbon. Mian tah min hea rohajati hahtipahi. Jeenhihxon res tah min hea rohajatihi, Hihbon —hahquin.

³ Sipiyahpa mehexon, Jesusen sca yohiquin:

—Jeen. Roha sca jahue —hahquin. Jan yohihitianbi ta sipiyahpa rohacahinnishqui.

⁴ —Hen mia yohinon nincahue. Tsoabi yohihaxma caxon sacerdote jismatanhue. Moisesnin yohini quescabijaquin hinanti pishcaya cahue, rohascaxon hinanti. Jascajaxon tah min jato nincamatih —hahscaquin Jesusen.

Capitanen joni Jesusen rohajahi

(Lc 7.1-10)

⁵ Capernaum jema janin sca nococani. Jema janin nocotaiya bi ta sontaro capitan joxon hilti yocanishqui.

⁶ —Hihbon, heen joni ta yoran honanyamajaqueta tax heen xoboho racatihqui. Hihti hisin ta jaiqui —hahquin.

⁷ —Hen tah hen rohajahi cahi —hahscaquin Jesusen.

⁸ —Hea tah hen jahuama qui, Hihbon, heen xobo janin mia mapeti tah hen rabinai. Min rahna nichi janinxonbi yohihue. Min yohihah ta heen joni rohanoxihqui qui.

⁹ Hen tah hen honanai. Heen hapon hea yohihah tah hen hahcai. Heen sontarobo rihbi tah hen jai. Cahue hean jaah ta heen sontaro cahiqui. Huetsa hen Johue hahca ta jahuiqui. Heen joni rihbi tah hen Nescajahue hahcai. Yohihah ta heen yohihi quescajaquin hahqui qui —hahscaquin capitanen.

¹⁰ Capitan yohuanai nincacax ta Jesus rahtenishqui. Chibanaibo sca yohiquin:

—Mato yohinon nincanahue. Nescapa shinancoinnica tah hen mato Israeli baquebo merayamahi.

¹¹ Mato tah hen yohihi, nincanahue. Hocho quehax ta maton nahuabo beyaxihcanihqui, caibo bari cainai quirihax, caibo bari hihquihi quirihax. Bexon ta Papan jihuetauhboxon jahuen jihue janinxon Abraham betan piyaxihcanihqui. Isaaque betan Jacobo rihbi ta fiestajaquin manayaxihcanihqui.

¹² Papan jihuetauhbo man hihihi bi ta bahquish chian mato potayaxihqui qui, jahuen jihuematii quiyah. Jano tah man coshin huaohihsanan xeta yeresahyaxihqui.

¹³ Jato jascajaxon, capitán sca yohiquin:

—Cahue. Min hihcoinjaquin shinanai quescabijaquin tah hen hahxonai —hahquin. Jaatianbi ta jahuen joni rohacahinscanishqui.

Pedron haita Jesusen rohajahi

(*Mr 1.29-31; Lc 4.38-39*)

¹⁴ Jaa pecaho ta Pedron xobon sca mapexon Pedron haita yona yonatai Jesusen meran-
ishqui, hisini racatai.

¹⁵ Jahuen mequen qui Jesusen mehehah ta yona tantiscanishqui. Rohacahinax huenixon
jahuen haitan jato pitijaxonquin.

Hicha hisinaibo Jesusen rohajahi

(*Mr 1.32-34; Lc 4.40-41*)

¹⁶ Huetsa neten bepichaiya sca ta yoshiman hihbojahib hihuecannishqui, hihti caibo.
Hisinai rahsi. Yohixon res ta jaton tiroma yoshinbo potanishqui. Hisinaibo rihbi roha-
jaquin, jatihibi.

¹⁷ Jascajaquin ta Papan joi yohinica Isaíasnen yohini quescasca janishqui: Noquen
hisinbo ta jaanbi bichinxonnishqui. Non hahan hisinaibo jaan potaxonquin hihqui Isaías
joi.

Jesus chibancatsihquibo

(*Lc 9.57-62*)

¹⁸ Jonibo hahqui tsamajaquetai jisxon:

—Hoque quexa canon bonahue —Jesusen hahquin jahuen haxenicabo.

¹⁹ Cahi cahiya sca, jaton huisha honan huesti joxon Jesus pataxxon, yohiquin:

—Jatihibi janin min cahi tah hen mia manahi catihi, Maestron —hahquin.

²⁰ —Mari ta mai quiniyahpa qui. Hihsabo rihbi ta nahayahpa qui. Hea cahen jas-
cayamahi. Hea noque baque cahen jano hoxati yamahan —hahscäuín Jesusen.

²¹ Huetsa rihbi sca jahuen haxenica jahui. Joxon:

—Hihbon, mihbetan capanan tah hen heen papa muhuataiya mihinax pari hen cayaxi-
hqui mihbetan —hahquin.

²² —Hea manahi jotatahhue. Hahbe muhuayaxihquiaan muhuataibo mihinnon jene-
hue —hahquin Jesusen.

Nihueyahpa behchon Jesusen tantimahi

(*Mr 4.35-41; Lc 8.22-25*)

²³ Jaatian sca, nontin nanetaiya, jahuen haxenicabo rihbi hahbetan naneti.

²⁴ Cahiboya sca nihuehnhan jahui. Behchon hanibo nihuen potajaquetana nonti
mahpohah nonti hihquicatsihscái. Hihcax bi Jesus racapaquetax hoxascái.

²⁵ Mohinxon sca yohicanquin:

—Non tah non hihquihi, Hihbon. Noque jahueja ra jaxonhue —hahcanquin.

²⁶ Mohinaho sca:

—Jahua jenquetsh man raquetain? Hihcoinai shinanxon bi tah man hicha nincayamahi
—jato jaquin. Huenixon sca nihue yohixon hian rihbi yohiquin tantiscababo. Yohihah,
tanticahinscái. Siriscái.

²⁷ Hian tantihi jisish, rahte rahtecani.

—Jahuentiho coshiyahpa cohren jaa quin? Hianbocabi ta yohihiqui. Nihue rihbi ta jaan
yohihiqui —hihcái.

Gadara janinhah yoshinyahpa

(*Mr 5.1-20; Lc 8.26-39*)

²⁸ Hoque quexa sca nococani, Gadara mai janin. Mapetaiya sca jaa behchihi rabe joni
jahui, yoshiman hihbojahib joni rabe. Tsahon tocan mehax rabebi jahui, sinabo rabe, hihti
coshi. Sinataibo copi ta jano huinotai bahin tsoabi cati hahtipahyamapahonishqui.

²⁹ Sai saihhxon coshin quenacanquin:

—Jahuejahi min noque jai jahuin, Díosen baquen? Noque potati nete nocorihyamahi bi
min noque potahi joresscain? —hahcanquin.

³⁰ Jaa hoque tocan ta hicha cochi repinica píhi nihniinishqui.

³¹ Jaa cochibo qui sca hihquinoxon, yoshinbaa hihti yocascaquin:

—Noque potaxon, hoa cochibo qui noque raanhue —hahcanquin.

³² —Botannahue, tahca —hahscäuín. Jaa janibo jenebahini sca cochi qui sca bocani.
Yoshin jato qui nocotah, cahi, bishquihhcanahi cahi, tirisihpaketax jene qui paquetax
hahscáni, jatihibi.

³³ Jaton cochi coirannicahbo sca jabacahini caxon jema janin yohibonaquin. Jatihibi
yohicanquin, yoshinyahpa hihpahoni rabe rohascái yohirihbicancuin.

³⁴ Yohihahbo picoscacani, jano jihuetaibo jatihibi. Jesus behchihi caxon, meraxon:
–Noquen maibo jenebahini catatahtanhue –hahcanquin.

9

*Yora honanyamajaquetai Jesusen rohajahi
(Mr 2.1-12; Lc 5.17-26)*

¹ Nanetax sca, pohquequihranax Jesus jano jihuepahoni jema qui sca nococani.

² Jano ta yora honanyamajaquetax racatai joni sca Jesus qui hihuecannishqui. Jahuen racatininbi huaquehinhixon hihuecanquin. Jaa jan jato rohajaxontihi shinancoinai jisxon, racatai joni Jesusen yohiquin:

–Raqueyamahue, baquen. Miin hohcha tah hen sohuaxonai.

³ Jan jascahiya, jano jai jonibo shinamehti, jaton huisha honanbo. Jaton jointinin yohuancani. Nea joni ta Dios yohuanihcamahi yohuanihqui, hihcansi.

⁴ Jahua jaton jointinin shinanihquin honanxon, Jesusen jato yocaquin:

–¿Jahua copi man maton jointinin tiromajaquin shinanain?

⁵ ¿Jahuemeha hashoan teema yohiti quin? ¿Miin hohcha tah hen sohuaxonai hahquin?
¿Huenihihnatxa nihaquetanhue hahquin?

⁶ Jaabi, noquebae hihxon hean mainxonbi hohcha sohuaxonti hahtipahi honanxon, jisnahué –hahxon sca, yoran honanyamajaquetai yohirihbiquin:

–Huenihihnatxa miin cacajati bihbahini miin xobon catanhue –hahquin.

⁷ Jascahah, huenicahini jahuen xobon cahi.

⁸ Jaajisibo ta rahte rahtenishqui. Rahte rahtetax bi noquen Papa qui siriresi yohuancani.

–Noquen Papan coshin hahxonai tah non jisi. ¿Yotihco coshi Papan jaa hinanihquin? –hihcansi.

*Jesusen Mateo quenahi
(Mr 2.13-17; Lc 5.27-32)*

⁹ Janohax caxon, tininti cobranxonai joni Jesusen meraquin. Jano tsahoxon cobranti misa janin tsahotaiton meraquin Mateo janeya joni. Meraxon:

–Hehbe cahi johue –hahquin. Jascahah, huenicahini jaa manahi cahi.

¹⁰ Jaatian, Mateon xoboho pih cahax, pihiboya hicha jonibo jato manahi becani, cobranxonnicabo betan hohchayahpabo. Pihi benahue hahca becani. Jahuen haxenicabobo betan Jesusen pihiya jato manahi becani.

¹¹ Jascapa mesco jonibo jisxon sca, fariseobaan jahuen haxenicabobo yocaquin:

–¿Jahua copi cobrannicaboya hohchayahpabo betan maton haxemanicahten pihiquin?

¹² Yocacaibo nincaxon, Jesusen jato yohiquin:

–Hisinyamahiboa ta rahonnica pishinyamahiqui. Hisinyahpabo caya ta rahonnica pishiniihqui.

¹³ Nea huisha joi jahua hihcatsihquiquin honantannahue: Man joni huetsahon shinanti tah hen queenai. Maton hohcha copi man hea jahuara hinanti tah hen queenyamahi. Jaa huisha honantannahue. Pontebo quenahima bi tah hen pontemabo quenahijoniqui –jato jaquin.

*Non piti tenetihin hihquibo
(Mr 2.18-22; Lc 5.33-39)*

¹⁴ Jaa pecaho sca Juanan haxenicabobo Jesus qui nocoti. Nocoxon yocacanquin:

–¿Jenquetsahpahi noquen non hicha piti tenehi bi miin haxenicabaan piti teneyamahiquin? ¿Jenquetsahpahi fariseobaan rihbi hicha piti tenehi bi miin haxenicabaan piti teneyamahiquin? –hahcanquin.

¹⁵ Jascahahbo Jesusen jato yohiquin:

–Jaton huetsa huanomahia caxon ta tsoanbi huanomahanan benáyamahiqui. Huetsatian ta jaton huanomati yamascatihiqui, Papan jato bichinah. Jaatian pari ta piti teneyaxihcanihqui.

¹⁶ Chopayohi honacatsihquiu tah non hotsihahma chopabehna bihxon jayaxon coton payo honayamahi. Jayaxon honahah bi ta hotsiscaxon chopabehnapan payo huaxarihbiscatihiqui, hashoan hani sca jahuen huaxa janon.

¹⁷ Noquen xehati behna rihbi tah non bichi borasa payo qui bochojayamahi. Non bochojaha bi ta xehati pahescaiyi borasa pohtoshihihiqui, noquen xehati yohyocohscanon, noquen borasa rihbi tiromascanon. Behna borasa qui tah non behna xehati bochojahi, rabebi manoyamanon.

*Chixanan hisinai haibo Jesusen rohajahi; hihresscαι xontaco Jesusen teehihmahi
(Mr 5.21-43; Lc 8.40-56)*

¹⁸ Jesusen jato jascajaquin yohihiya bi huesti hapo nocoti joxon, raboxonen tisquihapauxexon yohiquin:

—Heen baque haibo ta rahma hea muhuaxonaxqui. Jaabi cahue. Miin mequeman mehexonhue. Mian mehehah ta teehihribitihiqui —hahquin.

¹⁹ Jan jascahah, huenicahuanax hahbetanbi Jesus cahi. Jahuen haxenicabaan rihbi chibanhabinquin.

²⁰ Bobibaan bi huesti haibo rihbi cahi, Jesus pataxcatsihqui. Doce bari sca jimi pota potahi haibo. Hachonbi caxon jahuen coton quexa mehequin.

²¹ Jahuen coton res mehehexah tah hen rohatihu hihxon, mehequin.

²² Jaatian rabejaquexon jaa haibo jisxon, Jesusen yohiquin:

—Raqueyamahue, baquen. Shinancoinax copi tah min roha sca jai —hahquin. Jaatianbi ta haibo rohanishqui.

²³ Jaatian hapon xoboho Jesus mapeti. Rehue hahcaibo betan corotaibo tsamatai meraxon:

—Botannahue. Xontaco ta muhuayamahaxqui. Hoxa res ta jaiqui —jato jaquin. Jato jascahah bi hosan hosancanquin.

²⁵ Tsamataibo picohax, chiqueho hihquixon, xontaco mehuetanah, huenicahuani.

²⁶ Jan jascajaquin jaa teehihmahah ta jaa mai jatihibi janin yohuanchanicananacnishqui, jano jihuetaibo.

Rabe benche Jesusen rohajahi

²⁷ Janohax Jesus cahiya sca benche rabechin chibannxon quenabonaquin.

—Noquehon shinanhue, Davidi baquen.

²⁸ Jahuen xoboho Jesus nocotah pecaho sca benche rabe rihbi nocoti.

—¿Hen mato hahxonti man shinancoinain? —jato jaquin.

—Shinancoinquin rahan, Hihbon —hahcanquin.

²⁹ Jaton bero mehexon sca:

—Man shinanai quescabi janoxihnahue —jato jaquin.

³⁰ Jato yohihah, jisresscakanquin.

—Tsoabi yohiyamanahue, mato tah hen yohihi —Jesusen jato jaquin, hihti yohiquin.

³¹ Yohiyamahue hahca bi ta janobo jatihibi janin caxon jan jato hahxonah yohibonacan-nishqui.

Joyo Jesusen rohajahi

³² Jaa benche rabe jahuen xobo janinhax picotaiya bi ta joyo joni hihuecannishqui, yoshiman hihbojahi joni.

³³ Jahuen yoshin potamaha ta yohuanscanishqui. Jaa copi ta tsamajaquetaibo rahtenishqui.

—Jascajaquin hahcai joni ta noquen xenibaan jahuentianbi jisyamanishqui —hihcani.

³⁴ Jascaraibaan bi fariseobo jascayamahi:

—Tiroma yoshiman yanapanan ta yoshinbo camahihqui —hihcani.

Jatohon Jesusen shinanai

³⁵ Jano jai jemabo jatihibichin ta Jesus nihnishqui, hani tahma jemabo janin rihbi. Jaton tsinquitxi xoboho jato betan tsinquipon jato honanmaquin. Papan jihuematic nete ta nea pishca sca jaonahiqui jato nincamaxon jaton hisinbo jatihibi rohajaquin. Jatihibi yosmahibo sirijaquin rohajaquin.

³⁶ Tsamataibo jisxon ta jahuen jointinin jatohon shinannishqui. Jaan jisi ta tiromajaquin rishquiha quescapahbo jacannishqui. Jaton coirannica yamahiya carnerobo jabaisai quescapahbo.

³⁷ Jato jisxon ta jahuen haxenicabo yohinishqui:

—Papa bihxonquin tsinquitxi ta hicha qui. Tsinquinica bo res ta hichayamahiqui.

³⁸ Jaa copi tsinquimanica yocanahue hashoan hicha jan raannon, jahuen tee hahxonibehábo.

10

Jahuen haxematibo Jesusen caisai

(*Mr 3.13-19; Lc 6.12-16*)

¹ Jaa pecaho sca jahuen doce haxenicabo quenamaxon, hahan yoshin tiroma potati coshi jato hinanquin. Hisinaibo rohajati coshi rihbi hinanxon, yosmahibo coshijati rihbi hinanquin.

² Jahuen haxenicabo ta doce janishqui. Jato bebohi ta Simon janeya janishqui, Pedro ca, jahuen jane huetsa. Huetsa cahen Andres, Simoman jochica. Huetsa cahen Jacobo, Zebedeo baque. Huetsa cahen Juan, Jacobon huetsa.

³ Huetsa cahen Felipe. Huetsa cahen Bartolomé. Huetsa cahen Tomás. Huetsa cahen Mateo, coriqui cobrannica hihpahoni. Huetsa cahen Jacobo, Alfeon baque. Huetsa cahen Tadeo.

⁴ Huetsa cahen Simon, Cananica hahcaibo. Huetsa cahen Judas Iscariote. Jesus paranxon bihmaní.

*Yohitannahue jan jato jaii
(Mr 6.7-13; Lc 9.1-6)*

⁵ Jaa rahsi jahuen doce haxenicata Jesusen raannishqui.

—Nahuabo qui cahi bahin boyamanahue. Samaritano jemabo janin rihbi boyamanahue.

⁶ Janoboma bi Israeli baquebo qui botannahue. Jaabo ta noquen behnotai yohinahbo qui, carnero hahcaibo.

⁷ Jato qui caxon yohinahue, Papan jihuematica nete ta nea pishca sca jaonahiqui hahquin.

⁸ Hisinaibo jaiya, jato rohajanahue. Mahuataibo teehihmanahue. Sipiayhpabo rohajxon sirijanahue. Yoshin tiromabo rihbi potanahue. Mato tah hen jaa coshi hinanresai. Jahuabi copi yohixonma jayaxon jato hahxonresnahue.

⁹ Jaya cati coriqui bifyamanahue. Coriquijoma tah man catihi, hanibo boxonma coriqui romishin boyamaribinahue.

¹⁰ Jaya cati borasa rihbi tah man botimahi. Coton huetsa boyamaquin. Zapato huetsa rihbi boyamaquin. Mepiti rihbi boyamaquin. Maton tee copi ta nincacaibaan mato pimatihiqui. Jaa copi tah man jaa rahsi botimahi.

¹¹ Jema qui nocoxon jaa hihyamahiya xobo qui nocoxon tsoa jano shinanyahpa joni jaquin hihxon jato yohinahue. Jano mato Benahue jaibo janin jihuetahxon jato nincamatuhue. Caribinoxon caman jaa xobohobi hoxanahue.

¹² Xobo qui mapenoxon jano jaibo yohinahue: Papan mato hahxonnon hahquin.

¹³ Mato Mapenahue jaiboya ta Papan jato hahxontihiqui, man yohihah quescajaquin. Mato Mapenahue jayamahiboya ta Papan jato hahxontimahiqui.

¹⁴ Jano mato nincacatsihyamahibo janinhax caxon, jeman nihxon maton zapato qui hueotai mai poto jato qui tahabahintannahue, jaton mai poto bocabi boyamanoxon.

¹⁵ Hen mato yohicoinnon nincanahue: Nete queyotaiya ta Sodon jema janin jihuepaniboo casticanxon, Gomorra jema janin jihuapehaniboo casticanquin bi hashoan hihti-jaquin jaabo mato nincacatsihyamahibo Papan casticanxyaxihquiqui.

Noque tiromajayaxihquibo

¹⁶ Jistahi man. Hinobo tocan carnerobo canon quescatah hen mato raanai. Jaa copi honanbo hihnahue, ronobo honan hihqui quescari. Hihcaxbi joni piyosma nobex hihqui quescari tiromabojatimabo janahue.

¹⁷ Jonibo qui coiramenahue. Mato bihxon ta jaton tintintibo qui mato hinantihiqui. Jaton tsinquitxi xobohoxonbi ta mato rishqui rishquiyaxihquiqui.

¹⁸ Jaton hapobo qui ta mato botihiqui, jaton quiquin hapobo qui rihbi ta mato botihiqui, man heen jihuetahbco copi. Jano tah man heen joi jato nincamaxon, nahuabo rihbi man nincamatih, Hen tah hen honanyamanihqui, Hihbon hihyamahabo.

¹⁹ Mato bihmahah, masa shinani *¿jahuá* hen yohitihin, jenques hen jatihin yohuani? Jayamanoxahnahue. Papan ta mato yohuanti shinamatihiqui man jato yohinon.

²⁰ Man jaatian yohuanyaxihqui ta matonahma qui. Dios Yoshin ta maton janaya yohuanyaxihquiqui.

²¹ Heen joi nincacai copi ta huetsa jahuen huetsanbi hapobo bihmatihiqui rehtehahbo. Huetsa rihbi ta jahuen papanbi jascajaribithiqui. Caibo rihbi ta jaton baquebaanbi jato rehtetihiqui, jato qui sinaxon.

²² Man heen janen cahi quen ta jatihibichin mato jistahihmatihiqui. Mato jascjahibaan bi ta hen mato jihuemanoxon bihtihi. Hen jonon caman man tenehiya ta hea janin sca Papan mato jihuemayaxihquiqui.

²³ Jaabi, mato tiromahiboya huetsanco botannahue. Yohicoín tah hen mato jai: Israeli jemabo jatihibi janin man cariyamahi bi tah hen joribiyaxihqui, hea noquebaque. Jaa copi tah hen mato yohihi: huesti jema janin mato tiromajahiya huetsa janin sca botannahue.

²⁴ Haxenica ta jahuen haxemanica mentan hashoan siri hihyamahiqui. Teexonnicaah rihbi ta jahuen patoro mentan hashoan hapo hihyamaribihiqui.

²⁵ Maton haxemanica tiromajapahoniboya mato rihbi sca jascjahibaan bi jenimanahue. Maton hihbo tiromajapahoniboya mato rihbi jascjahabaan, heen hihbo jascáhahniboo quesa cahra hea jacanihquin hihquish jenimanahue. Tiroma yoshiman hah

ta hea jacanihqui xobo hihbo que bi. Hea jascajahiboya ta mato heen teexonnicaahbo hashoan rihbi sca jacantihiqui.

*Noquen Hihbo huesti qui raqueti
(Lc 12.2-9)*

²⁶ Jaa copi jato qui raqueyamanahue. Jonexon hahcaibo jatihibi ta Papan janibijayaxi-hquiqui. Jonetax yohuanai joi jatihibi ta jaabo yohuanai Papan janibijaquin nincamayaxi-hquiqui.

²⁷ Hen mato yamebo yohihi joibo neten rihbi jato yohiyaxahnahue. Hen baxexi jai joibo rihbi coshin nincamayaxahnahue.

²⁸ Rehtenoxon caman mato yora tiromajabahinti hahtipahibio qui raqueyamanahue. Maton yoshin ta jahuejati hahtipahyamacaniqui. Mato rehtexon bi maton yoshin rihbi chihi janin potati hahtipahi ta huesti qui. Hahqui caya raquenahue.

²⁹ ¿Huesti soro copi non rabe hihsa romishin maroyamahin? Copi que ma bi ta huesti res mahuataiya Papan jaa shinanbehnotimahiqui.

³⁰ Maton boo rihbi ta jahuentihi jaiquin hihxon Papan honanihqui.

³¹ Jaa copi jahua qui raqueyamanahue. Mato tah man hicha hihsa mentan hashoan hihti copi qui.

*Cristonahbo
(Lc 12.8-9)*

³² Jonibaan nincanon hihquish Hea tah hen Cristonah qui hihqui jonibo jatihibi ta henabó qui. Heen naihoh queha Papa bebonxon tah hen Jaa ta hena qui hahtihí.

³³ Jonibaan nincanon hihquish Hea tah hen Cristonahma qui hihquibo rihbi ta henamabo qui. Heen naihoh queha Papa bebon tah hen jaabo yohihi, jaabo ta henamabo qui hen hihtihí.

*Jesus qui raeyamahibo
(Lc 12.52-53; 14.26-27)*

³⁴ Joni huetsa betan siripi jihuetaibo rahsi janon hihquish hea jahui shinanyamanahue. Siripi jihuetaibo rahsi janonma bi sinacahinax rehtenanaibo janon tah hen joni-qui.

³⁵ Jahuen papa qui huetsa sinanon tah hen joni-qui. Haibobo rihbi ta jaton mamabo qui sinanica qui. Jahuen hihni rihbi ta jahuen yaya qui sinathiqui.

³⁶ Huetsanah ta jahuen jenahaxbi jahuen rahuibo jatihiqui.

³⁷ Jahuen papa sinamis hihquish, jaa hihyamahiya jahuen mama sinamis hihquish hehon queenyamahi joni ta henama qui. Jahuen bebo baque sinamis hihquish, jaa hihyamahiya jahuen baque haibo sinamis hihquish hehon queenyamahi joni ta henama qui.

³⁸ Hea rehtehibaan bi tah hen heen Hihbaan joi jenetimahi hihxon hea chibanyamahax tah man henabó man hihtimahi.

³⁹ Noque rehtecanmis hihxon hea hihbomayamahibio ta jascabiscatihiqui mahuatai. Heen joni jan hihqui copi rehtehibo ta hehbé jihuenica jascabi sca jatihiqui.

*Papan noque hinanyaxihqui
(Mr 9.41)*

⁴⁰ Mato Benahue hahcaibaan ta hea jascajaribicaniqui. Hea johue hahcaibaan ta hea raanni heen papa jascajaribicaniqui.

⁴¹ Papan joi yohinica jan copijahi quescajaribiquin ta jahuen joi yohinica Johue hahcaibo Papan copijayaxihquiqui. Pontejaquin shinanai joni jan copijahi quescajaribiquin ta jaa ponte joni Johue hahcaibo Papan copijayaxihquiqui.

⁴² Heen haxenicaxon copi man nescapa baque pishca jiricatsihquiton jene paxa xehamanixon tah man Papan copijahah bihyaxihqui. Jaa man bihyaxihqui ta jenquetsah-pabi manotimahiqui.

11

*Nashimanica Juaman raanaibo
(Lc 7.18-35)*

¹ Jascajaquin jahuen doce haxenicabo haxemaquin queyohax res sca, janohax sca huetsa jeman haxemahi Jesus cahi.

² Jesusen jahuen coshiyaxon hahciaya ta swo xobohoxon joi nincaxon, jahuen haxenicabo Juaman raannishqui yocaqui bohábo.

³ Nocoxon:

—¿Hoa jahui joni hen yohini mia quin? —Jahui jatihquin huetsa, non mananon? —hahcanquin, Juan chaninoxon.

⁴—Man jisxon nincacai Juan yohitannahue.

⁵ Benchebaan ta jisresscαιqui. Chantobo ta nihresscαιqui. Sipiyahpabo ta rohascαιqui. Pabebaan ta nincascαιqui. Muahatahbo ta hahquirihbi teehihscaiqui. Jahuaborajomabaan ta joi siri nincacuihqui.

⁶ Heen joi nincacoinai joni rihbi ta hahan jenimati jaresscαιqui, jascajaquin yohitan nahue —Jesusen jato jaquin.

⁷ Boresscaiboya, Juan jahua joni hin honanahbo hihxon jano tsinquitaibo Jesusen yocauquin:

—Jahua jisi man jano tsoa jaitonma caniquin? Nihuen xayanai tahuia jisi man catanni-hquin?

⁸ Jahua cahra man jisi caniquin? Hihti siri chopasahuehi joni nan? Hihti siri chopasahuehibo ta quiquin hapon xoboho pari man merathihi.

⁹ Jahua copi man caniquin? Papan joi yohinicica jisi nan? Jaa rahan. Mato yohinon nincanahue. Papan joi yohinicahax bi ta yohinicica mentan hashoan coshi joibo jaa jaiqui.

¹⁰ Jaa yohihi ta nea huisha jaiqui:

Jise. Mia bebon canon tah hen heen raanti joni raanai. Mia bahi bexojaxon ta catihqui, min jahan canon hihqui jaa joi.

¹¹ Nincanahue hen mato yohicinnon. Nashimanica Juaman yohihi joi mentan hashoan siri joi yohinicica ta jahuentianbi jayamanishqui. Papan jihuetah res ta hashoan siri yohiti jaiqui. Caibo Papan jihuetahbo texe mentan hashoan namanhax bi ta hashoan siribo yohiti jaiqui.

¹² Nashimanica Juan jomenoni bi ta rahma caman jahuen hahbe jihuetahb Papan coshin tsinquihiqui. Mohi mohinihbaan ta jaa joi histon bichiqui, jahuen jihuetahbocatsihxon.

¹³ Juan yohihi jonon caman ta Cristo jotihi Papan joi yohinicabaan huishaxon yohipahonishqui. Moisesnin huishani janin ta jascarihbihqui, jaa joi rihbi. Jaa copi ta Juaman jato yohihi histon sca bihcancihihi.

¹⁴ Nincati shinanyahpaxon nea nincanahue. Elías janeya ta joyaxihqui hahquin ta Papan joi yohinicabaan huishanishqui. Juan ta jaa Elías qui.

¹⁵ Pabinquiyahpaxon nincanahue, hen mato yohihi.

¹⁶ Rahma jihuetaibo jahua quescapahbo hin hen mato nescajaquin yohinon nincanahue. Baquebo jaabo rahihi shirohi notsihi sinacananai quescapahbo ta jaabo qui.

¹⁷ Man bairahnon hihxon non rehue hahcái bi tah man bairahyamahi. Non huiniah bi tah man huaoohiyamahi hih ta jacanihqui notsihi. Rahma jaibo ta jascarihbihqui.

¹⁸ Joxon ta piti siribo Juaman piyamanishqui. Xehati rihbi ta xehayamapahonishqui. Jaa copi ta Yoshiman ta jaa hihbojahiqui hihcanihihi.

¹⁹ Hea noquebaque joxon tah hen pixon xeharihbibi. Jaa copi yohuanrihbicani. Jise, jaa joni ta pihanhuan qui hih ta jacanihqui. Xehanhuan tah qui. Coriqui cobrannicabo ta jahuen hahberabetibo qui. Hohchayahpabo ta jahuen hahberabetibo qui hihribicani, hea yohihi. Tsoa ponte shinanyahpa quin hihxon tah man joni huetsa jisxon, jan hahcái jisxon man honanthihi —jato jaquin Jesusen.

Nincayosmabo

(Lc 10.13-15)

²⁰ Jaatian sca jano jahuen coshiyaxon jan jato hicha hahxonrahshi jemabo sca jaan yohicoinqui, jaton shinan ponteyamahiya jato yohicoinqui.

²¹ —Hahrai hih tah man jatihi, corazinobon. Hahrai hih tah man jatihi betsaidabon. Mato tocanxon heen coshiyaxon hen hahrasih quescajaribiquin, Tiro jemanxon hahxon, Sidon jemanxon hen hahcaya cahen neateman jaton hohcha copi benaxon hahan benati chopasahuehx chihi mapo mapocohtax tsahoxon jaton shinan pontehan.

²² Jaton shinan pontehaxma muahuanhbo casticanxon bi ta mato sca hashoan rihbi Papan casticanxihihi.

²³ Capernaum janinhahbon, naiho jihuetai quescarax maton jema janin jihuetai shinan man Jain? Matoyabi ta maton jema panteon hihiyaxihqui. Heen coshin mato hahxonni jai quescajaquin Sodom jema janin rihbi jascajaxonah cahen rahma caman jaton jema jaquehahnihihi.

²⁴ Jaabo tiromabo copi jaton jema Papan yamajabahinni bi ta jahuen casticanxihihi.

Tantihi benahue hihqui Jesus

(Lc 10.21-22)

²⁵ Jaa pecaho sca Papa yocaxon Jesusen yohiquin.

—Hahxon tah min hea jai, Papan. Mia tah min naiyahpa mai hihbo qui. Shinamahn-huanyahpabo betan honanbaan honancasquimanon tah min jato pantexon miin baquebo sca honanmahi.

²⁶ Mian jisi, jascajaha siri quen tah min jato jascajaxonai, Papan.

²⁷ Papan ta hea jatihibi hinanihqui. Jahuen baque tsoa quin ta tsoanbi honanyamahiqui. Heen Papa huestichin ta honanihqui. Tsoa heen Papa quin tah hen jahuen baque hihxon hea huestichin honanai. Caibaan ta honanyamahiqui. Hea nincacaibaan res ta honanihqui, hean jato honanmahah.

²⁸ Benahue, teetaibon. Benahue, hihue papihibon, jatihibi. Mato tah hen tantimatihi.

²⁹ Hen mato hihbonon benahue. Hen mato nincamanon benahue, man honannon. Honaxon bi hen mato yohinon. Mah hohmis hohmisai honanai tah hen qui. Benahue, hen mato shinan siricahinmanon.

³⁰ Hen mato yonohi quescayahah ta teema qui. Hen mato yohihah tah man histon hahtih. Heen jihuetahbohi benahue —jato jaquin.

12

*Tantiti neten trigo rebox tesabonahibo
(Mr 2.23-28; Lc 6.1-5)*

¹ Jaton tantiti neten sca ta Jesus betan babin caquin trigo huai nabebacahini caquin, picatsihxon jahuen haxenicabaan huestibo bero pasquebonaxon bishqui hahxon pinishqui.

² Jascajahibo jisxon, fariseobaan sca yohiquin.

—Jise. Tantiti neten jascajatimahi bi ta miin haxenicabaan bero bichiqui.

³ Jascayah sca:

—¿Jahuen jonibo betan caxon, picatsihxon, jahua Davidinin janishquin? ¿Papan joi jisxon man honanyamahin?

⁴ Picatsihquish ta Papan xoboho hihcoxon yocacah, Papa pejanxonti paan hinanahbihxon pinishqui. Jaa ta jaan pitima piti qui. Jahuen hahbe cahibaan pitima rihbi. Yohuanxonnicahbaan pitim res ta jaa qui.

⁵ Tantiti netenbi ta Papan xoboho Papa bebon yohuanxonnicahbo teetihqui. Jaa netenbi jaabo jaton tee jaah ta siri qui, Papan jisi. ¿Moisesnin huishani joi jisxon bi man jaa rihbi honanyamahin?

⁶ Nincanahue hen mato yohinon. Papan xoboho teeti joi jai copi res ta tantiti netenbi jahoxon teexoncaniqui. Rahma ta jahuen xobo mentan hashoan coshi joiyahpa neno qui.

⁷ ¿Nea huisha jahua hihcatsihquiquin man honanyamaribbihin? Man joni huetsahon shinanti tah hen queenai. Maton hohcha copi man hea jahuarda hinanti cah hen queenyamahi. ¿Jaa joi hen jahua hihti quin? Honanxon cah man ponte jonibo qui tiromahi yohuanyamahan.

⁸ Noquebaquehax tah hen tantiti nete hihbo qui, hah tah hen mato jai, man honannon —jato jaquin.

*Meyosma joni
(Mr 3.1-6; Lc 6.6-11)*

⁹ Janohax caparihax sca, jaa fariseobaan tsinquit xoboho nococani.

¹⁰ Mapetaibaan bi joni meyosma jano tsahoti. Jesus caheti shinanxon, yocacanquin, jano jaibaan:

—¿Tantiti neten non joni rohajatihin? —hahcanquin.

¹¹ Jascajaquin yocacahbo jaan sca jato yohiquin:

—¿Maton carnero hina tantiti netenbi mai quiniho paquetaiya man bihxon tsecayamahin?

¹² Joni ta carnero mentan hashoan jihuemat qui, hah ca hen mato jai. Jaa copi tah non tantiti neten joni huetsa yanapantihi.

¹³ Jato jascajaxon meyosma sca yohiquin:

—Miin mequen hehqui pontehue.

Yohihah, hahqui jahuen mequen pontehax rohascai. Huetsa jahuen mequen hihqui quescapi, siribehcoinscrai.

¹⁴ Jaatian picotax, fariseobo yohinani. Jenquetsaha non jatihin jaa rehtenoxon, hihceni.

Jesus yohihi Isaiasnen huishani joi

¹⁵ Rehteti shinanaibohi honanax, janohax Jesus caresscrai. Cahiton sca hihti caibaan chibanhinscaquin. Jato tocan jai hisinaibo ta jatihibi rohajapaquenishqui.

¹⁶ Rohajaxon ta jato hihti yohinishqui, jan jato rahonah tsoabi yohiyamahahbo.

¹⁷ Isaiasnen huishani quescaya sca janon ta jato yohinishqui. Jaa joi ta nesca qui:

- ¹⁸ Jisnahu. Jaa ta hen caisai heen joni qui. Hahan hen hihti queenai heen joni tah qui.
Hahan hen jenimahi. Heen yoshin tah hen hinanai. Jayaxon ta jatihibi nahuabo yohiyaxihqui qui, jato hihboscanoxon.
- ¹⁹ Tsohbetanbi ta sinacananantimahiqui. Sai saihihima ta qui. Bahin cahibaan nincacah ta jahuabi quenayamahiqui.
- ²⁰ Tahua moshitai quescapahbo meraxon bi ta jaan tehcayamahiqui. Lamparin huaxmen nocahax cohinai quescapahbo ta jaan nocajayamahiqui. Quiquin hapoxon jan tiromabo casticannon caman ta jasca jatihiqui.
- ²¹ Hahqui ta jatihibi nahuabaan jaton shinan camatihiqui, jaan jato jihuemayaxihqui copi hihqui Isaiasnen huisha.

*Yoshiman yanapanai tah qui hihquibo
(Mr 3.19-30; Lc 11.14-23; 12.10)*

- ²² Jaatian ta yoshiman hihbojahi joni hihuecannishqui. Yoshiman hihbojahah benchesca banetax, joyoscai. Jesusen rohajaha jisresscaquin, yohuanrihbiscai.

²³ Rahte rahtetax sca tsamajaquetaibo yohinani.

—¿Jaa tsi ra Davidi xohta hihyamahiquin? —hihscacani.

²⁴ Nincaxon sca fariseobaan jato yohiquin:

—Neatohon ta tiroma yoshiman coshiyahpaxon yoshinbo potahiqui. Beelzebú ta jahuen hihbo qui, tiroma yoshin —hahcanquin.

²⁵ Jasca jaibaan bi jaabaan shinanai honanxon Jesusen jato yohiquin: Hapon jihuetahbajo rahnibibi rehtenanaiya ta jaton hapon yonoti queyotihiqui. Jema ta jascarihbihiqui. Xobo jascarihbihili. Jaabo rahnibibi rehtenanax jahuabi baneyamascai.

²⁶ Satanas hahbe Satanasnen potahah ta Satanasbo rehtenanscainqui. ¿Jenquetsahax sca jahuen yonoti banetihiquin?

²⁷ ¿Beelzebú coshiyahpaxon tiroma yoshinbo hean potahiya jahua coshiyahpaxon cahramator baquebaan jato potahiquin? ¿Jenquetsahpa shinanya man quin? Maton baquebaanbi ta mato yohitihiqui.

²⁸ Dios Yoshinyaxon hean jato potahi honanscanahue: Papan jihuemat nete ta mato qui nocosa jaiqui, shinanscanahue.

²⁹ Coshi jonin jahuen xobo coiranaiya jenquetsahax hihcoxon huetsan jahuen jahuanabro bichintihiquin? Xobo hihbo nexaxon pari ta jahuen jahuanabora bichintihiqui. Shinanscanahue.

³⁰ Hehbetan teeyamahax tah man heen rahuibo qui. Hea tsinquixonyamaquin tah man jabisahi.

³¹ Jaa copi tah hen mato yohihi: Papan ta jatihibi tiromabo sohuati hahtipahiqui. Jaton shinaman tiromajaquin hahcaibo, Papa qui tiromahi yohuanaiibo, jato jatihibi sohuatihiqui, yocacah. Jahuen Yoshin siri qui tiromahi yohuanaiibo res ta jato sohuaxontimahiqui.

³² Hea noquebaque qui tiromahi yohuanaiibo ta Papan sohuatihiqui. Dios Yoshin qui tiromahibo ta jascayamahiqui. Jascapahbo ta jahuentianbi sohuatimahiqui. Rahma sohuayamaribhiquin. Nete queyotai bi sohuayamaribhiquin.

*Jahuen bimi jisxon honanti
(Lc 6.43-45)*

³³ Jihui honanquin hahcajaquin honannahue. Siri jihui tah qui hih tah man jai, siri bimiyahpahi honanax. Tiroma jihui tah qui hih tah man jaribihili, tiromabo bimiyahpahi honanax. Jahuen bimi honanxon tah man jahuen yora yohihi.

³⁴ Jascayaquin rihbi hea honannahue, rono janayahpabon. ¿Jenquetsahax man tiromabohax siripi yohuantihin? Maton shinan tiroma hichahi quen tah man tiroma yohuanyahpabohi.

³⁵ Siri jonibo ta siri shinan hicha qui, jaa copi siripi yohuani. Tiroma jonibo rihbi tiroma shinan hichahax jaya yohuanrihbihili.

³⁶ Hihresi yohuanaioya ta jatihibi jaton joi tiroma copi Papan jato casticanyaxihqui qui, jahuen casticanti neten.

³⁷ Tiroma yohuan jahponibo ta casticanyaxihqui qui. Yohuan siriyahpabo ta jaton yohuan copi casticantimahiqui —jato jaquin.

*Hahan honanti jismahue hahcaibo
(Mr 8.12; Lc 11.29-32)*

³⁸ Jaatian jaton huisha honanbo betan fariseobaan yocascaquin.

—Maestron. Papan shinan coshiyahxon min hahcaihili tah non jiscatsihqui, mia Papan raanai joni hihqui honannocon.

³⁹ Yocacahbo sca jato yohiquin:

—Tiromaboxon tah man jascajaquin shinanai. Tsiniti shinanyahpaboxon tah man jascajaquin hea yocacai. Papan coshiyaxon hen hahcai man jiscatsihqui bi ta Papan mato jismatimahiqui. Hahan hea honanti mato hinanquin bi ta jahuen joi yohinica Jonas jan huinomani quescapah res huestijaquin res Papan mato jismathiqui.

⁴⁰ Yapahhuahnen xehahah, quimisha nete jahuen poco janin Jonas hihbahinahax quimisha yame rihbi hihshinahax piconi quescaribibi tah hen noquebaque mai chicho quimisha neten quimisha yame rihbi hea jatihi. Jasca hen jaiya ta hahan hea honanti qui.

⁴¹ Papan casticanti neten ta Níñe jema janin jihuapehonianiba mato metoxon yohiyax-ihquiqui. Jonasen noque yohihah tah non noquen shinan pontenihqui. Jonas mentan hashoan nincati jonin mato yohihah bi tah man nincayamanihqui. Mato tah man noque mentan hashoan nincayosmabo qui hih ta jayaxihcanihqui, man nincayosmabo quen.

⁴² Etiopia mai janin japhoni quiquin hapo haibaan rihbi ta casticanti neten mato jisxon jascajaquin rihbi mato yohiyaxihquiqui. Hocho bi res hihquish bi tah hen Salomon yohuanai nincapi caniqui, Salomonen honanax yohuanai nincacatsihquish. Salomon mentan hashoan honanai jonin mato yohihah bi tah man nincayosmabo qui hih ta jayaxihquiqui.

*Catani joribibi tiroma yoshin
(Lc 11.24-26)*

⁴³ Jan coiranai joni jenehax ta tiroma yoshinbo nihniciqui, jano hotati yamahi janin nihnicach bi jahuenbi tantitimahiya shinanscaquin.

⁴⁴ Janohaz hen jahui janin caribitanpan, heen xobon, hihcahinax ta caresscαι qui jahuen xoboho. Nocoxon ta hihbojoma siri merahiqui. Matsó siri meraquin, bexojaxonah siri.

⁴⁵ Jaatian sca caxon, hashoan tiromaboyoshinbo rihbi benaxon, siete merahax jaya joribiscái, jano jihuenoxon. Jaatian ta hashoan tiromacanahí sca jaa joni jatihiqui, hicha yoshiman sca hihbojahah. Huestichin hihbojamenoa bi hashoan tiromascaí –jato jaquin.

*Jesusen mama betan jahuen huetsabo nocotai
(Mr 3.31-35; Lc 8.19-21)*

⁴⁶ Tsamajaquetaibo haxemahi yohuanparihiya, jahuen mamaya jahuen huetsabo nocoti jahuex jeman nichish hahbetan yohuancatsihqui.

⁴⁷ —Miin mama betan miin huetsabo ta jeman nichiqui. Mia ta yohuanquihncatsihcani-hqui —hahquin huetsan.

⁴⁸ Jascayah:

—¿Tsoa hin, heen mama? ¿Tsoa hin, heen huetsabo? —jato jaquin.

⁴⁹ Jato jascajaxon jahuen haxenicabo metoxon: —Jisnahue. Neabo ta heen mama qui. Neabo ta heen huetsabo qui.

⁵⁰ Heen naihoh queha Papa queenai quescabijaquin hahcai joni ta heen huetsa qui. Jascapah ta heen chocha qui. Jascapah ta heen mama qui —Jesusen jaquin.

13

*Mihsahahnica joi
(Mr 4.1-9; Lc 8.4-8)*

¹ Jaatian ta hian patax tsahoti Jesus canishqui, xobohoh quehax picotax.

² Hian quetsahohatiya sca hihti caibo hahqui tsinquiaqueti becani. Jaa copi ta nontin sca nanenishqui, nontin tsahoxon quexa nichibo haxemanoxon.

³ Haxemaquin ta jaa patax queha joibo jato hicha yohinishqui. Nescajaquin jato yohiqui: Huesti huaijanicah ta jahuen trigo banahi canishqui.

⁴ Huai chian sca trigo berobo mihsahahbonahi cahi. Mihsahahbonahah cahen caibo berobo bahin paquecanahí. Jascapa ta pehiyahpabaan topiquin queyonishqui.

⁵ Caibo berobo rihbi cahen chahoma main paquenish. Bemacanya mashi jai. Mai chicho hihyamahax copi cahen jascapa histon joconish.

⁶ Bari xanascaiyá sca cahen joconain bohiston xanahi, mai chicho jaton tapon cayamahiya.

⁷ Caibo moxa chian paqueti. Jaabo joconai bi cahen moxan rishquiquin, hashoan hani sca hihxon.

⁸ Caibo berobo rihbi cahen mai siri janin paqueti. Jaabo cahen joconax, hanihax bimiscái. Caibo cahen huesti bero potahah cien beroyahpascaí. Caibo cahen sesenta beroyahpascaí. Caibo cahen treinta beroyahpascaí.

⁹ Hahan nincati pabinquiyahpaboxon nincanahue —hahquin.

*Jaa patax queha joi Jesusen yohihi
(Mr 4.10-12; Lc 8.9-10)*

¹⁰ Jaa pecaho sca jahuen haxenicabo jaabo rahsibi Jesus qui caxon yocacanquin:

—¿Jahua copi min jaa patax queha joibo res yohiquin jato haxemahin? —hahquin.

¹¹ Yocacahbo sca: —Papan jihuematici jenquetsahpa quin man honannon hihxon tah hen jaa patax queha joi yohihi. Hoa caibaan nincaxon bi honanyamanon hihxon tah hen jascajahi.

¹² Jaton jointi janin Papan shinan pishca jaibo tah hen hashoan hinantili, hicha bi res jan janon. Jaton jointi janin jai shinan yamahibo tah hen jaa jaibo pishca rihbi jato bichintihi.

¹³ Jaa copi tah hen jaa patax queha joi jato yohihi. Jaatian ta jisquin bi jistimacantihiqui. Nincquin bi ta nincarestihiqui, honanyamaquin.

¹⁴ Isaiasnen huishani joi jai quesca sca ta jaresscaiqui.

Pabinquinin nincaxon bi tah man honantimathihi. Beron jisquin bi tah man jistimathihi.

¹⁵ Nincayosmaboxon copi tah man jascatihi. Pabinquiyaxon bi hochoxon nincacai quescajaquin. Jistihbi tah man bero rahcohi, jismis hihxon. Nincamis hihxon rihbi, jointin nincaxon, shinan pontehax rohahax jihuematici hihxon tah man jascajahi.

hih ta jaiqui Isaiasnen huishani joi.

¹⁶ Jahuerohajaquin tah man jascajaxonma beron jisxon jiscoinai. Jahuerohajaquin tah man pabinquiyahpaboxon nincacoinai.

¹⁷ Man jisibo ta hicha Papan joi yohinicabo jisti queenpahonishqui. Pontejaquin shinanaibaan hihti jiscatsihxon bi man jisi jisyamaquin. Man nincacai joibo hihti nincacatsihquiaan bi ta Papan jato nincamayamanishqui. Jaa copi sca Jahuerohajaquin ta Papan noque jismahiqui, Jahuerohajaquin ta noque nincamahiqui, hihnahue.

*Mihsahahnica jahuahi jaiquin hihxon jan yohihi
(Mr 4.13-20; Lc 8.11-15)*

¹⁸ Bananica joi jahua hihcatsihquiquin mato hen yohinon nincanahue.

¹⁹ Papan jihuematici joi yohihah bi honanyamahi joni ta bahinbi bero paquetai quesca qui. Jahuematici janin banaquin hahcajaquin non nincamaha bi cahen joxon, non yohiha joi tiroma yoshiman bichinbahinquin.

²⁰ Chahoma main bero paquetai ta nincamenoxon jenimaxon bichi quescapah qui.

²¹ Jahuematici tapon chicho cayamahi quesca sca basiyamahi. Jaa joi jan bilihcoinai copi caibaan hosan hosanquin. Hosanah sca histon jenescaquin. Masa tenetihbi jenebahini caresi.

²² Moxa chian paquetaibo ta joi bilihcoinxon bi huetsa shinanboyta jaxon cajayamahibo quescasca qui. Nincacoinxon bi ta mai mehabaan shinanai quescajaquin shinanxon, jaton jahuaborabo rihbi shinanxon jaa joi caimayamahiqui, bimijoma quesca sca jan janon.

²³ Mai siripan banaha bero ta nincanica joni quescapah qui. Jaa nincaxon, jahuen shinaman nincacoinxon, shinan cajajaquin. Bero caichi jai quescaribhibi jahuen shinan, caibo quiha cien bero sca, caibo quiha sesenta, caibo quiha treinta.

Trigo tocan huasi joconcanahi

²⁴ Huetsa jaa patax quehah joi rihbi ta nescajaquin jato yohinishqui. Papan jihuematici ta bananica jai quesca qui. Jahuematici huai chian caxon cahen banaquin jahuen berobo mihsahahbonaquin.

²⁵ Mihsahahquipish yame hoxahiya sca jahuen rahui jahui. Joxon, jaa huai chian sca banahipibo bero tocan jahuen huasi bero mihsahahbonahax caresscrai.

²⁶ Trigo bero joconax hani sca jaax beroyahpa sca jaiya bi cahen huasi jascarihbibi, beroyahpscrai.

²⁷ Trigo tocan huasi jai jisxon ta jahuen jonibaan sca yocatihi.

—¿Siri bero rahsi min banayamahohquin, Patoron? ¿Siri rahsi potahi shinanah bi jenquetsahpi huasi sca jaiquin?

²⁸ Jaatian ta jaton patoronen jato yohitihiqui:

—Jaa ta noquen rahuin noque jascajanhoxqui —hahquin.

—¿Hoa huasibo non mexahi catimahin —hah sca jacani.

²⁹ —Mexayamaquin rahan. Huasi mexaquin bi jayabi trigo rihbi man mexamis.

³⁰ Jatihibi haninon jenenahue. Trigo tsinquiti tian pari caxon tah non tsinquixonnicahbo yohitih. Huasi pari mexanahue. Huasi mexaxon nexaxon cohati sca tsamanhinhinahue. Trigo bero rahsi sca tsinquixon janobexojati xobo janin bexojaxonnahue —hah sca jato jatihi.

*Jaton moxo bero**(Mr 4.30-32; Lc 13.18-19)*

³¹ Huetsa jaa patax queha joi rihbi ta jato yohinishqui. Papan jihuematí ta moxo bero pishca jai quescaribihiqui. Jascapa bero pishca cahen huái chian hihbaan banahah joconi.

³² Caibo bero mentan hashoan hexti pishcahax bi ta joconax hani sca jaax texe banabo mentan hashoan hani sca jaiqui. Jihuiscaya ta hihsabo joxon jahuen mebibó janin sca nahajatihiqui.

*Hahan paan soohihmati**(Lc 13.20-21)*

³³ Huetsa jaa patax queha joi rihbi ta nescajaquin yohinishqui. Paan hahnica haibaan ta jahuen paan soohihmanoxon hahan soohihmati bihnichá qui. Jascapa bihxon cahen huesti paniro tihopa tonco janin niaquin. Jano niahah ta tonco jatihibi soohihtihiqui. Papan jihuematí ta jascarihbihiqui, non honanaima bi hanihi –jato jaquin.

*Jaa patax queha joi rahsi**(Mr 4.33-34)*

³⁴ Jascapahbo jaa patax queha joibo ta Jesusen jato haxemanishqui, tsinquitax tsama-jaquetaibo yohiquin. Jaa patax joibo rahsichin ta jato haxemanishqui. Jayajoma jahuabi jato yohiyamaquín.

³⁵ Jaa copi ta Papan joi yohinicateñ huishani jai quesca janishqui. Jaa patax queha joibo yohiquin tah hen jato haxemahi. Jahuentianbi nincanigmabó joi tah hen jato nincamahi hih ta jaiqui huishani joi.

Huasi jahua hihcatsihququin hihxon jan yohihi

³⁶ Tsamataibo potabahini sca Jesus cahi, xoboho hihcohi. Jano rihbi ta jahuen haxen-icabo hihconishqui, yocacatsihqui.

—¿Huasi bero joi jahua hihcatsihququin? Noque yohihue —hahcanquin.

37 —Nesca tah qui, jisnahue —jato jaquin.— Siri berobo banahi joni ta noquebaque qui.

³⁸ Jahuen huai ta nai naman yohihi qui. Jahuen bero siribo ta Papan jihuetañbo qui. Huasibo cahen tiroma yoshiman jonibo.

³⁹ Jahuen rahui cahen Satanas. Jahuen tsinquití tian cahen nea nete queyotai hihcatsihqui. Jahuen tsinquixonnicahbo cahen Papan yonotibo.

⁴⁰ Jascarihbihí, huasi mexaxon coháhi jaibo quescaribihí ta nea nete queyotaiya jayaxihqui.

⁴¹ Noquebaque hihxon tah hen heen yonotibo raanyaxihqui. Caxon ta hohchaman-icahboya tiromajahibo tsinquiyaxihcanihqui. Jascapahbo ta Papan jihuematima janin boyaxihcanihqui.

⁴² Jato boxon ta johuehinhatai chihi janin jato potayaxihcanihqui. Jano ta sai saihiyaxihcanihqui. Jaton xeta yeres yeresahquin, hisin tenequin.

⁴³ Jaatian ta bari coshi xaba jai quescaribihí, Papan jihuetañbo siribo coshi shi-nanyahpa hihyaxihcanihqui, Papan jihuematí janin. Pabinquiyahpaxon nincanahue.

Jonenihbo coriqui

⁴⁴ Papan jihuematí ta nahue chian tsama coriqui jonenoxon mihinnihbo quescapah qui. Jaa mihinnihbo meraxon cahen huetsa jonin mahporihbihax hihti jenimahi caxon jan jai jatihibi maromathi. Maromaxon ta coriqui bihxon jahan sca jaa nahue marotihiqui, jaa mihinnihbo jahuenah sca hihnon.

Copi moro

⁴⁵ Papan jihuematí ta marocatsihquin moro copibo benahi maronica nihnihi quescapah rihbi qui.

⁴⁶ Huesti moro hihti siri, hihti queenti siri meraxon cahen caxon jan jai jatihibi maromaxon sca jaa moro siri maroscaquin.

Mesco yapa rahcoxon caisaibo

⁴⁷ Papan jihuematí ta tarrafa quesa rihbi qui. Tarrafa cahen hian janin potaxon mesco yapa rahcocanquin.

⁴⁸ Bochoscaya ninixon mapemaxon yapa tsecapquescacanquin. Tsecapquescacanquin. Tsahoxon sca tasa qui siribo nanéhñiquin, tiromabo potapaquequin.

⁴⁹ Nete queyotaiya ta jascaja rihbi Papan jayaxihqui. Joxon ta Papan yonotibaan tiromabo bihyaxihcanihqui, siribo tocan nihyamascanon.

⁵⁰ Johuehinhatai chihi janin ta jato potayaxihcanihqui. Jano ta sai saihiyaxihcanihqui. Xeta ta yeres yeresahyaxihcanihqui, hisin tenequin.

Behnaboya xenibo jismahibo

⁵¹ –¿Hen mato yohihi jatihibi man nincaxon nincacoinain? –jato jaah:
–Nincaquin rahan –hihcani.

⁵² –Jaa copi tah man Papan jihuetahbohax jahuen jihuetahbo haxescaxon caibo rihbi sca man haxematihi. Jaatian tah man hicha jahuarayahpa hani patoro quesca man jatihi. Jascaphah cahen jahuen bexojati chiqueho caxon behnaboya xenibo siribo cainmatihqui –jato jaquin.

Nazaret janin Jesus nocorihbibi

(*Mr 6.1-6; Lc 4.16-30*)

⁵³ Jascajaquin jaa patax queha joibo jato yohiquin queyohax, janohax Jesus cahi.

⁵⁴ Jahuen main cahi. Cahi nocotax jaton tsinquitixoboho mapexon janoxon jahuen caibo Papan joi yohiquin. Jaan jato haxemaha, rahte rahtecani.

–¿Jahuerahnon haxenihxon hen neatohon yotiho honannishquin? ¿Jenquetsahaxon coshi bihxon jonibo rohajahiquin?

⁵⁵ ¿Xobojahnicaten baque ma hin? ¿María janeya jahuen mama ma quin? ¿Jacobo, José, Simon, Judas jahuen huetsaboma quin?

⁵⁶ ¿Jahuen chocabo jatihibi noque betanbi jihueyamacaniquin? ¿Jahuen sca hen jahuen shinan binnishquin? –hihcani.

⁵⁷ Jaa copi nincacoinyamacanquin. Nincacoinyamacanquin. Nincacoinyamacanquin.

–Papan joi yohinicahon huetsancohabo queenaibaan bi ta jahuen mai janinhahbo jahan queenyamacaniqui. Jahuen jenabo, jahuen xobo janinhahbo, jaabo jahan queenyamacaniqui –jato jaquin.

⁵⁸ Nincayosmabo copi ta jahuen coshiyaxon jaton jema janin jato hicha hahxonyamanishqui.

14

Nashimanica Juan muhuatai

(*Mr 6.14-29; Lc 9.7-9*)

¹ Janobo jahuen coshiyaxon Jesusen jato hahxonai ta caibaan sca quiquin hapo Herodes yohinishqui.

² –Nashimanica Juan tah qui. Yamanicahax bi ta hahquirihbi teehihscaiqui. Jaa copi ta coshiyahpa qui –hih sca Herodes jai, Jesus yohihi. Jahuen jonibo betan yohuani ta Herodes jascanishqui.

³ Neateman Juan retehox copi jascari yohuani. Jasca jayanoxon pari ta Juan bihxon sipo xoboho Herodesnin tsahonnishqui, Herodesnin huetsan haibo Herodias copi.

⁴ Jaa ta miin haiboma qui. Min tah min hahbetan tiromahi, Juaman yohihah copi sipo xoboho tsahonquin.

⁵ Juan retecatsihxon bi jonibo sinamis hihxon rehteyamaquin. Jaa ta Papan joi yohinica qui hihquiboya sinacanmis hihxon rehteyamaquin.

⁶ Jahuen bari senenjahiya ta xehahibo Herodesnin xehaquihnnishqui. Jahuen haibaan baque haibo chirinai jisxon, Herodesnin costan costanquin.

⁷ Costanxon, Dios quenaxon sca jaa xontaco yohiquin:

–Min queenaibo hea yocareshue. Mia tah hen hinantihi –hahquin.

⁸ Juaman mapo yocahue jahuen maman jaá sca, jahuen mama queenai quescajaquin xontaconen yocaquein:

–Juaman mapo quencha qui nanexon hea bexonahbo yohihue –hahquin.

⁹ Kontaconen yocacah sca quiquin hapo benacahinscái. Min yocacai tah hen mia hinantihi hahxon bi masa shinanscaquin. Masa shinanaxon bi Dios quenaxon yohixon copi jeenhahquin, hichaxon nincacaibo jai copi rihbi jeenhahquin.

–Textetannahue –hahquin jato.

¹⁰ Caxon sca sipo xobohoxon bi Juan textecanson.

¹¹ Quencha qui sca jahuen mapo nanexon, bexon, xontaco hinanquin. Jaan sca jahuen mama hinanquin.

¹² Juaman hexanicabo ta jahuen yora bichi bocannishqui. Bihxon mihinquin. Mihintani joxon, Jesus yohicanquin.

Cinco mil jonibo Jesusen pimahi

(*Mr 6.30-44; Lc 9.10-17; Jn 6.1-14*)

¹³ Yohihahbo nontin nanetax janobihax Jesus cahi. Jano tsamataibo yamahi janin jahuen haxenicabo betan yohuani cahi. Jano tsoa yamahiton nocoti cahi. Jano ta Jesus cahiqui chanihibo nincacax sca, jano jai jemabo janinhax tsama jonibo cahi. Hian quetanbahini sca Jesus chibani bocani.

¹⁴ Taxnatax mapexon jonibo tsamascai Jesusen meraquin. Jatohon hihti shinanxon, jaton hisinbo rohajaquin.

¹⁵ Bepiscaiya joxon jahuen haxenicabaan yohiquin:

—Neno ta tsoabi jihueyamahiqui, Hihbon. Bari rihbi ta hihquicatsihscainqui. Nea jonibo raanscahue, honobo jai jemabo janin caxon jaton piti pishca maroscatanahbo —hahcanquin.

¹⁶ —Jahua copi catima ta jacaniqui. Piti jato hinannahue, matonbi —jato jaquin Jesusen.

¹⁷ —Neno tah non pichca paan pishca res jai, rabe yapa xohi rihbi. Jahua hashoan tah non piti yamahi —hihcani.

¹⁸ —Jaa hea bexonnahue —hahquin jato.

¹⁹ —Janobi tsahopaque nahue —jonibo jaxon, jaa pichca paanya rabe yapa bihxon, nai bejisinhixon, Papa yohiquin. Piti tehcaxon sca jahuen haxenicabo hinanpaquequin, jaabaan sca jonibo hinanbihinon.

²⁰ Pih iyanicahinscacani. Texejahabo tsinrixon doce tasa bocho bihcanquin.

²¹ —Jaa pihibo ta hicha janishqui. Haiboboya baquebo toponyamahah bi bebo rahsi topovah ta cinco mil janishqui.

Hian benichi Jesus jahui

(Mr 6.45-52; Jn 6.16-21)

²² —Jaa pecaho ta jahuen haxenicabo yohinishqui:

—Hean hen nea jonibo camanon nontin nanetax pohquejaquescanahue —hahquin jato yohiquin.

²³ —Tsamataibo camahax sca, jano jai mahchi manihihnat cahi, jaa huesti caxon Papa yocanoxon hihquish. Yamescaya sca jaa huesti janobaneti.

²⁴ —Jahuen nonti pohquejaqueti cahi hochoscai. Behchoman tsahkahah huinahahbo bi cacasquimahi. Nihuen jato behchihah huinacasquimacanquin.

²⁵ —Xaba jahui hochoma sca hian benichi jato qui Jesus cahi.

²⁶ —Hian benichi jahui jisish, jahuen haxenicabo hihti raqueti. Yoshin tah qui hihquish, raquetax sai saihihcani.

²⁷ —Jaatian:

—Raqueyamanahue. Hea tah hen qui. Rahteyamanahue —hahquin jato.

²⁸ —Mia hihxon hea yohihue, Hihbon, hen jene benicanaxon mia behchihi canon —hahquin Pedronen.

²⁹ —Johue —jaáh sca picotax jene benichi Jesus qui cahi.

³⁰ —Caquin bi behchon jisish, raquerihbiscai. Jene meran hihquicatsi sca jaax sai saihihquish:

—Hihbon, hea bihhue —hih sca jai.

³¹ —Mehuetanxon huenihihmixon sca:

—Hicha tahma res tah min shinancoinai. ¿Jahua jenquetsahin min shinancoinyamahin? —hahscaquin Jesusen.

³² —Nontin nanexon sca nihue tantinon yohiquin.

³³ —Jaa jisxon, hahbe cahibaan hahqui raboxonen tisquihahpaquexon:

—Mia coin tah min Papa Diósen baque qui —hahcanquin.

Genesaret janinhahbo jan rohajahi

(Mr 6.53-56)

³⁴ —Hoque quexa nocotax sca Genesaret jema qui nococani.

³⁵ —Janohahbaan sca jaa nocotaibo jisxon, Jesus honanxon janobo jai jemabo janin quenamacanquin, hisinyahpabo benon hihxon. Jaa copi jascapahbo becanquin.

³⁶ —Jesus qui caxon, hihti yocacanquin.

—Miin coton quexa pishca res hea mehemahue, hen rohanon —hahcanquin. Mehehax res sca hisinyamascai. Sircalahin sca jacani.

15

Hahan jointi rishtajatibo

(Mr 7.1-23)

¹ —Jerusalen janinhax sca caibo nocoti becani. Fariseobo betan jaton huisha honanbo. Nocoxon sca:

² —Miin haxenicabaan ta mechoquihxonma pihiqui. *Jahua copi jascajacanquin, noquen xenibaan yohini quescajayaquin?* —hahcanquin yocaquin.

³ —Maton caya tah man Papa Diosen yohini quescajayaamanoxon huetsajaquin jonibo haxemahi. *Jahua copi man jascajahn?*

⁴ Papan ta yohinishqui: Miin papahon queenhue; miin mamahon rihbi queenhue hahquin. Huetsa rihbijan yohini: Jahuen papa qui tiromahi yohuanai joni queyocahinnon tan rehtetihi. Jahuen mama qui tiromahi yohuanai joni jascajaribiquin.

⁵ Papan mato jascajaquin yohinh bi tah man huetsajaquin jonibo yohihi. Jaton mamboya jaton papabo yanapanyamahabo hihxon tah man jato yohihi, Maton papabo man yanapanpanan Papa Dios hinantijanahue hah tah man jato jai.

⁶ Jascajaquin tah man maton haxemati joiyaxon Papan joi nincayamamahi, jonibaan nincapanan.

⁷ ¡Nincacoinhcamahibon! Mato yohihi ta sirijaquin Isaíasnen yohinishqui:

⁸ Jaton janan nea jonibo hehqui siripi yohuanah bi ta jaton jointinin jahuabi nincayamahiqui.

⁹ Nescajaquin Papa Dios hahxonnahue hihxon bi ta jonibaan shinanax yohuanai joi res haxemacaniqui. Jaa copi ta yanca bi res hea yocacaniqui —jato jaquin.

¹⁰ Tسامataibo sca Benahue hahxon:

—Nincaxon nincaquin sirijanahue.

¹¹ Piquin non noquen poco janin nanehiton ta noquen jointi rishtajayamahiqui. Noque jointi rishtajahi ta noquen jana janinhax picotaibo qui —jato jaquin.

¹² Jahuen haxenicabo sca jaa pataxi becani. Pataxxon sca:

—¿Min yohihi nincacax fariseobo sinascai min honanyamahin? —hahcani.

¹³ —Jahuen huai janin jaan banayamani meraxon ta heen Papan mexabahinxon potatihiqui.

¹⁴ Sinaresnon jato jenenahue. Benchexon bi ta bahi jismahi bebobonacaniqui. Benchen hahbe benche hiohax ta rabebi xanqueman paquetihiqui.

¹⁵ —Min noque yohiha jaa patax queha joi, jahua hihcatsihquiquin? Noque yohihue —hahquin Pedronen.

¹⁶ —¿Maton rihbi man honanyamaparihin?

¹⁷ —Noquen jana janin hihquihax noquen poco janin huinotax pohi sca jathihibi piti picotihqui man honanyamahin?

¹⁸ Noquen jana janinhax Cainaibo ta noquen jointi janinhax Cainihqui. Jascapahbaan ta noquen jointi rishtajahiqui.

¹⁹ Noquen jointi janinhax Cainai ta shinan tiromabo qui. Joni rehteti, tsiniti, haiboya shiroti, yometshti, joni huetsa qui quesahi yohuant, Papa qui tiromahi yohuant.

²⁰ Jascapahbo shinan ta hahan jointi rishtatih qui. Mechoquihxonma piquin bi tah non jascajaquin noquen jointi rishtajatimahi —jato jaquin.

Jesus nincacoinai jaton nahua haibo

(Mr 7.24-30)

²¹ Janohax picotax sca Tiro jema janinbo sca Jesus betan bocani, Sidon jema janinbo cahi, Jesus betan.

²² Jesus nocotai merahax Cananeo haibo sca jahui, jano jihuetai haibo. Quenáhonahi joxon hihi yocaquin.

—Hehon shinanhue, Hihbon, Davidinin baquen. Yoshiman hihbojaha ta heen baque haibo hihi hisinihqui —hahquin.

²³ Hihti yocacah bi jahua hihyamahi. Jahuen haxenicabaan sca Jesus pataxxon yohiquin:

—Yohihue, jan catannon. Sai saihihanan ta noque chibambenahiqui —hahcanquin.

²⁴ —Noquen nahuabo qui ma bi manotai Israeli baquebo qui res hen jonon ta Papan hea raannishqui —Jesusen jaquin.

²⁵ Jaa bebon sca joxon betihhpaquexon haibaan yohiquin:

—Jenquetsaha ra hea jaxonhue, Hihbon.

²⁶ —Baquebo bichinxon hochiti jaton piti hinanah ta tiroma qui —Jesusen jaquin.

²⁷ —Tiroma rahan, Hihbon. Jaabi ta jaton hihbaan misa janinhax paquetai tequeromishin hochitinin piti qui —hahquin haibaan.

²⁸ —Min tah min shinancoinai, haibon. Min yocacai quescabijaquin tah hen mia hahxonai —Jesusen jaquin. Jaatianbi ta jaa haibaan baque sircachinnishqui, rohascrai.

Mesco hisinyahpabo Jesusen rohajahi

²⁹ Janohax cahax sca, Galilea hian quetanbahini cahax, mahchi manichish jano Jesus tsahoti.

³⁰ Hihti caibo jonibo jahui, jaa chibabenahi. Jaton hisinyahpabo hihuecanquin, chantobo, benchebo, meyosmabo, joyobo, mesco hisinyahpabo hicha bi res becanquin. Jesus bebonbi jato taracanrenencanquin, jato jatihibi rohajascanon.

³¹ Jato rohajahiya ta tsinquijsaquaetaibo rahte rahtenishqui. Joyobo yohuanscrai, meyosmabo sircalahinscrai, chantobo nihresscrai, benchebaan jisresscaya, rahtetax:

—Noquen Papa Diosen ta hihtijaquin noque hahxonihqui —hihcani.

Cuatro mil bebobo Jesusen pimahi

(*Mr 8.1-10*)

³² Jahuen haxenicabo quenabohanxon sca Jesusen jato yohiquin.

—Nea tsinquijsaquaetaibohon tah hen shinanai. Quimisha neten sca ta nenobi banecaniqui, pihan ta hihcankihi. Pihamxa cati tah hen jato yohicatsiyamahi. Bahin cahi bi pihamxuan hihquish nocoyamacanmis. Jatohon tah hen shinanai —jato jaquin.

³³ —¿Jahuerahnnon non tsoabi jano jihueyamahi janin hicha piti marotihin? Jaabo ta hicha qui —hah sca jacanquin jahuen haxenicabaan.

³⁴ —¿Jahuentihi paan man jain? —jato jaquin.

—Siete res ta qui. Yapa pishca rihbi —hahcanquin.

³⁵ Tsamajaquaetaibo mihtsahohti yohiscaquin, Jesusen.

³⁶ Yohixon jaton siete paanya yapa pishca bihxon Papa yohixon tehcapaquexon jahuen haxenicabo hinanquin, jaabaan sca jonibo hinanpaquerihibinon.

³⁷ Pihax yanicahinaibaan bi texejaribicanquin. Texejahabo tequebo tsinquixon siete tasa bocho bihcankihi.

³⁸ Haiboboya baquebo toponyamahah bi bebo rahsi toponah ta cuatro mil joni janishqui.

³⁹ Jonibo camahah cahiya sca ta nontin nanetax Magdala jema janin taxnati bocan-nishqui.

16

Miin coshi noque jismahue jaibo

(*Mr 8.11-13; Lc 12.54-56*)

¹ Fariseobo betan saduceobo sca becani. Jesus qui joxon:

—Papan coshiyaxon hahhue —hahcanquin, jan hahcai jisxon hahqui chaniscanoxon sca jascajacanquin.

² —Bepichaiya tah man naijisish, Nai ta joshinjaquetihqui. Bahquish ta nete siri janoxihquihih man jai.

³ Xaba paquetaiya sca tah man naijisish, Rahma ta hoi nete qui, nai ta joshiniquihih man jai. Nai jisxon tah man nete yohiti honanai. Nete joibo yohiti honanxon bi tah man Papan hahxonai jisxon jahueja Papan noque janoxihquihih man joni huetsa yohiti honanyamahi.

⁴ Tiromaboxon tah man hea yocacai, hahan honantijaquin Papan coshiyaxon hen mato jismati hea yocaquin. Tsiniti shinanyahpa quescapahbo hihquish tah man hean mato jismati man queenai. Jahuabi hahan honanti ta Papan mato jismatimahiqui. Jonas huinoni quescapa huesti ta Papan mato jismatihiqui —Jesusen jato jaquin. Jato jascajaquin yohihax caresscrai.

Fariseobaan joi cachapa

(*Mr 8.14-21*)

⁵ Hoque quexa sca Jesus betan jahuen haxenicabo cahi, pohquejaqueti. Caquin bi jaya cati piti shinanbehnobahincanquin.

⁶ —Coiramenahue. Fariseobo betan saduceobaan jai hahan paan soohihmati qui coiramenahue. Jistahin man —Jesusen jato jaquin.

⁷ —Non pitijoma jahui copi rah ta noque jascajahiqui —hah sca jacani jaabo rahsibi yohinani.

⁸ Jahua yohuan jaabo jai jahuen jointinin honanxon sca:

—¿Jahua copi man pitijoma non jahui copi rah ta qui hih man jain yohinani, ¿man hihcoinjaquin shinanyamahin?

⁹ Pichca paanyaxon non cinco mil joni pimahipi man shinanbehnoscain? ¿Texejahabo tequebo jahuentihi tasa tsinquihipixon man shinanyamascain? ¿Man honanyamahin?

¹⁰ ¿Siete paanyaxon non cuatro mil jonibo pimahipi man shinanbehnorihbiscain? Texejahabo man jahuentihi paniro tsinquihipi man shinanbehnoscain?

¹¹ Fariseobo betan saduceobaan jai hahan paan soohihmati qui coiramenahue, hen mato jaah ta maton piti copima qui. ¿Jenquetsahpahin man honanyamahin? —Jesusen jato jaquin.

¹² Jaatian pari ta honancannishqui. Hahan paan soohihmati jan hihqui bi fariseobo betan saduceobaan haxemahi joi qui coirameti jan yohiha honancanquin. Hahan paanjati jan yohiyamahi honanscacanquin.

*Papan caisah tah min qui hihqui Pedro
(Mr 8.27-30; Lc 9.18-21)*

¹³ Cesarea de Filipo jema janin sca nococani.

—¿Hea noquebaque hen jahua joni quin, jahua jacaniquin? —Jesusen jato yocauquin.

¹⁴ —Caibaan shinanah ta mia nashimanica Juan qui. Caibaan rihbi shinanah cahen Elías yamanica. Caibaana cahen Jeremías yamanica. Jaa hihyamahax cahen, huetsa rihbi Papan joi yohinicaja japhoni —hihcanni.

¹⁵ —¿Maton cahran? ¿Maton shinanah hea jahua quin? —jato jaquin.

¹⁶ —Mia tah min noquen Papan caisni joni qui, mia joti neateman jan yohini —hih sca Simon Pedro jai.

¹⁷ —Mia tah min hahan jenimati jai, Simoman, Jonasen baquen. Jonibaan res mia shinanmahama bi heen naihoh queha Papan mia shinanmaha tah min honanai.

¹⁸ —Mia tah hen Pedro janehi. Mixan main xobojaquin hahcajaquin tah hen heen jihuetaħbo rahiħ uesti yorajatħi. Min yohiha join jato jihuetaħbojaxon tah hen jato uesti yorajatħi. Tiroma yoshiman ta jato teneti haħtiptimahiqi.

¹⁹ —Hahan quehpenti hinanquin hahcajaquin tah hen mia yohihi, min heen jihuematī janin jonibo hihquimanon. Mainxon min jonibo yohiyaxiħqui ta Papan yohiħħah quescā sca jatihiq, jascabi sca janon. Mainxon min nexabo pecaquin hahcajaquin yohihi rihbi ta Papan yohihi quescā sca jatihiq —Jesusen Pedro jascjaqaquin.

²⁰ Jaatian sca Jesusen yohiquin sirijaquin: Hea Cristo hihqui tsoabi yohiyamanahue.

*Hen tah hen muhauayaxiħqui hihqui Jesus
(Mr 8.31-9.1; Lc 9.22-27)*

²¹ Jaatian pari jato yohimenoxon ta hashoan sirijaquin sca jato yohibenanishqui, jaa muhauayaxiħqui honanahbo. Jerusalen janin jaa cati jai, jano jan hicha tiromabo teneti jai, judio hapoħbaa tiromajahah bi jan teneti jai, sacerdote hapoħbaa tiromajahah jan teneti jai, jaton huisha honanbaa tiromajahah bi jan teneti jai, teneħax bi jan mahuatħihi, mahuatipish bi jahuen quimisha neten sca jan teehiħribyaxahnon jato yohiquin.

²² Nincaxon, hahmebi yohicatsihquin Jesus ninibohanxon sca Pedronen yohiquin:

—Jascari yohuanyamahue, Hihbon. Papan ta mia jascajatimahiqi. Min yohihi quescāja ta mia jatimahiqi.

²³ Pedro bejisxon sca:

—Hea jenebahini catanhue, Satanas. Papa queenai quescajayama hen janon hihxon tah min hea pantecatsihqui. Papan shinanai quescajaquinma bi tah min jonibaan shinanai quescajati honanai.

²⁴ Jascajaquin Pedro yohixon, texe rihbi sca jahuen haxenħiċċo yohirħbiquin:

—Heħchon jocatsihxon tah man matobi man queenaima sca man haħfihi. Hea re-hetħibaan bi tah hen heen Hihbaan joi jenettimahi hihxon tah man hen mato yohihi quescahijatħi.

²⁵ Mahuati qui raquetaibo ta mahuatħiħi. Jascapahbo jihuettimahi bi ta hea copi mahuataibo queyoyamanox manatiħiħi.

²⁶ —¿Nea mai jatiħobi hihħboħax bi mahuatax jahuya sca man banetihin? —Jabiyahpa queyōscaxon jahua man jatiħin? —Jabiyahpa queyoyamanoxon man jahua Papa hinanti haħtipahin?

²⁷ —Heen Papan coshi xabaya tah hen joribiyaxiħqui. Jahuen yonotiboyabi tah hen jotihi. Joxon tah hen jatiħibi jonibo tsinqixon jaabo hihpahonib o quescabijaquin jato hahxontihi, caibo copijaquin, caibo casticanquin.

²⁸ —Hen mato yohinon nincanahue. Caibo neno nichibaan tah man muhuaxonma hea quiquin haposcaax jahui man jisyaxiħqui —jato jaquin.

17

*Jesus huetsapahcagini
(Mr 9.2-13; Lc 9.28-36)*

¹ Jato jascħihi sei diaz sca Pedro, Jacobo, Jacobon huetsa Juan, jaabo rahsi quenaxon mahchi janin Jesusen jato hioquin. Jano tsoa yamahi janin mahchi quēya jato maniquinhūn.

² Jano sca ta jaton jisnun bi Jesus huetsapahcaghinnishqui. Jahuen bemanan xabati, bari xabati quescā sca jai. Jahuen chopa rihbi pehnecahini, xaba quescacahini.

³ Jaabaan jisi bi yamanihbo Moises betan Elías janohrihi nihresscái. Jesus betan yohuan yohuan rabebi janohrihi. Jato jisxon Pedronen sca Jesus yocaquin:

⁴ —Hihbon. Non neno jahue ta siri qui. Mia queenaiyahai tah non quimisha tapastihai, mina huetsa, Moisesnina huesta, Eliasena huetsa rihbi —hahquin Pedronen.

⁵ Pedro yohuanparihiya xabatai nai cohiman jato mahporenenuin. Jaa nai cohin chicho quehax yohuanai sca nincacanquin:

—Nea ta hen queenai heen baque qui. Hahan tah hen hihti jenimahi. Jaa nincanahue.

⁶ Jaa yohuanai joi nincacax, jahuen haxenicabo hihti rahtetax betihihpaquecani.

⁷ Joxon sca jato mehexon:

—Raquetaxma huenihahnahue —Jesusen jato jaquin.

⁸ Huenixon jisi bi tsoabi yamascai, Jesus huesti res.

⁹ Mahchi janinhax botopaqetui caquin sca:

—Man rahma jisi tsoabi yohiyamaxahnahue. Mahuatipish hen hahquirihbi teehihnon caman tsoabi yohiyamaxahnahue.

¹⁰ —Mia noque jihuemanica hihqui bi ta noquen huisha honanbo huetsa yohuan jaiqui. Elías pari ta joribithiqui, chini sca noque jihuemanicah hih ta jacaniqui. ¿Jahua copi jascacaniqui? —Jesusen yocacanquin.

¹¹ —Hihcoini. Elías ta joribixon jatihibi bexoja sca jaiqui.

¹² Man honannon hihxon tah hen mato yohiscái: Elías ta moa joribiscanishqui. Jahuiton bi ta jaa hihqui honanyamacannishqui hapobaan. Jaa honanxonma ta queenaibo quescajaquin jahancanhoxqui. Jascaja rihbi ta hea jayaxihcanihqui —jato jaquin.

¹³ Jaatian ta Elías janohrihi bi nashimanica Juan jan yohihi honanscacannishqui.

Jomiyahpa Jesusen rohajahi

(Mr 9.14-29; Lc 9.37-43)

¹⁴ Botopaqetax cahx tsama manahitaibo qui nococani. Jesus behchihax jaa bebonbi huesti jonin raboxonen tisquihahpaquexon:

¹⁵ —Hihbon, jenquetsaha ra heen baque hea jaxonhue. Tehquehahqui ta hihti jomihiqui. Hicha coti ta chihi janin paquetihqui. Jeneho rihbi ta paqueresiqui.

¹⁶ Miin haxenicabo qui hen hihuehah bi ta rohajati hahtipahyamacanaxqui —hahquin.

¹⁷ —¡Shinancoinjomabon! Shinanquin sirijayamahibo tah man qui. ¿Jahuentiho basi hen mato betan hihquiya pari man pontetihin? ¿Jahuentiho basi cahra hen mato teneti Jain? Jaa hihuenahue —Jesusen jato jaquin.

¹⁸ —Jaa jenebahinhue —Jesusen coshin jaáh sca ta jaa baque jenebahini tiroma yoshin canishqui. Jaatianbi rohacahinscái, siriscái, jaa baque.

¹⁹ Jesus qui sca jaabo rahsibi jahuen haxenicabo tsinquiaquexon yocacanquin:

—¿Jahua jenquetsahiya non camati hahtipahyamaquaquin? —hahcana.

²⁰ —Man hicha shinancoinyamahi copi, rahan. Hen mato yohihah nincanahue: Moxo bero hexti pishca hihqui quescaji maton shinan hicha tahma pishca res jaxon cah man nea mahchi yohirestih. Join res potati tah man hahtipahquehahnai. Catanhue man jaah cahen cahen.

²¹ Jaatian man hahtipahyamahibo yamahan —jato jaquin.

Mahua tah hen jayaxihqui hihribibi Jesus

(Mr 9.30-32; Lc 9.43-45)

²² Galilea hian qui nocorihbixon sca: —Hea bihnon ta hapobo bihmayahcihihqui, hea rehrehahbo hihxon.

²³ Rehrehipibaan bi tah hen quimisha neten hihquish hahquirihbi teehihyaxihqui —Jesusen jato jaquin. Yohihah benáscacani. Hihti benati.

Papan xobo bexojati copi yocacahtaibo

²⁴ Janohax Capernaum jema janin sca bocani. Nocotaiya Papan xobo bexojati cobrannicabaan Pedro yocaquin:

—¿Papan xobo bexojati coriqui maton haxemanicahten copijayamahiquin?

²⁵ —Copijaquin rahan —hihcahini sca Pedro cahi. Jano Jesus jai xoboho mapetai bi Jesusen pari jaa yocaquin:

—¿Min jenquetsahpa shinananin, Simoman? Hea yohihue: ¿mai meha quiquin hapobaan tsoabo cobraniquin? ¿Jatonah bi jaton baquebo nan? ¿Huetsabo nan?

²⁶ —Huetsabo rahan, Hihbon.

—Hihcoini. Jaton baquebo ta cobrantimabo qui.

²⁷ Jaabi, sinayamahahbo hiaman mishquitanhue. Mishquxon min bihmenohi yapa bihxon, jaxbaxon, jahuen jana janin jai coriqui bihhue. Jaa bihxon tah min noque rabebi copijaxontihi —Jesusen jaquin.

18

*Tsoa non hashoan yohuan hihbo quin hihquibo
(Mr 9.33-37; Lc 9.46-48)*

¹ Jaatian jahuen haxenicabo sca joxon, Jesus yocacanquin: —¿Papan jihuematici janin tsoa non hashoan yohuan hihbo quin, hihbon?

² Baque pishca quenabohanxon sca jato tocambi nichinquin.

³ Naponbi nichinxon sca:

—Hen mato yohinon, nincanahue. Baque pishca quescanahue. Shinan ponteyamahax tah man Papan jihuematici janin nocotimabirestihi.

⁴ Jahuen hapoti coshi yamahi ta nea baque pishcaten honanihqui. Jascajaquin shinanaihba ta Papan jihuematici janin hashoan yohuan hihbo qui.

⁵ Nescapa baque pishca huesti res heen janen sirijaquin bihxon yanapanquin tah man hea rihbi jascajahi.

*Hohchapan man paquemis hihqui.
(Mr 9.42-48; Lc 17.1-2)*

⁶ Nescapa hea nincaconai baque pishca hohchamahi joni ta hihti hohcha jaiqui. Hihti-hosi macan renti qui tenexxon hian naponbi potahah jenimatihihma bi ta nescapa pishca jan hohchamani copi Papan casticanha hihti tiromati qui.

⁷ Mai mehabo ta hahraai hiyaxihquiqui, huetsabo hohchamanish. Hohchati qui caibo tecayacahinti hahtipahyahibaan bi ta jato hohchamanibo hashoan hahraai hiyaxihquiqui, Papan casticanti jato qui paquetah.

⁸ ¿Miin mequeman min hohchatain? Mextehue. ¿Miin taken min hohcatain? Taxtehixon potahue. Mento hiyamahax chantohax queyoyamanox manatah cahen tiromama. Rabe mequenyahpahax rabe taheyahpa chihi qui potahah cahen hihti tiromahan.

⁹ ¿Miin beron mia hohchamahiquin? Tsecaxon potahue. Rabe beroyahpahax bi johue-hihnatai chihi perehihqui janin cahá ta tiroma bi res qui. Benchehax bi queyoyamanox manatah cahen hashoan siri.

*Manotai carnero
(Lc 15.3-7)*

¹⁰ Coiramalahue. Nescapa baque pishca jahuajoma hihqui man shinamis. Naihoxon ta jato coiranquin jascabijaquin heen naihoh queha Papa yocaxoncaniqui jahuen yonotibaa.

¹¹ Manotaibo jihuematici tah hen joni.

¹² Huesti joni cien carnerobo jai quesca tah qui. Huesti jahuen carnero cahen manotan. Noventinueve pasto janinbi potabahini ta manotai huesti benahi sca catihiqui.

¹³ Caxon merahax ta jahan hihti jenimatihiqui. Texe behnotaxma pasto chian nichi copi jenimahax bi ta manotai rahma merahax hashoan jenimascajui. Jasca coin tah qui.

¹⁴ Ni huestibi nescapa baque pishca manotima ta maton naihoh queha Papa queenihqui.

*Jascabi sca janon jenehue, non jatihi
(Lc 17.3)*

¹⁵ Miin huetsa mihqui hohchatai jaa benahi caxon, jaa huesti yohuanquihnxon jan hohchatai yohihue. Mian yohihah jaan nincacaiya tah min miin huetsa merarihbi sca jai, jan manoquehana.

¹⁶ Min yohihah bi nincacatsihyamahiya huetsa rihbi miin huetsa benatahhue. Huesti hiyamahiya rabe meraxon, hioxon, jaton nincanonbi miin huetsa yohirihbihue. Huishani joi jai quescaquin hahhue, Yohicoin sta jaaxqui jaábo hihxon rabe hioxon man yohuanai nincamaquin.

¹⁷ Jaabaan rihbi yohihah bi nincacatsihyamaparihiya, miin huetsabo jatihibi sca yohihue. Jatihibonbi sca yohihah bi nincayosmaparihiya, nahuah tah qui hihxon jenebahinsahue, miin caibohax bi nahuascai quescanon.

¹⁸ Hen mato yohinon nincanahue. Jascabi sca janon man mainxon jascajaquin yohihi jatihibi ta naihoxon jascarihbisi yohihah sca jatihibi. Man mainxon yohixon bexojahi jatihibi ta naihoxon rihbi bexojaha sca jatihibi.

¹⁹ Huetsa rihbi hen mato yohinon: Huesti shinanyaxon man joni huetsa betan tsin-quixon yocacah ta man yocacai jatihibi heen naihoh queha Papan mato hahxontihiqui.

²⁰ Jano man rabe hiyamahax quimisha joni heen janen tsinquitai janin tah hen hea rihbi hihtihi. Jaa copi Papan mato hahxontihiqui honannahue —jato jaquin.

²¹ Jesus patax nihquirani joxon Pedronen yocaquin:

—¿Jahuentihi coti noquen huetsa noque qui tiromahah bi non hahan shinanxon, jascabi sca janon jenehue non jatihih, Hihbon, noque qui jan tiromahi non shinanyamascanon? —Hasta siete coti non jascajatihin?

²² —Siete coti res ma bi setenta coti siete janaxon topovah, jano caman, rahan.

²³ Papan jihue cahen quiquin hapon hahcai quescapah. Jaa quiquin hapon cahqui jaton cuenta copi jahuen jonibo betan bexohah.

²⁴ Jaton cuenta toponihnihiya bi jaton hani coriqui huesti mil ribinai joni jahui.

²⁵ Jahuatohonbi jahuen ribin copijatimahiya sca:

Hina sca jaábo nea joni maromanahue, jahuen haiboya jahuen baquebo rihbi maromaxon jahuen jahuaraborabo jatihibi maromanahue, jan ribinai copi hen coriqui bilihon hah ca hapon jai.

²⁶ Jaatian ta raboxonen nihxon jahuen jonin hihti yocatihiqui:

Hea tenehue, hihbon. Mia tah hen jatihibi copijayaxihqui.

²⁷ Hahan shinanxon sca ta Jascabi sca janon jenehue jahuen hapon jatihihi, ribinjoma sca jan janon.

²⁸ Ribinjoma caxon sca cahen jahuen hahbe teenica cien coriqui res jaa ribinai meratihi. Meraxon texecobahinxon, Min hea ribinai hea copijatahi tsuh hahtih.

²⁹ Raboxonen nihxon sca ta jahuen hahbe teenicaton hihti yocatihiqui: Hea tenehue. Mia tah hen copijayaxihqui.

³⁰ Jan hihti yocacah bi cahen jeenhahyamaxon bi policia bihmaxon jatihibi jan copi-janon caman sipo xoboho tsahontihi.

³¹ Jan jascajahi jisish texe jahuen hahbe teenicabo hihti benati. Benatax ta jaton hapo yohihi caxon jatihibi yohicantihiqui.

³² Jahuen joni quenamaxon sca ta jahuen hapon yohitihiqui: Tiroman, min hea hihti yocacah tah hen mia Jascabi sca janon jenehue hahcaqui.

³³ Hen mia jascajaxonah cahen mian rihbi sca miin hahbe teetai joni mian hahxontihi, hahquin.

³⁴ Sinaxon sca ta jahuen sipo xobo coirannicabo jaa joni hinantihiqui, jahuen ribin jatihibi copijanon caman.

³⁵ Maton huetsa mato qui tiromahah bi man maton jointiboyaxonbi man jaa hohmis-mayamahiya ta heen naihoh queha Papan maton hohcha shinanbehnoyamaribitihiqui —Jesusen jato jaquin.

19

*Noquen hihquihinti non potatimahi
(Mr 10.1-12; Lc 16.18)*

¹ Jato jascajaquin yohihax sca Galilea mai janinhax cahax Judea main sca cahi cahi. Nocotax Jordan huean janinbo cahi, hoque quexa.

² Hihti caibo rihbi jaa chibani bocani. Hahqui nocotaiboya, janoxonbi jaton hisinbo jaan rohajaquin.

³ Fariseobo rihbi sca jahui, Jahuen yohuan copi rehtenoxon hihxon, Jesus yocacanquin: —¿Queenxon copi res noquen haibo potacatsihquin non potatimahin? —hahcanquin.

⁴ —¿Jonijamenoquin haibo betan bebo Papan jato jonijani man jahuen quirica janin jisyamaniquin?

⁵ Jaa copi ta jahuen mama jahuen papa jenebahini sca jahuen haibo betan jihuetai jahuen bene catihiqui. ¿Rabehax bi huesti yora sca jaabo rabe sca janon jahuen haibo bebaan hihquihinti Papan yohihi man honanyamahin?

⁶ Jaa copi ta rabehax bi huesti yora sca qui. Papan ta jato huesti yorajahiqui. Jaan huesti yorajaha tsoanbi jenemayamanahue hil ca jaihsen —Jesusen jato jaquin.

⁷ —¿Jascahiya jahua copi sca noquen haibo potanoxon non jahuen jaya cati quirica huishaxon potati Moisesnin yohinishquin? —hahcanquin.

⁸ —Mato nincayosmabo copi ta Moisesnin mato jascajaquin yohinishqui. Noquen haibo non potanon Papan noque jonijani que ma bi ta maton haibo man potacatsihqui copi mato jascajanishqui.

⁹ Hean sca tah hen mato yohihi: Maton haibo tsinihima bi jaa potaxon huetsa sca bichish tah man jaa copi hohchayahpaboscai —jato jaquin.

¹⁰ —Noquen haibo non potatimahiya ta haibojoma jihuetah hashoan siri qui —hihcani jahuen haxenicabo sca.

¹¹ —Jaa man yohuanai ta jatihibi jonibaan shinantimahihi, caibaan res. Jascari jahue Papan jaah ta caibaan res jascajaquin shinantihiqui.

¹² Queejomabó ta mesco jaiqui. Caibo cahen jascapahbo caini. Caibo cahen huetsabaan jato jascapahhue hahca queejoma sca baneti. Caibo rihbi cahen Papan jihuematí joi yohinoxon queejoma banetan. Nincati hahtipahxon nincanahue –jato jaquin.

Baque romishin Jesusen yocaxonai
(*Mr 10.13-16; Lc 18.15-17*)

¹³ Jaatian baquebo sca Jesus qui becanquin. Jan jato mehexon Papa yocaxonnon hihxon hihuecanquin. Hihuehibaan bi jahuen haxenicabaan jato Jaya beyamanahue hahquin.

¹⁴ –Jaya behábo jato panteyamanahue. Joresnon, jotima yohiyamanahue. Jascapahbo ta heen Papan jihue jamin canicahbo qui –Jesusen jato jaquin.

¹⁵ Jato jascajaquin yohixon baquebo sca mehexon janoxonbi Papa jato yocaxonquin.

Coriquiyahpaton Jesus yohuanquihnai
(*Mr 10.17-31; Lc 18.18-30*)

¹⁶ Huetsa joni sca jahui, beronan tahni.

–Maestron, ¿queyoyamanox mananoxon jahua siri shinanti hen pishinain? –hahquin yocaquequin.

¹⁷ –¿Jenquetsahpahiya min hea sirijati joibo yocacain? Huesti res ta siri qui. Queyoyamanox manacatsihquin Papan mia yohini quescajahue –hahquin Jesusen.

¹⁸ –Jahua jan yohini nan? –hahscaquequin.

–Rehetyamahue. Tsiniyamahue. Yometsohyamahue. Quesayamahue.

¹⁹ Miin papaya miin mamahon queenhue. Mihmebi min queemehti hihqui quescarihibi joni huetsahon queenhue –hahquin Jesusen.

²⁰ Jatihibi tah hen jaresscái. ¿Jahua hashoan hen pishintihin? –hahquin beronanen.

²¹ –Jahuabi pishinyamacatsihxon miin jahuaborabo maromatanhue. Maromaxon jahuaborajomabó jaa coríqui hinanhue. Jaatian tah min naihoh hicha jahuabora jatihi. Jato hinanax, hehbetan cahi sca jotanhue –Jesusen jaa jaquin.

²² Jascayah, benacahini beronan caresscái, jahuen jahuaborabo hicha jaax copi.

²³ Jaa benatax cahiya, jahuen haxenicabo sca Jesusen yohiquin:

–Man honannon hihxon tah hen mato yohihi. Coriquiyahpabo Papan jihuematici janin hihquitíta tee bi res qui.

²⁴ Hen mato yohiribinon: Xohmox bero qui hahua huinomati tee que bi ta Papan jihuematici janin coriquiyahpabo cati hashoan tee bi res qui.

²⁵ Jesus jascari yohuanai nincacax ta jahuen haxenicabo rahte rahtenishqui.

–¿Coriquiyahpabo cati tee hihquiya tsoa non Papan jihuematici janin catihin? –hihcani.

²⁶ Jato jatihibi bejisxon sca:

–Jonibo hahmebi jano nocoti hahtipahyamahi bi ta Papan jatihibijati hahtipahiqui –Jesusen jato jaquin.

²⁷ –Noquen caya tah non noquen jahuaborabo jatihibi jenebehnanxon mia chibanaí, Hihbon. ¿Jahua sca non bihyaxihquin? –hahscaquequin Pedronen.

²⁸ –Nincanahue, hen mato yohinon. Hea chibanaibo hihquish tah man nete behna tian sca hapobo sca man jihuethi. Quiquin hihbo hihxon hen jatihibi hihbojahi tian tah man Papan israeli baquebo jatihibi jixontihí, hapo rahsixon.

²⁹ Hea hahxonnoxon jaton jihuebo jenebahinaibo, jaton huetsabo jenebahinaibo, jaton chocabo jenebahinaibo, jaton papa jaton mama jenebahinaibo, jaton banabo jenebahinaibo, jascapahbo tah hen hashoan hicha hinantíhi. Huesti jan jenebahinni tah hen cien sca jaa hinantíhi. Queyoyamanox manataibo rihbi ta jaabo jatihiqui.

³⁰ Hen jascajaquin hahxontíhi bi nincanahue, hen mato yohinon: Hicha bebohibo ta chinibo sca hihyaxihquiqui. Hicha chini chininish ta bebocahinyaxihcanihqui.

20

Teexonicahbo

¹ Papan jihuematici ta huai hihbaan hahcai quescapah qui. Jaa copi tah hen mato yohihi. Jaa huai hihbo cah hen yamequiri cahan, jahuen bimi tsinquionnicahbo benahi.

² Teexonicahbo meraxon, huesti neten teexona patorobaan copijahi tihibi copijati-jaxon, jahuen huai janin jato raanquin.

³ Bari nai pohahihnatayi sca caxon, huetsa teenicabo rihbi meraquin, jaton nihti janin cahuuancahresiba.

⁴ Jaabo rihbi quenaxon:

–Heen huai chian bottannahue mato rihbi. Ponte shinanxon tah hen mato copijatihi –jato jaquin.

⁵ Jahuen huai chian sca bocani. Barin manan tsahcahiya sca caribixon huetsabo meraxon jascajaribiquin. Bari racacahuaniyai sca jascajaribiquin, caibo rihbi sca meraxon.

⁶ Bari hihquiscái cahiya sca caxon, nihresaibo merarihbxion jato yocaquin:

—¿Jahua copi man jeman res nihbahinahin?

⁷ —Tsoanbi ta noque teemayamahiqui —hahcanquin.

—Heen huai chian teeti botannahue, mato rihbi —jato jaquin.

⁸ Bari hiquihiya sca jahuen teemanica yohiquin:

—Noquen jonibo quenahue. Chini hihquihahbo pari copijahue, jascajaquin teemenohibo chini sca copijanoxon.

⁹ Bari hihquicatsiscayia cahabo jahuiya sca jato copijapaquequin, joni tihibi huesti neten teexonbahinaha patorobaan copijahi tihi copijaquin.

¹⁰ Chini sca teemenohibo jahui. Noque rah ta hashoan hicha copijanoxihquiqui hihcanci. Jascaraibaan bi jaabo rihbi jatihi rihbi copijaquin.

¹¹ Jaton coriqui bichish sca, huai hihbo qui sinati yohuancanacani.

¹² —Hoa chini hihquihahbo ta huesti hora res teecanaxqui. Non tee teexon bari tenebahinahí bi ta jatíhi res noque copijahiqui —hihcanci.

¹³ Huai hihbaan sca yohiquin:

—Mia tah hen tiromajayamahi, chahin. ¿Jaatihi canannoxon huesti neten teebahinati min yohiyamahahquin?

¹⁴ Miín coriqui catanhue. Hen mia hinanai tihi rihbi tah hen chini hihquihahbo hinanai, queenxon copi.

¹⁵ Heabi hen queenai quescajaquin heen coriqui hen hinanti hahtipahyamahin? ¿Hen huetsa joni hicha hinanai copi miín sinatain? —hahscäuquin hihbaan.

¹⁶ Jascajaquin rihbi ta chinitaibaan beboyaxihquiqui, bebohibo rihbi ta chiniyaxi-hquiqui —Jesusen jaquin.

Hen tah hen mahuayaxihqui hihqui Jesus

(Mr 10.32-34; Lc 18.31-34)

¹⁷ Jaa pecaho sca Jerusalen jema janin Jesus cahi cahi. Bahin caquin, jahuen doce haxemanicahbo quenabohanxon, jato yohiquin:

¹⁸ —Jerusalen janin tah non cahi. Jano ta sacerdote hapobaan hea bihyaxihquiqui, caibaan hea jato bimahah. Jaton huisha honanbo betan yohuanxon ta hea rehteti yohiyaxihcanihqui.

¹⁹ Hea retehahbo hihxon ta nahuabo hea hinanyaxihcanihqui. Hea hosan hosanxon, rishqui rishquixon jihuín hueonxon hea rehtenon ta jascajayaixihcanihqui. Retehahbo bi tah hen quimisha neten hihquish hahquirihbi teehihyaxihqui. Man honannon hihxon tah hen mato yohihi —jato jaquin.

Jacoboya Juaman maman yocacai

(Mr 10.35-45)

²⁰ Jaatian Zebedeon baquebaan mama sca jahui. Jahuen baque rabeya joxon jan queenai yocanoxon Jesus bebon raboxonen nichi.

²¹ —¿Jahua min queenain? —Jesusen jaquin.

—Mia noquen quiquin hapo hihqui tian, nea heen baque rabe mia namanbi hapo rabe hihnon yohixonhue. Huetsan mia mécayahoxon yononon, huetsan mia memihohxon yononon yohixonhue —hahquin haibaan.

²² —Min yocacai tah min honanyamahi. ¿Hean xehayaxihqui mocani jaabaan xehati hahtipahiquin? —Jesusen jaquin.

—Hahtipahquin rahan —hahquin.

²³ —Hean xehahi mocani tah man xehatihi. Man jaa tenehi bi ta hea pataxxon hehbe hapoti hen mato yohiti hahtipahyamahi. Heen Papan ta hea jascajati yohiyamahiqui. Jaan honanai qui ta Papan jaa hinanyaxihquiqui, jato jascajati yohinixhon —hahquin.

²⁴ Texe jahuen haxemanicahbaan sca nincaxon Zebedeon baque rabe sinajacanquin.

²⁵ Jato sinajahibaan bi Jesusen jato yohiquin:

—Hen mato yohinon benahue —hahxon —nahua hapobaan jaton caibo yono yonohi tah man honanai. Jato ta hihbojacaniqui jaton hapobaan.

²⁶ Maton tah man jascajatimahi. Hapocatsihxon texe hahxoncoinnahue yanapanquin.

²⁷ Bebonicacatsihquish, jaton yonotinahue.

²⁸ Jonibaan hea hahxonnon hihquish tah hen joyamaniqui. Jato hahxonnoxon hihquish tah hen joníqui, noquebaque hihqui bi. Hicha jonibo jihuén hihxon tah hen hehri jato rehtemahi. Hen jato hahxonti shinanai quescajaquin shinannahue —jato jaquin.

Rabe benche Jesusen rohajahi

(Mr 10.46-52; Lc 18.35-43)

²⁹ Jericó jema janin nocotax sca, janohax Jerusalen quiri jahuiton sca hihti caibo jato chibbanbenahi becani.

³⁰ Jaa bahi quexabi ta rabe benche janishqui, huinotaibo nincaresi tsahotai. Huinotai ta Jesus qui, hihquibo nincacax sca quenácahincani.

—Hihbon, noquehon shinanhue, Davidinin baquen —hihcanci.

³¹ Jascari quenataibaan bi Netenahue hahcanquin, huinotaibaan. Netenahue hahcabo bi hashoan sca quenacani:

—Noquehon shinanhue, Davidinin baquen.

³² Nihrenenxon sca Jesusen jato quenaquin.

—¿Hen mato jenquetsahaxonti man queenain? —hihqui.

³³ —Non jisnon noquen bero rohajahue, Hihbon —hahcanquin.

³⁴ Jaatian jatohon hihti shinanxon, bero qui jato mehexon jato rohajaquin. Jaton bero sricahinax, hahbetanbi sca becani, rabebi.

21

Jerusalen janin Jesus nocotai

(Mr 11.1-11; Lc 19.28-40; Jn 12.12-19)

¹ Jerusalen hochoma sca becani. Bettagé jema pishca qui nocotax, Olivo manan qui nococani. Janoxon sca jahuen haxenica rabe raannoxxon yohiquin.

² —Hoa hoque jai jema janin caxon tah man caballo meraxihqui. Nexa tah man meraxihqui, jahuen baqueyabi. Rabebi pecaxon jahuen baqueyabi hea bexontannahue.

³ Jahujea man jain hahcá, Noquen Hihbo ta nea pishiniqui hihnahue. Jaatian ta mato bexonmatihqui —jato jaquin.

⁴ Neateman Papan joi huishanicabaan yohini quescabijaquin janon ta jato jascajanishqui.

⁵ Jerusalen janin jihuetaibo nescajaquin yohinahue: Jisnahue. Maton quiquin hapo ta nocoti jahuiqui. Quiquin hapobo jahui quescarihma bi joni quesa jahuiqui, caballo cahtsahotax. Caballo baque res cahtsahotax ta jahuiqui, noquen jahuaborabo noque papixonnica caballo baquen ta jahuiqui hihqui jaa huisha.

⁶ Jan yohihab quesca sca caxon, nexa sca caballo meracanquin jahuen haxenicabaan.

⁷ Pecaxon, jahuen baqueyabi becanquin. Caballo baque jaton chop ahpohenxon, jano Jesus cahtsahonbenacanquin.

⁸ Hihti caibaan jaton cotonbo pecaxon jano Jesus jonoxihqui bahinbi mijancanquin, hahan jonon. Caibaan rihbi jepe pehi xatexon jascajaribiquin, mijanquin.

⁹ Caibo bebohi becani, caibo rihbi hahchon becani. Quenáhonahi becani:

—David xohtah ta jahuiqui. Hahxonhue. Papa Diosen janen ta jahuiqui. Papan shinanya ta jahuiqui. Jaa hahxonhue, Papan —hihcanci.

¹⁰ Jascayah, Jerusalen janin hihcohi. Jaa jema janinhahbo jatihibi rahte rahtetax:

—¿Tsaa hin? —hihcanci.

¹¹ —Nea ta Papan joiya jahui joni qui, Jesus. Galilea mai mehax nocoti jahui, Nazaret jema janinhax nocoti jahui —hihcanci, tsamajaquetaibo.

Papan xobo janin tiromabo jan camahi

(Mr 11.15-19; Lc 19.45-48; Jn 2.13-22)

¹² Papan xoboho sca Jesus mapeti. Mapexon, janoxon marohiton jonibo meraxon, maromahiton rihbi meraxon, jascapahbo jatihibi camaquin. Jato picomaxon, jaton coriqui mahnenanti mesabo behonxon, nobex maromanicabaan tsahotibo hueranbohanxon, jato yohiquin:

¹³ —Papan huishani joi janin ta nea jaiqui: Heen xobo ta janoxon hea yohiti xobo qui. Jascapa xobo hihqui bi tah man jano yometso tsamati jaa xobo jai —jato jaquin.

¹⁴ Jaatian sca bencheboya chantobo jaa xoboho mapeti, Jesus jano jai copi. Jato jisxon, jaan jato rohajaquin.

¹⁵ Jahuen coshi shinaman jan jato hahxonai jisxon sacerdote hapobo betan jaton huisha honanbo sinati. Papan xoboho baquebo quenatai, Davidi xohta hahxonhue hihquibo nincacax, sina sinacani.

¹⁶ Sinaxon, Jesus yocacanquin:

—¿Jaabo yohuanai min nincayamahin? —hahcanquin.

—Nincaquin rahán. ¿Baquebo tah min mihqui siripi yohuanmahí, baquexobo rihbi, hihqui Papan huishani joi, man jahuentianbi jaa jisyamaniquin? —jato jaquin.

¹⁷ Jato jenebahini sca picoti cahax huetsa jema janin cahi, Betania jema. Jano sca hoxashinahi.

*Jesusen jihui xanamahi
(Mr 11.12-14, 20-26)*

¹⁸ Xaba paquetaiya sca jahuem Jerusalen janin nocotax picatsihscai.

¹⁹ Bahi quexabi bimi jihui huesti meraxon, bimi bichi caha bi yamahi. Pehi rahsi jai.

—Jahuentianbi bimiyamaxihhue —hahquin, jihui. Jan yohihah, xanacahinscrai.

²⁰ Jan yohiha jihui choshishi jisish, rahte rahtetax jahuen haxenicabo yohuan:

—Jenquetsahpi jaa jihui xanacahiniquin? —hihcanni.

²¹ Yohuanai nincaxon, jato yohiquin:

—Man honannon hihxon tah hen mato yohihi. Papan mato hahxoncointihi honanxon, hahxonyama rah ta hea jatihiqui shinanyamaxon tah man jascapa yohiti hahtipahtihi. Jascapah res ma bi tah man hoa manan quescapahbo rihbi yohitihi, Huenihihnatax hoa hiaman paquehue. Shinancoinxon man yohihah ta man yohihi quescatihiqui.

²² Papan mato hahxoncointihi honancoinxon man yocacai jatihibi ta jaan mato hahxonyax-ihquiipi.

*Tsoan yohihah min jascajahn hihquibo
(Mr 11.27-33; Lc 20.1-8)*

²³ Jaatian sca nocotax Papan xoboho mapexon janu nocohihntai jonibo haxemaquin. Jato haxemahiya bi sacerdote hapobo becani, jato hahbe hapobo betan. Joxon:

—¿Tsoan mia jascajahue hahca min neno jascajahipiquin? —hahcanquin.

²⁴ —Mato rihbi tah hen huestijaquin yocatihi. Man hea yohihiya tah hen tsoan hea jascajahue hahcai hen mato yohirihbitili.

²⁵ —Tsoan yohihah Juaman nashimapahonishquin? —Papan yohihah nan? —Jonibaan res yohihah nan? —jato jaah bi jahuahiyama sca jacani. Jaabo rahsibi res yohinani.

—Papan yohihah rahan hih non jaiya ta noque yocaxihqui, Jahua copi sca man Juaman yohihah bi nincayamaniquin.

²⁶ Jonibaan res rahan hih tah non jatimaribhi. Tsamataibaan noque jenquetsah ra jamis. Juan Papan joi yohinica hihpahoni ta shinancaniqui —hihcanni, jaabo rahsibi yohinani.

²⁷ Yohinanxon sca:

—Non tah non honanyamahi —hahcanquin Jesus.

—Hean rihbi tah hen tsoan hea jascajahue hahcai mato yohiyamarihbibi —jato jaquin.

Rabe bebo baqueya

²⁸ Man jaa shinannon tah hen mato yohihi. Rabe bebo baqueya joni ta japahonishqui. Jahuun beboqua baque ta yohinshqui:

—Rahma noquen huai chian teetanhue, baquen —hahquin.

²⁹ Jascayah bi:

—Hen tah hen queenyamahi —hihqui. Jascarax bi chini sca pontejaquin shinanax, teeti cahi, huai chian.

³⁰ Jahuun chini sca jahuun papan jascajaquin rihbi yonoquin.

—Teeti rahan, Papan —hahcax bi jahuun chini baque cayamaribibi.

³¹ Hea yohinahue: —Jahuemehaton jahuun papan yohiha quescabijanishquin?

—Jahuun baque beboquihaton rahan —hahcanquin.

—Hihcinki. Jascarihbihi ta coriqui cobranmisboa tsini haibobo mato bebohi bocani-hqui Papan jihuematii janin cacatsihqui.

³² Papan babin canoxon ponte jihuetai Juaman mato yohihah bi tah man nincayamaniqui. Coriqui cobranmisbaan caya ta nincanishqui. Tsini haibobaan rihbi. Jaabaan nincacoincrai jisxon maton rihbi chini sca pontejaquin shinanax nincacointihi bi tah man nincacoinyamahi.

Tiromabo teexonnicaaho

(Mr 12.1-12; Lc 20.9-19)

³³ Huetsa jahan haxeti joi nincanahue. Huesti jonin ta hani huaijanishqui. Jahuun huai banaxon, jahuun senenjatibo honantijanoxon chiquebohanxon, hahan bishtaxmatijaxon, janoxon coiranti xobojaxon, jahuun huai coirantibo yohihax joribiyanoxon cahi caresscrai.

³⁴ Jahuun huai tsinquitii tian sca, jahuun jonibo raanquin, jahuun coirannicahban jahuun bimi hinannon hihxon.

³⁵ Raanah sca nococani. Nocotaiton bi jahuun coirannicahbaan jato yahtanquin. Huetsa rishquixon, huetsa rehtexon, huetsa rihbi macaman tsacaquin rehtecanquin.

³⁶ Jaa pecaho sca huetsa jahuun jonibo sca huai hihbaan raanrihbiquin, hashoan hicha sca. Raanah nocotaiton jato jascajaribicanquin.

³⁷ Chini sca jahuen baquebi raanquin. Heen baque ta nincayaxihcаниhqui hihxon jaa raanquin.

³⁸ Jahuen baque nocoti jahui merahax, yohinancani:

—Nea ta huai hihbo hiyaxihqui qui, jahuen papa mahuataiya. Jaa rihbi rehtenon benahue noquenah sca jahuen huai hihnon —hihcani.

³⁹ Nocotaiton sca yahtanxon, huai mapoho boxon rehtecanquin.

⁴⁰ ¿Joxon sca jaa huai hihbaan jahua jato jati quin? —Jesusen jato jaquin.

⁴¹ —Jato ta tiromajaquin rehtetihqui. Jahuen huai rihbi ta huetsa coirannicahbo hinantahitihiqui, bimi jai tian jahuenah hinanyaxihqui bo —hahcanquin.

⁴² —¿Papan huishani joi janin man nea jahuentianbi jisyamaniquin?

Tiroma tah qui hihxon xobojahibaan potani xobo jihui ta hahqui xobojati qui. Papa Diosen ta jaa caisihqui. Jan hahcai shinanax tah non rahtetai hihqui jaa joi.

⁴³ Jaa copi tah hen mato yohihi: Papan ta mato jahuen jihue bichinyaxihqui qui. Mato bichinxon ta maton nahuabo sca hinanyaxihqui qui, jahuen joi jai quescabijahibo.

⁴⁴ Jaa jihui qui paquetaito ta tobithihiqui. Jato qui jaa jihui paquetah ta moshi moshtaibo jayaxihqui qui —jato jaquin.

⁴⁵ Hahan haxeti joi jan yohihi nincaxon, jato qui jan jayaxon yohihi jaton hapobaan honanquin.

⁴⁶ Jaa bihcatsihquish bi jonibo qui raquexon bihyamacanquin. Papan joi yohinica tah qui hihqui bo sinacahincanmis hihquish raquecandi.

22

Huanomahi

¹ Yahtancatsihquibaan bi Jesusen jato yohipariquin hahan haxeti joi jato nincamaquin.

² Papan jihuemahi ta huesti quiquin hapon hahní quescapi qui. Jahuen baque huanomayanoxon ta jato hichaxon pitijati yohinishqui.

³ Piti hicha jaiya sca, jan yohihipibo yohitannon, jahuen jonibo raanscaquin.

Huanomaquin pih benahue hahca bi queenyamacani.

⁴ Huetsabo sca jaton hapon raanribi qui.

—Hen yohihipibo yohitannahue. Piti ta hiresscaili. Heen torobo rehtexon, xoa toro baquebo rehtexon, pitijaha ta jatihibi hiresscaili. Pihihue jato jatannahue —jato jaquin.

⁵ Caxon yohihah bi nincacatsihyamacani. Huetsa janin res bojaquetancani. Huetsa jahuen huai chian cahi. Huetsa jahuen tee janin cahi.

⁶ Caibaan rihbi jahuen jonibo bihxon, jato sinajaxon rehtecanquin.

⁷ Jaa copi ta sinaxon sca jaton quiquin hapon jahuen sontarobo sca raanxon hoa rehtemisbo rehtexon jaton xobobo mapojaribinishqui.

⁸ Jato jascajaxon sca jahuen jonibo yohirihbi qui:

—Noquen piti hiresscaili bi ta non jato yohihipibo tiromabo qui.

⁹ Hoque cahi bahin sca botannahue. Man janu merahi jatihibi jato yohibonanahue, pih behabo.

¹⁰ Yonohah sca bocani. Bahin caquin jonibo meraxon chanixon jahuen huanomati janin jato becanquin. Siriboya tiromabo mesco jato becanquin, jahuen huanomati piti janin hihti caibo sca joni janon.

¹¹ Pihibo jisi caxon sca jayaxon huanomati chopasahuehaxma huesti joni pih tsah-taiton hapon meraquin.

¹² Meraxon:

—¿Jenquetsahpahi min jayaxon huanomati chopasahuehaxma neno hihcohin, hiconin? —hapon jaah bi jahuahiyamahi.

¹³ Piti metexonaibo sca quenaxon:

—Nea menexxon tanexnahue. Nexaxon nenoma qui bahquish chian potanahue. Jano bahquish chian potahahbo ta saisaihihqui qui, hisinxon xeta tais tais hahquin.

¹⁴ Hicha quenamaha bi ta huestibo res hihquinica qui —Jesusen jato jaquin.

Non hapo copijatihin hihqui bo

(Mr 12.13-17; Lc 20.20-26)

¹⁵ Yohihah, yohinani fariseobo caresscaili. Jahuen joi copi rehtenoxon jenquetsahaxon non tiroma yohuanmatihin hihcani.

¹⁶ Jatonahabi jaton haxenicabo sca raancanquin, herodianobo betan caxon Jesus yocac-abho. Cahi nocoxon sca, yocacanquin:

—Mian tah min sirijaquin yohihi, maestron. Non tah non honanai. Mian tah min noque Papan bahi sirijaquin honanmahi. Tsoa qui bi raquexonma tah min jaabijaquin noque yohihi. Noquen bemanan res tah min jisyamahi; noquen shinan rihbi tah min honanai.

¹⁷ Jaa copi tah non mia yocacai. ¿Quiquin hapo Cesaronen noque cobranah non copijati Jain? ¿Non copijatimahin? Noque yohihue —hahcanquin.

¹⁸ Tiromabohi honanxon, jato yocaquin: —¿Jahuejanoxon man shinancoinihcamaxon hea tanahin?

¹⁹ Hahan copijati coriqui hea jismanahue —hahquin.

Yohihah, jaa coriqui bexon hinancanquin.

²⁰ Bihxon, sanahihnxon jato yocaquin:

—¿Neno tsoan mapo jaiquin? ¿Tsoan huishani neno jaiquin?

²¹ —Cesaronena rahan —hihcanni.

—Jahuena hihquiya, jahuena hinannahue. Noquen Papa rihbi jahuena hinannahue —jato jaquin.

²² Nincacax, rahtecani. Joihaxma sca bocani.

Non teehihribitihin hihquibo

(*Mr 12.18-27; Lc 20.27-40*)

²³ Jaatian saduceobo rihbi yocaqui became. Jaabaan shinanah, mahuatax non tsoabi hahquirihbi teehihtimahi. Jaabaan sca yocaquin:

²⁴ —Maestron, Moisesnin ta noque yohinishqui, noquen bocha baquejahaxma hihxon-aiya non jahuen yononma bixxon hahqui sca noquen bocha non baquejaxonti.

²⁵ Neno noquen chahin baquebo ta siete janishqui, bebo rahsi. Jahuen beboquiha baque haibo bichish bi baquejahaxma hihqui. Jahuen chinipan sca jahuen yononma hihquihinquin.

²⁶ Jaa jascarihbibi; baquejahaxma mahuati. Huetsa sca jascarihbibi. Huetsa sca jascarihbibi, jaton chini caman sca. Jaa jascarihbibi.

²⁷ Jaton yononma sca mahuarihbiscay.

²⁸ ¿Papan jihue janin sca teehihribihax jihuetaiboya, tsoan haibo jaa yononma jatihiquin? Jatihibichin jaa hihquihinsh bi —hahcanquin Jesus.

²⁹ Jasca jaiboya, jato yohiquin:

—Papan huishamani joi honanyamaxon tah man honanai shinanxon bi honancoinyamahi. Papan coshi rihbi honanyamaxon tah man shinancoinyamahi.

³⁰ Papan jihue janin sca teehihribihibaan ta haibo bihyamayaxihqui. Haibobo rihbi ta benoyamayaxihqui. Papan naihoh jai yonotibo hihqui quescapi ta jayaxihcanihqui.

³¹ Mahuanihbo ta hahquirihbi teehihtimahiqui hih man jai bi tah hen mato yohihi ¿nea Papan huishamani joi man jisyamaniquin?

³² Hea tah hen Abrahanen Papa Dios qui. Isaaquen Papa Dios tah hen qui. Jacobon Papa Dios tah hen qui.

hahqui jaa joi. Jaa copi honannahue. Papa Dios ta mahuanihbaan Papa Dios hihpahoni ma qui. Jihuetaibaan Papa Dios ta jaa qui —jato jaquin.

³³ Jesusen jato yohihi ta tsamajaquetaibaan rihbi nincanishqui. Nincacax bi ¿jasca hin? hihquish rahte rahtecani.

Jaa pari nincati joi

(*Mr 12.28-34*)

³⁴ Saduceobo rihbi jan yohixon netemahi chanihadbo sca fariseobo jaabo rahsi sca tsiniquican.

³⁵ Yohinanax, jato quiha huesti jahui, Moisesnin huishani joi honan. Jesus tanacatsi-hquin nescajaquin yocaquin:

³⁶ —Maestron, ¿jahue meha non Moisesnin huishani joibo jaa pari hashoan nincati Jain? —hahquin.

³⁷ —Miin Hihbo Diosohon tah min miin jointiboyabi queentihu, miin yoshinboyabi, miin shinanboyabi tah min jahan queentihu. Jaa pari nincati joi ta jaa qui.

³⁸⁻³⁹ Jaa pecaho ta huetsa jascapah rihbi qui: Mihbe jihuetaibohn tah min queenribitihu, mihri min queemehti hihqui quescarihbibi.

⁴⁰ Jaa joi rabe janinhax ta texe Moisesnin huishani joi jahuiqui. Texe Papan joi yohinicabaan huishani joi rihbi janohax jahui.

Cristo tsoan baque quin Jesusen jato jai

(*Mr 12.35-37; Lc 20.41-44*)

⁴¹ Caibo rihbi sca fariseobo nocohihnataya Jesusen jato yocaquin.

⁴² —Hean sca tah hen mato yocacai: ¿Tsoan baque Cristo quin? ¿Jahua man shinanain? —hahquin.

—Davidina rahan —hihcanci.

⁴³ —Davidina hihquiya, ¿jenquetsahpahiya quenaquin Hihbon Davidi janishquin, Dios yoshiman huishamahah?

⁴⁴ Jaa jan huishani ta nesca qui:

Heen Hihbo Diosen ta heen hihbo yohinishqui. Hihbonoxon hea mecayaho tsahoti johue, miin rahuibo miin hinabo sca hen hihmanon caran hihbohue.

⁴⁵ Jahuen hihbo hihqui Davidi yohuan iaiya, ¿jenquetsahpax jahuen baque hihti quin? —jato jaquin.

⁴⁶ Yocacah bi jahua yohiti honanyamacanquin. Jato jascajaquin yocarihbimis hihxon rabinxon jahuabi yocayamascacanquin, jahuentianbi.

23

Jesusen fariseobo cahehi

(Mr 12.38-40; Lc 11.37-54; 20.45-47)

¹ Jaa xoboho hihti caibo jaiya sca, jahuen haxenicabo rihbi jano jaiya, jatihibixonbi nincanon Jesusen yohiquin.

² Fariseobaan ta Moïsesnin huishani joiyaxon mato haxemahiqui. Jaton huisha haxemanicahbaan ta jascajaribiqui.

³ Jaa copi jato nincanahue. Jaabaan mato yohihi jatihibi jointinin nincaxon hahnahue. Jaabaan yohihi quescajaxon bi jaabaan hahcai quescajayamahue. Janan sirijaquin yohixon bi ta jascajayamacaniqui.

⁴ Patorobaan jaton jonibo hihuenhuan papimahi hahcajaquin ta yohiquin tee joibo tsamancaniqui, man rehbo rehbocanascanon. Mato jascapa hihuebo yohixon bi ta ni huesti metotinibni jahuabi mato yanapanyamacaniqui.

⁵ Caibaan jisnon hihxon res ta hahcanihqui, siri hihqui shinanahbo hihxon. Jisibo hihxon res ta jaton benexehtibo pextinjacaniqui, hahqui huishaxon Papan joi shinantihibi. Jaton rajoti jisibo hihxon res ta jaton coton quexabo quenexaxon hanijacaniqui.

⁶ Huanotaiton caibaan jato saludanxon Hapon hahcá ta costancaniqui.

⁷ Tsoabi mato Hapon hahmayamanahue. Maton hapo ta huesti res qui, mato haxemahi. Mato tah man noque huetsa rahsi qui.

⁸ Tsoabi rihbi tah man main jaibo Papan hahtimahi. Maton naihoh queha Papa huesti res ta maton Papa qui.

¹⁰ Tsoabi rihbi mato Maestron hahmayamanahue. Cristo huesti ta maton maestro qui.

¹¹ Maton huetsabo man hashoan hahxonaiya tah hen hashoan shinanya joni mato jisayaxihqui.

¹² Jaa copi ta rahma caibo mahuinti shinanai joni hean hihpaquemayaxihqui, naman sca jaa janon. Naman mehabo quescaxon joni hahxonaibo tah hen hinahihnamayaxihqui, shinan siriya jaa hihnon.

¹³ Hahrai hahrai hih tah man jayaxihqui, fariseobon. Judio joi xeni honanmanicabon, hahrai hih tah man jayaxihqui, Papan casticanah. Shinancoinlhcamaxon paranaibo tah man qui. Jonibo Papan jihue janin capanan tah man jato bahi xehponai. Papan jihue janin hihcocatsihquiaan bi tah man jato pantehi, mato rihbi hihcocatsihyamaxon.

¹⁴ Yomanahai yononmabo jaton jahuaborabo bichinxon bi tah man Papa yocaquin joi tsamanscái.

¹⁵ Hahrai hih tah man jayaxihqui fariseobon. Mato judio joi xeni haxemanicabon. Man tah man jascarihbiyaxihqui, Papan casticanah. Shinancoinlhcamaxon paranaibo tah man qui. Huesti joni haxemanoxon tah man mai nabebacahinax hian pohquejaquexon haxemahi. Man haxemaha sca ta man tiromajaquin hahcai quescajaquin bi rabejaquin hashoan tiromaja sca jaiqui, maton tiroma shinanyaxon mato muuinquin.

¹⁶ Hahrai hih tah man jayaxihqui. Benchexon bi tah man caibo hioti shinanai. Nesca tah man yohuan iai: Papan xobo hihcoinnicahton xobo hihqui quescaribihi tah hen hihcoini yohuanai hihquish bi non quesahah ta tiroma ma qui, hih tah man jai, paranquin. Papan xobo janin jai oro hihcoinnicahton oro hihqui quescaribihi tah hen hihcoini yohuanai hihquish tah non quesatima sca jai hih tah man jai. Jascari yohuanquin tah man joni huetsa paranai.

¹⁷ Shinanjomabon. Benchebon. ¿Jahuemeha hashoan coshi quin? ¿Oro nan? ¿Oro hihbo nan?

¹⁸ Jano Papa racanxonti ta hihcoinnica racanxonti qui hihquish bi quesascaax tah non tiroma yamahi hih tah man jai, parani. Jaa racanti janin racatai tah non hihcoinnica hinanai hihquish tah non quesatimascai hih tah man jai.

¹⁹ Shinanjomabon, ¿jahue meha hashoan coshi quin: non hinanai jahuarobabo nan? ¿Racanxonti hihbo nan?

²⁰ Jaa copi ta jaa racanxontiya yohuanai joni jahuen racanxontiya res yohuanyamahiqui. Jano racatai jahuen hinantiyabi ta yohuanihqui.

²¹ Papan xoboya yohuanai joni ta jaya res ma bi jaa chicho jaiboya yohuanihqui.

²² Naiya yohuanai joni rihbi ta jaho jaiboya yohuanihqui: janoxon ta Papan noquejisiqui. Jaa copi ta jascari yohuanai joni noquen Papa Diosyabi yohuanihqui.

²³ Hahrai hih tah man jayaxihqui, fariseobon. Hahrai hih tah man jayaxihqui, judio joi xeni honanmanicahbon. Hihcoinihcamaxon tah man paranai. Maton haxé pehi tah man texe pishca jahuela noquen Papa hinanxon, cahua meso rihbi pishca hinanxon, comino pehi rihbi pishca hinanxon jai. Jascajahax bi tah man Papan hani joibo, non jaa pari nincati jai joibo, man nincati pishinai. Non pontejaquin shinanti jai joibo, non joni huetsahon shinanti jai joibo, non Papan joi nincacointi jai joibo. Jaa joibo caya tah man shinancointihi, hoa hanitahmabo jenexonma.

²⁴ Benchexon bi tah man joni hioti shinanai. Naca pishca xehamis hihxon maton xehati tohaxon bi tah man moanman hahua xeharesai.

²⁵ Hahrai hih tah man jayaxihqui, fariseobon. Mato jascarihbibi, judio joi xeni haxemanicahbon. Shinancoinihcamaxon tah man jonibo paranresai. Pinoxon tah man tason rahchoxon quenchábo rahchocai. Chicho rihbi nahpantahin: janoxon ta yometsohiyabihresti shinanbo bochohiqui.

²⁶ Shinanjoma fariseon. Chicho pari miin tasonbo nachohue, chixama rahpanah siri sca hihnon.

²⁷ Hahrai hih tah man jayaxihqui, judio hapobon. Hahrai hih tah man jayaxihqui, fariseobon. Shinancoinihcamaxon tah man jonibo paranresai. Tsahon quescapahbo tah man qui. Tsahon ta bermacanya sirijaquin bexojahah bi chicho sca mahuatipi pisi bochohi qui, rahnintibo bochohi.

²⁸ Mato tah man jascapahbo rihbi qui, rahmacanya ponte joni quescapahax bi jointi janin tiroma shinanbo bochohi, paranti shinanbo bochohi.

²⁹ Hahrai hih tah man jayaxihqui, judio hapobon, fariseobon, shinancoinihcamaxon paranicabon. Papan joi yohinicabo tah man jaton tsahon xobojaxonai. Sirijaquin Papan joi yohipahonihbo copi tah man jaton tsahon sirijaquin bexojahi.

³⁰ Jascajahax tah man yohuanai. Noquen papabo jihuetai tian jihuexon cah non jaabaan rehteni quescajayamaquehahnai, Papan joi yohinicabo rehteyamaquin.

³¹ Jascari yohuanxon tah man Papan joi yohinicabo rehtepahonihbaan baquebo man hihqui man honanmahai.

³² Maton papabaan rehtequin texejani senenjascanalhue, hah ca hen mato jaihsen.

³³ Ronobon. Toahihca baquebon. Man tah man jenquetsahaxon bi maton casticanti mato xahbanjamatinahi. Tironmabo casticanti tian ta Papan mato tiromajayaxihqui qui.

³⁴ Man jato tiromajanonti tah hen heen raantibo mato qui raanai, heen joi yohinicabo hen mato qui raanai, honanbo hen mato qui raanai, heen joi huishahibo hen mato qui raanai. Caibo tah man rehtetihai. Caibo tah man jihuun hueonxon rehtetihai. Caibo tah man maton tsinquitxi xobohoxon bi rishqui rishquitihai. Caibo rihbi tah man huesti jema janinxon huetsa caman chibantihai tiromajacatsihqui.

³⁵ Jaa copi tah hen mato hihti casticanyaxihqui. Abel janeya siri joni rehtemenonihxon texe siri jonibo rehtepahonihxon, Berequiasnen baque Zacarias sca man rehtenihqui. Jaa tah man racanxonti janinhax Papan xobo janin cahiton man rehtenihqui.

³⁶ Hen mato yohinon nicanahue: Jaa jatihibi copi ta Papan mato casticanyaxihqui qui-jato jaquin.

*Jerusalen joniohon Jesusen masa shinanai
(Lc 13.34-35)*

³⁷ Jerusalen janin jihuetaibo sca yohihi:

—Jerusalen janinhahbon, Papan joi yohinicabo tah man rehtehi. Jan mato qui raanaibo tah man macaman tsacaxon rehtehi. Hatapanen jahuen baquebo paxajaquin hahcajaquin hicha coti sca hen mato tsinquihih bi tah man queenyamahi.

³⁸ Jisnahue. Maton jihue ta boncoscainqui. Jonijoma sca ta jaiqui.

³⁹ Man tah man hea jisyamascatih. Hea hahquirihbi jahui merahax tah man Papan shinanya ta joxonihqui. Papan janen ta jorescailqui hih tah man jayaxihqui. Hen joyaxahnon caman tah man hea jisyamascatih –jato jaquin.

24

*Papan xobo tiromajayaxihquibo
(Mr 13.1-2; Lc 21.5-6)*

¹ Papan xobo janinhax picotax sca bahin cahi cahi. Hahbetan caquin, jemanxon Papan xobobo jisxon, jahuen haxenicabaan metoxon hani xobo siribo jismacatsihquin yohicanquin.

² Jishue, Hihbon jaábo bi:

–Hen mato yohinon nincanahue. Nea man jisi rahsi ta potojaquequin queyobahinyaxihcanihqui. Nea macan tsamanxon xobojanibo bi ta ni huesti macan huetsa cahchian tsahoyamascayaxihqui qui.

*Nete queyoti hochomahiya non jisyaxihquibo
(Mr 13.3-23; Lc 21.7-24; 17.22-24)*

³ Jato jascajabahini cahax, Olivoya manan manichish Jesus tsahoti. Jaabo rahnibi sca jahuen haxenicabo hahqui tsinquipaquexon yocacanquin:

–Noque yohipishcrahue. ¿Min yohiha jahuentian jayaxihqui qui? ¿Jahua huinotai jisxon non mia joribiti nea pishca sca jai non honantihin? ¿Nete queyoti neno pishcasca jai honannoxon jahua non jistihin?

⁴ Yocacabho sca: –Coiramenahue. Mato parancanmis.

⁵ Hea hihquicamaxah ta hicha jonibo joyaxihqui qui. Hea tah hen Cristo qui hihxon ta hicha joni paranyaxihcanihqui.

⁶ Rehtenanaibo tah man nincayaxihqui. Huetsa janin rehtenanaibo jai chanihi tah man nincaribiyaxihqui. Nincaxon bi masa shinanyamanahue. Nete queyoriyamanon bi ta jascapahbo jatihi qui.

⁷ Jaa rehtenanaibo janon ta huetsa nahuabo jaton nahuabo betan rehtenani boyaxihcanihqui. Jaton sontaroboya cahax ta quiquin hapobo hahbe quiquin hapobo betan rehtenanyaxihcanihqui. Huetsa janinbo ta pihan hihquish muhauayaxihcanihqui. Huetsa janinbo rihbi ta mai miuhuanyaxihqui qui.

⁸ Jaa rahsi te pehocohyaxihqui qui, nete queyoscayaxahnon.

⁹ Jaatian ta mato bihxon mato tiromajayaxihcanihqui. Mato ta rehteyaxihcanihqui. Man hea hihbomahi copi ta jatihibi nahuabaan mato jistahihmayaxihcanihqui.

¹⁰ Jaa copi ta nincapahonixon bi hihti caibaan hea jenebahinyaxihqui qui. Hea jenexon ta paranxon jaton hahbe nincacoinnicabo rihbi polisia bihmayaxihcanihqui. Jascapah ta jistahihmahanani jayaxihcanihqui.

¹¹ Papan joi yohihicamahax ta hicha quesabo jaresscatihqui. Tsama jonibo ta paranyaxihcanihqui.

¹² Tiromabo hashoan hicha sca jaiya ta joni huetsahon shinanyamahibo hashoan hichayaxihqui qui. Shinanyahpabo cahen huestibo res.

¹³ Jabi ta maton neta queyonon caman man tenehiya Papan mato jihuecoinmayaxihqui qui.

¹⁴ Papan mato jihuemayaxihqui joi siri ta jatihibi janin chanihi boyaxihcanihqui, jatihibi nahuabo nincamaquin. Jaatiansca ta neta queyoscayaxihqui qui.

¹⁵ Jaa copi Danieln huishani joi jisxon, honannahue. Papan joi yohinicaxon ta huishanishqui, Papan jati janin ta non rahminai joni nihyaxihqui qui, hihqui jaa huisha. Jascapa jano nichi jisxon sca honannahue.

¹⁶ Jaa jisish, jabatax mahchibo janin joneyaxahnahue, Judea mai mehabon.

¹⁷ Miin xobo pemacanya tsahotax, botocahintanhue histon. Miin xobobo jai jahuaborabo bichishma hishtocahintanhue.

¹⁸ Miin huai chian cotonjoma teetax carestanhue, miin coton benahi joribiyamatanhue, carestanhue.

¹⁹ Jaa netebaan ta tohoyabo huaohihcanahi cayaxihqui qui. Xoma hahmahibo jascarihbibi.

²⁰ Jenetian jabayamanoxon Papa yocayaxahnahue, tantiti neten rihbi jabayamanoxon yocayaxahnahue.

²¹ Jaatian ta hihti tiromajayaxihcanihqui. Nete jamenoni rahma caman tsoan jisnima tiromabo ta jayaxihqui qui. Jahuentianbi jascapahbo hahquirihbi yamascanon ta jaatian jayaxihqui qui. Jaa copi jascajaquin Papa yocayaxahnahue.

²² Jascapa tiroma netebo hashoan hichahiya cahen tsoabi jihueyamahan. Jaa copi ta jahuen caisabohon shinanxon jascapa tiromabo basi jatima Papan yohiyaxihqui qui.

²³ Jaatian, Neno ta Cristo qui hihquiboya jato nincayamaxahnahue. Hono tah qui hihquiboya nincayamaxahnahue.

²⁴ Hea tah hen Cristo qui hihqui quesahibo ta joyaxihqui qui. Papan joi yohinica tah hen qui hihquiboya quesahi. Jaton coshiyaxon hahan honantijaquin hahcajaquin ta jonibo rahteyaxihcanihqui, jato parannoxon. Hahtipahxon cahen nincacoinnicabo rihbi bahinmahhuan nichinbohanan.

²⁵ Jascapahbo jayaxihqui tah hen mato yohiscrai. Jato honanyaxahnahue.

²⁶ Jisnahue, Cahchiho ta Cristo nichiqui hihquibaan bi jato honanax jisi boyamanoxahnahue. Xobo chicho tah qui, hihquibaan bi jato nincayamanoxahnahue.

²⁷ Bari cainai quirihax bari hihquih janin caman cana bacahi xabatani jai quescapi tah hen sanarenenyaxihqui. Jaa honanxon jato nincayamanoxahnahue.

²⁸ Jano mahuatipi racatai janin ta hishmin tsinquitihqui, hih ca hen jaihsen.

Noquen Hihbo joyaxihqui

(Mr 13.24-37; Lc 21.25-33; 17.26-30, 34-36)

²⁹ Jascapa nete tiromabo queyosaiya ta bari xehpo sca jaax xabayamascatihqui. Hoxne rihbi ta xabayamascatihqui. Naihoh quehax ta huishibo rihbi paqueyaxihqui qui. Naihoh jai coshibo ta Papan tahayaxihqui qui.

³⁰ Jaatian tah man nai bejisxon hahan honanti jisyaxihqui, hea joribiscanon. Jaatian ta jatihibi janin jaibo huaohiyaxihcanihqui. Naihoh quehax botopaqetui jahui sca ta hea noquebaque jisyaxihcanihqui, nai cohiman jahui ta hea jisyaxihcanihqui, hihti xabaya hihti coshiya jahui ta jisyaxihcanihqui.

³¹ Corneta rehue coshin res corotai bi tah hen heen yonotibo raanyaxihqui, jatihibi janin jai heen caisabho tsinquinon. Nai chibechijaquetancahuana janin cahi, ramaho jascarihibi, jatihibi janin jato tsinquinonquin.

³² Xono jahui ta hahan haxeti qui, honannahue. Bochocohax pehiihiscaiya ta bimi bero tsinquiti netebo nocoti jahui non honanai.

³³ Jascajaquin rihbi hen mato yohihahbo jaresscrai jisxon, maton xoboho hihcohi jahuicamahi hen hochoma pishca jahui honannahue.

³⁴ Man honannon hihxon tah hen mato yohihi: Hen mato yohihah quescabih jaresscaya pari ta nete queyoyaxihqui qui.

³⁵ Jaatian ta naiya maibo queyocahinyaxihqui qui. Naiya maibo queyocahinai bi ta heen joi jahuentianbi queyotimahi qui.

³⁶ ¿Jahuentian nete queyoyaxihqui qui? ¿Jahuen bari hihquiya queyoyaxihqui qui? Tsoanbi tah non honanyamahi. Naihohx Papan yonotibaan honanyamarihbinon tah hen hean rihbi honanyamahi. Papa huestichin ta honanihqui.

³⁷ Jahuentian queyoyaxihqui qui honanxonma bi nea honannahue: Noen jihuetai tian japhalonibo quescaribhi ta hea sanareneni jonon caman jayaxihcanihqui jonibo.

³⁸ Jenen jato mahponon caman ta pipi pipichi xeha xehahi jihuecanpahonishqui. Jahuen nontin Noen nanenon caman ta bebaan hahuinjanon haibobo rihbi benonon huanomacanpahonishqui.

³⁹ Jahuentian jene paquexihqui qui honanxonma ta jascajacanpahonishqui, paquerenxon sca jenen jato bonon. Jascarihibi ta hea joti jayaxihqui qui, tsoan honanaima bi histon.

⁴⁰ Jaatian ta jaton huai chian rabe joni teetai jayaxihqui qui, huetsa hioxon tah hen huetsa jenebahintihi.

⁴¹ Jaton rentin rabexon rene renehiton bi tah hen huetsa bihxon huetsa jenebahintihi.

⁴² Coiramenahue tahca. Jhua netenbi maton hihbo mato bichi jahui qui man tah man honanyamahi.

⁴³ Jhua neten hen jotihi qui man tah man honanyamahi. Mato qui ta nococahintihi qui. Jaa tah man honanscrai. Jhua hora jahuen xoboho yometso hihquicahintihi honanxon cahen xobo hihbaan coiranran. Coiranxon cahen jahuen xoboho hihquimayamahan.

⁴⁴ Jaa copi coiramenahue. Rahmabi ta joyamahi qui hih man jai bi tah hen joresscattihi.

Siri betan tiroma teexonai

(Lc 12.41-48)

⁴⁵ Jahuen patoronen yohihi quescabijaque hahxonai joni ta siri joni qui, shinanyahpa. Jascapa cahen jahuen patoronen yohitihi, texe jahuen jonibo jan jisxonnon. Jaton piti tian jan jato pimanon.

⁴⁶ Jascajaxonaiton jahuen patoro joxon merahah ta hahan jenimati jaiqui, jahuen patoronen siri joni jisi copi.

⁴⁷ Jascapa joni ta jahuen patoronen yohitihqui, jatihibi jahuen xoboyabi jahuen jonibo jan jisxonnon.

⁴⁸ Jascapa hihyamahax bi tiroma joni hihquish cahen Heen patoro ta basixhqui qui hihxon,

⁴⁹ jahuen hahbe jonibo rishquitihqui. Jato rishquixon sca ta piquin sirijaxon xehahax pahenscatilhqui.

⁵⁰ Joriyama ta jatihi qui hih jahuen joni jaitianbi ta pahenscaiton jahuen patoronen merahi jotihi qui.

⁵¹ Joxon ta jaa joni caxquepaquexon jahuen tequebo potatihqui. Jano nincacoinih-camahibo jaiton potaquin. Jano ta saisaihihqui, xeta tais tais hahcaibo rahsi jayaxi-hqui qui.

25

Diez xontacobo

¹ Jahuen jihuetahbo Papan jihuemahi jahui ta diez xontaconen hahni quescatihqui. Jaton johue bihhabini caxon cahen huanomanoxon jaton tsaben benejati jahui behchihi bocani. Jan huanoxihqui bepi jascacani.

² Pichca xontaco shinanjoma janon cahen jatihi rihbi shinanyahpa jaribinish.

³ Honanma xontacobaan cahen jaton johuebo bihhabini caxon bi jaton nachiti boyamanish.

⁴ Shinanyabaan jaton johue boxon bi jaton nachiti rihbi boquin.

⁵ Jaton tsaben benejati basihya sca, manatax hoxacatsihqui racapaquecani.

⁶ Yame pochinicon sca quenatai nincacanquin. Jo ta jaiqui. Behchitannahue, hahquin.

⁷ Huenicahuanxon sca jaton johue cohuaquin. Cohuasxon nachicanquin.

⁸ —Maton nachiti noque hinannahue. Noquena ta nocahiqui —tanamabaan jaton huetsabo jaquin.

⁹ —Noquena xabanon matonah rihbi xabati rah ta noquen nachiti senentimahiqui. Jano marohibo janin maton nachiti marotanahue, hih ca hen jai ihsen —shinanyahpabaan jato jaquin.

¹⁰ Marohi bohiboya sca jaton patoro nocoti. Jaa manatax, huanomahi hahbetan hihco-cani johueyahpabo. Mapescaiboya sca coirannicahban xehpoti xehpoquin.

¹¹ Chini sca nachiti marotani jahui xontacobo nocorihbih. Nocoxon, jemanxon que-nacanquin:

—Patoron, noque quehpexxonhue, patoron.

¹² Chichoxon sca ta jaan jato yohitihqui:

—Mato tah hen honanyamabiresai —hahquin.

¹³ Jaa copi coiramenahue. Heen joti nete, heen joti hora tah man honanyamahi.

Hinantahbahinaibo

¹⁴ Papan jihuemahi ta huesti joni hocho canoxon jai quesa qui. Jaan cahen jahuen jonibo quenaxon jahuen jahuaborabo hinantahban.

¹⁵ Huetsa cahen pichca borasa coriqui hinanan. Huetsa cahen rabe res. Huetsa cahen huesti res. Jaabo jaya teeti hahtipahi tihi jato hinanpaquequin, jaton shinan tihi coriqui senenjaquin. Jato hinanbahini caresscrai.

¹⁶ Pichca borasa bichish, jan hinanmenoha jahuen coriquiya caxon, jahuaborabo maromaribinoxon maroquin. Basi jascajaxon huetsa pichca borasa rihbi coriqui bocho-jaribiquin.

¹⁷ Rabe borasa hinanah jascajaribiquin. Jatihi rihbi bochojaquin maroxon maromaxon coriqui bixhon, caíjaxon rabe bochojaquin.

¹⁸ Huesti borasa hinanah cahen jascayamahi. Jaan cahen jahuen borasa bichish, caxon, mai poquinxon, jan jahuen patoronen coriqui jonequin.

¹⁹ Basihax sca jaton patoro joribiscrai. Nocoxon, jato betan bexonoxon jato quenamapaquequin.

²⁰ Quenamaha jan pichca borasa bocho hinantahni pari jahui. Jan cananxonai pichca borasa bocho bexon jahuen patoro jismaxon:

—Pichea tah min hea hinantahbahinnihqui, Hihbon. Jatihi rihbi tah hen jayaxon mia cananxonai.

²¹ —Siri tah qui. Mia tah min siri joni qui. Sirija tah min jai. Mia tah hen hicha tahma hinantahbahinniqui. Rahma tah hen hicha sca mia hinanai. Hea jenimahi hihqui quescari hehbetanbi jenimahue.

²² Rabe borasa jan hinantahbahinni sca jahui.

—Rabe tah min hea hinantahbahinniqui, hapon. Jatihi rihbi tah hen mia cananxonai.

23—Siri tah qui. Mia tah min heen joni siri qui. Sirija tah min jai. Hicha tahma tah hen mia hinantahniqui. Hicha sca tah hen mia hinanai. Hea hen jenimahi hihqui quescri hehbetanbi jenimahue.

24 Huetsa sca jahui, huesti borasa bishnish.

—Hapon, mia yonomis hihqui tah hen honannihqui. Mianbi banahahmabo tah min tsinquihi. Mianbi jahuen chishpo potaxonma tah min bichi.

25 Jaa copi tah hen raquexon miin coriqui mihinbihqui. Nea tah qui, jise. Bihhue.

26 Jaatian ta jahuen patoronan jaa yohitihiqui:

—Joni tiroman, chiquishin, ¿heanbi bananihxonma hean tsinquihi min honannihquin nan? ¿Jano heanbi jahuen chishpo potayamahi janin hen bichi cahi min honanihquin nan?

27 ¿Hea jascapah honanxon heen coriqui jaya teenica hinantahtahn min janiquin jan jaya teenon? Jaatian tah hen joxon heen coriquinin cananai hashoan hicha bihquehahnai.

28 Heen coriqui jaa bichinnahue, hah ca mato jaihsen. Jaa bichinxon hoa chonga borasayahpa hinannahue.

29 Hicha jaibo tah hen hashoan hicha rihbi hinanxihiqui, jan tsama sca janon. Jahuabi yamahibaana tah hen jaabo jai pishca jato bichintihi.

30 Hojri bahquisch chian sca nea chiquish potanahue. Jano ta saisaihihxon xeta tais tais hahcaibo rahsi jatihiqui.

Jonibo casticanti nete

31 Heen joti neten ta heen coshi xabaya hea noquebaque joyaxihqui. Heen yonotibo rihbi tah hen hahbeyaxihqui. Joxon ta heen quiquin hapo tsahotinín tsahoxon jathibi quenamayaxihqui.

32 Jaatian ta jathibi jonibo hea bebonbi tsinquiyaxihcanihqui. Carneroboya chibo jai bi carnerobo rahsi jano huesti janon jaton hihbaan jato caisai hahcajaquin ta ramihoh huesti tsama janon ramihoh rihbi texe hean nichinbohanyaxihqui.

33 Heen carnerobo ta heen mecayaho nihyaxihqui. Chibobo cahen memiho.

34 Mecayaho nichibo sca tah hen quiquin hapo hihxon yohiyaxihqui:

Benahue. Heen Papa ta matohon hihti queenihqui, man jenimanon. Man jano jihuemon jan mato bexojaxonai janin benahue, matonah sca jahuen jihue janon. Naiyahpa mai jariyamahiyabi ta mato jaa bexojaxonnihihi.

35 Mato tah man hea pimaniboi qui. Picatsihquiton tah man hea pimanihqui. Jiricatsihquiton tah man hea xehamaniqui. Maton nahua hihqui bi tah man sirijaquin hea maton xoboho mapemaniqui.

36 Chopanma hihquiton tah man hea sahuemaniqui. Hen hisinaiya tah man hea jisi caniqui. Sipo xobo tsahotaiton tah man hea yanapanniqui, hah tah hen jato jayaxihqui.

37 Jaatian ta jahuen siri jonibaan yocayaxihqui:

¿Jahuentian mia picatsihqui jisxon non mia pimanihquin, Hihbon? ¿Jahuentian mia xehacatsihquiton non mia xehamaniquin?

38 ¿Jahuentian non mia noquen nahua quescapa mapemaniquin? ¿Jahuentian non mia chopanma jaiton sahuemaniquin?

39 ¿Jahuentian mia hisini jai, jaa hihyamahax sipo xoboho tsahotai non mia jisi caniquin?

40 Jaton quiquin hapo hihxon tah hen jato yohiyaxihqui:

Man honanon tah hen mato yohihi. Nea heen huetsabo romishin jascajaxonquin tah man hea rihbi hahxonihihi.

41 Memiho quehabo sca tah hen nescajayaxihqui: Botannahue, tiromabon. Satanas jahuen tiroma yoshinbo betan jano cati chihí janin botannahue.

42 Hen picatsihqui bi tah man hea pimayamanihqui. Hen jiricatsihqui bi tah man hea xehamayamaniqui.

43 Maton nahua quesa jahuiton bi tah man hea mapemayamaniqui. Chopa bocabi tah man hea sahuemayamaniqui, hisinax, sipo xoboho tsahonah racatai bi tah man hea jisi cajaquetanyamanihqui.

44 Jato jascajaha ta yocaticanihqui.

¿Jahuentian non mia picatsihqui jisniquin, Hihbon? Picatsihqui, jiricatsihqui, xobojoma, chopanma, hisinax, sipo xoboho tsahotai jahuentian non mia jascapa jisxon bi non mia hahxonyamanihquin?

45 Jasca jaiboya tah hen jato yohitihi:

Man honanon tah hen mato yohihi. Nescapa pishcabu maton jisí, jahuama quescapahbo, jato hahxonyamaquin tah man hea rihbi hahxonyamanihqui.

46 Jato jascajaxon tah hen jato potascatihi, jascabijaquin casticanahbo sca janon. Heen siri jonibo tah hen queyoyamanox manati janin hiotihi.

26*Jesus rehteti shinanaibo**(Mr 14.1-2; Lc 22.1-2; Jn 11.45-53)*¹Jato jascajaquin haxemaquin queyoxon sca:²—Hoqueha bahquish ta pascua fiesta hihyaxihqui. Man tah man honanscái. Jaa neten ta' hea jihuín hueonxon rehtehahbo hihxon hea bihmayaixicanhqui —jahuen haxenicabo Jesusen jaquin.³Jaatianbi ta Caifas janeya hapon xoboho sacerdote hapobo betan jaton hahbe hapobo tsinquinishqui. Caifas jaton yohuan hihbo copi jano tsinquitani, yohuannoxon.⁴Quexelon Jesus paranxon bihxon rehteti yohinanax, jeenihquinannancani.⁵Fiesta naponbi tah bihtima qui. Jonibo sinayohuanax noque potacatsihcanmis hihcani.*Jesus boshnashimahi haibo**(Mr 14.3-9; Jn 12.1-8)*⁶Betania jema janin sca Jesus cahi, sipiya hihpahoni jonin xoboho nocoti, jahuen Jane cahen Simon, xobo hihbo.⁷Jato betan pihi tsahoti Jesus jaiya sca huesti haibo jahui. Hahan hininjatiya joxon, jahuen pomo quiha xenin Jesus boshnashimaquin. Hihti copi jahuen hininjati.⁸Jesus machicai jisish, sinatax yohuancani:

—¿Jahua copi jaa jatihibi yohyoquihqui?

⁹Maromaxon ta hicha coriquí bihquehahniqui, jahuaborajomabo yanapannoxon —hihcani.¹⁰Jaabo yohuani jai honanxon sca:

—¿Jahua copi man jaa haibo jatsanjahin? Hea ta sirijaquin hahxonaxqui.

¹¹Jahuaborajomabo ta jascabi jatihibri, man jato yanapannon. Hea tah man huetsatian jisyamascatih.¹²Hea tsahonahbo ta hea hininjahaxqui.¹³Nincanahue hen mato yohinon: Jano heen joi siri nincacaibo janin jatihibi ta neatohon hea hahxonai yohuanchaniyaxihcanhqui. Jaa copi ta jaa shinanbehnoyamayaxihcanni —hqui —jato jaquin.*Judas betan bexohibo**(Mr 14.10-11; Lc 22.3-6)*¹⁴Jaatian ta jahuen haxenica huesti picoti canishqui, Judas Iscariote. Sacerdote hapobo janin cahi.¹⁵Jato qui nocoxon: —¿Hen mato bihmanon jahua man hea hinantihin? —jato jaquin. Coriquí toponxon sca janacanquin, treinta libra jan bihnon.¹⁶Bichish, cahi. Caxon, jahuentian cahra bihmahah siritihquin hihxon shinanquin.*Posen pihibo**(Mr 14.12-25; Lc 22.7-23; Jn 13.21-30; 1 Co 11.23-26)*¹⁷Jaton fiesta nocotai neten sca, jahuen haxenicabo joxon Jesus yocaquin:

—¿Jahuerahnoxon pinoxon non mia fiesta neten pitijaxontihin, Hihbon —hahcanquin.

¹⁸—Hoa non honanai joni yohitannahue jema janin. Heen nete ta nea pishcascaiqui. Miin xobohoxon tah hen heen haxenicabo betan fiesta pinoxihqui hih ta maestro jaiqui. Jascajatannahue.¹⁹Jesusen raanah sca, bocani. Jan yohiha quescajaxon janoxon fiesta neten pitijacanquin.²⁰Bepi sca jaiya jahuen haxenicabo betan janoxon piquin.²¹Piresscaiboya jato yohiquin:²²—Man honannon hihxon tah hen mato yohihi: Nenohah ta huesti jaiqui, hea jato bihmaxihqui.²³Hihti benatax sca tsoan jascajatihquin hihquish huesti huestibo yocacancani:

—¿Hea nan, Hihbon? —hihcani.

²⁴—Hehbetanbi nea quenti qui piti bichi joni ta hea bihmanica qui.²⁵Papan huishamani joi jai quescata noquebaque janoxihqui. Hea jascajati jai bi ta hea bihmahi joni Hahrai hihyaxihqui. Jahuen papan jaa baquejayamahah cahen siripan —jato jaquin.²⁶Jaa bihmanoxihqui hihxon Judasen sca yocaquin:

—¿Hea hin, Maestron?

²⁷—Mia rahan —Jesusen jaquin.²⁸Pihiboya sca posen bihxon, Papa yocaxon, tehcaxon, jato hinanxon:

—Binhahue pinoxon. Nea ta heen yora qui —jato jaquin.

²⁷ Tason rihbi bihxon, Papa yocaxon, jato hinanrihbiquin:

—Nea xehanhue, jatihxonbi.

²⁸ Heen jimi tah qui. Jonibaan hohcha copijaquin tah hen heen jimi potaxihqui. Mahuaquin tah hen mato hahxonbahinai. Jaa shinanhahnan xehati ta nea qui.

²⁹ Mato betan huetsaphaquin xehayahnoxon caman tah hen nea xehati hahyamascatihi. Heen Papan jihue janin mato jihuemahi tian pari tah hen mato betan huetsaphaquin xehayaxihqui —jato jaquin.

Jesus qui Pedro paranahxihqui

(*Mr 14.26-31; Lc 22.31-34; Jn 13.36-38*)

³⁰ Pihax, behuahax, olivo janeya manan qui sca bocani.

³¹ Janoxon sca jato yohiquin:

—Nea yamebi tah man jatihibichin hea jenebahinnoxihqui, Papan huishani joi jai quescatah man jatihi. Carnero coirannica tah hen rehtexihqui, heen carnerobo potojahtannon hihqui jaa joi.

³² Jaabi tah hen hahquirihbi teehihquish Galilea main sca catihi, mato rihbi man jano hea merahi canon —jato jaquin.

³³ —Caibaan mia jatihxonbi jenebahinai bi tah hen hean mia jenetimahi, hihbon —Pedronen jaquin.

³⁴ —Quimisha coti hatapa queorihyamahi bi tah min nea yamebi heen joni hihtima min yohixihqui —Jesusen jaquin.

³⁵ —Hea rehtehibaan bi tah hen miin joni hihti ma hen yohitimabirestghi —hahscaquin Pedronen. Jatihxonbi sca jascajaribiquin.

Getsemani nahue chianxon Jesusen yocacai

(*Mr 14.32-42; Lc 22.39-46*)

³⁶ Getsemani janeya nahue chian sca becani, Jesus betan.

—Neno tsahopaquehue, Papa yocaudi hen hori canon —jato jaquin.

³⁷ Jato jascajaxon Pedroya Zebedeon baque rabe hori boquin. Jano sca Jesus hihti benati, hihti masa shinanguin.

³⁸ —Mahuabena tah hen jai, hihti masa shinanguin. Nenoxonbi hea manahi banenahue, hea coirannoxon.

³⁹ Jato jascajabini cahax, hori pishca beho racaxon Papa yohiquin:

—Papan. Hea janoxihquibo jatimajahue, jatimajati hahtipahxon. Jaabi hea queenai quescayamahi bi mia queenai quesa janon hihmahue.

⁴⁰ Yocacax joxon sca hoxahiton jahuen haxenicabo meraquin.

—¿Huesti hora pishca hea mananoxon man hoxa teneti hahtipahyamahin?

⁴¹ Hoxa tenexon Papa yocanahue, tiroma yoshiman mato tiromamacatsihquin tanayanaman. Maton shinaman man teneti shinanai bi tah man hahan teneti coshi yamahi.

⁴² Jascacahini sca Papa yocaudi caribibi.

—Papan, hea janoxihquibo jatimajati yamahiya mia queenai quesa janon jahue —hahquin.

⁴³ Joxon sca, hoxahiton jato merarihbiquin. Jaton bero quextojaquetax hoxa hoxacani.

⁴⁴ Jato mohinaxma caribixon jahuen quimisha sca jascajaquin yocarihbiquin.

⁴⁵ Joxon sca:

—¿Man hoxaparihin? ¿Tanti tanti pari man Jain? Jisnahue. Hohchayahpabaanbihnon bihmahi ta beresscacaniihqui.

⁴⁶ Hueninahue. Caresscatannon benahue. Hea bihmahi jahui ta nea nocoscaiqui —Jesusen jato jaquin.

Jesus bichibo

(*Mr 14.43-50; Lc 22.47-53; Jn 18.2-11*)

⁴⁷ Jato yohihiyabi jahuen haxenica huesti jahui, Judas. Hahbetan rihbi hicha becani, caibo machitoya, caibo chantiya. Sacerdote hapobaan raanah becani, judio hapobaan raanah becani.

⁴⁸ Jato betan joriyamaxon ca Judasen jato yohihah:

—Hen meraxon betsohahquin hicotanai joni tah qui. Hen betsohahquin hicotanai bihtannahue.

⁴⁹ Nocotax sca ponte res Jesus qui jahue, Min jascabi jayamahin hahxon, betsohahxon hicotanquin. Hicotanahbi:

⁵⁰ —Jahuejahi min jahuin, amigon? —Jesusen jaa jaquin. Jaatian nihquirani joxon bihxon Jesus menexcanquin.

⁵¹ Jasca jaibaan bi huesti jahuen haxenicaton machito tsecaxon sacerdote hapon joni marequin bi cahnexon jahuen pabinqui paxtebahinquin.

⁵² —Min machito bexojahue. Machitonen rehtenanaibo ta jahanbi mahuatihiqui.

⁵³ ¿Heen Papa hean yocacah jan jahuen yonotibo sesenta mil raantihiqui min honanyamahin?

⁵⁴ Hea nescajayaxihquibo ta Papan huishani joi jaiqui. ¿Hen yocacaiya jenquetsahpax jan yohini quesca jatihiquin? —Jesusen jaa jaquin.

⁵⁵ Yahtannicabo sca yohiquin:

—Jahua copi man rehtemis joni yahtanquin hahcajahnin, machitoyaxon chantiyaxon hea chibabenahin? Netetihibi Papan xoboho tsahoxon haxemahi bi tah man hea bilyamahipiqui.

⁵⁶ Papan huishani joi jai quesca janon tah man nescajahi —hahquin jato.

Jaatianbi jahuen haxenicabo jatihibi jabacani. Jesus yahtanahbo jenebahini bocani.

Hapobo janin Jesus bohibo

(*Mr 14.53-65; Lc 22.54-55, 63-71; Jn 18.12-14, 19-24*)

⁵⁷ Menexxonsca sacerdote hapo Caifas janin Jesus bocanquin. Jaa xoboho jaton huisha hapobo jaton hanibo tsinquipuihranscái.

⁵⁸ Jano Jesus hiohiboya hocho sca jato chibanquin Pedronen. Sacerdote hapon xoboho jaabo mapenon, jeman res Pedro nihnichi. Jaton sontaro tocan janos tsahoti, jahueja janoxihihcanihquin hihquish manati.

⁵⁹ Chicho cahen sacerdote hapoboya texe judio hapobo yohuananci. Jaa copi rehteti janon hahqui yohuanai quesabu quenamacanquin.

⁶⁰ Hicha quesabu jano mapetai bijahua copi rehteti merayamacanquin. Chini sca huetsa quesa rabe nocoti.

⁶¹ —Toa joni tah non yohuanai nincaquipiqui. Papan xobo tah hen fotojaquetanxon quimisha neten hahquirihbi jaa xahnen xobojati hahtipahi hih ta jaipishqui —hihcáni.

⁶² Jaton quiquin sacerdote sca huenicahinxon Jesus yocaquin:

—¿Min jahuabi yohiyamahin? ¿Jaabo mihqui yohuanai bi min jahuabi yohiti yamahin?

⁶³ Yocacah bi jahuahiyamahi. Jahuabi yohiyamahiya, hapon yohirihbiquin:

—Quiquin Dioscoinyaxon tah hen mia hihti yohihi quesaxonma min yohicoinnon. ¿Mia min Díos en baque Crísto quin? Noque yohihue.

⁶⁴ —Min yohihi quesca rahan. Hashoan rihbi tah hen mato yohihi: Papan mecayaho jahuen quiquin hapo tsahotai tah man hea noquebaque jisyaxihiqui. Nai cohiman jahui tah man hea jisyaxihiqui —Jesusen jaquin sacerdote hapo.

⁶⁵ Nincaxon, jahuen coton huaxabahinxon, jato yohiquin:

—Dios qui ta tiromahi yohuanahqui. —Jahua hashoan non nincati pishinain? Jan tiromahi yohuanai tah man nincascai.

⁶⁶ —Jahua shinan man Jain?

—Jan yohuanai copi non rehteti jai rahan —hahcanquin.

⁶⁷ Jahuun bemanan qui toshbanhahxon, copasxon beshrishihiqicanquin.

⁶⁸ Rishquixon yocacanquin:

—Yohihue, Criston. ¿Tsoan mia rishquihiquin?

Jaa tah hen honanyamahi hihqui Pedro

(*Mr 14.66-72; Lc 22.56-62; Jn 18.15-18, 25-27*)

⁶⁹ Jasca jaabo jai bi jemanhihti janin Pedro tsahoti. Jano tsahotaiton huesti haibaan joxon yohiquin:

—Mia rihbi tah min hoa Galilea mai meha Jesus betan nihrasahi.

⁷⁰ Jano jaibaan sca jatihixonbi nincanon jahuen joni hihtima yohiscaquin:

—Min yohuanai tah hen honanyamabiresai —Pedronen jaquin.

⁷¹ Nichibo tocan mehax huetsa haibo rihbi joxon, Pedro jisquin sirijaxon, jato yohiquin:

—Nea coin ta Jesus Nazareno betan nihcachihiqui.

⁷² Hahquirihbi jahuen joni hihtima Pedronen yohiquin. Dios quenaxon:

—Jaa joni tah hen honanyamabiresai —hahquin.

⁷³ Basiyamahaz jano nichibosca joxon:

—Hihcoini. Mia rihbi tah min jahuen haxenica qui. Min yohuanai tah non honanai.

Janoha joni quescapah tah non mia nincacai —Pedro jacanquin.

⁷⁴ Dios quenaxon, hihcoinyamahaz hea muhuapahinon hihxon jascajaribiquin:

—Jaa joni tah hen honanyamabiresai —Pedronen jaquin. Jaatianbi sca hatapa queoti.

⁷⁵ Jesusen yohiha joi shinanrenenscaquin. Hatapa queorihyama jai bi tah min quimisha coti heen joni hihtima min yohixihiqui. Jesus jascari yohuanah shinanax, picocahini cahax coshin huaohihscai.

27*Pilato janin Jesus bohibo**(Mr 15.1; Lc 23.1-2; Jn 18.28-32)*

¹ Xaba paquescaiya sca sacerdote hapobo betan judio hapobo tsinquirihbixon sesion hahxon sca Jesus rehteti yohicanquin jatihibichin.

² Menexrihbixon jaton gobernador janin sca Jesus hiocanquin Pilato janeya gobernador janin.

Judas rehtehihtai

³ Jaanbihmahah Jesus rehtenoxihquibohi jisxon, masa shinanxon sca Judasen jahuen treinta coriqui hinanrihbibi caxon, sacerdote hapoboya judio hapobo hinanrihbiquin.

⁴ —Hohchajoma joni mato bimahah tah hen hohchatai —jato jaquin.

—¿Min jascahah bi jahueja non noquen jatihin? Mianbi jise —hahcanquin.

⁵ Papan xoboho jaa coriqui potojaquetanbahini Judas caresscrai. Cahax risbipan tenexentax rontamehscrai.

⁶ Jahuen coriqui topihax sca sacerdote hapobo yohuani:

—Hahan mahuamati coriqui tah qui. Papa hinanti bohnanti qui tah non nanetimahi —hihcami.

⁷ Jaa copi ta jahanbi mai maroti yohinannishqui. Caxon sca huesti quentijanicaton mai maroncanquin, jano nahuabo mihinti janon.

⁸ Jaa copi ta jaa mai jimin mai hahcanihqui, rahma caman.

⁹ Jasca ta janishqui Papan joi yohinica Jeremiasnen yohini quescabi:

Joni ta jaatihni copitihqui hih Israelibo hapobo jaiya ta treinta coriqui bihcanihqui.

¹⁰ Jahanbi ta quentijanicaton mai marocaniqui, heen hihbaan hea yohini quescabijaquin hihqui Jeremiasnen huishani joi.

¹¹ Jaatian gobernador bebon Jesus nichi. Jano hihuehahbo Gobernador yocacahti Jesus:

—¿Mia min judiobaan quiquin hapo qui? —hahquin.

—Min yohihi quescari rahan —hahquin Jesusen.

¹² Judio hapobo rihbi hahqui chanihah bi Jesus jahuabi yohuanyamascai.

¹³ Pilatonen sca yocarihbiquin:

—¿Mihqui hicha chanihibo min nincayamahin? —hahquin.

¹⁴ Jabi ni huesti jaton joi qui Jesus yohuanyamahi. Jaa copi ta gobernador rahtenishqui.

*Jesus rehteti yohihibo**(Mr 15.6-20; Lc 23.13-25; Jn 18.38-19.16)*

¹⁵ Jaa fiesta hahqui nocotai tihibi ta gobernadornen sipo xoboho tsahonnibo huesti jato picoxonpanishqui, fiestajahibaan caisxon jaa jane yohihiya jaa jato picoxonquin.

¹⁶ Jan jano tsahonni ta tiroma shinanya joni janishqui jatihixonbi honanaibo. Jahuen Jane cahen, Barrabas.

¹⁷ Fiestajahibo tsinquiaquetaiton sca Pilatonen jato yocaquin.

—¿Tsoa hen mato picoxonti man queenain? ¿Barrabas nan? ¿Jesus, Cristo hahcaibo nan? —jato jaquin.

¹⁸ Notsixon copi judiobaan Jesus hinanah ta Pilatonen honannishqui. Honanxon copi ta jonio jascajaquin yocanishqui.

¹⁹ Janoxon joni ponteti sca Pilato tsahoscai. Jano tsahotai bi ta joni raanxon jahuen haibaan yohinishqui:

—Siri joni tah qui. Jahuabi jahua hahyamahue. Rahma jaya namaxon tah hen hihti masa shinanai.

²⁰ Jascajaquin jahuen haibaan Pilato yohinon bi ta judio hapobaan tsamajaquetaibo nescajanishqui: Barabbas mato picoxonnon Jesus rehteti yocanahue, hahcanquin.

²¹ Quenataibo nincaxon sca gobernadornen jato yocaquin:

—¿Rabe jai bi jahuemeha hen mato picoxonti man queenain?

—Barabbas rahan —hihcami.

²² —¿Cristo hahcaibo Jesus cahran? Jaa hen jahuejati man queenain? —Pilatonen jato jaquin.

—Jihuui qui hueonhue —hahcanquin jatihixonbi.

²³ —¿Jahua copi nan? ¿Jahua tiroma janishquin? —jato jaquin.

Jato jascahah bi hashoan sca quenacani:

—Jihuui hueonhue.

²⁴ Jan jano jahuabi hahyamahi bi hashoan sca corocanahibo jai jisxon, jeneya benahue jaax jaton jisnon bi mechoquihti.

—Jahuen jimi ta hehqui hueoyamahiqui. Mato quibi ta paquetihqui, jisnahue —jato jaquin.

²⁵ Tsinquijaquetaibo jatihibi sca nescari coshin yohuani:

—Noque qui jahuen jimi paquenon, noquen baquebo qui rihbi jahuen jimi paquenon —hihcanci.

²⁶ Jaatian Barrabas jato picoxonxon, Jesus rishquihahbo jahuen sotarobo yohixon jato hinanquin jihuin hueonahbo.

²⁷ Jahuen sotarobaan sca Jesus bihxon, gobernador xobo chicho hioxon, jaton hahbe sotarobo quenacanquin.

²⁸ Jahuen chopá potamaxon joshin coton sca sahuemacanquin.

²⁹ Moxa maitjaxon, maimaxon, tahuá xecomaxon, jaa bebon raboxonen nihxon hosan hosancanquin.

—Jee, judiobaan quiquin hapon —hahcanquin.

³⁰ Jascajaxon, hahqui toshbanhahxon, jahuen tahuá bichinxon hahanbi mashrishquiquin.

³¹ Hosan hosanxon jaa joshin coton pecaxon jahuen coton sahuemaribixon, jihuin hueonnoxon sca Jesus bocanquin.

Jihuin hueonaibo

(*Mr 15.21-32; Lc 23.26-43; Jn 19.17-27*)

³² Jemama qui picoti caxon sca Simon janeya joni meracanquin, Cirene mai meha joni. Jaa jahuen coros hiamacanquin.

³³ Manan qui nococani, Golgota janeya manan. Golgota ta mapo xao manan hihcatsi-hquiqui.

³⁴ Xehati mocani xehanon hinanahbo bi tanahax queenyamahi.

³⁵ Jihui qui tasaxon rontanxon sca jahuen chopá metisahnxon tsoan bihtihiquin hihxon borasa qui macan bero nanexon chicohah, huetsa macan pari cainaiya huetsan bignon, huetsa macan pari cainaiya huetsan biquin.

³⁶ Coirani sca sotarobo tsahopaqeti.

³⁷ Jaa bochihori ta quirica hueoncannishqui, jaa copi reteha joibo jano janon. Nea ta Jesus qui, Judiobaan quiquin hapo, hihqui jaa quirica.

³⁸ Yometso rabe rihbi sca tasaxon rontancanquin jaa senenbi. Ramiho huetsa, ramiho huetsa.

³⁹ Jano huinotaibaan ta hosan hosancannishqui, jaton mapo bose bosehihcanaxon.

⁴⁰ —Papan xobo fotojaquetanxon quimisha neten jaa xahnen hahquirihbi xobojanica hihquish, janohax siri sca johue Papan baque hihquish, jaa jihui janinhax botopuhranhue —hahcanquin.

⁴¹ Sacerdote hapobo betan texe judio hapobaan ta jascajaquin rihbi hosancannishqui.

⁴² —Huetsabo jihuematí hahtipahxon bi ta hahri jihuematí hahtipahyamahiqui. Israelibaan quiquin hapo hihquish, jan coros janinhax botopuquenon. Jaatian tah non nincacointihu.

⁴³ Papa Diosen baque hihqui ta shinannishqui. Queenxon, Papan jaa botonxon rohajas-canon. Hea tah hen Diosen baque qui jan jaipi hih ca hen ja hisen —hihcanci.

⁴⁴ Jascajaquin rihbi ta hahbe hueonahbaan hichaquin hosannishqui.

Jesus mahuati

(*Mr 15.33-41; Lc 23.44-49; Jn 19.28-30*)

⁴⁵ Barin manan tsahcahiya sca ta yamecahinnishqui, jatihibi mai janin. Nai pohapaque bari janon caman bahquishihpi.

⁴⁶ Bari nai pohapauetayi sca ta coshin bi res Jesus yohuannishqui:

—Elí Elí lama sabactani. Papan, Papan, jahua copi min hea jenebahinain? hihcatsihqui.

⁴⁷ Nincacax:

—Elías ta quenahiqui —hihcanci jano nichibo.

⁴⁸ Huesti bishquihihcanahi caxon, taco quescapa bihxon, xehati cachaqui maosahxon tahuá qui queonxon sananhixxon xehamaquin.

⁴⁹ Caibaan sca:

—Jenehue. Jaa botoni Elías jotihiquin non tah non jiscatsihqui —hahcanquin.

⁵⁰ Hahquirihbi coshin bi res quenatax sca Jesus mahuati.

⁵¹ Jaatianbi ta Papan xoboho hahan chiqueti chopá rontamehtai huaxacahinnishqui, bochiquihax naman caman, rabe teque sca janon. Mai rihbi ta miuhannishqui. Macamahnhanbo rihbi ta caxquecahinnishqui.

⁵² Cristo hihquipish bi teehihribihi pecaho ta tsahonbo rihbi quehpemehnishqui, neate-man hihni Papan baquebo yorayabi teehihribihax huenihihnxatax bocani.

⁵³ Jaabo ta jaa jema janin nichi bocannishqui, hihti caibaan jisnonbi.

⁵⁴ Jesus muhuataiaya jascapa huinotai jisish ta jano coiranai sontaro capitan hihti raquenishqui, jahuen sontarobo rihbi hihti raqueti.

—Jaa ta Papan baque coin hihnishqui —hihcani.

⁵⁵ Hochoxon rihbi ta hichaxon haibobaan coiranxon jisnishqui. Jaabaan ta Galilea mai janinhax Jesus betan jahui haibobo janishqui, pitijaxonaibo.

⁵⁶ Huetsa ta María Magdalena janeya janishqui. Huetsa cahen María Jacobon mama, Josepan mama. Huetsa cahen Zebedeon baquebaan mama.

Jesus tsahonaibo

(*Mr 15.42-47; Lc 23.50-56; Jn 19.38-42*)

⁵⁷ Bepi sca Arimatea jema janinhax coriquiyahpa patoro jahui, José janeya. Jesusen hexamena nincacoinni joni.

⁵⁸ Pilato janin caxon sca jesusen yora hean bihtimahin hahca, Pilatonen Bihhue hahquin.

⁵⁹ Jahuen yora botonxon sca sabana pahtsacah siripan rahcoquin.

⁶⁰ Rahcoxon boxon, tsahomehyanonoxon jano jan macan manan xanqueman poquinipi janin mihinquin. Heen tsahonti janinbi tsahonpan hihxon jano Jesus mihinquin. Tsahon xehponoxon sca hihihosí macan taranbohanxon xehpoquin. Macaman xehpobahini sca caressci.

⁶¹ Jaa tsahon patax sca María Magdalena betan huetsa María manati tsahoti.

Tsahon coiranai sontarobo

⁶² Jaton tantiti nete janon jaa nete queyotaiya sca sacerdote hapobo betan fariseobo Pilato janin bocani.

⁶³ Nocoxon:

—Hapon, hoa paranmis bifyamaparixon tah non yohuanai nincaquipiqui. Jaa tah non rahma shinanai. Quimisha neten hihquipish tah hen teehihribiyaxihqui hih ta jaipishqui.

⁶⁴ Jaa copi yohihue, jahuen quimisha neten caman jahuen tsahon coiranahbo. Jonetax jahuen yora yometsohtax teehihrihbi ta jaipishqui —hih jahuen haxenicabo jamis, jonibo parani. Jascajaquin paranh ta jan jato paranmenopahoni mentan hashoan tiroma jatihiqui —Pilato jacanquin.

⁶⁵ —Hoa cahisen, sontarobo. Jato boxon, man honanai quescajaquin jato coiranmatañ nahue —jato jaquin.

⁶⁶ Caxon sca, hahan xehpoti macan boyacanquin. Boyaxon honantijaxon coiranahbo sontarobo quenimacanquin.

28

Jesus teehihqui

(*Mr 16.1-8; Lc 24.1-12; Jn 20.1-10*)

¹ Jascaphibido pecaho jaton tantiti nete huino sca jaipi quen xaba paqueti hochoma sca María Magdalena betan huetsa María cahi, tsahon jisi.

² Cahiboyabi naihoh quehax Papan yonoti huesti botopaqueti jahuiya coshin bi res mai mihiuni. Botopaquexon hahan xehpoti macamahnhan taranbohanax jaa cahtsahoscai.

³ Jahuen yora cana bacahi quescari xabati. Jahuen chopá cahen joxo bi res joxo.

⁴ Jaa jisish ca hihti raquetax tastahihcanahax sontarobo racareneni muhuataibo quescapahax.

⁵ Haibobo nocotaiya:

—Raqueyamanahue. Rehtepibo Jesus benahi man jahui tah hen honani.

⁶ Nenoma ta qui. Jan yohipi quescari ta teehihribihaxqui. Jano racanipibo jahuen tsahon jisi benahue.

⁷ Histon caxon sca jahuen haxenicabo yohitannahue. Hihquipish bi ta hahquiribi teehihquishqui. Mato bebohi ta Galilea main cahiqui. Jano tah man jaa jisi catihi. Mato tah hen yohiscai, jato jascajaquin yohitannahue —Papan yonotinin jato jaquin.

⁸ Histon sca bocani. Tsahon janinhax hishtocanahi cahi, raqueya jenimahax jahuen haxenicabo yohihi bocani.

⁹ Cahitonbi jato behchihi Jesus jahui.

—¿Man jascabi jayamahin? —jato jaquin. Jato jascalah bi pontecahini caxon jaa bebon betihhpaequexon taxecocanquin.

¹⁰ —Raqueyamanahue. Galilea main bohábo heen huetsabo yohitannahue. Jano ta hea jisyaxihsanahqui.

Yohihi sontarobo bocani

¹¹ Jato yohihi haibobo bohiboyabi sca tsahon janinhax sontarobo rihbi bocani. Jeman caxon rahma huinotah jatihibi sacerdote hapobo yohicanquin.

¹² Judiobaan hapobo betan tsiniquxon sca jahueja sca non jatihin hihquish yohinanxon sontarobo hicha coriqui hinancanquin.

¹³ Coriqui hinanxon:

—Non yame hoxahiya ta jahuen haxenicabo joxon jahuen yora bichincanaxqui hihnahue.

¹⁴ Man jascari yohuani jai chanihah noquen gobernador sinataiya tah non jaa rihbi raejatihi, mato jahuejayamanon –sontarobo jacanquin sacerdotebaan.

¹⁵ Jaa coriqui bichish sca jascari yohuani bocani, sacerdotebaan yohihah quescari. Jascari yohuannihbo copi ta rahma caman jatihibi Judea mai janin jascari yohuanchanicanqui.

Jahuen raantibo Jesusen raanai

(*Mr 16.14-18; Lc 24.36-49; Jn 20.19-23*)

¹⁶ Galilea main sca ta jahuen haxenicabo bocanishqui, once joni. Jano nocoyaxahnahue Jesusen jato yohipi manan janin nococani.

¹⁷ Jano Jesus meraxon, hahqui raboxonen tisquihahpaquehcanquin. Jesus tah qui hih caibo janon bi jaa hin Hen tah hen honancoinyamahi hih caibo jaribibi.

¹⁸ Jato qui joxon sca:

—Papan ta hea jatihibi hihbomascaiqui, naiho jai jatihibi, main jaibo jatihibi rihbi.

¹⁹ Jaa copi jatihibi mai janin caxon janu jaibo haxematannahue. Heen Papan janen, jahuen baquen janen rihbi, jahuen yoshin siripan janen rihbi jato nashimatannahue, heen jihuetahbo.

²⁰ Jascajanahue hahquin hen mato yohipahoni joibo jatihibi jato haxemanahue, jascahabo. Nete queyonon caman hen mato betan jascabih jayaxihqui honannahue.

MARCOS **Marcosnen huishani joi siri**

*Juan cahchiho yohuani cahi
(Mt 3.1-12; Lc 3.1-9, 15-17; Jn 1.19-28)*

¹ Papan baque Jesucristo joi siri ta nescari pehocohnishqui.

² Papan joi yohinica Isaiasnen pari ta nescajaquin huishanishqui:

Jise. Mia bahixonnon hihxon tah hen heen joi yohinica pari raanai.

³ Jaa ta cahchiho jano tsoa jihueyamahiton nichish coshin yohuanyaxihqui: Bahixon-nahue jahan hihbo jonon. Jahuen bahi najisti chaibo hahxonnahue hih ta jaa jayaxihqui

hihqui Isaiasnen huishani joi.

⁴ Isaiasnen yohini quescajaquin nashimahi ta Juan cahchiho jano tsoa jihueyamahiton canishqui. Cahax coshin yohuani:

—Papan maton hohcha sohuanon maton shinan pontenahue hen mato nashimanon — hahquin.

⁵ Jascajahiya ta Judea mai mehabo, Jerusalen jema janinhahbo rihbi Juan qui bocan-nishqui jatihibi. Jaton hohcha Papa Dios yohihiya cahen Juaman jato nashimaquin Jordan huean janinxon.

⁶ Juaman ta camello rani chopasahuapahonishqui. Bichi cinturonen chinexehti. Champo pipahoni. Bona jaene rihbi xehapahoni.

⁷ —Hehchon ta hea mentan hashoan shinanya noque joyaxihqui. Jaa hihti siri copi tah hen chiquerehue tsahopaquexon jahuen sapato risbi pecaxonti betan hea senenyamahi.

⁸ Hean hen mato jenen nashimahi bi ta jahuen jonibo man jai honanahbo hihxon Papan mato jahuen Yoshin hinanyaxihqui, nashimaquin hahcajaquin hicha hinanquin — Juaman jato jaquin.

*Juaman Jesus nashimahi
(Mt 3.13-17; Lc 3.21-22)*

⁹ Jascascaiya Galilea mai meha Nazaret jema janinhax Jesus jahui. Jahuiya ta Juaman jaa nashimanishqui Jordan huean janinxon.

¹⁰ NASHIMAHIA cahen jene janinhax mapexon nai huiso quehpemehtai Jesusen jisquin. Dios Yoshin nobex quescapah hahqui botopauquetai jisquin.

¹¹ Jaatian:

—Mia tah min hen hihti queenai heen baque qui. Mihon ta hen jenimahi —hihqui naihoh quehax yohuanai joi.

*Yoshiman Jesus tanahi
(Mt 4.1-11; Lc 4.1-13)*

¹² Jaa pecaho ta Dios Yoshiman Jesus cahchiho camanishqui.

¹³ Cuarenta neten cahchiho Jesus nichii yohinahbo tocan. Jano nichiton ta Satanasnen hohchamacatsihquin tananishqui. Papan yonotibaan sca ta Jesus pimanishqui.

*Galilea janin Jesus teemenohi
(Mt 4.12-17; Lc 4.14-15)*

¹⁴ Jaatian sca Juan sipojahipibo pecaho sca Jesus caribibi Galilea main. Papan joi siri yohibonahi cahi.

¹⁵ —Papan mato hahxonti nete ta nocoscainqui. Papan jihuemahi joti ta nea pishca sca jaonahiqui. Maton shinan pontenahue. Papan joi siri bihcoinnahue —jato jaquin.

*Yapabihnicahbo Jesusen caisai
(Mt 4.18-22; Lc 5.1-11)*

¹⁶ Galilea hian quexa sca quetanbonahi cahi. Caquin bi Simon jahuen huetsa Andres betan jisbonaquin. Tarrafa potahiton jato jisbonaquin, yapabihnicarabe.

¹⁷ —Hehbe bonahue, joni hionica sca hen mato hihmanon —jato jaquin.

¹⁸ Jascasca jaton tarrafa potabahini sca hahbe bocani.

¹⁹ Jaatian caribiquin bi Zebedeon baque Jacobo jisbonaquin. Jahuen huetsa Juan betan nontinxon jaton tarrafa honahiton jisbonaquin.

²⁰ Jisxon jato quenaquin. Quenaha jahuen jonibo betan jaton papa nontinbi banenon Jesus betan sca bocani.

Tiroma yoshinyahpa
(Lc 4.31-37)

²¹ Capernaum jema janin sca nococani. Tantiti neten sca haho tsinquit xoboho hihcoxon Jesusen jato haxemaquin.

²² Haxemaha rahtecani. Huishani honanbaan haxemahi quescajaquinma bi hapon hahcai quescajaquin jato haxemaha ta rahtecannishqui.

²³ Jaa xoboho rihbi cahen tiroma yoshinyahpa joni huesti jai. Jaan cahen joi coshin yocaquin:

²⁴ –¿Min noque jahuejatihin, Nazaret janinha Jesusen? ¿Min noque queyohi jahuin? Min tsoa quin hen ta hen honanai. Diosen raanai tah min qui –hahquin yoshiman.

²⁵ Jesusen sca jaa yohiquin:

–Netetax jahuen yora janinhax picohue –hahquin.

²⁶ Jan jascaha jaa joni tastahihmahax sai saihihquish tiroma yoshin picoti.

²⁷ Jatihibi sca rahtetax yocacahanan:

–¿Teeee, jahua joni hin? Honanmati joi behna tah qui. Hapon hahcai quescajaquin ta haxemahiqui. Yoshin tiromabo ta yohihiqui. Jaan catanhue hahca ta bocanihqui –hihcani.

²⁸ Janohax cahen histon bi res Jesus qui yohuanscacani Galilea mai jatihibi janinhahbo.

Simoman haita Jesusen rohajahi
(Mt 8.14-15; Lc 4.38-39)

²⁹ Jaatian sca haho tsinquit xobohoh quehax cainax Andres betan Simoman xoboho hihcocani Jesus, Jacobo, Juan.

³⁰ Simoman haita cahen yonatax racati. Jesus yohiscacanquin, Jaa ta hisinihqui, hahquin.

³¹ Yohihahbo metsontanxon hueniquin. Huenihah rohacahinxon jato pimascaquin.

Hisinaibo Jesusen hicha rohajahi
(Mt 8.16-17; Lc 4.40-41)

³² Jaa bepi bari hihquiscaya sca ta hisinyahpabo, tiroma yoshinyahpabo rihbi jato jatihibi Jesus qui hiocannishqui.

³³ Jaa jema janinhahbo jatihibi Jesus janin xehqui patax tsamajaqueti.

³⁴ Jano cahen mesco hisinyahpabo Jesusen rohajquin hihti caibo. Hicha tiroma yoshinbo rihbi netemaxon picoquin. Jaa honanaibo copi jato netemaquin.

Galilea main caxon Jesusen haxemahi
(Lc 4.42-44)

³⁵ Mohiyahtax hihari sca xaba paqueri jaima huenitax Jesus cahi jano tsoabi yamahiton. Janoxon sca jahuen Papa yocaquin.

³⁶ Jaatian sca Simon, jaabo, Jesus benahi cahi.

³⁷ Meraxon yohicanquin:

–Jatihixonbi ta mia benacaniqui –hahcanquin.

³⁸ –Huetsa jemabo janin sca canon bonahue, jano rihbi Papan joi yohinon. Jaa copi tah hen jahuequi –jato jaquin.

³⁹ Jato jascahax Galilea janin sca Jesus nihnichi jatihibinco. Haho tsinquit xobohoxon Papan joi yohibonahi cahi. Tiroma yoshinbo rihbi picoquin.

Sipiyah rohajahi
(Mt 8.1-4; Lc 5.12-16)

⁴⁰ Jaatian cahen huesti sipiyahpa joni Jesus qui joxon hihti yocaquin. Raboxonen tisquihapqacon yocaquin:

–Queenxon ta mian hea rohajathi –hahquin.

⁴¹ Jahan hihti shinanxon mehancahinxon mehexon Jesusen sca yohiquin:

–Queen tah hen jai. Rohascahue –hahquin.

⁴² Jan jascahah hisinyamascai, rohascai.

⁴³ Jaatianbi jaa catannon sca Jesusen hihti yohiquin:

⁴⁴ –Tsoabi yohihaxma sacerdote qui catanhue, min rohascai jismahi. Min rohahi copi Moisesnin yohini hinanti hinanthue min rohascai honanahbo –hahquin.

⁴⁵ Jesusen jascahah bi cahi. Jan rohascai yohibonahi cahi. Yohibonahiya cahen jema janin jahuibo hichahiya jeman cati Jesusen hahtipahyamascaquin, jaa yocacatsihqui hichahiya. Hueneman res cahi. Jatihibi janinhax sca Jesus qui bocani.

2

*Yora honanyamajaquetai rohajahi
(Mt 9.1-8; Lc 5.17-26)*

¹ Huetsa neten sca cahen Capernaum janin hahquirihbi Jesus nocoti cahi. Jahuen xobon jaa nocoscai cahen nincacanquin janohahbaan.

² Hicha joni tsamajaquetaiya cahen xobo senenyamascai, xehqui pataxbi jahuenbi nihcahuantimahi. Jaan ca Papan joi jato yohiquin.

³ Jahuen yora honanyamajaquetai joni sca hihuehi became, chosco joni.

⁴ Joni tsamajaquetaiboya Jesus pataxti hahtipahyamaxon Jesus mahchi xobo pemacanya tsecapuin. Quinijaxon jahuen cacajatiyabi jaa joni botonpaquecanquin. Yora honanyamajaquetai joni hahan racatai bi botonpaquecanquin.

⁵ Rohajatihi shinancoinaibo jisxon yora honanyamajaquetai joni sca Jesusen yohiquin:

—Miin hohcha ta sohuá scah qui, baquen —hahquin.

⁶ Jano rihbi cahen jaton jointinin shinani tsahocani huishani joi honanbo.

⁷ —¿Jahua jenquetsahin nea jonin jascajaquin yohihiquin? Tiromahi ta yohuanihqui. Papa huestichin ta hohcha sohuati hahtipahiqui —hihcanci jaton jointinin.

⁸ Jaton jointinin jascajaquin shinanaiboya jahuen shinaman honanscaxon Jesusen jato yohiquin:

—¿Jahua jenquetsahin man jascajaquin shinanain maton jointinin?

⁹ ¿Jahue meha joi nea yora honanyamajaquetai joni yohiti hashoan teema quin? ¿Miin hohcha ta sohuá scah qui hihihi nan? ¿Huenihue, miin cacajati bichish caresscatanhue hihihi nan? ¿Jahue meha hashoan yohiti teema quin nan?

¹⁰ Nai nequebihoxon hohcha sohuati hihbo hea jai man honannon hihxon tah hen nea sca yohihi —jato jaxon yora honanyamajaquetai joni sca yohiquin:

¹¹ —Mia ta hen yohihi. Huenihue. Miin cacajati bichish miin xobon caresscatanhue —hahquin.

¹² Yohihih huenixon jahuen cacajati bichish res sca jaton jisnonbi caini. Jatihixonbi jisish rahtetax siripi Papa qui yohuancani:

—Jahuentianbi tah non jascajahi jisyamaniqui —hihcanci.

*Leví Jesusen quenahi
(Mt 9.9-13; Lc 5.27-32)*

¹³ Hian quexa sca cahen Jesus caribibi. Jatihibi jonibo hahqui tsamajaqueti, jaan jato haxemanon.

¹⁴ Jano huinoquin bi Leví sca meraquin Alfeonen baque. Janoxon coriqui cobranti janin hapobana cobranxoni tsahotai meraquin. Meraxon:

—Hehbe cahue —hahquin. Jan jascahah huenicahuanax hahbetan cahi.

¹⁵ Pih benahue hahca Levin xoboho sca jahuen haxenicaboyabi Jesus cahi. Jesus betan hicha joni bocani. Nocotax pih tsahoti hicha cobranxonaiboya hicha hohchayahpabo rihbi jano tsahoti.

¹⁶ Hohchayahpaboya cobranxonaibo betan Jesusen pihi jisxon huishani joi honan fariseobaan jahuen haxenicaboyocaquin:

—¿Jahuejanoxon cobranxonaiboya hohchayahpaboya betan pihiquin? —hahcanquin.

¹⁷ Jascajaquin yocacaibo nincaxon Jesusen jato yohiquin:

—Hisinjomabo pishinaima bi ta hisinyahpaboya rahonica pishinihqui. Hohchajoma jonibo quenahima bi tah hen hohchayahpaboya quenahima joni —jato jaquin.

*Non piti tenetimahin hihquibo
(Mt 9.14-17; Lc 5.33-39)*

¹⁸ Jaatian sca cahen Juaman haxematibaan piti tenenish. Fariseobaan rihbi piti tenequon. Jesus qui caxon fariseobaan Jesus yocaquin:

—¿Jahua jenquetsahin Juaman haxenicabaan piti tenenon fariseobaan haxenicabaan rihbi tenehi bi minabaan piti teneyamahihqui? —hahcanquin.

¹⁹ Jesusen jato yohiquin:

—¿Jahue betan huanohi joni hihparihiya huanoquin quenamahibaan piti tenetihiquin? Jato betan huanohi joni hihparihiya ta piti tenetimahihqui.

²⁰ Huetsatian ta jatoma qui huanohi joni hionyaxihcanihqui. Jaatian pari ta piti teneyaxihcanihqui quenamahibaan.

²¹ Tsoanbi ta hotsinica chopan chopa payo honayamahihqui. Jascajaquin honahah ta hona teresihqui hashoan huaxascasi.

²² Tsoan rihbi ta hompa rahma nehsehihqui bichi borasa xeni qui mahneyamahihqui. Jascalah ta hompa pohtoshihmatihiqui, xehati yohyocohnon borasa rihbi masascanon. Hompa rahma nehsehihqui ta borasa behna qui mahneti qui –hahquin Jesusen.

Tantiti neten bimi bishbonahi

(Mt 12.1-8; Lc 6.1-5)

²³ Huesti tantiti neten sca cahen trigo huai nabebacahini cahi. Hahbetan caquin jahuen haxenicabaan trigo bimi tesabonaquin.

²⁴ Fariseobaan sca Jesus yohiquin:

–Jise. ¿Jahua jenquetsahin jaabaan jascajahiquin, tantiti neten jascajatima joi jai bi? –hahcanquin.

²⁵ Jascalahbo jato yohiquin:

–Jahua pitimahiya hahbe cahibo rihbi pihan hihquiya jaa rihbi pihan hihxon Davidinin hahni man jisyamaniquin huishani joi janin?

²⁶ Abiatar sacerdotebaan hapo hihqui tian ta Papan xoboho David hihconishqui. Jaa paan sacerdotebaan res piti que bi jaan piquin. Jahuen jonibo rihbi piquihinquin –jato jaquin.

²⁷ Jato jascajaxon yohirihbiquin:

–Tantiti nete copi joni jaima bi ta joni copi tantiti nete jaiqui.

²⁸ Jaa copi ta hea noque baque tantiti nete hihbo qui –jato jaquin.

3

Meyosma

(Mt 12.9-14; Lc 6.6-11)

¹ Jaton haho tsinquitxi xoboho cahen Jesus hihcorihbihi. Meyosmahi noque jano rihbi jai.

² Jesus jisquin sirijascacanquin.

–Rohaja ra ta jatihiqui tantiti neten hihqui bi –hihxon jiscanquin jaya yohuanti janoxon cahecatsihquin.

³ Jesusen sca meyosmahi yohiquin:

–Noque tocanbi johue –hahquin.

⁴ Jascajaxon tsahotaibo yocauquin:

–¿Tantiti neten sirijati joi jaiquin? ¿Masajati joi jaiquin? ¿Teehihmati joi jaiquin? ¿Rehteti joi jaiquin? –jan jascalah bi jahua hihyamacani.

⁵ Benaya bi sinaxon sca Jesusen jato bejispaquequin. Jointi chahomayabo copi benati.

Meyosmahi sca yohiquin:

–Miin mequen sanahnihhue –hahquin. Sanahnihhax rohascai.

⁶ Jaa rohajahi jisish cainax herodianobo betan sca fariseobo hahqui yohuancani:

–¿Jenquetsahaxon non Jesus mahuamatihin? –hihcani yohuani.

Hian quexa tsamajaquetaibo

⁷ Hian janin sca jahuen haxenicabo betan Jesus caresscái. Hahchon bocani hicha jonibo tsama bi res. Galilea mai mehax, Judea mai mehax.

⁸ Jerusalen janinhax, Idumea janinhax, Jordan hoque quexa quehax, Tiro janinbohax, Sidon janinbohax. Tsama bi res hahqui cahax tsamajaqueti. Jatihibi jan hahcaibo nincacax tsamajaqueti hashoan nincacatsihqui.

⁹ Main tsamajaquetaibo hahqui tsehquesihquiboya jahuen haxenicabo sca yohiquin:

–Nonti jistannahue non hahan canon –hahquin.

¹⁰ Jan hicha rohajahipi copi hisinyahpabaan jatihixonbi Jesus mehecatsihquish hahqui tsamajaqueta tax tsehquesihqui.

¹¹ Yoshin tiromabaan rihbi Jesus jisish hahqui betihipaquetax joi coshin yohuani:

–Mia tah min Diosen baque qui –hihcani.

¹² Jonibaan yoshin jascari yohuanai nincayamanon hihxon, jato hihti yohiquin:

–Yohuanyamanhue –hahquin.

Jahuen doce raantibo Jesusen caisai

(Mt 10.1-4; Lc 6.12-16)

¹³ Mananahbo sca cahi. Caxon jan caisaibo quenaquin. Quenahah hahqui bocani.

¹⁴ Doce joni cahen caisquin, hahbetan nihnon. Papan joi yohinicabo raannoxxon jato caisquin.

¹⁵ Tiroma yoshin potati hihbobo hihnon jato caisquin.

¹⁶ Huetsa cahen Simon. Jaa cahen Pedro janequin.

¹⁷ Huetsa cahen Jacobo, Zebedeon baque. Huetsa cahen Juan Jacobonen huetsa. Jabo rabe Jesusen Boanerges janequin. Boanerges cahen terenihca baquebo hihcatsihqui.

¹⁸ Huetsa cahen Andres, huetsa cahen Felipe, huetsa cahen Bartolomé, huetsa cahen Mateo, huetsa cahen Tomas, huetsa cahen Alfeon baque Jacobo, huetsa cahen Tadeo, huetsa cahen Simon Celador,

¹⁹ huetsa cahen Judas Iscariote, Jesus bihmanica. Jaa rahsi caisquin, doce joni.

Mia tah min Satanás coshiyah qui hihquibo

(Mt 12.22-32; Lc 11.14-23; 12.10)

²⁰ Xobon sca Jesus cahi. Hahquirihbi tsamajaquetaiboya piti hahtipahyamascaquin.

²¹ Jascascai nincacax jaa bichi sca jahuen jenabo cahi.

—Tehquehish sca ta jaiqui —hihxon jaa bichi bocani.

²² Jerusalen janinhax jahuex huishani joi honanbo rihbi yohuani:

—Tiroma yoshin hapon yanapana ta tiroma yoshin picohihqui. Beelcebunen ta jaa hihbojascaiqui —hihcanci.

²³ Jascahiton:

—Benahue —jato jaquin. Jahuiboya sca jaa patax queha joibo sca jato yohiquin:

—¿Jenquetsahaxon Satanásnen Satanásn picotihiquin?

²⁴ Huesti mai mehax jaabo rahsibi rehtenananax ta queyoscatihiqui.

²⁵ Huesti xobo mehabo jaabo rahsibi rehtenananax ta jaabo queyoscatihiqui.

²⁶ Satanás hahbe Satanás betan rehtehahax cahen jaabo queyoscaan, hahri queyocani.

²⁷ Coshi jonin xoboho ta tsoabi yometsohti hihcoti hahtipahyamahiqui, hihbo nexayamahax. Hihbo nexaxon pari ta jahuen jahuarabobo bichinthihiqui, jatihibi queyobahinnoxon.

²⁸ Yohicoín ta hen mato jai: jatihibi hohcha ta jonibo sohuatihiqui. Papa qui tiromahi yohuanaibo rahsi rihbi ta sohuatihiqui.

²⁹ Jascapahbo sohuaxon bi ta Dios Yoshin qui tiromahi yohuanaibo Papan jahuentianbi sohuatimahiqui. Jascapa hohcha ta jascabih sca banetihiqui —jato jaquin.

³⁰ Jaa ta tiroma yoshinyahpa qui jaabo jai copi cahen jato jascajaquin.

Jesusen mama betan jahuen huetsabo

(Mt 12.46-50; Lc 8.19-21)

³¹ Jahuén mama betan jahuen huetsabo sca nocoti. Jemanhihti janin nihxon Jesus quenamacanquin.

³² Tsamajaqueta tax tsahotaibaan sca yohixonquin:

—Miin mamaya miin huetsabo ta jeman qui. Mia ta quenamacaniqui —hahcanquin.

³³ Jaan sca joi bichinquin:

—¿Tsoa heen mama quin? ¿Tsoa heen huetsabo quin? —hahquin.

³⁴ Tsahohahtancuhuanaboo bejispaquexon sca:

—Neabo ta heen mama heen huetsabo qui.

³⁵ Papa queenai quescajanicahbo ta heen huetsa, heen choca, heen mama qui —jato jaquin.

4

Mihsahahnica

(Mt 13.1-9; Lc 8.4-8)

¹ Jaatian sca cahen hian quexaxon Jesusen jato haxemaribiquin. Hicha joni hahqui tsamajaquetaiya nontin nanetax tsahoti tsamajaquetaiboo hian quexa banenon.

² Janoxon sca hicha jaa patax queha joi jato haxemaquin.

³ —Nincanahue. Mihsahahnicahton cahen jahuen bimi bero mihsahahbonahi cahan.

⁴ Jan mihsahahca can caibo bero bahinbi paqueti. Jano paquetaiboo topibonahi sca hihsabo cahi queyobonahi.

⁵ Mai chahoma janin caibo rihbi paqueti. Hihquiyamahax histon joconi.

⁶ Joconai bi barin hahca hashoan xanahax jahuen tapon chicho cayamahax pehuahax res sca xanahi.

⁷ Moxa tocan rihbi caibo bero paqueti. Moxa pari hanixon rishquiayah bimi yamahi.

⁸ Mai siri janin rihbi caibo paqueti. Hanihax bimihisiripi. Jaa bero hanihax bimihis caibo quiha treinta bero, caibo quiha sesenta bero, caibo quiha cien bero sca jai.

⁹ Hahan nincati pabinquiyahpaxon nincanahue —jato jaquin.

Jaa patax joi jan haxemahi

(Mt 13.10-17; Lc 8.9-10)

¹⁰ Tsamajaquetai janiboo boresscaya Jesus qui banejaqueta tax jahuen doce jaabo yocacahcani. Jan yohiha jaa patax queha joibo honancoincatsihqui yocacahcani.

¹¹ Yocaca jato yohiquin:

—Papan jihuemahi jone joi mato honanmaxon tah hen jaa patax queha joi rahsi jaabo nincamahi nincayosmabo quen.

¹² Jis jisxon bi jisyamahabo, ninca nincaxon bi nincayamahahbo, jaton shinan pontehax jaton hohcha yamamis hihxon nincayamahibo copi tah hen jaa patax queha joi rahsi jato nincamahi —jato jaquin.

*Mihsahahnica joi Jesusen honanmahi
(Mt 13.18-23; Lc 8.11-15)*

¹³ Jato jascajaxon Jesusen yocaquin:

—¿Hen rahma yohiha jaa patax queha joi man honanyamahin? ¿Jenquetsahaxon sca man jatihibi jaa patax queha joi honantihin?

¹⁴ Bero mihsahahnquin hahcajaquin ta mihsahahnicahton joi yohibonahihqui.

¹⁵ Bahinxon nincacaibo ta nescapah qui. Yohibonahi joi nincacaibaan bi ta Satanas joresscaxon jaa joi jato bichinlhqui.

¹⁶ Jascajaquin rihbi ta mai chahoma janinxon joi nincamaha jenimarenenscakaniqui. Nincacoinax, jenimacani.

¹⁷ Jenimahax bi jaton tapon chicho cayamahax quescaxon basimaxon jenescacanquin. Jaa joi jaiton caibaan jato hosan hosana jenescacanquin. Nincacaibo copi caibaan tiromajacatsihquin chibana jenescacanquin.

¹⁸ Caibo rihbi ta yohibonahi joi moxa tocancion nincacaibo qui.

¹⁹ Jahuen teebo jan shinanai ta moxa quesca qui. Coriquiyahpati shinanax paramehti, jahuaborabo jan hashoan queenyorahí rihbi ta moxa quesca qui. Jaan rishquihah bimiyamascai.

²⁰ Mai siri janin joi nincamaha ta nincacoinnicabo qui. Bimihi siripi. Huesti bero joconax caichi, caibo quiha treinta, caibo quiha sesenta, caibo quiha cien bero —jato jaquin.

*Johue
(Lc 8.16-18)*

²¹ Jaatian sca jato yocaquin:

—¿Jahuejahi non johueyahpa chiqueho jotihin? ¿Quenti behonbohana naman tsahonih nan? ¿Jano hoxati tapo naman tsahonih nan? ¿Jano johue tsahonti janin tsahoni non jaaya joyamahin?

²² Yohiyamayaxihqui jone joi ta yama qui. Joneha jismayamayaxihquibo yamaribibi.

²³ Hahan nincati pabinquiyahpaxon nincanahue.

²⁴ Man nincacai nincaquin sirijanahue. Man hinannoxon toponaitihi ta jatíhi rihbi mato hinantihiqui. Hashoan rihbi sca ta mato hinantihiqui.

²⁵ Jaibo bi ta hashoan jaan hinantihiqui. Yamahibo bi ta jaabo jai pishca jato bichintihiqui —jato jaquin.

Bero joconai

²⁶ Jascajaxon jato yohirihbiquin:

—Papan jihuemahi ta nescapah qui. Huesti jonin cahen bimi bero main mihsahahbonahhan.

²⁷ Hoxashinahax mohiyahtax, jasca jan hicha neten jaiya, jan mihsahahbonahipi bero joconcaax hanishi. Jenquetsahax hanihiquin jaan honanyamaquin.

²⁸ Main joconajoncaax hahmebi bimihihqui. Pehi pari caini, bimihax res sca bero caniscuai.

²⁹ Canihiton ta tsinquiscanoxon xatebonacaniqui —jato jaquin.

Moxo bero

(Mt 13.31-32; Lc 13.18-19)

³⁰ Jascajaxon jato yohirihbiquin:

—¿Papan jihuemahi ta nescapah qui hihxon non jahua yohuan jatihin? ¿Jahua jaa patax queha joi non jatihin, Papan jihuemahi joi nincamanoxon?

³¹ Papan jihuemahi ta moxo bero quescapah qui. Main banahah bi ta jatihibi jihui bero mentan moxo bero hashoan hexti romishin qui.

³² Jascapah cahen banahipi joconi. Hanishi. Jatihibi banabo mentan hashoan hanishi. Hihihosí mebihí, hotahí joxon hihsabaan sca janon nahajanón —jato jaquin.

*Jaa patax queha joi haxemahi
(Mt 13.34-35)*

³³ Jascajaquin hicha jaa patax queha joi yohixon Papan joi jato nincamaquin jaabaan nincati hahtipahi tihi.

³⁴ Jaa patax queha joi rahsi jato yohiquin. Huetsa jonibo jato betan hihyamascaia cahen jahuen haxenicabo rahsi jatihibi yohiquin sirijascaquin.

*Nihueyabi behchon Jesusen tantijahi
(Mt 8.23-27; Lc 8.22-25)*

³⁵ Jaa neten bari hihquiscaya cahen jahuen haxenicabo yohiquin:
—Hoque quexa pohquejaqueti bonahue —hahquin.

³⁶ Tsamajaquetaibo jenebahinax res sca hahan jan tsahotai nontin Jesusyabi pohquejaquecani. Huetsa nontibo rihbi hahchon pohquejaqueti.

³⁷ Nihuehnhan sca jahui. Behchoman nonti tsahcaquin. Nonti qui nachicohti jene bochonan.

³⁸ Jascarai bi Jesus nonti chishqui quiri hoxahi. Nonti tsahotinin racatax tepitinin tepihax hoxahi. Mohinxon sca yocacanquin:

—Maestron, ¿non mahuataiya mia jahua hihtimahn? —hahcanquin.

³⁹ Mohinah nihueyahpa hian yohiquin:

—Tantiscahue. Behchonyamascahue —jan jascahah nihue tantih, behchon yamascai.

⁴⁰ —¿Jahua jenqueti man raquetain? ¿Man shinancoinyamahn? —jato jaquin.

⁴¹ Jan jascahah rahtetax yohinanancani:

—Jahua hihxon yohihah nihuen bocabi nincaquihquin? ¿Hiaman bocabi nincaquihquin? —hihcani.

5

*Gadara joni yoshinyahpa
(Mt 8.28-34; Lc 8.26-39)*

¹ Hian hoque quexa Gadara mai qui sca nococani.

² Nonti janinhax mapetaiton yoshin tiromayahpa joni Jesus behchihi jahui. Tsahonni-hbo janin cahuan cahuani jihueta tax joxon behchiquin.

³ Tsahonni-hbo janin jaa cahuan cahuani nihrasih. Tsoanbi nexati hahtipahyamahi joni, cadenanen bocabi nexatimahi.

⁴ Hicha coti cadenanen tanexxon menexahbaan bi jaan cadenabo tehcaquin, hahan tanexahbo tehcapanquequin. Jaa xecoti tsoabi coshi yamahi.

⁵ Jascabi tsahon tocan nichish mahchi rihbi manichish sai saihihshinahax sai saihih-bahinahax hahmebi macaman tsehuérahshi.

⁶ Jaan cahen hochoxon Jesus jisish hishtoquihranjahuex hahqui betihihpaqueti.

⁷ Picohue Jesusen jaá bi tebihihpaquexon coshin bi res yohiquin:

—¿Hea min jahuejatihin, Jesusen, queya queha Diesen baquen? Diesen noque jisnon tah hen mia hihti yocacai: hea tiromajayamahue —hahquin.

⁸ —Jahuen yora mehax picohue, yoshin tiroman —Jesusen jaá jascajaquin.

⁹ Jesusen sca yocacuin:

—¿Mia min jahua Jane quin? —hahquin.

—Heen Jane ta Legion qui, noque non hichahi copi —hahquin.

¹⁰ Jascajaxon yoshiman hihti yocacuin, huetsa main jato camayamanon.

¹¹ Jano rihbi ta hicha repinica cochi janishqui mananan pibonahibo.

¹² —Cochi qui sca noque camahue, jato qui non hihquinon —hahquin yoshiman hihti yocacuin.

¹³ Jascajaha Jesus jeenhihqui. Yoshin tiromabu picotax res sca cochi qui sca hihquihi. Hihquihiboya jaa repinica dos mil rocohihcanahax quempe janinhax cayahax jenenencanya hihquihibah hahsatax mahuati.

¹⁴ Cochi coirannicahbo sca jabaxon yohibonaquin jema janinxon, huenemanxon rihbi. Jaabaan yohihah cahen jahua hi jacanaxquin hihquish honani sca bocani jano jihuetaibo.

¹⁵ Jesus qui nocoxon yoshinyahpa hihrasih joni jiscanquin. Yoshiman hichaxon hih-bojani bi jano siripi tsahotai jiscanquin. Chopayahpahax res sca tsahotai jahuen shinan sirisciai jiscanquin. Jisish raquecani.

¹⁶ Jan cochi qui yoshin mahnebohanxon yoshinyahpa joni rohajahi jisibaan ja to yohi-hah hihti raquecani.

¹⁷ Nincacax raquexon sca Jesus hihti yocascacanquin. Noquen mai mehax catanhue hahcanquin.

¹⁸ Nontin Jesus nanetaiton cahen yoshinyahpa hihrasihiton hihti yocascaquin, hahbetan cacatsihquin.

¹⁹ Jan jascahah bi Jesus jeenhihymahi.

—Miin caibo yohihi miin xoboho catanhue. Mihon shinanxon miin hihbaan mia hahxonai jatihibi yohitanhue —hahquin.

²⁰ Jan jascahah yohihi caxon yohibonaquin. Decápolis jemabo janinhahbo yohiquin. Jatihibi Jesusen jaa hahxonai yohibonaquin. Jan yohibonaha jatihibi rahtecani.

*Jairon baque; chixanan hisinai haibo
(Mt 9.18-26; Lc 8.40-56)*

²¹ Jaatian sca Jesus hoque quexa nontin pohquerihbihiya hicha joni hahqui tsamajqueti. Hian quexa sca cahen jaa nichi.

²² Hapo sca nocoti. Jairo janeya, haho tsinquit xobo hapo. Jesusjisish jahuen tahe qui betihipaquexon hihti yocaquin:

²³ —Heen baque haibo pishca ta mahuacatsihquiqui, hapon. Miin mequeman mehexoni cahue. Rohahax jihuemon —hahquin.

²⁴ Hahbetan sca Jesus cahi. Cahiya hichaxon Jesus chibancanquin. Tsehquesihcanahi bocani.

²⁵ Jato betan rihbi huesti haibo cahi, doce bari sca jimihisinish.

²⁶ Hicha rahonnicabaan rahonah bi rohayamahi, hohmis hohmisi, jahuen coriqui queyoquin. Rahonahbaan bi jascabi hisini, nanocohcanaribibi.

²⁷ Jesusen hahcai nincacax tsamajaquetaibo tocan nichish hahchon cahi. Hahchon caquin sca jahuen chopamehequin.

²⁸ Jahuen yora meheyamaxon bi jahuen chopapishcamehetah hen rohascatihi, hihxon mehequin.

²⁹ Mehehaz jimi tantiscay. Jahuen hisin rohascay jahuen jointinin honanquin.

³⁰ Jesusen sca jahuen yora janinhax coshi cahi jahuen jointinin honanxon tsamajaquetaibo tocan rabejaquecachuanxon jano nichiboyocaquin:

—¿Tsoan heen chopamehehaxquin? —jato jaquin.

³¹ Jahuen haxenicabaan sca yohiquin:

—Nea tsamajaquetaibo mihqui tsehquesihqui jisi bi min Tsoan hea mehehaxquin hihqui yocacahtain? —hahcanquin.

³² Jascajahibaan bi Jesusen jisjaquehtanquin, honannoxon.

³³ Jan hahzonah honanax raquetaxtastahihcanahi jahue Jesus qui betihipaquexon hihcoinjaquin sca haibaan jatihiboyohiquin.

³⁴ Jaa cahen Jesusen yohiquin:

—Baquen, min shinancoinai copi tah min rohascay. Shinanquin sirijahax caresscatanhue, miin hisin rohascaax caresscatanhue —hahquin.

³⁵ Jan yohuanai betanbi hapon xobo janinhax jahuibo nocoti. Nocoxon tsinquit xobo hapon yohicanquin:

—Moa ta miin baque mahuascaaxqui. ¿Jahuejanoxon sca min maestro jatsanjahin? —hahcanquin.

³⁶ Jascajahibo nincaxon Jesusen jaa hapon yohiquin:

—Raquexonma shinancoinhue —hahquin.

³⁷ Caquin sca tsoabi hahbetan camayamaquin. Pedro, Jacobo, Jacobonen huetsa Juan, jaabo rahsi Jesusen boquin.

³⁸ Cahi, hapon xoboho nococani, haho tsinquit xobo coiranicahton xoboho. Nocoxon corotabojisbonaquin, huaonihquiboya hihti huinihibo.

³⁹ Hihcoxon Jesusen jato yocaquin:

—¿Jahua jenquetsahin man huaonihqui coro corotain? Mahuatihma bi ta xontaco hoxahihqui —jato jaquin.

⁴⁰ Jascajahiton hosancanquin. Hosan hosana Jesusen jato jatihibi jeman cainmaquin. Jahuen papa, jahuen mama, hahbe jahuibo, jaabo rahsi cainmayamaquin. Jano xontacoracataiton sca jato betan Jesus hihcohi.

⁴¹ Xontaco metsonxon:

—Talita, cumi —hahquin. Haibo pishcan, mia tah hen yohihi huenihue, hihcatsihqui.

⁴² Jan jascayahuenitax nichi. Doce bari jai xontaco. Jisish rahte rahtecani.

⁴³ Jan xontaco hahxonai tsoabi yohiyamahahbo cahen Jesusen jato hihti yohiquin.

Jascajaxon:

—Xontaco piti hinannahue —jato jaquin.

6

*Nazaret janin Jesus nocotai
(Mt 13.53-58; Lc 4.16-30)*

¹ Janohax res sca cahen jahuen mai janin sca Jesus caribhi. Jahuen haxenicabo rihbi hahbetan bocani.

² Tantiti neten sca haho tsinquit xobohoxon jato haxemaquin. Nincacax hicha joniborahte rahteti.

—¿Jahuerahnhox nescapa yohuan haxenishquin? ¿Jenquetsahpa shinan bijnishquin?
¿Jahua coshin jahuen mequeman hahquiquin?

³ ¿Hoa carpinteroma hin? ¿Marian baquema hin? ¿Jacob, José, Judas, Simon jahuen jochicaboma hin? ¿Jahuen chocabo neno noque tocan jihueyamahiquin? —hihcanci hahqui sinati.

⁴ —Huetsancohabo Papan joi yohinacahon queenaibaan bi ta jahuen mai janinhahbo res jahan queenyamahiqui. Jahuen jenabo, jahuen xobo janinhahbo rihbi jahan queenyamacani —Jesusen jato jaquin.

⁵ Jaa jema janinxon ta jahuen coshin jato hahxonti hahtipahyamanishqui, huestibo res hisinaibo mehexon rohajaquin.

⁶ Hihcoinai jaabaan shinanyamahi copi Jesus rahteti. Jemabo janin sca haxemabonahi cahi.

Yohitannahue jaah bohivo

(Mt 10.5-15; Lc 9.1-6)

⁷ Jahuen doce quenaxon yoshin tiromabo picoti jato hihbomaxon rabe rabebo jato raanquin.

⁸ Raannoxon jato hihti yohiquin, mequen botanahbo, huesti hahqui paxati mepitiya res bohabo. Piti boyamanon, borasa, jaya cati coriqui rihbi boyamanon.

⁹ Sapato sahuequin bi rabe coton sahueyamanon.

¹⁰ —Xoboho hihcohax janobi banenahue, jaa jema janinhax canoxon caman.

¹¹ Mato Johue hahyamaxon mato nincacatsihyamahiboya janohax caquin maton sapato qui hueotai mai poto jato qui tahabahimi botannahue yohitimabohi honanahbo —jato jaquin.

¹² Jaan jascajaha boresscacani, shinan pontenahue jato jabonahi bocani.

¹³ Hicha yoshin rihbi picocanquin. Hicha hisinyahpabo rihbi xeniyaxon bemanxon rohajacanquin.

Nashimanica rehthehivo

(Mt 14.1-12; Lc 9.7-9)

¹⁴ Jascajahiboya cahen Jesusen joi jatihixonbi nincacanquin. Herodes janeya quiquin hapon rihbi nincaquin. Jesus yohihi cahen caibo nescari yohuannish:

—Nashimanica Juan ta mahuatipish bi teehirribihiqui. Jaa copi ta jascajaquin coshin hahquiqui —hihcanci.

¹⁵ —Elías yamanica tah qui —hihqui caibo rihbi.

—Papan joi yohinica tah qui. Neateman Papan joi yohipahoni quescapah tah qui —hihqui caibo sca.

¹⁶ Jesusen hahcai nincacax Herodes sca jascarihbibi:

—Juan ta jihuerihbihiqui. Hean rehetequin textebahinhoh bi ta teehirribihiqui —hihqui.

¹⁷ Jascari yohuanyahnoxon ta Herodias copi Juan bihmaxon Herodesnen Juan sipojanishqui. Herodias Felipenin haibo que bi ta Herodesnen bichinnishqui. Jahuen huetsan haibo bichinquin.

¹⁸ Bichinaiton cahen Juaman Herodes yohiquin:

—Miin huetsan haibo bichintima joi ta jaiqui, noquen nincati joi —hahquin.

¹⁹ Jan jascahah Herodesnen haibo Herodias Juan qui rainyamahi jihuexon rehtecatsihquin bi hahtipahyamaquin, jahuen benen pantehah.

²⁰ Juan ponte jihueta hohchajomahi honanax Juan qui raquequin Herodesnen coiranquin, caibaan rehtemis hihxon. Juan nincaxon jahua shinanti honanyamaquin bi nincacuin, coin coinxon.

²¹ Jahuen bari nocotai neten sca cahen Herodesnen fiestajaquin. Pihi jahuebo jahuen tintibto quenamaquin, jahuen sontaro hapobo quenamaxon Galilea mai meha patorobo rihbi quenamaquin. Fiestajahiboya jahuen haibaan Juan copicatsihquin shinanquin: Rahma caya tah hen Juan rehteti hahtipahscai hahqui.

²² Fiestajahibo qui hihcohax Herodiasnen baque xontaco jato bairahxonaiya hahan Herodes hihti jenimahi, jan quenamahabo rihbi. Jenimaxon Herodesnen yohiquin:

—Min quenaina hea yocareshue, hen mia hinann.

²³ Jascajaxon Papa Dios quenaxon sca xontaco yohirihbiquin:

—Min hea yocacaibo tah hen mia hinantihi, heen yonotibo jatíhi hena hihnon jatíhi rihbi mina hihnon caman —hahquin.

²⁴ Yohiha jahuen mama yocacu sca caresscái.

—¿Jahua yocapan? —hahquin.

—Nashimanica Juaman mapo rahan —hahquin jahuen maman.

²⁵ Hapo qui histon caribixon sca yohiquin:

—Nashimanica Juaman mapo tah hen queenai rahmabi. Quencha qui nanexon min hea hinanti tah hen queenai —hahquin.

²⁶ Yocacah sca hapon masa shinanquin. Hihtijaquin masa shinanxon bi Dios quenaxon yohixon copi jahuen joi huetsajati hahtipahyamaquin. Jan quenamahibaan nincacah copi rihbi jeenahscaquin.

²⁷ Jeenhihxon, rehtexonnica sontarobo sca raanquin, jahuen mapo bihtanahbo. Raanah caxon carcel janinxonbi Juan textecanquin.

²⁸ Quencha qui jahuen mapo nanehax jaya joxon xontaco hinancanquin. Xontaconen sca jahuen mama hinanrihbiquin.

²⁹ Jascajahibo nincacax ta Juaman haxenicabo jahuen yora bichi canishqui. Jahuen yorabihxon tsahoncanquin.

Cinco mil Jesusen pimahi

(Mt 14.13-21; Lc 9.10-17; Jn 6.1-14)

³⁰ Jesusen jato raanah catanipish Jesus qui jahuen raantibo joribibi. Joxon jaabaan hahtanipi yohixon jaabaan haxematanipi yohirihbiquin jatihibi.

³¹ Yohihoya Jesusen jato yohiquin:

—Mato rahsibi tantihu bonahue jano tsoabi yamahiton —jato jaquin. Cahí jahuibo hichahiya ta pinoxon bocabi tantiti hahtipahyamacannishqui.

³² Jano tsoabi yamahiton sca nontin bocani jaabo rahsibi.

³³ Jaabo cahi cahen hichaxon jiscanquin. Jato honancanquin. Jatihibi jema janinhax quetanpaquebahini cahax jaabo pari nocoti, jano nontin cahi janin.

³⁴ Nocoxon hicha tsamascaibo Jesusen jisbonaquin. Coiranyamaha carnerobo behnochana quescapabaho jato jisquin. Jatohon shinanxon hicha jato haxemarihbiquin.

³⁵ Bepiscayi sca hahqui joxon jahuen haxenicabaan yohiquin:

—Neno ta jahua yamahihqui. Bepi rihbi sca ta jaiqui.

³⁶ Jano huaiyahpabo jaiton jato raanschahue, hochoma jemabo janinxon rihbi jaton piti marohi cahabo —hahcanquin.

³⁷ Jascahahob:

—Piti hinannahue, matonbi —jato jaquin.

—¿Non doscientos denario copi paan marohi catihin, jato pimanoxon? —hahcanquin.

³⁸ —¿Jahuenti paan man Jain? Jistannahue —jato jaquin. Jistani jahuec sca:

—Pichca rahan. Rabe yapa rihbi —hihcáni.

³⁹ Jato jatihibi sca Jesusen yohiquin, cincuenta cincuentaboya cien joni rahsi jano huasi mipaxbihaiton tsahonon.

⁴⁰ Jascari tsinquitax tsahocani cincuenta cincuentaboya, cien cienbo.

⁴¹ Jaton pichca paan bihxon jaton rabe yapa rihbi bihxon nai bejisihnixon Papa yocaxon paan tehcapaquexon jahuen haxenicabo hinanscaquin, tsamajaquetaibo hinanpaquehaho. Yapa rabe rihbi jatihibi hinanpaquemaquin.

⁴² Hinanah jatihixonbi pili yanacahini.

⁴³ Paan tequeboya yapa tequebo tsinquirihbixon sca doce tasa bohasjacanquin.

⁴⁴ Paan pihibo cahen cinco mil bebobo. Hichaxon bi jatihibi tasa bocho texejacanquin.

Jesus jene benichi cahi

(Mt 14.22-27; Jn 6.16-21)

⁴⁵ Jaatian sca chini canoxon jahuen haxenicabo yohiquin, nontin nanetax Betsaida jema janin pohquejaquenon. Jaabo cahiya cahen tsamajaquetaibo Jesusen yohiquin xobon caresscattanon.

⁴⁶ Jato yohihax manan manixon Papa yocaqui cahi.

⁴⁷ Yamescayi cahen nonti carescrai bi Jesus huesti main baneti.

⁴⁸ Nihuen tsahcayah huinacasquimahibo bi jaan jato jisquin. Xaba paqueri jaima sca jato qui cahi, jene benicanahi. Jato huinobahincatsihqui bi jaabaan meraquin.

⁴⁹ Jene benicahinquiranai jisish, Yoshin tah qui, hihquish sai saihihcáni.

⁵⁰ Jatihixonbi jisish hihti raquecani.

—Jointi coshijanahue. Hea tah hen qui. Raqueyamanahue —jato jaquin.

⁵¹ Jato qui nontin nanetaiya cahen nihue tantiscai. Nihue tanticahinaiya hihti rahtescanani.

⁵² Paan tehcapaquexon jahuen coshi jan jato jismahipi bi honanyamacanquin, jaton shinan chahomahiya.

Genesaret janinhahbo Jesusen rohajahi

(Mt 14.34-36)

⁵³ Pohquejaquetax Genesaret main taxnati. Taxnaxon nonti nexacanquin.

⁵⁴ Nonti mehax bototaiton janohahbaa Jesus honancanquin.

⁵⁵ Honanax jatihibinco hishtocahini caxon hisinyahpabo jaton cacajatinin racatai hihuecanquin. Jano Jesus jai nincaxon jano becanquin.

⁵⁶ Jatihibinco jan cahi, hanitahma jemabo janin, hani jemabo janin, hueneaiton rihbi, hisinyahpabo bexon jano maronicabo tsinquitai hueneman jato racancanquin. Racanahbo Jesus yocacanquin jahuen chopas quechon bocabi mehenoxon. Jaa mehehibo jatihibi ta rohanishqui.

7

Jahan noquen jointi rishtatibo

(Mt 15.1-20)

¹ Jaatian sca huishani honanbo betan fariseobo Jesus qui tsinquicani, Jerusalen janinhax jahui honanbo. Tsinquixon jahuen haxenicabaan pih iiscanquin.

² Mechoquihxonma jaton mequen rishtayaxon texe jahuen haxenicabaan pihibo iiscanquin.

³ Mechoquihyamaxon ta fariseobaan piyamahiqui, jatihibi judiobaan rihbi jascajarihiquin. Jaton xenibaan hahpahoni quescajaquin ta jacanihqui.

⁴ Jano piti maroti janinhax joxon ta nashiyamaxon piyamacaniqui. Hicha jascapahbo jahpahoni ta jacanihqui. Pinoxon ta posillobo, poobo, yami quentibo qui jene jasijacaniqui.

⁵ Fariseobo betan huishani joi honanbaan sca Jesus yocauquin:

—¿Jahua jenquetsahin miin haxenicabaan noquen xenibaan hahpahoni quescajayamahiquin? Mechoquihxonma ta picanihqui. Jaton mequen qui hueotai hohchayabi ta picanihqui —hahcanquin.

⁶ Jascahahbo jato yohiquin:

—Ponte bi res ta mato qui yohuanquin Isaiasnen huishanishqui:

Nea jonibo jaton janan siripi hehqui yohuanai bi ta jaton shinan hocho bi res qui, hehon queenyamacani.

⁷ Papan joi haxemahicamaxon bi ta jonibaan joi honanmacaniqui. Yanca bi res ta hehqui betihipa quececanihiqui
hah ta Isaiasnen janishqui.

⁸ Jonibaan hahpahoni quescajaquin hahnoxon tah man Papan yohini joi jenehi.

⁹ Jato jascajaxon jato yohirihbiquin:

—Sirija ra tah man jai, maton xenibaan hahpahoni quescascanoxon Papan joi jenequin.

¹⁰ Moisesnin ta yohinishqui: Miin papahon queenhue, miin mamahon queenhue. Huetsa jan yohini ta nea qui: Tiromahi jahuen papa qui yohuanai joni tah man rehteti jai, jahuen mama qui tiromahi yohuanai rehtequin cahneyamaquin.

¹¹ Jaan jascajani que bi tah man matonbi yohihi: Maton papa, maton mama yohinahue Jaa hen mia hinanpanan ta Corban qui, hahquin. Corban ta Papa qui hinanah hihcatsihiquipi.

¹² Jascari yohuanmaxon tah man jaton mama hahxontima haxemahi, jaton papa hahxontima haxemahi.

¹³ Jascajaxon tah man Papan joi pantehi, maton xenibaan hahpahoni quescajaquin tah man maton rihbi maton baquebo haxemahi. Jascapajahi tah man jai hicha —jato jaquin.

¹⁴ Jonibo quenarihbxon sca jato yohiquin:

—Hea nincanahue, jatihixonbi honanahue.

¹⁵ Jahuabi ta noque chicho quehamo noque qui nanexon noque rishtajatimahiqui. Noquen jointinin non shinanaiton ta noque rishtajahiqui.

¹⁶ Hahan nincati pabinquiyahpaxon nincahue —jato jaquin.

¹⁷ Jato potabhinax xobohoh hihcohiton jan jato yohiha jahuen haxenicabaan yocauquin, min yohiha jahua hihcatsihqui, hahquin.

¹⁸ Yocaca jato yohiquin:

—¿Mato rihbi man honanti pishinain? Noque chicho quehamabo ta noque qui nanexon noque rishtajati hahtipahyamahiqui. ¿Man honanyamahin? —jato jaquin, jatihibi pitibo hahan jointi rishtajatima sca janon.

¹⁹ Jaatian sca:

—Noquen jointi qui hihquihima bi ta poco janin res nanetihqui. Poco janin nanetax jaroma caini —jato jaquin.

²⁰ Jato yohirihbiquin:

—Noquen jointinin non shinanaiton ta noque rishtajahiqui.

²¹ Noquen jointinin tah non shinanai: tiroma shinanbo, benejomabo betan hihti, queejomabo betan hihti, yometsohti, joni rehteti, benoyahpabo betan hihti, queeyahpbo betan hihti

²² caibaan jahuequibo bichinti, tiromajati, paranti, tsiniti, notsi notsiti, joni qui tiromahi yohuanti, yohitimabohi, honanmabohi.

²³ Jascapa tiromabo rahsi tah non noquen jointinin shinanxon hahcai rishtascanoxon –jato jaquin.

Jesus nincacoinni nahua haibo

(Mt 15.21-28)

²⁴ Jato jascanax janohax Tiro jema janinbo sca caresscrai. Nocotax bi jan jano hihqui honanyamahahbo xoboho hihcocami. Hihcocax bi jenquetsahax jonetimahi.

²⁵ Jesus nocotai joi nincacax huesti haibo jahui, jahuen haibo baque pishca yoshiman hihbojahi. Jahuex Jesusen tahe qui betihihpaqueti.

²⁶ Jaa haibo ta judiobaan nahua hiphahonishqui, sirofeniciabaan jena. Jahuen baque janinhah yoshir picoxonti jaan hihti yocaquin.

²⁷ —Baquebo pari pimanon. Baquebaan paan pihi bichinxon tah non hochitinin pinon potantimahi —hahquin Jesusen.

²⁸ —Jascari rahan, Hibbon. Jaabi ta baquebaan paquehi paan tomes misa namanxon hochitinin pihiqui —hahquin haibaan.

²⁹ —Jascarax tah min caresscatihi. Yoshin ta miin baque janinhax picoscαιqui —haibo jaquin.

³⁰ Jan jascayah xoboho caxon jahuen baque bachiho racatai meraquin, siri scah.

Jesusen joyobo rohajahi

³¹ Jaatian sca Tiro janinbohax cahi Sidon jema nabebacahini, Galilea hian janin carihibi, Decapolis maibo nabebacahini cahi.

³² Cahiton bi pabe joni Jesus qui hiocanquin. Pabehax bi joyorihbi. Jesusen mehenon sca yocanconcanqui.

³³ Tsamajaquetaiboma qui pabe nihcahuancahuanguihnxon jahuen pabinqui janin jahuen metoti niaquin. Toshbanhahxon jahuen jana mehequin.

³⁴ Nai bejisihnixon jointi xecahihnxion:

—Efata —hahquin. Quehpemehhue hihcatsihqui.

³⁵ Jascahiya jahuen pabinqui quehpemehscrai, jahuen jana janpequehtax yohuani siriscai.

³⁶ Jaa rohascaya cahen Jesusen jato hihti yohiquin tsoabi yohiyamanon. Jan hihti yohihah bi hashoan hicha sca yohicanquin.

³⁷ Hihti rahtetax yohuancani.

—Jatihibijaquin ta sirijahiqui. Pabehibo nincamaquin. Joyobo yohanmaquin —hihcani.

8

Cuatro mil Jesusen pimahi

(Mt 15.32-39)

¹ Jascasca jaiya hicha joni tsamajaquetaiya jahua pitimahiya jahuen haxenicabo queanaxon jato yohiquin:

² —Nea tsamajaquetaibahon tah hen shinanai. Quimisha neten sca hehbetan hihxon bi ta jahuabi piyamacanbihqui.

³ Pihaxma jaton xobon cahabo raanah ta bahin mehax jaton yora yosmajaquexihcanhqui, caibo rihbi hocho quehabo —jato jaquin.

⁴ Jascaha jahuen haxenicabaan:

—Jenquetsahaxon non nea jonibo pimatihin, neno tsoabi jihueyamahiton? —hahcanquin.

⁵ —Jahuentihi paan man Jain? —jato yocaquin.

—Siete rahan —hihcani.

⁶ Tsamajaquetaibo sca jaan yohiquin, main tsahonon. Jaton siete paan bihxon Papa yocaxon tehcapaquexon jahuen haxenicabo hinanquin, jonibo sca hinannon hihxon. Bihxon sca jato hinanpaquecanquin.

⁷ Yapa romishin huestibō rihbi cahen jaabo jai. Jaa bihxon Papa yocaxon jato hinanmarihbiquin.

⁸ Hinanah pihi yanicahincani. Texehi tequebo tsinquirihbixon siete tasa bohasjacanquin.

⁹ Cuatro mil jonibo janohabohi bi jato pimaxon cahabo jato camascaquin.

¹⁰ Jaatian sca jahuen haxenicaboyabi nontin nanetax Dalmanuta main sca cahi.

*Hahan honanti yocacahtaibo
(Mt 16.1-4; Lc 12.54-56)*

¹¹ Fariseobo sca ta Jesus qui jonishqui. Joxon Jesus yohuanquihnnquin, joi bichinnanan-catsihquin. Papan hinanah hahan honanti jan jatojismanon hihxon yocacanquin.

¹² Jascahiboya jointi hihti xecahihihnixon jato yohiquin:

—Jahua jenquetsahin nea rahma jihuetai jonibaan hahan honanti jiscatsihquiquin? Yohicoín tah hen mato jai: jahubi hahan honantibita mato jismatimahihqui —jato jaquin.

¹³ Jato banescaa nontin nanerihbihax ramihoh quexa sca cahi cahi.

*Fariseobo qui coirameti yohihi
(Mt 16.5-12)*

¹⁴ Caquin bi piti boti shinanbehnonganquin. Huesti paan res nonti janin jai.

¹⁵ Coirametahbo jato yohiquin:

—Jisnahue. Fariseobaan hahan paan soohihmati qui raquenahue. Herodesnen hahan paan soohihmati qui raquenahue —jato jaquin.

¹⁶ Jaa jan yohihi jaabo rahsibi sca yocacahcani:

—Non paan yamahiya cahra noque yohihihquin —hihcanci.

¹⁷ Jascajaquin shinanaiho honanxon Jesusen sca jato yocaquin:

—Jahua jenquetsahin man paan yamahiya yocacahnananain? ¿Man jiscoinyamaparihin? ¿Man honancoinyamaparihin? ¿Maton shinan chahoma sca quin?

¹⁸ ¿Beryahpaxon bi man jisyamahin? ¿Pabinquiyahpaxon bi man nincayamahin? ¿Cinco mil jonibo pimanoxon pichca paan hen tehcapaquehiya texehi teque tsinquirihbixon jahuentih tasa man bohasjahoquin? ¿Man shinanyamahin? —jato jaquin.

¹⁹ —Doce rahan —hihcanci.

²⁰ —Siete paan cahran, hahan hen cuatro mil pimahiya texehi teque tsinquixon jahuentih tasa man bohasjahipiquin? —jato jaquin.

—Siete rahan —hihcanci.

²¹ —¿Man honancoinyamaparihin? —jato jaquin.

Betsaida benche Jesusen rohajahi

²² Betsaida jema janin sca nococani. Nocotaiboya benche joni Jesus qui caibaan hiocanquin. Hioxon hihti yocacanquin, mehexonhue hahquin.

²³ Yocacah benche metsonxon hiobonahi jemama qui cahi. Benchen bero qui toshban-hahxon mequeman mehexon sca yocaquin:

—¿Min jisyamabiresain? —hahquin.

²⁴ Jari jisxon:

—Jhui nihcahuanaí quescapahbo ta hen joni jisi —hahquin.

²⁵ Jaatian sca jahuen bero meherihbihah coshicahinxon jisribiquin. Siriscaxon jatihibi sca jisquin sirijaquin.

²⁶ Jahuen xobon sca jan catannon:

—Jema janin hihquihaxma catanhue —Jesusen jaquin.

Mia tah min Cristo qui Pedro jai

(Mt 16.13-20; Lc 9.18-21)

²⁷ Jaatian sca jahuen haxenicaboyabi Jesus cahi, Cesarea de Filipo mai meha jemabo janin sca. Caquin jato yocaquin:

—¿Hea tsoa hihqui shinancaniquin? —jato jaquin.

²⁸ —Nashimanica Juan yamanica tah qui hih ta caibo jaiqui. Elías yamanica tah qui hih ta caibo rihbi jaiqui. Papan joi yohipahoni yamanica tah qui hih ta huetsabo rihbi jaiqui —hihcanci jahuen haxenicabo.

²⁹ Jaan sca jato yocaribiquin:

—¿Maton cahran? —¿Hea tsoa hihqui shinan man Jain? —jato jaquin.

—Mia tah min Cristo qui —hahquin Pedronen.

³⁰ —Tsoabi jascajaquin yohiyamanahue —jato jaquin Jesusen.

Jan mahuayaxihqui Jesusen yohihi

(Mt 16.21-28; Lc 9.22-27)

³¹ Jaatian sca jato sirijaquin yohiquin:

—Hea noque baque ta tiromajayaxihcanihqui. Hehon ta queenyamayaxihcanihqui haniboo, sacerdote hapobo, huishani honanbo. Hea ta rehteyaxihcanihqui. Rehtehipibo bi tah hen quimisha netenax hahquirihbi hueniyaxihqui —jato jaquin.

³² Jahuabi joi jonexonma jato jascajaquin. Jesus quenabohanxon sca Pedronen yohiquin:

—Jascari yohuanyamanahue —hahquin.

³³ Rabejaquexon jahuen haxenicabo jisxon Pedro yohiquin:

—Jascayamahue. Hea janinhax catanhue, Satanas. Papan shinanai quescajaquinma bi jonin shinanai quescajaquin tah min shinanai —hahquin.

³⁴ Jahuen haxenicaboya tsamajaquetai jonibo nincaqui jonon sca jato quenaquin. Jato quenaxon:

—Hehchon jocatsihxon tah man matobi man queenaima sca man hahtihi. Hea rehtehibaan bi tah hen heen Hihbo jenetimahi hihnahue, nete tihibi jascanahue. Jaatian tah man heen jihuetaaho jathihi.

³⁵ Non muhamis hihquibo ta muhuatihiqui. Hehqui hinamehxon heen joi siri nincocoainabo ta rehtehah bi jihuetahiqui.

³⁶ ¿Mai jatihobi hihbojahax bi muhuatax jahuaya sca man banethin?

³⁷ ¿Hahquirihbi teehihnoxon non copijaquin jahua hinantihin?

³⁸ Rahma jaibo ta tsini tsiniboi qui, hohchapan baquebo. Hehqui hihtimahpai joni qui tah hen hea rihbi hihtimahyaxihqui. Heen joi qui hihtimahpai joni qui rihbi tah hen hea noquebaque hihtimahyaxihqui Papan yonotibo betan Papan shinanya jahue x jato qui hihtimahpi —jato jaquin.

9

¹ Jascajaxon:

—Mato ta hen yohicoinai: jahuen coshin Papan jihuemahi joresscái jisyanoxon caman ta texe neno nichibo muhuayamayaxihquiqui.

Jesus xabayahpacahini

(Mt 17.1-13; Lc 9.28-36)

² Jato jascahax seis neten sca hihxon Pedro, Jacobo, Juan jaabo rahsi Jesusen boquin. Hani mahchi jato maniquihñquin jaabo rahsibi. Jatoyabi maniscaax jaton jisnonbi huetsapahcähini.

³ Jahuen chopá xabareneni joxoshamani. Jascapa joxojahti ta tsoanbi main jihuetai pahtsanicaton hahtipahyamahiqui.

⁴ Elias yamanica betan Moises yamanica sca jato qui cainax Jesus betan yohuan yohuani.

⁵ Yohuanaibaan bi Pedronen sca Jesus yohiquin:

—Maestron, noque neno hihqui ta siri qui. Quimisha tapasnonhue. Mina huesti, Moisesnina huesti rihbi, Eliasnena huesti rihbi —hahquin.

⁶ Juhua yohiti honanyamahaz jascari yohuani. Hihti rahtecani.

⁷ Jato bochiqui cahen nai cohin maracahti. Nai cohin chicho quehax sca yohuani jai:

—Nea ta hen hihti queenai heen baque qui. Jaa nincanahue —hihqui.

⁸ Nincaxon jisbohanrenenxon bi tsoabi jisyamacanquin. Jesus huesti jano jai meracanquin.

⁹ Jaa pecaho sca mahchi mehax botopaquexon Jesusen jato hihti yohiquin:

—Man rahma jisí tsoabi yohiyamanahue. Hea noquebaque hihquipish bi hahquirihbi huennin caman yohiyamanahue —jato jaquin.

¹⁰ Jan jascahah tsoabi yohiyamacanquin. Hihquipish bi hahquirihbi huennitih i jan hihqui bi jahua hihcatsihquiquin hihquish jaabo rahsibi yocacahanancani.

¹¹ Jesus sca yocacanquin:

—¿Juhua copí Elias pari ta jotihiqui huishani honanbaan jaiquin? —hahcanquin.

¹² Jaan sca:

—Hihcoini. Elias pari joti jai. Jatihibi rohajahi jahui. Hean sca hen mato yocanon: ¿Juhua yohihi nea huishani joi jaiquin? Noquebaque ta hihti tiromajayaxihcanihqui, hosan hosan rihbi ta jayaxihcanihqui.

¹³ Mato ta hen yohihi. Elias ta moa joresscanishqui. Jahuiton bi ta jaabo queenai quescajaquin jaabaan janishqui jayaxihquibo Papan huishani quescajaquin —jato jaquin.

Yoshirnyahpa beronan rohajahi

(Mt 17.14-21; Lc 9.37-43)

¹⁴ Jahuen haxenicabo qui nocoxon sca jato qui hicha tsamajaquetaibo meracanquin. Huishani honanbo jato betan joi bichinanaiton jiscanquin.

¹⁵ Jesus jahui jisish rahtetax jatihibi tsamajaquetai jonibo sca hahqui bishquihihcahinxon hicotancanquin.

¹⁶ Jaatian sca jaan jato yocaquin:

—¿Juhua yohuan man jato betan Jain?

¹⁷ Yocacah sca tsamajaquetaibo meha huestichin yohiquin:

—Heen baque ta hen mihqui hihuehahqui, Maestron, joyo yoshiman hihbojani quen.

¹⁸ Jan janoxon shinanaiton bi ta hueran paquehiihqui. Bacox jancharahicahini. Jahuen xeta yeres yeres hahquin. Jahuen yora jestancahini. Picoxonhue hah hen miin haxenicabo jaah bi ta hahtipahyamacanaxqui –hahquin.

¹⁹ Nincayosmabon, jascapahbo tah man qui. ¿Jahuentiho basi hen mato betan jatihin? ¿Jahuentiho basi hen mato tenetihin? Neno hehqui hihuenuahue –jato jaquin.

²⁰ Hahqui hihuescancanquin. Jesus meraxon cahen tiroma yoshiman beronan tastahihmaquin. Tastahihquish maihi taramehcanahi, bacox jancharahiquish.

²¹ Jahuen papa Jesusen yocacuin:

–¿Jahuentiho basi nescari jihiuescaquin? –hahquin.

–Baque pishcabihaxbi rahan.

²² Hicha coti ta chihu janin hueranrahsihiqui, jenenencanya rihbi hueranquin rehtecat-sihquin. Hahtipahxon noque yanapanhue noquehon shinanxon –hahquin jahuen papan.

²³ ¿Hahtipahxon nan? Shinancoinai jonin jisi ta jatihibi jati hahtipahti qui –hahquin Jesusen.

²⁴ Yoshinyahpaton papa sca coshin yohuani:

–Hen ta hen shinancoinai. Hen hashoan sca nincacoinnon hea yanapanhue –hahquin.

²⁵ Hicha bishquihihcahinchiranax jahuex tsamajaquetaibo jisxon tiroma yoshim Je-susen yohiquin:

–Joyu yoshiman, pabe yoshiman. Mia ta hen yohihi. Jahuen yora mehax picohue, jahuentianbi hahqui joyamascanoxon –hahquin Jesusen.

²⁶ Sai sahihquish coshin tastahihmahax picoti. Beronan muhati quescapi racati. Jatihibi sca yohuanquehancani:

–Mahua sca ta jaiqui –hihcanni.

²⁷ Jesusen sca metsonxon huenihihnihah hueniscai.

²⁸ Xoboho Jesus mapescaya sca jahuen haxenicabaan jaabo rahsichin yocacuin:

–¿Jenquetsahpahin non picoti hahtipahyamacanquin? –hahcanquin.

²⁹ –Jascapa tah man Papa yocaxon res picotihi. Huetsajon tah man jenquetsahaxon bi picotimahi.

Jan mahuayaxihqui jan yohirihbihi

(Mt 17.22-23; Lc 9.43-45)

³⁰ Janohax Galilea mai nabebacahini bocani. Jaabo jano cahi tsamajaquetaibaan honanti Jesus queenyamahi.

³¹ Jahuen haxenicabo res haxemabonanoxon jaabo rahsi nihquihinquin. Jato nihquihinquin yohiquin:

–Jaton joniibaan hea bihnon ta hea hinanyaxihcanihqui. Bihxon sca tah hea rehteyaxihcanihqui. Rehtehahbo sca tah hen quimisha neten hihquish hahquirihbi hueniyaxihqui –jato jaquin.

³² Jan jascalah bi honancoinyamacanquin. Yocacahcatsihqui bi raquecani.

Tsoa non coshi quin hihquibo

(Mt 18.1-5; Lc 9.46-48)

³³ Capernaum jeman sca nococani. Xobohoxon sca Jesusen jato yocacuin:

–¿Jahua yohuan man jaonahin? –hahquin.

³⁴ Yocacah bi jahua hihyamacani. Tsoa non hashoan coshi quin yocacahnananhonahax bi rahma jahua hihyamacani.

³⁵ Tsahoxon jahuen doce joni quenaxon sca jato yohiquin:

–Bebocatsihqui joni ta chiniti jaiqui, jatihixon bi yononica –hahquin.

³⁶ Huesti baque pishca bihxon naponbi nichinxon hicobehnanxon jato yohiquin:

³⁷ –Nescapa baque pishca heen janen johue hahcai jonin ta hea rihbi johue hahquiqui. Hea johue hahcai jonin ta hea que ma bi hea raanni johue hahquiqui –jato jaquin.

Noque panteyamahibaan ta noque yanapaniqui

(Mt 10.42; Lc 9.49-50)

³⁸ Juaman sca yohiquin:

–Huesti joni tah non merahipiqui, Hihbon. Miin jane yohixon tiroma yoshinbo picohi. Noque betan ta nihyamahiqui. Noque chibanyamahiya ta non jascajayamahue hahquipiqui –hihscai Juan.

³⁹ Jesusen yohiquin:

–Jascajaquin yohiyamanahue. Heen jane yohixon coshin hahcai joni ta hahcax res sca hehqui tiromahi yohuantimahihqui.

⁴⁰ Noque panteyamahibaan ta noque yanapanihqui.

⁴¹ Yohicoin tah hen mato jai: mia Criston joni copi hahxoncatsihquin mia jene pishca xehamahi joni ta copijacoinyaxihqui qui.

*Huetsa joni hohchamamis hihxon jan haxemahi
(Mt 18.6-9; Lc 17.1-2)*

⁴² Nescapa hea nincacoinai baque pishca hohchamahibo ta Papan hihti tiromajayaxi-hqui qui. Jascapahbo macanya tenexxon jenenencanya potahah sirijaquin shinantimahi bi ta Papan casticana hihti tiromajaquin shinanyaxihqui qui.

⁴³ Miin mequeman tiromajanica hax mextehiihue. Mento jihu enish bi queyoyamanox manatah tiroma que ma bi ta rabe mequenyabi nocayosma chihi janin potahah hihti tiroma bi res qui.

⁴⁴ Jano ta jaton xena jahuentianbi muhuayamahiqui. Jaa chihi rihbi ta jahuentianbi nocayamahiqui.

⁴⁵ Miin tahan tiromajanica hax taxtehiihue. Tanto jihu enish bi queyoyamanox manatah tiroma que ma bi ta rabe taheya chihi janin potahah mia hihti tiromascatihi.

⁴⁶ Jano ta jaton xena jahuentianbi muhuayamahiqui. Chihi rihbi jahuentianbi nocayamah.

⁴⁷ Miin beron tiromajanica xon miin bero tsecahue. Huesti beroya jihu enish queyoyamanox manatah tiroma que ma bi ta rabe beroya chihi janin potahah mia hihti tiromascatihi.

⁴⁸ Jano ta jaton xena jahuentianbi muhuayamahiqui, chihi rihbi jahuentianbi nocayamah.

⁴⁹ Tashi nepocah quessa ta jatihibi jonibo chihin jati qui.

⁵⁰ Tashi ta siri qui. ¿Tashi jahuíyamascaiton jahuínon hihxon jenquetsahaxon man hahquirihbi jahuíjatihin? Tashiyahpa jihu enahue. Joni huetsa betan siripi jihu enahue.

10

*Noquen hihquihinti potatima
(Mt 19.1-12; Lc 16.18)*

¹ Janohax caresscái Judea mai janin, Jordan hoque quexa rihbi. Jano rihbi hahqui tsamajaque cani. Jan hahrasih quescayaquin sca jato haxemarihbiquin.

² Hahqui joxon sca tanacatsihquin fariseobaan yocaquin:

—¿Bebaan jahuen haibo potati joi yama quin? —hahcanquin.

³ —¿Jahua Moisesnin huishanishquin, man jascajanón? —jato jaquin.

⁴ —Jascajati queenaibo ta Moisesnin yohinishqui: Bebaan ta jahan jahuen haibo potati quirica huishaxon jahuen haibo potatihiqui —hahcanci.

⁵ Jesusen sca:

—Man jointi chahomahi copi ta jascayaquin huishanishqui.

⁶ Nete jameno hi tian ta bebo betan haibo Papan jato jonijanishqui.

⁷ Jaa copi ta jahuen papaya jahuen mama jenebahinax jahuen haibo betan sca bebo jihu eti canicah qui.

⁸ Jaabo rabehax bi huesti yora sca jihu eti. Rabe hihyamasca, huesti yora sca jai.

⁹ Jaa copi jaabo rabe Papan huestijaha tsoanbi potamayamaxahtahi man —jato jaquin.

¹⁰ Xoboho sca jahuen haxenicabo jaa joi hahquirihbi yocacahti.

¹¹ Jaan sca jato yohiquin:

—Jahuen haibo potaxon huetsa haibo bichi joni ta jahuen haibo qui hohchati jihu eti hui qui, tsinihi.

¹² Jahuen bene potaxon huetsa bebo bichi haibo rihbi ta jahuen bene qui hohchati jihu eti hui qui, tsinihi —jato jaquin.

*Baquebo Jesusen yocaxonai
(Mt 19.13-15; Lc 18.15-17)*

¹³ Jaatian sca Jesus qui baquebo hihuecanquin jato mehexon non. Hihuehiton jahuen haxenicabaan yohiquin:

—Jascapahya joyamanahue —hahcanquin.

¹⁴ Jascaya hibio jisish sinaxon jato yohiquin:

—Panteyamanahue, hehqui baquebo behabo. Jascapah ta Papan jihu emati qui.

¹⁵ Nincanahue hen mato yohinon: baque pishcaten Papa Dios hihbojamahi quescaya manahax tah man Papan jihu janin jahuentianbi catimahi.

¹⁶ Jato jascajaxon baquebo hicotanxon mehexon Papa yocaxonquin.

*Jesusen coriquiyahpa yohuanquihna
(Mt 19.16-30; Lc 18.18-30)*

¹⁷ Carihibi bi huesti joni bishquihihcahinxon hahqui raboxonen tisquihahpaquexon yocaquein:

—¿Jenquetsahax hen queyoyamanox manatihin, maestro siripan? —hahquin.

¹⁸ Jesusen sca yohiquin:

—¿Jahua copi min hea siripan hahcain? Tsoabi ta sirima qui. Papa huesti ta siri qui.

¹⁹ Papan joi tah min honanai. Rehteyamahue. Tsiniyamahue. Yometsohyamahue. Caibo qui quesahi yohuanyamahue. Paranxon bichinyamahue. Miin papa, miin mama nincacoinhue —hahquin.

²⁰ Berongan pishcahax bi ta hen jascari jihuescái —hihqui yocanica.

²¹ Sirijaquin bejisxon sca jahan queenxon Jesusen yohiquin:

—Huesti tah min pishinparihi. Jatihibi miin jahuequibo maromaxon jahuabijomabo coriqui hinantanhue naihoh quehax bi sca min hicha bi res jayaxahnon. Jascajatanax joribihue hehbe canoxon —hahquin.

²² Jan jascajaha jahuen jahuequibo hichahi copi metsamarenenax masa shinanbahini caresscái.

²³ Jato jispaquexon sca jahuen haxenicabo Jesusen yohiquin:

—Jahuequi hichayahpa joni jano Papan jihuemahi janin hihquiti ta tee bi res qui —jato jaquin Jesúsen.

²⁴ Jan jascajaha jahuen haxenicabo rahtecani. Rahtetaiton Jesusen jato yohirihbiquin:

—Jano Papan jihuemahi janin hihquiti ta tee bi res qui, heen baquebaan.

²⁵ Hahua xohmox bero chirehuinti tee que bi ta jahuequi hichayahpa joni jano Papan jihuemahi janin hihquiti hashoan tee qui —jato jaquin.

²⁶ Jan jascajaha hihti rahtetax yohuancani:

—¿Jascachiya tsoa non queyoyamanox manatihin? —hihcáni.

²⁷ Jato jisxon Jesusen yohiquin:

—Jomibaan hahtipahyamahi bi ta Papan hahtipahiqui. Papan ta jatihibijati hahtipahiqui —jato jaquin.

²⁸ —Jise. Jatihibi jenebahinax tah non mihibetan sca cahi —hihscaí Pedro.

²⁹ —Hen mato yohinon nincanahue. Jahuen xobo, jahuen huetsabo, jahuen chocabo, jahuen mama, jahuen papa, jahuen baquebo, jahuen huaibo, jaa rahsi hea copi, heen joi siri copi rihbi jenebahinai jonin ta jan potabahinai quescapahbo rihbi bihyaxihqui qui.

³⁰ Bih ta jatihiqui xobobo, huetsabo, chocabo, mamabo, baquebo, huaibo. Huesti jenebahinnixon ta cien sca bihribiyaxihqui qui. Rahma tahni ta jascapahbo bihyaxihqui qui, caibaan sca jato tiromajacatsihquin jatsanjanon. Papan jihuemahitian rihbi ta queyoyamanox manatihiqui.

³¹ Hicha bebocanahibo ta chinijaqueyaxihqui qui. Chinitaibo ta beboyaxihqui qui —jato jaquin.

Jan mahuayaxihqui Jesusen yohirihbibi

(Mt 20.17-19; Lc 18.31-34)

³² Jaatian sca bahin cahax, Jerusalen janin bocani. Jesus bebohi. Jano cahiya ta jan honamahibo rahtecannishqui. Chibanaibo rihbi raquecani. Hahquirihbi jahuen doce joni quenabohanxon jaa huimoyaxihqui jato yohiquin.

³³ —Jisnahue. Jerusalen janin tah non cahi. Jano ta sacerdote hapobo, huishani honanbo rihbi hea hinanyaxihcanihqui. Hinanahbo ta Rehteti ta jaiqui hihxon nauabon jaabaan sca hinanyaxihqui qui.

³⁴ Hea hosanxon ta hehqui toshbanhahxon rishquixon rehteyaxihcanihqui. Rehtehipi bi tah hen quimisha neten hihquish hahquirihbi hueniyaxihqui —jato jaquin.

Jacobo betan Juan yocacahtai

(Mt 20.20-28)

³⁵ Jaatian sca Zebedeon baque rabe Jacobo betan Juan Jesus betanbi pecantaba cahi, yohuancanahi:

—Non mia yocacai noque hahxonhue, Maestron —hahcanquin.

³⁶ Jaan sca:

—¿Jahueja mato jaxonti man queenain? —jato jaquin.

³⁷ —Min jihuemahi tian noque tsahomaxahnhue, huetsa mia mecyaho, huetsa mia memiho —hahcanquin.

³⁸ Jesusen jato yohiquin:

—Man yocacai tah man honanyamahi. ¿Hean xehahi mocani man maton rihbi xehati hahtipahin? ¿Hahan hea nashimahiton mato rihbi nashimaha man teneti hahtipahin? —jato jaquin.

³⁹ —Tenequin rahan —hihcáni.

—Hean xehahi mocani tah man maton rihbi xehatihi. Hahan hea nashimahiton ta mato rihbi nashimayaxihičaniqui.

⁴⁰ Hea mecayaho tsahomati hihboma tah hen qui, hea memiho rihbi. Jano tsahonica rahsi ta jano tsahotihqui —jato jaquin.

⁴¹ Jacobo betan Juan jascaraiya nincaxon jahuen diez jonibo jato qui rainyamacani.

⁴² Jato quenaxon Jesusen yohiquin:

—Nuhua hapobaña ta jaton jonibo jihuematih bi yono yonohihqui man tah man honanai. Jaton patorobaña rihbi jato coshin yonohi ta man honanrihbihi.

⁴³ Mato tah man jascaphabo jatimahi. Maton hapocatsihqui ta maton yonoti jatihiqui.

⁴⁴ Maton cacannicacatsihqui ta jatihibichin teexonnica jatihiqui.

⁴⁵ Jascarihbibi tah hen hahxoní Joníqui, yonohima. Hicha jihuetaħbo tah hen mahuati Joníqui, jaton ribin copijaxoní quescari.

Bartimeo benche Jesusen rohajahi

(Mt 20.29-34; Lc 18.35-43)

⁴⁶ Jericó jema janin sca nococani. Jahuen haxenicaboyabi cahax hicha joniboya rihbi janohax cahiya, bahimahhuan hihquicahuanax Timeon baque Bartimeo tsahoti. Bartimeo cahen benche joni, coriqui yocanica joni.

⁴⁷ Jesus jano huinotai yohihahbo coshin quenaquin:

—Hehon shinanhue, Jesus, Davidinin baquen —hahquin.

⁴⁸ Jascaraítón:

—Jascayamahue. Netehue —hahcanquin hichaxon. Jascaħahbo hashoan coshin sca yohuani:

—Hehon shinanhue, Davidinin baquen —hahquin.

⁴⁹ Nihrenenxon Jesusen yohiquin:

—Jaa quenanahue —jato jaquin. Benche joni sca quenacanquin:

—Jenimahax huenihue. Mia ta quenamahiqui —hahcanquin.

⁵⁰ Jahuen rahcoti potabahinax histon huenicahuanax Jesus qui cahi.

⁵¹ Nocataiton Jesusen yocaquin:

—¿Mia jahuejaxonti min queenain? —hahquin.

—Heen bero hea rohajahue, Hihbon —hahquin benche jonin.

⁵² —Carescatanhue. Hihcoinjaquin shinanax tah min rohascái —hahscáquin Jesusen. Rohascaxon Jesus chibánbonascaquin.

11

Jerusalen janin Jesus nocoti

(Mt 21.1-11; Lc 19.28-40; Jn 12.12-19)

¹ Jerusalen hochoma sca Betfagé jema patax Betania jema patax rihbi Olivos mahchi janin nocoxon Jesusen jahuen haxenica rabe raanquin.

² —Man jano nichí hoque jema janin catannahue. Nocoxon tah man cabacho baque nexa meraxihqui, hahan tsoabi cahtsahoyamaparihi. Pecahax jaya jonoxahnahue.

³ Juhuejanoxon man jascajahin jaiboya, Noquen Hihbo ta nea pishinihqui. Rahmabi ta mihqui raanrihbinoxihqui, hahnahue —jato jaquin.

⁴ Caxon cabacho baque xehqui patax nexa meracanquin. Janibi bahin nichí meracanquin. Meraxon pecacanquin.

⁵ Pecahiton jano nichibaān jato yocaquin:

—¿Jahua man Jain? ¿Jahuejanoxon man cabacho baque pecahin? —hahcanquin.

⁶ Hihbaan yohiha quescajaquin sca jato yohicanquin. Yohiha jeenhihsacani, jaabo jaya catannón.

⁷ Cabacho baque sca Jesus qui hihuecanquin. Cabacho jaton chopabo cajanxon sca Jesus cahtsahoncanquin.

⁸ Caibaan rihbi jaton chopo bahinbi cacajaquin. Caibaan rihbi nahue chian pehi bihtanxon bahinbi cacajaquin.

⁹ Bebohibo betan chini cahibo coshin yohuanbonacani:

—Hahxonhue, Papan. Nete Hihbaan raanah ta jahuiqui. Miin shinan siri jaa hinanhue, Papan.

¹⁰ Noquen xohta Davidinin jahuen jihuetaħbo jihuemapahoni quescajaribiqui ta janoxihqui, jahuen shinan Papan hinanah. Jaa hahxonhue, Naihoh quehan.

¹¹ Jerusalen jema janin hihquihax sca Papan xoboho Jesus hihcohi. Jatihibi jispaqueħax moa bepiscaiyá Betania jema janin caribibi jahuen doce Joniyabi.

Bimijoma jihui qui Jesus yohuani

(Mt 21.18-19)

¹² Hoxashinahax mohiyahtax sca Betania janinhax cahax pihan hihqui.

¹³ Hochoxon bimi jihui pehiyahpa jisxon bimijoma hin hihquish jisi cahi. Jihui qui nocoxon jahuabi merayamaquin pehi rahsi, jahuen bimiti tian nocorihyamahiya.

¹⁴ Jahuentianbi sca miin bimi tsoanbi piyamanoxihnon –hahscaquin. Jihui yohiquin jan jascajahi jahuen haxenicabaan nincaquin.

Jesusen yometsohbo camahi

(Mt 21.12-17; Lc 19.45-48; Jn 2.13-22)

¹⁵ Jerusalen janin nocoribhax Papan xoboho hihcohi. Hihcoxon janoxon marohibo cainmaquin. Maromahibo picomaquin. Coriqui mahnenanaibaan misabo behonjanaquin. Nobex maromahibaan tsahotibo rihbi behonjanaquin.

¹⁶ Jaa xobon tsoabi jaton jahuabora papihibo huinomayamaquin.

¹⁷ Honanmaquin sca jato yohiquin:

–Jatihibi mai mehabaan janoxon yocati xobo ta heen xobo jayaxihquiqui. ¿Jascapa huisha yama quin? Jai bi tah man jano yometsohtaibo joneti xobo man heen xobo jai –jato jaquin.

¹⁸ Jan jascajahi sacerdote hapobo betan huishani honanbaan nincaquin. Jatihibi tsamaquaquetai jonibo jahuen honanmati joi qui rahtetaiya hahqui raquetexon jenquetsahaxon non jaa rehtetihin hihxon shinancanquin.

¹⁹ Bepiscaya jema janinhax bocani.

Jihui xanahi

(Mt 21.20-22)

²⁰ Yamequirihbi huinonbahinxon tapon caman bimi jihui xanascai meracanquin.

²¹ Jan yohuanipi shinanrihbixon sca Pedronen yohiquin:

–Jise, Hihbon. Hoa bimi jihui min hahqui yohuanipi ta pehua sca jaiqui –hahquin.

²² Jesusen jato yohiquin:

–Papahon shinancoinnahue.

²³ Hen mato yohinon nincanahue: jahuen jointinin shinancoinyamaxonma bi shinancoinai jonin nea mahchi nescajaquin yohihiya, Huenitax, hian janin huermehhue, jan yohihi quescabijaquin ta Papan hahxontihiqui. Jan yohihi Papan jascascrajatihi shinancoinaiya ta Papan hahxontihiqui.

²⁴ Jaa copi tah hen mato yohihi. Papa yocaxon man yocacaibobi man bihtihi shinancoinnahue. Jascajaquin yocaxon ta man bihtihi.

²⁵ Nihxon Papa yocaxon mato qui hohchataibo shinanyamascanahue. Maton Papan rihbi naihohxon man hohchataibo shinanyamascanon.

²⁶ Jascapa man shinanyamascatihi bi man shinanparihiya ta maton Papan rihbi naihohxon man hohchataibo shinanbehnotimahihqui –jato jaquin.

Jesus hapohax yohuani

(Mt 21.23-27; Lc 20.1-8)

²⁷ Jerusalen janin sca boribicani. Papan xoboho Jesus nichiya hahqui bocani sacerdote hapobo, huishani honanbo, judiooba hanibo.

²⁸ Hahqui caxon yocanquin:

–¿Jahuaxon min jascajahin? ¿Tsoan jascajahue hahca min jascajahin? –hahcanquin.

²⁹ –Mato rihbi ta hen yocacai. Man hea yohihiya tah hen jahuaxon hen nescajahi hean rihbi mato yohitihi.

³⁰ ¿Tsoan raana Juaman nashimapahonishquin? ¿Papan nan? ¿Jonibaan nan? Hea yohinahue –jato jaquin.

³¹ Jaabo rahsi sca yocacahnanananci:

–Papan rahan, hih non jaiya ta jaan sca noque yocatihiqui, Papan raana Juaman nashimahiya jahua jenquetsahin sca man jaa nincacoinyamanihquin?

³² ¿Jonibaan rahan, hih cahra non jatihin? –hihcani tsamajaquetai jonibo qui raquetax. Papan joi yohinica Juan jai jatihixonbi shinanai copi jato qui raquecani.

³³ Yocacahnananxon Jesus yohicanquin:

–Non tah non honanyamahi –hihcani.

–Hean rihbi ta hen mato yohiyamahi, jahuaxon hen nescajahi –jato jaquin Jesusen.

12

Tiromajaquin teexonnica hbo

(Mt 21.33-46; Lc 20.9-19)

¹ Jaa patax queha joi sca Jesusen jato yohiquin:

—Huesti jonin cahen huai banahan. Banaxon chiquequin. Chiquexon macan quenchajquin, bimibo jentsinnoxon. Janoxon huai coirannocon sca tapojascaquin.

Banaquin queyoxon sca caibo jahuen huai hinantahquin. Huai hihbo sca huetsa main cahi.

² Bimi tian jan hinantaho hihbobo qui jahuen joni raanquin, bimi texe hinanahbo.

³ Nocotaiton rishquixon jahuabi bimijoma raanscacanquin.

⁴ Mequen bi res nocataiya huetsa jahuen joni sca raanrihbiquin. Nocotaiton mapo qui tsehuejaxon tiromajacanquin.

⁵ Huetsa jahuen joni rihbi hapon raanrihbiquin. Jaa rehtecanquin. Huetsa rihbi jascjacanquin, caibo rishquixon caibo retequin.

⁶ Huesti sca jai, hahan jan shinanai jahuen baque huesti sca. Chini sca jaa jato qui raanquin, heen baque ta nincatihcaniqui, hihxon.

⁷ Nocataiya hinantaho hihbobo yohinan: Nea ta jahuen papan huai hihboyaxihqui qui. Jaa retehi canon bonahue jahuen huai noquenah sca janon, hihcani.

⁸ Jaa bikhon rehtexon huai behro potacanquin.

⁹ ¿Jahueja jascapahbo huai hihbaan jatihiquin? Joxon ta hinantaho hihbobo rehteyaxi-hqui qui, huetsabo sca huai hinantahnoxon.

¹⁰ ¿Nescajaquin huishani joi man jisyamaniqui?

Tiroma ta jaiqui hihxon xobojahibaan potabohannihbo jihui ta hahqui xobojati jihui qui.

¹¹ Papan ta jascjahiqui. Jan jascjahijijisah tah non rahtetai

—jato jaquin.

¹² Jahuen huai joi jan yohihi jatoya jan johi honanxon jaa xecotancatsihquibo bi tsamajaquetaibo qui raquetax jaa janinhax boresscacani.

Hapo copijati jaiquin hihquibo

(Mt 22.15-22; Lc 20.20-26)

¹³ Yohuanquihnahbo jaamahi yohuanaiton bihnon fariseoboya herodianobo sca raancanquin.

¹⁴ Raanahbo hahqui caxon yohicanquin:

—Mian ta min ponte yohihi, Maestron. Non tah non honanai. Rabinxonma tah min honanmah. Tsohqui raquexonma tah min jatihibi jonibo min yohihi. Jahuabi joi huetsajaxonma tah min ponte res noque yohihi. Papan joi ta min honanmacoinai. Cesaronen noque cobranah noquen copijati joi jaiquin? ¿Yamahihquin? ¿Non copijatihin? ¿Non copijatimahin? —hahcanquin.

¹⁵ Jaabo hihcoinicamahi yohuanai honanxon jato yohiqui:

—¿Jahuejanoxon man hea tanahin? Huesti coriquiya benahue hen jisnon —jato jaquin.

¹⁶ Huesti bohiboya jato yocaquin:

—¿Tsoana hin, nea mapo? ¿Nea huisha cahran? —jato jaquin.

—Cesaronra rahan —hihcani.

¹⁷ —Cesaronabo Cesaro hinanrihbinahue. Papanahbo Papa hinannahue —jato jaquin Jesusen.

Jan jascaraiya hahqui raquecani.

Non teeihthihin hihquibo

(Mt 22.23-33; Lc 20.27-40)

¹⁸ Saduceobo sca Jesus qui bocani. Tsoabi ta hahquirihbi huenitimahiqui hihquibo. Nocotax yocacahcani:

¹⁹ —Moisesnin ta noque huishaxonnishqui, Maestron. Jahuen huetsa baquejahaxma mahuataiya ta jahuen yononma jahuen chinipan bihtihiqui, jahuen bochan baque janon hahqui baquejanoxon haquin huishaquin.

²⁰ Siete huetsabo ta janishqui. Beboquihahnen ta haibo bijnishqui. Bichish bi mahuati, baquejahaxma.

²¹ Jahuen chinipan sca ta jahuen yononma bijnishqui. Bichish bi mahuati, baquejahaxma. Jahuen jochica jascarihibili.

²² Siete rahsi jascari mahuati, baquejahaxma. Chini sca haibo rihbi mahuati.

²³ ¿Papan noque hahquirihbi huenihi tian jahuemehatona jaa haibo hihyaxihqui qui, siete jatihxionbi haibojani? —hahcanquin.

²⁴ Jesusen jato yohiqui:

—Papan huishamani joi honanyamahax tah man jascarai, jahuen coshi rihbi honanyamahax tah man ponte yohuanyamahi.

²⁵ Mahuataibo hahquirihbi huenihi tian ta Papan yonotibo naihoh queha jai quescapahbo bebobo jayaxihqui qui huanoahmabo. Haibobo rihbi ta beneyahpatimahiqui.

²⁶ ¿Mahuanihbo hahquirihbi huenitimahiquin? ¿Papan Moises yohini man jisyamaniquin, Moisesnun huishani janin hoa jihui namantiha pishca joibo jaiton? Papan ta Moises yohinishqui: Abrahanen Papa Dios tah hen qui, Isaaqueen Papa Dios, Jacobon Papa Dios hahquin.

²⁷ Mahuataibaanama bi jihuetaibaan Papa Dios ta jaa qui. Jaamajaquin tah man shinanai –hahquin jato.

Non hihti nincati

(Mt 22.34-40)

²⁸ Jaatian sca huishani honan huesti jato pataxi jahui. Jaabo yohinanai nincacuin. Jesusen jato yohiquin sirijahi jisxon Jesusen yocaquin:

–¿Papan yohini joi non jahuemeha hihti nincatihin? –hahquin.

²⁹ Jesusen sca yohiquin:

–Hihti nincati joi ta nea qui. Nincanahue, Israelibaan. Noquen hihbo Papa Dios ta jaa huesti hihbo qui.

³⁰ Miin Hihbohon shinanhue miin jointiboyaxonbi, miin yoshinboyaxonbi, miin shinanboyaxonbi, miin coshiboyaxonbi.

³¹ Jaa pecaho ta nea qui. Mihbe jihuetaibohon shinanhue, mihmebi min shinamehti hihqui quescarihbijaquin. Nea rabe joi mentan ta hashoan hani joi yama qui –hahquin.

³² Jascajaha huishani honan joni sca yohuani:

–Ponte ta min jai, Maestron. Papa Dios huesti tah qui. Huetsa yamaha, jaa huesti. Hihcoin tah min jai.

³³ Noquen jointiboyaxonbi noquen shinanboyaxonbi noquen coshiboyaxonbi noquen Papahon shinantixon, non noquebi shinamehti hihqui quescarihbijaquin noquen hahbe jihuetaibohon shinanti ta Papa qui hinanti jatihibi mentan hashoan siri qui. Jatihibi hinábo rehtexon Papa qui hinanti mentan hashoan siri –hihqui.

³⁴ Jan honanax yohuanai jisxon Jesusen sca jaa yohiquin:

–Papan jihuematí hochoma ta mia qui –hahquin.

Jaa pecaho yocati qui raquecani jatihibi.

Cristo yocacahai: ¿Etsan baque hea qui?

(Mt 22.41-46; Lc 20.41-44)

³⁵ Papan xobohoxon honanmahahnan Jesusen jato yocaquin:

–¿Jenquetsapahin huishani honanbaan nescajahiquin: Cristo ta David xohta qui hahquin?

³⁶ Dios Yoshiman shinanmaha ta Davidinibni yohinishqui:

Papan ta heen hihbo yohinishqui: Hea mecayahlo tsahohue, miin rahuibo hen mia namanjaxonn caman.

³⁷ Jaa yohihi, Heen hihbo, ta Davidinibni janishqui, jaanbi. ¿Jenquetsahax sca jahuen xohta hihtihiquin? –jato jaquin.

Coin coinxon hicha tsamajaquetaibaan nincacanquin.

Jaton haxemanicahbo Jesusen cahehi

(Mt 23.1-36; Lc 11.37-54; 20.45-47)

³⁸ Honanmaquin jato yohirihbiquin:

–Huishani honanbo qui raquenahue. Chopá nенque sahuehax ta nihniit costancaniqui. Janoxon maroti janin caibaan jato hapón hahti rihbi ta costancaniqui.

³⁹ Jaho tsinquití xoboho ta hashoan siribó tsahotibó rihbi queencaniqui. Fiesta tian ta jano hashoan cacannicabó tsahotai janin tsahocatsihcaniqui.

⁴⁰ Haibo yononmanen xobo ta jahuen jahuequiboyabi bichincaniqui. Caibaan jato jisnon hihxon res ta chajajaquin Papa yocacaniqui. Jascapahbo ta hashoan casticanyaxi-hquiqui –jato jaquin.

Yononmanen jan jai pishca hinanai

(Lc 21.1-4)

⁴¹ Jano Papa Dios hinanti coriqui naneti hoque tsahoxon jaton coriqui nanehivo Jesusen jisquin. Coriquiyahpa janibaan ta hichaxon hicha coriqui nanecannishqui.

⁴² Jahuabijoma haibo yononma huesti joxon cahen nanequin, rabe coriqui pishca huesti soro copitai.

⁴³ Jahuen hexenicabó quenaxon sca Jesusen jato yohiquin:

–Nincanahue, mato yohinon. Jatihibi coriqui nanehivo mentan ta nea yononmanen hashoan nanehiqui.

⁴⁴ Hicha jaxon ta jaabaan nanecaniqui. Jahuabi jaxonma bi ta neatohon jan jai pishca queyobahinhqui nanequin –jato jaquin.

13

*Papan xobo huaxeyaxihquiibo
(Mt 24.1-2; Lc 21.5-6)*

¹ Papan xobohoh quehax cainaiton sca jahuen haxenica huestichin yohiquin:

—Maestron, yotihoparahbo macanbo, yotihoparahbo xobo jise —hahquin.

² Jesusen sca jaa yohiquin:

—¿Nea hihtilosi xobobo min jisin? Ni huesti macanbi ta huetsa cahchian cahtsahoyamascatihiqui. Jatihibi ta potapaqueyaxihcanihqui —Jesusen jaquin.

*Nete queyoti jaonahi honanti
(Mt 24.3-28; Lc 21.7-24; 17.22-24)*

³ Picotax sca Papan xobo hoque tocan Olivos manan janin tsahotaiton Jesus yocacanquin Pedro, Jacobo, Juan, Andres, jaabo rahsichin.

⁴ —Noque yohihue. ¿Jahuentian jascayajaxihcanihqui? ¿Jahua hahan honanti jayaxihquiquin, min noque yohiha quescabi janon? —hahcanquin.

⁵ Jesusen jato yohiquin:

—Jisnahue. Mato parancanmis.

⁶ Jaa ta hen qui hihquish ta heen janen joyaxihcanihqui hicha. Hicha jonibo ta paranyaxihcanihqui.

⁷ Rehtenanaibo nincacax, hocho rehtenanaibo joi rihbi nincacax raqueyamanahue. Nete queyorihyamanon ta jascatihiqui.

⁸ Nahuaboo ta hahbe nahuaboo betan rehtenantihiqui. Quiquin hapon jonibo ta huetsa quiquin hapon jonibo betan rehtenantihiqui. Huetsancobo ta mai mihuanyaxihqui. Piti ta yamayaxihqui pihan hihquibo. Jascaraiboya ta hohmis hohmisti pehocohtiqui.

⁹ Matobi coiramenahue. Casticannicahbaan tananon ta mato hinanyaxihcanihqui. Haho tsinquitx xobohoxon ta mato rishquyaxihcanihqui. Tinintibo bebon tah man nihiyaxihqui, quiquin hapobo bebon rihbi. Man tah man jato yohicoinyaxihqui.

¹⁰ Heen joi siri ta jatihibi jonibo pari yohiti jaiqui.

¹¹ Mato yahtanxon hinanaiya, jahua non jatihin hihxonma masa shinanyamanahue. Mato jaatianbi hinanai yohuan yohiyaxahnahue. Matonbi shinanaxma bi Dios Yoshiman yohuanmaha ta man yohuanyaxihqui.

¹² Huetsa jonin ta jahuen huetsabi hinanyaxihqui, retehahbo. Huetsa papan ta jahuen baquebi jascajaribiyaxihqui. Jaton papa, jaton mama rihbi rahuixaxon ta baquebaan jato rehtemayaxihqui.

¹³ Jatihixonbi ta mato jistahimayaxihcanihqui man heen jane jai copi. Jascalahbo bi ta mahuanoxon caman tenehi joni hean teehimayaxihqui.

¹⁴ Jan janu nihtima janin rahninti masajanica nichiton merahax mahchi quiri jabayaxahnahue, Judea mai mehahbon. Honanhue, nea quirica jisnican.

¹⁵ Xobo pemacanya janinhax jahuequi bihbahini xoboho hihcopaqueyamayaxahnhue.

¹⁶ Huai chian teetax rahcoti bichi joribiyamacayaxahnhue.

¹⁷ Tohoyabo betan xoma hahmahibo ta hohmis hohmisyaxihqui.

¹⁸ Matsi tianbi jascayamaxahcabo Papa yocanahue.

¹⁹ Papan jato Jonijamenoni yamanish ta rahma caman tsoan jisyamanibo tiromabo netebo jayaxihqui. Jaax ta jahuentianbi jascapa hahquirihbi jaribitimahiqui.

²⁰ Jaa netebo noquen hihbaan basimayamahiya cahen tsoabi baneyamahan. Jan caisnibohon shinanaxon ta jaa netebo basimayamayaxihqui.

²¹ Jise, nea ta Cristo qui hihquiboya nincayamanahue. Jise, hoa tah qui, hihquiboya hihcoinai shinanyamanahue.

²² Cristohaxma bi Cristohicamahi Papan joi yohihihcamaibio rihbi ta jatihiqui. Hahan honantiboya hahan rahtetibo ta mato jismatihiqui, hahtipahxon Papan caisaibo paranoxon.

²³ Jisnahue. Jascaphaboo jatihibi jariyamanon ta hen mato yohiscrai.

*Noquebaque joyaxihqui
(Mt 24.29-35, 42-44; Lc 21.25-36)*

²⁴ Jaa hihi tiromaboo pecaho ta bariyahpanbi bari xabayamascatihiqui. Hoxne nete rihbi ta yamascatihiqui.

²⁵ Naihoh quehax ta huishibo paqueyaxihqui. Hani huishmabo ta bahinma sca cayaxihqui.

²⁶ Jaatian ta nai cohin tocan hihti coshi shinanya hihti xabatai hea noquebaque jahui hea jisyaxihcanihqui.

²⁷ Jaatian tah hen heen yonotibo raanyaxihqui. Raanah ta reboqui caxon, chiponqui caxon bari cainai quiri caxon bari hihquihi quiri caxon janu nai chibechijaquehtancahu-naiton caxon jahuen caisaibo tsinuiyaxihqui qui.

²⁸ Pesto jihui jisquin hahcajaquin honannahue. Pesto pereocotax bochocohiya tah man jene tian rahma jahui man honanai.

²⁹ Jascajaribiquin hen mato yohihi quesa sca jai jisxon hea noquebaque neno pishca sca jaonahua honannahue.

³⁰ Man honannon hihxon tah hen mato yohihi: rahma chini jihuetaibo queyoriyama jai bi ta hen mato yohihi quesa sca jayaxihqui qui.

³¹ Naiya mai queyocahinai bi ta heen joi jascabiyaxihqui qui.

³² ¿Jahuentian jascapahbo jayaxihqui qui? ¿Jahua neten, jahua hora? Tsoanbi ta honanyamahqui. Papan naihoh quehabaan yonotibaan bocabi honanyamaquin. Papan baquen rihbi honanyamaribiquin. Papa huestichin honanquin.

³³ Jisnahue. Jahuentian jaa nete jotihiquin honanaxma coiramenahue.

³⁴ Huesti joni hocho catani jahuicama tah hen jathihi. Jahuen xobo janinhax cacatsihxon cahen jahuen jonibo tee hihbomapaquequin. Huetsa jahuen tee, huetsa rihbi jahuen tee, jathihi jaton tee jato hihbomapaquequin. Xehpoti coirannicah rihbi yohi qui coiranhue, hahquin.

³⁵ ¿Jahuentian xobo hihbo joyaxihqui qui? ¿Yamescaya, yame pochinicon, hatapa queotaiya, xaba paquetaiya? Man tan man honanyamahi. Jaa copi coramenahue.

³⁶ Man shinanyamahi tianbi joxon hoxahiton mato meramis.

³⁷ Jatihibi jonibo hen yohihi quescajaquin tah hen mato jai: coiramenahue.

14

Jesus bihti yohinanaibo

(Mt 26.1-5; Lc 22.1-2; Jn 11.45-53)

¹ Pascua fiestaya chahoma paan fiesta rihbi nocoti rabe nete pishinaiya cahen sacerdote hapobo betan huishani honanbo yohinani:

—¿Jenquetsahaxon non Jesus paranxon bihtihin rehtenoxon?

² Fiesta jai tian bihtima ta jai qui, hoa fiestajahi jonibo rehtenanmis —hihceni yohuani.

Haibaan Jesus hininjahi

(Mt 26.6-13; Jn 12.1-8)

³ Jaabo jascarai bi Betania jema janin Jesus pihi tsahoti Simoman xoboho. Simon ta sipi paheyahpa japhaponishqui. Pihi tsahotaiya huesti haibo jahui, hahan hininti nardo xeniyahpa pomoya, hilhi copi bi res hahan hininti. Jahuen pomo retequebahinxon Jesusen mapo qui nardo xeni machiquin.

⁴ Machicaiya caibo rainyamahi:

—¿Jahuejanoxon nea hahan hininti xeni jascajaquin yohyoquihqui?

⁵ Jaa nardo xeni maromaxon ta trescientos denarios, hashoan rihbi, bihquehaniqui jahubijomabo sca cori qui pishca hinanno —hihceni, haibo qui rainyamahi.

⁶ Jesusen jato yohi qui:

—Jenenahue. ¿Jahua jenquetsahin man jaa jatsanjain? Jan hea jascajaxonah ta siri bi res qui.

⁷ Mato tocan ta jahubijomabo jascabihi jatihi qui. Man queenai tianbi tah man jato yanapanti hahtipahi. Huetsa tian ta mato tocan hea hihyamascatihu.

⁸ Jan hahtipahi quescaja ta haibaan jaxonaxqui. Hea tsahonyahnoxon ta heen yora hea hininjahi qui.

⁹ Yohicoan ta hen mato jai: jatihibi mai janinxon heen joi siri yohixon ta jaan hea jascajaxonni yohiyaxihcani qui, jaa haibo shinanxon.

Judasen Jesus paranxon bihmahi

(Mt 26.14-16; Lc 22.3-6)

¹⁰ Jaatian sca Judas Iscariote cahi. Jaa cahen Jesusen haxemati huesti, sacerdote hapobo qui cahax jato Jesus hinanyahnoxon jato betan bexohi.

¹¹ Jan jascacatsihqui nincacax coincoinxon yohicanquin:

—Mia tah non cori qui hinantihu —hahcanquin. Jenquetsahaxon hen hinantihin hihxon Judasen shinanscaquin.

Cristo shinanhahnan piti

(Mt 26.17-29; Lc 22.7-23; Jn 13.21-30; 1 Co 11.23-26)

¹² Chahoma paan fiesta pehocohti neten sca pascua carnero baque rehtehiboya Jesusen haxenicabaan yocaquin:

—¿Jahuerahnon non catihin, pascua fiesta mia pitijaxonnoxon? —hahcanquin.

¹³ Yocacah cahen rabe jahuen haxenicabo raanquin yohixon:

—Jema janin botannahue. Janoxon ta jeneyahpa poo maibehnani jahui jomin mato behchixihqui. Hahbe botannahue.

¹⁴ Jan hihcohi janin xobo hihbo yocanahue: Noquen maestron ta mia yohihiqui, Jahuerahnon hin, janoxon piti chique, janoxon heen haxenicabo betan hen pascua fiesta pinon.

¹⁵ Bochiquiha hani chique ta mato jismaxihqui, misayahpa, tsahotiyahpa, moa hihrescai. Janoxon noque pitijaxonannahue —jato jaquin.

¹⁶ Raana jema janin nocoti bocani. Jan yohihi quescabijaquin meracanquin. Pascua fiesta sca pitijaxoncanquin.

¹⁷ Bepiscaiya jahuen doceyabi Jesus nocoti.

¹⁸ Pihi tsahoxon jato yohiquin:

—Man honannon hihxon tah hen mato yohihi: mato quiha huestichin ta hea bihmatihi, hehbetan pihi huestichin.

¹⁹ Masa shinanxon jatihixonbi yocapaquecanquin:

—¿Hea hen quin? —hahcanquin.

²⁰ —Heen doce quiha huesti tah qui. Hen poseman netinai tason qui ta jaan rihbi hehbetanbi jahuen poseman netinihqui.

²¹ Hea yohihi huishani joi jai quescari tah hen mahuanoxihqui. Hahraai hih ta jatihiqui, hea bihmahi joni. Jahuentianbi jonijayamaha ta jaa hashoan siribiresquehanhqui —jato jaquin.

²² Pihanen sca posen bihxon Papa yocaxon tehcapaquexon jato hinanpaquequin.

—Bihnahue. Nea ta heen yora qui —hahquin.

²³ Tason rihbi sca bihxon Papa yocaxon jato hinanquin. Hinana jatihixonbi hahqui xehaquin.

²⁴ —Nea ta heen jimi qui. Hicha jonibaan hohcha copijaquin tah hen heen jimi potaxihqui. Mahuaquin tah hen mato hahxonbahinai.

²⁵ Yohicoin tah hen mato jai: nea xehati tah hen hahquirihbi xehayamascatihu. Janoxon Papan jihuemahi janinxon pari ta hen behna sca xehayaxihqui —jato jaquin.

Pedro paranahixhqui

(Mt 26.30-35; Lc 22.31-34; Jn 13.36-38)

²⁶ Papa qui behuahax sca Olivos manan janin boribicani.

²⁷ Janoxon sca jato yohiquin:

—Jatihixonbi tah man hea potabahinnoxihqui, huishani joi jai quescajaquin: Carnero coirannicah ta hen rehtetihi carnerobo potojahtani jabisihcami.

²⁸ Hihquipi bi hahquirihbi huenihah tah hen hea pari Galilea main cayaxihqui, man chini canon —jato jaquin.

²⁹ Pedronen sca yohiquin:

—Jaabaan jatihixonbi mia potahi que bi tah hen hean mia potatimahi —hahquin.

³⁰ —Yohicoin ta hen mia jai: hatapa rabe coti queori jaima tah min heen joni hihtima min quimisha coti yohinoxihqui nea yamebi —jesusen jaquin.

³¹ Jascajaha coshin sca yohuani:

—Hea miayabi rehtehibaan bi tah hen miin joni hihtima hen yohitimahi —hihqui.

Jatihibi sca jascarih.

Getsemani huai chianxon Jesusen yocacai

(Mt 26.36-46; Lc 22.39-46)

³² Getsemani janeya huai janin sca bocani. Nocoxon sca jahuen haxenicabo yohiquin:

—Nenobi tsahopaqueannahue, hen Papa yocatannon.

³³ Jascajaxon Pedro, Jacobo, Juan, jaabo rahsi boquin. Hihti masa shinanscaquin Jesusen. Rahte rahteti.

³⁴ —Heen jointiboyabi tah hen bena benatai, hahan mahuati bena tah hen jai. Nenobi banexon coirannahue —jato jaquin.

³⁵ Hoque pishca cahax beho racaxon Papa yocaquin, janoxihquibo jatimajati yocaquin.

³⁶ —Papan, hea janoxihquibo jayamanoxahnon jahue, jatimajati hahtipahxon. Mian tah min jatihibi hahti hahtipahi. Jaabi hea queenai quescayamahi bi mia queenai quescahue —hahquin.

³⁷ Joribixon jaabo hoxahiton meraquin. Hoxahiton meraxon Pedro yohiquin:

—¿Min hoxayamahin, Simoman? ¿Huesti hora pishca min coiranti hahtipahyamahin?

³⁸ Coiranhanan Papa yocanahue mato hohchati queenmayamahabo. Maton shinaman man coshiti shinanai bi tah man shinan coshi yamahi —jato jaquin.

³⁹ Hahquirihbi caxon Papa yocaribiquin. Jan yocacah quescajaquin yocaribiquin.

⁴⁰ Joribixon sca jato hoxahiton merarihbiquin, jaton bero quextojaqueti. Yocacah bi jahua yohiti honanyamacanquin.

⁴¹ Jahuen quimisha coti sca catani joribixon jato yohiquin:

—¿Man tanti tantih ihoxaparinh? Senen ta jaiqui. Hora ta nocoscaqui. Hea noquebaque ta hohchayahpabo jonibo hinannoxihquiqui, bichibó hihxon.

⁴² Huenitax canon bonahue. Jisnahue, hea bihmanica ta jahuiqui.

Jesus menexxon bohibo

(Mt 26.47-56; Lc 22.47-53; Jn 18.2-11)

⁴³ Jan jascajahi betanbi Judas nocoti, jahuen doce quiha huesti. Hicha joni machitoyahpabo huinoyahpabo rihibi hahbetan became. Sacerdote hapobaan raanah became. Huishani honanbo betan judiobaan hanibaan rihibi raanah became.

⁴⁴ Jato betan bexohax bihmanica jato bebohi jahui. Hahan Jesus honanahbo jato yohibenanai:

—Hen hicottannozihqui joni tah qui. Jaa bihxon coiranxon hiotannozihnahue —jato yohibenani jahui.

⁴⁵ Nocotax res sca Jesus qui joxon:

—Hihbon —hahxon hicotanquin.

⁴⁶ Hicotanaiya Jesus bihcanquin.

⁴⁷ Jesus bichiboya jaa patax nichu huestichin jahuen machito tsecaxon sacerdote hapon yonoti reraquin bi jahuen pabinqui res paxtebahinquin.

⁴⁸ Jesusen sca jato yocaquin:

—¿Yometso bihquin hahcajaquin man hea bichin, machitoyahpa joxon, huinoyahpa rihibi joxon?

⁴⁹ Netetihibi Papan xobohoxon honanmahanan hen mato betan hihrasihu bi tah man hea bifyamahipiqui. Jaabi huishani joi jai quescabi janon tah man nescajahi —jato jaquin.

⁵⁰ Jato jascajanjan jatihixonbi jaa potabahini jahuen haxenicabo jabati.

Jabatai beronan

⁵¹ Huesti beronanen cahen jahuen rahcoti res sahuexon Jesus chibanquin.

⁵² Jaa rihbi sca bichibaan bi jahuen rahcoti potabahinax chopanma sca hishtocanahi jabati cahi.

Tsinquixon Jesus cahehibo

(Mt 26.57-68; Lc 22.54-55, 63-71; Jn 18.12-14, 19-24)

⁵³ Sacerdote hapo janin sca Jesus hiocanquin. Sacerdote hapobo, judiobaan hanibo, huishani honanbo jatihibi jano tsinquican.

⁵⁴ Hiohibo bi hochoxon Pedronen jato chibanbonaquin sacerdote hapon xobo jemanhti janin hihconoxon caman. Jemanhihtin sca sacerdote hapon yonotibo betan pehchihi tsahoti.

⁵⁵ Xobohoxon cahen sacerdote hapobo betan tsinquitibaan jatihixonbi Jesus qui yohuancointi joi benacanquin, cahexon retemanoxon. Benaxon bi merayamacanquin.

⁵⁶ Hahqui yohuancoinihcamahi quescahi yohuanai hichahi. Jaa joiya huesti yohuancoinyamacani.

⁵⁷ Caibo nihinahtax hahqui yohuancoini quescari quescahi yohuani.

⁵⁸ —Nea mequeman xobojanib Papan xobo tah hen potapaqueyaxihqui. Quimisha neten potahipixon tah hen huetsa rihibi sca xobojayaxihqui, mequeman hahcahma sca, hih ta jaipishqui noquen nincanonbi —hihcanci.

⁵⁹ Jascaraibaan bi jaa joiya huesti yohuancoinyamacani.

⁶⁰ Naponib nihxon sca sacerdote hapon Jesus yocaquin:

—¿Min jahua yohiti yamahin? —Jahua yohuan neabo mihibqui jaiquin? —hahquin.

⁶¹ Jascalah bi jahua hihyamahi. Neteti. Sacerdote hapon yocarilhiquin:

—¿Mia min Cristo quin? —Mia min noquen Papan siripan baque quin? —hahquin.

⁶² —Jaa tah hen qui. Coshiyahpaton mecyaho hea noquebaque tsahotai tah man jisyaxihqui. Nai cohin tocan jahui rihibi ta man hea jisyaxihqui —jato jaquin Jesusen.

⁶³ Jan jascajahiya sacerdote hapon sca jahuenahbi jahuen chopa huaxabahinxon yocaquin:

—Jahua copi non hashoan rihibi hahqui yohuanti benaparitihin?

⁶⁴ —Jan tiromahi Papa qui yohuanai ta man nincascai. —Jahuejati man shinanain? —hahquin.

—Rehteti ta jaiqui —hihcanci jatihibi.

⁶⁵ Caibo hahqui toshbanhihcahini. Juhuen bemanan beracohxon rishquixon yocacanquin:

—¿Tsoan mia rishquihiquin? Noque yohihue —hahcanquin.
Sacerdote yonotibaan sca bihxon rishqui rishquirihbiquin.

Pedro paranahti

(Mt 26.69-75; Lc 22.56-62; Jn 18.15-18, 25-29)
66 Naman jemanhihti janin Pedro nichiya sacerdote hapon yonoti haibo jan cahi.

67 Pedro pehchihi jisxon bejisquin sirijaxon yohiquin:

—Mia rihbi tah min Nazaret janinha Jesus manahi nihrasihu —hahquin.

68 Jascajaha jeenhihyamahi:

—Jahua rah tah min jai. Min yohanuanai ta hen honanyamahi —hihqui. Jemanhihti xehpoti janin sca Pedro nichiya cahiya hatapa queoscai.

69 Jan cahi jisxon yonoti haibaan jan nichibo sca yohiquin:

—Jaa ta jato betan nihnicah qui —hahquin.

70 Haibaan jascajaha bi Pedro jeenhihyamahi. Jascama ta qui hihresi. Jaa pecaho pishca jano nichibaan sca Pedro yohirihbiquin:

—Hihcoini tah min jato betan nihnicah qui. Mia ta min Galilea mai meha qui —hahquin.

71 Hen yohuancoinyamahiya Papan hea rehtenon. Papan hea jiscoina tah hen yohuancoinai. Man yohihi joni tah hen honanyamabiresai —jato jaquin.

72 Jahuen rabe coti sca hatapa queoti. Queotaiya cahen Jesusen yohiha joi Pedronen shinanscaquin: Hatapa rabe coti queori jaima tah min heen joni hihtima min quimisha coti yohinoxihqui. Jaa joi shinanax hihti benatax huaohihscai.

15*Pilatonen Jesus yocacai*

(Mt 27.1-2, 11-14; Lc 23.1-5; Jn 18.28-38)

1 Xaba paquescaiya sacerdote hapobo, judiobaan hanibo, huishani honanbo, jaabo rahsibi tsinquitax yohinanai. Jesus menexxon hioxon Pilato hinancanquin.

2 Pilatonen sca yocacuin:

—¿Mia min judiobaan quiquin hapo quin? —hahquin.

—Min yohihi quesca rahan —hahquin.

3 Hahqui tiromahi yohuanquin sca cahen sacerdote hapobaan joi tsamanscaquin.

4 Pilatonen sca jaa yocarihbiquin:

—¿Min jahua yohiti yamahin? ¿Mihqui hicha yohuanquin joi tsamanaibo min ninayamahin? —hahquin.

5 Yocacah bi Jesus jahua hihyamascaiya Pilato rahteti.

Jesus rehetetijahibo

(Mt 27.15-31; Lc 23.13-25; Jn 18.38-19.16)

6 Pascua fiesta tian ta jan sipojani huesti Pilatonen jato picoxonpahonishqui, jaabaan yocacai huesti picoxonquin.

7 Jaton quiquin hapo potacatsihquin, rehtenanxon huetsa jonibo retehiton jan sipojanibo jai. Huesti cahen Barrabas janeya.

8 Tsamajaquetai jonibo mapexon sca, jan jato hahxonpahoni quesacaquin Pilatonen jato hahxonnon yocacanquin.

9 Yocacatsihquibo bi jaan pari yocacuin:

—¿Judiobaan quiquin hapo hen mato picoxonti man queenyamahin? —hahquin.

10 Sacerdote hapobo notsi notsixon hinanai honanscaxon jascajaquin.

11 Jascalah bi cahen sacerdote hapobaan tsamajaquetaibo yohuanquihbiquin sinamaquin, Jesus yocatima shinanahbo. Sinaxon sca Jesusma bi Barrabas jan jato picoxonnon yocacanquin.

12 Jascalahitton Pilatonen jato yocarihbiquin:

—¿Barrabas picoxonti man queenaiya maton quiquin hapo hahcaibo joni cahran? Jaa hean jahuejatihin? —jato jaquin.

13 —Jihuin hueonhue —hahcanquin coshin bi res.

14 —¿Jahua copi nan? ¿Jahua tiroma jaiquin? —jato jaquin Pilatonen. Jan jascalah bi hashoan coshin sca yohuancani:

—Jihuin hueonhue —hahcanquin.

15 Jenimahabo sca Pilatonen Barrabas jato picoxonquin. Jesus rishquimaxon, jihuin hueonnon hixhon, bijnahue jato jaquin.

16 Bijnahue hahca hapon xobo chicho sca sontarobaan Jesus hioquin, pretorio janeya xoboho. Jano hioxon sca hahbe sontarobo jatihibi quenacanquin.

17 Yancon chopasahuemaxon moxa maitijaxon maimacanquin.

18 —Jihuehue, judiobaan quiquin hapon —hahcanquin hapojahicamaxon.

¹⁹ Jascajaxon jihui taxon marishquicanquin. Hahqui toshbanhihcani. Hapojahicamaxon hahqui raboxonen tisquihapaequecanquin.

²⁰ Hosanquin queyoscaxon yancon chopas cahon jahuen chopas sahuemacanquin. Sahuemaxon jihuin hueonnoxon sca hiocanquin.

Jihuin hueonainbo

(Mt 27.32-44; Lc 23.26-43; Jn 19.17-27)

²¹ Simon janeya joni cahchihoh quehax jahue xano huinotaiton jahuen coros hiamacanquin. Jaa ta Alejandro betan Rufo jaton papa hihpahonishqui, Cirene mai janinhah.

²² Jano Gólgota Jane jaiton hiocanquin. Gólgota cahen mapo xaoya manan hihcatsihqui.

²³ Mirra rahoya vino mescoxon xehamacatsihquiaan bi queenyamahi.

²⁴ Jihuin hueonscacanquin. Jahuen chopabo metisahcanquin. Tsoana banetihiquin hihxon macan bero borasa qui nanexon chicohas huetsa pari cainaiya huetsan bignon, huetsa macan pari cainaiya huetsan sca bignon.

²⁵ Bari hihinahtaiya hueoncanquin.

²⁶ Jahua copi rehetequin honanahbo hihxon quirica sca hueoncanquin. Judiobaan quiquin hapo, hihqui jaa quirica.

²⁷ Rabe yometsoh rihbi hueoncanquin, huetsa jahuen mecayaho, huetsa jahuen memiho.

²⁸ Jaatianbi ta huishani joi quescas sca janishqui: Hohchataibo betan hihqui shinaxon reheteah ta qui, hihqui jaa joi.

²⁹ Jano huinotaibaan sca jaton mapo bose bosehihcahinxon hosanquin.

—Heeeeen. Papan xobo potapaquehipixon tah hen quimisha neten hihxon jaa xahnen hen huenirihbiyaxihqui hih ta min jaipiqui.

³⁰ Coros janinhax bototax mihmbebi sca teehihhue —hihcani.

³¹ Sacerdote hapobo, huishani honanbo betan jascarihbibi yohuani. Hosancanquin.

—Cabo teehihmaxon bi ta hahmebi teehihiha tipahyamahiqui.

³² Criston, Israelibaan quiquin hapon, coros janinhax rahmabi botopaquequihranhue, botoquihranai mia jisxon non mia nincacoinnon —hihcani. Hahbe hueonahbaan rihbi hosanquin.

Jesus muhuascai

(Mt 27.45-56; Lc 23.44-49; Jn 19.28-30)

³³ Barin manan tsacahiya sca jatihibi mai bahquishihcahinscrai, bari racapaquenon caman.

³⁴ Bari racapaquetaiya sca Jesus coshin yohuani:

—Eloi, Eloi, ¿lama sabactani? —hahquin. Papan Dios, Papan Dios, ¿jahua jenquetsahin min hea jenescain? hihcatsihqui.

³⁵ Jan jascahi nincaxon:

—Jisnahue, Elias ta quenahiqui —hahcanquin jano nichibaan.

³⁶ Hishtocahinxon huesti jonin xehati cachani qui taco quescapah maosahxon jihui taxo qui queonxon sananhixnixon xehamaquin. Xehamaxon:

—Mananahue. Jaa botonnoxon Elías jahui non jison.

³⁷ Jaatian sca saisaihiquish Jesus muhuascai.

³⁸ Jaatianbi ta Papan xobo janin rontamehtai chopas chique huaxacahinnishqui, bochihi janinhax naman caman.

³⁹ Jesus bebon nihxon jan jascari muhuatai jisish capitán sca yohuani:

—Hihcoini, nea ta Diós baque qui —hahquin.

⁴⁰ Haibobaan rihbi ta hochoxon jisnishqui. Huetsa cahen María Magdalena, huetsa cahen María, hoa chinitai Jacoboya José jaton mama, huetsa cahen Salomé. Jano nihxon ta jiscannishqui.

⁴¹ Galilea janin Jesus nichiya cahen jaabaan jaa chibapahonish. Jaa pimarihbipahonish. Jesus betan Jerusalen janin jahuipi haibobo rihbi ta jano nihxon jiscannishqui, hichaxon.

Jesus tsahonaibo

(Mt 27.57-61; Lc 23.50-56; Jn 19.38-42)

⁴² Yantanscaya cahen bahquish tantiti neten piyanoxon pitijacanquin, jaton pitijati neten.

⁴³ Jaa copi jahuen raque potahax Pilato janin caxon Jesusen yora Josepan yocaquin. Jaa José ta Arimatea janinhah hihpahonishqui hahbe hapobo tsinquinica, shinanyahpa joni. Papan jihuemahi jiscatsihqui jaan rihbi manaquin.

⁴⁴ Jesus muhuascai nincacax Pilato rahteti. Capitan quenaxon sca yocaquin:

—¿Mahua sca jaiquin? —hahquin.

⁴⁵ —Mahua sca ta jaaxqui —capitan jaiya jeenhihscai, Josepan jahuen yora bihnon.

⁴⁶ Sábana maroxon Jesus botonpaquexon sabananen rahcoxon macan xanquen poquinipibo tsahon chicho racanquin. Macan taranxon sca tsahon quini behpoquin.

⁴⁷ Jan jano tsahonai ta María Magdalena betan Josepan mama Marian jisnishqui.

16

Jesus teehihribihi

(Mt 28.1-10; Lc 24.1-12; Jn 20.1-10)

¹ Tantiti nete huinoscaya hininjahi canoxon hahan hininti marocanquin, María Magdalena, Jacobon mama María, Salomé, jaabo rahaibichin.

² Hahan semana pehocohtai neten sca xaba honanax yamequiribi tsahon janin bocani.

³ Yohuanbonacani:

—¿Hahan tsahon behpohipi macan tsoan noque taranbohanxontihquin? —hihcanahi.

⁴ Jaa macan cahen hihthosi. Jari jisxon moa taranbohanah meracanquin.

⁵ Tsahon chicho hihcoxon joxo tariyahpa beronan mécayaho tsahotai meracanquin.

Merahax rahte rahtecani.

⁶ Jaan jato yohiquin:

—Rahteyamanahue. Man tah man Jesus benahi Nazaret janinha Jesus hueonipibo. Jaa ta huenitaxqui. Nenoma sca tah qui. Neno racanipi jisi benahue.

⁷ Yohihi sca botannahue: Mato rihbi canon ta Galilea main Jesus caresscαιqui. Janoxon tah man jaa jistih, jan mato yohihipi quescabijaquin. Jahuen haxenicabo, Pedro rihbi yohitannahue —jato jaquin.

⁸ Yohihah rahte rahtetax tastahihquish tsahon janinhax picotax bishquihihcanahi bocani. Raquetax tsoabi yohibonahaxma bocani.

Maria qui sanareneni

(Jn 20.11-18)

⁹ Hihquipish bi hahan semana pehocohtai neten hihari huenitax roqui María Magdalena qui pari Jesus cainnish. Jaa haibo janinhax roqui siete tiroma yoshin jaan piconish.

¹⁰ Caxon qui jaa Marian Jesus betan nihcahchihibo huinihi huaohihquiton meraxon yohiquin:

¹¹ —Hahquirihbi ta teehihqui qui. Hen ta hen jistanai —hah qui jan jai bi qui hihcoinai shinanyamacanquin.

Jahuen haxenica rabe qui caini

(Lc 24.13-35)

¹² Jaa pecaho roqui huetsapahax sca huetsa rabe qui caini, jemama qui cahiton. Jahuen haxenica rabe.

¹³ Jaabo rabechin qui caxon texe yohihahbaan bi hihcoinai shinanyamarihbicanquin.

Jesusen raantibo raanai

(Mt 28.16-20; Lc 24.36-49; Jn 20.19-23)

¹⁴ Jaa pecaho sca roqui jahuen once qui cainrihbibi pihi tsahotaiton. Hihquipish bi hahquirihbi teehihscrai jisxon yohihahbaan bi hihcoinai shinanyamahiboya roqui jato hihi yohiquin, hihcoinai shinanyamahiboya copi, jaton jointi chahomahi copi rihbi.

¹⁵ —Jatihibi main caxon jatihibi jonibo heen joi siri yohili botannahue.

¹⁶ Nincacoinaiton man nashimahiboya tah hen teehihmatihi. Nincacoinyamahiboya tah hen casticanyaxihqui.

¹⁷ Heen janen tah man caibaan tiroma yoshinbo picoyaxihqui. Joi behnapan ta caibo yohuanyaxihqui.

¹⁸ Ronobo bichish bi ta hisinyamayaxihcanihqui. Hahan mahuati paheyahpabo xehahax bi ta hisinyamayaxihcanihqui. Hisinaibo ta mequeman meheyaxihcanihqui roha-hahbo.

Jesus hinahihnascai

(Lc 24.50-53)

¹⁹ Jato yohi sca jan jaiya qui noquen hihbo Jesus naihohxon Papan bilihnihninish, jahuen mécayaho sca tsahonon.

²⁰ Jaabo sca ta jatihibinco caxon joi haxemacannishqui. Noquen Hihbaan ta jato yanapanquin hahan honantijaxonmishqui, jaabo hihcoinai yohuanai honanahbo.

LUCAS

Lucasen huishani joi siri

Teofilon honannon jan yohihi

¹ Mihqui tah hen nea joi raanai, señor Teofilon. Neno jenques japahonishquin hihxon hichaxon huishati shinannibaan bi tah hen hean sca huishaxon mia yohicatsihqui.

² Cristo jomenon ijsnicaħboxon ta jahuen joi yohinicabaan noque jaa joi honanmascanshqui, jaabaan jisnixon.

³ Min honanon hihxon tah hen hean rihbi huishapaqueti shinanai. Neateman pehohcohnish rahma caman jenques jaiquin jatihibi honanquín sirijaxon tah hen huishaxon mia yohihi.

⁴ Jenquetsahpa yohuan jacoinnishquin min mian rihbi honancoinnon tah hen nea huishahi.

Nashimanica baquexo picoyaxihqui

⁵ Judea main Herodes quiquin hapo japarihiya ta Zacarías janeya joni janishqui. Noquen Papa noque yocaxonnicah, jahuen joi haxemanicah. Abías baquebo betan teenica. Jahuen haibo ta Elisabet janeya janishqui, yocaxonica Aaroman chiní baue.

⁶ Jaa haibo betan bebo cahen rabebi pontejaquin shinanaibo, Papan yohini joibo nincacoinaibo. Papan yononi quescabijauin hahcaibo. Jascajati ta jaiqui hihxon Papan yohihi quescabijaxon rabebibichin jahua joibi pishinmayamaquin.

⁷ Jascapahboħax bi baquejomabo. Jahuen haibo baqueyosma, yoxaboscai, jaa rihbi yosiboscai.

⁸⁻⁹ Hen mia yohihi quescari jaton coiranti nete nocotaiya cahen Abías baquebo Papan xobo coirani jaax bocani. Jaton tee hahqui jano Zacarías cahi. Papan xoboho hahan hininjati quetejatanhue hahca jano mapescai.

¹⁰ Chichoxon Zacarías huestichin quetejahiya bi ta jemanhihti janin texe jonibo tsama-jaquenishqui. Quetejati hora nocotai quen jemanhihtinin tsinquijaquexon Papa yocacan-quín.

¹¹ Janoxon quetejati janin nihxon sca, Papan yonoti hahqui sanareneni jahui Zacaríasnen jisquin. Jahuen hininjati pataxbi nihrenenai jisquin.

¹² Jisish rahte rahteti. Hihti raqueti.

¹³ —Raqueyamahue, Zacarian. Min yocacai ta Papan nincaquihqui. Min hahqui baquejaha ta miin haibaan tohoscaxon baque bihyaxihqui. Jaa pishca tah min Juan janeyaxihqui.

¹⁴ Jaa baque copi tah min jenimayaxihqui, hihti coincoini. Jan cainaiya ta hicha jonibo rihbi jenimayaxihcanihqui.

¹⁵ Papan jisi ta haniscaxx shinanya joni sca jayaxihqui. Pahe xehayosma. Mae, hompa, jascapa pahebo xehayamaquin. Cainrihyamahiton bi ta Dios Yoshiman jaa hihbojayaxihqui.

¹⁶ Jaa copi ta haniscaxon jaan yohihah miin caibaan hichaxon jaton shinan ponteyaxihqui, jaton Papa Dios qui hinamehxon.

¹⁷ Jahuen hihbo bebohi ta miin baque nihyaxihqui. Elías yamanicaton coshi shinanya ta nihyaxihqui. Jahuen yoshin siri Papan Elías hinanni quescajaquin rihbi ta jaa rihbi hinanah jaaya nihyaxihqui, jonibi shinan hinanbonahī nichī. Jaton baqueboħon shinanħabu jato shinan hinanquin. Hihti sirijaquin shinan sca jaábo nincayosmabo yohibonaquin. Jaton Hihbo nincacatsihquibo jaábo hihxon ta jato yohibonayaxihqui —hahquin Papan yonotinin.

¹⁸ Jascari Papan yonoti yohuani jaiya:

—¿Min hihcoinai hen honannon, jahua min hea jismatihin? Jise. Hea tah hen yosiboscai. Heen haibo rihbi yoxaboscai —hahquin Zacaríasnen.

¹⁹ Jaatian sca:

—Hea tah hen Gabriel qui, noquen Papa Dios bebon nihnicah. Yohitanhue hea Papan jaah tah hen mia yohihi jahui. Jaa copi tah hen mia joi siri yohihi.

²⁰ Hen mia yohihah nincahue. Joyo sca tah min jatihi. Hen mia yohihi nocoyaxahnon caman tah min yohuantimacahinscatihi, hen yohihah bi hihcoinai shinanyamahax. Hen mia yohihi quescabi ta jayaxihqui, jahuen nete nocotaiya —hihqui Papan yonoti.

²¹ Zacarías piconon caman jaa manati jemanhihtinin jonibo nichī. Papan xoboho jan basihiya rahtecani.

²² Jaatian sca picoscai. Picotax bi joyoscai, Jascabi yohuantimacahinxon behantanresquin. Jan behantan behantanaiya ta chichoxon Papan jismaha jan jahuara jisbenanai honanscacannishqui.

²³ Jaa pecaho sca jahuen xobon cati nete nocoscaya jahuen xobon caresscrai.

²⁴ Jahuen xobon jan nocotipi pecaho hahbetan hihquish jahuen haibo Elisabet tohoscai. Tohoxon bi pichca hoxne jahuen toho paxajaquin jisyamahabo. Tsoabi yohiyamaquin.

²⁵ Papan ta hea hahxonihqui. Jonibo tocan hen hihtimahyamas canon ta jaa queenai tianbi hea hahxonihqui, hihqui.

Jesus cainyaxihqui

²⁶ Jan Elisabet yohiho seis hoxne sca ta Nazaret janeya jema janin sca Papan yonoti canishqui, Papan raanah. Gabriel janeya, Papan yonoti.

²⁷ Jano cahax huesti haibo qui nocoti cahi. María janeya haibo. Bebaan honanahma. Jaa bihyaxihqui joni ta José janishqui, Davidinin chini baque.

²⁸ Nocoxon sca Papan yonotinin yohiquin:

—¿Min jascabi jayamahin, haibon? Mia ta noquen Hihbaan shinanihqui. Mihbetanbi ta hihqui —hahquin.

²⁹ Jan jascalah, haibo rahte rahteti. Jan jascarai jahua hihcatsihqui qui hihqui, jahuen jointi chicho res.

³⁰ Rahtetaiton sca:

—Raqueyamahue, Marian, noquen Papa ta mihon jenimahiqui.

³¹ Jise. Min tah min tohoscayaxihqui. Bebo baque bihxon sca tah min jaa Jesus Janeyaxihqui.

³² Jaa ta shinanya joni hihyaxihqui qui. Papa naihoh quehaton baque tah qui hih ta jayaxihcanihqui. Jahuen xohta yamanica Davidinin jihuetahbó ta Papa Díosen jaa hinanyaxihqui qui,

³³ queyotaxma jan jascabi sca judiobaan qui qui hapo hihnon —hahquin Papan yonotinin.

³⁴ Jascahah Marian yocaquin:

—¿Jenquetsahaxon hen heen bene yamahi bi hen baque bihtihin? —hahquin.

³⁵ Jaatian sca:

—Dios Yoshiman ta mia hihbojahi qui. Papan coshi shinaman ta mia coiraniqui. Jaa copi ta min bihyaxihqui baque yohihi, Jaa ta Papan baque qui, Díosen baque, hihyaxihcanihqui.

³⁶ Jise. Miin tsabe Elisabet rihbi ta yoxabohax bi tohoyascai qui. Baquejoma hihpahonish bi ta jahuen seis hoxne tohoya sca jaiqui.

³⁷ Papan ta jatihibijati hahtipahiqui —María jaquin Papan yonotinin.

³⁸ Jascahah:

—Hea tah hen qui, hih ca hen jai sen, heen Hihbaan jihuetahbó. Min hea yohiha quescajaquin jan hea janon —hahquin Marian. Jaatian Papan yonoti caresscrai.

Elisabet jisi María cahi

³⁹ Papan yonoti jascaripi pecaho Judea main sca histon cacatsihquish María caresscrai. Mahchibó jano jaiton cahi, jan honanai jema janin nocoti cahi.

⁴⁰ Nocotax sca Zacarian xoboho mapeti. Min jascabi jayamahin, tsaben hahquin Elisabet hicotonquin.

⁴¹ Min jascabi jayamahin tsaben hahcái betan bi jahuen xahquin janin jahuen baquexo tehquexihtani Elisabetnin honanquin. Dios yoshiman hihbojaha sca Elisabet coshin yohuani:

⁴² —Hihti hahxon ta noquen Papan mia jaiqui. Miin xahquin janin jai baquexo ta jaan mia hahxoniqui.

⁴³ ¿Hea jahua que ma bi min heen hihbaan mama hihquish min hehqui jahuin?

⁴⁴ Hihcoin tah hen jai. Jise, min hea yohihi hen nincacai betan bi ta coincoinax heen xahquin hihbaan quehax heen baquexo tehquexihtanaxqui.

⁴⁵ Noquen Papan mia hinantijaxon yohihi pi nincacoinax tah min hihti jenimascatihi —hahquin Elisabetnin.

⁴⁶ María sca noquen Papa qui siripi yohuani:

Mia tah min hihti siri qui, Papan, hih tah hen jai, heen jointiboyabi.

⁴⁷ Noquen Papa ta hea jihuemanicah qui. Jahan tah hen hihti jenimahi hih tah hen jai noquen Papa yohihi.

⁴⁸ Jahuen hina pishca res hen hihqui bi ta hehon shinanihqui. Hehon shinanaxon jan hahxonai copi ta jayaxihqui yohuancoinsca jayaxihcanihqui. Papan ta jaa hahxonishqui hih ta jayaxihcanihqui hea yohihi.

⁴⁹ Jahuen coshi shinaman ta hea hihti hahxonihqui. Jaa ta Papa Dios coin qui.

⁵⁰ Jan yohihi quescabijaquin non hahcaiboya ta noquehon jascabijaquin Papan shinani-hqui.

⁵¹ Jahuen mequen siripan hahxonquin ta jahuen coshi noque jismahiqui. Nincayosmabo ta jaan rabinmahiqui.

⁵² Hani quiquin hapobo namanaxon ta jaton yohuanbo jato jenebahinmahiqui. Jahuab-orabojomabu rihbi ta mehehiqui, hihti meyayahpa quescapahbo sca jaábo.

⁵³ Pihan hihquibo rohahiriscanon jato piti siribo pimaxon bi ta hicha jahuequiyahpabo picatisihcanahabo jato camahiqui.

⁵⁴ Israeli baquebo hahxontijanixon ta jan yohini quescabijaquin noque yanapaniqui, noque jahuen jonibo quen.

⁵⁵ Abraham yohinxon ta noquen xohtabo rihbi sca hahxontijanixon jan yohini quescabijaquin hahxonscainqui, jascabi sca janon hihqui María.

⁵⁶ Elisabet janin cahen quimisha hoxnebo sca María jihueta. Janohax res sca jahuen xobon caribiscas.

Nashimanica caini

⁵⁷ Jan cahipi cahchiqui sca jahuen tsaben jahuen baquebihresscaquin, bebo baque pishca. Bichish, hihti jenimahi.

⁵⁸ Hahbe jihuetaibo betan jahuen jenabo rihbi jenimacani. Hahan shinanxon ta noquen Hihbaan hihti hahxonihqui, hihcani.

⁵⁹ Huesti semana huinoscaax jaya jahuen mama, jahuen papa cahi, jahuen jane huishamahi. Janoxon honantijati janin caxon, hahan judiobaan honantijahahbo hihxon jaton baquexo jismaquin. Janohahbaan sca:

—¿Jahuen papan Jane ya janon non Zacarías huishatihin? —hahcanquin.

⁶⁰ —Hahyamaquin rahan. Jahuen Jane ta Juan qui —hihqui jahuen mama.

⁶¹ —Jaa Jane ya miin jenabo yamahihqui, tsoabi —hahscacanquin.

⁶² Jaatian sca jahuen papa cohantanquin yocacanquin:

—¿Mian min jahua Jane catsihquin?

⁶³ Jahuen papan sca huishaquin hahcajaquin tabla pishca yocaxon bihxon, hahqui huishaquin. Jahuen Jane ta Juan qui hahquin huishaquin. Rahte rahtescacani, jan huishahi Jane jisish.

⁶⁴ Jaatianbi jahuen jana choyocahinax Zacarías yohuanscái.

—Hahxon tah min hea jai, Papan —hihscai.

⁶⁵ Jan yohuanscái nincacax, jaton hahbe jihuetaibo rahte rahtescái. Jenquetsahax jahuen baquexo jaresscainqui hihquish janohahbo yohuan chanicanahiboya sca Judea mahchi janinbo jihuetaibo jaya res yohuan yohuancani.

⁶⁶ Chanihibo nincaxon shinancanquin: Hahan Papan shinanai baque tah qui, Jenquet-sahpa joni jaa jayaxihqui, hihxon shinan shinancanquin.

Zacarías yohuanni

⁶⁷ Dios Yoshiman hihbojaha jahuen papa yohuanai joi rihbi nincascacanquin. Jaa Zacarías yohuanni ta nesca qui:

⁶⁸ Hahxon tah min noque jai, Papan. Non tiromabohi copi noque casticanquin mahuamatihi bi tah min noquehon shinanxon hahqui paxacahuanti joni noque hinanscái.

⁶⁹⁻⁷⁰ Neateman miin joi yohinicateon janan min yohuanni quescabihí tah min rahma jai. Davidinin chini baque tah min noque hinanai, quiquin hapoxon noque jihuemahi jan jayaxahnnon tah min noque hinanai.

⁷¹ Noquen rahuibaan noque hihbojapanan ta jaan noque xahbanjamayaxihqui. Noque jistahihmahibio jatihibi ta jaan pantetihqui, noque jahuejayamascaábo.

⁷² Noquen xohtabohon shinanxon min jato hahxontijani quescabijaquin tah min noque hahxoncái, Papan. Min jato yohini quescabijaquin tah min noque hahxoncái.

⁷³⁻⁷⁴ Jaton rahuibo qui hen jato xahbanjamahah ta raquexonma sca miin chini baquebaan hea teexonyaxihqui qui hah tah min noquen xohta Abraham janiqui, Papan, noque yohiquin.

⁷⁵ Jaa yohicoinnixon tah min noque hahxoncoinscái, Papan. Sirijaquin shinanhahnán sca non janon. Tiroma shinajomabu non jihueta hahtipahscanon. Mahuanoxon caman non jascabi sca mia shinanhahnán jihuemon tah min noque hahxonai, Papan Papa Dios jaxon, jahuen baquexo rihbi sca Zacaríasnen yohiquin:

⁷⁶ Naihoh queha Papan joi yohinica ta mia hihtihi, baquexon. Noquen Hihbo beboxoni tah min niyahixihqui, janiboo yohiquin shinan hinanbonaquin. Noquen Hihbo nincati shinan jato hinanbonaquin.

⁷⁷ Jatohon shinanxon noquen Papan jaton hohcha sohuaxona jahuen baquebo sca ji-huenon tah min jato honanmabonayaxihqui.

⁷⁸ Noque jisí noque qui botopaquexon ta Xaba Hihbaan noque xabajayaxihqui qui.

⁷⁹ Bahquish chian jihuetaibo ta xabajaxonyaxihqui qui. Mahuati qui raqueti jihuetaibo ta xabajaxontihi qui, hahan jihuetaibo sca nichibó hihqui Zacarías.

⁸⁰ Jascapa cainnish cahen jahuen baque hanicahuani. Jahuen shinan caícanahi. Jahuen Hihbaan joi yohiti nete janon caman cahchiho res nichí jihuetaibo.

2

Jesus cainai

(Mt 1.18-25)

¹ Jaatian ta Cesaro Agostonen jahuen jonibo yohinishqui, jatihibi jonibaan jane huishapauehahbo.

² Jascajati jan yohimenoni tah qui, Siria main Cirino jaton tininti hihpahoni tian.

³ Cesaronen jascajaquin yonohah ta jaton jemabo janin jatihibi jonibo bocannishqui, jaton Jane huishahahbo.

⁴ Galilea mai janinhax José rihbi cahi, Nazaret jema janinhaxbi. Judea main cahax, jahuen xohta Davidinin jema janin nocoti cahi. Jaa jema ta Belen janeya qui. Davidinin chini bauehax copi ta jano canishqui.

⁵ Tohoyascai jahuen haibo hihyaxihqui ta María hahbetanbi canishqui. Jaan jaa bihyaxihqui copi jahuen Jane rihbi jahuen benenahyabi huishahbo.

⁶ Jano nocoxon Marian jahuen baque jan bihnoxihi qui honanscaquin.

⁷ Jano jai xobo bocho rahi jaiya jahuenrahnon hoxatimahiya ganado xobohoxon sca jahuen bihmenohi baquexo bihxon, chopan rahcoxon, vacan piti racanxonti janin racanquin.

Carnero coirannicahbo qui Papan yonotibo cainai

⁸ Jaatian rihbi ta jaa maibo janin carnero coirannicahbo janishqui. Jaton xobo hochó copi ta pastochianxon jaton carnerobo coiranshinacannishqui.

⁹ Yame coiranaiton jato qui Papan yonoti cainquihrani. Papan xaba rihbi jato janin xabarenenaiya rahte rahtecani.

¹⁰ —Raqueyamanahue. Joi siri mato yohihi tah hen jahui, jatihibichin nincacax jenimahabo.

¹¹ Nea netenbi ta Davidinin jema janinxon huesti haibaan jahuen baque bichishqui, mato jihuemanica coin noquen Hihbo Cristo.

¹² Hahan honanti sca tah hen mato yohihi: chopan rahcohah vacan piti racanxonti janin racataci tah man jaa meratihi. Jistannahue —hahquin Papan yonotinin.

¹³ Jaatian sca hahchonquihrani hicha Papan yonotibo sanareneni. Papa qui yohuani sircani.

¹⁴ Noquen naihoh queha Papa ta hihti coshi shinanya qui. Nai nequebihahbohon hihti shinanxon ta hahan sirijaquin shinanti shinan jato hinanihqui, hihcanni.

¹⁵ Papan yonotibo naihoh boresscaiboya sca carnero coirannicahbo yohinancani:

—Noquen Hihbaan noque honanmaha jisnon bonahue. Belen janin canon bonahue —hihcanni.

¹⁶ Bishquihihcanahax sca nocoxon Maríaya José meracanquin. Jisíbi bi vacan piti racanxonti janin baquexo racati.

¹⁷ Honanscaax janohax joquin sca Papan yonotinin noque yohihah tah non jistanai, hihxon sca jatihibi jonibo yohibenacanquin.

¹⁸ Yohihahbo jatihibi rahtecani. Coirannicahbo yohuanai joi jahua hihcatsihqui qui hihcanni, rahtetax.

¹⁹ Rahtetaibaan bi Maríaya rahteyamahi. Jaan cahen jahuen jointinin shinanresquin, chanihibo joibo shinanquin.

²⁰ Jaatian sca coirannicahbo jaton pasto janin nocorihbicani. Noquen Hihbo ta coshi shinanya qui hihcanni.

—Min noque yohihipi jatihibi tah non jistanahqui, Papan. Min noque yohihipi quescabi tah qui. Hahxon tah min noque jai —hihcanni.

Jesus baquexo jismahibo

²¹ Jan cainipi huesti semanan sca honantijamaxon Jesus janecanquin. Jahuen maman xahquinho jahuabi nanéyamaparihiya, Jaa tah man Jesus janeyaxihqui, Papan yonotinin jato jaho quescabijaquin janescacanquin, Jesus janeya janon.

²² Man baquexo janeho huesti hoxne senenndon caman tah man Papan xobo qui samatihi hahquin ta Moisesnin huishanishqui. Jaa copi jascajacanquin. Jahuen hoxne senenscaya Papa hinani sca baquexoya bocani, Jerusalen janin.

²³ Papan joi janin ta jascajati huisha jaiqui: Jahuen maman bihmenoho bebo baque jatihibi yohihi tah man Papanah ta qui hih man jatihibi, Papa hinani.

²⁴ Huetsa rihbi ta jaiqui, Papan huishamani: Haibaan baquexo bichipi copi rabe nobex hinanyamaxon rabe coma pishca mohitahpa noquen Papa Dios hinanxon rehtexonquin, hihqui jaa huisha.

²⁵ Jascajati joi copi Jerusalen janin bocani. Jaatian rihbi ta Jerusalen janin Simon janeya joni janishqui. Pontejaquin shinanai joni. Noquen Papahon shinanai joni. Noque jahuen jonibohon shinanxon noque jihuemanica Papan raantahi honancoinax manatai joni. Jaa hihbojaxon ta Dios Yoshiman honanmanishqui.

²⁶ Papan raanai joni jisishma mahuati tah min jatimahi, hahquin Dios Yoshiman.

²⁷ Papan xoboho sca Dios Yoshiman hihuehah Simon nocoti. Jaatianbi jano Papan huishamani joi jai quescabijahi Jesusen papa betan jahuen mama rihbi jahui, Jesus hihuehi.

²⁸ Jaya mapetaiton sca jaton baquexo bichinxon Simoman hicotanquin. Chihtoxon noquen Papa yohiquin.

²⁹ Hihti sirijaquin sca tah hen shinanai, Hihbon. Hea yohinihxon tah min jaabijahi. Mihqui careesscanoxahnpan.

³⁰ Min raanai noque jihuemanica tah henjisresscay, Papan.

³¹ Jatihixonbi jisibo hihxon tah min raanscay.

³² Mia honanyamapahonihxon bi ta nea baque copi noquen nahuabaan rihbi mia honancatihiqui. Noquen caibo rihbi ta miin joniboxon nea jisish hihti siribohi yohuanyaxihcanihqui, Papan hihqui Simon.

³³ Jaton baquexo yohihi Simon jascaraiya jahuen papa betan jahuen mama rahteti. Rahtetaiboya:

³⁴ —Noquen Papan ta matohon shinanihqui —hihxon, baquexon mama bejisahnna sca, jahuen baquexo yohihi yohuani—Jise. Nea copi ta hicha noquen caibo jascabi behnoti sca jaticaniqui. Hicha rihbi ta nea copi jascabi sca jihuethiqui. Hahqui ta caibo rihbi tiromahi yohuanyaxihqui. Noquen Papa hahan honantahi bi tiromabohi yohuani.

³⁵ Jonibo jenquetsapha shinanyahpabohin non honannon ta neatohon noque yohiyaxi-hiqui. Mian rihbi tan min jointi machexehxon masa shinanyaxihqui —hihqui Simon.

³⁶ Jano rihbi ta huesti haibo janishqui, Ana janeya. Fanuelnina baque, Aserin chini baque. Papan shinanmahah yohuannica haibo. Xontacohax jahuen bene betan siete bari jihueneish bi jahuen bene mahuataiya yononma sca banenish yoxaboscai.

³⁷ Ochenta y cuatro bari jai bi sea yoxabohax bi Papan xoboho nihxon bariyahpan, yame rihbi piti tenehannah Papa yocauquin.

³⁸ Simon betan nichibo merahax:

—Hahxon tah min noque jai, Papan. Jaa jisish tah hen hihti jenimahi —hihqui haibo. Jerusalen janin jihuetaibo sca yohihi cahi. Papan jihuemanica jopahinon hihquish manataibo jatihibi sca ta yohinishqui, Jaa ta jaresscawai, hahquin.

Nazaret janin boribihibo

³⁹ Jaatian sca Papan yohinib quescabijauin queyohax Galilea main sca cahi Jesusen mama betan jahuen papa caribibi. Cahipish Nazaret jema janin jaton xobon nocorihbicacani.

⁴⁰ Jano jihueneish sca jaton baque haniscaax coshisca. Hihti honan. Hahan Papan hihti shinanai joni.

Papan xoboho Jesus nocotai

⁴¹ Jatihibi bari tian ta Jerusalen janin jahuen mama betan jahuen papa capahonishqui. Pascua fiesta tian jano fiesta huinoti bocani.

⁴² Doce bari Jesus jaiya sca jaabo hihpahoni quescari fiesta huinoti jano bocani. Jaa rihbi jato betan cahi.

⁴³ Fiesta queyoscai sca jaton xoboho jonoxon beribicani. Jema janin jaton baque banetai bi honanaxma jahuen papabo joribicani.

⁴⁴ Jahuen chahibo betan jaa rihbi jahui shinanax nihbahinahi becani. Bepi sca jaton baque yamajaxon jato betan jahuibo janin sca benacanquin. Jaton jenabo yocacah bi yamahi.

⁴⁵ Benacasquimahax sca Jerusalen janin benahi boribicani, rabebi.

⁴⁶ Jano quimisha neten benacasquimacanquin. Benabonaxon sca Papan xoboho haxemanicahbo betan jaa tsahotai meracanquin. Haxemanicahbo yohuanai nincanoxon, jano jaa tsahotai merascacanquin. Hashoan honancatsihquin jato yocaribiquin. Jato betan yohinani tsahotai.

⁴⁷ Jan honanxon yohuanquihna haxemanicahbo rahteti. Nincaqui jano tsahotaibo rihbi rahteti.

⁴⁸ Papan xobo janin jahuen haxemanicahbo yohuanquihnaiton merahax jaabo rabe rihbi rahte rahteti.

—¿Jenquetsahpahn min noque betan cayamahipiquin, baquen? ¿Min honanyamahin? Masa shinanhahnah nan tah non mia benacasquimahipiqui —hahquin jahuen maman.

⁴⁹ —¿Jahua copi man hea benarahsihin, maman? ¿Heen Papan teebo jisti hea jai man honanyamahin? —jato jaquin.

⁵⁰ Jascajaha bi jan yohihi jahua hihcatsihquiquin honanyamacanquin.

⁵¹ Jaatian sca Nazaret janin jato betan caresscái. Nococani. Jano jihuescacani. Jahuen papan, jahuen maman yohihi quescabijaquin hahquin. Hicha bari huinoscái bi hen huishaxon mia yohihi jatihibi jahuen maman shinanpariquin.

⁵² Jano jihuetax ta Jesus hanishqui. Jahuen shinan rihbi caicanahi. Jano jaibaan jisí ta siri joni jaa janishqui. Papan jisí siririhbihi.

3

Nihi naman mehax Juan yohuanai

(Mt 3.1-12; Mr 1.1-8; Jn 1.19-28)

¹ Jasca sca janibaan ta huetsa quiquin hapo jaresscanishqui, Tiberio janeya. Quince bari sca jaa jaton hapo jaiya cahen jonibo jixxonnicah rihbi jai, jahuen gobernadorbo. Judea main jahuen gobernador ta Poncio Pilato janeya janishqui. Jaatian rihbi ta Galilea main Herodes haponishqui. Herodesnin huetsa Felipe ta Iturea main sca haponishqui. Traconite janinbo rihbi jahuen mai, jaa hihboti. Janohax ta Abilinia janinbo Lisaniasnen hihboti janishqui.

² Anas betan Caifas rihbi ta judiobaan quiquin yohuan hihbobo janishqui. Jaabo rahsi hapobo jaiya sca ta jano tsoa jihuacamahin janin jihuexon noquen Papa yohuanai Juaman nincanishqui. Jaa Juan cahen Zacariasnen baque. Papa yohuanai nincacax jaa joi yohihi sca nichí.

³ Jordan huean janinbo sca nihnnichi. Quetanhahnibahinxon quetanpaquebahinribiquin. Yohibonahi nichí.

—Noquen Papan maton hohcha sohuanon shinan siri scabihnahue. Shinan behnayahpa man jaiya hen mato nashimanon benahue —Juaman jaquin yohibonaquin.

⁴ Isaíasnen rihbi ta Papan joi yohinicaxon jaa yohihi neateman huishanishqui. Jano tsoa jihuacamahin janin tah hen quenahi: Noquen Hihbo hahan jonon bahixonnahue. Pontequin bahixonquin.

⁵ Mai xanquen jatihibi tah man bochojabonatih. Mahchi jatihibi rihbi tah man mapaque mispanjabahintihi. Mayabo rihbi tah man pontetih. Xanquen xanquenaibo rihbi sirijabonaquin.

⁶ Jaatian ta Papan raanah jihuemanica joresscái jatihibi janibaan jisyaxihqui qui hah ta Isaíasnen janishqui huishaquin.

⁷ Isaíasnen jascajani copi ta nashimamahi behibo Juaman yohinishqui:

—Papan ta mato casticantihiqui. ¿Tsoan mato Papan mato castanmis yohihih man neno jabaquihran jahuin, rono papayahpabon?

⁸ Maton shinan pontejacoinax siri shinanya sca jihuenuahue hih ca hen jai sen, maton shinan honanahbo. Noquen Papa ta Abraham qui hihyamaribbinahue. Nea macanbo ta Papan joni jatihiha tipahi qui, Abrahanen baquebo sca janon, hahan Papa jenimahibo sca janon.

⁹ Jihui reranoxon hahcajaquin ta jahuen yami bihxon Papan tarescainqui. Siri bimijomabo tarexon cohaquin hahcajaquin ta tiroma shinanyahpabo Papan casticanscainqui. Shinannahue —jato jaquin.

¹⁰ Jascalah yocascacanquin.

—¿Hicon nan? ¿Jahueja sca non jatihi?

¹¹ Yocacahbo sca jato yohiquin:

—Rabe cotonyahpaxon cotonjoma joni huesti hinannahue. Pitiyahpaxon, jascajaquin rihbi pitijoma joni hinannahue jan pinon —jato jaquin.

¹² Jaatian sca coriqui cobranaibo rihbi becani. Jaan jato hihquimatanquin nashimanon hihquish becani. Nocoxon sca yocacanquin:

—¿Noquen non jahuejatihin? —hahcanquin.

¹³—Hapon mato yohihi tihi res cobrannahue. Man mahuinmamis —jato jaquin.

¹⁴ Sontarobaan rihbi sca yocaquin.

—Noque rihbi sca yohihue. Sontaroxon non jenquetsahatihin —hahcanquin. —Man tah man tsoabi tahttjaxon jahuabi bichintimahi. Quesaxon bichintimarihbibi. Maton hapobaan mato copijahi res bihxon jaa res bihti shinannahue —jato jaquin.

¹⁵ Juaman jascjahiji manahiji quenichibo shinamehti:

—Jaa tsri ta Papan caisai joni quin —hihcani, Juan yohihi jaton jointinin shinamehti.

¹⁶ Jascaraiboya:

—Hean hen mato jenen nashimahi bi ta hea mentan hashoan coshi joni jahuiqui. Ni jahuen sapato risbi pecaxonti tah hen senenyamahi jaa hihti siri copi. Jaan ta jahuen yoshin siri mato hinantihiqui chihu rihbi mato maracanquin.

¹⁷ Chishpo nihuen potanon hihxon bero romishin potaquin hahcajaquin ta Papan xecoscaiqui. Bero rahsi tsamatia tsinquixon sca jahuen bexojati janin niaxon bi ta nocayosma chihin chishpo mapojayaxihqui —jato jaquin.

¹⁸ Jascapahbo joibo ta jato hicha yohinshqui, nincacoinahbo. Joi siri jato nincamaquin.

¹⁹ Siri joibo jan yohihi que bi ta quiquin hapoxon Herodesnin bihmaxon sipo xoboho Juan tsahonnishqui. Jascatimahi bi tah min miin huetsan haibo betanbi hihqui, Juaman jaho copi Herodesnin jaa sipo xoboho tsahonquin. Jatihibi jan tiromajaquin hahni Juaman yohiho copi rihbi sipo xoboho tsahonquin.

²⁰ Hihti tiromaxon bi ta hashoan sca tiromajaquin Herodesnin Juan bijnishqui.

Juaman Jesus nashimahi

(Mt 3.13-17; Mr 1.9-11)

²¹ Jaabi, sipo xoboho Herodesnin jaa tsahonyaxahnon ta Juaman jato nashimapahanishqui, jato nashimanon hihquish hahqui nocotaibo. Jascapahbo nashimaxon ta Jesus rihbi nashimanishqui. Nashimaha ta noquen Papa yocanishqui. Yocacahn, nai quehpemehtai jisquin.

²² Jaton jisnonbi sca naihoh quehax nobex quescapah botopaqetui jahui jisquin. Naihoh quehax yohuanairihbi nincacanquin. —Mia tah min jahan hen queenai heen baque qui. Mihon tah hen hihti jenimahi —hihqui.

Jesucriston xohtabo

(Mt 1.1-17)

²³ Jaa pecaho ta joi siri yohibonahi sca Jesus nihnishqui, treinta bari jaax. Jonibaan jisí cahen jaa Josepan baque. Jahuen chahita cahen Helí.

²⁴ Helí sca cahen Mataten baque. Matat cahen Levin baque. Leví cahen Melquin baque. Melqui cahen Janan baque. Jana cahen Josepan baque.

²⁵ José cahen Matatiasnen baque. Matatias cahen Amosen baque. Amos cahen Nahuman baque. Nahum cahen Eslin baque. Esli cahen Nagainin baque.

²⁶ Nagaí cahen Maaten baque. Maat cahen Matatiasnen baque. Matatias cahen Semeinin baque. Semei cahen Josepan baque. José cahen Judapan baque.

²⁷ Judá cahen Joananen baque. Joana cahen Resan baque. Resa cahen Zorobabeln baque. Zorobabel cahen Salatielnin baque. Salatiel cahen Nerin baque.

²⁸ Neri cahen Melquin baque. Melqui cahen Adin baque. Adi cahen Cosamam baque. Cosam cahen Elmodamen baque. Elmodam cahen Erin baque.

²⁹ Er cahen Josuepan baque. Josué cahen Eliezernin baque. Eliezer cahen Joriman baque. Jorim cahen Matatinin baque. Matat cahen Levin baque.

³⁰ Leví cahen Simeonien baque. Simeon cahen Judapan baque. Judá cahen Josepan baque. José cahen Jonaman baque. Jonan cahen Eliaquim baque.

³¹ Eliaquim cahen Meleanen baque. Melea cahen Mainanen baque. Mainan cahen Matatajen baque. Matata cahen Nataman baque. Natan cahen Davidinin baque.

³² David cahen Isaipan baque. Isaí cahen Obedin baque. Obed cahen Boozen baque. Booz cahen Salmonen baque. Salmon cahen Naasonen baque.

³³ Naason cahen Aminadab baque. Aminadab cahen Adminen baque. Admin cahen Arni baque. Arni cahen Esroman baque. Esrom cahen Faresen baque. Fares cahen Judapan baque.

³⁴ Judá cahen Jacobon baque. Jacobo cahen Isaaquen baque. Isaaque cahen Abrahanen baque. Abraham cahen Tarepan baque. Taré cahen Nacoren baque.

³⁵ Nacor cahen Seruquen baque. Seruque cahen Ragaunen baque. Ragau cahen Peleg baque. Peleg cahen Eberin baque. Eber cahen Salan baque.

³⁶ Sala cahen Cainanen baque. Cainan cahen Arfaxad baque. Arfaxad cahen Seemin baque. Seem cahen Noeman baque. Noem cahen Lamequen baque.

³⁷ Lamec cahen Matusalenen baque. Matusalé cahen Enoquen baque. Enoc cahen Jaretan baque. Jaret cahen Mahalalelnin baque. Mahalalel cahen Cainanen baque.

³⁸ Cainan cahen Enosen baque. Enos cahen Setin baque. Set cahen Adaman baque. Adam cahen Papa Diosen baque.

4

*Tiroma yoshiman Jesus tanahi
(Mt 4.1-11; Mr 1.12-13)*

¹ Dios Yoshiman shinanyahpahax sca Jordan huean janinhax Jesus cahi. Cahí, Dios Yoshiman jano cahue hahca, jano tsoa jaitonma sca cahi.

² Cuarenta neten jano nihnxion bi ta jahuabi piyamanishqui. Tiroma yoshiman sca ta hohchamacatsihquin tana tamanishqui. Jahuuen cuarenta neten sca hihti picatsih sca jaiya sca Satanasnen tanaribiquin.

³ —Papa Diosen baquexon, toa macan yohihue, piticahinscanon —hahquin.

⁴ Jascajaha:

—Piti res jaax jihuetaima tah man jai hah ta Papan janishqui huishamaquin —hahquin Jesusen.

⁵ Jaatian sca queya maniquihnxon bochiquixon sca jatihibi mai janin jai jemabo Satanasnen jismarenenquin.

⁶ —Hoa jatihibi ta Papan hea hinannishqui. Queenxon tah hen mia hinantihi, mian sca jato hihbojanon. Jaton jahuabora jatihibi mina sca hihnon.

⁷ Hea bebon min miin raboxonen nichish betihihpaquexon yocacah tah hen mia hinantihi —hahquin Satanasnen.

⁸ Jascajaha:

—Miin Papa Dios huesti tah min yocatihi, jaa huesti qui tah min betihihpaquetihi hih ta Papa jaiqui jahuen huisha joi janin —hahquin Jesusen sca.

⁹ Jaatian Jerusalen janin sca Satanasnen hioquin. Jano sca Papan xobo pemacanya Jesus penimaxon:

—Papa Diosen baque hihquish nenohax cayahue.

¹⁰ Jahuuen yonotibo ta Papan yohitihiqui, mia coiranabo hih ta jaiqui Papan huishani janin. Cayahue.

¹¹ Jahuuen mequeman ta mia bihtihiqui, macan qui min joxcorohyamanon hih ta jaribinishqui jahuen quirica janin —hahquin Satanasnen.

¹² Jascajaha bi:

—Hea cahra hahxoncointihiquin, tanapan hihxon, Miin Hihbo Dios tanayamahue hah ta Papan janishqui —hahscacuin Jesusen.

¹³ Satanasnen hohchamacatsihquin bi jenquetsahaxon bi hohchamatimahiya sca Jesus jenebahini caresscái, joribiyaxahpan hihquish.

*Galilea mainxon Jesusen yohimenohi
(Mt 4.12-17; Mr 1.14-15)*

¹⁴ Jaatian Jesus rihbi joresscái. Dios Yoshiman coshi hinanah, Galilea main sca cahi jahui. Nocotaiya, Papan coshiyahpa ta jaa qui hihqui jano jihuetaibo sca yohan chanicanahi bocani jatihibi janin.

¹⁵ Jaton tsinquitit xoboho mapexon ta jato haxemapahonishqui. Jan yohihi nincacax, nea ta Papan raanai joni qui hihscacani.

*Nazaret jema janin Jesus nocotai
(Mt 13.53-58; Mr 6.1-6)*

¹⁶ Jaa pecaho Nazaret jema janin sca Jesus nocoti cahi, janohax jan hanini janin sca nocoti. Jan japhahoni quesca sca tantiti neten jaton tsinquitit xobø janin jato betan tsinquitit cahi.

¹⁷ Tsinquitaibaan sca noque nincamarohahue hahxon Isaíasnen huishani quirica hinancanquin. Jato nincamanoxon sca nihxon quirica quehpexon jano nea joi jai benaxon jato nincamaquin.

¹⁸ Dios yoshiman ta hea hihquihiniqui. Jahuajomabo joi siri hen yohinon ta hea caisnischqui. Caisnixon ta hea raannishqui, hinábo hen piconon hináboma sca jaábo. Benchebo rihbi hen yohinon ta hea raannishqui hahquirihbi jisti hahtipahabo. Tiroma hihboyahpabon hen piconon ta hea raanishqui, hinábomascanon.

¹⁹ Papan jisí ta rahma jahuen joi siri nincamaha hihti siri qui hahquin jato nincamaquin.

²⁰ Jascajaquin nincamaxon jahuen quirica xehpoxon quirica coiranxonnicá hinanrihbihax tsahopaque sca jai. Tsahotaiya jaa bejisi manacani.

²¹Jaatian sca:

—Nea hen mato nincamaha joi ta rahma maton nincanonbi jascacoinscaini, Papan yohini quesa sca —jato jaquin.

²²Jan yohihah nincquin sirijahax rahte rahtescacani. Papan noque hahxoncoinai joi ta noque nincamahaxqui hihquish rahte rahtecani. Jaatian sca shinanax:

—Nea Josepan baquema quin —hihsacacani.

²³Jascari yohuananaiboya:

—Hea rah tah man jatihixonbi hea nescajaquin yohiyaxihqui. Rahomehhue, rahonnican hah ra tah man hea jayaxihqui. Capernaum jema janinxon roqui miin coshiyaxon min jato jenquetsaja ra jaxonipi. Neno miin mainxon sca noque jascajaxonhue hah tah man hea jaribitihi —jato jaquin.

²⁴Jato jascajaxon jato hihti yohiscaquin:

—Jaabi tah hen mato yohicoaini. Jahuen main cahiton ta Papan joi yohinica jahuen caibaan sirijaquin bihtimahiqui.

²⁵Hihcoinja tah hen mato jai. Elías yamanica jihuene tian ta basi hoi paqueyamanishqui, quimisha bari seis hoxnerihbi hoi yamanon. Jatihibi janin ta hihti pihaxmahnhan sca hihcannishqui.

²⁶Hicha maton caibo yononmabo jaatian rihbi janí que bi ta jato qui Papan Elías raanyamanishqui. Jato qui ma bi ta Sarepta jema janin Papan raannishqui, huesti sidono yonoma haibo qui caxon piti cajaxonnon.

²⁷Jascajaquin rihbi ta Eliseo jihuennitan sca hicha maton caibo sipiyahpabo janí que bi jatoma bi Siria mai janinha huesti res Papan rohajanishqui —jato jaquin.

²⁸Jaton nahua Papan hahxonai ninccacax sinacahincani, tsinquitxi xoboho jaibo rahsibi sina sinati.

²⁹Bihtanxon sca jemama qui Jesus bocanquin. Jano jai hani xanquen janin boxon rehtenoxon naman potacatsihquibo.

³⁰Rehtecatsihquiaan bi jato nabebacahini cahax Jesus caresscrai.

Yoshiman hihbojahijoni

(Mr 1.21-28)

³¹Capernaum jema janin sca cahi, Galilea mai janin. Nocotipixon jaton tantiti neten jato haxemaquin.

³²Jan yohihah ninccacax ta rahtecanishqui, shinan hihboxon jaan jato honanmaha copi.

³³Jaton tsinquitxi xoboho rihbi ta tiroma yoshinyahpa joni mapenishqui. Jesus yohuanai ninccacax coshin sai saihihscrai.

³⁴—¡Hahrai! ¿Noque jahuejahi min jahuin, Jesus Nazarenon? ¿Noque queyohi min joresscain? Mia tah non honanai. Mia tah min Diosen baque qui —hahquin yoshinyahpaton.

³⁵Jascayah bi:

—Jascaraxma netetax jaa jenebahini catanhue —hahquin Jesusen. Catanhue hahca yoshiman jaa joni tapon hueranbohanquin, jato tocan racanon. Jahuabi tiromajaxonma sca jaa joni jenebahinquin.

³⁶Jaa jisish raqueya sca hihcani jaa xoboho jaibo rahsi. Raquetax yohinanancani.

—¡Enquetsahpa coshi shinanya jaa jaquin! ¡Jistan! Jahuen coshiyaxon ta catanhue hahquiqui. Jaan yohihah ta tiroma yoshinbo boresscailqui —hihcanni.

³⁷Jaa copi ta jaya joihi hicha bocannishqui, janobo jaibo chanicatsihqui xobo tihibi mapecanahi.

Pedronen haita Jesusen rohajahi

(Mt 8.14-15; Mr 1.29-31)

³⁸Jaton tsinquitxi xobo janinhax sca Simoman xobon Jesus cahi. Nocotaiya bi Simoman haita yona yonati racati. Jaa copi, Rohajaxonhue, hahcanquin, nocoscaiton.

³⁹Hihcohax jaa racatai patax nihirenenxon sca jahuen hisin Jesusen yonoquin jenebahinhue, hahquin. Yonohah, yonayamascahini. Rohascaax huennitax jato pitijaxoni mehcascai.

Hicha hisinaibo Jesusen rohajahi

(Mt 8.16-17; Mr 1.32-34)

⁴⁰Bari hihquiscaya sca jaton hisinyahpabo hihuecanquin. Hihuehivo mehexon sca jato rohajapaequin.

⁴¹Hicha tiroma yoshinbo rihbi ta jaan camanishqui. Jenebahini catanhue jan jaah sai saihihcani. Mia tah min Diosen baque qui hihcahini boresscacani. Jaabo hashoan coshin yohuanapanan ta jato netemanishqui. Jaa Cristo hihqui honanax yohuanaboo copi jato netemaquin.

*Galilea main sca Jesus cahi yohihi
(Mr 1.35-39)*

⁴²Xaba paque sca jaiya sca jano tsoa jaitonma sca Jesus cahi. Tsamajaquetaibo caxon jaa benabonaxon merahax hahqui nocohihnat.

—Noque jenebahini cayamascahue, hihbon. Noque qui banejaquerohahue — hahcanquin.

⁴³Noque qui banejaquerohahue hahcabio bi:

—Huetsa jemabo janin rihbi tah hen Papan joi yohibonahi cati jai, Papan jihuematici joi honanahbo. Jaa copi tah hen jahui —jato jaquin.

⁴⁴Jaa pecaho sca judiobaan tsinquiti xoboboho mapecanaxon Papan joi siri jato yohibonaquin.

5

*Jahuen coshiyaxon jan yapabihmahi
(Mt 4.18-22; Mr 1.16-20)*

¹Jaatian sca Genesaret hian quexa sca cahaz, nihxon jano jaibo honanmaquin. Ninca-catsihquish sca tsama jonibo hahqui tsinquijaqueti.

²Nincacatsihquibo tsehquesihquin hueranbonaha jisí bi nonti rabe quexa racatai. Nonti racatai bi yapa rahconicabo yamahi, yapa rahcotani jahuex jaton tarrafa pahtsaqui mapescabio. Huetsa nonti ta Simomana janishqui, huetsa nonti cahen jahuen companihirobaana.

³Simoman nontin nanéxon sca:

—Napon hori noque hueranbohanhue —hahquin Simon yohiquin. Jaatian sca nontin tsahoxon sca quexa nichibo haxemaquin.

⁴Yohuanquin janquerjaxon sca Simon yohiquin.

—Nemin janin sca noque hioxon maton tarrafa potanahue, yapa bihnoxon —hahquin.

⁵Pota potashinaxon bi tah non jahuabi bihyamahaqui, maestron. Jaabi, mian yohihah tah hen potahi —hahquin Simoman.

⁶Potaxon sca hicha yapa rahcoquin. Yapa hashoan hichahiya jaton tarrafa huaxacatsih-scai.

⁷Mapo behue behuehahxon sca jaton companiandrobo quenacanquin, huetsa nontin joxon jato yanapanabo. Joxon rabebi jaton nonti bochojabahincanquin hihquicatsih-scanon caman.

⁸Yotihu ra jisish raquescaax Jesus bebonxon raboxonen tisquihapaequexon:

—Hea jenebahinhue, Hihbon. Hea tah hen hohchayahpa joni qui —hahquin, Simon Pedronen.

⁹Huestijaquin potaxon bi yotihu ra yapa bichish Pedro raquescái, hahbe yapa bihnicalbo rihbi.

¹⁰Zebedeon baque rabe rihbi ta jascarihbibi raquenishqui, Jacobo betan Juan, Simoman companiandrobo rabe. Raquescaiboya:

—Raquyeamahue, Simoman. Rahma tah min joni bihnical sca jatihi —hahquin Jesusen.

¹¹Taxnaxon sca cahen jaton nontibo jatihibi jenebahini sca Jesus manahi sca bocanni.

*Sipiyahpa Jesusen rohajahi
(Mt 8.1-4; Mr 1.40-45)*

¹²Jaa pecaho sca ta janobo jai jemabo qui nocoti canishqui. Huesti jema qui nocoxon sca sipiyahpa joni behchiquin. Sipiyahpaton sca Jesus merahax tarakahpaquexon Jesus hihti yocaquin.

—Jeen hihxon res tah min hea rohajatihi, Hihbon. Mian tah min hahtipahi —hahquin.

¹³Jascajaha, mehexon sca:

—Queen ta jai. Rohascahue —hahquin. Jaatianbi jahuen bichi siricahinscái, behna sca.

¹⁴—Hen mia rohajaha tsoabi yohiyamaxahtahi min. Min yohimis. Tsoabi yohixonma, sacerdote jismatanhue, Moisesnin yohini quescabijaquin hinanti pishcaya catanhue, rohascaxon hinanti pishca. Jascajahaquin tah min jato nincamatihí, jonibo tocan hahquirihbi jihuetai hahtipahnoxon —hahscáquin Jesusen.

¹⁵Yohiyamahue hahca bi hashoan sca jonibo yohibonaquin, Jaan ta hea rohajahaxqui hahquin. Jaa copi hihti caibo sca becandi. Jesus yohuanai nincanoxon rahomehti becandi.

¹⁶Jan cahá cahchiqui nocotahbo jaa huesti Jesus cahi. Jano tsoa jaitonma cahax basihi, Papa yocaqui basli.

*Yora honanyamajaquetai Jesusen rohajahi
(Mt 9.1-8; Mr 2.1-12)*

¹⁷ Huetsa neten sca ta jato haxemaribinishqui. Jato yohihi bi ta fariseoboya jaton haxemanicahbo nocohihnatxa nincacuia tsahopaquecannishqui. Galilea mai mehax jahuibo, Judea mai mehax jahuibo rihbi, Jerusalen jema janinhax jahuibo rihbi nincacuia tsahocani. Papan coshiyaxon jan rohajahi sca jiscanquin.

¹⁸ Tsinquiqaetaiboya sca jahuen yora honanyamajaquetai joni becanquin. Jahuen cacaquiyaxonbi hihuexon Jesus bebonbi janacatsihquaan bi joni hichahiya jenquetsahax hihcotimahi.

¹⁹ Jenquetsahaxonbi mapematimahiya sca jayabi xobo pamacanya hinaxon xehuabo xecabohanxon jahuen cacajatinin sca rontanpaquebohanxon Jesus bebonbi sca racanpauecanquin.

²⁰ Jan jato rohajaxontihi shinancoinaibohi jisxon, racatai joni Jesusen yohiquin:

—Miin hohcha tah hen mia sohuaxonai, hiconin.

²¹ Jaatian jano tsahotai fariseoboya jaton haxemanicahbo jaabo rahsibi yohinancani.

—Jahua hihqui shinanax Diosihcamahi yohuaniquin? Papa Dios huestichin ta hohcha sohuati hahtipahiqui. ¿Neatohon rihbi hahtipahiquin? —hihcani.

²² Jaya baxexaibo honanxon Jesusen jato yocaquin:

—Jahua yohuan man maton jointinin Jain?

²³ ¿Jahuemeha hashoan teema yohitihquin? ¿Miin hohcha tah hen sohuaxonai hihqui nan? ¿Huenihhnatax nihquetanhue hihqui nan?

²⁴ Jaabi, noquebaque hihxon hen mainxonbi hohcha sohuaxonti hahtipahi honannoxon jisnahue —hahxon sca yora honanyamajaquetai yohirihbiquin:

—Mia tah hen yohihi. Huenihhnaxon miin cacajati bilihbahini caresscatanhue, miin xobon —hahquin.

²⁵ Yohihah sca jaton jisnonbi huenicahuanxon jahuen cacajati bichish jaya cahi caresscrai. Jahuen xobon cahi.

—Papa Diosen ta hea rohajahaxqui —hihcanahi cahi.

²⁶ Nincacax rahte rahtecani.

—Papan ta hahxoncoiniqui —hihcani. Caibo rihbi hihti raquetax:

—Tsoan jisnima tah non rahma jisiqui —hihcani.

Jesusen Leví quenahi

(Mt 9.9-13; Mr 2.13-17)

²⁷ Japecaho sca caxon, tininti cobranxonai joni Jesusen meraquin, Leví janeya. Jahuen janoxon cobranti misa janin tsahotaiton meraquin. Meraxon:

—Hehbe cahi johue —hahquin.

²⁸ Jascajaha huenixon jatihubi potabahini cahi, Jesus manahi sca.

²⁹ Jaatian sca jahuen xobo janin sca hani fiesta hahqui jonon Levin Jesus quenamaquin. Jaan quenamaha hahbe cobrannicabohi rihbi hicha jano jai, jaton hahberabetibohi rihbi.

³⁰ Jaabo rahsi jaa manahi tsahotaiya sca fariseobo betan jaton haxemanicahbo rererenxon, Jesusen haxematibohi cahecanquin.

—Jahua copi man cobranmisboya hohchayahpabo betan man pihi tsahotain? ¿Jahua copi man jascapa betan xehahin? —hahcanquin.

³¹ Jesusen sca jato joi bichinquin.

—Hisinjomabo ta rahonnica pishinyamahihqui. Hisinjahpabo caya rahonnica pishinoh.

³² Pontebo quenahima bi ta pontemabo quenahi hea joniui, shinanquin pontejahabo —jato jaquin.

Non piti tenetihin yocacacintaibo

(Mt 9.14-17; Mr 2.18-22)

³³ Jaatian:

—Juaman haxenicabaan ta hicha piti tenehiqui. Hicha rihbi ta Papa yoca yocacaniqui. Fariseobaan haxematibaan ta jascajaribicaniqui. Minabaan ta jascajayamacaniqui. Minabaan ta pipi pipixon xeha xehacaniqui —hahcanquin.

³⁴ —Jaton huetsa huanomahi caxon ta huanomahanan piti tenetima jacaniqui.

³⁵ Huetsa tian ta jaton huanomati yamascatihqui, Papan jato bichinah. Jaatian pari ta benáxon piti teneyaxihcaniqui —hahxon, honanahbo hihxon sca jaa patax queha joi jato yohiquin.

³⁶ Nescajaquin jato yohiquin:

—Chopa payo honacatsihquin tah non hahan honanoxon hotsihahma chopa behna non teque huaxayamahi. Behna chopayaxon honanoxon non huaxahah ta behna chopa tiromascatihqui. Payo honahah bi ta behna hotsihax chopa payo betan senenyamaribiscatihqui.

³⁷ Noquen xehati behna rihbi tah non xenibichi borasa qui non bochojayamahi. Non bochojaha bi ta pahescaxon borasa pohtoshihmahax noquen xehati yohyocohitihiqui, noquen borasa rihbi tiromascanon.

³⁸ Xehati behna tah non hestenica borasa behnabo qui bochojati jai.

³⁹ Xehati pahe xehahax tah non bata queenyamaribhihi. Pahe ta nohuepihqui hihquish –hahquin Jesusen.

6

*Tantiti neten bero pibonahibo
(Mt 12.1-8; Mr 2.23-28)*

¹ Jaatian sca tantiti neten sca bahin cahax trigo huai nabebacahini cahi. Hahbetan caquin, jahuen haxenicabaan huestibo bero tesabonaxon, bishqui bishqui hahxon xo-caxon picanquin.

² Jascajahirton fariseobaan jato yocaquin:

–Jahua copi man jascajahirin, tantiti neten non piti tsinquitimahi bi? –hahcanquin.

³ Jesusen sca jato yohiquin:

–¿Papan joi jisquin man Davidinin hahní honanyamahin? Hahbetan cahibo picatsi-hquya jaa rihbi picatsihquish,

⁴ Papan xobo janin hihcoxon Papa jismanoxon pejanxonti paan hinanahbihxon, pixon, hahbe nichibo rihbi jan hinanni man honanyamahin? Jascapa ta tsoanbi pitimahiqui, Papa yohixonnica huestichin ta jaa piti hahtipahiqui –hahquin Jesusen.

⁵ Sirijaquin yohiquin sca jato yohirihbiquin:

–Hea ta hen noquebaque qui, tantiti nete hihbo –jato jaquin.

Meyosmahi

(Mt 12.9-14; Mr 3.1-6)

⁶ Huetsa tantiti neten rihbi sca jaton tsinquitit xoboho mapexon jato haxemaribiquin. Huesti meyosma joni rihbi jano tsahoti, mecayaho jahuen mequen yosmahi.

⁷ Tantiti neten ta rahonnicabaan tsoabi rahontimahihqui, tantiti netenbi jaa rohajati-hiquin hihxon ta jaton haxemanicahbo betan fariseobaan jisisnishqui. Hahan cahenoxon jisiscanquin.

⁸ Jahua yohuan jaabo rahsi jaiquin jahuen jointinin honanxon ta jaton nincanonbi meyosma joni sca yohinishqui:

–Huenihhnatax naponbi nihhue –hahquin. Jascajaha huenihhnatax jato tocanbi nihrenenscrai.

⁹ Reren rerenaibo sca Jesusen yocaquin:

–¿Tantiti neten non siribojaxontimahin? ¿Tantiti neten non tiromajatihin? ¿Joni huetsa non tantiti neten jihuematihin? ¿Non muahumatihin? Hea yohinahue –hahquin Jesusen.

¹⁰ Jato jispaquexon meyosma sca yohiquin:

–Miin mequen sanahinhue –hahquin. Yohihah mehanscaax rohacahinscrai.

¹¹ Roha sca jaa jai bi jano tsahotaibo sina sinati. Jesus qui yohuan yohuancacani, jahueja non jaa jatihin, hihqui.

Doce haxenicabo Jesusen caisai

(Mt 10.1-4; Mr 3.13-19)

¹² Jascaripish noquen Papa yohihi sca mahchi manichi Jesus cahi. Yametai bi janoxonbi Papa Dios yoca yocashinaquin.

¹³ Xabacoscaya cahen jahuen haxenicabo quenascaquin. Hahqui jahuiton doce res caisxon:

–Mato tah man heen raantibo qui –hahquin.

¹⁴ Jan caisni ta neabo qui: Simon, jahuen Jane huetsa cahen Pedro. Jahuen huetsa Andres rihbi, Jacoboya Juan jaabo rabe rihbi, Felipe, Bartolomé.

¹⁵ Mateo, Tomas, Santiago Alfeon baque, Simon Zelotes hahcaibo

¹⁶ Judas Santiagonen baque, Judas Iscariote, jaabo rahsi. Judas Iscariote cahen Jesus paranxon judiobo

Hicha jonibo Jesusen haxemahi

(Mt 4.23-25)

¹⁷ Jato betan botoquihrani jahuex sca mai mispani janin nihrenenai bi hicha haxehibo becani. Nincaqui becani, hihti caibo. Jaabo cahen Judea mai mehax behibo, Jerusalen janinhax behibo. Tiro jema janinhahbo, Sidon jema janinhahbo, quebijistima hian quexa jihuetaibo.

¹⁸ Jesus nincacatsihqui jahuibo, rahomehti jahuibo. Caibo rihbi tiroma yoshinbaan hihbojani bi becani. Jascapahbo rihbi ta Jesusen rohajanishqui.

¹⁹ Jesus mehehex jahuen coshin rohahibo rahsibo quen janu jaibo rahsichin jaa mehecatsihscacani.

*Hahanjenimatiboya hahan benatibo
(Mt 5.1-12)*

²⁰ Jato honanmaxon bejisquin sca jato yohiquin:

Jenimanahue jahuaborajomabon. Papan ta mato jihuematihqui. Mato cah man jahuen jihuetahbbo.

²¹ Jenimanahue pihan hihquibon. Man tah man yaniyaxihqui, rohahihrichi.

Jenimanahue huinihibon. Man tah man coin coini bitsayaxihqui.

²² Jonibaan mato jistahilmaha jenimanahue. Mato yohuanquihnyamascaxon bi mato roa roahahbo bi jenimanahue. Man hea nincacoinai copi maton janeya tiromahi yohua-naiboya jenimarihbinahue.

²³ Mato jascahibaan bi hihti coincoinnahue. Jaton xohtabaan ta Papan joi chaninicabo jascajribinishqui. Naihoh sca ta janoxon mato hinantibo Papan mato hicha bexojaxonihqui. Jaa copi jenimanahue.

²⁴ Jascapahbo hahan jenimati jaibo bi ta hicha coriquiyahpahax man ¡Hahrai! hihiyaxihqui. Maton jahuaboraya jenimati shinanaxon bi tah man jahuabi hashoan bihtimahi.

²⁵ Rahma yanitax bi tah man Hahrai hihiyaxihqui hihti pihamahhuan hihquish.

Rahma bitsatax bi tah man Hahrai hihiyaxihqui bena benatax huaohihquish.

²⁶ Jatihibi jonibo mato qui siripi yohuanaiya Hahrai hihnahue. Papan joi yohihihcamaahi quesahiboya ta maton papabo jato qui jascarihbibi siripi yohuanpahonishqui.

*Rahuibohon non shinantihi
(Mt 5.38-48; 7.12)*

²⁷ Mato tah hen yohihi, nincanahue. Maton rahuibohon shinannahue. Mato jistahilmahibaan bi jato sirijaquin hahxoncoinnahue.

²⁸ Mato roahibaan bi jato qui Papa yocaxonnahue. Mato tahtijahibaan bi jato yocaxon-nahue.

²⁹ Mia copasah bi copixonma ramiqui sca jismahue. Miin coton mia bichincatsihquiya jaa hinanax miin camiseta rihbi yohuashihyamahue.

³⁰ Mia yocacaibo jatihibi hinanhue. Mia bichinai bi bichinyamascahue.

³¹ Hea hahxoncanpahinon hih min jain, jato pari hahxonhue, min jato hahxonai quesacajaribiquin mia hahxonnon.

³² Matohon queenaibohon tah man copinani queenai. ¿Jaa copi man shinanyahpabo hihqui man shinanain? Nincayosmabo rihbi ta jascanica qui, jatohon queenaibohon queeni copinani.

³³ ¿Caibaan rihbi mato siribojaxonah, copinanquin sca jato siribojaxonquin bi man jaa copi hicha shinanyahpabo man jihuetai man shinanain? Nincayosmabaan rihbi ta jascajanica qui.

³⁴ ¿Jan mato hinanrihbitihi honanxon man joni huetsa coriqui hinantahbax man jaa copi shinanyahpa sca jain? Nincayosmabaan rihbi ta hahbe nincayosmabo hinantahbahiqui, jatihibi bihibribianoxon.

³⁵ Jaabo jascahi bi tah man maton rahuibohon man shinantihi. Jascapahbo siribojaxonnahue. Hinantahxon bihibribiti masa shinanyamanahue. Naihohxon sca ta Papan mato hinanrihbyaxihqui, hashoan hicha sca. Bihibribiti shinanaxonma hinantahbax tah man noquen naihoh queha Papan baquebo jihuethi. Jaan rihbi ta jahuen sinatahbohon shinanihqui, jahuen tiromabohon bi shinanquin.

³⁶ Yomanantaibohon shinannahue, maton naihoh queha Papan hahcái quescajaquin. Hohmis hohmisabohon bi maton naihoh queha Papan jatohon shinanquin hahcái quescajarihbinahue.

*Joni huetsa qui tiromahi yohuantima
(Mt 7.1-5)*

³⁷ Min hahcái quescajayaquin bi jaan hahcái quescajaquin joni huetsan jahuaborajahi jisish, Jahuejanoxon jascajahiquin, tioma joni tah qui'hihiyamanahue. Jaatian ta mato rihbi Papan jascajaya mayaxihqui. Caibaan mato tiromajanh bi jaa tiromani shinanyamanahue, maton Papan rihbi man tiromani shinanyamanon.

³⁸ Pishinaibo hinannahue, maton papan ta mato hinanrihbiyaxihqui qui. Yohuashihihx-onma ta tasa bochojaxon bishtaxpaquexon tsahonpaquexon shaconxon hahquirihbi matsanhin Nixon mato hinanrihbiyaxihcanihqui. Hinannoixon man toponai quescabijaquin ta maton Papan mato hinanrihbiyaxihqui qui –hahquin Jesusen.

³⁹ Jato jascajaxon jaa patax queha joi sca jato nincamaquin. Benchen ta hahbe benche bahi jismatimahqui. Jismacatsihqui bi ta mai xanquen qui rabebi paquetihqui.

⁴⁰ Haxenica ta jahuen haxemanicah mentan hashoan honan hiyamahqui. Sirijaquin haxemaha pari ta jahuen haxemanicah quesa sca jatihi qui.

⁴¹ ¿Jenquetsahaxon min miin bero janin jihuuhuan jaxon bi miin huetsan bero qui jai poto pishca min yohitihin?

⁴² Miin bero janin jihui jaxon jenquetsahaxon sca min miin huetsa yohitihin, Miin bero janin jai poto pishca hean tsecanon tenehue huetsan, hah min jatihi? ¡Quesan! Miin bero qui jai jihui pari tah min potatih. Jaatian pari tah min jisquin sirijaxon miin huetsa bejistih, jahuen poto bero pishca tsecanonoxon.

Bimibo jisxon non jihui honanai

(Mt 7.17-20; 12.34-35)

⁴³ Jihui siribo ta bimi tiromayahpa yamatihqui. Jihui payo rihbi ta bimi siriboya jatimahqui.

⁴⁴ Jenquetsahpa jihui hin hihxon tah non jahuen bimi jisxon jatihibi jihui honanai. Moxayahpa jihui queha tah non pama tsinquitimahi. Moxayahpa yora quiha rihbi tah non sexon bihtimahi.

⁴⁵ Noquen jointi janin siri shinambo jaiya tah non siri yohuan noque jai. Jascarihbibi tah non tiroma jonihax noquen jointi janin tiroma shinanboya tiroma yohuan rihbi jai. Noquen jointi janin jai shinanboya tah non yohuanai.

Xobojahibo rabe

(Mt 7.24-27)

⁴⁶ ¿Hen jahuejanon hihxon man hea Hihbon Hihbon hahcain, hen mato yohihah hea nincaxonma bi hea quenaquin?

⁴⁷ Hehqui joxon hen yohihi nincaxon jaabijaquin hahcaibo rahsi jenquetsahpabo hin hihxon tah hen mato yohihi.

⁴⁸ Jascapa hihquish tah min xobojahi joni quesa qui. Xobo jihuibo nichinnoxon ta nincacoinnicateon nemin pari mai poquinihqui, minquex mai qui nocoxon xobo jihui nichinnoxon. Jaatian ta jenehhuan joxon mai mahpobahinxon bahiquin xobo bocatsihquin bi hahtipahyamahqui, sirijaquin jan xobo jihui nichinai copi.

⁴⁹ Hen yohihah nincaxon bi hahyamahi joni ta mashin xobojanoxon bemacanya poquinxon jihui nichinai quescapah qui. Jenehhuan joxon maimahah ta xobo paquerestihqui, jenen huaxa huaxascanon –jato jaquin Jesusen.

7

Capitanen joni Jesusen rohajahi

(Mt 8.5-13)

¹ Jato nincamaquin queyohax sca Capernaum jema janin cahi.

² Jano ta huesti sontaro capitan rihbi jihuenshqui. Hahan jan hihti shinanai jahuen joni jai bi jaa jahuen joni hisini. Mahuati hisini racati.

³ Jesus nocoscai chanhi nincaxon jahuen joni rohajaxoni Jesus jonon hihxon judio hapobo sca raanquin yohitannahue hahxon. Raanah bocani.

⁴ Jesus qui nocoxon sca hihti yocacanquin.

–Jaa hahxonrohahue, Hihbon. Nahuahax bi ta siri joni qui.

⁵ Noquen caibohon ta queenihqui. Noquen tsinquitxi xobo rihbi ta jaanbi noque hahxon-nishqui –hahcanquin.

⁶ Jascajaha jato betan Jesus cahi. Capitanen xobo qui nocoti cahiboya sca capitanen raanah caibo sca jato behchihi jahui. Behchixon yohicanquin:

–Hehon shinanax bi paxquini hocho joyamahue, Hihbon, hih ta jaiqui, Hihbon. Hea ta hen jahuama qui. Heen xobo janin mia hihquitii tah hen senenyamahi.

⁷ Jaa copi tah hen heabi mihqui cayamahaqui. Jano xonbi yohireshue. Min yohihah ta heen joni rohaxihqui qui.

⁸ Hen tah hen honanai. Hean rihbi tah hen heen hapon yohihah hen hahcai, heen sontarobo rihbi tah hen jai, hean yonohibo. Hean cahue hahca ta catihiqui. Huetsa rihbi cahen johue hahca jahui. Nescajahué hahca cahen hean yohihi quescajaquin, hih ta jaiqui, Hihbon –hahcanquin yohixonquin.

⁹ Capitan yohuanai chanihahbo Jesus rahteti. Janobi rabejaquexon chibanaibo sca yohiquin:

—Mato yohinon nincacinnahue. Jascapa nincacinnica tah hen ni huestibi Israeli baquebo merayamanihqui —hahquin.

¹⁰ Jesusen yohihah sca ta capitan janin boribixon jahuen joni rohascrai meracannishqui.

Yononmanen baque Jesusen teehihmahi

¹¹ Hoxashinahax mohiyahtax res sca ta Nain hahcaibo jema janin Jesus cahi canishqui. Jahuen haxenicabo betan hicha jonibo rihbi Jesus manahi bocani.

¹² Jema xehqui qui nocoti caquin sca tsahoni jahuibo behchicanquin. Mahuatipi hiabenahibo behchicanquin. Jaa huesti jahuen baque mahuatipi quen cajon hiacaibo jahuen maman chibanaequin. Jahuen bene yamahi, yononma. Jema mehabo rihbi hicha jaa manahi becamei.

¹³ Yononma jisxon hahan shinanxon:

—Huaoihiyamahue —hahquin noquen Hihbaan.

¹⁴ Yohixon caxon sca cajon mehequin. Jan mehehiya hiacaibo janobi nihreneni.

—Beronan. Mia tah hen yohihi, huenihue —hahquin.

¹⁵ Jan yohihah mahuatipi tsahohihnascai. Tsahohihnatax yohuanscaya jahuen maman bihnon:

—Miin baque bihhue —hahquin.

¹⁶ Hihti rahte sca jacani.

—Papan ta noque hahxoniqui. Jahuen joi nincamanica janon ta noque quiha huesti Papan caisnishqui —hahcanquin, Jesus yohihi.

—Noque jahuen jonibohon ta Papan shinanhqui —hihcanahi boribicani.

¹⁷ Yohuanchanicahiboya sca ta Judea mai janinhahbaan jatihixonbi nincanishqui, chanihahbo, jaa senenbi jihuetaibaan rihbi nincaquin.

Nashimanicahten raanaibo

(Mt 11.2-19)

¹⁸ Juaman haxenicabaan rihbi Juan yohiquin. Nincaxon rabe jahuen haxenica Juaman raanscaquin.

¹⁹ Noquen Hihbo yocaqui cahábo hihxon jato raanquin.

—¿Hoa jahui joni Papan noque yohini mia quin? ¿Jo hen jatiquin huetsa, non mananon? hahquin yocatannahue —hahquin.

²⁰ Jaan raanah cahax nocoxon yohicanquin.

—Nashimanica Juaman ta noque raanaxqui non mia yocanon. ¿Hoa jahui joni Papan noque yohini mia quin? ¿Jo hen jatiquin huetsa, non mananon? —hahcanquin.

²¹ Jaton jisnonbi sca hicha hisinaíbo jaan rohajaquin. Hohmis hohmisaiibo rihbi rohajon tiroma yoshiman jatsanjahibo rihbi rohajaquin. Hicha benchebo rihbi rohajaquin, jisíbo sca.

²² Jaatian yocacaibo sca jaan yohiquin:

—Man jisxon nincacah Juan yohitannahue. Benchebaan tajisresscapiro. Chantobo ta nihresscapiro. Sipiyahpabo ta sircihinscapiro. Pabebeaan ta nincascapo. Mahuatipibo ta jihuerehbiscapiro. Jahuaborajomabaan ta joi siri nincaquihqui, hahquin yohitannahue.

²³ Hen yohihi nincacoinaibo ta hahan jenimati jaiqui —jato jaquin.

²⁴ Juan yohihi boressca jaiboya sca Juan tsoa quin honanahbo hihxon tsinquijsaquaetaibo noquen Hihbaan yocaquin:

—Jahua jisi man janoo tsoa jihuetaitonma caniquin?

²⁵ ¿Tahua huesti nihuen xayanai nan? ¿Jahua cahran man jisi caniquin? ¿Chopá siri sahuehi joni nan? Hihti siri chopayahpabo tah man hapobaan xoboho pari man merathi.

²⁶ ¿Jahua cahran man jisi caniquin? ¿Papan joi yohinica nan? Jaa rahan. Mato yohinon nincanahue. Yohinica res ma bi ta yohinica mentan hashoan coshi joibo jaa jaiqui.

²⁷ Hahqui ta huishacannishqui:

Jise: Mia bebon canon tah hen heen raanti joni raanai. Mia ta bahi bexojaxoni catihiqui mia hahan canon

hih ta jaa yohihi Papan joi janin jaiqui.

²⁸ Nincanahue, hen mato yohinon. Juaman yohihi joi mentan hashoan siri joi yohiti ta tsoabi yamahihqui. Papan jihuetaibo res ta jahuamahax bi Papan jihuemaha hashoan siri joi yohiti jaiqui —jato jaquin.

²⁹ Jan yohihi nincacax Juaman nashimaniboa sca:

—Papan ta noque hihti hahxonihqui —hihscai. Coriqui cobranxonaibo betan tsinquijsaquaetaibo jascacani.

³⁰ Fariseobo betan jaton haxemanicahbo jascayamahi. Juaman jato nashimati queenyanamanish, rahma Papa queenai quescajati rihbi queenyamaribcani.

³¹ —Rahma jihuetaibo ¿jenquetsahpabo quin? Jahua quescapahbo hin hen mato yohinon nincanahue.

³² Mato tah man baquebo jaabo rahsibi shirohi quescapahbo qui, notsi notsihi nescari yohinanaibo: Man bairahnon hihxon non rehue hahcai bi tah man bairahyamahi. Non huiniyah bi tah man noque betan huaoihiyamahi hihqui ta notsihi quenananiqui. Jas-capahbo tah man qui, rahma jaibo.

³³ Joxon ta piti siribo Juaman piyamanishqui, xehati rihbi xehayamaquin. Jan piyamahiya tah man hahqui yohuanpahonihqui, tiroma yoshinyahpa tah qui, hihqui.

³⁴ Hea sca joxon tah hen pixon xeharibhi. Hen jascajahiya tah man Hoa pihanhuan jisnahue. Xehanhuan tah qui. Coriqui cobranxonnicahbo ta jahuen hahberabetibo qui. Hohchamisbo ta jahuen hahberabetibo qui hih tah man janiqui, hea yohihi.

³⁵ Tsoa ponte shinanyahpa quin hihxon ta jenques jihuethquin hihxon jisxon pari non honantih i hih ta jacanihqui. Jascatibi bi tah man hehqui yohuanresai —jato jaquin.

Fariseon xoboho Jesus nocotai

³⁶ Jaatian sca:

—Heen xobo janin pihī canoxahnhue —hah huesti fariseo jonin sca jaah, janō cahax mapetax Jesus hisquen racati, pinoxon.

³⁷ Jaa jema janin rihbi huesti hahresti haibo jai. Fariseonen xobohoxon Jesusen pihī honanax jahui, pomo xecobenahi. Jahuen hahan hininjati rahoya pomo.

³⁸ Mapetax Jesus cahchiqui nihrenenax jahuen tahe quiri cahcopaquetax huaohihqui. Huaohihqui bi jahuen bero jenen jahuen tahe qui toisihqui. Jahuen boon sca tasoxon, tahe qui tatsohahxon jahuen hinintinin jahuen tahe hininjaquin.

³⁹ Jaa jisish, jahuen jointi chicho fariseo yohuanscāi:

—Papan joi chaninicaxon ta neatohon honanquehanielqui. Hoa haibo jenquetsahpa quin, jenquetsahpaton mehehiquin hihxon cahen honanquehan, hohchayahpa haibo can —hihqui jahuen jointinin.

⁴⁰ Fariseo jascaraiton sca:

—Mia ta pishca yohicatsihqui, Simoman —hahquin Jesusen.

—¿Jahua hin, maestron? Hea yohiroahahue —hahscaquin.

⁴¹ —Coriqui jan jato hinantahni cahen rabe jonibaan jaton patoro ribinnish. Huetsan cahen rabe bari teexon copijati ribinrish. Huetsan cahen rabe hoxne teexon copijati ribinnish.

⁴² Copijati hahtipahyamahiboya cahen jaton patoronen jato Jascabi sca janon, jene-nahue hahcan. Jato jascajaquin hahxonah sca jahuemeha hashoan jahuen patorohon queennishqui? Yohihue —hahquin Jesusen.

⁴³ —Hean shinanah ta hoa hashoan ribinpahoni hashoan rihbi sca jahuen patorohon queennishqui —hahquin Simoman.

—Hihcoini. Pontejaquin tah min shinanai —hah sca Jesus jai.

⁴⁴ Haibo jisxon sca Simon yohirihbiquin:

—Nea haibo jise. Miin xoboho mapetaiton tah min hea tachoquiti hinanyamahahqui. Neatohon caya jahuen bero jenen hea tacho tachoxon jahuen boon sca hea tasohihqui. Mapetaiton tah min hea mehetanyamahaguin.

⁴⁵ Neatohon ta hihcoxon tahe qui hea tatsohahquin jeneyamahiqui.

⁴⁶ Hahan boo masquiti min hea jahuabi hinanyamahah bi ta neatohon hea hahan hinintinin tasquihiqui.

⁴⁷ Jaa copi tah hen mia yohihi, jahuen hohcha hichahi bi tah hen jatihibi sohuahi, jan hihti queenscanon. Non hichatahma sohuaxonah ta hichatahma rihbi noquehon queencaniqui —hahquin.

⁴⁸ Haibo sca yohiquin:

—Miin hohcha tah hen sohuaxonai —hahquin.

⁴⁹ Hahbetan pihī tsahotaibo sca jaton jointi chicho yohuani.

—¿Jahua hihxon hohcha sohuaxonti jaan shinanihqui? —hihcana.

⁵⁰ Jascaraiboya bi haibo yohirihbiquin.

—Hen mia hahxontih i min shinancoinai copi ta miin hohcha yama sca qui. Sirijaquin shinani sca cahue —hahquin.

¹ Janohax cahax res sca janobo jai jemabo janin caxon joi siri Jesusen jato yohiquin. Hani jemabo, hanitahma jemabo, jatihibi janin Papan jihuemat i joi jato nincamaquin. Jahuen doce haxenicabo rihbi jaa manahi bocani.

² Haibobo rihbi jan rohajaho jato betan bocani. Tiroma yoshiman jispahoni haibobo rihbi jan rohajaho jato manahi bocani. Huetsa cahen María Magdalena, siete tiroma yoshiman hihbojani bi jaan rohajaho rohascái.

³ Huetsa cahen Juana, Cusan haibo. Jaa Cusa ta Herodesnín tininti hihpahonnishqui. Huetsa rihbi cahen Susana. Huetsa haibobo rihbi cahen hicha. Huaiyahpaxon jato pitijaxonai haibobo.

Mihsahahbonanicah

(Mt 13.1-9; Mr 4.1-9)

⁴ Jemabo janinhax jonibo hahqui tsinquijaqueti nocoscaax hichascaiton sca ta jaa patax queha joi jato nincamanishqui. Nescajaquin jato yohiquin:

⁵ Jahuen huai banahi cahen huesti joni canish. Jahuen huai chianxon sca bero romishin banaquin mihsahahbonaquin. Mihsahahbonahah cahen caibo bero bahinbi paqueti, jahuibaan jamabonascanon. Hihsabaan rihbi joxon topibonaquin queyoquin.

⁶ Caibo bero rihbi cahen chahoma main paqueti. Jaabo cahen joconax bi bemacanya hihquish xanahi pehuacanascái.

⁷ Caibo bero rihbi moxa bero tocan paqueti. Moxa bero betanbi joconax bi hanhiton moxan sca rishquiquin.

⁸ Caibo bero rihbi siri main paqueti. Jaabo cahen joconax, hanihax bimihi, hichahi. Huesti bero potaho joconax bimiyahpascaax cien beroyahpascai. Berotihibi jascari – hahquin.

Jaa joi jato nincamaxon coshin sca yohiquin:

–Hahan nincati pabinquiyahpaxon nincanahue –hahquin.

Honanyamahiboya pontejaquin jan yohihi

(Mt 13.10-17; Mr 4.10-12)

⁹ Jaatian jahuen haxenicabaan sca yocaquin:

–Jahua noque haxemacatsihquin min jascarain, Hihbon? –hahcanquin.

¹⁰ Papan jihuemat Jenquetsahpa quin man honannon hihxon tah hen jaa patax queha joi yohihi, caibaan honannomma hihxon. Jisxon bi jisyamahabo hihxon. Nincaxon bi nincayamahahbo hihxon tah hen jascapa yohihi.

Mihsahahnica jahuahi jaiquin hihxon jan yohihi

(Mt 13.18-23; Mr 4.13-20)

¹¹⁻¹² Nea tah qui. Jaa bero ta Papan joi qui. Jonibo cahen bahinxon nincacaibo. Nincascaibaan bi ta nincacoinax Papan baquebo sca jamis hihxon tiroma yoshiman jato jaa joi bichiniqui jaton jointi janin yamascanon.

¹³ Chahoma main paquetaibo ta joi siri nincacax coin coinxon bichibo qui. Bemacanya jaton tapon jai quescaxon ta basima tahni bichipixon jenebahinaibo qui.

¹⁴ Moxa chian paquetaibo ta nincacoinaibo qui. Nincacoinxon bi ta huetsa shinanbo rihbi sca bihcaniqui, masa shinantibo, jahubora tsamanti shinanbo, mai mehabo costan costanti shinanbo. Jascapa shinanbo jointi qui bochohax ta shinan siri caitimahi qui, jahuama quesca sca jai.

¹⁵ Siri main paquetaibo ta sirijaquin bihxon nincacoinxon jeneyamahibo qui. Jascapah ta bimi hichayahpa qui.

Johue

(Mr 4.21-25)

¹⁶ Tsaoanbi tah non johue quetejaxon quentipan sca mahpobahinyamahi. Quetejaxon tah non tapo naman rihbi tsahonyamahi. Jahuen tsahonti janin caya tah non johue tsahonai, jahuibaan sca jahuen xaba jisnon hihxon.

¹⁷ Man jonexon hahcai ta janibi sca Papan yohipaqueyaxihqui qui. Jan yohiyamaxihqui ta yama qui, jonexon hahcaibaan bi. Jaan honantima jonexon hahcai ta yama bi res qui. Jatihixonbi honanahbo sca ta jonexon hahcaibo jaan yohipaqueyaxihqui, jahubi jone yamascanon.

¹⁸ Jaa copi nincacinnahue. Nete queyoscaiya ta nescajayaxihqui qui: Papan hinanah min jaiya ta hashoan sca jaan mia hinanyaxihqui qui. Jaan hinanah bi min yamahiya ta min jai pishca rihbi mia bichintihqui –hahquin.

Jesusen mama jahuen huetsabo betan nocotai

(Mt 12.46-50; Mr 3.31-35)

¹⁹ Jaatian jahuen mama betan jahuen huetsabo nocoti jahui. Joxon bi jonibo tsamataiya Jesus yohuanquihnti hahtipahyamacanquin.

²⁰ Caibo sca chanihi jahui.

—Miin mama betan miin huetsabo ta jemanhihtinin nichiqui. Mia ta jiscatsihcanihqui —hahcanquin.

²¹ Jasca jaiboya sca:

—Hean yohihi nincaxon hahcoinaibo ta heen mamaya heen huetsabo qui —hahquin.

Nihueya behchon tantijahi

(Mt 8.23-27; Mr 4.35-41)

²² Huetsa neten sca ta jahuen haxenicabo betan nontin naneti canishqui. Nanexon sca:

—Hian pohquejaquenahue —jato jaquin. Pohqueti caquin hoque quexa sca chibibonacanquin.

²³ Nihuen xotonah sca pohquecanahi cahi, pohquecanahi cahi, nontinbi sca Jesus hoxascanon. Hian naponbi sca nihuehhuan jato qui paqueti. Behchoman bochojaha nonti hihquicatisihscai.

²⁴ Jesus qui caxon sca mohinxon:

—Hihbon. ¡Non tah non hihquiscái, Hihbon! —hahcanquin. Huenicahuanxon sca nihueya behchonbo yohiquin. Tantinahue jan jaiya tanticahinscái. Jahua nescascai. Jaatian hahbe cahibo sca:

²⁵ —¿Man nincacoinyamabiresain? —hahquin. Jaabo rahte rahtetax yohuan yohuanaiton jato jascajaquin.

—Jahua joni cohren jaa quin? Jaan yohihah ta nihuen rihbi nincaquihqui. Jaan yohihah ta behchoman rihbi nincaquihqui —hihcáni.

Gadra joni yoshinyahpa

(Mt 8.28-34; Mr 5.1-20)

²⁶ Jaatian sca nocotax Gadara main sca taxnacani, Galilea mai hoque quexa.

²⁷ Bototax mapescaiton sca jaa behchihi yoshinyahpa joni jahui, janohahbaan caibo. Tiroma yoshiman hihbojani cahen basi sca chopanma nihpahonish. Jahuen xobon jihueyamahi. Tsahon tocando cahuan cahuanresi.

²⁸ Jesus nocotai merahax bishquihahanan sai saihihonahi jahue x raboxonen nichish betihihpaqueti. Coshin sai saihihqui.

—¿Hea jahuejahi min jahuin, Jesusen? Mia tah min naihoh queha Diosen baque qui. Mia tah hen hihti yocacai. Hea tiromajayamahue —hahquin.

²⁹ —Jaa joni jenebahini catanhue, tiroma yoshiman —Jesusen jaah sca yoshin jascari sai saihihqui. Hicha coti jahuen yoshiman yahtanxon bohá cahen basi sca jaa joni hohmis hohmispahoni. Cadenanen menexxon tanexxon coiranabaan bi cahen cadena tesabahinax jano tsoa jaitonma jabapahonish, yoshiman jatsanjahah.

³⁰ Jascapa hihqui bi Jesusen yocaquin.

—¿Mia min jahua Jane quin? —hahquin.

—Hea ta legión qui —hihqui. Jaa janin hicha yoshin nocohihnxon hichaxon hihbojani cahen jaa janeya janish.

³¹ Picotax botannahue hahcá sca hihti yohiscacanquin yoshinbaan:

—Noquen quininhuan janin, jano Diosen noque potayaxihqui janin noque potayamahue —hahcanquin.

³² Jano rihbi cochi repinica jai, pihi manichi hichahi.

—Hoa cochi qui non canon yohirohahue —hahcanquin yoshinbaan.

³³ —Botannahue —hahca sca jaa joni jenebahini bohax cochi qui sca hihquihi bocani. Yoshin jato qui hihquihah sca mapoho rocohihcanahi cahi, jene qui paquetax hahsacani cohibo.

³⁴ Jascabibojisish cochi coirannicahbo jacobini caresscái. Caxon jema janin jihuetaibo yohi yohixon hocho jihuetaibo rihbi nincamacanquin.

³⁵ Yohihah sca jisi became. Jahua jaaxquin hihquish became. Jesus qui nocoxon sca jaa patax tsahotai jaa joni meracanquin, jahuen yoshin tiroma yamascai. Chopayahpahax res sca sirijaquin shinani tsahotaiton meracanquin. Jaa jisish rahte rahtecani.

³⁶ Raqueya sca jaibo bi caibaan sca jan rohajahi jisxon yohirihbicánquin:

—Jascajaquin ta yoshinyahpa joni rohajahaxqui —hahcanquin.

³⁷ Jaatian tsinquiaquexon Gadara janinbo jihuetaibaan sca Jesus yohiquin, Noque jenebahini catanhue, hahcanquin. Hihti raquexon Jesus camati shinanxon jascajacanquin.

³⁸ Jaatian nanetax cacatsihqui bi yoshin tiroma potamaha joni rihbi hahbetan cacatsihqui. —Hea rihbi hiohue —hahca bi jeenhahyamaquin.

³⁹ —Miin xobon caxon Papan mia hahxona jato yohihue —hahquin. Jascajaha jatihibi janin sca yohibonahi cahi, Jesusen ta hea rohajahaxqui, hihcanahi.

*Jairon baque; chixanan hisinai haibo
(Mt 9.18-26; Mr 5.21-43)*

⁴⁰ Hoque quexa Jesus nocotaiton sca janohahbaan johue hahquin sirijaquin. Jaa joti manarahsihbaan jaabihquin sirijaquin.

⁴¹ Jaatian jaton tsinquit xobo hihbo jahui, Jairo janeya. Jesus bebon miracahpaquexon, Heen xoboho johue, hihxon hihti yocaquin.

⁴² Jaa huesti jahuen baque haibo hisinai quen hihti yocaquin. Doce bari jahuen baque jai muhuacatsihscai. Jeenhihquish hahbetan caresscái bi jonibo hichahi. Tsinquitax hueranhahnanax Jesus qui tsehquesihcanahi bocani.

⁴³ Jaatian jan rihbi huesti haibo jai, hisinax jahui. Doce bari sca jimi pota potahi haibo. Tsoanbi jaa rohajati hahtipahyamahiya, hahchon nihxon Jesusen coton quexa mehequin.

⁴⁴ Mehehax rohacahin sca jai, jimi tanticahinscái.

⁴⁵ —¿Tsoan man hea mehehahquin? —hahscáquin Jesusen.

—Hen tah hen hahyamahaqui —hahcaibo rahsi jaiya sca Pedronen yohiquin:

—Hichaxon ta mia tejabohanxon mia tsahca tsahcahahbonacaniquí, maestron —hahquin.

⁴⁶ —Tsoan rah ta hea mehehaxqui. Heen coshi hahqui cainai tah hen honanahqui —hahquin.

⁴⁷ Joneti hahtipahyamahax, raqueyahax saqui saquihihquish, jahuem jaa bebon rabox-onen nihxon sca, Hisinnixon tah hean mia mehehahquin, Hihbon, hahquin haibaan yohiquin sirijaquin. Jatihxionbi nincanon sca yohiquin, jan rahma rohacahinscái yohiquin sirijaquin.

⁴⁸ —Shinancoinax copi tah min roha sca jai, baquen. Jascabi roha sca jahue —hahquin Jesusen sca.

⁴⁹ Jaa jan jascajaquin yohiparihiya bi tsinquit xobo hihbo yohihi jahuen joni nocoti jahui.

—Miin baque ta muhuascaaxqui. Noquen haxemanica jatsanjayamascahue —hahquin.

⁵⁰ Jaa yohihi nincaxon tsinquit xobo hihbo jisanan:

—Masa shinanyamahue. Shinancoinreshue. Roha ta jatihiqui —hahquin Jesusen.

⁵¹ Jahuen xoboho mapexon sca hahbe nichibo Jesusen mapemayamaquin. Pedro, Juan, Jacobo, xontaconen papa, jahuen mama, jaabo rahsi res hahbetan hihcomaquein.

⁵² Texe janos tsamataibo cahen jaya huinihi. Jaya huaohihqui.

—Huaoohiyamanahue. Muahuathima bi ta hoxaresiquí —hahquin Jesusen.

⁵³ Jascajaha bi xontaco mahua sca jai honanxon Jesus hosancanquin.

⁵⁴ Xontaco mehuetanxon sca coshin yohiquin:

—Huenihue, baquen —hahquin Jesusen.

⁵⁵ Juhuen yoshin joribiscaax xontaco huencahuanscái.

—Piti hinanhue, jan pinon —hahscáquin Jesusen.

⁵⁶ Juhuen papa betan jahuen mama rahte rahtetí. Jenquetsahaquin rohajahaxquin yohiyamahabó sca jahuen papaya jahuen mama hihti yohiquin:

—Tsoabi yohiyamanahue —hahquin Jesusen.

9

*Jahuen haxenicabo Jesusen raanai
(Mt 10.5-15; Mr 6.7-13)*

¹ Juhuen doce raantibó sca quenamaxon cahen coshi shinan jato hinanquin. Jatihibi tiroma yoshinyahpabo rohajati, jatihibi hisin rihbi rohajati coshi hinanquin.

² Hinanxon Papan jihuematí joi yohihahnan hisinaibo rohajabonanon hihxon jato raanquin.

³ —Jaya catibo bichishma botannahue. Mepiti tah man botimahi, borasa boyamaribiquin. Ni piti ni coriqui boyamaribiquin. Rabe cotonya rihbi tah man catimahi.

⁴ Xobon mato mapemaha janobinahue. Caribinoxon caman tah man jaa xoboho hoxatihí.

⁵ Mato mapenahue hahyamahiboya tah man jaton jema potabahini caquin sca maton sapato qui hueotai jaton mai poto jato qui tihabahintihi, nincayosmabohi honanahbo hihxon —jato jaquin.

⁶ Cahax sca jema tihibi qui nocoxon Papan joi siri yohihahnan hisinaibo rohjacanquin.

*Juan retehox yohuanabó
(Mt 14.1-12; Mr 6.14-29)*

⁷ Herodes janeya quiquin hapo sca caibaan yohiquin, Jasca roqui Jesus jaiqui hahquin, jatihibi yohixon.

—Caibaan shinanah ta Juan mahuanish bi jihuerehbiscaiqui —hihquiboya caibo sca:

⁸ —Elías yamanica rah ta noque qui caini joribisciaiqui —hihcami, Jesus jaa hihqui shinanax.

—Neateeman jihuelpahonish bi teehihribiscai Papan joi yohixonnica ra tah qui —hihqui caibo rihbi sca. Jascapa nincaxon Herodesnin masa shinanquin.

⁹ —Juan tah hen textenihqui. ¿Nea yohihibo Jesus jahua joni jatihiquin? ¿Jenquetsahaxon hen jaa jistihin? —hihxon shinanquin.

Cinco mil Jesusen pimahi

(Mt 14.13-21; Mr 6.30-44; Jn 6.1-14)

¹⁰ Jesusen raanipi hahqui beribixon sca jaabaan caxon hahtanipi jatihibi yohicanquin. Jato canon benahue hahxon sca jaabo rahsibi sca hahbetan canon Betsaida jema janin jato hioquin.

¹¹ Jahuen bocanaxquin honanax texe rihbi jano bocani. Nocotaiton jato Benahue hahxon Papan jihuematii joi Jesusen jato honanmaquin. Hisinaibo rihbi rohajaquin jatihibi.

¹² Bepiscaiya jahuen raantibo joxon yohicanquin:

—Nea jonio ibo camahue, Hihbon, nenobo jai jemabo janin caxon huaiyahpabo janin rihbi caxon jano hoxati sca benahahbo. Jano jaton piti benahahbo. Neno ta jahuabi yamahihqui —hahcanquin.

¹³ Jascajahaboo bi:

—Maton caya jato piti hinannahue —hahquin.

—Noque tah non piti yamahi. Pichca paan pishca, rabe yapa rihbi, jaa res. Jahua hashoan tah non yamahi. ¿Yotihixon piti marohi non catihin? —hahcanquin. Cinco mil bebobo jano jai quen jascajacanquin.

¹⁴ —Cincutaboo rahsi tsahojaquetannon jato mitsahohmanahue —hahquin jahuen haxenicabo.

¹⁵ Yohihah sca jascajacanquin mitsahohmaquin.

¹⁶ Jaton pichca paanya rabe yapa bihxon sca nai bejisihnxon Papa yohixon tehcaxon jahuen haxenicabo metisahpaquequin. Hinahan, jaabi rihbi jonio sca hinanpaquecanquin.

¹⁷ Bihxon yaninoxon caman jatihixonbi picanquin. Pixon bi texejaribicanquin. Yapaya paan tequebo piquin texejahiboya sca doce tasa bocho tsinquirihbicanquin.

Mia tah min Cristo qui Pedro jai

(Mt 16.13-19; Mr 8.27-29)

¹⁸ Jaa pecaho sca Papa yohi jaa huesti cahiya jahuen haxenicabo sca hahqui bocani. Noco sca jaiboya sca jato yocaquin:

—¿Hea jahua joni hihqui shinancanquin? —hahquin.

¹⁹ —Mia roqui Juan yamanica qui, hoa nashimapahoni. Caibaan shinanah cah min mia Elías yamanica. Caibaan rihbi jisí cah min neateeman jahponi Papan joi nincamanicah, hahquirihbi teehihqui —hihcami.

²⁰ —¿Maton shinanah cahran? ¿Hea tsoa quin? —jato jaquin.

—Mia tah min Papan raanai qui, min jotihi jan neateeman yohini tah min qui —hahquin Pedronen sca.

Jan mahuayaxihqui Jesusen yohihi

(Mt 16.20-28; Mr 8.30-9.1)

²¹ —Tsoabi jascajaquin honanmayamanahue.

²² Hicha pari tah hen teneti jai, noquebaque hen jai copi. Hapobo rihbi ta Jaa ta tiroma qui hihyaxihquiqui, hea yohili. Jaton haxemanicahbaan rihbi ta jascajaribiyaxihquiqui. Jascajaxon ta hea rehtescayaxihcanaighqui. Rehtehipibaan bi tah hen quimisha neten hihquish hahquirihbi teehihtih —jahuen haxemanicabo jaquin.

²³ —Jano jaibo rahsi sca yohirihbiquin:

—Hehchon jocatsihxon tah man matobi man queenaima sca man hahtih. Hea rehtehibaan bi tah hen heen Hihbo jenetimahi hihnahue nete tihibi. Jaatian tah man heen jihuetaahbo jatihi.

²⁴ Mahuati qui raquetaibo ta mahuatihiqui. Jascapa jihuetaimahi bi ta hea copi mahuataibo queyoyamanox manatihiqui.

²⁵ —¿Nea mai jatihobi hihbojahax bi mahuatax sca jahuaya man banetihin? ¿Jaabiyaha queyoscaxon man jahua jatihi?

²⁶ Hea hihbomacatsihyamahibo tah hen noquebaque hihxon Mia tah min henama rihbi qui hah hen jatihi. Heen joi qui hihtimahpaibo rihbi tah hen jascajatihi. Coshi shinanya joxon tah hen jascajatihi, noquebaque hihxon. Papan xabaya joxon, hicha naihoh queha yonotibo rihbiya joxon tah hen jascapa jascajatihi.

²⁷ Hihcoinja tah hen mato jai. Caibo neno nichibaan tah man mahuaxonma Papan jihuemati man jistih —hahquin.

*Jesus xabayahpacahinai
(Mt 17.1-8; Mr 9.2-8)*

²⁸ Jato jascahipixon ocho netebo hihxon Pedro, Juan, Jacobo jaabo quimisha hioquin. Papa yohinoxon mahchi janin cahi.

²⁹ Janoxon Papa yohihahnhan sca jahuen bemanan huetsapahcahini. Jahuen chopra rihbi pehnecahini, cana bacahi quescape.

³⁰ Jaatian rabe joni hahbetan yohuani sanareneni jahui, huetsa cahen Moises yamanica, huetsa cahen Elías yamanica.

³¹ Jaabo rabe rihbi xabayahpahax hahbetan yohuani. Jerusalen janin jan mahuayaxi-hqui yohuancani.

³² Yohuan yohuanai boyo bi Pedro jaabaan hoxan hihxon bi tenexon jahuen xaba jisquin. Hahbe yohuanai xabayahpa rabe rihbi jiscanquin.

³³ Yamanica rabe caresscacatsihquiya sca Pedronen Jesus yohiquin.

—Noque neno jaah ta siri qui, maestron. Quimisha tapasnonhue, mina huesti, Moisessnina huesti rihbi, Eliasnena huesti rihbi —hahquin, jahua yohuanti honanxonma jascajaquin.

³⁴ Pedro jascari yohuanaiya bi nai cohiman jato mahporenenuin. Cohiman mah-pobiahna raquecani.

³⁵ Jaatian cohiman mehax yohuanai sca nincacanquin:

—Nea ta hen caisin heen baque qui. Jaa nincanahue.

³⁶ Jascari yohuanai nincaxon jisibaan bi Jesus huesti sca jai. Jascapa jisipixon bi ta tsoabi yohiyamacannishqui. Jisyamahicamacani. Chiní sca ta yohicannishqui.

*Yoshiman hihbojani Jesusen rohajahi
(Mt 17.14-21; Mr 9.14-29)*

³⁷ Jaa mahchi janinhax bototipish hoxashinahax mohiyahtax cahiton sca jato behchihi tsama jonibo becamei.

³⁸ Jato tocan huesti joni coshin yohuanhonahi jahui.

—Maestron, mia tah hen hihti yocacai. Heen baque jisxonhue. Jaa huesti heen baque tah qui.

³⁹ Yoshiman hihbojaha ta sai saihihcahinax jomi jomihax bacox jancharahihqui qui, hihbon. Jenexonma ta yoshiman rishqui rishquihihqui.

⁴⁰ Jahuen tiroma yoshin potamaxonnahue hen jaah bi ta miin haxenicabaan hahti-pahyamahipicanaxqui —hahquin.

⁴¹ —¿Nincacoinyosmabon! ¿Jenquetsahpahi man shinancoinyamahin? ¿Jahuentiho basi hen mato betan hihquiya pari man pontetihin? ¿Jahuentiho basi cahran hen mato teneti Jain? Miin baqueya johue —hahscaquin Jesusen.

⁴² Jan jaya jahuiyabi yoshiman sca main hueranbohanxon jomimaribiquin. Jascaratton sca yohixon tiroma yoshin jenemabahinxon:

—Nea ta miin baque qui, biihue —hahscaquin Jesusen.

⁴³ Jan jascajaxonai jisish rahte rahtecani janu jaibo jatihibi.

—¿Jahuentiho coshi Papan shinanyaxon noque hahxonihquin? —hihcani.

*Jan mahuayaxihqui Jesusen yohirihbili
(Mt 17.22-23; Mr 9.30-32)*

Jan jato hahxonai jatihibi jisish rahte rahtetaibo rahsi. Jaatian sca jahuen haxenicabo jaan yohiquin.

⁴⁴ —Hen mato yohinon nincaquin sirijanahue. Jaabaan hea jahuejara janon ta jonibaan hea bimayaxihcanihqui. Jaabaan hea bihti ta hochomascaiqui —jato jaquin.

⁴⁵ Jan yohihah jahua hihcatsihqui qui cahen honanyamacannish. Jaton jointi xeh-potaiya cahen honancasquimacannish. Jahua hihcatsihqui qui hihxon hihbo yocatihin bi yocati qui raquecani.

*Tsoa hashoan hapo quin hihqui bo
(Mt 18.1-5; Mr 9.33-37)*

⁴⁶ Jaa pecaho sca jaabo rahsibi yocacahanani. Tsoa non hashoan hapotihin hihcani.

⁴⁷ Jaton jointi chicho yohuanaibo joi honanxon, jano nichi baque pishca bihxon jaa pataxxon jato yohiquin:

⁴⁸ —Nea baque pishca heen janen bichi jonin ta jascajaquin hea bichiqui. Hea bichi jonin ta hea raanni rihbi bichiqui. Mato tocan hashoan hahxonnicca joni ta hihti shinanya joni qui —hahquin.

*Noque panteyamahibaan noque yanapanani
(Mr 9.38-40)*

⁴⁹ —Maestron, tiroma yoshinbo miin jane yohixon camahi joni tah non jisiqui. Jaa tah non Jascajayamahue hahbenanai, jan noque betanbi nihyamahi copi —hahscaquin Juaman.

⁵⁰ Jascajaha:

—Jascapa panteyamanahue. Mato panteyamahibaan ta mato yanapaniqui —hahquin Jesusen.

Jacoboya Juan Jesusen hihti yohihi

⁵¹ Jahuen Papa qui cati hochoma sca jaonahiya sca Jerusalen janin cati shinanax, jano res cahi cahi.

⁵² Jano jan nihnoxihqui janin pari canon, jonibo raanquin. Jaan raanah bocani. Samaritano jema qui nocosaxon noquen hihbo jano hoxati benaxonabo bi jano hoxati hinancatsihamacani, samaritanobo.

⁵³ Jerusalen janin jan cahi honanax janoo hoxamatiqueenyamacani.

⁵⁴ Jano nocosaxon jascapahbohi jixson rabe jahuen haxenicabaan yocaquin:

—¿Naihoh quehax jato qui chihi paquexon jato queyobahinti non Papa yocatimahin, hihbon? —hahquin Jacobo betan Juaman.

⁵⁵ Jato qui rabejaquexon:

—Hahyamaquin rahan —hahxon pontequin jato hihti yohiquin.

⁵⁶ Yohiquin sirijaxon jaa jema huinobahini caresscaax cahi. Huetsa jema qui sca nococani.

Jesus betan nihcatsihquibo

(Mt 8.19-22)

⁵⁷ Janohax boribican. Huinotaiton sca huesti jonin Jesus yohiquin:

—Jano mia cahi tihibi tah hen mia manahi catihi, miin joi yohinicanoxon —hahquin.

⁵⁸ Jascahiya:

—Caman hinobo ta jaton mai quini jaiqui. Pehiyahpabo rihbi ta nahayahpa qui. Hea noquebaque tah hen jascayamahi. Hea noquebaque tah hen jahuenbi hoxati yamahi —hahxon, huetsa sca yohiquin:

⁵⁹ —Heen joi yohinicanoxon hehbe johue —hahquin. Hehbe johue hahcá bi:

—Heen papa pari hen mihintahyaxahnnon, hihbon —hahquin.

⁶⁰ —Mahuataibaan hahbe mahuataibo mihinnon jenehue. Papan jihuemahi joi yohibonahi cahi johue mia —hahscaquin noquen Hihbaan.

⁶¹ Huetsa sca yohuan:

—Mihbetan tah hen catihi, hihbon. Heen jenabo pari hen yohitannon manatahhue —hahquin.

⁶² Jaa sca yohiquin:

—Miin tee queyoyamaxon bi min japhoni janin sca miin shinanax camahax tah min Papan teexonnicaah mia jatimahi —hahquin.

10

Setenta Jesusen raanai

¹ Jasca jaipixon sca huetsa jonibo sca joi yohibonatannahue hahquin. Jascajaxon setenta raanquin, rabe rabe bohábo hihxon. Jano jaabi nocoyaxihqui xobo jatihibi qui canon jato raanquin, janjan nocoyaxihqui jema tihibi.

² Jato raannoxon yohiquin:

—Banaho huaijohuescaax tsinquitihicha jai bi ta teexonnicaahbo huestibohiqui. Jaa copi huai hihbo yocanahue, tsinquixonicahbo jahuen huai chian jan raannon.

³ Jistahi man. Hinobo tocan man carnerobo canon quesca tah hen mato coiranhanan raanai.

⁴ Coriqui boyamanahue. Ni borasabi, ni sapatobi, boyamanahue. Bahin caxon jonibo behchixon yohuanquihnxonma huinóbahintannahue.

⁵ Xobo qui nocoxon tihibi, Papan hahxonah man neno jascabihi jayamahin, hahnahue sirijaquin.

⁶ Mato sirijaquin bichiboya ta man yohihah quescsa sca Papan jato hahxonyaxihqui qui. Mato sirijaquin johue hahyamahiboya ta man jato sirijaquin yohiyamahah quescatihiqui.

⁷ Mapetax tah man jaa xoboho sca jihuetahtihi. Jano jihuetahxon jaton piti mato hinanahbo pinahue. Jaton xehati xehaquin. Teexonnica copijaha tah qui. Jaa copi jatona pinahue. Xobo tihibi tah man piquin betsatimahi.

⁸ Jemabo janin rihbi nocotaiton mato sirijaquin benahue hahca jaa xoboho hoxanahue. Mato hinanai pitibo pinahue.

⁹ Jano jaibo rohajaxon, Papan mato jihuematii ta nocoscaiqui, jato janahue.

¹⁰ Jemabo qui nocotaiton bi mato benahue hahyamahiboya tah man jaton jemanhihtibo janin nihxon man yohitihi:

¹¹ Noquen tahe qui hueotai mai poto tah non mato qui tahabahinai man jascapahbo copi. Jaabi honannahue. Papan jihuematii ta hochoma sca jaonahiqui.

¹² Mato tah hen yohihi. Casticanti neten ta sodomitobo Papan casticanai mentan hashoan coshin jaton jema jaan casticanyaxihqui qui.

Nincayosmabo

(Mt 11.20-24)

¹³ ¡Hahrai hilti tah man jayaxihqui, corazino jonibon! Jascaribbi tah man jayaxihqui, Betsaida janibon. Mato tocanxon heen coshiyaxon hen hahní quescajaribiqui hen Tiro jema janinxon hahcaya cahen neateman jaton hohcha copi benaxon hahan benati chopa sahuehax chihi mapo mapocohtax tsahoxon jaton shinan pontehan.

¹⁴ Tiro joniboya Sidono janibon jemabo casticanyaxihqui bi ta hashoan hihtijaquin sca Papan mato casticanyaxihqui qui.

¹⁵ ¡Capernaum janibon! ¿Naihoh jihuetax quescari man maton jema janin siripi jihueta shinanain? Maton jema ta maton tsahon baneyaxihqui qui –jato jaquin.

¹⁶ Jascajaxon jahuen raantibo yohirihbiquin:

–Man yohihah nincacaibaan ta hea nincacuhi qui. Man yohihah bi nincacatsihyamahiboa ta hea rihbi nincacatsihyamahiqui. Hea nincacatsihyamahiboa ta hea raanni heen papa rihbi nincacatsihyamacaniqui –hahquin.

Jahuen setenta beribiscui

¹⁷ Raanah, botanipish, jahuen setentabo jenimahonahi beribicani. Nocoxon:

–Yoshinbobi tah non miin janen yonohipiqui, Hihbon –hahcanquin.

¹⁸ –Naihoh quehax cana bacahihcamahi tah hen Satanas potahah paquetai jisniqui.

¹⁹ Nincanahue. Hean raanah caquin man rono jamabahinti coshi tah hen mato hinanipiqui. Nibo jamabahinti rihbi. Satanasnen yoshinbaan mato jahuejati hahtipahyamanon tah hen mato coshi hinanipiqui. Ni jahuatohonbi ta mato tiromajatimahi. Naihohxon maton jane huishá sca jai copi jenimanahue –jato jaquin.

Jahuen Papa betan jahuen baque

(Mt 11.25-27; 13.16-17)

²¹ Jato jascajaxon Dios Yoshiman hahan jenimati hinanah hihti jenimaxon noquen Papa sca yohiquin:

–Hahxon tah min hea jai, Papan. Mia tah min naiyahpa mai Hihbo qui. Shina-manhuanyahpabo betan honanbaan honancasquimanon tah min jato pantexon, miin baqueebaan sca honannon miin jato honanmahi, Papan. Mian jisi jascapa siri quen tah min jascajaxonai, Papan.

²² Papan ta hea jatihibi hinanipiqui. Jahuen baque tsoa hin ta tsoanbi honanyamahihqui. Papa huestichin ta honanipiqui. Tsoa heen Papa quin tah hen jahuen baque hihxon hea huestichin hen honanai. Caibaan ta honanyamahihqui. Hean yohihah res ta caibaan rihbi honansciqui –hahquin.

²³ Jascajaxon jahuen haxenicabo rahsi sca yohirihbiquin:

–Man jisivo jisish jenimanahue.

²⁴ Man rahma jisi ta Papan joi yohixonnicahto betan quiquin hapobo hichaxon jiscatsihxon bi hahtipahyamacannishqui. Man nincacai ta nincacatsihxon bi nincayamacanpanhonishqui –jato jaquin.

Samaritano

²⁵ Jaatian nihxon judiobaan haxemanaicahton jenquetsahaxon yocaxon non Jesus tiromahi yohuanmatihin hihxon yocascaquin:

–Maestron, ¿jenquetsahax hen queyoyamanox manatihin? –hahquin.

²⁶ –¿Papan joi janin jahua huisha jaiquin? ¿Jahua min jano jisin? –hahscäuin Jesusen.

²⁷ Jaan yocacah sca:

—Miin Hihbo Diosohon tah min miin jointiboyabi queentihu, miin yoshinboyabi, miin coshiboyabi, miin shinanboyabi tah min jahan queentihu. Mihbe jihuetaibohn tah min queenrihbitihu, miabi min queemehti hihqui quescarih —hahquin.

²⁸ —Hihcoini. Jihuenox hihqui jascahue —hahscacuin.

²⁹ Jascajanicah sca jan hihqui Jesus shinanmacatsihxon sca Jesus yocarihbiquin:

—¿Tsoa heen hahbe jihuetahbo quin nan? —hahquin.

³⁰ —Nesca tah qui. Huesti joni cahen Jerusalen janinhax Jericó jema janin cahi cahpaechehi. Cahiton sca cahen tiromabaan bixxon jahuen chopas bichinxon, rishqui rishquxon hahan mahuati tsehueya sca potabahincanquin.

³¹ Sacerdote huesti sca janu huinoti jahui. Bahin joxon jahuen caibo janu miracahtai merahax tecayacahini caresscái.

³² Levito baquebo huesti sca jascaribibi, jahuen caibo. Jano nocoxon merahax tecayacahini caresscái.

³³ Samaritano huesti sca hocho quehax jahui, jahuen nahua sca. Hahqui nocoxon jahan shinanxon bihtanxon, rahonquin.

³⁴ Olivo bimi xeniya vino rahojaxon jayaxon jahuen tchue rahonquin. Jahuen cabacho cahracanxon sca janu hoxati xobo janin sca hioquin. Janoxon sca rahonxon coiranshinaribiquin.

³⁵ Xaba paque sca jaiya sca rabe neten teexon cananai tihi coriqui hinanxon sca xobo hihbo yohiquin: Jaa hea coiranxonhue. Jaa coiranquin min hashoan sca coriqui castanaiyah tah hen joribixon mia copijatihu.

³⁶ Jascajaquin yohixon sca Jesusen yocacuin:

—Yometsohbaan tsehuejaha racatai qui cahen quimisha joni nocoti. Mian shinanah, jahuemeha jahuen hahbe jihuetah quesa janishquin? Hea yohihue —hahquin haxemanaica yocacuin.

³⁷ —Hoa jahan shinanxon hahxonai rahan —hahscacuin.

—Mian rihbi jascajatanhue —hahscacuin Jesusen.

Martaya Maria janin Jesusen nocoti

³⁸ Janohax Jesus, jaabo, boresscaax huetsa jema janin nococani. Jano cahen Marta janeyha ibo jihueneish. Jaan Mapehue hahquin jahuen xobon Jesus mapenon.

³⁹ Jahuen shara rihbi cahen janu jihuepanish, María janeya. Jesusen haxemahin nincacatsihqui cahen jaa patax tatsahoxon jan yohihi Marian nincaquin sirijaquin.

⁴⁰ Jahuen tee hichahiya Marta tee teeti. Piti qui jaa mehca mehcatai bi Marian nincarresquin. Martan sca yocacuin:

—¿Hea huesti hen tee teenon heen sharan hea yanapanyamahi min jisyamahin, Hihbon? Yohihue, jan hea yanapannon —hahquin Martan.

⁴¹ —Hicha tah min masa shinanai, baquen. Miin tee hichahi tah min jatsanai.

⁴² Huesti shinanyati ta jaiqui, Papan joi nincati res. Marian ta sirijaquin shinanax nincati queenihqui. Jan queenai ta tsoanbi bichintimahique —hahquin.

11

Papa yocati Jesusen haxemahi

(Mt 6.9-15; 7.7-11)

¹ Huetsa neten sca cahen huetsa janin caxon janoxon Papa yocanish. Papa yocacuin queyoscaiyah huesti jahuen haxenicaton yohiquin:

—Juaman ta jahuen haxenicabo Papa yocati haxemanishqui, Hihbon. Jascajaquin rihbi noque haxemahue, non Papa yocanon.

² Haxemahue hahcá jato haxemaque nescacajauin:

—Papa yocacatsihqui nescacajahue.

Papan, mia Papa Dios jai honanahbo jahue. Miin jihuetahbo non janon noque hihbojahue. Min naihoh hahcái quescajaribiquin neno rihbi hahhue.

³ Nea neten piti noque hinanhue, Hihbon.

⁴ Noquen hohcha sohuahue. Mihqui non hohchani min shinanyamascaí quescajaribiquin tah non joni huetsa tenexon noque qui tiromahibaan bi jato sirijaquin yohuanquihnaí. Jascajaquin rihbi noquen hohcha sohuaxon jaa shinanyamascahue, Papan. Satanashen noquen coshi tanatihu janin noque hioyamahue, Papan. Satanashen noquebihmayamahue

hahquin yocanahue —jato jaquin.

⁵ Jascajaquin haxemaxon sca jato yohiscaquin:

—Mihqui nocotaibo pimacatsihquish rah tah min yame pochinicon miin huetsan xobo janin caxon min yocatihi: Huetsan, quimisha pichanti pishca hea hinanhue, huetsan.

⁶ Noquenjenabo ta hocho quehax jahuex hehqui nocotaxqui. Jahuabi tah hen jato pimati yamahi.

⁷ Chichoxon sca cahen mia yohihan: Hea jatsanjayamahue. Heen xehpoti tah hen moa xehposcái. Heen baquebo rihbi ta moa hoxascaíqui. Mia hinantihi bi tah hen picotimahi *¿jhah* mia jatihiquin?

⁸ Nincatahi man. Mia jahuen huetsa que bi hinanti queenyamaxon bi ta min hihti yocacai copi mia hinantihiqui, min yocacai tihi.

⁹ Man honanon hihxon tah hen mato yohihi. Papa yocanahue. Mato ta hinantihiqui. Benanahue. Papan ta mato meramatihiqui. Xehpoti ton ton hahnahue. Papan ta mato quehpenxontihiqui.

¹⁰ Yocacai tihibichin ta bihtihiqui. Benahi tihibichin ta meratihiqui. Ton ton hahcai tihibi ta mapetihiqui.

¹¹ *¿Miin* baquebo mihqui caxon min mishquitanai yapa pishca mia yocacah bi min rono hinantihi?

¹² *¿Hatapa* bachi yocacah bi min nibo hinantihi?

¹³ Honannahue. Tiromaboxon bi tah man maton baquebo qui siribo hinanti honanai. *¿Man* yocacah maton naihoh queha Papan hashoan rihbi sca jahuen yoshin siri mato hinantimahiquin? —jato jaquin.

Yoshinyahpa tah qui hihquibo

(Mt 12.22-30; Mr 3.19-27)

¹⁴ Huetsa tian sca ta yoshiman bihni joni rihbi jahuen tiroma yoshin camaxon rohajishqui. Tiroma yoshiman hihbojaha joyo sca banenish. Joyo banenish bi jahuen tiroma yoshin camaha yohuanscái. Jan yohuanai jisish rahte rahtecani tsamajaquetaibo.

¹⁵ Caibo rihbi hahqui yohuaní:

—Quiquin yoshin Beelzebunen coshi hinanah ta tiroma yoshinbo camahi qui —hihcáni.

¹⁶ Caibaan rihbi sca jahuen coshi tanacatsihquín:

—Miin naihoh queha coshin hahxon noque jismahue —hahcanquin.

¹⁷ Yocacahbo bi jaton shinan honanxon Jesusen jato yohiquin:

—Jahuen jihuetahbó jaabo rahsi bi rehtenanaiya ta hapon yonoti queyotihiqui. Jaton caibo betan rehtenançanahibó ta queyonicabo qui, jahuabi yamascanon. Jaa copi honanahue. Satanasnen ta jahuentianbí jahuen hahbe yoshin tiromabó picotimahiqui.

¹⁸ Satanas hahbe Satanas betan rehtenanxon cahen jenquetsahxon bi sca jahuen yonotibo yonoyamahan. Jascama ta qui. Satanasnen coshiyaxon hen tiroma yoshinbo camahi hih man jai copi tah hen mato yohihi.

¹⁹ *¿Tiroma* yoshiman coshiyaxon hean tiroma yoshinbo camahi man jaiya, jahuatohon cahran maton baquebaan jato camahiquin? *¿Jenquetsahpa* shinanya man quin? Jaabaanbi ta mato yohiyaxihquiqui.

²⁰ Papan coshiyaxon tah hen hean yoshinbo camahi. Jaa copi honannahue: Papan jihuetahbó nete ta mato qui noco sca jaiqui.

²¹ Nesca tah qui, jisnahue. Coshi jonin cahen jahuen toohahtiyahpaxon jahuen xobo coiranán. Coiranah cahen jaho jaibo tsoanbi meheyamahan.

²² Hashoan coshi joni pari joxon ta xobo hihbo bilihxon jahuen toohahti bichinnica qui, jayaxon coiranti jaa xobo hihbaan shinanah bi. Jahu jahuaborabo rihbi bichinxon ta jahuenahbi jahuen jonibo qui sca jaan metisahpaquenica qui. Jascapah tah hen qui.

²³ Hehbe hihyamahax tah man henaboma qui. Hea tsinquiponyamaquin tah man jabismahi.

Joribinicayoshin

(Mt 12.43-45)

²⁴ Tiroma yoshin ta joni jenebahini cahax jano jahuabi jaitonma cahax jano jihueta benahi cahuan cahuani caxon bi merayamahax janohax hen jahui janin caribitanpan hihcähini cahiqui.

²⁵ Caxon ta matso siri sca jahuen xobo merascaíqui, bexojaxonah sca.

²⁶ Jaatian ta caxon hashoan tiromabó hahbe yoshin rihbi benatihiqui, siete hahbe yoshinbo. Jatihibi sca jahuex ta jaa jonin jointi janin sca jihuetahbó. Jaa copi ta jaa joni hashoan tiromacanahí sca jatihiqui, hicha yoshiman hihbojaha sca.

Jenimacointi

²⁷ Jato jascajaquin yohi yohihiya sca ta tsinquiponyamaquin tocanaxon huesti haibaan coshin yohinishqui:

—Mia baquexo bihni haibo ta hihti jenimati jaiqui. Mia chocho hahmani ta hihti jenimati jaiqui —hahquin.

²⁸ Jascajaha sca:

—Jaama bi ta Papan joi nincaxonbihcoinaibo caya, hahan jenimati jaiqui —hahquin.

Jahuen coshi jisti yocacaibo
(Mt 12.38-42; Mr 8.12)

²⁹ Hihti caibo sca nocohihntaiya jato yohiquin nescajaquin:

—Rahma ta jonibo shinan tiromayahpabo qui. Non mia nincanon hahan honanti noque jismahue hah tah man jai. Man jascarai bi ta huestijaquin res hahan honanti Papan mato jismatihqui, Jonas janí quescapah res tah man jistihi, jaa jisxon honanti.

³⁰ Jonas jisxon ta ninevitobaan honannishqui. Jaa Jonasbi ta hahan honanti janishqui. Jascapahribihi tah hen hea noquebaque hahan honanti qui.

³¹ Jonibo casticanpaqueti nete noco sca jaiya ta chiponquiha quiquin hapo yamanica nihxon rahma jai jonibo yohiyaxihqui: Mato tah man nincayosmabo qui hahquin. Jaa ta hocho quehax jonishqui, shinanyahpahaz Salomon yohuanai nincaqui jahui. Salomon hiphahoni mentan hashoan coshi shinanya rahma neno jai bi tah man nincacatsihyamahi.

³² Papan casticanti neten ta Níneve jema janin jihuapehonihsaan mato metoyaxihqui: Jonasen yohihah jaton shinan pontenihxon. Mato tah man noque mentan hashoan nincayosmabo qui. Jonas mentan hashoan nincati joinin mato yohihah bi tah man nincayamanihqui hah ta jayaxihcanihqui, mato yohiquin.

Non johue quescapahi
(Mt 5.15; 6.22-23)

³³ Tsoanbi tah non johue quetejaxon joneyamahi. Quetejaxon tah non quentipan mahpoyamarihbihi. Quetejaxon tah non jahuen tsahotinin tsahonai mapetaibo rahnichin jahuen xaba jisnon.

³⁴ Noquen yoran johue ta noquen bero qui. Miin bero siripaiya tah min xabapan nich. Miin bero tiromahiya tah min bahquish chian nich.

³⁵ Jistahi man. Maton shinan janin xaba jai man shinanah bi bahquishcahinmis.

³⁶ Miin shinan xabayahpa hihquish, jahuabi miin shinan bahquishihyamaha tah min sirijaquin xabajonah sca min jathihi, johuepan xabajaha quescapi —hahquin.

Jaton haxenicaboyabi Jesusen fariseobo cahehi
(Mt 23.1-36; Mr 12.38-40; Lc 20.45-47)

³⁷ Jascajaquin jan yohihiya, fariseo jonin sca:

—Heen xobon pih cahue —hahquin. Jascahah hahbetan cahax mapetax pih tsahopapqueti.

³⁸ Piriyamahax jan mechoquihyamahi quen fariseo rahteti.

³⁹ Rahtetaiton:

—Mato fariseobaan tah man chichoma maton tasonbo rahchoxon maton platobo rahchocai. Maton jointi nahpamehtan; jano tah man tiroma shinanbo bochohi, yometsohti shinanya hihti tiromabo shinanbo.

⁴⁰ ¿Maton mequen mato hinanxon maton jointi rihbi Papan mato hinanyamanishqui, honanmabon?

⁴¹ Maton jointiboyaxonbi jahuaborajomabo yanapancoinnahue. Jaatian tah man jahuabi sca rishtaya hihqui man shinanyamascatih.

⁴² ¡Hahrai! hih tah man jathihi, fariseobon. Maton haxe pehi romishin tah man texe Papa jahuena hinanxon, cahua meso rihbi texe pishca hinanxon, huai bimi rihbi texe hinanxon bi Papan yohihi quescajati man pishinmah. Joni huetsa yanapantih bi tah man tiromajahi. Joni huetsahon shinanti Papan mato yohihah bi tah man hahyamahi. Man hinanaibo Papa hinanquin jenebahinxonma caibo rihbi yanapantih bi tah man hahyamahi.

⁴³ ¡Hahrai! hih tah man jayaxihqui, fariseobon. Tsinquti xobo janin tah man hapobo tsahotai janin tsahoti queenbiresai. Jemanhihti janin tsinquijaquetaibaan mato saludanti rihbi tah man queenyorahi.

⁴⁴ ¡Hahrai, hahrai! hih tah man jayaxihqui. Mato tah man tsahonipibo quescapahbo qui. Tsahonipi manixon bi tah non jenquetsahpa pisi chicho jaiquin non honanyamahi —jato jaquin.

⁴⁵ Noquen Hihbaan jascajaquin yohihiya sca Moisesnin joi haxemanica huesti jano tsahoxon yohiquin:

—Maestron, jascajaquin yohiquin tah min noque rihbi cahehi —hahquin.

⁴⁶ —¡Hahrai! hih tah man mato rihbi jayaxihqui, haxemanicahbon. Jonibo hihuehhuan papima papimaquin hahcajaquin tah man joi tsamanxon jato yohihi. Yohixon bi tah man mato metotinin bocabi mehexon jato yanapanyamahi.

⁴⁷ ¡Hahrai! hihnoxihnahue. Maton papabaan ta Papan joi yohinicabo rehtepahonishqui, maton sca man Papan joi yohinicabaan tsahon qui tsahonxobojanom.

⁴⁸ Jascajaquin tah man maton shinanbo noque jismahi. Maton papabaan hahpahoni quescajariquipuun tah man shinanai. Jaabaan rehtenihbo tah man maton sca man tsahonxobojaxonai, hahbe rehtemisboxon.

⁴⁹ Jaa copi ta honanxon Papan yohihiqui: Jato qui tah hen heen joi yohixonnocaboya heen raantibo hean raanai. Hen raanah cahiton ta texe rehtexon texe rihbi tiromajayaxi-hcanihqui, hahquin.

⁵⁰ Rahma jihuetaibo yohihi sca ta Papan nescajaquin yohihiqui: Maton tah man heen joi yohixonnocabo rehtennihqui. Hen raanmenoni rehtennixon tah man rahma caman jato jatihibi rehtenpaquehi, hahquin.

⁵¹ Abel rehtennixon tah man caibo sca rehtexon, jato rehtepaquehi. Janoxon Papa yocaxonti janin jan nich que bi Zacarías sca rehtenoxon caman tah man jato rehtenpaquehi. Mato ta Papan casticanyaxihiqui, hih ca hen jai sen, jaton jimi man potamani copi.

⁵² ¡Hahrai! hih tah man jayaxihiqui, haxemanicahbon. Jayaxon Papa honanti huisha joiyahpaxon bi tah man honancatsihyamahi. Jascaxon tah man caibo rihbi sca man pantehi, honanpanan –jato jaquin.

⁵³ Jascabajahini caressca jan jaiya cahen jaton haxemanicahbo betan jaton fariseobo sina sinati.

⁵⁴ Hashoan sca yocacanquin. Jahuemeha jahuen yohuan copi non rehteti hahtipahtihin hihxon hicha yocacanquin.

12

Hahcointi Jesusen yohihi

¹ Quexehibaan bi hicha bi res jonibo jano tsinquijaqueti. Hihti caibo tsamatax, joni huetsa qui tsehquesihcanahi bohiboya jahuen haxenicabo Jesusen yohiquin, behna joi sca:

—Coirametahi man. Fariseobaan coro pahe mato qui mahnemis —hahquin, fariseobaan hahcoinicamati shinan yohiquin.

² —Rahma jonexon hahcaibo jatihibi ta Papan janibijaquin yohiyaxihiquipu. Jonetax hihquibo jatihibi ta jaan yohipaqueyaxihiquipu jatihixonbi nincakahbo.

³ Tsoanbi nincayamanon hihquish man bahquish chian yohuanni joibo ta xaba chianxon jaan jato nincamayaxihiquipu. Maton xobo chicho baxexai joibo ta xobo manixon coshin nincamaquin hahcajaquin jatihibi nincamayaxihiquipu.

Tsohqui raqueti

(Mt 10.28-31)

⁴ Caibaan ta mato rehtexon bi jahua hashoan mato tiromajati hahtipahyamahiqui, hea huetsabaan. Jascapahbo qui raqueyamanahue.

⁵ Huetsan ta mato rehtexon mato casticanti rihbi hahtipahiqui. Hahqui raquenahue, bixton chihi janin mato potamis. Hahqui caya raquenahue.

⁶ ¿Rabe soro copi non pichca hihsa romishin maroyamahin? Copi que ma bi ta jascapa mahuataiaya mi huestibi Papan jato shinabehnoyamahihqui.

⁷ Maton boo rihbi ta jahuentihiajiquin Papan honanahqui. Raqueyamanahue hah ca hen mato jai sen. Mato tah man hicha hihsa mentan hashoan copi qui.

Cristonahbo

(Mt 10.32-33; 12.32; 10.19-20)

⁸ Jonibaan nincanon hihquish Hea ta Cristonah qui hihquibo jatihibi tah hen hean rihbi Papan yonotibo tocanxon rihbi Jaabo ta hena qui, hen jatihi, jaabo yohihi.

⁹ Jonibaan nincanon hihquish Hea ta Cristonahma qui hihquibo rihbi tah hen Papan yonotibaan nincanonbi Jaabo ta henama qui hen jatihi.

¹⁰ Man hehqui tiromahi yohuanai bi tah hen jaa mato sohuaxonti hahtipahtih. Dios Yoshin qui man tiromahi yohuanai ta jascayamahi qui. Jaa ta hen mato sohuaxontimahi.

¹¹ Jaton tsinquiti xobo janin mato hiohax, jaton hapobaan mato casticannon hihquish quesahiboya, jahua yohuan japan, jahua hen yohithihin hihyamayaxahnahue.

¹² Jaatianbi ta Dios Yoshiman mato yohuan hinantihiqui —jato jaquin.

Masa shinantima

¹³ Jaatian, tsinquijaquetaibo tocan nihxon, huesti jonin yohiquin:

—Maestron, heen bocha yohihue, noquen papa yamanicaton jahuaborabo jan hea texe hinannon —hahquin.

¹⁴ —Maton jahuaborabo hinannicama tah hen qui. Mato jascajaquin ponteti ta Papan hea yohiyamahiqui —jaa jascajaxon tsamataibo sca yohirihbiquin:

¹⁵ —Jistahi man. Coiramenahue, jahuaborabo tsinquit shinan man bihmis. Maton jahuaborabo hichahax jihueta siriti shinanyamanahue —hahquin.

¹⁶ Jahan haxeti joi sca jato yohiquin:

—Huesti jonin cahen huai banahoxon tsama bi res bimibo tsinquiscaan.

¹⁷ Tsinqui tsinquihax ¿Jahuejascapan? Heen bimibo hichahi copi tah hen jahuerahnobexojatimascai, hihqui.

¹⁸ Shinanax sca, Heen jano bexojati xobobo huaxepaquexon hihihosí xoboja sca janoxahpan. Jascajati ta jaiqui. Jano sca heen beroboya heen bimibo tsamanquin bochojascaax tah hen jenimatih.

¹⁹ Hicha bari jihuexon piti tah hen tsinqui sca jai. Tanti tantihahnan pipi pipixon xeha xehascapan, coin coin, hih tah hen jatihi, hihqui shinamehti.

²⁰ Jahuen jointinin jan jascari yohanaiya bi ta Papan yohinishqui: Shinanjoman, nea yamebi tah hen mia muhuamanoxihqui. Min bexojahibo tsoa sca sihbotihiquin? hahquin.

²¹ Man jascapa honanma jamis, main jihuexon, hahan jihuexahpan hihxon tsinqui tsinquixon bi Papa janin hicha tsinquiyamahi —jato jaquin Jesusen.

Papan coiranaibo

(Mt 6.25-34)

²² Jahuen haxenicabo sca yohiquin:

—Masa shinanyamanahue, hih ca hen jai sen. Jahua pitima ta jaiqui, jahua pipan hihyamanahue. Chopá tah hen yamahi, jahua hen sahuetihin hihyamarihbinahue.

²³ ¿Pinoxon res non jihuetaín? ¿Chopá sahuenoxon res non yora Jain?

²⁴ Hihsabaan hahcái shinannahue. Jaabaan ta banayamahiqui. Bimi ta tsinquiyamaribicaniqui. Piyanoxon bexojacatsihxon bi cahen jahuerahnobi bexojati yamahi. Jaton bexojati xobo yamahi bi ta Papan jato piti pishinmayamahiqui. Mato tah man hihsabo mentan hashoan copi qui, hah ca hen mato jai sen. Papan ta mato jistihiqui.

²⁵ Heen shinaman bi hashoan queyanihpan hihquish bi tah min min queyanihtimahi.

²⁶ ¿Jascati hahtipahyamaxon jahuejanoxon man texe copi man masa shinantihin?

²⁷ Joabo rihbijenquetsahpabo hin hihxon shinannahue. Jaabaan ta yomenjayamahiqui. Chopá rihbi hahyamahax bi ta hihti siri rajotiyahpa qui. Salomon hicha chopá siribo japhonish bi cahen huesti joa betan senenyamanish.

²⁸ Joa ta nihi naman hicha jaiqui. Siripi hanihi bi tah non huajaxon jato mapojahi, copima quen. Copi que ma bi ta Papan jato hihti siri rajotibo hinanihqui. ¿Hashoan sca jan mato coirantihí man shinanyamahin? Shinancoinnahue.

²⁹ Jaa copi, Jahua pipan, jahua xehapan jayamanahue. Jahua copi bi masa shinanya manahue.

³⁰ Man jascapa pishinai ta Papan jisiqui, hah ca hen mato jai sen. Piti benahi, chopá rihbi benahi ta jatihibi nahuabo nihniciqui.

³¹ Maton tah man Papa queenai quescajaquin hahtih, pitiya chopabó jaan mato hinanon.

Non naihoh queha bexojatibo

(Mt 6.19-21)

³² Masa shinanyamanahue, baquebon. Mato man hicha jihuetaima bi ta Papan mato jahuen jihue hinanihqui.

³³ Maton jahuaborabo maromaxon yomanahitaibo yanapannahue. Queyoyosma coriqui quescapa bihquin hahcajaquin Papa janin queyoyosma jahuaborabo bexojanahue. Jano ta yometsohtimahiqui. Champon rihbi ta jano pihamantimahiqui.

³⁴ Jahua ra hihti queenxon cah man jano res shinanah.

Noquen Hihbo non manatihi

³⁵ Maton Hihbo manati shinan bihnahue. Chopá sahuxon johue quetejahax manatihi camahi quescanahue.

³⁶ Huanomahi catani jaton patoro yame jonoixihqui honanax ta jan nocoxon quenahi nincaxon manataibaan histon jahuen xobo xehpoti quehpenbohanxontihiqui.

³⁷ Hoxahaxma manataiton jaton patoronen jato merahah ta hihti jenimacantihiqui. Jaton hibbaanbi ta jato hahxonquin pitijaxonquin jato pimatihiqui, jaanbi jato metexpaquexonquin.

³⁸ Yame pochinicon joyamahax xaba paqueti hochoma sca joxon jato jascari manataiton merahah ta hihti jenimati jaabo jatihiqui, jahuerohahi tah non hoxayamahahqui hihqui.

³⁹ Man honannon hihxon tah hen huetsa sca mato yohihi: Jahua hora yometso jotihiquin honanxon cahen coiranxon xobo hihbaan yometso hihquimayamahan.

⁴⁰ Jascapa hoxan hihtima shinanya janahue. Hea nocotihu man shinanyamahi tianbi tah hen hea noquebaque mato qui nocotihu –jato jaquin.

Siri betan tiroma

(Mt 24.45-51)

⁴¹ –Jaa jaa patax queha joi yohuani min hihqui bi min noquebi yohihin, Hihbon? ¿Caibo rihbi min yohihin? –hahscaquin Pedronen.

⁴² Jascalah Jesusen yohiquin:

–Shinanyahpa ta jahuen hihbaan yohihi quescabijaquin hahxonai joni qui. Jascapha ta jahuen hihbaan yohitihiqui, jahuen jonibo jisxonti. Jato jisxonquin jaton pitibo jato hinanxonnon hihxon ta jato jisxonnahue hahbahintihiqui.

⁴³ Jahuen hihbo joxon sca jascajahiton merahah ta hahan jenimati jaresscatihiqui.

⁴⁴ Jascapa ta jahuen hihbaan yohitihiqui, jatihibi jahuen joniboya jahuen jahuabora jan jisxonscanon.

⁴⁵ Shinanyahpa hihyamahax ta heen hihbo ta basihi cahiqui hihxon jahuen hihbaan jonibo rishqui rishquixon jahuen teexonnicañ haibobo rihbi rishquixon, pixon, xehahax pahenscaiton sca jahuen hihbaan jisbenatihiqui.

⁴⁶ Joriyama ta jatihiqui hih jan jai tianbi ta hihbo sanarenentihiqui, hihbo nocorihtimahi jan shinanah bi. Joxon sca cahen caxquepaquexon nincayosmabo janin jaa potatihiqui.

⁴⁷ Jahuen hihbaan yohini quescabijati honanxon bi hahxonyamahi quen ta jahuen hihbaan hihti casticantihiqui.

⁴⁸ Honanyamaxon tiromajahibo ta hashoan hichama rishqui rishquiyaxihqui qui, hihti hahtihbi bi. Hicha mia hinannixon ta hicha rihbi mia hahquirihbi yocayaxihqui qui. Hicha mia hinantahnixon ta hicha rihbi mia bichinyaxihcanañhiqui.

Jesus copi join hihquinanai

(Mt 10.34-36)

⁴⁹ Chihi potahi tah hen main joniqui. Quetetax perehihna sca japhinon hih tah hen jai.

⁵⁰ Hihti tiromabó hen tenetihí tah hen honanáí. Histon huinopahinon hihxon tah hen tene tenehi.

⁵¹ ¿Huesti shinanyahax siripi jihuetaibo rahsi sca janon hea joni shinan man jain? Huetsajaquin shinanaibo qui huetsa shinanyabo rainyamanon tah hen joníqui.

⁵² Huesti xoboho pichca joni jihuetaix bi ta texe qui rabe rainyamatihiqui. Jascayamahiya ta rabe qui texe rainyamatihiqui.

⁵³ Huetsa ta jahuen baque qui rainyamatihiqui. Huetsa rihbi ta jahuen papa qui rainyamatihiqui. Huetsa haibo ta jahuen baque qui rainyamatihiqui. Huetsa rihbi jahuen mama qui rainyamahi. Yaya rihbi jahuen hihni qui rainyamahi. Hihni rihbi jahuen yaya qui rainyamahi –hahquin noquen hihbaan.

Hahan honantibo

(Mt 16.1-4; Mr 8.11-13)

⁵⁴ Jahuen haxenicabo jascajaxon, tsinquiaquetaibo sca yohirihbiquin:

–Jano bari hihquihi quiri jisxon nai cohin hanicanahi merahax tah man Hoi ta jahuiqui hihqui. Hihcoini. Jasca ta jatihiqui.

⁵⁵ Chiponquihañ nihue jahuiya tah man Rahma ta barinoxihqui qui hihqui. Jascacoinri-hibihi.

⁵⁶ Honanihcamañibon, ¿nihueya cohinbo jisxon jahua jatihiquin honanxon jahua copi sca man Papan yohihah jahua jatihiquin man honanyamahin, jan mato yohihah bi?

Noquen Hihbo betan non bexothi

(Mt 5.25-26)

⁵⁷ ¿Jahua jenquetsahaxon man matonbi shinanxon ponte res jihuetai shinanyamahin?

⁵⁸ Mia demandana juez janin caquin bahinxon bi mia demandanai betan bexohue. ¡Juez janin mia ninitana juezin sca jahuen porisia yohixon mia sipo xoboho rehuinmamis!

⁵⁹ Chicho tsahonah tah min copijabahinquin queyoyamahax janohax picotimahi –jato jaquin.

13

Shinan pontehax jihueticabo

¹ Jaatian Pilatonen hahni sca caibaan yohiquin. Galilea mai mehabaan roqui jaton yohinahbo rehtexonquin Papa mapojaxoncannish, Papa Dios hinancatsihquin. Jaton

yohinahbo mapojahiton bi roqui Pilatonen jato rehtenish. Rehtexon qui jaton jimin qui jaton yohinahbo nashimaquin, jonin jimiya sca maponon.

² Jaa chanihibo sca Jesusen yocaquin:

—*Jatihibi jonibo mentan hashoan hohchayahpabo quen Papan jato jascajani shinan man Jain?*

³ *Jascayama ta jaiqui. Maton shinan ponteyamahax tah man mato rihbi jascapahbo rihbi jayaxihqui, queyocahinscaibo rahsi.*

⁴ *¿Hoa dieciocho jonibo, jato qui jaton xobohhuanen paquequin bishtaxni cahran? Jatihibi ta mahuacannishqui. ¿Jatihibi Jerusalen janin jihuetaibo mentan jaabo hashoan hohchayahpabo hi shinan man Jain?*

⁵ *Jascayamahi rahan. Maton shinan ponteyamahax tah man mato rihbi queyocahinyax-ihqui.*

Bimijoma jihui

⁶ *Jato jascajaxon jaa patax queha joi sca jato nincamaribiquin:*

—*Huesti jonin cahen bimi jihui bananish. Bananish, bimiyahpa sca rah ta qui hihquish, cari carixon jisi bi jahuen bimi yamahi.*

⁷ *Bimi yamahiya sca jahuen huai teexonnica yohiquin: Jise. Quimisha bari sca tah hen bimi bihcatsihquish jori jorichai. Jahuabi ta yamahihqui, rahma caman. Rerascahue. ¿Jahua janon jaa nihtihiquin? hahquin.*

⁸ *Huesti bari pari jenetahhue, hihbon, mai cahuenbohanxon hen jaa naman tara payobo tsamanbohantannon.*

⁹ *Jascajaha bimihya jascabiscanon. Jascajahah bi bimiyamahiya tah non rerascatihi hahquin jahuen huai teexonnaica ton —hahquin.*

Cahcoya haibo Jesusen rohajahi

¹⁰ *Jato jascajahipish huetsa neten sca jaton tsinquitit xoboho Jesus mapexon jato haxemaribiquin, jaton tantiti neten.*

¹¹ *Jano tiroma yoshinhyahpa haibo rihbi mapeti. Yoshiman hihbojaha dieciocho bari sca hisini. Cahcopaquecanahi nihnica. Jenquetsahax bi pontetimahi.*

¹² *Jaa meraxon mequeman mehehax Jesus coshin yohuani:*

—*Rohascahue, chocan —hahquin.*

¹³ *Jan yohihah, pontecahin sca jai. Jascari rohacahinscaax Hahxon tah min hea jai, Papan, hihqui Papa Dios yohi.*

¹⁴ *Jaton tantiti netenbi Jesusen jaa rohajahiya jaton tsinquitit hihbo rainyamacahini. Rainyamaxon jano tsinquiaitaibo sinajaquin:*

—*Seis nete ta hahan teeti netebo qui. Jaa netebaan rahomehti benahue. Tantiti neten tah man rahomehimahi —hahquin.*

¹⁵ *Jato jascajahiton Jesusen sca pontejaquin yohiquin:*

—*Quesan, ¿xehpohipixon tantiti netenbi man maton vaca pecaxon, jaa hihyamahiya maton cabacho pishca pecaxon, hioxon man jene xehamayamahin?*

¹⁶ *¿Satanasneea haibo jisxon nexahah dieciocho bari nexá sca nichii quen non tantiti neten jaa rohajatimahin? ¿Maton caibo que bi nexá bi res janon man rohajamacatsihyamahin?*

¹⁷ *Jato jascajaha jano tsahobehcoinaibo hihtimahcahinscái. Jaabo hihtimanon bi texe tsinquiaquetaibo jenimahi. Jahuen coshi shinaman jan jato hahxonah quen hihti jenimacani.*

Moxo bero

(Mt 13.31-32; Mr 4.30-32)

¹⁸ *Jaa copi ta jato yohinishqui:*

—*Papan jihuematii jenquetsahpa quin, Jenquetsahpa hin nihxon tah hen mato yohihi.*

¹⁹ *Huesti moxo bero pishca quescapa tah qui. Jascapah non noquen huai chian banahah cahen hanicahuanscaax jihuiscái. Jihui tihopa sca jaiya cahen jahuen mebibio romishin janin hihsabaan nahajaquin.*

Hahan paan soohihmati

(Mt 13.33)

²⁰ *Hahquirihbi sca jato yohiquin:*

—*¿Papan jihuematii jenquetsahpa quin?*

²¹ *Jaa ta hahan paan soohihmati quescapa qui. Jascapa bihxon cahen tasa bocho misi janin haibobaan niahan. Jano niahah ta tasa bocho jatihobi soohihcahuaniqui —hahquin.*

Hanitahma xehqui

(Mt 7.13-14, 21-23)

²² Jaatian sca cahi. Jerusalen janin cahi caquin janobo jai jemabo janin banehuanax caribihiton sca:

²³ —Hihbon, ¿Papan jihuemahibo hichatahmabo quin? —hahquin huetsan.

²⁴ —Papan hani tahma xehqui huesti janin hihcoti shinannahue. Hicha ta Hihcopan hihxon bi hihcoti shinanyamahiqui.

²⁵ Xobo hihbaan jahuen xehqui xehpobohanscái bi tah man jeman nihxon sca xehpoti ton ton hahxon Noque quehpexonhue Hihbon man jatihi. Man jascaraontta Mato tah hen honanyamahi, jahuerahnkahbo ra tah man qui hah ta mato jatihi.

²⁶ Jaatian tah man Mihbetan tah non pipahoniqui, mihibetan rihbi tah non xehapahoni-hqui, noquen jemabo janinxon tah min haxemapahonihqui hah man jatihi.

²⁷ Jaatian ta mato yohiyaxihquiqui: ¿Jahuerahnkahbo mato quin? Hen tah hen mato honanyamahi. Nenohax botannahue, tiromabon.

²⁸ Jascajahá tah man huaohiyaxihqui. Abraham, Isaaque, Jacobo, Papan joi yohixon-nicahbo jatihibi rihbi, jaabo jatihibi Papan jihuetauhohax jaa janin jihuetai jisxon tah man hihi masa shinanbahinscatihi. Jato qui tah man hihcotimahi. Jatoma qui ta mato potayaxihquiqui.

²⁹ Caibo caya ta hocho quehax nocohihnyaxihcanihqui. Bari cainai quirihax, bari hihquih quiquirihax, reboquihax, chiponquihax, janobohax nocohihhnaxon ta Papan jihuetauhboxon jaa janinxon fiestajayaxihcanihqui, benahue Papan jato jaah.

³⁰ Jaatian ta rahma chini chinitaibo bebonicabo sca jatihi. Caibo rihbi rahma bebonicabo ta chinitaibo sca jayaxihquiqui —jato jaquin.

Jerusalen copi Jesusen benatai

(Mt 23.37-39)

³¹ Jato jascajahíya bi fariseobo sca nocoxon:

—Nenohax catanhue. Herodesnín ta mia rehtecatsihquiqui —hahcanquin.

³² —Hoa quexenica yohitannahue. Tiroma yoshinbo camaxon tah hen hisinaibo rahma rohajaxon, bahquish rihbi rohajaxon hoqueha bahquish sca hen janquenjayaxihqui.

³³ Jaabi tah hen rahma jari caparíhi. Bahquish rihbi tah hen caparinoxihqui, hoqueha bahquish rihbi tah hen caparixayihqui. Maton quiquin jema janinbi tah man tiromaboxon Papan joi yohinica rehtemathí.

³⁴ Jerusalen janinhahbon. Man hea nincacoinpahinon, Jerusalen janinhahbon. Papan joi yohinicabo rehtemisboxon tah man mato qui Papan raannihbo rihbi macaman tsacaquin rehtepahoniqui. Jahuentihi coti sca hen mato tsinqúimaha bi tah man queenyamahi. Hatapanen jahuen baque romishin tsinqúixon jahuen pehi naman jato pajaxajquin hahcajaquin hen mato tsinqúimaha bi tah man queenyamahi.

³⁵ Jistáhi man. Jahuen baquemabo sca man janon ta Papan mato jenehilihqui. Man tah man hea jisyamascatíhi, hen joribinon caman. Jaatian pari tah man yohuanyaxihqui, Papan baque ta híti shinanya nete hihbo jahuiqui hihqui —jato jaquin.

14

Tahsóhíhqui Jesusen rohajahi

¹ Jaa pecaho sca quenamaha huesti fariseo hapon xoboho pihi cahi, jaton tantiti neten. Jaa piquirinxon jahua hahxon non cahetihin hihxon jis jiscanquin.

² Jascapa tocánxon pihanan jisi bi huesti tahsóhíhqui joni rihbi jaa bebon tsahotai jai.

³ Jaton joi xeni haxemanicahoya jano jai fariseobo sca Jesusen yocauquin:

—¿Tantiti neten non rohajatihi? ¿Non rohajatimahin? Hea yohinahue —jato jaquin.

⁴ Yocacah bi jahua hihyamacani. Jahua hihyamahiboya sca tahsóhíhqui mehexon rohajaxon, caresscahue hahquin Jesuseñ.

⁵ Tsahohantaibo sca yohiquin:

—¿Maton baque mai poquin chicho paquetaiya, jaa hihyamahiya maton ganado mai poquin chicho paquetaiya tantiti neten que bi man histon bihtimahin?

⁶ Yocacah bi jahua yohiti honanyamacanquin.

Huanomahi canon quenamahibó

⁷ Quenamahabó ta pihi tsahocatsihquin hapobaan tsahotibo bihcatsihquibo rahsi jano janishqui. Jascapahbo rahsili jisxon, jaa patax queha joi sca jato yohiquin:

⁸ —Heen xobo janin pihi cahue hahca cahax jano jahuen hanibó tsahotihí janin tsahopaqueyamanahue. Mia mentan hashoan hapo rihbi quenamaxon mihqui sca caxon, Hori cahue, jaa neno tsahonon, hah mia jamis.

⁹ Jan mia jascalahá tah min hihtimahpax chini chini sca tsahoti catihí.

¹⁰ Jaa copi quenamaha cahax jano chinibo jaiton tsahopaquehue. Jaatian rah ta piti hihbo joxon sca mia Jari hapobo quiri tsahohihnarohahue mia jatihiqui. Jan jascajahiya ta mihibe quenamahabo jatihibichin mia shinanya hihqui mia jistihiqui.

¹¹ Hea rah tah hen caibo mentan hashoan shinanyahpa qui hihquibo jatihibi ta hihtimahyaxihqui qui. Hea rah tah hen caibo mentan hashoan jahuama qui hihquibo ta shinan siri Papan hinanyaxihqui qui —jato jaquin.

¹² Jaatian sca jaton piti hihbo sca yohiquin:

—Pihu benahue hahnoxon pitijaxon miin hamicobo quenamayamahue. Miin huetsabo rihbi quenaxxonma, miin jenabo rihbi quenaxxonma, mihibe coriquiyahpabo rihbi quenamayamahue. Mia pimanoxon copiquin sca mia quenamaribicanmis.

¹³ Hichaxon pitijacatsihquin, jahuaborajomabo, tobi pishcabo, chantobo, benchebo, jascapahbo quenamanoxahnhue.

¹⁴ Jaabaan mia pimaquin copiti hahtipahyamahi quen tah min hahan jenimati jaresscatihi. Jahuen baquebo Papan huenihhnixon ta mia hahan jenimati hinanyaxihqui qui —hahquin.

Hichaxon pih benahue hahca joyamahibo

¹⁵ Jato tocan pihii tsahotax huetsa joni sca yohuani:

—Papan jihue janinxon pihibo ta hihti jenimatihiqui —hahqui.

¹⁶ Jascalah:

—Piti fiestajayanoxon cahen huesti jonin hicha jonibo quenamahan.

¹⁷ Jahuen piti hihres sca jaiya sca jahuen joni raanquin, jan quenamahipibo yohinon hihxon. Raanah, Benahue hih ta jaiqui, Ma ta hihresscapiro hahquin jato yohibonaquin.

¹⁸ Yohihah bi huesti cacatsihyamahi. Jaa cacatsihyamahiya jatihibi sca cacatsihyamas-cacani. Jan yohimenohah cacatsihyamaxon joi bichinscaquin: Huai tah hen marohipiqui. Pihu catastin tah hen heen huai jisi cahi. Pihu cati tah hen hahtipahyamascai hahquin hea yohixontanhue hahquin.

¹⁹ Huetsan sca: Hean tah hen diez toro marohipiqui, rabexon nininicabo. Pihu catastin tah hen rahma jato tanahi cahi. Pihu cati hen hahtipahyamascai piti hihbo yohixonhue hahquin.

²⁰ Huetsan rihbi sca: Hen tah hen haibo bichipiqui. Jaa copi tah hen cati hahtipahyamascai hahquin.

²¹ Jato yohitani nocoxon sca, jaabo yohuanai jahuen patoro yohiquin. Yohiha jahuen patoro rainyamasca: Rahmabi caribitanhue. Bahin nichibo janin sca caxon jano jaibo, jema quexabi nichibo rihbi yohitanhue. Jahuaborajomabo, tobi pishcabo, benchebo, chantobo jaabo sca yohixon hihuetanhue hahquin.

²² Jascajatani joxon sca: Min yohihah quescajaquin non hihuehah bi ta piti hicha pari jaiqui, hihbon, hahquin jahuen jonin.

²³ Jemama qui sca caxon, min bahinxon behchihibo sca bihxon tapasoho jihuetaibo rihbi hihuetanhue heen xobo bochoscanon.

²⁴ Non quenamamenohibaan ta jahuabi noquen piti tanatimabiresiqui hihca hen jai sen hahquin.

Shinanquin sirijahax hinamehcointi

²⁵ Jascajaquin jano tsahotaibo Jesusen yohihiya hihti caibo sca hahqui nocohihnati. Nocotaibo sca jaan yohiquin:

²⁶ —Maton papabo jistahihmaxma hehqui jahuibo ta heen haxenicabo jatimahiqui. Maton papa, maton mama, maton haibo, maton baquebo, maton huetsabo, maton chocabo jistahihmaxma, maton yoshin rihbi jistahihmaxma tah man heen haxenicabo jatimabiresai.

²⁷ Hea retehibaan bi tah hen heen Hihbo jenetimahi hihnahue. Jascaxon nincacoin-nahue. Jascjayamaxon tah man heen haxetibo jatimahi. Man shinannon hihxon tah hen yohihi.

²⁸ ¿Xobojacatsihxon, jahuentihi copitihiquin, heen coriqui senentihiqui hihxon man shinanquin sirijaxon pari xobojayamahin?

²⁹ Shinanquin sirijayamaxon xobo jihuibo nichinxon bi janquenjati min hahtipahyamahiya ta jisibaan sca mia hosantihiqui.

³⁰ Hoa jonin ta xobojacatsihxon bi janquenjati hahtipahyamahiqui hih ta jaticaniqui.

³¹ ¿Quiquin hapobo rihbi habhe quiquin hapo betan retenenai canoxon tsahotahxon veinte mil sонтарояхпа hahqui jahui bi diez mil pishcayaxon jaa tenetihin hihxon sirijaquin shinanyamaparaihiqui?

³² Tenetimahi shinanxon ta hoa huetsa hocho pari jahui bi comision hahqui raantihiqui jenquetahax non bexotihin hihxon.

³³ Jascajaquin rihbi shinanquin sirijaxon maton jihue jatihibi jenebahinyamahax tah man heen haxetibo jatimabirestihi.

*Tashi jahuijoma
(Mt 5.13; Mr 9.50)*

³⁴ Tashi ta siri qui. ¿Hahan non pitijacatsihqui bi noquen tashi jahuiyamascaiya, jahua-tohon sca non noquen piti jahuijatihi. Non tah non hahtipahyamascatihu.

³⁵ Jascapa tashi tah non hahquiribi mai sca hihnon hihxon noquen banabo janin minchintimahi. Non payomacatsihquin piti huecax potahi janin rihbi tah non jascapa tashi tsamantimahi. Jascapa tashi tah non potaresai. Hahan nincati pabinquiyahpaxon nincanahue.

15

*Manónica carnerobo
(Mt 18.10-14)*

¹ Jaatian sca cobranmisbo betan hohchayahpabo rahsi sca became. Jesus yohuanai nincáqui became.

² Jascapa hahqui nocotaiya fariseobo betan jaton xenibaan joi haxemanicahbo hahqui yohuansca. Hohchayahpabo sirijaquin bihxon ta jascapa betan pihiqui, hihcana.

³ Jaa copi ta jaa patax queha joi jato yohinishqui:

⁴ –¿Cien carnero jaax bi huesti manotaiya, jaa manotai huesti benahi canoxon man texe noventinuve janobi jenebahini caquin, man benahi sca cayamahin?

⁵ ¿Meranoxon caman man benahi cayamahin? ¿Meranoxon man jenimahanan papibehnnitamahin?

⁶ ¿Xoboho nocoxon sca maton jenaboya mahbe jihuetaibo quenaxon, Jahuerohajaquin tah hen heen carnero baque manotai bi merahahqui, Jenimanonhue hah man jatimahin?

⁷ Jascarihbibi ta naihoh quehax jenimacaniqui. Huesti hohchaya jonin mainxon jahuen shinan pontehiya ta jenimacaniqui. Noventinuve jaton shinan ponteti pishinyamahi shinanibohon jenimayamahax bi huestichin jahuen shinan pontehiya jenimacani.

Coriqui manotai

⁸ ¿Jascarihbibi ta huesti haibaan diez libra jaxon bi huesti manomaxon, johue quetejaxon xobo matsoquin sirijaxon meranoxon caman benabonatimahiquin?

⁹ Meranoxon sca jahuen jenaboya jahuen hahbe jihuetaibo quenaxon Jahuerohajaquin tah hen hen manomaha coriqui hen merahahqui, jan jatimahiquin?

¹⁰ Jascarihbibi ta mainxon huesti hohchaya jonin jahuen shinan pontehiya Papan yonotibo jenimacaniqui –jato jaquin.

Bexnanya haibo copi coriqui potaresai beronan

¹¹ Huetsa rihbi sca jato yohiquin:

–Huesti joni cahen rabe bebo baque janish.

¹² Haniscaxon cahen jahuen chini baquen jahuen papa yohiquin: Papan, texe hena hihnon min mahuaquin potabahinyaxihqui hea rahmabi hinanscahue. Jascajaha jahuen baquebo hinantijaxon jaa sca jahuela hinanscaquin.

¹³ Jahuuenahbo jatihibi bichipish jaabiyyahpa caresscrai, hocho sca huetsa main cahi cahi. Cahi nocoxon sca bexnanbo maroquin. Haibobo copi rihbi jahuen coriqui potaquin queyobahinquin, jahuabi yamascanon.

¹⁴ Jaa maibo jarin piti pishin sca jaiboya, jaa rihbi pihan hihscai.

¹⁵ Pihan hihxon janoha joni patorojascaquin. Jahuuen patoronen sca jaan jahuen cochibo pimahi canon jahuen pasto chian sca raanquin, cochi coirantanhue hahxon.

¹⁶ Tsoanbi piti hinanyamahah, pihan hihquish cochin piti bimi romishin piti shinan-bahinquin. Jascapah que bi yanicahinnoxon caman piti shinanquin.

¹⁷ Jaatian sca shinanquin sirijahax, Heen papan jonibo hichahi bi ta jaton piti pishinyamahiqui. Neno ca hen pitin mahuacatsih sca jai.

¹⁸ Rahma ran heen papa janin hea caresscatihu. Nocoxon tah hen yohitihi: Papan, noquen Papa Dios qui hohchatah tah hen mihqui rihbi hohchatai.

¹⁹ Tiroma copi tah min hea Baquen hahtimascrai. Miin joni quesca sca hea jahue.

²⁰ Jascatanpan hihcahini sca caresscrai, jahuen papa janin cahi cahi.

Nocoti jahui bi hocho pari hihquiya manan huinoquihrani jahuiton jahuen papan meraquin. Jointi xecahihnxion hahan hihti shinanax bishquihihcanahi caxon jahuen baque hicotanxon betsohahquin.

²¹ Hicotanah sca: Papan, noquen Papa Dios qui hohchatax tah hen mihqui rihbi hohchanihqui. Hea tiroma quen tah min hea Baquen jatimascai hahscaguin jahuen baquen.

²² Jascahah bi yosibaan jahuen jonibo yohiquin: Sahuemanoxon tari siriya berinahue. Meheseshtiya joxon mehesennahue. Sapato rihbi bexonnahue jan sahuenon.

²³ Non xoamarasihi toro baque bihtannahue rehtenoxon. Hicha pitijaxon pih non coin coinnon.

²⁴ Nea heen baque ta mahuanish bi jihuerihbiscaiqui. Manonish hen shinahan bi tah hen heen baque merahahqui, jato jaquin. Jenimascai, jahuen papa.

²⁵ Jahuen baque bebo quihah teeti. Huai chian teetanax joresscaquin bi xobo hohchamaxon sca rehuen behua behuáhíbo nincaquin.

²⁶ Jahuen papan joni huesti quenaxon sca yocaquin: ¿Jahua copi jascacaniquin? hahquin.

²⁷ Jochica ta nocotaxqui. Jaa copi ta toro xoa pishca papan rehtehaxqui, jaa siripi nocotai quen hahquin.

²⁸ Honanscaax jahuen bocha rainyamahax xoboho hihcocatsihyamascai. Picoxon jahuen papan Johue, Johue hahca bi joi bichinquin:

²⁹ Jahuentihí bari sca hen mia teexonai bi tah min heen hahbe rabetibo betan hen jenimanon jahuentianbi hea chibo baque bocabi hinanyamanihqui. Basi teexonquin bi tah hen jahuentianbi mia nincayama yamanihqui. Hea teemis que bi tah min hea jahuabi rehtexonyamaniqui.

³⁰ Hoa miin baque jahuen hahresti haibobo janin caxon miin coriqui queyontanax jahuiya cah min noquen toro xoa rehtexonah, hahquin.

³¹ Jaatian sca: Mia tah min jascabihí hehbetan jihuetai, baquen. Hea jai jatihibi rihbi ta mina qui.

³² Jan jahui quen non coin coinax jenimaha ta siri qui. Miin jochica ta mahuanish bi jihuerihbiscaiqui. Manonish bi ta rahma hahquirihbi merahah sca qui.

16

Patoronen joni tiroma

¹ Jascajaxon jahuen hexanicabo sca Jesusen yohirihbiquin:

—Huesti coriquiyahpa joni cahen janish, jahuaborayahpa joni. Huesti neten sca ta chanicannishqui: Miin jahuabora coirannicahton ta miin coriqui mia queyonihqui.

² Jascaraiboya jahuen coirannica quenamaxon jahuen hihbaa cahescaguin. ¿Hihcoini yohuancaniquin? Hen mia hinantahni coriqui topopaquehue non jisnon. Heen coiranxonica tah miin jatimascai hahquin.

³ Jascahah shinamehti: ¿Jahuejascapan? Heen patoronen ta hea heen tee hea bichiniqui. Yosmaxon tah hen horo horoti hahtipahyamahi. Yocamis sca hihtihi bi tah hen yocati hiitmahpai.

⁴ Hen honanai quescajaquin hahpan, heen tee jan hea bichinai bi caibaan sca sirijaquin jaton xoboho hea jihuemahabo hihcahini sca caxon jahuen patoro ribinai jonibo sca quenamaquin.

⁵ Jahuen patoro ribinaibo quenamapaquexon sca: ¿Jahuentihí min heen patoro ribinain? hahquin, jan quenamamenohi.

⁶ Cinco mil botella olivo xeni tah hen ribinai hahquin. Tsahohue, miin hahan huishatibihxon tres mil botella min copijascái huishahue hahquin.

⁷ Huetsa rihbi sca yocaquin: ¿Mian cahran? ¿Jahuentihí min ribinain? hahquin. Hean tah hen mil tasa trigo ribinai hahquin. Miin huishatibihxon ochenta res min ribinai huishahue hahscaguin.

⁸ Jan jascajahi chanihibo nincacax sca jahuen patoro yohuani: Jaa ta yometsohti honan qui hihqui, coirannica yohihi jascari. Jascapahbo rihbi ta mai mehabo qui. Jaton caibo jatohon queenon hihxon ta nea mai mehabaan hahquiqui, xaba baquebo mentan hashoan honan ta jacaniqui.

⁹ Maton rihbi rah tah man yometsohxon, jaa coriquinin sca jonibo hesetihí, maton coriqui queyo sca jaiya jaabaan sca jaton queyoyosma jihue janin mato jihuemanon — hahquin fariseobo yohiquin.

¹⁰ Hicha tahma hinanah, jayaxon sirijaquin hahxon tah man hicha hinanah jayaxon sca sirijaquin hahtihi. Hicha tahma hinanah bi jayaxon tiromajaquin hahxon tah man hicha hinanah sca jayaxon rihbi tiromajatihi.

¹¹ ¿Nea mai meha jahuaborayxon man sirijaquin hahyamahiya tsoan sca mato naihoh queha jahuaborabo hinantahtihiquin?

¹² ¿Caibaana man jaton jahuaborabo coiranxonquin sirijayamahiya tsoan sca mato matonah hinantihiquin?

¹³ Patoroyahpaxon tah man jaa sirijaquin teexonhanan huetsa patoro rihbi sirijaquin teexontimahi. Huetsa queenxon tah man huetsa sca jistahimatihi. Huetsa hahxonquin sirijaxon tah man huetsa sca nincayamacatih. Maton Papa Dios hahxonquin tah man jahuaborabo rihbi tsinqui tsinqui hahtipahyamacatih –jato jaquin.

¹⁴ Jan yohihi jatihibi nincaxon bi yohuashihboxon hosancanquin fariseobaan.

¹⁵ Hosanaiba sca jaan yohiquin:

–Man siribo hihqui jonibaan shinanahbo hihquish tah man siripihamahi yohuanai. Siripi yohuanihcama man jai bi ta maton shinanbo Papan honanihqui. Hihi siri tah qui hih jonibo jai que bi ta jascapahbo shinanyabo Papan jistahimahihi.

Papan jihuemati

¹⁶ Juan jonon caman ta Moisesnin huishani joibo janishqui, Papan joi yohixonnicaabaan yohini joibo rihbi. Juan Joni pecaho tah non Papan jihuetaahboti joi siri sca non yohihi. Jaa copi ta histon sca jahuen jihuetaahbo sca jacobaniqui. Nincati queenaibo rahsi.

¹⁷ Papan joi ta queyotimahihi. Naiya mai queyókahinyaxihqui bi ta ni huesti teque pishcabii jahuen joi manotimahihi.

Haibo potatima Jesusen yohihi.

(Mt 19.1-12; Mr 10.1-2)

¹⁸ Miin haibo potaxon huetsa sca bichish tah min hohchayahpa sca jai, noquen Papa qui tiromahi. Huetsa jonin potahah haibo bichish tah min jascarihihi, noquen Papa qui hohchayahpa sca jai.

Lázaro betan hani patoro

¹⁹ Huesti joni cahen coriqui hicha bi res janish. Yanconihboya joxonihbo jahuen quiquin chopabo sahuexon cahen jatihibi neten hihi nohuenihbo pipipahonish. Jenimahanan jihueta can.

²⁰ Jahuen xoboho jaa jascari jihuenon cahen jemanhihi hoque huesti yocamis janish. Patoronen xobo xehqui janin cahi bahin potahahbo racati, jahuen yora nobepan rahbojocatax hisini racati.

²¹ Racatax sca: Haitara, jahuen misa janinhax paquetai teque romishin hea hinanpahin-non, hahan hen pihiiyanicahinon, hihqui pihan hihquish.

²² Jascari jaax mahuascai. Papan yonotibo sca joxon jano Abraham siripi jihuetai janin jaa hioscaquin, jano sca siripi jihuenon. Coriquiyahpa rihbi sca mahuati. Mahuatai mihincanquin jonibaan.

²³ Jano jascapa bexojati janinxon sca hihi hisin hisinxon hoque jisxon hocho Abraham meraquin. Lázaro rihbi hahbetan pihii tsahoti.

²⁴ Abraham quenaxon sca: Hehon shinanhue, Papan. Lázaro raanrohahue, jahuen metoti rebo pishca jenen mehchajaxon jan heen jana matsijaxonnon. Nea chihin ta hea jeneyamahihi. Hihi tiroma hisin tah hen jai, hahquin.

²⁵ Shinanhue, baquen. Jihueparihax tah min siriboyahpa janiqui. Lázaro cahen tiromabo rahsi. Rahma cahen pihihue hahca nenoxon pihii jihuetai. Mia cah min hisin jaroma teneti jai.

²⁶ Hono naponbi rihbi ta hihihosii xanquen jaiqui, jenquetsahax bi neno hax jari tsoabi botopaqetimahi. Jarihax rihbi tsoabi neno poqueuihriani jotimahi, hahquin Abrahamen.

²⁷ Jaatian hihi yocaribiscaquin: ¡Hahrai, Papan! Jascahiya heen papan xobo janin jaa raanrohahue.

²⁸ Pichca ta heen huetsabo jaiqui. Raanrohahue, caxon jan jato yohi yohinon, nea hihi tiroma janin joyamahabo, hahquin coriquiyahpa hihpahoniton.

²⁹ Moisesnin huishani joibo ta jaabo jaiqui, Papan joi yohinicabaan huishani joi rihbi. Jaa joibo jaabaan nincacoinnon, hahquin Abrahanen.

³⁰ Jascahah: Jaa joi ta nincayamacaniqui, Papan. Mahuatipish bi jato qui huesti cahiya pari ta nincacointicaniqui, hahquin.

³¹ Moises nincayamaxon, Papan joi yohinicabo rihbi nincayosmaboxon ta huesti mahuatipish bi hahquirihbi jihuexon jato yohihah bi nincatimarihbicaniqui, hah sca Abrahanen jaa janon –jato jaquin.

¹ Jascajaxon jato yohirihbiquin:

—Hahan hohchati shinanya ta jotihiqui. Man jaa jotimajati hahtipahyamahi bi ta jaa jomahi joni hihti sai saihihyaxihquiqui, casticannah.

² Hohchati shinan hinanyamanon macan renti tenexxon jenenencanya potahah cahen hashoan siriquehahni.

³ Coiramenahue. Miin huetsa hohchataiya pontejaquin yohihue. Shinanquin sirijahiya sca sirijaquin yohuanquihnhue.

⁴ Mia tiromajaxon bi Hen tah hen tiromajahahqui, huetsan. Pontejaquin sca tah hen shinanai mia jaah tah min sirijaquin yohuanquihntihi, jan mihqui tiromahah tah min shinanyamascatihu. Huesti neten mia siete coti jascajaha bi tah min hahxontihi —jato jaquin.

Nincacointi shinan

⁵ Jascalah:

—Hahan nincacointi shinan noque hashoan hichajaxonhue, Hihbon —hahcanquin.

⁶ —Moxo berotihopa shinan pishcayahpxon man nea huishtinanti jihui yohixon Mexcahinax hian janin cayacahintanhue man jaah cah man yohihah quesa sca jaquehahni.

Noquen Hihbo non hahxoncointi

⁷ Patoroboxon man yonohah, maton joni huai chian teebahinahax jascayamaxon maton hinabo pimaxonax xobon sca jahuiton sca man Johue, mapexon piresscahue ¿hah man jatin?

⁸ Hea pitijaxon sca johue, hahqui mehca mehcaxon hea bexonhue, hen pixon xehanon. Jascajaxon pari mian sca Pinoxahnhue, xehanolahnhue, ¿hah man patoroboxon jatinmahin?

⁹ Man yonoha jan hahcaiya, Hahxon tah min hea jai, ¿hah man jatin?

¹⁰ Maton jonin mato hahxonai quescajaribiquin maton Hihbo hahxonnahue. Maton hihbaan mato yohiha jatihibi hahcax Noque tah non tiromabo teexonnicaahbo qui. Jan noque yohihah res tah non hahcai, hihnahu —jato jaquin.

Diez sipiyahpabo Jesusen rohajah

¹¹ Jaatian sca Jerusalen janin sca cahi cahi. Galilea mai senenbi cahi, samaritanobaan mai quetanpaquebahini cahi.

¹² Jaton jema huesti qui nocoxon sca sipiyahpabo jahuibo behchiquin. Diez joni, sipiyahpabo rahsi. Jesus merahax, hocho nihxon coshin quenacanquin:

¹³ —¡Maestron, Jesusen, noquehon shinanrohahue! —hahcanquin.

¹⁴ Jato jisxon:

—Man rohahi sacerdotenin jisnon jismatannahue —jato jaquin. Jascalah boresscacani. Bahin caquin jisi bi jaton sipi rohacahinscái.

¹⁵ Rohahipibo bi huesti res joribibi.

—Papan ta hea hihti hahxonihqui —hihonahi jahui. Nincacahbo hihquish coshin yohuani.

¹⁶ Jesus qui nocoxon sca hahqui betihihpaquexon:

—Hihti hahxon tah min hea jai, Hihbon —hahquin. Jaa joni cahen samaritano.

¹⁷ —¿Rohascaibo diez hihiyamahipishquin? ¿Texe cahrán?

¹⁸ —Caibo jononma nea nahua huesti Hahxon tah min hea jai, Papan hihonahi jahuiquin? —hahscäuquin Jesusen.

¹⁹ Jascajaxon jaa yohiquin:

—Huennitax caresscatanhue. Hihcoinjaquin shina nax copi tah min siri sca jai —hahquin.

Hihbo joti hochomahiya jayaxihquibo

(Mt 24.23-28, 36-41)

²⁰ Jaa pecaho sca ta fariseobaan yocannishqui:

—¿Papan jihuematici jahuentian jotihiquin? —hahcanquin. Yocacahbo sca:

—Papan jihuematici ta jistimahiqui. Maton beron tah man jaa jistimahi.

²¹ Neabi tah qui, Hoa tah qui hih tah man jatimaribhi. Papan ta mato tocanaxon mato jihuematicihi.

²² Fariseobo jascajaxon jahuen haxetibo sca yohiquin:

—Huetsa tian tah man Noquen Hihbo noque betan hihpahinon, huesti nete pishca res jan hahquirilhi noque betan nihpahinon, hih tah man jayaxihqui. Hea jiscatsihxon bi tah man hea jisyamayaxihqui.

²³ Hoa tah qui hihiyamahax ta Neno tah qui hihiyaxihcanihqui. Jascalahbo bi jano yohihibo janin boyamayaxahnahue. Jato chibanyamayaxahnahue.

Baquebo Jesusen yocaxonai
(Mt 19.13-15; Mr 10.13-16)

¹⁵ Baquexobo rihbi ta hihuecannishqui, jan jato mehenon. Jaya jahuibo jisxon, jahuen hexenicabaan jato yohiquin, jascapahya beyamanahue, hahquin.

¹⁶ Pantehibo jisxon jato quenaxon:

—Baquebo hehqui jonon jenenahue. Jato panteyamanahue. Jascapa ta Papan jihuetahbo qui.

¹⁷ Hen mato yohinon nincanahue: Baquebaan Papan joi nincacoinai quescajaya maquin nincareaibaan ta Papan jihuetahbota hahtipahyamahiqui —jato jaquin.

Coriquiyahpa betan Jesus yohuani
(Mt 19.16-30; Mr 10.17-31)

¹⁸ Huesti hapon sca yocaquin:

—Siri Maestron, ¿jenquetsahax hen hea queyoyamanox manatihin?

¹⁹ —Jahua copi min hea siri yohihin? Tsoabi siri ta yama qui, Papa huesti res.

²⁰ Papan yohini joibo tah min honanai. Tsinyamahue. Joni huetsa rehteyamahue. Yometsohyamahue. Quesayamahue. Miin papan yohihah nincahue, miin maman rihbi yohihah nincagoon —hahquin Jesusen.

²¹ —Baque pishcaxon nincanixon tah hen rahma caman jaa min yohihi quescabijaquin hahcái —hahquin.

²² —Huesti jata sca tah min pishinai. Miin jahuaborabo jatihibi maromabahinxon jahuajomabo jaa coriqui hinanreshue. Jaatian tah min naihoh sca siri jahuabora jatihi. Jascajatanax hehbe johue —hahquin Jesusen.

²³ Nincaxon masa shinanscaquin, jahuen jahuabora hichahiya.

²⁴ —Coriquiyahpabo Papan jihuetahbota jaah ta hihti tee qui.

²⁵ Xohmox quini janin hahua huinomaha ta tee qui. Tee que bi ta coriquiyahpahhuan Papan jihue janin hihquiti hashoan tee qui —jato jaquin Jesusen.

²⁶ Jan jascahiya: —¿Coriquiyahpabo Papan jihuetahbota imahiya tsoabo sca non Papan jihuetahbota jatihin? —hahscacanquin.

²⁷ —Jonibaan jisíjenquetsahaxon hahtimahi bi ta Papan hahtipahiqui —jato jaquin.

²⁸ —Jise. Noquen tah non jatihibi jenebahinxon mia chibanaí, Hihbon. ¿Non queyoyamanox jihuetahmahin? —hahscacanquin Pedronen.

²⁹⁻³⁰ —Papan jihuematí joi bihcoinnxon tah man maton xobo potabahinai. Maton xobo, maton haibo, maton huetsabo, maton papabo, maton baquebo rihbi, jaabo jatihibi jenebahinxon tah man nea mainxon bi hashoan hihti caibo rihbi man bihtihi. Naihoh sca tah man queyoyamanox jihuerahbbitihi. Jatihibi potabahinax bi tah man hashoan sca jatihi —jato jaquin.

Jan mahuanoxihqui Jesusen yohirihbihi
(Mt 20.17-19; Mr 10.32-34)

³¹ Jahuen doce joni sca quenaxon:

—Nincanahue. Jerusalen janin tah non cahi cahi. Jano sca ta Papan joi yohinicabaan huishani joibo jai quescá sca jatihibi jaresscatihiqui, noquebaque hihqui bi hea yohihi joibo.

³² Hea ta nahuabo bihmayaxihcanihqui. Hosan hosanxon ta hea hicháyaxihcanihqui.

³³ Hea betoshbanhahxon ta rishquitinin rishqui rishquixon hea rehtescayaxihcanihqui. Hea rehtehipibo bi quimisha neten hihquish tah hen hahquirihbi hueníyaxihqui —jato jaquin.

³⁴ Yohihah bi nincayamacanquin. Jaabaan nincacah cahen honantima joi. Jahua hihcatsihquiquin honanyamacanquin.

Jericó benche Jesusen rohajahi
(Mt 20.29-34; Mr 10.46-52)

³⁵ Jaatian sca Jericó jema janin sca nocoti bocani. Jema hihcoti bahin bocani. Jaa bahi quexabi benche joni tsahoti. Coriqui yocaqui tsahoti.

³⁶ Huinojaquetai nincacax yocacahti:

—¿Tsoabo man huinotain? —hahquin.

³⁷ —Nazaret janinhah Jesus ta huinotihqui —hahcanquin.

³⁸ —Jesusen, Davidi baquen, hehon shinanhue —hahquin, coshin.

³⁹ Hahbe huinotaibaan sca: —Netehue. Netehue —hahcabio bi hashoan sca sai saihihqui:

—Davidi baquen, hehon shinanrohahue —hahquin.

⁴⁰ Nihrenenxon sca:

—Jaa neno hihuenahue —hahquin Jesusen. Hihuehah, jaa senenbi nichiton sca benche yocaquin:

⁴¹ —¿Hen mia jahuejaxonti min queenain? —hahquin.

—Heen bero hea rohajaxonhue, Hihbon —hahquin.

⁴² —Jisresscahue. Hen mia rohajati min shinancoinai quen tah hen mia rohajasca jai —hahquin.

⁴³ Jaatian jahuen bero sircahin sca jai. Bero sircahinxon Jesus chibarbonahi caquin, Papa Diosen ta hea hihti hahxonihqui hihcanahi. Jaa jisish jathihi sca jascarihbibi; Papa Dios ta hihti siri qui hihcanacani.

19

Jesus betan Zaqueo

¹ Jericó jema nabebacahini cahi sca bocani.

² Jano Zaqueo janeya joni jai, cobrannicabaan hapo. Coriquiyahpa joni.

³ Jenquetsahpa hin hihxon Jesus jiscatsihqui bi jonibo tsamajaquetaiya jenquetsahaxon jistimahi. Queyanihmaxon jisti hahtipahyamaquin.

⁴ Bishquihihcanahi cahi. Jari Jesus huinoxihqui quiri cahi, jihuin hinacahini. Jesus jiscatsihqui hinacahinxon manaquin.

⁵ Hinatax manatai bi jaa jihui ponte sca nocoxon bejisihnixon bototi Jesusen yohiquin:

—Botopaqehue, Zaqueon, histon. Rahma tah hen miin xoboho tantihi cacatsihqui.

⁶ Botocahinax res sca hahbetan caxon jenimahanan jahuen xobon mapemaquin.

⁷ Jan janu mapetai jisish, jathihi reren rerenscacani.

—Hohchayahpa jonin xoboho mapetax ta janobi tantihiqui —hihcani.

⁸ Reren rerenibaan bi nihinaxon:

—Hihbon, texe heen coriqui hena hihnon tah hen jatíhi rihbi jahuajomabo hinannoxihqui. Paranxon hen bichinnihbo rihbi tah hen chosco coti jatíhi rihbi tsamanxon jato hinanrihbitihi, hihbon —hahquin Zaqueonen.

⁹ —Nea netenbi ta nea xoboho jihuetai joni Papan jihuemahiqui, queyoyamanox manascanon. Nea rihbi Abrahanen baque, can.

¹⁰ Manonihbo benahi tah hen nailoh quehax joníqui, jato jihuemanoxon. Jaa copi tah hen queyoyamanox manati yohihahqui —jato jaquin, Jesusen.

Patoronen coriqui hinanai

¹¹ Jato jascajahax Jerusalen hochoma sca nichiya sca:

—Jaa rah ta quiquin hapo sca Papan hihmanoxihqui. Jaa rah tah non rahmabi jisnoxihqui —hihcani. Jascajaquin shinanaibo quen jaa patax queha joi sca jato yohisacaquin.

¹² —Huesti hani patoro cahen hocho canish, janoxon quiquin hapo sca hihmahahbo. Quiquin haposcaax joribyanoxon cahi.

¹³ Cariyamaxon diez jahuen jonibo quenaxon joni tihibi coriqui hinantahquin, joni tihibi diez mil soles. Hinanaxon jato yohiquin: Hen joribinon caman jayaxon maroxon maromanahue hichajanoxon, jato jaquin.

¹⁴ Jan caresscaipi cahchiqui sca texe jahuen jihuetahabaan jaa jistahihmaxon comision raanquin. Jano jaton patoro cahi janinbi cahax nocoxon Jaa patoro noquen quiquin hapo hihti tah non queenyamahi yohihi cahabo hihxon comision raancanquin.

¹⁵ Jaabi, quiquin haposcaax joribixon sca jan coriqui hinantahnihbo quenamaquin. Joni tihibichin jahuentihi cananihquin hihxon jato quenamaquin.

¹⁶ Huesti joxon: Hihbon, min hea hinantahbahinni tah hen diez coti rihbi jatíhi rihbi hahcai, hahquin.

¹⁷ Min tah min sirijahi. Mia tah min siri joni qui. Hicha tahma hinanah bi tah min sirijaquin hahcai. Jaa copi tah min diez hani jemabo sca min hihbotihi hahquin jahuen hapon.

¹⁸ Huetsa sca jahui. Min hea hinantahbahinni coriqui tah hen pichca coti rihbi jatíhiribi hahcai, Hihbon, hahquin.

¹⁹ Mia rihbi tah hen pichca hani jemabo sca hinanai, min hihbonon, hahscäuin.

²⁰ Huetsa rihbi sca jahui. Joxon: Nea ta min hea hinantahbahinni coriqui qui, Hihbon. Chopan rahcoxon tah hen sirijaquin mia bexojaxonnihqui.

²¹ Mihqui raquexon tah hen bexojaniqui, Hihbon. Mia tah min sina qui. Mian jananihma tah min bichinai. Min banayamanih tah min tsinquirihbibi, hahquin.

²² Min yohuanai quescabija tah hen mia jatíhi, tiroman. ¿Hea sina hihqui min honanihquin? ¿Hen jananihmabo hean bichinain? ¿Heanbi banayamanihbo tsinquinica min hea honanain?

²³ ¿Jahua copi sca min heen coriqui jaya teenica hinanyamanihquin jan jaya teenon? Joxon cah hen heen coriquinin cananai hashoan hicha bibriguehahnae.

²⁴ Jano nichibo sca yohiquin: Jahuen coriqui bichinxon, diez tsama jai joni hinannahue.

²⁵ Jaatian: Ma ta diez jaresscapiro, Hihbon, hahcanquin.

²⁶ Jaa jaibo rahsi tah hen hashoan sca hinantihi. Jahuajomabo rihbi tah hen jan jai pishca hean bichintihi, hih ca hen jai sen.

²⁷ Hoa hea jaton quiquin hapoti queenyamahibo sca neno hihuolahue. Heen rahuibo tah qui. Heen jisnon bi jato rehtepaquetnahue. —Jascajaquin ta haxehahbo Jesusen jato jaa patax queha joi yohinishqui.

Jerusalen janin Jesus nocotai

(Mt 21.1-11; Mr 11.1-11; Jn 12.12-19)

²⁸ Jaa joi jato nincamahax Jerusalen janin sca cahi caribhi.

²⁹ Bettagéya Betania jemabo hochoma sca Olivo janeyahpa mahchi ponte nococani. Janoxon sca rabe joni raanquin.

³⁰ —Hoque racatai jema janin botannahue. Nocoxon tah man cabacho baque nexá meratihi, tsoabi jaa cahtsahonima. Pecaxon hahbenahue.

³¹ ¿Jahuejanoxon man pecahin? yocacah sca, Noquen hihbo ta pishinlhqui hihnahue —jato jaquin.

³² Raanah boresscacani. Cahi nocoxon jan yohiha quescabi meracanquin.

³³ Cabacho baque pecahiton sca cabacho hihbaan jato yocaquin:

—¿Jahuejanoxon man pecahin? —jato jaquin.

³⁴ —Noquen Hihbo ta nea pishinlhqui —hahscacanquin.

³⁵ Jascajaxon becanquin. Jaya noco sca jaiya sca, jaton chopra hahan pohenxon tsahotijacanquin.

³⁶ Jaa cahtsahotax cahiya sca caibaan rihbi jaton taribo pecaxon bahin mijanquin, hahan nihnon hihxon.

³⁷ Olivoya mahchi naman sca nocotaiya jahuen haxenicabo jatihibi jenimacanahi yohuanganahi, coshin bi res:

—Papan shinanyaxon ta hihti hahxonihqui —hihcanci. Papan coshiyaxon Jesusen jato hahxonrahsihji jispip jascacanxi.

³⁸ —Quiquin hapo ta jahuiqui, Papa Diosen janen ta jahuiqui. Shinanya siri tah qui. Papan ta noquehon shinanxon hahxonihqui. Noquen naihoh queha Papa ta hihti siri bi res qui —hihcanci.

³⁹ Caibo fariseobo rihbi jato tocan nihxon Jesus yohiquin:

—Jascayamanon miin haxenicabo netemahue, maestron —hahcanquin.

⁴⁰ —Jaabo netetaiya ta toa minchihhi macanbo coshin yohuanquehahnae —jato jaquin.

⁴¹ Mahchi cahpaquehxon hori Jerusalen jema racatai jisish Jesus jaya huaohihqui.

⁴² —jRahmabi Papa betan siripi jihueti man honanpahinon, Jerusalen janinhahbon! Jaa honantihi bi tah man benchebo qui.

⁴³ Tiromabo netebo ta mato qui nocoti jahuiqui. Mato qui tsequeti joxon ta mai tsamanxon mato chiquehahtanbohanxon mato tejatanbohanxon jatihibi janinxon mato tiromajayaxihcanihqui.

⁴⁴ Maton xobobo potojaquetanxon ta maton baquebo rehteyaxihcanihqui. Hahan xobojaqin man tsamanni macan ta ni huestibi huetsta macan cahchian tsahoyamascatihiqui. Mato jascajayaxahnnon bi tah man Papan mato rahma sirijacatsihqui man honanyamahi —jato jaquin.

Papan xobo janin tiromahibo jan camahi

(Mt 21.12-17; Mr 11.15-19; Jn 2.13-22)

⁴⁵ Jema janin hihcohax sca Papan xoboho mapeti. Mapexon janoxon maromahibo cainmabahinquin.

⁴⁶ —Heen xobo ta jahoxon hea yocati xobo qui hih ta Papan joi janin jaiqui. Nenoxon Papa yocatihi bi tah man jano yometsho tsinquitijahi —hahxon jato jabamaquin.

⁴⁷ Jatihibi neten sca ta jaa xobohoxon jonibo haxemanishqui. Jan haxemahiya cahen judiobaan hapobo betan jaton haxemanicahbaan jaa rehteti shinannish. Judio patorobo betan rihbi jascajaquin shinanxon bi jenquetsahaxon rehteti merayamacanquin.

⁴⁸ Jan haxemahiya nincacatsihqui jonibo hashoan hicha tsinquijaquetaiya cahen jenquet-sahxon rehtenoxon bihtimahi.

¹ Huetsa neten sca Papan xobohoxon jonibo haxemahanan jan joi siri yohihiya sca judiobaan hapobo mapeti jahui. Jaton hapobo, jaton haxemanicahbo, jaton yohuan hihbobo, jaabo rahsi jano mapeti jahui.

² Mapexon yocacanquin:

—¿Tsoan janen min jascajahn? ¿Tsoan jascajahue hahca min jascajahn? Noque yohihue —hahcanquin.

³ —Hean rihbi tah hen mato huesti yocatihu, maton pari hea yohinon.

—¿Tsoan yohiha Juaman nashimapahonnishquin? ¿Jonibaan yohihah nan, Papan yohihah nan? —jato jaquin.

⁵ Jascajaquin yocacah jaabo rahsibi yocacahanannancani:

—¿Jahua non yohitihin? Papan yohihah rahan hah non jaiya ta jahua copi sca man jaa nincayamanihquin hah noque jatihiqui.

⁶ Jonibaan res yohihah rahan hih non jaiya ta nea tsamajaquetaibaan noque macaman tsacaxon rehtetihiquin. Papan joi yohinica ta Juan janishqui hah ta jacanihqui jatihixonbi, hih ca hen jaihsen —hihcani, jaabo rahsibi yohuani.

⁷ Jascahahnanaxon sca:

—Tsoan yohiha jaan nashimanishquin, non tah non honanyamahi —hihcani.

⁸ —Man hea yohiyamahi quen tah hen tsoan yohihah hean nescajahin hean rihbi hen mato yohiyamahi —jato jaquin.

Huai teexonnicaahbo

(Mt 21.33-44; Mr 12.1-11)

⁹ Jaatian sca jaa patax queha joi sca jonibo yohirihbiquin:

—Huesti jonin cahen bimi huai bananish. Huajaxon ta teexonnicaahbo jahuen huai hinantahnishqui, canoxon. Hinantahbani cahi, hocho cahi caresscrai.

¹⁰ Basixon sca texe jahuen bimi bihxnonn hihxon hochoxon jahuen joni raanquin. Raanah nocotaiton sca hinantahnibaan rishquixon mequen sca camarihbicanquin.

¹¹ Huetsa rihbi jahuen joni sca raanrihbiquin. Jaa rihbi rishqui rishquixon roaxon mequen bi res camarihbicanquin.

¹² Huetsa rihbi sca raanquin, jahuen quimisha sca. Jaa rihbi tsehue tsehuejaxon potacanquin.

¹³ —Jahuejascapan? Hahan hen queenai heen baque sca raanpan. Jaa rah ta nincayaxih-caniqui, hahxon raanquin.

¹⁴ Jaa sca nocoti jahui jisish, yohinancani jahuen hinantahnibo. Jahuen papa yama sca jaiya ta nea sca huai hihbo hiyaxihqui. Rehtenonhue, jahuen huai noquena sca hinon hihcami.

¹⁵ Jascaxon huaima qui hioxon sca rehtecanquin. —Huai hihbobi joxon sca jahueja jaan jato jatihiqui?

¹⁶ Joxon ta jahuen hinantahnibo rehtepaqueyaxihqui. Jato queyobahinxon sca ta huetsba sca jahuen huai hinantihiqui —jato jaquin.

—Jascajayama jacanpahinon —hihscacani, nincacax.

¹⁷ Jato bejispaquequin sca:

—¿Nea huishani jahua hihcatsihqui? Jaa nahuita jihui ta tiroma qui hihxon xobojahibaan potahibaan bi ta jaabaan potahi jihui qui hean xobojacoinai hih ta jaiqui huishani joi.

¹⁸ Jaa nahuita jihui qui paquetaibo ta tobicahintihiqui, jatihibi. Caibo qui paquequin ta jaa jihuin jato champajabahintihiqui —jato jaquin.

Hapon cobranah non copijati

(Mt 21.45-46; 22.15-22; Mr 12.12-17)

¹⁹ Jato qui jan jaa joi yohihi honanxon ta jenquetsahaxon non jaa bihtihin hihxon jaton haxemanicahbo betan jaton hapobaan tanaxon bi bihti hahtipahyamacannishqui, jonibo qui raquexon.

²⁰ Noquen Hihbo nincacoinihcamahax manahihti cahabo sca caibo copijacanquin. Jaama joi yohuanmatannahue hahxon copijacanquin. Jaama yohihiton bihxnon tah non noquen hapo hinanscatihi, noquen gobernador rihbi hinanquin hahcanquin.

²¹ Nincacoinihcamaxon sca Jesus yocacanquin:

—Mian tah min sirijaquin yohihi, maestron. Pontejaquin tah min haxemahi. Tsohquibi raquexonma tah min jaabijaquin jatihibi jonibo yohihi. Papa qui cahi bahi tah min honammacoinai.

²² Noque yohihue: —¿Quiquin hapo Cesaronen noque cobranah non copijatihin? —Non copijatimahin? —hahcanquin.

²³ Paranxon yocacaibohi honanxon:

²⁴ —Coriqui huesti hea jismanahue. ¿Tsoan mapo jano jaiquin? ¿Tsoan huisha jano jaiquin? —jato jaquin.

—Cesaronena rahan —hahcanquin.

²⁵ —Jahuena hihquiya jaa hinannahue. Papana hihquiya tah man noquen Papa hinanribitihu —jato jaquin.

²⁶ Tsinquitaibaan jisiya ta jenquetsahaxon yohuanquihnxon bihtima jacannishqui. Jato joi bichinah neteresscani, rahtetax.

Jonibo hahquirihbi teehihtihquin hihquibo

(Mt 22.23-33; Mr 12.18-27)

²⁷ Saduceobo sca jahui, tsoabi ta mahuatax hahquirihbi huenitimahiqui hihnicabo. Jaabaan sca tanaquin yocaquin.

²⁸ Maestron, Moisesnra ta huishanishqui, noquen bocha baquejahaxma hihxonaiya non jahuen yononma bihxon hahqui noquen huetsa yamanica non baquejaxonti.

²⁹ Siete joni ta janishqui, jaa mama quiha rahsi. Bebo quihaton ta haibo bichish bi baquejahaxma mahuanishqui.

³⁰ Jahuen chini jaa bichish bi jascarihbibi.

³¹ Huetsa rihbi sca jahuen chini, jascarihbibi. Jatihibi sca jascarihbibi, baquejahaxma queyocani.

³² Hahchon sca ta jaton haibo rihbi mahuanishqui.

³³ Papan noque hahquirihbi huenihiya sca, ¿tsoan haibo jaa jatiquin? Jatihibichin jaa hahuinjani —hahcanquin.

³⁴ —Rahma jihuetaibo ta haibo bilmahahnaniqui.

³⁵ Papan caixon hahquirihbi jihuemahibo ta huanoyamascayaxihcanihqui. Huanomayamaribiquin.

³⁶ Jaabo ta mahuayosmaboyaxihqui. Papan yonotibo hihqui quescaribibi ta jayaxihcanihqui. Papan jato jihuemaha ta jahuen baquebo rahsi sca jayaxihcanihqui.

³⁷ Mahanicabo hahquirihbi hueniyosmabohi man shinanah bi ta huenínicabohi Moises-nin yohinishqui, nescajaquin: Hea tah hen Abrahanen Papa Dios qui, Isaaquena rihbi, Jacobona rihbi.

³⁸ Papa Dios ta mahuanihbaan Diosma qui. Jaa ta jihuetaibaan Papa Dios qui, Jaan jisi jatihibi japarihi quen —jato jaquin.

³⁹ —Hihcoini rahan —hih sca jaton haxemanica huesti jai.

⁴⁰ Hashoan yocati qui raquescaax jascari.

Cristo yocacahtai: ¿tsoan baque hea quin?

(Mt 22.41-46; Mr 12.35-37)

⁴¹ Netetaiton sca:

—¿Jahua jisxon Cristo ta Davidin baque hiyahixihqui jacanihqui?

⁴² Man jisyamahin, behua huishaquin ta jaa yohihi Davidinin yohinishqui:

Xaba hihbaan ta heen hihbo yohinishqui, Hea mecayahohi hihbohi tsahohihnahuea

⁴³ Miin rahuibo miin hinabo sca hihnon hen jato namanjanon caman neno tsahotihue hah cahen Davidinin janish huishaquin.

⁴⁴ Heen hihbo jan hihquiya ¿jenquetsahax res sca jahuen hihbohax bi jahuen baquetihiquin?

Judiobaan haxemanicahbo quescapahbo non jamis

(Mt 23.1-36; Mr 12.38-40; Lc 11.37-54)

⁴⁵ Jato jascajaxon jatihixonbi jonibaan nincanon sca jahuen haxenicabo yohiquin:

⁴⁶ —Jaton haxemanicahbo hihqui quesca man jamis. Coiramenahue. Jaton chopasiribo sahuehax jano jonibo tsinquijaquetai nihti ta costancaniqui, jisibo hihquish jano nich. Caibaan jato Hapon hahnon hihxon ta costancaniqui. Tsinquiti xoboho ta hapobaan tsahotibo janin tsahocatsihcanihqui. Pihi johue hahca ta xobo hihbo patax bi res tsahoxon picatsihcanihqui.

⁴⁷ Yononma meraxon ta tahtijaxon jahuen jahuarobabo jatihibi bichincaniqui. Parannquin ta Papa basi yocacaniqui, jatihixonbi nincanon hihxon. Jascapa ta Papan hihti casticanyaxihqui —jato jaquin.

21

Yononmanen coriqui pishinxon bi hinanai

(Mr 12.41-44)

¹ Jaatian sca coriquiyahpabo jano nich jisquin. Papa qui hinancatsihquin coriqui naneti bohnanti janin coriqui nanehi nichibo jisquin, hicha coriqui nanehibo.

² Huesti yononma sca joxon jahuen coriqui yamahi bi jahuen rabe coriqui romishin nanequin. Jaan nanehi jisxon sca Jesusen jato yohiquin:

³ —Hoa jahuaborajoma yononmanen ta caibo mentan hashoan hicha nanehiqui.

⁴ Hoabaan ta hicha bi res jaxon texe hinanihqui. Hoa yononmanen ta jatihibi pishinxon bi jan jai jatihibi hinanihqui —jato jaquin.

*Papan xobo potojaquetanyaxihquibo
(Mt 24.1-2; Mr 13.1-2)*

⁵ Jaatian Papan xobo yohihi caibo yohuani.

—Macanbo hihti siribo tah qui. Jise. Sirijaquin ta hahcannishqui, xobo siri —hihcani.

⁶ —Nea man jisi xobo ta potojaquetanyaxihcanihqui. Ni huesti macanbi ta huetsa caht-sahotimascatihqui. Potaquin ta ni huestibi pishinmayamayaxihcanihqui —jato jaquin.

*Noquen Hihbo jahui hahan honanti
(Mt 24.3-28; Mr 13.3-23)*

⁷ —¿Jahuentian jascajaxyaxihcanihqui, maestron? ¿Jahua jisxon non min yohihi quesa sca jacatsihqui non honantibio? —hacanquin.

⁸ —Coiramenahue, mato parancamis. Hea tah hen qui hihqui ta heen janen hicha joyaxihqui. Nete ta queyocatsihscainqui hih ta jaribiyaxihcanihqui. Jascascaibaan bi jato nincayamaxahnahue.

⁹ Rehtenanaibo joi nincacax bi rahteyamayaxahnahue. Mai hihbocatsihxon rehtehibo joi nincacax rahteyamaribiyaxahnahue. Jascapahbo pari ta jatihibi. Jascapa jai bi ta nete queyorihyamatihqui —jato jaquin.

¹⁰ Jascajaxon jato yohirihbiquin:

—Huetsa janibo ta jaton nahuabo betan rehtenanyaxihcanihqui. Quiquin hapobo ta hahbe quiquin hapobo betan rehtenanthihi.

¹¹ Mai rihbi ta coshin bi res mihuanyaxihqui. Nahuan pahen ta hisinyaxihcanihqui, mahuati hisini. Hicha janin ta jascayaxihqui. Hahqui raquetibo ta jatihibi. Naihoh rihbi ta hahan honantibo jayaxihqui.

¹² Jaabi ta jascapahbo jariyamahi bi mato tiromajanoxon mato yahtanyaxihcanihqui. Tsinquixon mato tiromajanoxon ta jaton tsinquitxi xoboho mato boyaxihcanihqui. Jaton sipo xoboho rihbi ta mato tsahonyaxihcanihqui. Man heen janen yohihi copi ta jaton gobernadorbo janinxon mato demandanyaxihcanihqui. Jaton quiquin hapobo janinxon jascajaribiquin.

¹³ Hioxon ta mato Hihcoini sca yohuanhue hahxon mato tana tanayaxihcanihqui.

¹⁴ Mato jascajahabo bi rahtexonma maton jointinin shinanquin sirjanahue. Jahua yohipan hihyamanahue.

¹⁵ Jaatianbi tah hen mato shinan hinantihu, hahan yohuanti hinanquin. Man hahan yohuanaiya ta mato joi bichinti hahtipahyamayaxihcanihqui. Mato joi bichincatsihquibo rahschin ta Jascama ta qui hahti hahtipahitimahqui.

¹⁶ Hahan yohuanti shinan hen mato hinanah bi ta mato qui yohuanxon caibo maton papabaan, maton mamabaan, maton huetsabaan, maton jenabaan, maton hahbe rabetibaan maton tintibio mato bihmayaxihcanihqui. Caibo rihbi ta mato rehteyaxihcanihqui.

¹⁷ Man hea nincacoinai quen ta mato jistahimayaxihcanihqui.

¹⁸ Jaabi tah man manotimahi, ni huestibi ta maton boo queyocahintimahqui.

¹⁹ Hea jenebahiyamahax tah man queyoyamanox manatihi.

²⁰ Mato jascajaxyaxihquibo bi nahuan sontarobo nea Jerusalen mayahahtanbohanai jisxon, nea jema tiromajabahinti nea pishca sca jai honannahue.

²¹ Jaa jisish Judea main jihuetax mahchi janin jabacahintannahue. Jerusalen janin hihquish rihbi picocahintannahue. Jemama qui nichibo rihbi jema janin joyamascanon.

²² Huishani joibo jai quesa sca janon ta hihti tiromabo netebo jatihibi.

²³ Jascapa hahqui nocotah ta tohoyabo hohmis hohmisyaxihqui. Xoma hahmahibo rihbi jascarihbibi. Nea main jihuetaibo ta hihti tiromabo huinoyaxihqui, Papan jato casticanah.

²⁴ Sontarobaan ta hicha janibo rehteyaxihqui. Jato bihxon rihbi ta jatihibi nahuabaan main jato borestihqui. Nea Jerusalen rihbi ta nahuabaan hihbojayaxihqui, jaton nete senennon caman.

*Noquebaquejoyaxihqui
(Mt 24.29-35, 42-44; Mr 13.24-37)*

²⁵ Hahan honanti rihbi ta jayaxihqui, bari huetsapahi. Hoxne rihbi huetsahpacahini, huishibo jascarihbibi. Quebijistima nian coshin behchon behchonax tsahca tsahcajaque-taiya ta jatihibi janin jihuetaibaan rihbi hihti masa shinanyaxihcanihqui.

²⁶ Jahua sca noque huinomatihiquin hihquish ta raqueya jihuetax jaton jointi masac ahinax jonibo mahuayaxihqui qui. Naihoh queha coshibo ta Papan shacon shaconyaxi hqui qui.

²⁷ Jaatian ta naihoh quehax hea noquebaque botopaqetai jisyaxihcainhqui, nai cohim man hihti coshi xabaya hea jahui ya.

²⁸ Hen mato yohini quescri jacatsihscaya yobacahinnahue. Hen mato bichi joti nea pishca sca jai honanax, bejisihnibahinquin hahcajahi jihuena hue.

²⁹ Jato jascajaquin yohixon, jaa patax queha joi jato yohiquin:

—Banabo jihuibo jisnahue, jatihibi jihui rihbi jisnahue.

³⁰ Bochocochi jisish tah man Bari tian sca ta jatihiqui hih man jai.

³¹ Jascajaquin rihbi hen mato yohihah quescri jaresscrai jisxon, mato bichi hea joti nea pishca sca jai honannahue.

³² Hen mato yohihah quescri jatihibi jascascaya pari ta nete queyoyaxihqui qui.

³³ Naiya mai queyoyaxihqui bi ta heen joibo jahuentianbi queyotimahiqui.

³⁴ Coiramenahue. Pahan pahenax man jointi xehpomis. Tiroma netebo huinotax, Hahrai jahue sca non jatihin hihquish man jointi xehpomis. Huetsa janin man maton shinan camahiya hahan hea jahui nete mato qui nocorenemnis.

³⁵ Jatihibi main jihuetaibo qui ta jaa nete histon nocorenenyaxihqui qui.

³⁶ Hen mato yohihah quesca jaresscacatsihquiboya mato cahnehahbo hihxon jatihibi tian hoxa tenexon jaayocanahue. Hea naihoh quehax jahui ya, hea bebon nihnicahnoxon hihxon, jaayocanahue —jato jaquin.

³⁷ Jato jaa joibo yohinoxon ta bariyahpan Papan xobohoxon jonibo haxemahax yamebo sca Olivoya manan janin hoxahi capahonishqui.

³⁸ Xaba paquescaya ta Papan xoboho jonibo hahquirihbi tsinqui jaquepahonishqui, jan haxemahi nincaqui jahue tsinquicani.

22

Rehtecatsihqui yohinani

(Mt 26.1-5, 14-16; Mr 14.1-2, 10-11; Jn 11.45-53)

¹ Jaatian pascua fiesta hochoma sca jai, chahoma paan piti fiesta.

² Jesus yohihi, Jenquetsahaxon non jaa mahuamatihin hih sca jacani, judio hapobo betan jaton haxemanicahbo. Jonibo qui raquetax jascacani.

³ Jaatian Judas Iscariote Satanases hihbojaquin. Jaa Judas ta Jesusen haxenica hihpanishqui, jahuen doce joni huesti.

⁴ Caxon judio hapobo yohuanquihnxon jaton tinintibo rihbi jaan yohuanquihnxon. Jenquetsahaxon Jesus bilmatihi honanscaxon jato yohiscaquin.

⁵ Jan jato yohihi jenimacani. Jenimahanan:

—Mia tahn non copijatih —hahcanquin.

⁶ —Mato tahn bimhacointih —hihquish, Jahua hora jonibo yamahiquin, Jaatianbi bimhah ta siri qui hihscai Judas, shinamehti.

Hihbo shinanhahnan piti

(Mt 26.17-29; Mr 14.12-25; Jn 13.21-30; 1 Co 11.23-26)

⁷⁻⁸ Fiesta hani neten sca jaton paan pinon jaton carnero baque rehteti netenbi Juanya Pedro Jesusen yohiquin:

—Noquen fiesta piti hahxontannahue non pinon —hahquin.

⁹ —Jahuerahnoxon piti non hahtihin, Hihbon —hahcanquin.

¹⁰ —Jema janin caxon tah man jene bihtanax poo hiabenahi jahui joni behchinohixqui. Jaa tah man chibantihi. Jano jaa mapetai janin rihbi tah man jaa xoboho mapetih.

¹¹ Mapexon xobo hihbo yohinahue: Jahoxon heen hexanicabo betan hen pascua piti pinon jahoxon piti chique jahuen hin hah ta maestronen jaiqui hahquin yohitannahue.

¹² Man jascahah ta bochiquiha chique hani mato jismanoxihqui qui bexojaha siriscay bi. Janoxon pitija noque jaxontannahue —jato jaquin.

¹³ Caxon sca jan jato yohihah quescabri meracanquin. Janoxon sca pascua pitijaxoncanquin.

¹⁴ Ma hihresscaya pihi tsahopaque cani, Jesus jahuen haxenicabo betan.

¹⁵ —Janin hea tiromajacanmis tah hen mato betan nea pascua piti hihti queenahqui.

¹⁶ Papan jihuetaibo janon hen jaton hohcha queyobahinno caman tah hen pascua piti piyamascatih —jato jaquin.

¹⁷ Hahqui xehati sca bihxon:

—Nea bihxon hinanpaquenahue.

¹⁸ Nea hompa tah hen xehatimascai, mato jihuemahi jonoxon caman.

¹⁹ Jato jascaxon, posen sca bihxon Papa yohixon tehcaxon jato hinanrihbiquin.

—Nea ta heen yora qui, man jihuenon hihxon tah hen hehri jato retemehai. Muhaquin tah hen mato hahxonai. Jaa shinanhahnhan piti ta nea qui. Hen mato hahxonai shinanhahnhan pinahue —jato jaquin.

²⁰ Pixon xehati sca bihxon jan piti yohihah quescajaribiquin:

—Nea xehati hahnhue. Hahxontijanixon mato hahxonscaxon tah hen behna sca hahquiribi hahxontijahi. Hahxontijaxon hen jahuentianbi huetsajatimahi honanahbo tah hen heen jimi potahi. Jaa shinanhahnhan xehanhue.

²¹ Jaa hen mato jascajaquin yohihi que bi ta hea bihmahi jonin hehbetanbi piti bichiqui.

²² Papan yohini quescabih ta hea tiromahabo jatihiqui. Hea tiromajayaxihquibo bi ta hea jato bihmanoxihqui joni Papan hihti casticanyaxihqui —jato jaquin.

²³ Jato jascahah, yohinancani. Tsoan cahra jascajatihiquin hihquish yocacahanancani, jaabo rahsibi.

Tsoa hashoan hapo quin hihquinanaibo

²⁴ Caibo sca yohinani, Tsoa non hashoan hapo hihyaxihquiquin hihquish. Jascaraibaan bi Jesusen jato yohiquin:

²⁵ —Nahuabaan quiquin hapobaan ta jato hihti hihbojahiqui. Jato yono yonohah bi ta Jaa ta hapo siri qui hihcanihqui.

²⁶ Mato tah man jascapaho jatimahi. Cacannicahax bi tah man jatihibichin yonoti quesa man jatihi, jato hahxonnicah. Mato bebonica ta maton chini quesa jatihiqui, mato hahxonnicah.

²⁷ Huetsan pinon ta huetsan rihbi metexoniqui. ¿Jahuemeha hashoan hapo quin? ¿Pinica hashoan hapoma quin? Maton hihbo hihxon bi tah hen mato tocan jihuexon mato hihti hahxonai.

²⁸ Caibaan hea tiromajahah bi tah man jenebahinyamarahsihi.

²⁹⁻³⁰ Hea quiquin hapo hihnon heen Papan hea yohini quescajaribiquin tah hen hean sca mato rihbi yohihi, hapobo sca man janon, hea quiquin hapo quen man hea janin hehbetanbi pixon xehayaxahnnon. Hen mato hinanah tsahoxon tah man quiquin hapoboscaxon israelibaan doce jenabo man yonoyaxihqui.

Pedro paranahxihqui

(Mt 26.31-35; Mr 14.27-31; Jn 13.36-38)

³¹ —Simoman, nincahue, Simoman. Bimi bero rahsi bihcatsihquin tohaquin hahcajaquin mato tana tananoxon hihxon ta Satanasn coshin yocacaxqui.

³² Jaabi tah hen mia yocaxonaqui, min nincacoinquin jeneyamanon. Hahquiribi miin shinan pontexon sca miin huetsabo coshi hinanyaxahnhue.

³³ —Sipo xoboho hea tsahonahbaan bi tah hen mia jahuentianbi jenebahintimahi, hihbon. Hea retehhibaan bi tah hen mia jenebahintimahi —hahscaquin Simoman.

³⁴ —Yohicoin tah hen mia jai, Pedron. Nea yamebi ta hatapa queori jaima quimisha coti min Hea tah hen jahuen jonima qui hih min jatihi hea yohihi.

Jesus rehteti hochomahi

³⁵ Pedro jascajaxon jatihibi sca yohiquin:

—Coriquijoma tah hen mato raannihqui, borasajoma rihbi, sapatojoma rihbi. Jascapa raanah bi ejahua man pishinnihqui?

—Jahubima rahan, hihbon —hahcanquin.

³⁶ —Rahma tah hen mato yohihi. Borasayahpahax jaya cahue. Coriquiyahpahax jascarihibi. Hahan retenanti machitojomaxon miin coton maromaxon machito marohue.

³⁷ Hea yohihi, Hahbe yometsohbo betan ta hihqui qui hih ta hea yohihi jacaninhqui, hehqui huishani joi jai quescajaquin ta hea janoxihcanaihqui. Jaa copi tah hen yometsoh yohuanihcamaquin mato yohihahqui. Neateeman huishaxon yohini quescabi sca ta jaresscatihqui, hea yohihi joibo —jato jaquin.

³⁸ —Jise, Hihbon. Neno tah non machito rabe jai —hahcani.

—Jascabi sca janon jenenahue —hahquin.

Getsemani huai chianxon Jesusen yocacai

(Mt 26.36-46; Mr 14.32-42)

³⁹ Xobo janinhax cahax, jan hihcachihi quescari Olivoya manan manichi cahi. Hahchon bi jahuen haxenocabo rihbi manahi cahi.

⁴⁰ Nocoxon:

—Tiroma yoshiman mato tanayamanon Papa yocanahue —hahquin.

⁴¹ Jato jascajahax hori pishca non macan pishca potahi tihixon jaa huesti cahi. Cahax, raboxonen nihxon, Papa yocascaquin:

⁴² —Papan, rahma janoxihquibo hea cahnemahue, queenxon. Jaabi, hea queenai quescarihma bi mia queenai quesca janoxihnon —hahquin.

⁴³ Jaatian Papan yonoti naihoh quehax hahqui botopaquexon coshi hinanai jiscanquin.

⁴⁴ Jaatian bená benaxon Papa hilti yocascaquin. Yocahahnan niscani, jimi toisihquicamahi niscani. Mai qui toisihquiya mai mehchascasi.

⁴⁵ Yocati queyohax res sca huenicahananax jahuen haxenicaboo qui joxon benaya hoxahiton jato meraquin.

⁴⁶ —Jahua Jenquetsahax man hoxa hoxahin? Huenixon Papa yocanahue; tiroma yoshiman mato tanamis.

Jesusbihxon nexahibo

(Mt 26.47-56; Mr 14.43-50; Jn 18.2-11)

⁴⁷ Jan jato yohihi betanbi jonibo nocoti. Jato betan jahuen haxenica Judas rihbi jato beboxoni jahui. Jesus qui joxon betsohahquin saludanquin.

⁴⁸ —Betsohahquin min hea jato bimahin, Judasen? —hahscaquin Jesusen.

⁴⁹ Jaatian Jesus tejabolanaibohi jisxon sca:

—Non jato rerascatihin, hihbon? —hahcanquin jahuen haxenicabaan.

⁵⁰ Judio hapon yonoti sca huestichin reraquin. Reraquin bi jahuen pabinquin mecayaho paxtebahinquin.

⁵¹ —Jenenahue —hahxon jahuen pabinqui Jesusen mehexon rohajaquin.

⁵² Jaya tejacahuanaibo cahen porisiabo, sacerdotebo, mesco hapobo. Jato jatihibi yocaquin:

—Yometsoh yahtanquin hahcajahi man machitoya jahuin? —Maton huinoboya man jahuin?

⁵³ Nete tihibi Papan xobohoxon honanmahanan hen mato betan hihrasih bi tah man hea bilyamahipiqui. Yame bihnicahbo tah man qui, yame baqueboxon.

Pedro paranahti

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jato jascayah bi bihxon judio hapon xobon Jesus bocanquin. Hocho tahni cahen Pedronen jato chibonbonaquin.

⁵⁵ Jesusyabi caibo mapenor, caibaan jemanhihtian chihi requenjaquin. Pehchihi tsataiboya sca Pedro rihbi jato tocan pehchihi tsahoti.

⁵⁶ Pehchihi tsahotai jisxon, Pedro bejisxon huesti haibaan sca yohiquin:

—Nea rihbi ta hahbetan nihrasiliqui —hahquin.

⁵⁷ —Quesahi. Jaa tah hen honanyamahi joni qui —hihscai Pedro.

⁵⁸ Jahuen hihbo jan hihbomayamahah basima sca huetsan rihbi bejisahnhan yohiquin:

—Mia rihbi tah min jahuen joni qui —hahquin.

—Jaama tah hen qui —hihibiscrai.

⁵⁹ Basima huesti hora tihixonpahax huetsa rihbi yohuani:

—Hihcoini ta jato betan nea nihcachihiqui, Galilea mai meha joni can —hahqui.

⁶⁰ Jan jascarai bi:

—Min yohihi tah hen honanyamabiresai —hihibihi Pedro. Jan yohuanai betan bi hatapa queoscai.

⁶¹ Xobohoxon sca rabejaquexon Jesusen Pedro bejisquin. Jaatianbi ta Jesusen yohihah joibo Pedronen shinanscanishqui, janin hatapa queonon tah min quimisha coti hehqui paranahxihqui jan yohihah shinanscaquin.

⁶² Shinanax, picotax huaohihscrai. Hihti huaohihqui, Pedro.

Jesus hosanaibo

(Mt 26.67-68; Mr 14.65)

⁶³ Xobohoxon sca Jesus xecoxon hosanhahnan rishquicanquin.

⁶⁴ Bebepoxon beshrishquixon yocacanquin:

—Jisxonma yohihue. —Tsoan mia beshrishquihiquin? —hahcanquin.

⁶⁵ Hicha jascapa join hosan hosancanquin.

Tsinquita hapobo janin Jesus nihmahiboo

(Mt 26.59-66; Mr 14.55-64; Jn 18.19-24)

⁶⁶ Xaba paque sca jaiya sca, jaton hani hapobo tsinquitibecani. Sacerdote hapobo betan jaton huisha honanbo tsinquican.

⁶⁷ Bexon, jato tocan sca Jesus nihmacanquin. Nihmaxon:

—Mia min noquen Cristo quin? Noque yohihue —hahcanquin.

—Hen mato yohihah bi tah man nincatimahi.

⁶⁸ Hen mato yocacah bi tah man yohitimarihbibi.

⁶⁹ Rahma tah hen hea noquebaque Papa mécayaho tsahonoxihqui, janoxon sca jahuen coshiyaxon yononoxon.

⁷⁰ Jato jascaha, joi bichincanquin:

—¿Mia min Papa Diosen baque quin nan?

—Jaa tah hen qui. Man yohihi quescabri rahan —hahquin.

⁷¹ —¿Jahua hashoan nincati non pishinain? Jan jascari yohanai tah non noquenbi nincacai —hahscacanquin.

23

Pilato janin Jesus hiohibo

(Mt 27.1-2; 11-14; Mr 15.1-5; Jn 18.28-38)

¹ Canon benahue hahxon sca Pilato janin sca Jesus hiocanquin jatihixonbi.

² Janoxon sca quesa cahecanquin.

—Nea tah non noquen caibo hihbojacatsihquiton merahahquin. Quiquin hapo Cesaro copijayamahabo ta jato haxemahiqui. Quiquin hapo Cristo jan hihqui ta yohirihbihiqui —hahcanquin.

³ —¿Mia min judiobaan quiquin hapo quin? —hahscquin Pilatonen.

—Min yohihi quesa rahan —hahquin Jesusen.

⁴ —Hean jisi ta jahua copi nea joni demandanti yamahihqui —judio hapoboya jano tsamajaquetaibo Pilatonen jaquin.

⁵ Coshi coshixon sca:

—Neatohon ta jonibo sinamaxon coromahiqui. Judea mai janin jatihibincon nihxon ta jato jascati haxemahiqui. Reboqui Galilea janin pehocohnish ta neno caman sca jahuiqui, jascati honanmabehni —hahcanquin.

Herodes janin sca Jesus hiohibo

⁶ —¿Galilea mai meha joni hin? —Pilatonen jato yocaquin.

⁷ Herodesnin mai meha joni Jesus hihqui honanxon, Herodes janin sca jaya bohabo jato raanscaquin. Herodes rihbi Jerusalen janin jaatian jai quen hahqui sca jato raanquin.

⁸ Jaatian Jesusjisish, Herodes coin coinscái. Jaya joihibo nincanish basi sca jaa jiscatsihquish jenimascaí. Jahuen coshiyaxon hahcái jiscatsihquish jenimahi.

⁹ Jahuen coshi jiscatsihxon sca yocaquin. Yocacah bi jahua hihyamahi.

¹⁰ Jan jahua hihyamahi bi ta jano rihbi nihxon judio hapobo betan jaton haxemanicahbaa quesajaquin coshin bi res cahecannishqui.

¹¹ Jahuen sontarobo betan Herodesnin Jesus tiromajaquin yohixon hosan hosanscaquin. Quiquin hapon tari sahuemaxon sca Pilato janin raanrihbiquin.

¹² Pilato betan Herodes rainyamapahonish bi jaatianbi raescái rabebi.

Jesus rehteti yohihibo

(Mt 27.15-26; Mr 15.6-15; Jn 18.39-19.16)

¹³ Pilatonen sca judio hapoboya jaton meyayahpabo quenamaxon, jaton jonibo rihbi quenamaxon jato yohiquin:

¹⁴ —Noquen jonibo noque bichincatsihqui joni tah qui hahxon tah man nea joni hihuehahqui. Maton nincanonbi tah hen sirijaquin jaa yocacahqui. Honanquin sirijaxon tah hen jahua copi caheti merayamahi.

¹⁵ Herodesnin ta merayamaribihaxqui. Hen hahqui raanah bi ta noque qui raanrihbihaxqui. Jahua copi rehteti ta yamahihqui, jan tiromani yamahi.

¹⁶ Jaa copi tah hen rishqui rishquimaxon picoxihqui —jato jaquin Pilatonen.

¹⁷ Jaton fiesta tian cah qui huesti joni jato picoxonpahonnish, hahpahonibo quescjaquin.

¹⁸ Pilatonen jato yohihah bi coshin bi res sai saihihcane jatihibi.

—Jaama rahan. Barrabas caya noque picoxonhue —hahcanquin.

¹⁹ Barrabasnen ta jaton jema janinhahbo sinamaxon rehtenanmanishqui. Jaa copi ta sipo xoboho jaa tsahoncannishqui, jan joni rehteni copi rihbi.

²⁰ Sai saihihquiboya coshin sca Pilatonen jato yohirihbiquin:

—Jesus tah hen mato picoxontih.

²¹ Pilato coshin yohanai bi sai saihihquin mahuincanquin.

—Jihui qui hueonhue. Jihui qui hueonhue, mahuanon —hihcane.

²² Jato yohirihbiquin, quimisha coti sca:

—¿Jahua tiroma hen janishquin nan? Hean jisi ta jahua copi rehteti yamahihqui. Jaa copi tah hen rishquimaxon jenebahinti —hahquin Pilatonen.

²³ Hashoan sca coshicahinxon coshin bi res yohicanquin.

—Jihui qui hueonxon rehtehue —coschin yohiquin Pilato mahuincanquin, sai saihihxon.

²⁴ Jaabaan yohihi quescajati ta jaiqui hihxon sca

²⁵ hoa joni rehtenica sca jato picoxonquin, jaabo queenai quescajaquin. Rehtenanmanca joni picoxonxon bi Jesus jato hinanquin, jaabo queenai quescajahabo.

Jihuin hueonaibo

(Mt 27.32-44; Mr 15.21-32; Jn 19.17-27)

²⁶ Jesus boxon sca jemama quirihax jahui joni behchixon bihxon jaa jahuen coros hiamacanquin. Simon janeya joni ta jaa janishqui, Cirene mai meha. Jesus chibansonan hiamacanquin.

²⁷ Hicha jonibo rihbi hahchon bocani. Haibobo rihbi hahchon bocani, huini huinicanna. Jaya huaohihcanacani.

²⁸ Jato qui rabejaquexon sca Jesusen jato yohiquin:

—Heya huaohihyamanahue, Jerusalen haibobon. Maton yoraya huaohihnahue, maton baqueya rihbi huaohihnahue.

²⁹ Tiromabo netebo ta mato qui nocoti jahuiqui. Jaatian tah man masa shinanyaxihqui: Hea rihbi baquejoma japahinon, baquexo jahuentianbi bihyamaha cahen hashoan siripan. Jahuentianbi baquexo xoma hahmayamani cahen siripan hih tah man jayaxihqui.

³⁰ Noque qui paquenahue mananbon. Noque mahpobahinnahue, mahchibon, hah tah man jatihi.

³¹ Xoo pari jihui jai bi nescajahibo jaiya ¿jihui xanascaiyia jenquetsahpabo jatihiquin? —jato jaquin.

³² Huetsa joni rabe rihbi ta bocannishqui, tiroma rabe. Jesus hueonxon jaabo rabe rihbi jihuin hueonnoxon bocanquin.

³³ Mapo xao janeya mahchi manixon sca janoxonbi jihuin hueoncanquin. Jesus naponbi janon, jaa patax tiroma joni huesti hueonxon nichinxon, ramihon sca huetsa joni tiroma.

³⁴ —Jaton hohcha jato sohuaxonhue, Papan. Hea honanyamaxon ta hea nescajacanihqui —nihqui Jesus.

Jihuin Jesus hueonxon sca tsoan jahuen chopa bihtihiquin hihxon macan bero pishca borasa qui nanexon chicohah huetsa macan pari cainaiya huetsan jahuen chopabihnon, huetsa macan pari cainaiya huetsan sca jahuen chopabihnon hihxon, jascajaquin jahuen chopabihcanquin.

³⁵ Jano tsinquipaquecahuani nihxon, jonibaan jis jisquin. Hosan hosancanquin, jaton hapobaan.

—Caibo ta rohajapahonishqui. Papan Cristohax hahrí sca rohajahanon, Papan caisah jonihax hahri rohajahanon —nihcanni jaton hapobo.

³⁶ Sontarobaan rihbi sca janohosan hosanquin. Mae cachani bexon, hinanquin.

³⁷ —Judiobaan quiquin hapohax mihri rohajahahue —hahcanquin.

³⁸ Jahuen mapo bochihi quirica rihbi hueoncanquin. Nea ta judiobaan quiquin hapo qui hihqui jaa quirica.

³⁹ Jaa patax hueonahbo huesti sca yohuani, yometsoh huesti:

—¿Mia min Cristo quin? Mihri rohajahatax botoxon noque rihbi hahxonhue —nihqui hosani.

⁴⁰ Ramih quehaton sca joi bichinxon jahuen hahbe tiroma joni qui rainyamascai:

—¿Mia min Dios qui raqueyamahin? Mia rihbi tah min mahuanoxihqui.

⁴¹ Noque rabe non tiromajani copi tah non rahma mahuatai. Non caibo hahni quescaja ta noque jacanihqui. Noque quescayamahi ta nea jahua tiromayamanishqui —hahxon, Jesus sca yohiquin:

⁴² —Quiquin haposcaxon, hehon shinanyaxahnhue, Jesusen —hahquin.

⁴³ —Nea netenbi tah min hehbetanbi heen jihue janin jacoinnoxihqui —hahscäu Jesusen.

Jesus mahuascai

(Mt 27.45-56; Mr 15.33-41; Jn 19.28-30)

⁴⁴ Barin manan tsacahiya sca, jatihibi janin bahquishihcrahini, bari mahpohah yamecanini, bari racapaquescanon caman bahquishihcrahini.

⁴⁵ Papa yocati xoboho rihbi chopa chique naponbi huaxacahini, quexe rabe sca janon.

⁴⁶ Coshin bi res sca Jesus yohuani:

—Hea biihue, Papan. Mihqui tah hen hinamehtai —nihquish mahuascai.

⁴⁷ Jatihibi jisish janohichi sontaro capitan sca yohuani:

—Papa Diosen ta jisiqui. Nea joni ta siri joni hihquishqui —nihqui.

⁴⁸ Jisi jahuibo rihbi hen mia yohihibo jisish rahte rahteti. Masa shinanax xohpatsihtax sca boribicani.

⁴⁹ Hahbetan nihpahonibaan rihbi hocho nihxon jatihibi jisquin. Galilea mai janinhax jaa manahi jahuipi haibobaan rihbi jatihibi jisquin, hochoxon.

Jesus mihinaibo

(Mt 27.57-61; Mr 15.42-47; Jn 19.38-42)

⁵⁰⁻⁵¹ Jaatian ta Jerusalen janin José janeya joni japhonishqui, Arimatea jema janinha joni. Arimatea ta judiobaan jema rihbi qui. Jaa José ta jaton cacannica rihbi janishqui, hihcax bi siri joni, pontejaquin shinanai joni. Noque jihuemanica Papan raanpahinon hihnicah. Jaan jisí cahen jahuen hahbe hapobaan tiromajaquin shinanrahsih. Jesus rehtecatsihquiobo quescayamahi ta jaa janishqui, jaabaan hahcachihi quescayamaquin.

⁵² Jaa José sca Pilato janin caxon Jesusen yora yocauquin.

⁵³ Jesusen yora bihpaxon sca, sabananen rahcoquin sirijaxon, mai xanqueman poquin quiniho sca mihinquin, jano tsoabi tsahonnihma.

⁵⁴ Tantiti neten piyanoxon ta jaton pitijati neten jaa tsahonnishqui, tantiti nete nea pishca sca jaiya.

⁵⁵ Galilea mai mehax Jesus betan jahuipi haibobo ta José chibanbonahi canishqui, jan tsahomi cahiya. Tsahon honanxon, jan jascajaquin racanai jisish, boresscacani.

⁵⁶ Hahan yora hininjati mescohi bocani. Mirra janeya hahan hininjati rihbi bichi bocani. Tantiti neten sca tantican, Moisesnin yohini quescari.

24

Hihquipish bi Jesus teehihrabiscai

(Mt 28.1-10; Mr 16.1-8; Jn 20.1-10)

¹ Tantiti nete huinoscaipish xaba honanax sca tsahon janin boribicani. Jaton hininjatibo rahojahipixon papibahini bocani.

² Nocoxon, hahan xehpohipibo macan taranbohana sca meracanquin.

³ Tsahon janin hihcoxon bi noquen Hihbo Jesusen yora merayamacanquin.

⁴ Jahuen hea bohancanaxquin hihquiboya sca rabe joni jano sanareneni. Jaton chopa cahen bahri bahrichi.

⁵ Hihti raquetax, jato qui betihihpaquecani haibobo. Betihihpaquetaiton:

—Mohitahpa joni tah man benahi. ¿Jahuanoxon man neno tsahonnihbo janin man benahi jahui nan?

⁶ Nenoma ta qui. Ma ta hueniscaaxqui. Galilea mainxon jan mato yohiho shinannahue.

⁷ Hohchayahpabo qui tah hen hea noquebaque hinamehti jai, jihuin hueonxon rehtescaabo. Jaa pecaho tah hen jahuen quimisha neten sca hahquirihbi teehihtih hah ta mato jahoxqui —hahcanquin, sanareneni jahuibaan.

⁸ Yohihah, Hihcoini, jasca ta jahoxqui hihcanni.

⁹ Jacahini sca tsahon janinhax boribicani. Jahuen once haxenicabo yohitannon benahue, jato jatihibi yohinon benahue. Texe rihbi jano jaibo yohinon benahue hihcagini bocani.

¹⁰ Jaa ta María Magdalena qui, Juana, Jacobon mama María rihbi. Caibo haibobo rihbi jato betan bocani. Nocoxon jahuen haxenicabo yohicanquin.

¹¹ Yohihah bi yohuanresaibo shinanxon jato nincayamacanquin.

¹² Pedro sca picotax bishquihcanahax tsahon janin nocotax cahcopaquexon jisi bi jano jahuen sabana jano huesti tsamati. Jahua jenquetsaxquin hihquish, rahtetax, xobon sca caribhi.

Emaus jema janin cahibo

(Mr 16.12-13)

¹³ Jaa neten bi sca jato quiha rabe joni cahi, huetsa jema janin cahi bocani. Emaus janeya jema janin cahi bocani, Jerusalen janinhax taken cahá cahen rabe hora.

¹⁴ Yohuan yohuanganahi bocani. Jisipiboya rahma nincabehnanaibo rahsi shinanax yohuan yohuanganahi cahi.

¹⁵ Yohinanganahi bohiboya sca, jato chibanbonahi caxon jato huinonquin bi jato manahi sca Jesus nichí.

¹⁶ Jaa hihqui bi bebepohah quescaxon jaa honanyamacanquin.

¹⁷ —¿Jahua yohuan man Jain, man yohinani nihcanahin? —jato jaah, nihrenencani jaton bemanan huetsapahcagini.

¹⁸ Cleopas janeya sca yohuani:

—¿Jerusalen janin jihuetahxon bi min mia huestichin jano jaipibo joi min honanyamahin? —hahquin.

¹⁹ —¿Jahua jaipishqui nan? —hahquin.

—Jesus nazareno jaipibo rahan. Jaa ta Papan joi yohinica hihpahonishqui. Jatihibichin jisnon bi ta Papan coshiyaxon hahpahonishqui. Papan shinanyaxon ta noque haxemaphonishqui.

²⁰ Noquen hapobo betan noquen cacannicabaan rehtenon ta hinanipicanaxqui, jihuun hueonxon retehahbo.

²¹ Noque israelibo jihuemanicah tah qui hih non jarashi que bi ta retehipecanaxqui. Neayanish ta quimisha netescaiqui, retepibo.

²² Rahma rihbi ta noquen chocabaan noque rahtehaxqui. Hihari tsahon janin caxon roqui jahuen yora xahbanjacanax.

²³ Merayamahax qui joquin sca Papan yonotibo jato qui cainai qui jiscanquin. Jihue ta jaiqui qui jaa yonotibo jai, yohuani.

²⁴ Jaatian ta noque janinhax caibo rihbi sca jahuen tsahon janin bocanaxqui. Haibobo yohuanah quescabí roqui meracanax, jahuen yora yamascai —hihcáni.

²⁵ —Honanyamahibon. ¿Yotihó chahoma maton jointi quin? Papan joi yohinicabaan yohini joibo jatihibi man nincapanan.

²⁶ ¿Jascapa tiromabo huinoti Criston jai yohiyamacannishquin? ¿Jaa pecaho sca naihoh queha quiquin hihbo jaa jatihí yohiyamacannishquin? —jato jaquin.

²⁷ Jato jascajaxon, Moisesnin huishani joibo jato honanmaquin sirijaxon, texe Papan joi yohinicabaan huishani joibo sca jato honanmapaquequin, Cristo yohihi joi rahsi.

²⁸ Jano jaabo cahi jema qui sca nococani. Hojno caparihi quescá jaa jai bi hihti vocacanquin:

²⁹ —Noque qui banetahue. Bepi sca ta jaiqui. Bari ta hihquicatsihscáiqui.

Jeenhihquisi mapeti.

³⁰ Jaabaan Pihue hahcá piti bihxon Papa yocaxon tehcaxon jato hinanquin.

³¹ Jaatian pari jaton bero quehpemehxon quescaxon jisxon jaa hihqui honanscacanquin. Jaatian jaabaan jisi bi jaa yamacahin sca jai.

³² —Bahinxon noque yohixon huishani joibo noque honanmaxon ¿noquen jointibo xecahihihniyamahaxquin? —hihcáni.

³³ Jaatianbi cahx, Jerusalen janin boribicani. Nocoxon jahuen once haxenicabo tsinquititon meracanquin. Texe rihbi jato betan tsinquiti.

³⁴ —Noquen Hihbo ta teehirihbihiqui. Hueni coin ta jaaxqui. Pedronen tajisishqui —hihqui tsinquitaibo.

³⁵ Jaatian jaabo rabechin bahinxon jisxon nincatanah yohixon, jan paan tehcaxonaiya jaa hihqui honanaibo yohicanquin.

Jahuen haxenicabo qui Jesus sanareneni

(Mt 28.16-20; Mr 16.14-18; Jn 20.19-23)

³⁶ Jato yohiparíhiya bi jato tocan jaa sanareneni jahui.

³⁷ Rahte rahtetax, yoshin tah qui hihquish, raquepahhuancani.

³⁸ ¿Jahua jenquetsain man rahtetain? ¿Jahuejahi man maton jointi janin raqueuya yohuanain?

³⁹ Heen mequen jisnahue. Heen tahe jisnahue. Hea tah hen qui. Mehexon jisnahue. Yoshinma tah hen qui: yoshin ta nami yamahihqui, xaobo yamarihbihi. Hea ta jas-capahma qui.

⁴⁰ Jato jascajaxon, jahuen mequen jato jismaquin. Jahuen tahe jato jismaquin.

⁴¹ Hihti jenimaya rahte rahtexon jaa hihqui shinanyamaparihiboya sca jato yocauquin:

—¿Man piti yamahin? —jato jaquin.

⁴² Yapa xohi teque pishca hinancanquin.

⁴³ Bihxon jaton jisnon bi sca piquin.

⁴⁴ Pixon jato yohiquin:

—Mato betan jihueparixon tah hen mato yohinihqui, hea yohihi Moisesnin huishani jatihibi jai quescá ta jatihiqui. Huetsa Papan joi yohinicabaan huishani joibo, Davidinin behua janin rihbi jaibo quescá sca ta jatihibi jatihiqui.

⁴⁵ Jascajaquin yohixon jaton jointi quehpexonquin Papan huishani joibo honancoinahbo jato yohiquin.

⁴⁶ —Tiromahabo bi Cristo mahuatihi, jan hihquipish bi quimisha neten hihquish hahquirihbi teehihi ta huishacannishqui.

⁴⁷ Maton shinan pontenahue jan maton hohcha sohuaxonnon hahquin Jerusalen janin yohimenohax janohax jatihibi jónibo janin sca jahuen janen jascajaquin yohiyaxihcáni, jaa jatihibi ta huishaxon yohicannishqui.

⁴⁸ Yohinihbo jai quescá sca jai jisxon tah man honanquin sirijahi.

⁴⁹ Papan mato hinantijani tah hen mato qui raanyaxihqui. Nea jema janin banetah-nahue, heen naihoh queha coshi mato qui noconon caman –jato jaquin.

*Jesus naihoh hinahihnati
(Mr 16.19-20)*

⁵⁰ Jato jascajaxon Betania jema janin caman jato hioquin. Janoxon sca jahuen mequen sanahihnixon siri shinanya janoxihquibo sca jato yohiquin.

⁵¹ Jato yohihahnan sca caresscai, naihoh hinahihnati.

⁵² Jaabo sca hihti jenimahanan Jerusalen janin boribicani.

⁵³ Papa yocati xoboho res mapexon Papa yocacanquin, Hahxon tah min noque jai, Papan, hahquin.

JUAN

Juaman huishani joi siri

Papanjoi hihbo jonihu

¹ Jahuabi jaríyamanon ta Papan joi hihbo janishqui. Papa Dios betan jihueta. Papan joi hihbo ta Papan shinanyahpa qui. Dios bi res ta jaa joi qui.

² Naiyahpa mai jaríyamanon ta Papa Dios betan jaa joi hihbo janishqui. Jahuen Jane cahen Jesus.

³ Jaan ta jatihibi janishqui. Jaan hahyamani quen ta jahuabi yamaquehanihqui.

⁴ Jaan ta jatihibi yoshinyahpabojaquequin jihuemanishqui. Jaa noquen jihuemanicah ta noquen xaba qui.

⁵ Bahquish chian xabatai bi cahen yamepan bahquishjayamaquin.

⁶ Noquen xaba hihbo ta jahuiqui hihqui jonon ta Juan janeya joni Papan raannishqui.

⁷ Jaa ta xaba hihbo qui hihxon yohicoini jonon. Joxon, jatihixonbi nincacoinahbo hihxon jato yohicoinquen.

⁸ Jaa Juan cahen xaba hihquishma bi xaba hihbo qui yohicoini jahui.

⁹ Jaa xaba hihbo ta jatihibi joni xabajanicah qui. Xaba hihbo hihquish bi cahen noque janin jaa jahui.

¹⁰ Jan hahni nete janin jaabi jahue que bi cahen jano jihuetaibaan huetsapahascaquin, jaabi que bi.

¹¹ Jaton caibo que bi Johue hahyamacanquin, jaanbi hahni nete janin nocotai bi.

¹² Caibaan res Johue hahquin. Jaa Johue hahcaibo cahen: Dosen baquebo sca janahue, mato rahsibi, hea nincacoinaibo rahsi, xabapan jato jaquin.

¹³ Jaa Johue hahcaibo Papa Dosen baquebo hihnon, jimiyahpa papa janonma bi queeyahpa papajomabo hihnon, bebaan baquejaha hihnonma bi: Papan baquebo janahue xabapan jato jaquin.

¹⁴ Yorayahpahax ta noque betan jaa Papan joi hihbo jihuemanishqui. Jan hihti coshin hahcái tah non jisniqui. Jaa huesti jahuen papa xohtahi, nete hihbohi. Yohuani hihcoinai. Shinanyahpa siri.

¹⁵ Hahqui chanicoini cahen Juan coshin yohuani, nescari:

—Hoa ta hen mato yohipi noque qui, hea pari jomenoni que bi ta hehchon jahui noquen hea mahuiniqui, jaa pari jihue hihbonixon —hahqui.

¹⁶ Jahuin shinan hihti caibohi tah non jatihixonbi bilihniqui, jaan hinanresah.

¹⁷ Xabapan shinan non bilihnon hihxon ta Papan Moises yononishqui, noquen nincati joi Moisesnin huishanon. Jaa pecaho ta Jesucriston sca jahuen shinan noque hinanresiqui, hihcoinai joi non honannon, noquehon Papan shinanai non honannon.

¹⁸ Tsoanbi ta noquen Papa Dios jisyamanishqui, jahuentianbi. Non jisyamani bi ta hahan jan shinanai jahuen baquen noque yohiha, jenquetsahpa noquen Papa Dios quin non honanscái.

Jesucristo ta Papan baque qui

(Mt 3.11-12; Mr 1.7-8; Lc 3.15-17)

¹⁹ Yocacahbo hihxon ta Jerusalen janinha judiobaan jaton sacerdoteboya levitobo Juan qui raannishqui.

—¿Mia min tsoa quin? —Juan yocacahbo. Yocacahbo ta jato yohicoinnishqui.

²⁰ Paranaxonma jato yohicoinquen:

—Hea ta hen Cristoma qui —hahquin.

²¹ Jasca jan jaiya, yocaribicanquin:

—¿Tsoa min quin? ¿Mia min Elías yamanica quin? —hahcanquin. Jascalahbo bi:

—Hea ta jaama qui —hahquin.

—Hoa Dios joi yohinica nan? —hahscacanquin.

—Hea ta jaama rihbi qui —hahquin.

²² Jaatian yocaribicanquin:

—¿Tsoa min quin? Noque Yocatannahue hahcaibo non yohihi sca canon, Jaa ta hen qui noque jahue, mianbi —hahcanquin.

²³ —Cahchihoxon quenahí ta hea qui, Hihbo hahan jonon bahi najisti chai jaxonnahue hahnical. Papan joi yohinica hihxon Isaiasnen noque yohini quescabijaquin tah hean jai —jato jaquin.

²⁴ Yohihahbaan bi fariseobaan sca hahquirihbi raanah, yocaribicanquin:

²⁵—¿Jahua copi min Cristo hihxonma bi min jato nashimahn, Elías rihbi hihxonma bi, hoa Dios joi yohinica rihbi hihxonma bi min nashimahi nan? —hahcanquin Juan yocaquin.

²⁶—Hean ta hen jenen res nashimahi. Mato tocan ta man honanyamahi joni nichiqui.

²⁷Hehchon jahui que bi tah hen jahuen sapato risbi pecaxonti senenyamahi, jaa hihti siri copi —Juaman jato jaquin.

²⁸Jordan huean hoque quexaxon, janoxon Juaman jato nashimahi janinxon bi ta jascajaquin yocacannishqui, Betania jema janinxon.

Jesus ta Papan carnero qui

²⁹Huetsa bahquish sca jari Jesus jahui qui jisxon, Juaman jato yohiquin:

—Jisnhue. Hoa ta Papan carnero joni qui, main jihuetaibaan hohcha copi mahuayaxi-hqui joni.

³⁰Hen mato yohihipi tah qui, Hehchon jahui jonin ta hea muuininhqui, jaa pari jihue hihbonixon hahquin.

³¹Hean rihbi jaa honannixonma bi tah hen israelibaan jaa jisxon honanon hihxon hean jenen nashimahi joníqui —Juaman jato jaquin.

³²Jato jascajaxon yohirihbicoinquin:

—Naihoh quehax Dios Yoshin botopaqetax, nobex quescapa hahqui bototi manahi jahui tah hen hean jisoqui.

³³Jaa tsoa quin tah hen hean rihbi honanyamanihqui. Hen honanyamahi bi ta Papan hea yononishqui, jenen nashimahi hea jonon. Botopaqetax heen yoshin siri jaa manahi jahui min jisyaxihqui ta heen yoshin siri bichibo nashimaquin hahcajanicah qui, heen yoshin siri jato hinanquin, hih ta Papa jahoxqui.

³⁴Jan jascajahi jisoxon ta hen mato yohicoinali: Papa Diosen baque tah qui —Juaman jato jaquin.

Jesusen caismenonibo

³⁵Huetsa bahquish sca, jahuen haxenica rabe betan nihibixon,

³⁶Jesus nichi jisxon:

—Jisnhue. Jaa ta Papa Diosen carnero qui —jato jaquin.

³⁷Jan jascarai nincax rabebi jahuen haxenica cahi, Jesus chibani sca.

³⁸Rabejaquexon, chibanai jato meraxon Jesusen jato yocaquin:

—¿Jahuejahi man behin? —jato jaquin. Yocacah:

—¿Jahuen min jihuetaín, Rabin? —hahcanquin. Rabin ta maestron hihcatsihqui qui.

³⁹Jisi benahue —hahscáquin. Jaatian boresscaxon, jan jano jihuetai jisish, bepiscaiya jaa netenbi jahuen xoboho banecani.

⁴⁰Huesti ta Andres janishqui, Simon Pedro huetsa. Huetsa joni betan nihxon, Juan yohuanai nincaxon, Jesus res sca chibanquin.

⁴¹Jahuen huetsa Simon benanaxon meraxon:

—Mesías tah non merascai —hahquin. Mesías cahen Papan raanah joni hihcatsihqui, Cristo, jaton join.

⁴²Jascajaxon, Jesus janin Simon hioquin. Nocotaiya bejisxon Jesusen yohiquin:

—Mia tah min Simon qui, Juaman baque. Cefas janeya sca tah min jayaxihqui —hahquin. Cefas ta macan hihcatsihqui qui.

Felipeya Natanael Jesusen quenahi

⁴³Huetsa bahquish sca Galilea main cacatsihquin Felipe meraxon:

—Hehbe cahue —hahquin Jesusen.

⁴⁴Betsaida jema janin ta Felipe jihuepahonishqui, Andres betan Pedro jano jihuapahoni janin.

⁴⁵Natanael meraxon, Felipenin yohiquin:

—Papan joi huishaquin Moisesn yohini joni tah non meratanai. Papan joi yohini-cabaan rihbi hahqui huishaxon yohini. Josepan baque Jesus tah qui, Nazaret janinhah —hahquin.

⁴⁶—¿Nazaret janinha jahua siri jatihi qui? —hahqui Natanael.

—Jisihue —hahscáquin Felipenin.

⁴⁷Natanael hahqui nocoti jahui jisish Jesus yohuani:

—Jisnhue. Jaa ta israeli baque coin qui, paranyosma joni —hahqui.

⁴⁸—¿Jenquetsahaxon min hea honanain? —hahquin Natanaelnin.

—Higo jihui namán tsahotai ta hen mia jisiqui, Felipenin mia quenarihyamanon —hahquin Jesusen.

⁴⁹—Mia tah min Papa Diosen baque qui, Maestron. Mia tah min israelibaan qui qui hahqui —hahquin Natanael.

⁵⁰ Jesusen sca Natanael yohiquin:

—¿Higo jihui naman tsahotai ta hen mia jisiqui hen mia jaiya min nincacoinain? Heen coshiyaxon hahcai tah qui. Hashoan rihbi heen coshiyaxon hen hahcai tah min jisyaxi-hqui.

⁵¹ Yohicoin ta hen mato jai: nai huiso quehpemehtaiya hea janinhax hinahihnatax hea noquebaque qui nocoti botopaqetai tah man Papan yonotibo man jisyaxihqui —jato jaquin.

2

Caná jema janinxon huanomahibo

¹ Jan jascaphipi quimisha neten sca Galilea main huanomahibo jai, Caná jema janin. Quenamaha janó rihbi Jesusen mama cahi.

² Jahuen haxenicaboyabi canon Jesus rihbi quenamacanquin, huanohihbo jisi canon.

³ Jaton xehati queyoscaiya:

—Hompa ta yamascaiqui, baquen —hihqui jahuen mama.

⁴ —¿Min jascaraiya bi jahueja hen jatihin, maman? Heen coshiya teeti nete ta nocorihyamahiqui —hahquin Jesusen.

⁵ Xehamanicahbo sca:

—Jaan mato yohihi quescabijanahue —jahuen maman jaquin.

⁶ Janobi rihbi cahen seis macan poo tsahoti jene paxa hahqui bexojatibo. Hanibo poo can, huesti cuñete hihyamahax rabe cuñete betan senenai tihopabo, hahan judiobo mechoquit, tachoquit, jaton hihti quescarí.

⁷ —Poo qui jene bohasaxonnahue —jato jaquin Jesusen. Jaatian bohasabahincanquin.

⁸ —Huehaxon, fiesta hihbo nomimatannahue —Jesusen jaah sca, huehaxon nomimacanquin.

⁹ Jaa jene hompacahinscái bi fiesta hihbaan tanaquin. Tanaxon bi jahuerahnohah hin honanyamaquin. Jene bihtanaibaan honanai bi fiesta hihbaan honanyamaquin. Tanaxon jahuen huanoni quenaxon sca fiesta hihbaan yohiquin:

¹⁰ —Pahenscaiton jato tiroma xehati xehamanoxon tah non siri pari jato hahmanica qui. Mian tah min rahma pari hompa siri cainmahi —hahquin.

¹¹ Galilea mai janinhah Caná jema janinxon ta Jesusen jascajamenoquin hahan honantijanishqui. Jahuen coshi jato jismahah cahen jahuen haxenicabaan nincacoinscáquin, Papan caisai joni hihqui honancoincanquin.

¹² Jaa pecaho jahuen mama, jahuen jochicabo rihbi, jahuen haxenicabo rihbi Caper-naum janin hahbetan cahax nocotax jahuentihí ra netebo janó baneti, basima tahni.

Papan xobo tiromajahibo Jesusen jabamahi

(Mt 21.12-13; Mr 11.15-18; Lc 19.45-46)

¹³ Judiobaan pascua fiesta nea pishcascaiya Jerusalen janin Jesus cahi.

¹⁴ Nocoxon Papan xobohoxon jaton ganadoya carnero maromahiton jascapa maromanicahbo meraquin. Nobex maromanica joniboya coriqui mahnenannica jonibo rihbi janó tsahotai meraribhiquin.

¹⁵ Jascajahiton meraxon risbipan hahan rishquitijaxon jeman jato potaquin. Jatihibi potaquin, jaton ganadaboya jaton carneroboya bi. Jaton coriqui napabohanxon coriqui misa rihbi behonjanquin.

¹⁶ Nobex maromanicahbo sca yohiquin:

—Nescapahbo botannahue. Heen papan xobohoxon jascajayamanahue. Janoxon marotima tah qui —jato jaquin.

¹⁷ Jato potahi jisxon, Hea tah hen miin xobo hihti jenipahichai jaa jiscatsihqui, hihqui neateman huishani joi jahuen haxenicabaan shinanscaquin.

¹⁸ Jahuen haxenicabaan sirijaquin shinanai bi judiobaan sca joi bichinquín:

—¿Jahua hahan honanti min noque jismahin, nescajanoxon? —hahcanquin.

¹⁹ —Nea xobo potojaquetannahue, quimisha nete huinoxon hen jaa xahnennenbi hahrib-inon —Jesusen jato jaquin.

²⁰ —¿Cuarenta y seis bari teexon janquenjanibo xobo min quimisha neten xobojaquin queyotihin? —hahcanquin.

²¹ Jahuen yora yohihi jan hihqui bi janoxon Papa Dios yocati xobo yohihi shinancanquin.

²² Hihquipish bi teehihríbíhiya pari ta jan jascajaquin jato yohihi jahuen haxenicabaan shinanscanishqui. Shinanax, Hihcoini Papan huishamani joi ta jaa yohihi jaiqui, noquen Hihbo Jesusen rihbi ta noque jascajaquin yohinishqui, hihcani.

Jatihibi jonibo Jesusen honanai

²³ Pascua fiesta tian Jerusalen janinxon hahan honantibo Jesusen hahcái jisxon:

—Papan caisai noque tah qui —hahcanquin hicha jonibaan.

²⁴ Jascaraibaan bi jato jatihibi honanax jato tocan Jesus nihresyamahi.

²⁵ Jatihibi jonibaan shinanai jaanbi jahuen jointinin honanscái copi, Jasca ta shinancaniqui hihnica pishinyamahi.

3

Jesus qui Nicodemo nocoti

¹ Huesti fariseo joni ta judioabaan cacannica hihpahonishqui, Nicodemo janeya joni.

² Jesus qui yame caxon yohiquin:

—Noque honanmahi mia jonon ta mia Papan raannishqui, Maestron. Non tah non honanai. Mian tah min hahan honantibojahi. Mihibetan Papa Dios hihyamahiya cahen min jascajati hahtipahyamahan —hahquin.

³ Jaatian:

—Mia tah hen yohicoinai. Behnajaquin jonijahama jonin ta Papan jihue jistimabiresiqui —Jesusen jaa jaquin.

⁴ —¿Yosibohax non jenquetsahax hahquirihbi jonitihin? Noquen maman xahquin janin non hahquirihbi hihquitihin, jonirihbinoxon? —Nicodemon Jesus jaquin.

⁵ —Mia tah hen yohicoinai: Dios Yoshiman jonijahama joni ta Papan jihue janin hihcotimabiresihqui. Jenen rihbi jonijahama joni ta jano hihcotimabiresihqui.

⁶ Namin jonijaha ta yorayahpa qui. Dios Yoshiman jonijaha ta yoshin rihbi qui.

⁷ Hahquirihbi joniti tah min jai hen mia jaah bi rahteyamahue.

⁸ Jano jan queenaiton ta nihue cahiqui. Jahuerahnohax cainax jahuen cahiquin tah min honanyamahi, xoo hihqui nincaxon bi. Dios Yoshiman jonijaha jatihibi ta jascarihbi qui —Jesusen jaquin.

⁹ —¿Ja min yohihi jenquetsahatihiquin nan? —hihqui Nicodemo.

¹⁰ Jesusen sca yohiquin:

—¿Israelibaan honanmanicahxon bi min hean mia yohihah min honanyamahin?

¹¹ Yohicoin tah hen mia jai: Honanxon non mato yohihah bi tah man nincayamahi. Jisxon non yohihah bi tah man nincayamahi non hihcoinai bi.

¹² Nea mai meha joi yohihah bi nincacoinyamaxon tah man jenquetsahaxon bi naihoh queha hen mato yohihi joi nincacointimahi.

¹³ Tsoabi naihoh catanni que ma bi tah hen janohax botopaqetai hea huesti jano canicah qui, hea noquebaque.

¹⁴ Nincacoinaibo queyoyamanox mananon ta cahchihoxon Moisesnin rono nichinhinnoxon jihuin hueonni quescajaquin hea noquebaque nichinhinnoxon hueonyaxihcanihqui.

¹⁵ Hea noquebaque qui hinamehxon nincacoinaibo jatihibi ta queyoyamanox manatihiqui.

Main jihuetaibon Papa Dios hihti queenai

¹⁶ Nai nequebihabo hihti queenxon ta jahuen baque hea huesti Papan raannishqui, hinamehxon nincacoinaibo jatihibi queyoyamanox mananon, tsoabi mehtexehtaxma jihuuenon.

¹⁷ Main jihuetaibo casticani jonon hihxonma bi hen jato jihuemahi jonon hihxon ta Papan hea raannishqui.

¹⁸ Nincacoinai jonibo ta jahua copi casticantimabo qui. Nincayosma jonibo ta casticaniscatihiqui, Papan baquen yohihah bi jahua nincayamahibo.

¹⁹ Mai janin xaba jahue que bi ta xaba jenipahiyamacaniqui. Yame caya ta jenipahicaniqui tiromabajohax. Jaa copi ta jato casticanyaxihqui.

²⁰ Nenoxon tiromabajibo rahsi ta johue jiscatsihyamahax xaba quiri cayosmabo qui, tiromabajibo caibaan jismis hihquish xaba quiri cayamahi.

²¹ Hihcoinaibo ta xaba quiri canicah qui. Papan jisi hah ta jaan jaiqui caibo hihnnon hihquish —Jesusen Nicodemo jaquin.

Juan Jesus qui yohuani

²² Jaa pecaho ta jahuen hexanicabo betan Jesus canishqui Judea mai janin. Jano jato betan banexon nincacoinaibo hihquimatanquin nashimaquin.

²³ Enon jema janinxon Juaman rihbi nashimaquin Salim hochoma jano noayahpa huean jaiton. Juaman jato nashimanon caibo jano cahi.

²⁴ Sipo xoboho Juan tsahonrihyamiboya jano jonibo bocani.

²⁵ Jascascahiya Juaman hexanicabo betan judiobo yohinani:

—¿Jenquetsahaxon non noquen hohcha potatihin? —hihqui yohinani rainyamahi.

²⁶ Juan qui caxon sca yohicanquin:

—Jordan hoque quexa mia manatipi jonin rihbi ta nashimahiqui, maestron. Min noque yohicoinipi joni tah qui. Jise. Hahqui sca ta jatihibi bocanihqui —hahcanquin.

²⁷ Jascahahbo jato yohiquin:

—Papan noque hinanyamahah tah non tsoambi jenquetsahpabi bihti hahtipahtimahi.

²⁸ Hea ta hen Cristoma qui. Hean pari yohixon ijonon hihxon res ta Papan hea yononishqui. Hen jascaphi tahn man matonbi honancoinai.

²⁹ Nesca tah qui, jisnahue. Jahuen haibo hihnon cahen bebo huanocatsihqui. Jan yohuanai ta jano rihbi nihxon jahuen hahberabetinin nincathihqui. Jan yohuanai nincacax coincoini. Jascarihbi ta hen hea coin coini jai.

³⁰ Caiti ta jaa jaiqui. Jahua hihtima ta hea jai —jato jaquin.

Bochiquihax jahui joni

³¹ Bochiquihax jahui joni ta jatihibi joni hihbojahiqui. Mainxon jonijahabo ta mainxon jisish jan jisiboya yohuanihqui. Naihoh quehax jahui joni ta jatihibi jonibaan hihbo qui.

³² Naihohxon jisnibo yohuancoin jan jai bi ta tsoambi nincacoinyamahihqui. Jan nincanilbo yohuancoin rihbi jan jai bi ta tsoambi nincacoinyamarilbihihqui.

³³ Jan yohicoinah nincacoinaibo ta Papa Dios ta hihcoinnicah qui hihqui qui.

³⁴ Papan raannica joni hihxon ta Papan joibo yohili qui. Hahqui ta jahuen yoshin siri Papa Dios yohuashihyamahiqui.

³⁵ Jaa jahuen baquehon queenxon ta Papan jatihibi jaa hinannishqui, jaan sca hihbo-janon.

³⁶ Jaa jahuen baque qui hinamehxon nincacoinai joni ta queyoyamanox manatihi qui. Jahuen baquen yohihah bi nincayamahi joni ta jihuettimahi qui. Jascapa ta Papan hihti jistahihmahiqui, hahquin.

4

Samaritano haibo Jesusen yohuanquihnai

¹ Juaman honanmaxon nashimahi mentan hashoan hihti caibo Jesusen honanmaxon nashimahi cahen fariseobaan nincascaquin.

² Jaanbi Jesusen nashimayamahi bi ta jahuen haxenicabaan res nashimanishqui.

³ Jahuen nashimatibo caichai fariseobaan joi nincacai honanxon Judea mai Jesusen potabahinquin, Galilea main caribinoxon.

⁴ Galilea main canoxon cahen Samaria mai nabebacahinti jai.

⁵ Cahí, Samaria mai meha jema janin nocoti, Sicar janeya jeman. Jacobonen jahuen baque José hinanni mai hochomahi.

⁶ Jene bihnoxon ta janobi Jacobonen mai poquinnishqui. Poquinxon chiquerihbiquin. Jano sca ta Jesus noconishqui. Bahin nihnihi paxquinax, barin manan tsacahiya jaa mai poquin quexa Jesus tsahopaquei.

⁷⁻⁸ Jahuen haxenicabo jema janin piti benahi canon cahen jano manati. Manahahnan, samaritano haibo jene bichi jahuiton, yocaquin:

—Hem nominon jene pishca hea bixxonhue, haibon —hahquin Jesusen.

⁹ Jaatian:

—¿Jenquetsahaxon min mia judio hihxon bi hea samaritano haibo jene yocacain? —samaritano haibaan Jesus yocaquin. Judiobaan samaritanobo jistahihmah copi haibaan jascajaquin.

¹⁰ —Tsoan mia jene yocacai honanxon cah min mianbi jaa yocakan. Papan mia hinanai rihbi honanxon cah min yocakan. Jaatian ta mia jene mohini hinanquehanhiqui —Jesusen jaquin.

¹¹ —Mai poquin ta nemin qui, bebon. Hahan tsecati rihbi tah min yamahi. —Jahuen min jascapa jene mohini bihtihin?

¹² Noquen xeni Jacobonen ta nea noa xehanishqui. Jahuen baqueboyaxonbi jahuen yohinabaan rihbi nea jene xehaquin. Nea noa noque jaan hinannih que bi cahran min jaa mentan hashoan coshi quin? —hahquin haibaan.

¹³ Jaatian Jesusen sca:

—Nea jene hahcaibo ta hahquirihbi nomicatsihnoxihqui qui.

¹⁴ Hean jene hinanah xehahax ta jahuentianbi jiricatsihyamascatihiqui. Jaa chicho quehax ta hen hinanai jene mohini jahuentianbi taraxaxma jabascatihiqui —haibo jaquin.

¹⁵ —Jaa jene hea hinanhue, bebon, jiricatsihyamascaax hen neno jene bichi jori joriyam-ascanon —haibaan Jesus jaquin.

¹⁶ Jesusen sca:

—Miin bene quenatanhue, joribinoxon —jaa haibo jaquin.

¹⁷ Jascahah:

—Heen bene ta yamahihqui —hahquin haibaan.

—Yohiquin sirija tah min jai, miin bene yamahi.

¹⁸ Pichca miin bene janish bi cah min rahma huetsa betan hihrihbibi, miin benema rihbi. Hihcoin tah min jai —hahquin Jesusen.

¹⁹ —Papan joi yohinica mia quin hen ta hen honanscrai, bebon.

²⁰ Nea machinxon ta noquen xenibaan betihihpaquexon Papahon shinanpahonishqui, Jerusalen janinxon non Papahon shinanti jai man maton jai bi —hihqui haibo.

²¹ Jesusen sca:

—Hen mia yohihah nincacoinhue, haibon. Papahon shinanaibaan ta nea mahchinxonma bi Jerusalen janinxonma rihbi noquen Papahon man shinanyaxihqui.

²² Man honanyamahi naman tah man betihihpaquetai, Papahon shinancatsihqui. Non honanai naman betihihpaquexon tah non noquen shinanai. Jihuemanicah ta judio xohta qui.

²³ Hahan Papahon shinanti nete jahuem bi ta nocoscrai, Papa qui betihihpaquexon shinancoinaibaan jahuen yoshin siriyanonbi Papahon shinanbiresnon, hahan shinancoinqui. Jascapa shinanaibohon ta noquen Papa queenihqui.

²⁴ Noquen Papa ta yoshin qui. Jahan shinanai noquebo ta jahuen yoshinyaxonbi shinancointi jaiqui —haibo Jesusen jaquin.

²⁵ —Papa Diosen caisai joni, Cristo hahcaibo, joyaxihqui ta hen honanai. Joxon ta jatihibi joi noque yohiyaxihqui qui —hihqui haibo.

²⁶ —Hea tah hen jaa qui, mia yohihi joni —hahquin Jesusen.

²⁷ Jasca jan jaiya bi jahuen haxenicabo nocoti. Haibo betan yohuanaiton merahax rahtecani. Rahtexon bi *¿*ahuejahi min hahbe yohuanahquin, jahua yohuan min Jain, hahbetan? Jesus yocacatsihqui bi yocayamacanquin.

²⁸ Jatian jahuen poo tsahonbahini jema janin haibo cahi cahi. Cahi nocoxon jonibo yohiquin:

²⁹ —Jatihibi hean janíbo hea yohihi joni jistannahue. *¿*Jaa Cristoma hin? —jato jaquin.

³⁰ Jatian jema janinhax cainax Jesus jisi bocani.

³¹ Jasca sca jaiboya:

—Pihue, maestron —jahuen haxenicabaan Jesus jaquin.

³² Pihue jaibaan bi:

—Man honanyamahi piti ta hea jai —Jesusen jaquin.

³³ Jasca jan jaiya jahuen haxenicabo jaabo rahsibi yohuani:

—*¿*Tsoan cahra piti bexonaxquin? —hihcanci yohuani.

³⁴ Jascabibo bi:

—Hea yononi queenai quescajaxonti ta heen piti qui. Jahuen tee queyoxonti rihbi ta heen piti qui.

³⁵ *¿*Chosco hoxne hihquish pari ta banabo tsinquitu siri sca jatihiqui hih man jayamahin? Man jascarai bi ta hen mato yohihi. Huai chian bana johuescrai jisnahue. Tsinquitu siri sca ta jaiqui hah ta hen mato jai.

³⁶ Cananahahn ta tsinquinacion jascabi jihuetai bimi tsinquihihqui. Bananica betan tsinquinica jenimascanon ta jaton tsinquitibo queyoyamanox manatihqui.

³⁷ Huetsan tsinquiaxahnon ta huetsan banahihqui hih ta jacanihqui. Hihcoini.

³⁸ Man bananixonma bi tsinquitannon tah hen mato yononihqui. Caibaan hahni tee tah man tsinquitihu —jato Jesusen jaquin.

³⁹ Jaa jema janinha samaritanobaan ta hichaxon Jesus nincacoinnishqui. Jatihibi hean janíbo ta hea yohihaxqui hahquin haibaan jato yohicoinali copi nincacoincanquin.

⁴⁰ Jesus qui caxon yocaukin:

—Noque qui banehue. Cayama sca jahue —hahcanquin. Jascalahbo jato betan rabe neten baneti.

⁴¹ Jaanbi jato yohihiya nincacoincanquin hashoan tsamaxon sca.

⁴² Nincacoinxon haibo yohicanquin:

—Mian noque yohihah nincacoinipixon bi tah non jaa yohuanai noquenbi nincaxon non hashoan sca nincacoinscrai. Jaa coin ta nai nequebihabo jihuemanicah qui, honancoin sca tah non jai —hahcanquin.

Hapon baque Jesusen rohajahi

⁴³ Rabe neten jato betan banetax janohax Galilea main sca cahi caresscrai.

⁴⁴ Caquin sca fa jato yohinishqui:

—Jahuen main jihuetai bi ta jahuen caibaan Papan joi yohinica nincacatsihyamahihqui —hahquin.

⁴⁵ Jascahi bi jatihibi jan Jerusalen janinha fiesta janinxon hahcai jistanipixon Galilea main jihuetaibaan Johue hahquin jaton main nocotaiton.

⁴⁶ Janoxon jan jato jene hompajaxonni jema janin nocorihbihi, Caná janeya jema, Galilea main. Capernaum jema janin cahen huesti tinintinin baque hisini jai.

⁴⁷ Judea mai mehax Galilea mai janin Jesus joresscái chanihah jaa yocaqui tininti jahui.

—Heen baque hea rahonxoní cahue. Hihcatsih sca ta jaiqui —hahquin.

⁴⁸ —Hahan honanti jisyamaxon tah man nincacoinyamahi, hahqui rahtetibo rihbi jisyamaxon —tininti Jesusen jaquin.

⁴⁹ Jan jascarai bi:

—Jani heen baque mahuanon carihue, hihbon —hahquin tinintinin.

⁵⁰ —Careshue. Miin baque ta jihuethiqui —tininti Jesusen jaquin. Min yohihi quescabi ta jacointhiqui hihquish tininti cahi caresscái.

⁵¹ Cahipish cabahinahi bi jahuen jonibaan behchibenaquin.

—Miin baque ta rohscaipishqui —hihcáni.

⁵² Jascaratón jato yocaquin:

—¿Jahuerahnón bari racatai jahuen yona tantihipishqui?

—Bahquish bari hihpaquescaya ta yona tantihipishqui —hihcáni.

⁵³ Jano bari racatai bi Miin baque ta jihuethiqui Jesusen jaipi jahuen papan honanscaquin. Jaatian sca jahuen xobo janinhahbo betan jathixonbi Jesus nincacoinascaquin.

⁵⁴ Jaa ta Judea mai mehax Galilea janin joribixon sca jahuen rabe sca jahuen hahan honanti Jesusen jato hahxonishqui.

5

Yora honanyamajaquetai Jesusen rohajahi

¹ Jaa pecaho judiobaan fiesta jaiya Jerusalen janin Jesus caribibi.

² Jerusalen janin ta jema xehpoti jaiqui, carnero janeya xehpoti. Jema xehpoti hochoma cahen noa pishca racatah Betesda hahcaibo, judiobaan join. Jaa hian quexa ta pichca xobo tsahotihqui.

³ Jaa xoboho cahen hicha hisinaibo racati, benchebo, tobi pishcabo, yora honanyamajaquetaibo. Noa pishca bahinon jaabo manati.

⁴ Jaa noa janin roqui Papan yonoti paquepahonish. Paquexon qui jene bahimaquin. Bahihiya qui jenenencanya paquemenohi joni rohahi siripi. Jahuen hisin jatihibi rohachahini.

⁵ Jano cahen huesti joni racati, treinta y ocho bari jascabi hisini.

⁶ Racataiton jisxon hicha bari sca hisinai honanscaxon:

—¿Min rohacatsihyamahin? —hahquin Jesusen.

⁷ —Jene bahihiya hea jenenencanya potanica ta yama qui, hihbon. Hea cahiya bi huetsa pari hihquihi —hihqui hisinai.

⁸ —Huenihue. Huenixon miin cacajati bichish caresscatanhue —Jesusen jaquin.

⁹ Jaatianbi rohacahinxon jahuen cacajati bichish caresscái. Jaton tantiti neten ta Jesusen jascajanishqui.

¹⁰ Jaa copi ta jan rohajahi joni judiobaan yohinishqui:

—Rahma ta tantiti nete qui. Tantiti neten tah min miin cacajati botimahi —hahcanquin.

¹¹ Jascalahbo bi:

—Miin cacajati bichish caresscatanhue hah ta hea rohajahi joni jaaxqui —jato jaquin.

¹² —¿Jahua joni jaa quin, mia Miin cacajati bichish jaya catanhue hahcai? —hahcanquin.

¹³ Yocacahbo bi Jesusen jane honanyamaquin, janó janibó hicha nichiton Jesus rebeso-huai copi.

¹⁴ Jaa pecaho Papan xobohoxon jaa merarihbixon:

—Jise. Mia tah min siriscái. Hohchayamascahue hashoan tiromamis —Jesusen jaquin.

¹⁵ Jaatian caresscaxon judiobo yohiqui:

—Hea rohajahi joni ta Jesus qui —hahquin.

¹⁶ Tantiti neten jan rohajahi copi judiobo Jesus qui rainyamahiton jaan jato joi bichin-quín:

—Heen papa ta rahma caman teetihqui. Hea rihbi ta hen teetai —Jesusen jato jaquin.

¹⁸ Jascajaha hashoan sca Jesus rehtecatsihquibohi. Jan tantiti neten tantiyamahi copi rehtecatsihquibohi. Papa Dios betan jasca rabe hihquish, Papa Dios ta heen papa qui jan jaiton.

Papan yohihah jahuen baquen haxemahi

¹⁹ Jesusen jato yohirihbiquin:

—Yohicoín ta hen mato jai: Papan baquexon bi tah hen hehmebi jahuejati hahtipahyamahi. Heen papan hahcai jísxon pari tah hen hahcai, jatihibi heen papan hahcai quescabijaquin hean rihbi hahquin.

²⁰ Hea jahuen baquehon shinanxon ta heen papan jatihibi jan hahcai rihbi hea jahuen baque jismahihqui. Jahuen coshiyaxon hen hahcai bi ta nea mentan hashoan coshin hen hahcai rihbi hem mato jismayaxihqui, man rahtenon.

²¹ Mahuanihbo huenixon heen papan jihuemahi quescajaribiquin tah hen jahuen baque hihxon hea hen queenaibo hean jihuemahi.

²² Tsoabi casticanxonma ta Papan hea yonohihqui hean sca jatihibi jointi honanxon casticanayaxahnón.

²³ Papa Dios Nete Hihbohi man honanai quescajaribiquin man jahuen baque Nete Hihbohi man jathixonbi honannon ta jascjahiqui. Jahuen baque ta nete hihboma qui hihquibo ta Jaa raanni jahuen papa rihbi ta nete hihboma qui hihnicahbo qui.

²⁴ Yohicoín tah hen mato jai: heen joi nincaxon bi hea raanni heen papa rihbi nincacoinai joni ta queyoyamanox manatihqui. Jaa casticanxonma ta Papan mahnescaiqui, mahuataibo janinhax jihuetaibo qui mahnenon.

²⁵ Yohicoín ta hen mato jaribih: mahuanihbaan ta Papan baquen yohihi nincascaiqui, nincacaibo jihuescanon.

²⁶ Jahuen papa teehihmanicahi quescajibih tah hen hea jahuen baque jaa xohtahi, Mia rihbi jato teehihmanicahue, Papan hea janí.

²⁷ Mia tah min noquebaque qui. Mian sca jato casticanhue hah ta heen papan janishqui.

²⁸ Hen mato yohihih bi rahteyamanahue. Hean quenahah ta tsahon janinhahbaan jathixonbi nincayaxihqui qui.

²⁹ Sirijanibo ta cainax huenicahintihiqui, jascabi sca queyoyamanox manati jihuenoxon. Tiromajanibo rihbi ta cainax huenitihiqui, jascabijaquin casticanahbo janoxon.

Hahan Jesus honanti

³⁰ Hehmebi tah hen jahuejati hahtipahyamahi. Papa nincaxon res tah hen jato castantichi. Jaa copi tah hen pontejaquin shinanxon casticanayaxihqui. Jaan hea yononixon shinanai quescajaquin tah hen jascajatihi. Heabi hen queenajah ta hen jayamahi.

³¹ Hehqui heabi yohuanax cahen heen yohuan jahuabi hihyamahan.

³² Hea jahua quin honanahbo ta huetsa yohuancoinihqui. Hea yohihi jan hihcoini yohuanai tah hen honanai.

³³ Honancatsihquin man Juan qui raanah ta hihcoini jaa yohuancinnishqui.

³⁴ Jonibo res yohuanai joi ta hean nincayamahi. Papan mato teehihmanon hihxon res ta hen mato yohihi.

³⁵ Johue quetejaha xabatai janin quescahi tah man Juan qui caniqui, jahuen xaba chian sca basima jenimanoxon quescahi.

³⁶ Heen papan ta hea teebo yohinishqui hean queyoxonnon. Jaa ta hen hahcai, hea papan raanni man honancoinnon hihxon. Hean hahcaibo ta hea yohihi joi quesca qui, hahan hea honanti. Juaman yohini nincaxon hahan hea honantih bi hean hahcai jísxon hashoan sirijaquin honanti.

³⁷ Hea raanni heen papan ta hehqui yohicoínihqui. Jan yohuanai tah man jahuentianbi nincayamanihqui. Beron rihbi tah man jaa jisyamaniqui jahuentianbi.

³⁸ Jaan raanni joni man nincacoinyamahiya ta maton jointi janin Papan joi yamahihqui.

³⁹ Papan huishani joi jisquin sirijanahue. Hea yohihi joi ta jaa qui, hahan hea honantih bi tah man hahan mahuataxma jihuetai man shinanai.

⁴⁰ Hean mato teehihmanon hehqui jottihi bi tah man jocatsihyamahi.

⁴¹ Jonibaan res hea Yotihos coshi mia quin hahti tah hen queenyamahi.

⁴² Mato tah hen honanai. Noquen Papahon tah man queenyamahi.

⁴³ Heen papan hea raanah hen jahui bi tah man hea Johue hahyamahi. Jaabaanbi shinanax jahuibo tah man Johue hahtih.

⁴⁴ ¿Jenquetsahaxon man mato qui siripi yohuanai benaxon man noquen Papan joi nincacointihin? Papa uesti noquen Dios hihqui bi tah man jaa siripi mato qui yohuant man queenyamahi.

⁴⁵ Heanbi noquen Papa maton hohcha yohipaqueyaxihqui shinanyamanahue. Mato cahenica ta Moisesnin huisha qui, hahan jihuetai man shinanai que bi.

⁴⁶ Moisesnin huishani joi nincacoinxon cah man hea rihbi ninquehehanai. Hehqui ta jaan huishanishqui.

⁴⁷ ¿Jenquetsahaxon man heen joi nincacointihin, Moisesnin huisha rihbi nincacoinxonma bi? —jato Jesusen jaquin.

6*Cinco mil Jesusen pimahi**(Mt 14.13-21; Mr 6.30-44; Lc 9.10-17)*

¹Jaa pecaho sca ta Galilea mai meha hian pohquejaqueti Jesus canishqui. Tiberias cahen jaa hiaman jane huetsa.

²Papan coshiyaxon hisinaibo Jesusen rohajahi jisxon hichaxon Jesus chibancanquin.

³Mahchi manichish jano jahuen haxenicabo betan Jesus tsahopaqueti.

⁴Judiobaana pascua fiesta nea pishca sca jai.

⁵Jari jisxon hihti caibo hahqui jahui meraxon Felipe yocaquin:

—¿Jahuerahn non piti marotihin jaabaan pinon?

⁶Felipe tananoxon ta jascajanishqui, jaanbi piti caijanoxon bi yocaquin.

⁷Jaatian:

—Doscientos libras non jai bi ta hahan paan marohah jato jatihixonbi piti senen-timahiqui, hexti pishca cohren huesti hinanah bi —Jesus Felipenin jaquin.

⁸Huetsa rihbi jahuen haxenica jahui, Andres, Simon Pedron huetsa.

⁹—Neno ta beronan jaiqui. ¿Pichca cebada paanya rabe tsatsa rihbi jan jai bi hen neatihu noquebo janon bi jaa jahuejatin? —Jesus jaquin Andresrin.

¹⁰—Jato tsahopaque manahue —Jesusen jaquin. Hani pasto jano jaiya, jano tsahopaque-can. Bebobon rahsi toponan ta cinco mil joni janishqui.

¹¹Jaatian jaa paan pishca bihxon Papa yocaxon tehcxalon tsahotaibo Jesusen hinan-paquequin. Tsatsa sca jascajaribiquin jaabo queenai tihi.

¹²Yaniscaiboya:

—Texejaha teque romishin tsinquitannahue, jahuabi yohyocohyamanon —jahuen hax-enicabo Jesusen jaquin.

¹³Jascajaha tsinquicanquin. Pichca cebada paan pihibaan texejahi tequebo tsinquixon, doce tasa bohasacanquin.

¹⁴Jascajaquin Papan coshiyaxon jan hahcai jisish:

—Nea coin ta Papan joi yohinica main joyaxihqui yohicanpahonishqui —hihqui piji tsahotaibo.

¹⁵Jaton quiquin hapo sca hihnon jaa bichi jocatsihqui baan bi honanscaax mahchi janin jaa huesti Jesus caribili.

*Jesus jene benichi**(Mt 14.22-27; Mr 6.45-52)*

¹⁶Bepiscahya jaton nonti janin jahuen haxenicabo nihpaqueti cahi.

¹⁷⁻¹⁸Nontin nanetax Capernaum quiri pohquejahqueti cahi. Yamescaya jato qui Jesus joriyamahi bi nihuen coshin behchonjaquin.

¹⁹Basi huina huinaxon yame jisibaan bi hahchon hian benichi Jesus jahui, nonti ho-choma sca. Hian benichai merahax rahtecani.

²⁰Rahtetaibaan bi:

—Hea ta hen qui, raqueyamanahue —hihqui Jesus.

²¹Jaatian nontin nanemacatsihqui bi nococahinscacani, jano jan cahi hoque quexa.

Jesus benahibo

²²Xaba paquescaya cahen hoque quexa banetipibaan benahah bi Jesus yamasca. Jahuuen haxenicabo betan ta Jesus naneyamahipishqui. Jaabo rahsibi nontin cahi tah non jisipiqui. Jaa huesti nonti res ta jaipishqui, huesta yamahi. —Jahuerahn non Jesus cahipishqui? hihxon benahahbo bi yamahi.

²³Janoxon jan Papa yocaxon jato paan pimahipi hochoma sca Tiberias janinhax jahui nontibo nocoti.

²⁴Jahuen haxenicaboyabi Jesus xahbanjahax, hahan behibo nontin sca nanetax, Caper-naum janin jahui became, Jesus benahi.

Jesus noquen hahan jihueti piti

²⁵Pohquequihrani joxon Jesus meraxon yocacanquin:

—¿Jahuentian min neno jahuequin, maestron? —hahcanquin.

²⁶—Yohicoin ta hen mato jai: Papan coshiyaxon hen mato hahxonai jisipixon bi tah man jaa copima hea benahi. Paan piji yanitipixon copi tah man hea benahi.

²⁷Queyonica piti copi teeyamanahue. Jahuentianbi queyoyamanox manatai piti copi teenahue. Noquebaque hihxon hen hinanyaxihqui piti ta jascapah qui. Hea jascapa hinannica man honannon hihxon ta jahuen shinanyaxon hen hahnon Papan hea hinanihqui —Jesusen jato jaquin.

²⁸Jan jascahyia:

—¿Jahueja non jatihin, Papan tee hahnoxon? —hahcanquin.

29 —Papan raanai joni nincacointi ta jaa tee qui —Jesusen jato jaquin.

30 —¿Jahua hahan honanti min hahcain, jisxon non nincacoinnon hihxon? ¿Jahueja min jain, Papan shinanyaxon?

31 Cahchihoxon ta noquen xenibaan maná piti pipahonishqui. Jaa yohihi ta Naihoh queha piti ta jato hinannishqui, pihabo, hih Papan huisha janin jaiqui —Jesus jacanquin.

32 —Mato tah hen yohicoina: naihoh queha piti ta Moisesnin mato hinanyamanishqui. Heen papan caya ta mato naihoh queha piti coin hinanihqui.

33 Jaan hinanai piti ta naihoh quehax botopaqetihqui, jaa pihx jihuetahbo —Jesusen jato jaquin.

34 —Jascapa piti noque hinanquin jeneyamaxahnhue, Hihbon —hahcanquin.

35 —Hea ta hen hahan jihuetai piti qui. Hehqui jahuibo ta picatsihyamascatihiqui. Hea nincacoinaibo ta jiricatsihyamascatihiqui, jahuentianbi.

36 Hea jisxon bi tah man nincacoinyamahi hah cah hen mato jai.

37 Heen papan hea hinanai tihibi ta hehqui joti qui. Hehqui jahuibo tah hen potatimahi, ni huestibi.

38 Hea queenai quescajahi tah hen joyamaniqui. Hea raanni queenajahi tah hen naihoh quehax botopaqetax joníqui.

39 Ni huestibi manomaxonma tah hen jan hea hinanai jatihibi hean hueniyaxihqui nete queyoscanon. Hean jascajati ta hea raanni queenihqui.

40 Jahuen baque jisxon jaa nincacoinaibo queyoyamanox manati ta heen papa queenihqui. Nete queyoscanon tah hen jato hueniyaxihqui —jato jaquin.

41 Jan jascahiya judiobo hahqui renren renreni. Naihoh quehax botopaqueni piti ta hea qui jan jaiya hahqui rainyamacani.

42 —¿Nea Jesus janeya joni Josepan baquema hin? —Jahuen papa, jahuen mama non honanyamahin? —Jenquetsahaquin sca Hea tah hen naihoh quehax paquenihqui hah noque jaiquin? —hihcanci.

43 Jaatian:

—Mato rahsibi yohuani renren renrenyamanahue.

44 Heen Papan Johue hahca ta hehqui jahuibo jahuipi. Jan Johue hahyamaha cahen joti hahtipahyamahan. Hehqui jahuibo tah hen hueniyaxihqui, nete queyoscanon.

45 Papan honanmahibon rahsi ta jatihiqui; jascajaquin ta Papan joi yohinicabaan huis-hanishqui. Heen papa yohuanai nincaxon honanaibo jatihibi ta hehqui jotihiqui.

46 Tsoanbi noquen Papa jisyamani que bi ta Papa janinha huestichin jaa jisnicah qui.

47 Hihcoinja ta hen mato jai: nincacoinaibo ta jahuentianbi queyoyamanox manatihqui.

48 Hahan jihuetai piti ta hea qui.

49 Cahchihoxon maná piti pihx bi ta maton xenibo mahuanishqui.

50 Naihoh queha piti pihx tah man mahuayamascatihi. Jascapa piti ta naihoh quehax botopaqetihqui.

51 Naihoh quehax botopaqueni piti mohitahpa ta hea qui. Jascapa piti pihx tah man queyoyamanox manascatihi. Hean hinanai piti ta heen yora qui. Mai mehabo jihueyaxahnon tah hen jato hinanai —jato jaquin.

52 —¿Jenquetsahaxon noque jahuen yora hinantihquin, non pinon? —hihquish jaabo rahsibi judiobo join bahchinnanscrai.

53 Join rehtenanaiboya Jesusen jato yohiquin:

—Yohicoin tah hen mato jai. Noquebaquen yora piyamaxon jahuen jimi rihbi xehayamax tah man jihueyamahi.

54 Heen yora pixon heen jimi rihbi xehahi noque ta queyoyamanox manatihqui. Jaabi rihbi tah hen hueniyaxihqui, nete queyoscanon.

55 Heen yora ta piti coin qui. Heen jimi rihbi ta xehati coin qui.

56 Heen yora pixon heen jimi rihbi xehahi tah man heen hahberabetibo qui, hea rihbi maton hahberabeti.

57 Heen papa ta jihuetai qui. Hea ta raannishqui. Hea jaa copi jihuetai quescarihi ta hea pihibo jihuetai qui, hea copi.

58 Jascapha naihoh quehax botopaqetai piti qui. Noquen xenibaan piti pihx bi mahuanih quescayamahi. Nea piti pihx queyoyamanox manati, jascabi sca jihuenox manati, —jato jaquin.

59 Capernaum janin haho tsinquit xobohoxon ta Jesusen jato jascajaquin yohinishqui honamquaquin.

Queyoyamanox manati

60 Jan yohuanai nincaxon:

—Honantima tah qui, jan yohuanai. ¿Tsoan nincatihiquin? —hihqui hicha jahuen haxenicabo.

⁶¹ Jahuen haxenicabo hahqui renren renrenai jahuen jointinin honanxon jato yocaquin: —¿Hen yohuanai nincacax man rahtetain?

⁶² ¿Janohax hen jonítom hen hahquirihbi hinahihnatai jisish cahran man hihti rahtemahin?

⁶³ Dios Yoshiman ta mato jihuematihiqui. Maton yora betan res tah man jahua bihitimahi. Hen mato yohihi joi ta yoshinyahpa qui, hahan jihuetai.

⁶⁴ Hahan jihuetai joi hen mato yohihah bi tah man caibaan nincacoinyamahi —jato jaquin. Jato jismenoxon ta tsoabo nincayosmabohin Jesusen honannishqui. Paranxon jaa bilmayaxihqui joni rihbi honanquin.

⁶⁵ —Jaa copi ta hen mato jascajahipiqui. Papan shinanyamahiya ta tsoabi hehqui jotimahiqui —hahquin.

⁶⁶ Jan jascaraiai ta hicha jahuen haxenicabaan jaa potabahinnishqui. Haxehi hahbetan nihyamascacanai.

⁶⁷ —¿Maton rihbi man hea potabahincatsihquin? —jahuen doce haxenicabo Jesusen yocaquin.

⁶⁸ —¿Tsohqui non catihin nan, Hihbon? Mian tah min noque hahan queyoyamati joi nincamahi.

⁶⁹ Mia Papan raanai jahuen caisti joni tah non mia honancoinai. Shinanquin sirijaquin tah non honanscái —hahquin Simoman.

⁷⁰ —¿Mato doce hen caisyamanihquin? Mato quiha huesti ta tiroma yoshin qui —Jesusen jato jaquin.

⁷¹ Jan yohihi ta Judas qui, Simon Iscariotenin baque. Jahuen doce quiha hihxon bi Jesus bihmati shinanai joni.

7

Jahuen huetsabaan nincacoinyamahi

¹ Jascahipish Galilea mai janin res Jesus nichí. Judea main nihcatsihyamascai, judiobaan rehtecatsihquiya.

²⁻³ Judiobaan tapasohoxon fiestajati nete nea pishcascaiya, jahuen huetsabaan Jesus yohiquin:

—Nenohax Judea main carestanhue, janoxon min hahcaibo miin haxenicabaan rihbi jisnon.

⁴ Sirijaquin jisíbo hihxon ta jonexon tsoanbi jahuejayamahiqui. Papan coshiyaxon hahan honanti hahcatsihquin janibixon hahhue, jathixonbi jisquin sirijahabo —hahcanquin.

⁵ Nincacoinyamaxon copi ta jahuen huetsabaanbi jascajanishqui.

⁶ Jesusen sca jato yohiquin:

—Caritima pari tah hen jai. Mato caya botannahue. Jahua copi hea manatima tah man jai.

⁷ Mato jistahihmajati ta mai mehabaan hahtipahyamahiqui. Jaabaan tiromajahi hean hihcoinqaquin yohihiya ta hea jistahihmajacanihqui.

⁸ Fiesta janín botannahue, mato. Caritima ta hea jai. Queenax ta hea catihi.

⁹ Jato jascajaquin yohihax, Galilea main banetahbi.

Tapasax jihuetahbahibo janin Jesus cahi

¹⁰ Jahuen huetsabo fiesta janin cahipi sca jaa rihbi cahi, caibaan jisnonma sca, janibima.

¹¹ Jonetax cahi bi fiesta janinxon judiobaan jaa benaquin:

—¿Jahuen jaa quin? —hahcanquin.

¹² Hihti caibo jaya baxex baxexi.

—Siri joni tah qui —hihqui caibo.

—Sirima ta qui. Jonibo ta paranihqui —hihqui caibo rihbi.

¹³ Judiobo qui raquetax tsoabi coshin jaya yohuanyamahi, honahaxbi yohuancani.

¹⁴ Fiesta naexbi sca Papan xoboho mapexon Papan joi Jesusen haxemaquin.

¹⁵ Jan jascahiya rahtetax judiobo yohuan:

—¿Jenquetsahaxon neatohon huisha joi honanishquin tsoanbi quirica honanmanima bi?

—hihcani.

¹⁶ Jascahiton Jesusen yohiquin:

—Hen jato honanmahi ta heen joima qui. Hea yononihton joi tah qui.

¹⁷ Papan shinanajati hahcatsihquiaan ta honantihiqui. ¿Papan shinanaiya honanma hen Jain? ¿Heanbi shinanxon honanma hen Jain? Jaabaan ta hen yohuanai honantihiqui.

¹⁸ Coshi joni hihqui shinanahbo hihquish ta jaabaanbi shinanax yohuanabio jaiqui. Hea raanai heen Papa coshi hihqui honanahbo hihquish tah hen hea yohuanai. Jascapa yohuannica ta hihcoini yohuannica qui. Jahuabi tiroma yohuanyamahi.

¹⁹ ¿Maton nincati joi Moisesnin hinanyamanishquin? Ni huestichinbi tah man jaa joi nincayamahi, jaan hinanni que bi. ¿Hean mato jahua hahca man hea rehtecatsihquin? – Jesusen jato jaquin.

²⁰ –Mia rah ta yoshiman hihbojahiqui. ¿Tsoan mia rehtecatsihquin? –hihcani.

²¹ Jesusen jato yohirihbiquin:

–Hen hahcai huesti jisish tah man jatihibi rahtetai.

²² Jaanbi shinanxonma bi noquen xenibaan pari yohihah ta Moisesnin mato honantiyahpati yohinishqui. Tantiti netenbi tah man baquexo honantijahi.

²³ Moisesnin yohini quesajacatsihquin tantiti netenbi joni huetsa honantijanicaboxon jahua copi sca man tantiti neten hean huetsa joni rohajahiya man hehqui rainyamahin?

²⁴ Beron jisxon res huetsa jonin shinan honanti shinanyamanahue. Shinanquin siri-jaxon pari joni huetsa honannahue –jato jaquin.

Nai janinhax Jesus joni

²⁵ Jasca jan jaiya caibo Jerusalen janinhahbo yohuanscrai:

–¿Neama hin, rehtecatsihquibo joni?

²⁶ Jistan. Janibi nichish yohuanai bi ta jahua hihyamacanighqui. ¿Cristo hihqui noquen cacannicabaan honancoinscainquin?

²⁷ Janobihax nea joni jahui tah non honanai. Cristo joni jahuiya roqui tsoanbi jahuerahnah jaa jahuiquin hihxon honanyamayaxihcanighqui –hihcani.

²⁸ Jaa copi cahen Papan xobohoxon jato hexemahi sca Jesus coshin yohuani:

–¿Hea man honanain nan? Janobihax hea joni man honanrihbih nan? Hehme mehax ta hen joyamaniqui. Hihcoinnicahton ta hea raannishqui. Jaa tah man honanyamahi.

²⁹ Hean tah hen jaa honanai. Jaan hea raanah ta hen jaa janinhax joni qui –hahquin Jesusen.

³⁰ Jasca jan jaiya xecotancatsihxon bi jaa bihxon rehteti siriymaparihiya tsoanbi meheyamaquin.

³¹ Rehteti shinan caibaan jai bi hicha noquebaan Jesus nincacoinquin.

–Neatohon ta hahan honanti hahquiqui, hicha. ¿Cristo joxon, neatohon hahcai quesajaxon bi hashoan hicha rihbi hahan honanti hahtihiqui? –hahcanquin

Fariseobaan Jesus bihcatsihqui

³² Jascari baxexaibaan bi fariseobaan nincaquin. Nincaxon, sacerdote hapobo betan fariseobaan sca jaton porisiabo raanquin, Jesus bihtannahue hahxon.

³³ Bihcatsihscaincopi cahen jato yohiquin:

–Basima tahni sca tah hen mato betan hihtihi. Hea raanni janin sca hea cati ta hochoma sca qui.

³⁴ Hea benaxon bi tah man hea meratimahi. Hea cahi janin tah man cati hahtipahyamathihi –jato jaquin Jesusen.

³⁵ Jaabo rahsibi sca judiobo yohuani:

–¿Jahuenbi cacatsihquiquin, non jaa merayamas canon? ¿Nahuabo qui canibó janin cacatsihquiquin, nahuabo sca honanmahi?

³⁶ ¿Benaxon bi tah man hea meratimahi jan hihqui bi jahua hihcatsihquiquin? Hea cahi janin tah man cati hahtipahyamahi. ¿Jan jascari yohuani hen jahua hihcatsihquiquin? – hihcani.

Jene mohini bahihi

³⁷ Hahan fiesta queyotai neten, jaton hani netenbi, nichish Jesus coshin yohuani:

–Jircatsihquish hehqui benahue, xehahi.

³⁸ Hea nincacoinai joni janinhax ta jene mohini huean bahihihcamaxihquiqui, jahuen jointi janinhaxbi, Papan huisha joi jai quescari –hahquin.

³⁹ Jan jene yohihi ta Dios Yoshin qui, nincacoinaibaan bihyaxihqui Dios Yoshin. Jesus huenihihniyamaxon ta jahuen yoshin Papan hinanyamaparinishqui.

Join bahchinanaibo

⁴⁰ Jan jascari yohuanai nincacax tsinquijaquetaibo yohuanrihbih:

–Nea coin ta Papan joi yohinica qui –hihcani.

⁴¹ –Noquen hapo hihnon Papan caisai joni tah qui –hahqui caibo rihbi.

–¿Galilea mai janinhax Papan caisai joni jotihiquin?

⁴² David xohtahax ta David jihuepahoni janinhax Papan caisai joni picotihiqui, Belen jema janinhaxbi. ¿Jascayamahi, Papan huisha joi janin? –hahcanquin caibaan rihbi.

⁴³ Jascapa mesco shinanyahpabohax join bahchinnanscacani.

⁴⁴ Caibaan Jesus xecotancatsihquin bi tsoanbi meheyamaquin.

Nincayamahi hapobo

⁴⁵ Jano sacerdote hapobo betan fariseobo manatai janin jaton porisiabo nocorihbihiton yocacanquin:

—¿Jenquetahpa hin man hihueyamahahquin? —hahcanquin.

⁴⁶ —Tsoabi ta jan yohuanai quesca jayamanishqui, jahuentianbi —hihqui jaton porisiabo sca.

⁴⁷ —¿Mato rihbi jaan paran paranaxquin?

⁴⁸ Maton hapobaan ni huestichin jaa nincayamahi ¿man jisyamahin? Fariseobaan rihbi ta jaa nincayamahihqui.

⁴⁹ Nea tsamatai rahsi ta yohitimabo qui, Papan huisha joi honanyamahibo —jato jacanquin fariseobaan.

⁵⁰ Nicodemo janeya Jesus qui johuanni joni jato betan hihxon jato yocaquin:

⁵¹ —¿Huetsa joni yohuanquihnxonma bi, jan hahcai rihbi honanxonma bi non jaa casticantihin? ¿Papan huisha joi janin jascajati joi jaiquin? —jato jaquin Nicodemonen.

⁵² —¿Mia rihbi tsi ra min Galilea mai meha quin? Papan joi jisquin sirijaxon, Galilea mai janinhax Papan joi yohinica jotima honanhue —jacanquin.

Tsinihii haibo

⁵³ Janohax picotax, jatihibi jaton xoboho bocani.

8

¹ Olivoyahpa mahchin sca Jesus cahi.

² Hihari sca Papan xoboho cahi. Jano sca roqui hahqui jatihibi joni tsinquitaiton tsahoxon jato yohi yohinish.

³ Jan jato haxemahiya qui jaton haxemanicahbo betan sacerdote hapobaan qui huesti haibo hihuequin, joni huetsa betan hihqui qui meraxon. Jato tocan jaa nichinxon qui Jesus yocacanquin:

—Joni huetsa betan hihqui bi tah non nea haibo merahahqui, maestron.

⁵ Huishaxon ta Moisesnin yohinishqui, nescapa non macaman tsacaquin rehtenon. ¿Mian cahrarn? ¿Jahua min mian yohihin? —hah qui jacanquin.

⁶ Jaton hapobo yohinoxon qui Jesus tanaquin jascajacanquin, hahqui yohuanti qui janon. Jasca jaabo jaiya qui cahcopaquexon qui jahuen metotinin mai huishaquin.

⁷ Jascabi yocacahbo qui huenixon qui jato yohiquin:

—Hohchajomaxon mato janinha huestichin macaman tsacamenonon —hah qui jato jaquin.

⁸ Cahcopaqueribhixon qui mai huisharihbiquin.

⁹ Jan yohihi nincacax qui yosibobo rahsi pari cahi. Jaa pecaho qui huesti huestibo cahi, jaa xobo janinhax caini. Jesus patax haibo huesti qui banenon.

¹⁰ Huenixon qui haibo Jesusen yocaquin:

—¿Jahuen bocanaxquin? ¿Mia tsoanbi casticancatsihyamahiquin? —hah qui jaquin.

¹¹ —Tsoanbi hihbon —hihqui haibo.

—Hean rihbi ta hen mia casticanyamahi. Caresscatanhue. Jahuentianbi hohchayamasc ahue —hah qui jaquin Jesusen.

Jesus noquen xaba hihbo

¹² Huetsa tian rihbi ta Jesusen jato yohinishqui:

—Jatihibi main ta hen hean jato xabajaxonai. Hea chibanaibo ta bahquish chian nihyamahiqui. Hahan jihueta xabapan sca ta mayaxihcanihqui.

¹³ Jan jascajahiya:

—Mianbi shinanax tah min yohuanresai. Chanicoen tah min jayamahi, noquen ninctima hih —fariseobaan sca hahquin.

¹⁴ Jesusen sca jato pontequin:

—Jahuerahnohax jahuem sca hea catihin hen honanax yohuanai hen mato yohihi ta maton nincati qui, yohicoinai joi. Heabi yohihi hen yohuanai bi tah man nincacointi jai. Janohax jahuem hea jahuerahn cahin man tah man honanyamahi.

¹⁵ Beron res jisxon tah man joni huetsana jahuen shinan honanti shinanai. Jascajaquin shinanaxon tah man casticannocon Papan rahuibo yohiti shinanai. Hean ta hen tsoabi jascajaquin yohiyamahi.

¹⁶ Yohixon tian tah hen hahcoinquin yohitihi. Hea raanni heen papa betan tah hen jaton shinan honanai, hea huestichin yohixonma bi hahbetanbi yohixon.

¹⁷ Maton nincati joi janin ta nescapa huisha jaiqui. Rabechin yohihah pari ta yohuan coin qui, nincati.

¹⁸ Rabe tah non qui hah ca hen mato jai sen. Hea yohihi heabi hihqui bi ta hea raanni heen papan rihbi hea yohihiiqui –jato jaquin Jesusen.

¹⁹ Jaatian:

–¿Jahuen hin, miin papa? –hahcanquin.

–Hea honanyamaxon tah man heen papa rihbi honanyamahi. Hea honanxon cah man heen papa rihbi honanan –jato jaquin.

²⁰ Janoxon Papa Dios coriqui hinanti chiquehoxon ta Jesusen jato jascajaquin yohin-
ishqui, Papan xobohoxon honanmaxon. Jahuen mahuati hora nocorihyamahiya tsoanbi
meheyamaquin.

Jano jaa cahijanin jaabo catimahi

²¹ Jahuen Papa honanyamahibo copi jato hahquirihbi yohiquin:

–Hea tah hen cahi. Hea benahax bi tah man maton hohchayabi mahuatihi. Jano hea cahiton tah man catimahi –hahquin.

²² Nincaxon bi honanyamahax sca:

–¿Jano hea cahiton tah man catimahi hihquish bi hahri rehtecatsihquiquin? –hahcani
judiobo.

²³ –Mato tah man naman mehabo qui. Hea tah hen bochiquiha qui. Mato tah man nea xabapan meha qui. Hea tah hen nea xabapan mehamo qui.

²⁴ Jaa copi tah hen Maton hohchayabi tah man mahuatihi hah hen mato jaahqui. Hea hihqui shinanyamahax tah man maton hohchayabi mahuatihi –Jesusen jato jaquin.

²⁵ Jan jascajahiya:

–¿Mia min jahua quin? –hahcanquin.

–Jaa yohi tah hen mato jai.

²⁶ Mato qui yohiti ta hen hicha jai. Mato casticanti rihbi tah hen hicha jai. Man tiromahibo bi ta hea raanni hihcoini yohuannica qui. Jan yohuanai nincaxon ta hen jaa joi rihbi main jihuetaibo yohihi –jato jaquin Jesusen.

²⁷ Jahuen papa yohihi jan hihqui bi ta honanyamacannishqui.

²⁸ Honanyamahiton Jesusen yohiquin:

–Hea noquebaque jihuun hueonxon pari tah man hea hihqui honantih. Hehmehbi jahuejaxonma bi papan hea yohini joi rahsi yohi hen jai tah man honantih.

²⁹ Hea raanni noque ta hehbe hihquiqui. Jaa queenai quescajaquin hen jai copi ta hea jeneyamahihqui.

³⁰ Jascajaquin jato yohihah hichaxon nincacoincanquin.

Papan baqueboya hina baquebo

³¹ Nincacoin ta jai hihquiðo judiobo sca Jesusen yohiquin:

–Heen joi jascabijaquin nincacax tah man heen hexenacabo jacointih.

³² Hihcoin hen jani quen tah man honantih. Jaa honanax tah man hinabomascathihi –Jesusen jato jaquin.

³³ –Noque tah non Abrahanen baquebo qui. Tsoanbi ta noque hinajayamanishqui, jahuentianbi. ¿Jenquetsahpahin min noque Hinaboma sca tah man jatihi min noque Jain? –Jesus jacanquin.

³⁴ Jascaraiton jato yohirihbiquin:

–Yohicoin tah hen mato jai. Jatihibi hohchataibo ta hina qui, hohchapan hihbojahah.

³⁵ Hina ta xoboho jascabija jihue jihueyamahihqui. Xobo hihbaan baque res ta jano jihuenci qui, queyoyamanox mana jihueti.

³⁶ Papan baquen mato hohca sohuxona tah man hihcoini hinabomascathihi.

³⁷ Abrahanen baquebo man jai tah hen honanai. Jahuen baqueboxon bi tah man hea rehtecatsihqui, maton jointi janin heen joi hihquicasquimahiya.

³⁸ Heen papan hea jismahi ta hen mato yohihi. Maton rihbi tah man maton papan yohihi quescajaquin hahcai –jato jaquin Jesusen.

³⁹ –Noquen papa xeni ta Abraham qui –hahcanquin. Jesusen sca:

–Abrahanen baqueboxon tah man jahuen tee hahquehahnai.

⁴⁰ Hea tah man rehtecatsihscai, Papan hea yohihi hen mato yohicoinah bi. Abrahanen ta jascajayamanishqui.

⁴¹ Maton papan tee tah man hahcai –Jesusen jato jaquin.

–Noquen mama ta tsiniyamanishqui. Huesti res ta noquen papa qui, noquen papa Dios –hahcanquin.

⁴² Jesusen sca:

—Papa Dios maton papa hihquiya tah man hehon queenquehanai. Papa Dios janinhax jonish tah hen hea jahui. Hehmehbi tah hen joyamaniqui. Jaan ta hea raannishqui.

⁴³ ¿Jenquetsahpahin man hen mato yohihah bi man honanyamahin? Heen joi nincayos-maboxon tah man honanyamahi.

⁴⁴ Tiroma yoshin ta maton papa qui. Jaa queenai hahti res tah man maton rihbi shinanai. Noquebo jamenohitian rehtemis hihnish ta rahma caman jascabi rehtemis qui, maton papa. Jaabiyahpa quesamisax, jascabihi quesahi. Quesa hihxon ta caibo sca quesamaribiqui. Hihti quesa, maton papa.

⁴⁵ Hihcoini yohuan hen jai copi tah man nincacoinyamahi.

⁴⁶ ¿Tsoan man hea heen hohcha yohitihin? ¿Jenquetsahpahin man hea hihcoini yohuanai bi man hea nincacoinyamahin?

⁴⁷ Papan baquebo ta jahuen joi nincanicabo qui. Jahuen baquemaboxon tah man nincayamahi —Jesusen jato jaquin.

Abraham jariyamahiya Cristo jihue hihboni

⁴⁸ Jan jato jascajahiya:

—Mia tah min Samaria mai meha qui. Yoshiman ta mia hihbojahiqui. ¿Hihcoinja non mia jayamahin?

⁴⁹ Jascalahbo jato Jesusen yohirihbiquin:

—Yoshiman ta hea hihbojayamahiqui. Heen papa qui tah hen siripi yohuanai. Mato tah man hehqui tiromahi yohuanai.

⁵⁰ Hehqui siripi yohuanai bo benahi ta hen joyamahi. Jatihibi shinan honannica ta jaiqui. Jaan ta mato yohihihqui, hehqui siripi yohuanai.

⁵¹ Hihcoinja ta hen mato jai. Heen joi nincacai jonibo ta mahuayamanox manatihqui —jato Jesusen jaquin.

⁵² —Mia yoshiman hihbojahi tah non honanscái. Abraham ta mahuanishqui. ¿Papan joi yohinicabo rihbi hihni que bi min jascarain, Heen joi nincacai noque ta mahuayamanox manatihqui, hihqui?

⁵³ ¿Mia min noquen papa yamanica Abraham mentan hashoan coshi quin? Papan joi yohinicabo rihbi ta mahuanishqui. ¿Jahua hihqui shinan mian jain? —Jesus jacanquin.

⁵⁴ Jato Jesusen yohiquin:

—Hehqui siripi yohuanai bo benaxon tah hen jahuabi bihtimahi. Heen papa ta hehqui siripi yohuanihqui, Jaa ta noquen Dios qui hih man jai que bi.

⁵⁵ Jaa man honanyamahi bi tah hen hean honanai. Mato quescapa quesamis hihquish pari ta hen Jaa ta hen honanyamahi hen jatihi. Jaa ta hen honanai. Jahuen joi rihbi ta hen nincacoinai.

⁵⁶ Hea neno joyaxihqui honanax ta maton papa yamanica Abraham jenimanishqui. Hea jahui jisish sca ta coin coinnishqui —jato Jesusen jaquin.

⁵⁷ Jan jascaraiya:

—¿Cincuenta bari jariyamaxon bi min noquen xohta yamanica Abraham jisniquin? —judiobaan Jesus jaquin.

⁵⁸ —Hihcoinja tah hen mato jai. Abraham cainrihyamahi bi tah hen hea janíqui —jato jaquin.

⁵⁹ Jan jascaraiya, tsacanoxon macan bichibaan bi Jonetax Papan xobo janinhax Jesus cainscái.

9

Benche cainni joni Jesusen rohajahi

¹ Jano huinoxon benche joni jisquin, benche jahuen maman bihni.

² Jahuen hexenocaban sca yocaquin:

—¿Tsoa tsi ra hohchanishquin, Maestron, benche hoa jahuen maman bihnon? ¿Jahuen papabo nan? ¿Jaabi nan? —hahcanquin.

³ —Jan hohchani copima ta qui. Jahuen papabo rihbi hohchani que ma bi tah qui. Papan coshiyaxon jaa rohajahi jisíbo ta benche jahuen maman bihnishqui.

⁴ Hea raanni heen papan teebo jahti ta noque jai, bari queya parihiya. Tsoabi teeti hahtipahyamascanon ta yametihiqui.

⁵ Mai mehabo tocan jihuexon tah hen jato xabajaxonai.

⁶ Jascajaxon mai qui toshbanhahxon huaho berojaxon benche betsamxon yohiquin:

⁷ —Siloé janeya noaho benashitanhue —hahquin. Siloé ta raanaah hihcatsihquiqui. Jascalah, cahax, benashitanjo quin jisbenascaquin.

⁸ Jan coriqui yocacahtai jispahonibaan sca yocaquin:

—¿Neama hin, yocaqui tsahopahoni joni?

Jahuen hahbe jihueneihbaan rihbi jascajaquin yocaquin.

⁹—Jaabi ta qui —hihqui caibo.

—Jaamahax bi ra ta jaa quescapih qui —hihqui caibo rihbi.

—Hea tah hen qui —hihqui jaabi sca.

¹⁰ Honancatsihquin sca:

—¿Miabi hihquish jenquetsahax min bero siriscaquin? —hahcanquin.

¹¹ —Jesus janeye jonin huaho berojaxon heen bero qui betsamxon hea Siloé janin nashitanhue hahcrah tah hen nashihi sca cahaqui jisresscanoxon —hihqui.

¹² —¿Jahuen hin, jaa joni? —hahcanquin.

—Hen ta hen honanyamahi —hahquin.

Benche yoca yocacanquin

¹³ Benche hihpahoni joni fariseobo janin sca bocanquin.

¹⁴ Tantiti neten cahen Jesusen huaho berojaxon jahuen bero rohajanish.

¹⁵ Fariseobaan sca yocarihbiquin:

—¿Jenquetsahaxon miin bero rohajaxquin? —hahcanquin.

—Jaan heen bero qui huaho tsamanah benashixon tah hen jisresscrai —jato jaquin.

¹⁶ —Papa Diosen raanahma tah qui. Tantiti neten jan tantibahinayamahi copi tah non honanai —hihcanni caibo fariseobo sca.

—¿Jenquetsahaxon hohchayahpa jonin jascapa hahan honanti jatihquin? —hihcanni caibo rihbi. Caibo huetsa shinanya hihnon caibaan rihbi huetsa shinanquin.

¹⁷ Benche hahquirihbi yocacanquin:

—Mia ta bero rahonaxqui. ¿Mian jisi jenquetsahpa joni quin? —hahcanquin.

—Papan joi yohinica tah qui —hahquin.

¹⁸ Jan benche hihpahonixon bi rahma pari jisi judiobaan nincacatsihyamahi. Hihcoinai shinanyamacaquin. Jahuen papa, jahuen mama yocarihyamaxon hihcoinai jaa yohuanai shinanyamacanquin.

¹⁹ —¿Nea hin, maton baque, benche ta cainnishqui hih man Jain? ¿Jenquetsahaxon sca rahma jisiquin? —hahcanquin.

²⁰ Jascalah:

—Jaa ta noquen baque qui, non tah non honanai. Jan benche cainni tah non honanrihbihi.

²¹ Jenquetsahaxon jan rahma jisiquin, non tah non honanyamahi. Tsoan jahuen bero rohajaxquin, non tah non honanyamaribhihi. Jaabi yocanahue. Hani sca ta jaiqui, jaanbi ta mato yohitihiqui.

²² Judioba qui raquexon jahuen papan, jahuen maman jascajaquin. Judiobaan cahen jatihixonbi yohinish, Cristo tah qui hihquibo jatihibi tah non potati jai, noquen tsinquitixoboho mapeyamascaábo, tsoanbi jato yohuanquihnyamascaábo tah non jato potatihi, hahcanquin huesti shinanyaxon.

²³ Judiobaan jascahipi copi raquetax:

—Jaa ta haniscay qui. Jaabi yocanahue —hihresi jahuen papa.

²⁴ Jascaraiya, rabe coti sca benche jahuen maman bihní joni hahquirihbi quenamacanquin.

—Papa Diosen caya ta hea rohahaxqui hihhue. Hoa joni ta hohchamis qui, non tah non honanai —hahcanquin.

²⁵ —Jahuen hohcha yamahihquin, hen ta hen honanyamahi. Nea res ta hen honanai: benchepahonixon bi ta hen rahma jisi —jato jaquin.

²⁶ —¿Jahueja mia jaaxquin? ¿Jenquetsahaxon mia jismahaxquin? —hahcanquin.

²⁷ —Moa ta mato yohihahqui. Hen yohihah bi tah man nincacatsihyamahahqui. ¿Jahua copi man hahquirihbi nincacatsihquin? ¿Mato rihbi man jahuen haxenicabocatsihquin? —jato jaquin.

²⁸ Jaa sinajascacanquin:

—Mia tah min jahuen haxenica qui. Noque tah non Moisesnin haxenicabo qui.

²⁹ Papa Diosen ta Moises yohinishqui, non tah non honanai. Jahuerahnohax hoa joni jonishquin, non tah non honanyamahi —hihcanni.

³⁰ Jaabo jascaraiya:

—Man jascaraiya tah hen rahtetai. Jahuerahnohax jaa jonishquin man honanyamahi bi ta hea bero rohahaxqui.

³¹ Hohchamisbo ta Papan nincayamahihqui. Jaa tah non honanai. Papahon shinancoinaibo, Papa queenai quescajahibo, jascapahbo ta Papan nincaquihqui.

³² Tsoanbi ta benche cainni joni bero rohajayamanishqui. Benche rohajahi ta tsoan jascajanima qui, nete jamenoní tian, rahma caman.

³³ Papa Dios betan hihyamaxon cahen Jesusen jahuejatibi hahtipahyamaquehaniqui — jato jaquin.

³⁴ —Mia tah min hohchaya bi res piconihqui. Jascaphaxon bi min noque honanmacatsi-hquin? Catanhue —hahxon picocanquin.

Jaton shinan xehpohibo

³⁵ Catanhue hahcaibo joi nincaxon benche hihpahoni meraxon Jesusen yocaquin:

—¿Noquebaquen yohihah min nincacoinyamahin?

³⁶ —¿Tsoa jaa quin, hapon, hen nincacoinnon? —hahquin.

³⁷ —Hea min jisi tah hen qui, mihibetan yohuanai.

³⁸ —Hean tah hen nincacoinai, hihbon —hihxon raboxonen nichish betihipaqueti.

³⁹ —Honanahbo tah hen naihoh quehax Joniqui, jisyamahibaan jisibo, jisibo rihbi benche sca banenon —hahquin Jesusen.

⁴⁰ Jan jascajahi caibo fariseobaan hochomaxon nincaxon yocacanquin:

—¿Noque rihbi non benche quin? —hahcanquin.

⁴¹ —Benchehax tah man hohcha yamaquehanai. Non tah non jisi man jai copi ta maton hohcha banetihqui —jato jaquin.

10

Carnero chique

¹ —Hen mato yohinon nincanahue. Carnero chiqueho hihquicatsihquish xehpoti janma bi huetsanco hinatax hihconica ta yometsoh qui, bichinmis joni.

² Xehqui janin hihconica ta carnero coirannicah qui.

³ Jan hihconon ta xehpoti coirannicahton quehpenxoniqui. Jahuen carnerobaan rihbi ta jahuen joi nincaquihqui. Jaan rihbi ta jaton Jane quenapaquexon jato cainmahiqui.

⁴ Jahuena rahsi jatinibí cainmaxon ta jato beboxoniqui. Jaton hihbaan joi nincaxon ta carnerobaan chibanihqui.

⁵ Huetsa joni cahen chibanyamacanquin, jahuen joi honanyamaxon. Jato bichi huetsa jahuiya cahen jabarescani —Jesusen jato jaquin.

⁶ Honanahbo jato jascajaquin yohihah bi nincayamacanquin. Jan yohuanai honanya-macanquin.

Jesus noquen coirannicah siri

⁷ Jaa copi jato hahquirihbi yohiquin:

—Man honannon hihxon tah hen yohihi: hea tah hen carnero jano hihcoti quescapa qui.

⁸ Hea joriyamanon joni bo ta yometsohbo qui, bichinnicabo. Carnerobaan ta jato nincayamanishqui.

⁹ Hea tah hen jano hihcoti quescapah qui. Hea janin hihcohibo ta queyoyamanox mananicabo qui. Hihcohax ta picorihbihqui, jaton piti rihbi pishinyamahi.

¹⁰ Yometsohti res ta yometso jahuiqui. Retehni rihbi jahui. Masajahi rihbi jahui. Jihuetahbo tah hen hea jahui, siripi jihuetahbo.

¹¹ Hea ta carnerobo coirannicah siri qui. Siri coirannicahton ta jahuen carnerobo jeneyamahihqui, retehibaan bi.

¹² Jahuena que ma bi carnerobo coirannon hihxon copijaha jonin cahen hino jahui jisish carnerobo potabahini caresi, coirannicah hihyamahax copi. Hinon sca cahen hahchixon jato jabisjaquin.

¹³ Coriqui copi coiranhue hahca bi cahen joni jabatih, carnerohon shinanyamaquin.

¹⁴ Hea tah hen carnero coirannica siri qui. Henabo tah hen hean honanai. Henabaan rihbi ta hea honanahqui.

¹⁵ Heen papan hea honanai quescajaquin tah hen hean rihbi heen papa honanai. Carnero muhuayamanon hihxon tah hen paxajaquin hehri jaton sinatahbo hean retemahi.

¹⁶ Hea ta huetsa carnerobo jaribih, nea chiquehoh quehama. Jaabo rihbi beti tah hen jai. Heen joi ta nincayaxihsanahqui, huesti repinica res janon, coirannicah rihbi huesti res.

¹⁷ Hahquirihbi teehihnoxon tah hen heen jihuetahbo jihuena hihxon jaton sinatahbo paxajaquin hehri retemahi. Jaa copi ta heen papan hehon shinaniqui.

¹⁸ Tsoanbi ta hea reteresiyamahiqui. Heanbi shinanaxon tah hen hehri jato retemahi. Heanbi shinanax ta hen hahquirihbi teehihihi, jascahue heen papan hea janí —Jesusen jato jaquin.

¹⁹ Jan jascajaquin yohihah, caibo judiobo huetsa shinanya janon caibo rihbi huetsa shinanya hihqui.

²⁰ Mesco shinanya hihquiaan bi hichaxon caibaan yohiquin:

—¿Jahua copi man hashoan nincatihin? Yoshinyaahpa tah qui. Tehquehah ta jaa jaiqui.

²¹ —Jan yohihi joi ta yoshinyahpa joninahma qui. ¿Yoshiman benche jismati hahtipahiquin? —hahcanquin caibaan rihbi.

Jesus queenyamahibo judiobo

²² Jene tian sca jaiya cahen Jerusalen janin judiobaan fiesta jai, Papan xobo jato behnajaxonniho copi fiestajacanquin.

²³ Jaa xoboho sca Jesus nichi, Salomon janeya chiquehoh.

²⁴ Hahqui tsinqui jaquexon yocacanquin:

—¿Jahuentian caman min noque honancasquimamatihin? Cristo hihxon, Hea ta hen Cristo qui hahquin noque yohiquin sirijahue —hahcanquin.

²⁵ —Moa hen mato yohihah bi tah man hea quesahi shinanai. Heen papan hea Jascajahue hahca hen hahcaibo ta jaa jixon hahan hea honanti qui.

²⁶ Jaabi tah man nincayamahi, heen repinica janinhahmaxon copi.

²⁷ Hean quenahah ta heen carnerobaan hea nincaquihqui. Hean rihbi tah hen jato honanai. Hea ta chibancaniqui.

²⁸ Hean tah hen jato teehihmah, queyoyamanox mananon, jahuentianbi manoya-manon. Heen mequeman hen xecohibo ta tsoanbi hea bichintimahihqui.

²⁹ Heen papan ta hea jato hinanihqui. Jaan ta jatihibi muhuinihqui. Jaan xecohi ta tsoanbi mebichintimahihqui.

³⁰ Heen papa betan tah hen huesti yora qui —jato jaquin Jesusen.

³¹ Judiobaan sca ta macanbihribinishqui, Jesus rehtecatsihquin hahan tsacanoxon.

³² Macan bichiton jato yohiquin:

—Hen hicha siri hahcaibo tah hen mato jismasci, Papan hea Siribojahue hahcah. —Jahuemeha hen hahcai copi man hea rehtecatsihquin? —jato jaquin.

³³ —Min siribo hahcaima bi min Papa Dios qui tiromahi yohanai copi rahan. Mia Jonihax bi Diosax quescapi yohanai copi —hahcanquin.

³⁴ Jesusen sca:

—¿Davidinin huishani joi janin nea huisha yamaquin? ¿Mato tah man diosbo qui hah ta hen mato jai hahquin huishayamanishqui?

³⁵ Papan huishamani ta tsoanbi huetsajati hahtipahyamahiqui. Jato yohihi Mato tah man diosbo qui Papa janí que bi man hehqui rainyamascaín?

³⁶ —Hea ta hen Papa Diosen baque qui hen jai copi man Dios qui tah min tiromahi yohanai hah man hea Jain? Baquen hahxon Papan hea naihohxon raanni que bi ¿man jascarain?

³⁷ Heen papan teebo hean hahyamahiya hea hihcoinai shinanyamanahue.

³⁸ Hen hahcoinaiya, hean mato yohiha copi que ma bi hean hahcai jisxon copi hihcoinai shinannahue. Jascajaquin tah man honanxon nincacointihi, hea janin heen papa hihqui, hea rihbi heen papa janin hihqui —hahquin.

³⁹ Jascahiton jaabaan hahquirihbi bihcatsihqui bi cahi, mequen sca cahabo.

⁴⁰ Jaatian sca cahx Jordan huean hahquirihbi pohquejaquetax, janoxon Juaman Nashimamenoni janin cahi. Cahi nocotax janobi sca baneti.

⁴¹ Jano sca hihqui honanax ta hihti caibo hahqui nocoti bocannishqui.

⁴² —Juaman ta hahan honanti hahyamanishqui. Hahyamahax bi ta hihcoini nea joni qui chaninishqui, jatihibi jan yohini quescabi ta nea Jesus jaiqui —hahcanquin.

⁴² Janoxon sca hichaxon nincacoincanquin.

11

Lázaro mahuatai

¹ Betania jema janin ta Lázaro janeya joni jihuapehahonishqui, jano María jahuen hohshi Marta betan jihueta jeman.

² Jaa Marianen ta hahan hinintinin noquen hihbo tachixon jahuen boon tasonishqui. Jahuen roha cahen Lázaro. Lázaro cahen hihti hisini.

³ Hisinaiya ta jahuen chocabaan huetsa joni raannishqui:

—Min hahan shinanai joni ta hisinihqui, hihbon —yohihi canon.

⁴ Yohiha Jesusen yohiquin:

—Mahuanoxonma bi ta hisinihqui. Papa Dios nete hihboji jisibo ta hisinihqui. Hea Papan baque xaba hihboji honanaxbo ta hisinihqui —jato jaquin Jesusen.

⁵ Jaabo ta Jesus hihti queenahonishqui, Marta, jahuen huetsa, Lázaro rihbi.

⁶ Jan hisinai honanax bi janobi rabe neten hihribihi.

⁷ Rabe neten hihxon sca jahuen haxenicabo yohiquin:

—Judea main hahquirihbi canon bonahue —hahquin.

⁸ Jascayah:

—¿Rahma pishca mia janohahbaan macaman tsacaquin rehtecatsihqupi que bi min hahquirihbi caribicatsihquin, Maestron? —jahuen haxenicabaan Jesus jaquin.

⁹ —¿Huesti neten doce hora yamahiquin? Bariyahpan nichish tah non joxcorohyamahi, bari xaba jisish.

¹⁰ Yame nichish tah non joxcorohtai, jano nihti jisyamahax —jato jaquin.

¹¹ Jato jascajaxon:

—Noquen huetsa Lázaro ta hoxahihqui. Mohini tah hen cahi —jato jaquin.

¹² —Hoxahax ta hahquirihbi rohatihiqui, hihbon —hahcanquin jahuen haxenicabaan.

¹³ Lázaro mahuatipi Jesusen yohihi bi hoxaresai shinancanquin.

¹⁴ Jaa copi ta jato sirijaquin sca yohinishqui:

—Lázaro ta mahuatipishqui.

¹⁵ Jahuerohahi tah hen hea janohiyamahipiqui, man honancoinnon. Man nincacoinnon hihquish ta hen janohiyamahipiqui. Jaabi, jisnon bonahue —Jesusen jato jaquin.

¹⁶ —Noque rihbi canon bonahue, hahbetan mahuanoxon —hahquin Tomasesen, rabe nane hahcaibo Tomasesen.

Jesus noquen teehihmanica

¹⁷ Nocoxon sca chosco neten sca tsahonipibo yohihibo Jesusen nincacuin.

¹⁸ Betania ta Jerusalen hochoma qui, media hora tahanen cahah.

¹⁹ Jaa copi ta janohax hihi caibo judiobo Marian xoboho bocannishqui, jano Marta betan María jihuetai xoboho. Jaton roha mahuatipi quen manahi bocani.

²⁰ Jesus nocoti jahui yohiha jaa behchihi Marta cahi, xoboho María banenor.

²¹ Behchixon yohiquin:

—Mia neno hihquiya ta heen roha mahuayamaquehanielqui, Hihbon.

²² Jan mahuatipi que bi ta min Papa yocacai rahsi mia hahxontihiqui. Hen tah hen honanai —hahquin.

²³ —Roha ta huenirihbitihiqui —hahquin Jesusen.

²⁴ —Nete queyotaiya Papan noque Hueninahue hahca ta huenirihbiyaxihquiqui. Hen tah hen honanai —hahqui Marta.

²⁵ Jesusen sca:

—Hea ta jato hueninicu qui, teehihmanicah. Hea nincacoinai joni ta mahuatax bi teehihribitihiqui.

²⁶ Jihuexon hea nincacoinai joni ta queyonox jascabi mahuatah jatimahiqui. ¿Mian min hea hihcoinai shinanyamahn? —hahquin Jesusen.

²⁷ —Hen tah hen mia hihcoinai shinanai, Hihbon. Mia tah min Cristo qui, Papan baque. Mia tah min naihoh quehax jonicas qui. Min hihcoinai tah hen shinanai —hahquin Martan.

Lazaroya Jesus huaonihqui

²⁸ Jascajaquin yohihax jahuen shara quenahi cahi. Nocoxon hexti pishca join jahuen shara yohiquin:

—Honanmanicah ta nocoscaiqui. Mia ta quenamahiqui —hahquin.

²⁹ Nincacax, histon huenicahuanax, picotax cahi.

³⁰ Jema janin cahen Jesus nocorihyamahi, jano Martan jaa behchitana janin banetah-bahi.

³¹ Maria histon huenicahuanax picotai jisxon, Tsahon janin ta huinihi cahiqui hihxon jaa manahibaan chibankuin.

³² Jesus janin María nocoxon, merahax, Jesusen tahe naman betihihpaqueti.

—Mia neno hihquiya ta heen roha mahuayamaquehanielqui, hihbon —hahquin huaonihnan.

³³ Jaa huaonihquiya hahbe jahui judiobo rihbi huinihiya, jahuen jointi hihti xecahihniquin. Masa shinanscaquin.

³⁴ —¿Jahuen man tsahonipiquin? —jato jaquin.

—Jisihue, hihbon —hahcanquin.

³⁵ Jesus huaonihscái.

³⁶ Huaonihqui jisish:

—Jise. Hahan ta hihti shinanihqui —hahquin judiobaan.

³⁷ —¿Benche jismahipixon cahra nea rihbi mahuayamanon rohajati hahtipahyamaquehahnipishquin? —hahcanquin caibaan rihbi.

Lázaro teehihribibi

³⁸ Jesus sca hahquirihbi jointi hihti xecahihnihx tsahon janin nocoti cahi. Tsahonxon macan champanin behpohipibo janin nocoti.

³⁹—Macan janabohannahue —jato jaquin Jesesen.

—Neatian ta pisiscaiqui, hihbon. Chosco nete sca tah qui jan hihquipi —hahquin Martan, yamanicaton chocan.

⁴⁰—¿Hihcoinai shinanxon tah min noquen Papa nete hihbohi jistihi hen mia jayama-haquin? —Jesesen jaquin.

⁴¹Jaatian sca macan janabohancanquin. Bochiqui sca jisxon:

—Papan, hen yocacah tah min nincacai. Hahxon tah min hea jai.

⁴²Hen yocacai tihibi tah min nincacai. Hen ta honanai. Jaabi, nea neno nichibaan nincanon hihxon tah hen mia yohihi, mian min hea raanni hihcoinai shinanahbo —hahquin.

⁴³Jascajaxon coshin bi res quenaquin:

—Lazaron, picohue —hahquin.

⁴⁴Jaatian sca hihquipi joni picoti. Jahuen mequen, jahuen tahe chopas quexen yabi-hah, payoman rihbi bebefohipibio.

—Pecanahue, jan nihtatahnon —Jesesen jato jaquin.

Jesus bihnoxon yohinanaibo

(Mt 26.1-5; Mr 14.1-2; Lc 22.1-2)

⁴⁵Jan Lázaro teehihmahí jisxon María manahi jahui judiobaan sca hihti caiboxon nincacoinquin.

⁴⁶Caibo rihbi jaton hapobo yohihi bocani. Nocoxon, Jasca ta jaaxqui, hahcanquin.

⁴⁷Yohihah sacerdote hapobo betan fariseobo tsinquiti, hapobo rahsi.

—¿Rahma can? ¿Non jahuejatihi? Hoa jonin ta hahan honantijahiqui, hicha.

⁴⁸Jan jascajaresnon non jahua hahyamahiya ta jatihixonbijaa sca chibanyaxihcanihqui. Romanobo sca joxon ta noquen janoxon Papa Dios yocati xobo pohtastihiqui, noquen jihuetahbó rihbi ta noque bichinyaxihcanihqui —hahcanquin.

⁴⁹Huesti joni sca jato tocan nihinati, Caifas janeya joni. Sacerdotebaan hapo hihxon jato yohiquin:

—Maton tah man jahuabi honanyamahi.

⁵⁰Huetsa jonibo jihuemon huesti joni mahuatah ta siri qui. Noquen jihuetahbó jatihibi queyoyamanon jascatihí bi tah man honanyamahi —jato jaquin.

⁵¹Hahmebi shinanxonma ta jascajanishqui. Jaa barí tian sacerdote hapo hihxon ta honanxonma bi jayaxihqui joi yohinishqui. Jaton caibo jihuemon Jesus mahuatihi yohihi.

⁵²Jaton caibo res jihuetahbó Jesus mahuayamahi. Hocho hocho jihuetai Papan baquebo tsinquinoxon cahen Jesus mahuati, jato huesti yorajanoxon.

⁵³Caifas jascari yohuanipiya sca Jesus rehtenoxon yohinan yohinancani, jatihibi neten.

⁵⁴Jaa copi ta judiobaan jisnonma sca jonetax Jesus nihnishqui. Janohax caresscái, chiponqui. Jano tsoa yamahi hochoma, Efrain janeya jeman sca nocoti. Jano baneti jahuen hexenicabo betan.

⁵⁵Judiobaan pascua fiesta hochomascaia ta hocho jihuetaibó Jerusalen janin bocanishqui. Jaton rishta sohuamahi bocani, janin pascua fiesta noconon hihquish.

⁵⁶Nocoxon Jesus benacanquin. Papan xoboho hihquihax yohinancani:

—¿Fiesta janin jaa jotimahiquin? ¿Jahua min shinanain? —yohihahnancani.

⁵⁷Jasca jaibaan bi jaton hapobaan jato yohiquin:

—Jano jan hihqui honanxon, noque yohinahue, non porisia bihmanon —jato jaquin.

12

Jesus tachocai haibo

(Mt 26.6-13; Mr 14.3-9)

¹Pascua fiesta joti seis nete pishinaiya cahen Betania janin Jesus joribibi. Jano Lázaro jihuetai jema, mahuatipi que bi jan hahquirihbi teehihmahipi.

²Jesus nocoscaia pitijacanquin, hichaxon piti. Martan cahen jato piti metexxonquin. Misanxon Jesus betan pihibo tocan sca Lázaro tsahoti.

³Marian sca nardo hahan hininti pomo bocho bihxon Jesus tachiquin. Hihti copi, hahan hininti. Tachixon, jahuen boon sca tasquin, jatihobi xobo hinin potonon.

⁴Jaatian sca jahuen hexenica Judas Iscariote, Jesus paranxon bihmayaixihquiton yocaquique:

⁵—¿Jenquetsahpahin jahuen hininti tres mil soles copi maromayamahaxquin, jahuabora-jomabo sca hinannoxon? —jato jaquin Judasen.

⁶Jahuaborajomabohon shinanxon copima jaan jato jascajaquin. Yometso hihxon copi jascajaquin. Jaa rihbi jaton coriqui coirannicahax ta jaton coriqui rihbi yometsohpahon-ishqui.

⁷ Jesusen sca Judas yohiquin:

—Jenehue. Hea mahuataiaya hahan hea hininjati ta hea hininjaxonihqui, jenehue.

⁸ Mato janin ta jahuaborajomabo jascabi jatihiqui. Hea tah man yamajayaxihqui —jato jaquin.

Lázaro rehtecatsihquibo

⁹ Jan jan hihqui honanax tsama bi res judiobo jaa jisi bocani. Jesus huestima bi Lázaro rihbi jiscatsihqui bocani, hihquipi que bi hahquirihbi huenihipi joni jiscatsihqui.

¹⁰ Jaa copi ta Lázaro rihbi rehteti shinanscacannishqui, jaton hapobaan.

¹¹ Lázaro copi hichaxon judiobaan jato potabahinxon Jesus sca nincacoinaiboya ta jaton hapobo sinanishqui. Jaa copi ta Lázaro rihbi rehtecatsihscacannishqui.

Jerusalen janin Jesus hihcohi

(Mt 21.1-11; Mr 11.1-11; Lc 19.28-40)

¹² Huetsa neten sca ta fiestajahi bohibo tsinquihihnishqui. Fiesta janin ta Jesus jahuiqui hahquin yohihabho nincacanquin.

¹³ Honanax binon pehi bihbahinax Jesus behchihi bocani. Quenacanahi bocani:

—Hosanná. Nete hihbaan raanai joni ta jahuiqui, israelibaan quiquin hapo. Papan shinanyahpa tah qui —hihcanahi bocani.

¹⁴ Jascahibaan bi cabacho baque merahax jaa cahtsahotax Jesus jahui. Jan jascanon ta huishani joi jaiqui:

¹⁵ Raqueyamanahue, Sion jema baquebon. Maton quiquin hapo ta jahuiqui, cabacho baque cahtsahotax.

¹⁶ Jaa huisha joi nincamenoxon ta jahuen haxenicabaan honanyamanishqui. Jan naihoh cahipi cauchiqui ta jan jascayaxahnon huishani joi jai shinancannishqui. Jaatian pari ta honancannishqui, Jesusen hahyaxihqui jaabaan huishani honanscaquin.

¹⁷ Caibo jascari quenacananon cahen caibaan yohibonaquin. Lázaro mahuatipi bi ta picohue hahxon jan hahquirihbi teehihmahi non jisipiqui hahbonaquin.

¹⁸ Papan coshiyaxon Jesusen jascajaquin hahquipi níncacax tsinquijsquetaibo jaa behchihi bocani.

¹⁹ Bohiboya sca:

—Jisnahu. Non tah non jahuabi hahyamahi. Jatihixonbi ta jaa chibancaniqui —hahcanquin fariseobaan sca.

Jesus benahi nahuabo

²⁰ Caibo fiesta janin bohibo ta jaton nahua quescapahbo sca janishqui.

²¹ Felipe cahen Betsaida jema janinhah, Galilea mai meha. Felipe qui caxon, jaa nahuabaan yocaquin:

—Noquen tah non Jesus jiscatsihqui, hapon —hahcanquin.

²² Andres yohihi sca Felipe cahi. Yohihax, Felipe betan sca cahi, Jesus yohihi. Yohihah bi:

²³ —Hea noquebaque Papan shinanya hihqui ta rahma jisnoxihcanihqui.

²⁴ Nicanahue hen mato yohinon. Main paqueyamahax ta bimi bero jaa huesti banetihqui, queyyamahi. Banahoh queyotax pari ta bimi hicha caichihqui.

²⁵ Mahuapaho hihxon Papan joi bihcatsihyamahibo ta mahuatihiqui. Non main res jihuetah ta jahuama qui hihquibo ta queyyamanox manatihqui, jihuecointi.

²⁶ Heen hahxontibo ta hea chibanti jaiqui. Jano hea hihquiton tah heen jonibo rihbi hihtihiqui. Hea hahxonai jonibo qui rihbi ta heen papa siripi yohuanyaxihqui.

Mahuanoxihqui Jesusen yohihi

²⁷ Rahma tah hen masa shinanai. ¿Jahua hen yohitihin? ¿Janoxihquibo tiromabo hea cahnemahue Papan, hih hen jatihin? Hihyamahi. Hea janoxihquibo copi tah hen nea nete qui noconihqui.

²⁸ Papan, mia nete hihbo shinanahbo jahue —hahquin Jesusen. Jaatian naihoh quehax yohuanai nincacanquin.

—Jascajaxon tah hen hahribitihi —hihqui.

²⁹ Hochomaxon níncacax tsamajaquetaibo yohuani:

—Terenhiah ta jaiqui —hihcani.

—Papan yonoti ta hahbetan yohuanihqui —hihqui caibo rihbi.

³⁰ Jesusen sca jato yohiquin:

—Maton honannon hihquish ta yohuanihqui, hean honannon hihquishma.

³¹ Mai mehabaan hohcha casticanti hora ta nocoscaiqui. Rahma ta mainxon yononica yoshin naman potapauenoxihqui.

³² Hea jihuin hueonhihnipibo tah hen jatihibi jonibo hehqui jomatih —jato jaquin.

³³ Jihuin hueonahbaan jan mahuanoxihqui honanahbo hihxon jato jascajaquin yohiquin. Tsamajaquetaibaan sca yocaquin:

³⁴ —Cristo roqui queyoyamanox manayaxihqui. Huishanihbo joi roqui jascari jai. ¿Jahua copi sca min Noquebaque ta hueonhihnixihcanihqui hah min noque Jain? ¿Noquebaque min hihqui tsoa quin? —hahcanquin.

³⁵ Jesusen jato yohiquin:

—Basimaxon sca tah man xaba jisti jenexihqui. Xaba chian nihnahue, jani yamenon. Bahquish chian nichii jonin ta jahuen nihti honanyamahihqui.

³⁶ Xaba jaxon jaa xaba nincacoinnahue, xabapan baquebo janoxon —jato jaquin. Jato jascajahax, caresscái, jaabaan jisyamascanon.

Nincacoinyamahi judiobo

³⁷ Jaton jisnon bi hicha hahan honanti jan hahcai bi nincayamacanquin.

³⁸ Papan joi yohinica Isaásnen yohini quescapahbo:

¿Non yohihah bi tsoan nincaquihquin, hihbon? ¿Nete hihbaan jahuen coshi jato jismahah bi tsoan nincaquihquin?

hihqui jaa huisha joi.

³⁹ Jascapahboxon copi ta nincacoinyamacannishqui. Huetsa joi rihbi ta Isaásnen huishanishqui:

⁴⁰ Jaton beron jismis hihquish ta benchecahincaniqui. Jaton jointinin nincacoinmis hihquish ta jaton jointi xehpocahinhqui, hean jato rohajamis hihxon ta jaton shinan huetsajacaniqui

hihqui.

⁴¹ Papan xaba jisxon ta jascajaquin Isaásnen huishanishqui. Jasca ta Papa jaiqui jato japhahonixon jascajaquin sca huishaquin.

⁴² Jaabi Jesusen yohihah hichaxon nincacoincanquin. Caibo jaton jonibaan rihbi nincacoinquin. Nincacoinxon bi fariseobo qui raquexon tsoabi yohiyamacanquin.

—Tsoanzi noque yohuanquihnyamas canon noquen tsinquitu xoboho noque mapemaya-mascacanmis —hihcani.

⁴³ Papan hea siri jisnon yohipan hihtihi bi hapobaan hea sirijaquin yohuanquihnnon tsoabi yohiyamapan hihxon yohiyamacanquin.

Nincayamahiboya Papan jato casticanyaxihqui

⁴⁴ Jaabo netetai bi coshin bi res Jesus yohuanai:

—Hea nincacoinax hinamehtaibo ta hehqui hinamehyamahiqui. Hea raanni qui caya ta hinamehtiqui.

⁴⁵ Hea jisi jonin ta hea raanni rihbi jisioui.

⁴⁶ Jato xabajahi tah hen nai naman joniqui, hehqui hinamehtaibo bahquish chian baneyamanon.

⁴⁷ Hea nincaquin bi nincaresaibo tah hen heanbi casticanyamahi. Mai mehabo casticanaxomma bi tah hen jato teehihmahi joníqui.

⁴⁸ Hea Johue hahyamaxon, heen joí rihbi nincacatsihyamahibo ta honantiyahpabo qui. Hean yohihi joi ta hahan jascapahbo honanti qui, nete queyosacaya.

⁴⁹ Hehmbebi shinanax ta hen yohuanyamahi. Hea raanni heen papanbi ta hea yohihi. Jaa. Jascari yohuanhue, jaa yohihue hea jaquin.

⁵⁰ Jahuentianbi queyoyamanox manati jato jihuemahue hih ta jaiqui. Jaa copi ta heen papan hea yohihi quescabijaquin hean mato yohihi —jato jaquin Jesusen.

13

Jahuen haxenicabo Jesusen tachocai

¹ Pascua fiesta nocorihyamahi bi mai jenebahini Papa qui cati sca jan jai Jesusen honanquin. Jahuen jonibohon shinanaxon mahuanoxon caman jatohon shinanquin.

² Pascua piti piriymahiboya cahen Judas, Simon Iscariotenin baque, tiroma yoshiman bihxon tiroma shinan jahuen jointi janin niascaquin, Jesus paranxon bihmanoxahnnon.

³ Pascua piti pihi tsinquiscacan, Jesus jahuen haxenicabo betan. Mian sca jato jatihibi hihbojahue Papan jai cahen Jesusen honanquin. Jahuen Papa janinhax jonish bi hahquirihi hahqui cahi cahen honanrihbiquin.

⁴ Misa janinhax huenixon sca jahuen tarí potahax hani payoman chinexehti.

⁵ Bandeja qui jene chicoxon jahuen haxenicabo tachocuin. Tachoxon hahan jan chinexehtai payoman sca jato tasoquin. Jascajaquin jato tachopaquequin.

⁶ Simon Pedro qui nocouquihranscái.

—¿Hea rihbi min tachocatsihquin, Hihbon? —hahquin Simoman.

7—Hen mia tachoca jahua hihcatsihquiquin, rahma honanxonma bi tah min huetsa tian pari honanyaxihqui —hahquin Jesusen.

8—Hea tah min jahuentianbi tachotimahi, hihbon —hahscaquin Pedronen.

—Hen mia tachóyamahah tah min henama sca jatihi —hahquin Jesusen.

9—Hea tachoxon mepanxon manashimarihbihue, Hihbon —hahscaquin Simon Pedro-nen.

10—Nashitanax ta tsoabi nashiti pishinyamascaiqui, tachoquiti huesti pishini, jatihibi rishtama sca hihnoxon. Mato tah man rishtajomaboscai, hihcax bi jatihibima —jato jaquin Jesusen.

11 Jesus parannoxihqui joni honanxon copi jato jascajaquin, jatihibima jaquin.

12 Jato tachoquin queyoxon jahuen chopasahuerihbihax jahuen tsahotinin tsahopaque-xon jato yocauquin:

—Jahua man haxenon hihxon hen mato tachocain? ¿Man honanyamahin?

13 Hihbon, Honanmanican, hah tah man hea quenaquin jai. Hahcoinquin. Jaa tah hen qui.

14 Maton hihbo, mato honanmanicah rihbi hihxon bi hean mato tachocaiya tah man maton rihbi joni huetsa tachotihu.

15 Hen hahcái jisxon man jascajaribinon tah hen mato jismahahqui.

16 Mato tah hen yohicoinal. Yonoti ta jahuen hapo mentan hashoan tee hihboma qui. Raana joni rihbi ta jaa raanai joni mentan hashoan yohuan hihboma qui.

17 Nea hen mato yohihi joibo honanxon, hen mato yohihi quescabijahax tah man hahan jenimati jaresscayaxihqui.

18 Mato jatihibi qui tah hen yohiyamahi. Heen caisaibo tah hen honanai. Papan huishamani joi jai quescabi ta janoxihqui. Heen paan pihí jonin ta jotsistonan hea jamaquihqui hihqui jaa huisha joi.

19 Janoxihqui jariyamahi bi tah hen mato rahmabi yohihi, jaressca jaiboya man hea hen qui man honanon.

20 Hen mato yohinon nincanahue: hean raanah cahax nocotaiton mato johue hah-caibaan ta hea rihbi johue hahqui. Johue hea jaibaan ta hea raanni rihbi johue hahqui.

*Judasen bihmanoxihqui Jesusen yohihi
(Mt 26.20-25; Mr 14.17-21; Lc 22.21-23)*

21 Jato jascajaquin yohixon masa shinanxon jato yohicoinqui:

—Man honannon hihxon tah hen mato yohihi: mato tocan tsahotai huestichin ta hea paranxon bihmanoxihqui —jato jaquin.

22 Jahuen haxenicabo bejisahantanani.

—¿Tsoa yohihi? —shinancanquin.

23 Hahan Jesus queenai jahuen haxenica cahen Jesus senenbi tsahoti.

24 Simon Pedron sca jaa cohan cohan hihxon:

—¿Tsoa yohihi? Yocahue —hahquin.

25 Jesus serenbixon yocascaquin:

—¿Tsoa hin, Hihbon?

26—Nea paan tequen netinxon hen hinanai joni tah qui —hahquin Jesusen. Jascaxon paaman netinxon Judas hinanquin. Simon Iscariotenin baque can, Judas.

27 Paan teque bichiton jahuen jointi Satanamen hihbojaquin.

—Hoa min hahcatsihqui hahtanhue, Judasen, histon —hahquin Jesusen.

28 Jahua yohiquin jascahiquin misa janin tsahotaibaan honanyamaquin.

29—Noquen coriqui coiranai copi rah ta hahan fiestajati piti non pishinai marotanhue hahqui —shinanquin caibaan.

—Jahuaborajomabo coriqui hinantanhue hah ra ta jaiqui —shinanquin caibaan rihbi.

30 Hahtanhue hahca jahuen paan bichish Judas caresscái, yamescái bi.

Behna joi

31 Caresscáiya Jesusen jato yohiquin:

—Hea noquebaque nete hihbo hihqui ta rahma jisnoxihcánihqui. Jisquin ta noquen Papa rihbi nete hihbo hihqui jiscantihqui.

32 Hea jisxon Papa Dios nete hihbo hi honanaiboya ta nete hihbo hihxon jato jismati-hiqui, jahuen baque rihbi nete hihbo hi honanahbo. Rahmabi ta jascajatihqui.

33 Basima bi res tah hen mato betan hihtihi, heen baquebaan. Man tah man hea benayaxihqui. Hen judiobo yohihi quescajaquin ta hen mato rahma yohihi. Hea janocahiton tah man cati hahtipahtimahi.

³⁴ Joi behna ta hen mato yohihi. Nincanahue. Joni huetsahon shinannahue, hean hen matohon shinanai quescajaquin. Joni huetsahon shinannahue.

³⁵ Man joni huetsahon shinanaiya ta heen haxenicabo mato qui jatihixonbi honancanti-hiqui –jato jaquin.

Jesus qui Pedro paramehxihqui

(Mt 26.31-35; Mr 14.27-31; Lc 22.31-34)

³⁶ –¿Jahuerahnon min canoxihquin, Hihbon? –hahquin Simon Pedronen.

–Hen janو cahiton tah min rahma chibantimahi. Huetsa tian tah min hehchon catihi –Jesusen jaquin.

³⁷ Pedronen yocaquein:

–¿Jahua copi hen mia rahmabi chibanti hahtipahyamahin? Hea rehtecatsihquibo que bi tah hen mia jenetimahi –hahquin.

³⁸ –¿Mia rehtecatsihquibo que bi min hea jenetimahin? Nincahue, hen mia yohinon: hatapa queorih jaima bi tah min quimisha coti heen joni hihtima min yohinoxihqui.

14

Jesus Papa qui cahi bahi siri

¹ Masa shinanyamanahue. Papan joi nincacoinnahue. Hea rihbi nincacoinnahue.

² Heen papan jihue janin ta xobo hicha qui. Yamahiya cahen Mato ta hen jihuettjaxoni cahi hen jayamahan.

³ Caxon mato jihuettjaxonax tah hen joribiyaxihqui, mato bichi sca. Hea janо hihquiton man rihbi hihbon tah hen mato bichi joyaxihqui.

⁴ Hahan hean cahi bahi tah man honanai –jato jaquin.

⁵ –¿Jahuen min cahin? Non tah non honanyamahi, Hihbon. ¿Jenquetsahaxon non mia jano cahi bahi honantihin? –hahquin Tomasen.

⁶ –Hea ta Papa qui cahi bahi qui. Yohuani hihcoinai joi tah hen qui. Hahan jihuetti ta hea qui. Hea janо hihquiton cayamahax ta tsoabi Papa qui nocotimahiqui.

⁷ Hea honanxon tah man heen papa rihbi honanquehanai. Rahma tah man honanscái. Jaa tah man jisiqui –jato jaquin Jesusen.

⁸ –Noquen Papa noque jismahue, Hihbon. Jaa res tah non queenai –hahquin Felipenin.

⁹ –¿Yotihixonpahi hen mato betan hihqui bi min hea honanyamahin, Felipin? Hea jisi jonin ta heen papa jisiqui. ¿Jahua copi min hea Noquen Papa noque jismahue hah min Jain?

¹⁰ Jano heen papa hihquiton tah hen hea rihbi hihqui. Hea janin ta heen papa rihbi hihqui. ¿Min hihcoin shinanyamahin? Hen mato yohihi tah hen heanbi shinanxon mato yohiyamahi. Hehbe hihxon ta heen papan jahuen tee hahqui.

¹¹ Heen papa betan tah hen qui, hehbetan rihbi heen papa hihqui. Hea hihcoinai shinannahue. Yohihah copi res shinanyamaxon, heen tee jisxon copi hihcoinai shinannahue.

¹² Mato ta hen yohicoinal: hen hahcái teebó ta hea nincacoinai jonin rihbi hahtihiqui. Hen hahcái hahxon bi ta hashoan hanibó rihbi hahtihiqui, hea heen papa qui cahiya sca.

¹³ Jatihibi man heen janen yocacai tah hen hahxontihi. Heen papa nete hihbo hi honanahbo tah hen hahxontihi, jahuen baque hihxon.

¹⁴ Man heen janen yocacai jatihibi tah hen mato hahxontihi.

Dios Yoshin jan noque hinantíhi

¹⁵ Hehon shinanxon tah man hen mato yohihi man hahtihi.

¹⁶ Hean rihbi tah hen heen papa yocatihi, huetsa yanapannica jan mato hinannon. Jaa ta jascabi sca mato betan jatihibi.

¹⁷ Jaa ta yohuancoinai hihbo qui, Dios Yoshin. Jaa jisyamaxon ta mai mehabaan jaa bihtimahiqui, jaa honanyamaxon copi rihbi. Maton tah man jaa honanai. Mato betan ta hihresscaiqui. Mato chichó rihbi sca ta jayaxihqui.

¹⁸ Jaabiyahpa cayama ta jai. Joribiyaxonoxon tah hen cahi.

¹⁹ Mai mehabaan hea jisyamascanon caman ta basima sca qui. Jaabaan hea jisyamascaí bi tah man maton hea jistihí. Hea jihuetai copi tah man mato rihbi jihuethi.

²⁰ Jaatian tah man honantihí, hea heen papa betan hihqui, mato rihbi hehbetan hihqui, hea rihbi mato betan hihqui.

²¹ Hen yohihi honanxon nincacoinaibaan ta hehon shinannicabo qui. Hehon shinanai-bohon ta heen papan rihbi jatohon shinanihqui. Hean rihbi hen jatohon shinanai. Jaabaan hea honannon hihxon tah hen heen yora hean jato jismatihí –jato jaquin Jesusen.

²² Judasen sca yocauin (Iscarioteninma, huetsa Judasen):

–¿Jenquetsahaxon min noque miabi jismatihí, mai mehabaan mia jisnonma? –hahquin.

²³ Jesusen yohiquin:

—Hehon shinanaibaan ta heen joi bihtihiqui. Jatohon ta heen papan shinantihiqui. Jato qui cahax tah non hahbetanbi jihueta.

²⁴ Hehon shinanyamahi jonin ta heen joi bihyamahiqui. Hen mato yohihi joi ta henama qui. Hea raanni heen papanah ta qui.

²⁵ Mato betan nihparixon tah hen mato yohihi.

²⁶ Dios Yoshin sca ta mato yanapannicah qui. Jaa ta heen janen heen papan raanyax-ihquiqui, jatihibi joi mato honanmanon. Hen mato yohipahoni joi jatihibi ta mato shinanmayaxihquiqui.

²⁷ Hahan jihueta siri mato hinanbahini tah hen cahi. Heen hahan sirijaquin shinanti tah hen mato hinanai. Mai mehabaan hinanai quescajayamaquin tah hen mato hinanai. Masa shinanyamanahue. Raqueyamanahue.

²⁸ Caresscaax ta hen jorihbiyaxihqui hen mato jaah tah man nincacahqui. Heen papan ta hea mahuihqui. Hehon shinanax cah man jenimahan, heen papa qui hea cahiya.

²⁹ Janoxihquibo tah hen mato yohiscaáqui, jaresscaiboya man hihcoinai shinannon.

³⁰ Mato betan tah hen basi yohuanyamascatihi. Mai mehabo yoshin hihbo ta jahuiqui. Hea ta jahuejati hahtipahyamahiqui.

³¹ Jaabi tah hen heen papahon hea queenai mai mehabaan honanon hihxon heen papan hea yohihi quescas hean jai. Hueninahue. Caresscanon bonahue.

15

Bimiyahpa mebib

¹ Hea ta bana jihui yora coin quescapha qui. Heen Papa cahen huai hihbo.

² Jatihibi heen bimijoma mebibio ta jaan mextehiqui. Bimiyahpa mebi jatihibi ta boxtepaquehiqui, hashoan bimi hichanon.

³ Mato tah man boxtehahscaqui. Hen mato yohiha join ta Papan mato boxtehiqui.

⁴ Jahuen jihui yora jahuen mebin jenebahintimahi quescas hehbetan jascabibi janahue. Hea rihbi tah hen mato betan jascabibi jai. Mebi ta hahmebi bimiti hahtipahyamahiqui; jahuen yora qui rechihah pari bimihi. Mato jascarihbibi; hehbetan hihyamahax cahen jahuabijomabo mebibio.

⁵ Hea tah hen jihui yora quescapha qui, mato cahen heen mebibio. Jahuen yora janin jahuen mebi rechitah hicha bimiyahpa hihqui quescajayamaquin tah man hehbetan hicha hahtih. Hehbetan hihyamaxon cah man jahuabi hahtimahi.

⁶ Hehqui rechitaima mebibio ta huai hihbaan mextexon potatihiqui mebi choshihi quescanon. Shinannahue: mebi choshibo ta tsinquixon mapojacanihqui.

⁷ Rechitax quescas man hehbetan jihuexon, heen joi rihbi maton jointi janin hihquiya tah man man queenai jatihibi yocatih, hen mato hahxonnon.

⁸ Hicha bimiyahpabo quescaxon man hicha noquen Papa hahxonaiya ta mato jisxon, heen Papa nete hihbohi jónibaan honanyaxihcanihqui. Jascapahbo tah man heen haxenicasbo jatihi.

⁹ Heen papan hehon shinanxon hahxonai quescajaribiquin tah hen hean rihbi matohon shinanxon hahxonai. Hen mato hahxonnon jascabijaquin nincacoinnahue.

¹⁰ Heen papan hea yohihi quescabijaquin tah hen jai, jaa queenai quescabijaquin hea hahxonnon. Jascabijaquin rihbi man hen mato yohihi quescabijaquin jaiya tah hen hea queenai quescabijaquin hen mato hahxonnon.

¹¹ Hea jenimahi hihqui quescari man mato rihbi jenimanon hihxon tah hen mato yohihi, man hinti jenimanon.

¹² Nea tah hen mato yohihi: matohon hean shinanai quescajaribiquin maton rihbi joni huetsahon shinannahue.

¹³ Noquen hahbe rabetibohon hihti shinanxon tah non mahuanoxon caman jato hahxonquin yanapantihi. Jascapa hahxonnicah ta tsoanbi hahxonquin mahuintimahi qui.

¹⁴ Hen mato yohihi quescajaquin hahcaibo tah man heen hahbe rabetibon qui.

¹⁵ Mato tah hen "heen jonibon" hahyamasca. Jahuen hihbaan hahcái ta jahuen jonin honanyamahiqui. Jatihibi heen papan hea yohipahoni mato honanmaxon copi tah hen mato "heen hahbe rabetibon" hahcái.

¹⁶ Hea man caisnima bi tah hen hean mato caisnihqui. Caisxon tah hen mato janescal, man hicha hahqui canon. Man hahcái queyoyamanox mananox tah hen mato raanai. Jascapahboxon man yocacai jatihibi noquen papan mato hahxonnon tah hen mato raanai.

¹⁷ Joni huetsahon man shinannon hihxon tah hen jascabijaquin mato yohihi.

Jesusyabi noque jistahihmajayaxihquibo

¹⁸ Mai mehabaan mato jistahihmahiya honannahue: hea pari ta jistahihmacanishqui, mato chini sca.

¹⁹ Mai mehabo man hihquiya cahen mai mehabo matohon queenquehan, jaton caibo copi. Jascapahboma tah man qui. Mai mehabo hihyamscanon tah hen mato caisnihqui. Jaa copi ta mai mehabaan mato jistahihmahihqui.

²⁰ Hen mato yohiha joi shinanbehnoyamanahue. Yonoti ta jahuen hihbo mentan hashoan yohuan hihbo hihyamahiqui. Hea tiromajacatsihquin hea chibannixon ta mato rihbi sca chibanyaxihcanihqui. Heen joi nincanixon ta maton joi rihbi nincayaxihcanihqui.

²¹ Hea raanni heen Papa honanyamaxon ta mato tiromajayaxihcanihqui heen jonibo man hihqui copi.

²² Hen jato yohiyamahah cahen hohchayahpbaboyamanah. Hean yohihah copi ta Honanyamahax tah hen hohchanihqui jati hahtipahyamacacaniqui, hohchanihxon.

²³ Hea jistahihmahai jonin ta heen papa rihbi jistahihmahiqui.

²⁴ Tsoan jascajani que ma bi tah hen Papan coshiyaxon jato hahxonpahonihqui. Jato tocan hen hihyamahiya cahen hohchayahpbabohiyamanah. Hen jato hahxonai jisxon bi ta heen papayabi hea jistahihmacaniqui.

²⁵ Papan huishamani joi janin ta nea jaiqui: Jahua copima bi ta hea jistahihmarescaniqui. Jaa joi jai quescabi ta jacaniqui.

²⁶ Mato yanapannicah sca tah hen heen Papa janinxon mato qui raanyaxihqui. Jaa ta yohuancoinai hihbo qui, Dios Yoshin. Papa janinhax jahuem ta hehqui yohuancoinyaxihqui.

²⁷ Hen haxemamenoni tian hea nincanish tah man rahma caman haxehi hehbetan nihnicahbo qui. Jaa copi tah man mato rihbi heyi yohuancointi jai.

16

¹ Hea jeneti shinan tsoanbi mato hinanyamanon hihxon tah hen nea rahsi hen mato yohihahqui.

² Jaton tsinquit xoboma qui ta mato potayaxihcanihqui, tsoanbi mato yohuanquihnya-mscanon hihxon. Mato retehibo ta Mia retequin Papa Dios hahxonpan hihnicahbo rahsi jatihiqui.

³ Heen papa honanyamaxon ta hea rihbi honanyamaxon jascajayaxihcanihqui.

⁴ Nea hen mato yohihi quescra jaresscaya Noque ta yohinishqui hihyaxahnahue. Man honannon hihxon tah hen mato yohihi.

Dios yoshiman tee

Mato manati hahtipahparixon tah hen mato honanmamenoxon jaa joi mato yohiyamahiqui.

⁵ Hea raanni heen Papa janin sca tah hen canoxihqui. Hen canoxihqui bi tah man Jahuen min canoxihquin hea jayamahi.

⁶ Jascajaquin hen mato yohihah copi tah man jointinin benatihi.

⁷ Man benatai bi tah hen mato yohicoinal. Hea cahah ta siri qui. Hea cayamahiya cahen mato yanapannica joyamahi. Caxon ta hen raantahi, mato qui jonon.

⁸ Joxon ta jatihibi jonibo honancoinmatihiqui, jahua tiroma quin, jahua siri coin quin, jahua Papan casticantihiquin, jato honanmaquin.

⁹ Hea nincayamahibo copi ta jaton hohcha copi Papan jato casticanyaxihqui jato honanmatihiqui.

¹⁰ Heen papa qui hea cahiya man hea jisyamascai copi ta jahua siri coin quin hihxon jato honanmatihiqui, jihueti honanahbo.

¹¹ Mai meha hihbojanica yoshin casticanti jaresscrai copi ta tiromabo copi Papan casticanyaxihqui jato honanmatihiqui.

¹² Mato yohiti hicha pari jai bi tah man rahmabi nincati hahtipahyamahi.

¹³ Joxon ta yohuancoinai hihbaan mato jatihibi hihcoinai joi honanmayaxihqui. Hahmebi shinanxonna bi ta Papan yohihi jan nincacai joibo mato honanmayaxihqui. Joyaxihquibo rihbi ta mato yohiyaxihqui.

¹⁴ Hea nete hihbohi honanahbo ta yohiyaxihqui. Hean yohihi joibo bihxon ta jaan mato honanmayaxihqui.

¹⁵ Heen papanahbo jatihibi ta henabo qui. Jaa copi tah hen mato yohihahqui, hean yohihi joibo bihxon ta jaan mato honanmayaxihqui hahquin.

Benatax bi jenimacahinti shinan

¹⁶ Man hea jisquin jenenon ta nea pishca sca jaiqui. Basima tahni hea jisyamascaipixon tah man hea hahquirihbi jisyaxihqui –Jesusen jato jaquin.

¹⁷ Caibo sca jahuen hexanicabo yohinani:

—¿Jan yohuanai jahua hihquiquin? Man hea jisquin jenenon ta nea pishca sca jaiqui. Basima tahni hea jisyamascaipoxon tah man hea hahquirihbi jisyaxihqui. Hea heen papa qui cahiya jan hihqui bi jahua yohihi jascarihqui?

¹⁸ ¿Basima sca jan hihqui bi jahua hihcatsihquiquin? Jan yohihi tah non honanyamahi —nihcani.

¹⁹ Yocacatsihquiibo hih honanxon Jesusen jato yohiquin:

—Man hea jisquin jenenon ta nea pishca sca jaiqui. Basima tahni hea jisyamascaipoxon tah man hea hahquirihbi jisyaxihqui hen mato yohihah copi ⁱjaa jahua hihcatsihquiquin hah man yocacahanan jayamahi?

²⁰ Hen mato yohinon nincanahue: man tah man huinitihi, huaohihqui, mai mehabo jenimanon. Bena benatax bi tah man hihti jenimaribitihi.

²¹ Jahuen baquexo bihti nete nocotaiya ta hisinxon jahuen baque caincatsihquiun haibaan masa shinanihqui. Jahuen baquexo bihresscaxon sca ta jan masa shinanan shinanbehnoscaiqui. Joni behna noquen neten jahui copi jenimahi.

²² Mato jascarihbihi. Rahma masa shinanax bi tah man jointinin jenimayaxihqui, hen mato hahquirihbi jisiya. Man jenimahi yohuan ta tsoanbi mato bichintimahihqui.

²³ Jaa neten tah man hea jahuabi yocayamayaxihqui. Man honannon hihxon ta hen yohihi: man queenaibo man heen janen noquen naihoh queha Papa yocacah ta mato hinanyaxihqui.

²⁴ Rahma caman tah man jahuabi heen janen yocayamahi. Yocanahue. Jenimanoxon tah man bihtihi.

Mai mehabo Jesusen cahnetimahi

²⁵ Papan jihuematici ta jascapah qui hahxon tah hen mato haxemapahoniqui. Huetsa tian tah hen jaa patax queha joi mato yohiyamascatihi, heen Papan joi mato yohiquin sirijascaquin.

²⁶ Jaatian tah man heen janen yocayaxihqui. Mato qui tah hen noquen Papa yocaxonyaxihqui hah ta hen jayamahi.

²⁷ Man hehon shinanxon heen papa janinhax hea joní man shinancoinai copi ta mato-hon shinanihqui.

²⁸ Heen papa janinhax tah hen joniqui, Naihoh quehax jonish tah hen hahquirihbi heen papa qui cahú, mai mehax sca —jato jaquin.

²⁹ Jahuen haxenicabaan sca yohiquin:

—Rahma caya tah min yohiquin sirijahi, jaa patax queha joima.

³⁰ Mian tah min jatihibi honanai. Noquen tah non honanscrai. Jahuabi yocacahtima sca tah non jai. Non tah non honanscrai. Jaa copi tah non hihcoinai shinanai, Mia tah min Papa Dios janinhax joniqui —hahcanquin.

³¹ Jesusen jato yocaquin:

—¿Man rahma nincacoinscain?

³² Hea huesti hihnon tah man jabacahini cahax jabisnoxihi. Jaabi tah hen hea huesti hen banetimahi, heen papa ta hehbetan hihihi.

³³ Heen shinan bilihon man shinanquin sirijanoxahnnon hihxon ta hen mato yohihahqui. Mai mehax tah man hohmis hohmisyaxihqui. Jascarax bi jenimanahue. Mai mehabo ta hen namanjasca jai.

17

Jahuen haxenicabo Jesusen yocaxonai

¹ Jato jascajaquin yohixon nai bejisahnhan sca yohiquin:

—Hen tah hen janquenjascai, Papan. Hea miin baque nete hihbohi jato honanmascahue, mia nete hihbohi honanahbo, hean rihbi jato honanmanon.

² Hen mia hinanai jatihibi teehihmanoxon jatihibi yorayahpabo hihbojahue hah tah min hea janiqui. Jahuenticabi queyoyamanox manati jihuetaibo tah hen jato teehihmascatihi.

³ Mia huesti tah min Papa Dios coin qui. Queyoyamanox manataibo ta mia honanax jihuetaibo qui. Mia honanxon, hea mian raanni Jesucristo rihbi honanax ta jihuecoinnicabo qui.

⁴ Hen hahxonnon min hea hinanni tee queyoxon tah hen mainxon hen mia nete hihbohi jato jismaphahonihqui.

⁵ Mai tsahonrihyamahax bi tah hen mihibetan nete hihbo hihquish xabanihqui. Mia jano jaiton sca hea rihbi nete hihbohi jisibo heen xaba jato jismahue, Papan.

⁶ Min hea hinanni mai meha jonibo tah hen noquen Papa jenquetsahpa quin hahxon jato honanmaniqui. Minabo tah min hea hinannihqui. Miin joi ta bihresscacanishqui.

⁷ Min hea hinanni joibo jatihibi ta mina qui. Jaa ta honanscacanihqui.

⁸ Min hea hinanni joi hean jato hinannah ta honancaniqui. Jaa bihcoinxon ta mia janinhax hea joníhonancoincaniqui. Mian min hea raanni ta hihcoinjaquin shinancoincaniqui.

⁹ Jaabo ta hen yocaxonai. Mai mehabo yocaxonma bi tah hen min hea hinannihbo hen yocaxonai. Jaabo ta mina qui.

¹⁰ Henabo jatihibi ta mina qui. Minabo jatihibi rihbi ta hena qui. Jaabo heen shinanyah-pabo quen ta hea nete hihbohi honancantihiqui, mai mehabaan.

¹¹ Rahma tah hen mai mehabo tocan hihyamascái. Jaabo res ta mai mehabo tocan hihquiqui. Mihqui tah hen cahi. Hahan min hea janeni miin janen jato coiranhue, jaabo huesti hihnon, noque rabe non huesti hihqui quescaribibihi.

¹² Jato betan hihxon tah hen min hea hinanni miin janen jato coiranpahoniqui. Hean jato coiranah ta tsoabi manoyamahihqui. Nincayosma tiroma huesti res ta manotihqui, huishani joi jai quescabai janon.

¹³ Mihqui sca tah hen cahi. Mainxon tah hen nea joibo mia yohihi, hea jenimahi hihqui quescarabho.

¹⁴ Miin joi tah hen jato yohiscaniqui. Hea mai mehama hihqui quescaribibihi ta jaabo mai mehaboma quen mai mehabaan jato jistahihmahihqui.

¹⁵ Mai janinha jato tsecahue hah ta hen jayamahi. Tiroma yoshiman jato jahuejayanaman jato jisxonhue hahquin tah hen jato yocaxonai.

¹⁶ Hea mai mehama hihqui quescaribibihi ta jaabo mai mehamabo qui.

¹⁷ Nincacointi shinan jato hinanxon hihcoinai join jato mequexonhue. Miin joi ta jaa joi qui, hihcoinai joi.

¹⁸ Mian min hea mai mehabo tocan raanni quescajaribiquin tah hen jato raanscái mai mehabo tocan canon.

¹⁹ Hihcoinai joi honanxon mihqui hinamehxon teneti shinan bichibo tah hen jaton hohcha copi hen hinamehtai.

²⁰ Jaabo res ma tah hen yocaxonai. Jaabaan sca yohihah hea nincacoinyaxihqui rihbi ta hen yocaxonai.

²¹ Jaabo jatihibi huesti yora hihnon, mia hehbetan hihqui quescari, hea rihbi mihbetan hihqui quescaribibihi, noque betan jaabo huesti yora jihuenon. Non jascaraiya ta mian min hea raanni honancoinyaxihqui jionibaan.

²² Min hea hinanni coshi shinan tah hen jato hinanrihbinihi, jaabo huesti hihnon, noque non huesti hihqui quescaribibihi.

²³ Jato betan tah hen jihuetai. Hehbetan rihbi tah min jihuetai, jaabo rihbi huesti yora siripi jihuenon. Jascaraiya ta min hehon hihti queenai quescaribibihi, hea raanax min jatohon hihti queenai mai mehabaan honanyaxihqui jionibaan.

²⁴ Jano hea jaiton min hea hinanni jonibo rihbi jati tah hen queenai, Papan, nete jariyamanon hehon queenxon min hinanni coshi jisibo.

²⁵ Mai mehabaan mia honanyamahi bi tah hen hean mia honanai, Papan. Hea min raanni rihbi ta heen jonibaan honanihqui. Mian tah min pontejaquin shinananai.

²⁶ Hahxonnicá Papa siri min hihqui jato honanmanixon bi tah hen jato honanmar-ihbitihi, min hehon queenxon hahxonni quescajaribiquin jatohon shinanxon min jato hahxonnon. Hea rihbi jato betan hihnoxon tah hen jato honanmanoxihqui.

18

Jesus bichibo

(Mt 26.47-56; Mr 14.43-50; Lc 22.47-53)

¹ Jascanax jahuen haxenicabo betan cahax Cedron janeya texpa pohquetax jano huai jaiton cahi.

² Jesus bihmacatsihqui Judasen ta jaa huai honanrihbinishqui, jaa huai chian jahuen haxenicabo betan Jesus cahiya cahen jaa rihbi jano capahoni.

³ Jano Jesus cahi honanxon sontarobo sca benaxon sacerdote hapobo janin porisiabo rihbi benaxon jaa huai chian jato hioquin. Caibo johueyahpabo, caibo ramparinyapabo, jaton jashiya bocani.

⁴ Huai chian nocataiton Jesusen jato behchiquin. Jahuejanoxihqui rihbi jatihibi honanax, jato behchihi cainxon yocaquin:

—¿Tsoa man benahin? —hahquin.

⁵ —Nazaret janinha Jesus rahan —hihcanci.

—Hea ta hen qui —hihqui Jesus. Jesus bihmanica hihquish Judas jato betan nichí.

⁶ Hea ta hen qui Jesus jaiya jaabo chitihihrenenax paqueti miracahrenencani.

⁷ —¿Tsoa man benahin? —jato jaribiquin.

—Jesus Nazaret janinhah rahan —hihcanci.

⁸—Hea ta hen qui hih ca hen jai sen. Hea benaxon heen jonibo jenenahue, botanahbo —Jesusen jato jaquin.

⁹ Min hea hinanni jonibo tah hen ni huestibi manomayamahi jan yohihah quescabi janon hihxon jascajaquin.

¹⁰ Simon Pedronen sca machito jaxon, tsecaxon, sacerdotenin joni reraquin bi mecayaho res paxtebahinquin. Malco ta jaa jonin jane qui.

¹¹—Miin machito bexojahue. ¿Heen papan hea jascajahue hahca hen hahtimahin? —Jesusen Pedro jaquin.

Jaton hapobo janin Jesus bohibo

(Mt 26.57-58; Mr 14.53-54; Lc 22.54)

¹² Jaatian sontaro hapon yohihah porisiabo betan jahuen sotarobaan Jesus bihtanxon menexcanquin.

¹³ Menexxon Anasen xobo janin pari bocanquin. Anas cahen Caifasnen coca. Caifas cahen jaa bari tian sacerdote hapo hihpahoni.

¹⁴ Caifas ta Huetsa jonibo jihuenon huesti joni mahuatah ta siri qui hihnicah qui.

Jesus qui Pedro paranahti

(Mt 26.69-70; Mr 14.66-68; Lc 22.55-57)

¹⁵ Anasen xobon bohiboya pari ta huetsa jahuen hahbe haxenica betan Simon Pedronen jato chibabonanishqui, Jesus bohiboya. Jahuen hahbe haxenica ta sacerdote hapon honannishqui. Jaa copi ta sacerdote hapon xoboho mapetaiboya jemanhihti janin jahuen hahbe haxenica hihconishqui.

¹⁶ Jaa hihcohi bi jemanhihti xehqui senenbi Pedro banereneni. Jahuen hahbe haxenica sca sacerdote hapon honanai joni hihquish picoxon xehpoti coirannica haibo yohixon Pedro hihcomaquequin, jemanhihti janin.

¹⁷ Jemanhihti janin nichiton sca xehpoti coirannica haibaan Pedro yocacuin:

—¿Mia rihbi min jahuen haxenicama quin? —hahquin.

—Jaama ta hen qui —nihqui Pedro.

¹⁸ Matsihiya sca cahen hapon jonibo betan porisiabaan chihi requenjaquin. Perehiquiya janoo pehchicani. Pedro rihbi jato betan pehchihi nichi.

Hapobaan Jesus yoca yocacai

(Mt 26.59-66; Mr 14.55-64; Lc 22.66-71)

¹⁹ Xoboho cahen jaton hapo yocacahti:

—¿Tsoabo miin haxenicabo quin? ¿Jahua yohiquin min jonibo haxemahin? —hahxon yocapaquequin.

²⁰ Yocacah Jesusen yohiquin:

—Janibixon tah hen jatihibi joni yohirahsihi. Maton tsinquit xobohoxon haxemaxon, Papan xobohoxon haxemaxon, jano judiobo tsinquitaiton tah hen jato honanmarasihi. Jonexon tah hen jahuabi yohiyamarahsihi.

²¹ ¿Jahua copi sca min hea yocacain? ¿Hea nincarahsihibaan jahua yohihipishquin? Jaabo caya yocahue. Jascajati ta jaiqui. Hen yohirahsihi nincaxon ta honancaniqui —hahquin.

²² Jascabiton:

—¿Jascajaquin min sacerdote hapo joi bichinain? —hahxon jaa senenbi nichi porisianen Jesus copatsahquin.

²³ —Ponte hen yohiyamahiya Jascama ta qui hahhue. ¿Hen ponte yohihiya jahua copi sca min hea rishquihin? —hahquin Jesusen.

²⁴ Jaatian hahquirihbi menexti jato yohixon Caifas janin sca Anasen jato raanquin, Caifas hashoan hapo copi.

Pedro Jesus qui paramehribihi

(Mt 26.71-75; Mr 14.69-72; Lc 22.58-62)

²⁵ Xoboho pari jaabo jai bi jemanhihti Pedro nichi pehchihi.

—¿Mia rihbi min jahuen haxenicama quin? —hahcanquin.

—Jaama tah hen qui —hahquin, Jesus qui paramehquin.

²⁶ Sacerdote hapon joni sca Pedronen paxteha jonin jenabo hihxon yocacuin:

—¿Huai chian min hahbetan nichi hen mia jisyamahaquin? —hahquin.

²⁷ Jascajaquin yocacah hahquirihbi jahuen joni hihtima yohiquin. Jaatianbi sca hatapa queoscai.

Pilato qui Jesus nocoti

(Mt 27.1-2, 11-14; Mr 15.1-5; Lc 23.1-5)

²⁸ Caifasnen xobo janinhax picoxon gobernador xoboho sca Jesus bocanquin. Xaba paquecatsihscai. Nahuan xoboho mapetax rishtaxon non pascua fiesta piti hahtipahya-mamis hihquish jahuen xoboho mapeyamacani.

²⁹ Jaa copi jato qui Pilato picoti.

—¿Jahua man hahqui yohuanain? —jato jaquin.

³⁰ —Tiroma joni hihyamahiya cah non mia hinanyamahan —hahcanquin.

³¹ —Boxon, maton xenibaan huishaniboo joi jisxon jaa joi jai quescajaquin hahnahue matonbi —Pilatonen jato jaquin.

—Noquen cah non rehteti hahtipahyamahi. Noquen rehtetima joi ta jaiqui —hahcanquin.

³² Jascajaquin ta hea rehteyaxihcanihqui hahxon Jesusen jato jaipi quescabijaquin janon, jascajacanquin.

³³ Jahuen xoboho hihcorihbixon Jesus quenaxon Pilatonen yocaquin:

—¿Mia min judiobaan quiquin hapo quin? —hahquin.

³⁴ —¿Mianbi shinanxon min hea yocacain? ¿Caibo hehqui yohuanah min hea yocacain? —hahquin Jesusen.

³⁵ —¿Hea judio quin? Jaton sacerdote hapobo betan ta miin caibaan mia hihuexon hea casticanmacatsihqui. —Jahuejah min jaipiquin? —Pilatonen jaquin.

³⁶ —Hean hihboti ta nea mai mehama qui. Nea mai meha heen hihboti jaiya cahen heen jonibo coshicahinquehanhqui, judiobaan hea bihyamahahbo. Nea mai mehama ta heen hihboti qui —Jesusen jaquin.

³⁷ —¿Mia min quiquin hapo qui nan? —Pilatonen yocaquin.

—Quiquin hapo hea hihqui hah tah min miabi jai. Jaamama jaabijaquin yohinoxon tah hen cainnihqui. Jaa copi tah hen nai naman joniqui. Jatihibi hihcoinai yohuannicaton ta heen joi nincaquihqui —hahquin Jesusen.

³⁸ —¿Hihcoinai jahua quin? —hihscai Pilato.

Jesus rehteti yohihibo

(Mt 27.15-31; Mr 15.6-20; Lc 23.13-25)

Jascahax Pilato caini judiobo qui.

—Jahua hohchabi ta hen jisyamahi.

³⁹ Pascua fiesta tian yocanicabo tah man qui, hen sipo xoboho tsahonni huesti mato picoxonnon. —Judiobaan quiquin hapo hen mato picoxonti man queenyamahin? —jato jaquin.

⁴⁰ —Jaama bi Barrabas —hahcanquin, coshin bi res. Barrabas ta yometsoh hihpahonishqui.

19

¹ Jaatian sca Jesus rishquihahbo jahuen sontarobo Pilatonen yohiquin.

² Sontarobaan sca rishquxon moxa maitijaxon Jesus maimaquin. Yancon tari rihbi sahuemacanquin, hapon tari.

³ Sahuemaxon hahqui jori jorixon:

—Jihuehue, judiobaan quiquin hapon —hahcanquin. Jascajaxon tihibi tantashahcanquin.

⁴ Jaatian judiobo qui Jesus hahquirihbi picoxon Pilatonen jato yohiquin:

—Jisnahue. Man jisnon tah hen mato jismahi. Hean jisi ta jahuen hohcha yamahihqui. Man honannon hihxon tah hen mato yohihi.

⁵ Jascahiya Jesus picoscai, moxa maitya, yancon tariya.

—Nea tah qui —jato jaquin Pilatonen.

⁶ Sacerdote hapobo betan porisiabaan sca Jesus meraxon coshin yohiquin:

—Jihuin hueonhue. Jihuin hueonhue —hahcanquin.

—Jihuin hueonnahue matonbi. Jahuen hohcha ta yamahihqui, hean jisi bi —jato jaquin Pilatonen.

⁷ —Huishihi joi tah non noque jai. Hea ta Diosen baque qui jan jai copi tah non jaa rehteti jai, noquen nincati joi nincaxon —hahcanquin.

⁸ Jascaraibo nincacax Pilato hashoan raquescrai.

⁹ Jahuen xoboho hihcorihbixon Jesus yocaribiquin:

—¿Jahuerahnhah mia quin? —hahquin. Yocacah bi jahua hihyamahi.

¹⁰ Jahua hihyamahiya Pilatonen yocaquin:

—¿Min hea yohicatsihyamahin? Mia tah hen picoti hahtipahi. Mia jihuin hueonxon rehteti tah hen hahtipahribihi ¿min honanyamahin? —hahquin.

¹¹—Naihohxon mia coshi hinanyamahah tah min hea jahuejati hahtipahyamaquehanai. Jaa copi ta hea bihxon mia hinanai joni hashoan hohchaya qui —Jesusen Pilato jaquin.

¹² Jascahah Pilatonen picocatsihqui bi judiobo coshin yohuani:

—Min jaa picohi tian tah min quiquin hapo Cesaronen hamicoma sca min jatihi. Jatihibi quiquin hapocatsihquibo ta Cesaronen rahuibo qui —hahcanquin.

¹³ Jascaraibo nincaxon Jesus cainmahax, castiganti yohinoxon janoxon yohiti tsahotinin tsahopaquesti. Gabata janeya jemanhihti janin, judiobaan join cahen Gabata macan champaani tapojahibo hihcatsihquiui.

¹⁴ Pascua fiesta piyanoxon jaton pitijati neten barin manan tsacahiya cahen jano tsahoxon judiobo sca Pilatonen yohiquin:

—Nea ta maton quiquin hapo qui —hahquin.

¹⁵ Jascahiya sai saihihscacani:

—Rehtehue. Rehthehue. Jihuin hueonhue —hihcansi.

—¿Maton quiquin hapo hen jihuin hueontihin? —Pilatonen jato jaquin.

—Cesaro huesti ta noquen quiquin hapo qui, huetsama —hihcansi sacerdote hapobo.

¹⁶ Jaatian jihuin hueonahbo sca jato Bihnahue hahquin. Bihnahue hahca Jesus bihcandin.

Jihuin hueonaibo

(Mt 27.32-44; Mr 15.21-32; Lc 23.26-43)

¹⁷ Bihxon boxon jahuen coros hiambahincanquin. Cahax mapo xao janeya manan qui nococani. Judiobaan join cahen Gólgota.

¹⁸ Janoxon sca tasaxon nichinxon jihuin hueoncanquin. Huetsa joni rabe rihbi jascajaribicanquin, ramaho huetsa nichinxon ramihoh rihbi huetsa nichincanquin. Naponbi cahen Jesus.

¹⁹ Quirica huishamaxon ta Jesusen coros qui Pilatonen jaa quirica hueonmanishqui: Nazaret janinha Jesus, judiobaan quiquin hapo hihqui jaa quirica.

²⁰ Hihti caiboxon ta judiobaan jaa quirica jisnishqui, jema hochoma hueonaibo quen. Judiobaan join huishaxon bi Latin join rihbi hahxon, Griego join rihbi huishahah, jaa quirica.

²¹ Jaa quirica jisxon judiobaan hapobaan sca Pilato yohicanquin:

—Judiobaan quiquin hapo hahquin huishayamahue. Judiobaan quiquin hapo ta hen qui jan hahcái, hahquin huishahue —hahcanquin.

²² —Hen huishahah ta huisha sca qui —hahquin Pilatonen.

²³ Jihuin hueonxon sca ta jahuen chopabo sontarobaan bijnishqui. Chosco sontaro hihquish jahuen chopab metisihpaequecani. Jahuen tari sca cahen metisihpapan rechijoma hihnish, jahuen tepan janinhax jahuen quecate caman sayá.

²⁴ —Jahuen tari huaxayamanahue. Tsoana banetihiquin hihxon macan bero pishca borasa qui nanexon chicoti ta jaiqui —hihcansi. Jascaxon huishani joi janí quescabijacanquin. Heen chopabo ta biphaquecanihqui. Heen sahueti bijnoxon ta macan bero potacaniqui. hihqui jaa joi. Jaa joi jai quescabijacanquin cahen sontarobaan hahquin.

²⁵ Jasca jaibaan bi Jesusen coros patax jahuen mama, jahuen mama huetsa, María Cleofas haibo, María Magdalena, jaabo nichí.

²⁶ Jahuen mama jisxon hahan jan queenai jahuen haxenica rihbi hochoma nichí jisxon jahuen mama Jesusen yohiquin:

—Hoa ta miín baque qui, maman —hahquin.

²⁷ Jahuen haxenica sca yohiquin:

—Nea ta miín mama qui —hahquin. Jaa copi ta jahuen xoboho sca jaa haxenicaton Jesusen mama jihuemanishqui.

Jesus mahuatai

(Mt 27.45-56; Mr 15.33-41; Lc 23.44-49)

²⁸ Jaatian sca jatihibi janquenja sca jan jai honanxon huishani joi jai quescanon hihquish:

—Xehan tah hen hihqui —hihqui Jesus.

²⁹ Jano cahen tason bocho xehati cachani tsahoti. Jesus jascaraiya sca taco quescapa hahan maosahxon mechchajaquin, jashi taxoyaxon jahuen jana janin sanancanquin.

³⁰ Cachani tanahax sca:

—Janquenja sca ta jai —hihqui. Jascarax jahuen mapo betihiquish mahuati.

Sontaroren Jesus pishnacohi

³¹ Pilato janin caxon sca pitijati nete sca jai copi, Janin yamenon mahuamati ta jaiqui hahxon judiobaan yocaquin. Jaton huihax tobanon yohihue, mahua sca jaiton jaton

yora botonxon botanahbo hahcanquin yocaquin. Tantiti neten jaton yora coros janin hueoyamanon hihxon jascajacanquin. Jaa tantiti nete jaton hani fiesta nete hihqui copi.

³² Tobatannahue hahca sontarobaan caxon jaa senenbi hueonah rabebe jahuen huihtax tobaxon huetsana jascajaribicanquin.

³³ Jesus qui nocoxon sca mahuascai meraxon jahuen huihtax tobayamascaquin.

³⁴ Tobayamaxon bi huesti sontaronen jashin Jesus pishnacoquin. Pishnacoha jimiya jene caini.

³⁵ Jaa jisinxon tah hen mato yohicoinai, maton rihbi man nincacoinnon. Hen tah hen hihcoinai. Honancoinax tah hen hihcoinai maton rihbi man nincacoinnon hihquish.

³⁶ Huishani joi jai quescabi janon ta tobayamacanishqui. Jahuen xao ta ni huestibi tobatiyahqui hihqui jaa joi.

³⁷ Jaa pishnaconixon ta jaabi jisyaxihcanihqui hihqui huetsa rihbi huishani joi.

Jesus mihinaibo

(Mt 27.57-61; Mr 15.42-47; Lc 23.50-56)

³⁸ Jaa pecaho Arimatea janinhax José janeya joni joxon Pilato yocaquin Jesusen yora botanoxon. Jaa José cahen nincacoinnica. Nincacoinnicaxon bi judiobo qui raquexon tsoabi yohiyamaquin. Rahma sca jahuen yora yocaquin. Yocacah Pilato jeen hihqui. Jeen hihqui caxon jahuen yora botonxon boquin.

³⁹ Jesusen haxemamenohiya hahqui yame canicah rihbi jahui, Nicodemo. Mirra, áloe jahan hinintibo mesco bequin hicha. Háhan mihinti rahobo jan behi cahen cuarenta kilo hihuepai.

⁴⁰ Jesusen yora bihxon judiobaan hahpahoni quescajaquin hahan hininjatiya bi joxo chopa quexen yabi yabicanquin.

⁴¹ Jano hueonahbo janin cahen jihui huai jai. Jaa huai janin rihbi mai poquin behna jai, jaho tsahonti quini, jano tsoabi tsahonrihyamahi.

⁴² Jaa tsahon hochomahi copi janobi Jesus tsahonbahancanquin pitijati neten copi hishtocani.

20

Jesus huenirihbihi

(Mt 28.1-10; Mr 16.1-8; Lc 24.1-12)

¹ Jahan semana pehocohtai neten sca hihari xaba paqueri jaima tsahon janin María Magdalena jahui. Nocoxon hahan tsahon behpohipibo macan taranbohanah sca jisquin.

² Bishquihihcanahi caxon Pedroya huetsa haxenica yohiquin. Jaa huetsa cahen jahan Jesus queenai joni.

—Tsahon janinhah ta noquen hihbo tsecacanaxqui. Jahuerahnon racanaxquin tah non honanyamahi —hahquin.

³ Yohila jaa huetsa haxenica betan picotax tsahon janin bishquihihcanahi Pedro cahi.

⁴ Rabebe bishquihihcanahax bi jaa huetsa pari tsahon janin nocoti, hashoan coshin cahax.

⁵ Cahcopiaquexon najisquin. Hahan yabihipibo joxo chopa jano tsamana jisish bi hihcoyamahi.

⁶ Hahchon sca Simon Pedro nocoti. Jahuex pontecahini tsahon quinihi hihcohi. Hihcoxon jisi bi jahuen chopa quexe tsamanah racati.

⁷ Hahan bebepohipibo payon cahen huetsanco, joxo chopa quexebo betan racayamahi. Jaa cahen hahmebi boxca boxcahah racatan.

⁸ Huetsa sca tsahon janin hihcohi, jaa pari nocotax bi chini hihcohi. Jisxon, Bohancointa jacanaxqui hihqui shinancanquin.

⁹ Jaa hihquipish bi hahquirihbi teehihtihi hihqui huishani joi honanyamaxon jascajaquin shinanquin.

¹⁰ Jaatian sca jaton xoboho rabebe caribibi.

Maria Magdalena qui Jesus sanareneni

(Mr 16.9-11)

¹¹ Tsahon patax banetax María nichi, huaohihqui. Huaohihanana cahcopiaquexon tsahon najisquin.

¹² Jisi bi Papan yonoti rabe. Jano Jesusen yora racanipi janin joxo chopayahpa yonoti rabe tsahotai. Tsahon mapo quiri huesti tsahotai, taha quiri huetsa.

¹³ —¿Jahua copi min huaohihquin, haibon? —yocaquin.

—Heen hihbo hea bohanahbo copi, rahan. Jahuen racancanaxquin hen ta hen honanyamahi —hihqui María.

¹⁴ Jaschaх rabejaquexon jisi bi janobi Jesus nichi. Jaa que bi Marian honanyamaquin.

- 15 —*Jahua copi min huaohihquin, haibon? ¿Tsoa min benahin? —Jesusen yocaquin.*
Jaa huai hihbo hihqui shinanxon:
 —Huetsanco hea bohanxon jahuen min racantanai hea yohihue, jonin, hen botannō
 —hahquin haibaan, jisxonma.
 16 —Marian —hahscaquin Jesusen. Jascalah rabejaquetax judiobaan join yohuanī:
 —Raboni —nihqui. Maestron hihcatsihqui, jaton join.
 17 —Hea xecoyamahue. Heen papa qui tah hen hinahihnarihyamahi. Heen huetsabo
 yohitanhue, hea heen papa qui, matón papa qui, heen Dios qui, matón Dios qui hea
 hinahinhatai yohitanhue.
 18 Yohitanhue hahca caxon jahuen haxenicabo María Magdalenanen yohiquin:
 —Noquen hihbo tah hen jistanai —jato jaxon jan nincacah jato yohiquin.

Haxenicabo qui Jesus sanareneni
(Mt 28.16-20; Mr 16.14-18; Lc 24.36-49)

- 19 Jaa pecaho sca jaa neten, hahan jaton semana pehocohtai neten, janō jaabo jai xoboho
 mapexon judiobo qui raquexon jahuen haxenicabaan xehqui xehpoquin sirijaquin. Bepis-
 caiya sca jahuem jato tocan Jesus nihreneni jahui.
 —¿Man siripi jayamahi? —jato jaquin.
 20 Jato jascajaxon jahuen mequen jato jismaquin. Jahuen pishi jato jismaquin. Noquen
 Hihbo jish jahuen haxenicabo jenimahi.
 21 Jato yohirihbiquin:
 —¿Man siripi jayamahi? Heen papan hea raanni quescajaribiquin tah hen mato raanai.
 22-23 Jato jascajaquin yohixon jato xoonhahxon:
 —Dios Yoshin binnahue —jato jaxon— Man huetsa joni hohcha sohuamahiya tah hen jaa
 sohuaxontihi. Man huetsa joni hohcha sohuamayamahiya ta jahuen hohcha jascabi jaiqui
 —jato jaquin.

Teehihibibi Tomasen jisquin

- 24 Rabe nane janeya Tomas ta jahuen doce haxenica janinha huesti janishqui. Jesus jahui
 bi cahen jato betan Tomas hiyamahi.
 25 Jaa copi cahen jahuen hahbe haxenicabaan yohinish:
 —Noquen hihbo tah non jisiqui —hahcanquin. Yohihabaan bi:
 —Jahuen mequen janin clabon metasipi quini jisyamaxon, jaa clabon quini janin heen
 metoti rihbi niyamaxon, pishnacohipibo janin heen mequen rihbi niyamaxon tah hen
 hihcoinai shinantomabirestihi —jato jaquin.
 26 Jan jascahipi ocho neten sca jaa xoboho jahuen haxenicabo hahquirihbi tsinquit. Jato
 betan Tomas hihqui. Xehqui xehpotai bi jato tocan Jesus nihreneni jahui.
 —¿Man siripi jayamahi? —jato jaquin.
 27 Jato jascajaxon Tomas sca yohiquin:
 —Miin metoti niah iohue. Heen mequen jisihue. Heen pishi janin miin mequen niah
 iohue. Paranaibo shinanyamahue. Hihcoinai shinanhue —hahquin.
 28 —Heen hihbo, heen Dios —hihscai Tomas.
 29 —¿Hea jisxon copi min hihcoinai shinanain? Jisxonma bi hihcoinai shinanaibo ta
 hahan jenimati jaiqui —Jesusen jaquin.

Non jihuenon Juaman huishahi

- 30 Jahuen haxenicabaan jisnon bi hicha hahan honantibo Jesusen hahní bi tah hen nea
 quirica huishaxon texe res yohihi; hashoan hicha jan hahníbo tah hen yohiti pishinai.
 31 Jaabi Jesus noquen Papa Diosen baque Cristo hi man honancoinnon hihxon tah hen
 nea huishahahqui, nincacoinax Jesus qui hinamehtax man jihuexayihnon.

21

Sietebó qui Jesus sanareneni

- 1 Jascari jato qui cainipish cahen Tiberias hian quexa sca jahuen haxenicabo qui Jesus
 sanareneni joribinish. Jan sanareneni jahui ta nescanishqui.
 2 Simon Pedro, Rabe nane janeya Tomas, Galilea mai meha Cana jema janinha Natanael,
 Zebedeonan baque rabe, huetsa jahuen haxenica rabe rihbi, jaabo janó hihcami.
 3 —Hea tah hen tsatsa benahi cahi —Simon Pedronen jato jaquin.
 —Cahue non mihibetan canon —hahcanquin. Cahax nontin nanecani. Tarrafa
 potashinaxon bi jahuabi bihyamacaquin.
 4 Xaba paquescaya quexabi jahuem Jesus nihreneni. Jesus que bi jahuen haxenicabaan
 honanyamaquin.
 5 —¿Man tsatsa bihyamahi, heen baquebaan? —Jesusen jato jaquin.

—Bihyama tah non jai —hahcanquin.

⁶ —Mecayaho sca tarrafa potanahue. Jano tah man merathi —jato jaquin. Jascahah potaxon bi naneti hahtipahyamascacanquin tsatsa hichahiya.

⁷ Hahan Jesus queenai jahuen haxenicaton sca Pedro yohiquin:

—Noquen Hihbo tah qui —hahquin. Chopanma teexon bi Noquen Hihbo tah qui hihqui nincaxon jahuen chopas Pedronen sahuequin. Sahuehax jenenencanya cayahi.

⁸ Texe jahuen haxenicabo nontin taxnati cahi. Tarrafa tsatsa bochohi ninibonahi cahx taxnacani, quexa hochoma hihquish cien metro tihxonpahi.

⁹ Mapexon tsiste requeman tsatsa xohihi meracanquin. Paan rihbi jan racatai mera-canquin.

¹⁰ —Man rahma rahcohi tsatsa pishcaya benahue —Jesusen jato jaquin.

¹¹ Nanexon jaton tarrafa ninibenaxon Simon Pedronen mapemaquin. Hanibo tsatsabo tarrafa bochohax bi huaxayarnahi, ciento cincuenta y tres tsatsa.

¹² —Pih benahue —Jesusen jato jaquin. Tsoa min quin tsoanbi jahuen haxenicaton yocayamaquin, raquexon. Noquen Hihbo hihqui honanscacanquin.

¹³ Joxon paan bilihon Jesusen jato hinanquin. Tsatsa rihbi jato hinanquin.

¹⁴ Jaa cahen jahuen quimisha coti sca jan hihquipish bi hahquirihbi teehihquipish jahuen haxenicabo qui jaa sanareneni jahui.

Pedro beten Jesus yohuanai

¹⁵ Piquin jaabijahiboya Simon Pedro sca Jesusen yohiquin:

—Simon, Juaman baquen, ¿neabo hehon queenai bi hashoan bi res min hehon queenain? —hahquin.

—Jeen. Mihon ta hen queenai, Hihbon. Min tah min honanai —hihqui Simon.

¹⁶ —Heen carnerobo pimahue —hahxon yocaribiquin jahuen rabe coti sca:

—Simon, Juaman baquen, ¿min hehon queenain? —hahquin.

—Jeen. Mihon tah hen queenai, Hihbon. Min tah min honanai —hihqui.

—Heen carnerobo pimaxonhue —hahscaquin Jesusen.

¹⁷ Juhuen quimisha coti sca yocaribiquin:

—Simon, Juaman baquen, ¿min hehon queenain? —hahquin. Min hehon queenain hahquin jan quimisha coti yocacai copi Pedronen masa shinanscaquin.

—Mian tah min jatihibi honanai, Hihbon. Mihon tah hen queenai. Min tah min honanai —hahquin Pedronen.

—Heen carnerobo pimaxonhue.

¹⁸ Mia tah hen yohicoinai: beronan hihquish tah min miin chopas sahuehax min jano queenaiton nihpahoniqui. Yosiboscaax tah min miin mequen cataxon sanatihi, huetsan mia sahuemaxon jano min cacatsihyamahiton mia bonon —hahscaquin Jesusen.

¹⁹ Jan yohihi ta jascahahbo mahuaxon noquen Papa Dios Nete Hihbohi Pedronen jato honanmayaxihqui qui honanahbo. Jaa pecaho:

—Hea chibanhue —Jesusen Pedro jaquin.

Jahan jan jenimahi haxenica

²⁰ Rabejaquexon hahan Jesus queenai jahuen haxenicamen jato chibahenahi Pedronen jisquin. Jaa cahen pihiboya Jesus senenbixon yocaquipi, Tsoan mia parannoxihqui qui, Hihbon, hihnicah.

²¹ Jaa jisxon cahen Pedronen Jesus yocaquin:

—¿Hoa cahran, Hihbon?

²² —Hea jonon caman jaa manati hen queenaiya, ¿mihqui jahua hihti quin? Mian hea chibanhue —Jesusen jaquin.

²³ Jaa copi ta jaa pecaho hicha noquen huetsabo jaya joibi yohuanpahonishqui:

—Jaa haxenica ta mahuayamayaxihqui qui —hihcani. Jasca que ma bi Jaa ta mahuaya-mayaxihqui qui Jesus hihyamani. Hea jonon caman jaa manati hen queenaiya, mihqui jahua hihti quin hihresi.

²⁴ Jaa haxenicaxon tah hen honancoinxon nea joibo huishahahqui. Honancoinxon yohuana joi tah qui. Non tah non honanai.

²⁵ Hashoan hicha rihbi ta Jesusen hahnishqui. Jatihibi huishapaquehah rah cahen mai senenyamascaan, quirica bochohi.

HAHNIBO

Criston raantibaan hahnibo

Jahuen yoshin noque hinantijani

¹ Mihqui huishamenoxon tah hen Jesusen hahni jatihibi mia yohinihqui, señor Teófilo, jan honanmani rihbi mia yohiquin.

² Hinahihnanoxon caman jan hahpahoni jatihibi tah hen mia yohinihqui. Hinahihnarhyamaxon ta jan caisni jahuen raantibo jaan yohnishqui jascalahbo. Dios Yoshiman shinanmaha jato yohiquin.

³ Jhui qui hueonahbo mahuatipish bi cahen jaabaan jisibó hihquish jato qui sanareneni jahui, jan hahquiribhi jihueta honanahbo. Cuarenta neten cahen jato betan hihcanahi. Jato nihquihinxon jenquetsahaquin Papan noque jihuemayaxihquin jato honanmaquin.

⁴ Jato betan pixon cahen jato yohiquin:

—Jerusalen jema potabahinaxma janobinahue, Papan yohini nocoyaxahnon caman janobi mananahue. Jaa ta Papan hinanyaxihqui qui hah ta hen mato janiqui.

⁵ Juaman mato jenen nashimani bi ta Papan mato jahuen Yoshin hinanyaxihqui qui nashimaquin hahcajaquin hicha hinanresquin. Jan jascatati nete ta nea pishca sca jaonahiqui —jato jaquin.

Naiho Jesus hinahihnatai

⁶ Jaatian hahqui tsinquirihbixon Jesus yocacanquin:

—¿Noquen caibobi sca hahquiribhi noquen hapo janon min rahmabi noquen nahuabo camatinih, Hihbon? —hahcanquin.

⁷ Yocacahbo jato yohiquin:

—Jaabi hihbo hihxon ta jayaxihquibo Papan yohnishqui. ¿Jahuentian jaticaniquin? ¿Jahua neten jayaxihcanychuin? Man tah man honantimahi.

⁸ Jaa man honantimahi bi ta Dios Yoshiman mato coshi hinanyaxihqui qui mato qui botopaquexon. Coshi bichish tah man hehqui chanicoinyaxihqui Jerusalen jema janin, Judea mai jatihibinco rihbi, Samaria mai janin rihbi, jano nai chibechijaquehtancahuanaiton rihbi —jato jaquin.

⁹ Jaschiton cahen Papan jaa bilihnihniquin jaton jisnonbi. Nai cohiman pantehah cahen jisyamascacanquin.

¹⁰ Jan cahiya nai bejisihnihi nih nichaibaan bi joxo chopaya rabe jato patax nihreneni jahui.

¹¹ Nihrenenxon yocacanquin:

—¿Jahua jenquetsahin man naihoh jisichain, Galilea mai mehabaan? Maton jisnon bi jan naihoh hinahihnatia quescaquihrani ta joribiyaxihqui qui, Jesus, jaabi, huetsama —hahcanquin.

Judas xahbanen Matías caisaibo

¹² Jasca jaabo jaiya cahen Olivo janeya mahchin mehax Jerusalen janin boribican. Jaa mahchi ta Jerusalen hochoma qui noquen xobo janinhax noquen huai tihixon.

¹³ Nocotax rabe tapoyahpa xoboho bocani bochiquiha chique janin, jano jaabo jihuetai janin. Pedro, Juan, Jacobo, Andres, Felipe, Tomas, Bartolomé, Mateo, Alfeon baque Jacobo, Simon Celador, Jacobon baque Judas.

¹⁴ Jaabo rahsichin Papa jaayocacanquin jaa shinan huestiya hihxon. Jato betan haina bobaan rihbi yocauquin. Jesusen jochicabaan rihbi, jahuen mama Marian rihbi yocacanquin.

¹⁵ Jano cahen noque huetsabo tsinquicani, ciento veinte rah. Jato tocan mehax huenihinanoxon Pedronen yohiquin:

¹⁶ —Papan huishamani joi jai quescari ta jahoxqui, noque huetsabaan. Judasen jascayaxihqui ta Davidinin huishanishqui, Dios Yoshiman shinanmahah. Jesusbihmanoxon ta Judasen Jesus qui jonibo hihuehxqui.

¹⁷ Jaa Judas ta noque betan hihpahonishqui, jaa rihbi nea tee hihbomahah.

¹⁸ Jan hohchaquin cananai coriquinon ta mai marohoxqui. Marohax paqueti behoracareneni pohtoshihcahinax jahuen pocobo napaquehreneni.

¹⁹ Jan jascajahi jatihixonbi honanxon ta Jerusalen janin jihuetaibaan jaa mai janenishqui Acéldama, jaton join. Jimiyahpa mai hihcatsihqui.

²⁰ Salmos quirica janin ta nea joi huishá jaiqui:

Jahuen xobo xahbanscanon tsoabi jano jihueyamascanon hihqui jaa quirica janin.

Jahuen tee rihbi huetsan hihbojanon
nihqui huetsa quirica janin rihbi.

²¹⁻²² Jascabi sca janon huetsa sca caisnahu. Noque betan huetsa sca yohinica caisti ta jaiqui. Juaman noquen Hihbo nashimani tian noque betan nihni joni huesti. Noquen Hihbaan noque nihquihihpahoni tian noque betan nihxon rahma caman noque manapahoni joni huesti caisnahu. noquen jisnonbi noquen Hihbo hinahihnanon caman noque manapahoni joni. Jaan ta noque betan noquen Hihbo Jesus retehahbo bi hahquirihbi jihueta yohicointihqui –jato jaquin Pedronen.

²³ Jaatian cahen rabe joni naponbi nihmacanquin. Huetsa cahen Matías. Huetsa cahen José, Barsabas hahcaibo. Justo jahuen Jane huetsa.

²⁴⁻²⁵ Jaatian cahen Papa yocacanquin:

—Hihbon, mian tah min jatihibi jonibaan shinan honanai. Criston raantibaan tee ta Judasen potabahinhoxqui jano jan cacatsihquiton canoxon. Rabe joni tah non naponbi nihmahi. ¿Jahuemeha min caisain Judasen tee jan hihbojanon? Noque jismahue non honannon —hahcanquin.

²⁶ Jascajaquin yocaxon jahuemeha hin honannoxon macan bero borasa qui nanexon chicoxon jiscanquin. Jisxon Matías honanscakanquin. Criston once raantibo betan sca hihnon jaton hahbe raanti janecanquin.

2

Dios yoshin jahui

¹ Pentecostes fiesta nete nocotaiya cahen jaabo jatihibi huesti xoboho tsinquit.

² Jano tsahotaibaan bi nihuehhuhan corotihcamahi naihoh quehax jahuex jaa xoboho coshin corotai nincacanquin jatihibichin.

³ Jascascaiaya cahen chihi perehiquicamahi romishin jato qui paquereneni. Chihi perehiquicamahi joni thihibi maracahreneni.

⁴ Dios Yoshiman sca jato jatihibi hihbojaquin. Jaan hihbojaxon shinanmaha huetsa join sca yohuancani.

⁵ Jerusalen janin ta jatihibi mai janinhax jahuex Papahon shinanai judiobo jihuecanishqui.

⁶ Yohuanaibo nincacax cahen jato qui hicha tsinquijsaqueti. Yohuanaiboya jatihixonbi jahuenahbi jahuen joi nincaquin. Huetsan jahuen joi nincaquin. Huetsan rihbi jahuena nincaquin. Jascajaquin jaton joibi nincacanquin jatihixonbi. Jascascaiaya jahua copi jascarihqui honanyamacanquin.

⁷ Rahte rahtexon yocacanquin:

—¿Yohuanaibo Galilea janinhahbo rahsima hin?

⁸ Jascaraiboya ¿jenquetsahaxon non noquen mai meha joibi non nincacain jatihibichin?

⁹ Neno tah non jai partobo, medobo, elamitabo, Mesopotamia janinhahbo, Judea janinhahbo, Capadocia janinhahbo, Ponto janinhahbo, Asia janinhahbo,

¹⁰ Frigia janinhahbo, Panfilia janinhahbo, Egipto janinhahbo, Cirene hochoma Africa mai janinhahbo, Roma janinhax pasijahi jahuebo,

¹¹ noquen caibo, nahua hihpahonish bi noquen caiboscaibo rihbi, cretensebo, árabebo. Papan coshin hahcei joi yohuanai tah non nincacai, noquen joinbi —hahcanquin.

¹² Rahtetax jahua copi jascarihqui honanyamahax yocacahnancani jatihibi:

—¿Jahuatohon yohuanhqui non jascajaquin nincanon? —hahcani.

¹³ Jascabibo bi yohuanxon sca caibaan hosanquin:

—Pahenax ta jascari yohuancaniqui —hahcanquin.

Pedro yohuanni

¹⁴ Jascaraibaan bi hahbe raantibo betan nihrenenxon Pedronen jato coshin yohiqui:

—Judea mai mehabon, Jerusalen janin jihuetaibaan. Man honanon hihxon tah hen mato yohihi. Hea nincanahue.

¹⁵ Noque pahenai shinan man jai bi tah non pahenyamahi. Bari ta queyarihyamahiqui. Nescaran ta tsoabi pahenyamahiqui.

¹⁶ Pahenaxma bi tah non Papan joi yohinica Joelinin yohini quesca noque jai. Joelinin ta nescajaquin huishaxon yohiniqui:

¹⁷ Papan ta yohihqui: Nete queyoti hochomascaiya tah hen jatihibi joni heen Yoshin hinanrestihi. Hinanah sca ta maton baque bebobo, maton baque haibobo rihbi hean shinanmaha yohuanyaxihqui. Maton beronanbaan ta namaquen hahcajaquin hahan honantibo jisyaxihqui. Maton yosibobaan rihbi ta namayaxihqui hean jismaha jisquin.

18 Jaa neten tah hen heen teexonicahbo bebobo, heen teexonicahbo haibobo rihbi heen Yoshin hinanrestihi. Hinanah ta hean jismahah yohuanyaxihqui.

19 Naihoxon tah hen hahan rahtetibo cainmatihi. Main rihbi hahan honantibo sca cainmaribiquin. Jimi, chihi rihbi, chihi cohin rihbi jato jismaquin.

20 Bari ta bahquishihcahinscatihiqui. Hoxne ta joshincahintihiqui, jimi quescacahini. Jascapahbo ta jatihiqui Hihbo joriyamanon. Jahuen joti nete nocotaiya ta jato castican jotihiqui jahuen coshi jato jismanoxon.

21 Hea hihbojahue Hihbon, hihquibo jatihibi ta Hihbaan teehihmatihiqui. Jascajaquin ta Joelinin huishanishqui.

22 Hen mato yohihi nincanahue, heen caibaan. Jesus ta Nazaret janinha joni hihnishqui. Papan raanai joni jaa hihqui man honannon hihxon ta jahuen coshi Papan hinannishqui tsoan jascajani que ma bi jaa coshiyaxon jan hahnon. Jisish hahan rahtetibojamaquin. Hahan honantibojamaquin. Maton jisnonbi ta jascajanishqui man tah man honanai.

23 Man rehteyaxihqui honanxon Papan yohini quescabijaxon ta Judasen mato jaa Jesus hinanhoxqui. Hinanah tah man rehtehohqui nincayosmabo jaa jihui qui hueonmaquin.

24 Rehtehipibaan bi ta Papan huenirihbioxqui teehihmaxon. Jaa ta jascabi muuatai jatimahiqui.

25 Hahqui yohuanxon ta Davidinin rihbi huishanishqui:

Netetihibi noquen Hihbaan hea manahi ta hen honanai. Hea pataxxon ta hea yanapaniqui, hen masa shinanyamanon.

26 Jaa copi tah hen coin coinax siripi yohuanai, muuatay bi hen hahquirihbi jihuethi honanax.

27 Hea jascabihi muuatay hihyamanon tah min hea potabahintimahi. Minabi miin joni tah min pisimatimahi.

28 Hea jahuentianbi queyoyamanox manati tah min hea honanmahi. Hea manaxon tah min hea hihti jemamatimahi.

Jascajaquin ta Davidinin huishanishqui.

29 Honanquin sirijaxon tah hen mato yohihi, heen caibaan. Neateman jihuenui noquen xeni Davidi ta muuatay tsahoncannishqui. Jahuen tsahon ta rahma caman jaiqui. Jatihixonbi tah non jaa honanai.

30-31 Miin jihuetahabo jan yononon hihxon tah hen miin xohta quiquin hapomayaxihqui hah ta Papan janishqui, jahuentianbi jahuen joi huetsajayosmaxon. Jan jascani honanxon Papan jismaha yohinica rihbi hihxon ta Cristo hihquipi bi Papan huenirihbitihi jaan honannishqui. Jaa yohihi ta jan jascabihi muuatay hihyamanon potabahintimahi, jahuen yora rihbi pisimatimahi hihnishqui David.

32 Jaa Jesus hihquipi bi Papan huenirihbihijisoxon ta non mato yohicoinai jatihixonbi.

33 Quiquin Hihboscahue Papan jaah ta jaa mecyaho sca Jesus tsahotihqui. Papan noque Dios Yoshin hinantijanixon ta nea man jisxon nincacai jaan hinanresiqui.

34 David ta naihoh nihinahyamanishqui. Jaanbi ta yohinishqui:

Noquen Hihbaan ta heen Hihbo yohinishqui, Hea mecyaho tsahotihue.

35 Miin rahuibo hen mia namanjaxonnon caman tsahotihue, hahquin.

36 Jaa copi honanquin sirijanahue, heen caibaan jatihixonbi. Jaa man jihui qui hueonmaho Jesus ta Papan yohiscaiqui jaa huesti Hihbo hinon, jan caisai joni –jato jaquin Pedronen.

37 Jan jascahi nincaxon masa shinanxon Pedro, jahuen hahbe raantibo rihbi yocacanquin:

—Jahueja sca non jatin, noque huetsabaan? —hahcanquin.

38 —Maton shinan pontenahue. Cristo sca maton Hihbo hihnon hihxon non mato nashimanon yohinahue maton hohcha jan sohuanon. Jascabajiton ta mato Dios Yoshin hinanrestihiqui.

39 Mato ta hinantijanishqui, jahuen yoshin mato hinanti, maton baquebo rihbi, jatihibi hocho quehabo rihbi, noquen Papan quenahibo rahsibi –jato jaquin Pedronen.

40 Basi yohuanxon cahen jato yohiquin sirijaquin:

—Nea tiromabo qui nocoyaxihqui casticanti mato xahbanjamanahue –jato jaquin.

41 Jaatian sca jan yohihah nincacoinaibo nashimacanquin. Jaa netenbi ta tres mil jonibaan Cristo bijnishqui.

42 Criston raantibaan honanmaha cahen nincaquin jeneyamacanquin. Jato manacanquin. Noquen hohcha copi Cristo muuaho shinanhahnman picanquin. Papa yocaquin jeneyamacanquin.

⁴³ Hicha hahan rahtetibo jahuen raantibaan hahcaijisish rahtecani. Hahan honantibo rihbi hahcaibo jisish raquecani jatihibi.

⁴⁴ Hahmerihbi cahen jihuecani nincacoinaibo rahsi. Jaabo jai jaton jahuaborabo jatihixonbi hihbojacanquin.

⁴⁵ Jaton jahuaborabo, jaton mai rihbi maromaxon cahen coriqui hinanpaquecanquin jaabo pishinai tihi jato hinanquin.

⁴⁶ Jatihibi neten huesti shinanyahax Papan xoboho nocohihncan. Jenimaxon shinanquin sirijaxon jaton xobohoxon sca picanquin.

⁴⁷ Papa qui siripi yohuani jihuecani. Janohabbaan rihbi jato sirijaquin yohuanquiñquin. Jato betan nocohihncataibo caicananon jan teehihmahibo noquen Hihbaan rihbijato nocohihnamaquin jatihibi neten.

3

Chanto rohajahibo

¹ Bari racapaquescaya cahen jaabo hihqui quesvari jascaran Papa yohihi tsinquitaboya Pedro betan Juan Papan xoboho mapeti cahi.

² Jano rihbi cahen huesti joni chanto jahuen maman bihni jascabi sca caibaan hioxon xehqui patax racanquin jaa neten tihibi. Siri Xehqui hahcaibo patax racaxon Papan xoboho mapetaibo coriqui yocauquin chanton.

³ Pedro betan Juan jaa xoboho mapecatsihscrai jisxon jahuen mequen mehanahxon coriqui pishca jato yocauquin.

⁴ Yocaca jaa jisquin sirijaxon sca:

—Noque jise —hahcanquin.

⁵ Jascalahbo coriqui pishca bihti shinanxon jato jisquin.

⁶ —Heen coriqui yamahi bi tah hen hen huetsa jai pishca mia hinanai. Jesucristo Nazarenon janen ta hen mia yohihi. Nihrescahue —hahquin Pedronen.

⁷ Jascajaxon mecyaho mehuetanxon huenihihniquin. Huenihihniha jahuen tahebo jahuen tapoxcobo jahuen ponobo coshicahinax cayatani nihrenenscrai.

⁸ Nihaquehtanscrai. Nihaquehtanax jato betan sca Papan xoboho mapescrai. Nichish cayacanahax:

—Papan ta hea hahxonihi —hahqui.

⁹ Nichish jascari Papa qui siripi jaa yohuanai jisxon cahen jano hihquibo rahsichin jaa honanquin.

¹⁰ Siri Xehqui hahcaibo patax jaabi tsahoxon Papan xoboho mapetaibo coriqui yocarashihi honanquin. Jan siriscrai honanax hihti rahtecani. Rahte rahtecani.

Pedro yohuanai

¹¹ Pedroya Juan jaa jonin xecohiya jano hihquibo rahsibi rahtetax Salomonen xobo hahcaiboho jato qui tsinquiajqueti, xobo rechiho.

¹² Tsinquiajetaibo jisxon Pedronen sca jato yohiquin:

—Heen caibon. ¿Jahua copi man nea jisish rahtetain? ¿Jahua copi man noquen coshinbi noquen shinamambi non nea joni nihmahi quesca man noque jisin?

¹³ Noquen xeniboi hihpahoni ta Abraham qui, Isaaque rihbi, Jacobo rihbi. Jaton Papa Dios ta noquenah qui. Jaa noquen Papan ta jahuen joni Jesus shinanya hih mato jismahihqui, Pilato jaa Jesus hinanax man queenyamahoh que bi. Pilatonen jaa picocatsiqui bi tah man queenyamahohqui, noque jihuemanicahma tah qui hihquish.

¹⁴ Jaa ponte joni que bi tah man queenyamahohqui, jaa Papan baque que bi. Queenamaxon tah man rehtemis joni mato picoxonti man yocahohqui.

¹⁵ Noque jihuemanicahma tah man matonbi rehtemahoqui. Rehtehipibaan bi ta Papan teehihmarihbihoxqui. Jan teehihmahiba jisoxon tah non mato yohscrai.

¹⁶ Cristo honancoriontah non jahuen janen nea joni rohajahaqui, nea man jisi man honanai joni. Jan noque hinanai shinaman tah non nea coshijahaqui, maton jisnonbi.

¹⁷ Honanyamaxon tah man rehtemahoqui, noque huetsabaan. Maton tinintibaan rihbi honanyamaxon retequin. Hen tah hen honanai.

¹⁸ Cristo ta hohmis hohmis yaxihqui qui hihxon Papan joi yohinicabaan jatihixonbi janí quescaja ta Papan jahoxqui jascahahbo.

¹⁹ Jaa copi maton shinan pontenahue, maton hohcha Papan sohuanon.

²⁰ Sohuaxon hahan maton shinan behnajati netebo Papan mato hinannon. Pontejaquin shinanax sca jihuenaue. Jan mato hinanai jahuen Cristo ta Jesus qui. Jaa jan raannon pontejaquin shinannahue.

²¹ Jahuene joi yohinon hihxon ta jahuen joi yohinicabo Papan caisnishqui. Jaabaan yohini jatihibi quesca janon caman ta noquen Jesus naihoh banetahbiqui.

²² Moisesnin ta yohinishqui: Maton huetsabi ta joi yohinica Papa Diosen mato qui raanyaxihqui qui jaa maton huetsabi hea quescapa joni. Jan yohihi jatihibi tah man nincatihi.

²³ Jaa joni nincayamahi jatihibi tah man Papan baqueboma qui picomaxon queyobahintihi, hahquin huishaquin.

²⁴ Samuel jaa pecaho joxon yohinicabo rihbi jatihibi ta jascarihbibi yohuannishqui, nea netebo yohihi.

²⁵ Mato tah man hoa yohinicabaan baquebo qui. Main jihuetaibo jatihibi jato shinan siri hinannon tah hen miin baquebo sirijaquin shinanmathihi, hah ta Papa Diosen Abraham janishqui. Jaanbi mato hahxonnoxon ta maton xenibo rihbi jascajati yohinishqui. Jaa copi ta jaa joi matonah rihbi qui, Papan jisnonbi man jascanon.

²⁶ Jahuen baque raanxon ta mato qui pari Papan jaa raannishqui. Maton hohcha potamaxon mato jatihibi sirijaquin shinanmahi jonon hihxon mato qui jaa raanquin –jato jaquin.

4

Quenamahabo Pedro betan Juan cahi

¹ Sacerdotebo betan Papan xobo coiranai sontarobaan hapo sca becani. Saduceobo rihbi jato betan jahui. Joxon sca tsinquitaito yohihiton meracanquin.

² Jan Jesus hueniho quescajaquin mahuanilbo Papan hueniyaxihqui hihxon cahen janon jaii jonibo Pedro betan Juaman nincamaquin. Jato honanmahi merahax sinaxon jato bilcanquin.

³ Bihxon bepiscai copi bahquish pari jato casticanyaxahpan hihxon sipo xoboho jato tsahoncanquin.

⁴ Jaabi ta Criston joi siri nincacaibaan hichaxon nincacoinnishihi, cinco mil jonibaan.

⁵ Hoxashinahax mohiyahtax jaton hapobo jatihibi jaton haniboo betan tsinquiscai. Huis-hani honanbo rihbi jato betan Jerusalen jema janin tsinquitit becani.

⁶ Jaton quiquin sacerdote Anas, Caifas, Juan, Alejandro, jaabo, quiquin sacerdotebaan jenabo jatihibi rihbi jato betan tsinquitit.

⁷ Pedro, Juan naponbi nichinxon yocacanquin:

–¿Jahua coshin man hahquipiquin? ¿Jahua janen man jascjahipiquin? –jato jaquin.

⁸ Dios Yoshiman hihbojaha sca Pedronen jato yohiquin:

–Jema hihbobon, noquen hapobon.

⁹ ¿Jenquetahaquin man nea chanto rohajahipiquin? ¿Jahuatohon man jaa rohajahipiquin? hah man noque jaiya tah hen mato yohihi, man honanon hihxon.

¹⁰ Jatihibi noquen caibaan honanon hihxon tah hen mato yohihi. Maton tah man Jesus Nazareno jihui qui hueonmaxon retehohqui. Jaa man retehipebi bi ta Papan hahquirihbi teehihmahoxqui. Jahuen janen tah non nea rohajahipiqui, rahma siri sca mato bebonbi nihnon.

¹¹ Jaa Jesus ta hahqui xobojati jihui quescapah qui, tiroma tah qui hihxon man xobojahibaan potanah que bi.

¹² Jaa huestichin ta noque teehihmati hahtipahiqui. Huetsa noque teehihmanica ta yamahihqui ni jahuenbi. Jaa huestichin jonibo teehihmanon ta Papan jaa yohihihqui –jato jaquin.

¹³ Raquetaxma Pedro betan Juan yohanai jissxon, escuela janin hihpahonima bijemama qui hanini rabe jato honanax rahtecani. Jesus betan nihpahonibo sca jato honancanquin.

¹⁴ Rohajahipi joni jato patax nichi jissxon joi bichincatsihxon bi jahua yohiti hahtipahamacanquin.

¹⁵ Tsinquitaitoboma qui jato picomahax res sca yohinannanscacani:

¹⁶ –¿Jahueja non jato jatihihi? Hahan honanti hani ta hahquipicanaxqui. Jatihxionbi ta Jerusalen janinhahbaan honanihqui. Hahyama ta jaipicanaxqui, hih tah non jatimahi.

¹⁷ Jaabi, jaa joi huetsabo janin caícanayamanon jato yohinon benahue. Jaa janen yohuanyamascanahue, non mato rishquimis jistahi man tan, hahquin jato yohinahue –hihcani.

¹⁸ Quenamaxon sca jato hihti yohicanquin:

–Jesusen janen yohuanyamascanahue tsoh. Jahuen janen tsoabi yohiyamanahue –jato jacanquin.

¹⁹ Jascahahbo Pedro betan Juaman jato yohiquin:

–¿Papan jisi jahuemeha ponte quin? ¿Mato noquen nincati nan? ¿Noquen Papabi non nincati nan? Shinannahue.

²⁰ Noque tah non non jisnibo chaniti jai, non nincaniboo rihbi yohiti jai.

²¹ Jascaratiton jato tahtijaribicanquin. Jema janin jato nincacatsihquibo hicha jai quen jenquetsahaxon casticanti honanyamaxon tahtijaribixon jato Boresscatannahue hahrescanquin. Jaa rohajahipi honanxon texe jatihixonbi, Hahxon tah min jaa jai Papan, jaiboya, casticanti hahtipahyamacanquin.

²² Hahan honantijaquin jaabaan rohajahipi joni ta cuarenta bari janishqui, hashoan rihbi. Jaa copi cahen jatihixonbi jaa honancanquin.

Papan coshi yocacaibo

²³ Boresscatannahue hahcabo sca jaton hahberabetibo qui caxon jaton sacerdote hapobo betan jaton hanibaan jato tahtijahi yohicanquin.

²⁴ Yohiha jatihixonbi Papa yocacanquin:

—Hihbon, naiyahpa mai, hian, janobo jai jatihibi rihbi tah min hahniqui.

²⁵ Miin Yoshin siri mian hinanah ta noquen xenibo David miin jonixon miin joi yohinshqui:

¿Jahua copi noquen nahuabo sina sinatihquin? ¿Jahua copi noquen caibaan honanma jai joibo yohiti shinanihquin?

²⁶ Mai meha quiquin hapobaan ta jaton sotarobo nichiniqui rehtemanoxon. Jaton hapobo tsiniquicani, noquen Papa rehtecatsihqui, jan caisai joni rihbi rehtecatsihqui

hah ta Davidinin janishqui huishaquin.

²⁷ Jascacoini. Herodes, Poncio Pilato, nahuabo, noquen caibo, jaabo jatihibi ta nea jema janin tsiniquihoxqui. Minabi miin joni qui sinatax ta tsiniquicanhoxqui. Min caisai miin Jesus qui ta sinacanhoxqui.

²⁸ Mian shinanxon miin mequeman hahmaha jayaxihquibo min yohini quescabija ta jaabaan jahoxqui.

²⁹ Rahma jaabaan hahan noque tahtijahi joibo jise, Hihbon. Raquexonma non miin joi yohinon noque coshi hinanhue, noque miin jonibo.

³⁰ Miin mequeman mehexon jonibo rohajahue. Miin baque Jesusen janen non hahan honantibo hahnon hahan rahtetibo rihbi non hahnon jahue —hahcanquin.

³¹ Papa yocaquin janquenja sca jaiboya jaabo jano tsinquitai xobo xayascai. Dios Yoshiman jato jatihibi hihbojaha sca raquexonma Papan joi yohicanquin.

Jaabo jai jatihibi hinancanquin, jatihibichina scajanon

³² Jaatian cahen nincacoinaibo jaa shinan huestiya hihcani. Jatihixonbi jaa huesti shinancanquin. Jan jaibo yohihi, jaa ta hena res qui, hih tsoabi jayamahi. Jatihibi jaya hihqui.

³³ Papan coshiyaxon hahxon cahen noquen Hihbo Jesus hahquirihbi teehihsciai yohicanquin jahuen raantibaan. Jato jatihibi ta hicha shinan Papan hinannishqui.

³⁴ Jato tocan tsoabi jahuabi pishinyamahi. Xobo jaxon maromacanquin. Mai jaxon jaa rihbi maromacanquin.

³⁵ Maromaxon coriqui bihxon caxon Criston raantibo hinancanquin. Jaabaan sca pishinaibo hinanpaquenon.

³⁶ José Janeya huesti ta Criston raantibaan Bernabé janenishqui. Bernabé cahen sirijaquin shinanai baquebo hihcatsihqui. Jaa cahen Chipre janinhax joni, levito joni.

³⁷ Mai hihbo hihxon cahen jahuen mai maromaxon coriqui bichish jaya caxon Criston raantibo hinanscaquin.

5

Ananías betan Safira

¹ Ananías janeya jonin sca jahuen haibo Safira betan jaton mai maromaquin.

² Coriqui bihxon, Jascajahue jahuen haibaan rihbi jaah, texe mequecanquin. Texe mequexon texe boxon Criston raantibo taracanquin.

³ Pedronen sca yocaquin:

—Ananin. ¿Jenquetsahaxon Satanásnen miin jointi hihbojahaxquin, min maromahi texe yohuashihxon Dios Yoshin paranti min shinannon?

⁴ ¿Maroyamaha minabi hihyamahipishquin? ¿Maromaxon sca jaa coriqui hihboxon quessayamaxon min queenai quescajati min hahtipahyamahin? ¿Jahua copi sca min jascajaquin paranain? Jonima bi tah min noquen Papabi parancatsihqui.

⁵ Jan yohiha nincacax Ananías racareneni mahuascai. Jaa chanishi joi nincacaibo rahsi sca hihi raquecani.

⁶ Beronanbaan sca huenixon Ananías rahcoxon boxon tsahoncanquin.

⁷ Quimisha horabo huinohax jahuen haibo sca hihcohi. Jaan cahen jahuen bene jascarax mahuatah honanyamaquin.

⁸ Jaa sca Pedronen yocaquin:

—Hea yohihue. ¿Man noque hinanah tih copitai min mai maromahaquin? —hahquin.

—Jatihi copitai rahan —hahquin.

⁹ Pedronen sca:

—¿Jenquetsahpahin man rabexonbi Dios Yoshin tanati shinanahquin? Nincahue. Miin bene tsahontanaibo ta mapescaiqui. Mia rihibi sca ta hioxihcanihqui —hahquin.

¹⁰ Jaatian cahen Pedro taracahrenenax haibo muhuati. Hihcoxon cahen haibo muhuas-cai meraxon beronanbaan boresscaquin. Boxon jahuen bene janin tsahonscacanquin.

¹¹ Jaatian ta nincacoinaibo jatihibi hihti raquenishqui. Jaa joi nincacaibо rahsi raqueti.

Papan rahtetibojahi

¹² Jaa jema janinxon ta Criston raantibaan hicha hahan honantibo hahnishqui, hahan rahtetibo rihbi hahquin. Salomonen rechí xoboho sca jatihibi tsinquicani.

¹³ Tsinquitaitoya caibo tsoabi jato betan tsinquiryamahi raquetax. Raquexon bi jema janinhahbaan jato hihti siri jisquin.

¹⁴ Nincacoinaibo cahen caicanasca. Bebobo, haibobo rihbi tsamascai.

¹⁵ Hihti caiboscaiya cahen jema bahinbi jaton pishinbo, jaton cacajatibo racanxonxon jator hisinyahpabo jano racancanquin, Pedro jahuiya jahuen bari yoshiman bocabi jato huinonon hihxon.

¹⁶ Jerusalen hochoma jemabo janinhax sca hicha jonibo jahui. Jaton hisinyahpabo hihuecanquin. Tiroma yoshinyahpabo rihbi hihuecanquin. Jato jatihibi ta Criston raantibaan rohajanishqui.

Pedroya Juan bichibo

¹⁷ Jasca sca jaiboya jaton quiquin sacerdote jahuen hahbe saduceobo betan notsi notsicai.

¹⁸ Notsi notsixon porisiabo bihmaxon Criston raantibo sipo xoboho tsahoncanquin.

¹⁹ Tsahonahbaan bi yame noquen Hihbaan naihoh queha yonoti joxon sipo xobo xehpoti quehpenxonon jato picoquin. Piconon:

²⁰ —Botannahue. Papan xoboho mapexon jonibo nea hahan jihueta joi jatihibi yohitan-nahue —jato jaquin.

²¹ Jan yohihi quescabijascacanquin. Xaba paquetaiya bi Papan xoboho mapexon jonibo haxemascacanquin.

Jaatian cahen quiquin sacerdote, jaabo, jahuen hihti janin nocoxon hahbe hapobo tsinquiamaquin israelibaan hanibo rahsi. Jato tsinquimaxon porisia sca sipo xobo janin raancanquin jato hihuenon hihxon.

²² Sipo xobo janin nocoxon sca porisiabaan jato xahbanjaquin. Joribixon sca jan xahbanjatanai yohicanquin:

²³ —Xehpoti jascabi xehpohah tah non meratanai, hihti xehpohah. Sipo xobo coiran-nicah rihbi tah non jahuen xehqui xehnichai jistanai. Non quehpenxon jisí bi ta tsoabi yamahaxqui —hahcanquin.

²⁴ Chaníhilo nincacaz Papan xobo coiranai sontaro hapo betan quiquin sacerdotebo rahtecani, ¿Jahua sca janoxihqui quiquin? hihcani.

²⁵ Jato yohihi sca huetsa jahui.

—Man sipo xoboho tsahonipibaan ta Papan xobohoxon jonibo haxemahiqui —hahquin.

²⁶ Jahuen sontarobo betan caxon jaa xobo coiranai hapon sca jato hihuequin. Jan hapo qui hihuehi copi jonibaan jato macaman tsacapaho hihxon coshixonma jato hihuequin honaxonbi.

²⁷ Hihuxon hapobo tsinquitai naponbi sca jato nichinquen. Quiquin sacerdotenin sca jato yohiquin:

²⁸ Jaa janen yohiyamascanahue hah tah non mato jaipiqui, sirijaquin yohiquin. Yohi-hah bi tah man Jerusalen jatihibi maton honanmati joi jato nincamahi. Jaa joni rehtehoh quen tah man jaa hohcha noque hihbomacatsihqui —jato jaquin.

²⁹ Hahbe raantibo betan Pedronen sca yohiquin:

—Joni mentan tah non hashoan noquen Papa nincati non jai.

³⁰ Noquen xenibaan Papa Diosen ta Jesus teehihmarihbihoxqui, jihuin hueonxon man rehtehip que bi.

³¹ Jaa ta noquen Papa Diosen huenihihnihoxqui, jaa mecyaho tsahonon quiquin hapo sca jonibo teehihmanicah. Noque israeli baquebo ponte shinan hinanxon noquen hohcha sohanon ta noquen Papa jaa huenihihnihoxqui.

³² Noquenbi jisoxon tah non yohiscai. Noque ta jahuen Yoshin siri rihbi Papan hinani-hqui jahuen joi nincacoinaibo rahsibi. Noque ta yanapanihqui —hihqui Pedro.

³³ Jascahahbo nincaxon cahen hihti sinaxon jato rehtecatsihscacani.

³⁴ Jano rihbi huesti fariseo tsahoti, Moisesnin huishani joi honan, Gamaeli janeya. Jatihibi jonibaan siri jisi joni. Hapobo tocan nihrenenxon Criston raantibo jatoma qui picomatahtahxon jaan jato yohiquin:

³⁵ —Heen caabaan. ¿Jahueja man jaabo jacatsihquin? Sirijaquin shinannahue.

³⁶ Neateman ta Teudas jonishqui. Hapohihti shinanax yohuanaiton sca ta hicha tahni jonibaan jaa chibannishqui hahbetan nihcatsihquiaan. Cuatrocientosbo. Jaabi hihbocatsihqui bi ta rehtexon jaa chibanaibo rihbi jabamacannishqui, jahuabi sca yamanon.

³⁷ Jaa pecaho ta Galilea janinhax Judas Jonishqui jonibo toponpaquehibo tian. Caibo hiohiton bi ta jaa rihbi rehtexon hahbe cahibo rihbi jabamacannishqui.

³⁸ Jaa copi tah hen mato rahma yohiscai. Jaabo jenenahue, jenebahinquin. Jaabaan bi shinanaxon hahcaiya cahen jahuabi jatimahi.

³⁹ Papa Diosen shinanaxon hahcaiboya cah man jenquetsahaxon bi jato pantetimahi. Dios betanbi man rehtenanai man meramis —jato jaquin.

⁴⁰ Nincacax jeenhicani. Criston raantibo quenamaxon sca rishqui rishquimaxon Jesusen janen yohuanyamascaabo hihxon tahtijaxon jato camascacanquin.

⁴¹ Picoahabho hapobo janinhax jenimacanahi bocani. Criston jonibo copi ta mato tiromajacaniqui. Tenescaibo tah man qui Papan jaiya jenimacani.

⁴² Jatihibi neten Papan xoboho yohuanax jaton xoboho rihbi yohuancani. Jesus ta Papan caisai joni qui hihcanci. Honanahbo nete tihibi nincamahi tantiyamacani.

6

Siete hahxonnicabo

¹ Nincacoinaibo caícanahiya sca ta hebreobo qui helenistabo rerer rerencanishqui. Nete tihibi piti hinanpaqueheibaan jaton yonommabo hinanyamahiya rerer rerenscacani.

² Nincacoinaibo tsinquimaxon sca Criston raantibaan jato yohiquin:

—Non Papan joi yohiquin jenebahinxon piti metexxon ta tiroma qui.

³ Jaa copi man honanai siri jonibo caisnahue. Siete caisnahue, Dios Yoshiman hihbojahi rahsi. Shinan siriya rahsi caisquin, piti hinanpaqueti tee non jato hinanon.

⁴ Noque cah non yocaxxon Papan joi yohinicabo sca jatihi —jato jacanquin.

⁵ —Jascayahua tira qui —hihxon sca jatihixonbi caiscanquin. Huetsa cahen Esteban, shinanya siri, Dios Yoshiman hihbojahi joni. Huetsa cahen Felipe. Texe cahen Prócoro, Nicancor, Timon, Parmenas, Nicolas, jaton nahua hihpahonish bi judioni Antioquía janinhah. Jaa rahsi caiscanquin.

⁶ Criston raantibo bebon jato nichinxon mehexon jato yocaxxoncanquin.

⁷ Hashoan sca cahen Papan joi caícanasci. Jerusalen janin nincacoinaibo rihbi hashoan caícanahi. Sacerdotebaan rihbi cahen hichaxon nincacoincanquin.

Esteban bichibo

⁸ Hicha Papan shinanyaxon sca Estebanen hihti hahan rahtetibojaquein. Jonibo roha-jaquin. Hahan honantijaquin Papan coshiyahpaxon.

⁹ Jaatian sca judiobaan Esteban joi bichincanquin. Hinaboma sca hahcaibo, cirenobo, alejandrino, Cilicia janinhahbo, Asia janinhahbo. Jaabo rahnichin Esteban joi bichincanquin.

¹⁰ Dios Yoshiman yanapano hashoan honanax Esteban yohuanaiya sca hahbetan yohinanti hahtipahyamacanquin.

¹¹ Yohinanti hahtipahyamacaxon jonexon coriqui hinanxon caibo sca yohuanmacanquin, quesahahbo hihxon.

—Moises qui tiromahi yohuanai tah non jaa nincaquipiqui. Noquen Papa qui tiromahi yohuanai rihbi tah non jaa nincaquipiqui —hihcanci quesahi.

¹² Esteban qui sinatax coro corotahbo cahen jonibo rihbi judiobaan coro coromaquin. Jaton hanibo rihbi, huishani honanbo rihbi sinamacanquin. Jaabaan sca Esteban pantere-nenxon bihxon jaton hapo tsinquitai janin bocanquin.

¹³ Quesamisbo sca yohuanmacanquin hahqui yohuanahbo.

—Jaa joni ta nea Papan xobo qui tiromahi yohuanihqui. Noquen Moisesnin huishani joi qui rihbi tiromahi yohuani. Tiromahi yohuani ta tantiyamahihqui.

¹⁴ Joxon ta nea xobo Jesus Nazarenon potojaquetanxon noquen hihti quescayamascai non jihuemon Moisesnin joi rihbi huetsajayaxihqui qui hah ta jaipishqui noquen nin-canonbi —hihcanci.

¹⁵ Jano tsinquitai hapobaan sca Esteban bejisquin sirijaxon jahuen bemanan naihoh queha Papan yonoti bemanan quescasca jiscanquin jatihixonbi.

Estebanen jato yohihi

¹ —¿Jascama hin? —hahquin quiquin sacerdotenin sca.

² Esteban sca yohuani:

—Hea huetsabaan, heen papabaan, hea nincanahue. Xaba Hihbo noquen Papa ta noquen xohta Abraham qui cainnishqui, Haran jema janin jihuetai cariyamahax, Mesopotamia mai janin jihuetai.

³ Miin mai, miin janabo rihbi potabahini catanhue, hen mia jismatihi main sca cahi catanhue hah ca noquen xohta janish noquen Papan.

⁴ Papan Cahue hahca cahen Caldeo mai potabahinax Haran janin sca jihuetai. Jahuen papa mahuatipi pecaho ta neno sca Papan jaa hihuenishqui. Nea main man neno rahma jihuetai mai janinbi ta hihuenishqui.

⁵ Jaabi ta nea mai jaa hihbomayamanishqui. Ni huesti tamanehcahinti hihbomaya maquin. Hihbomayamaxon bi hinantijaquin, jahuen hihyaxahnon jahuen baque yamahi que bi jahuen baquebaana, jahuen chini baquebaana rihbi hihyaxahnon jato hinanti jaquin.

⁶ Jahuen chini baquebo sca jaton nahuabaan main cahiton jaton nahuabaan jato hihbojaxon cuatrocientos bari jato tiromajayaxihqui ta yohirihbinishqui.

⁷ Jaabi ta jato hinajahi jonibo hean casticanyaxihqui. Jaatian ta picoscaxon nenoxon sca hehon shinanyaxihcanihqui hih ta Papa janishqui.

⁸ Miin baquebo cajaxon jato janu jihuetai hinanah ta heen jonibo hihyaxihcanihqui hea nincacoinaibo hah ta Papan janishqui, Abraham yohiquin. Jaabo honantiyahpabo jayaxahnon hihxon sca ta Honantiyahpa jahue Papan jaa janishqui. Jaa pecaho ta Abrahanen baquejanishqui. Jahuen baquexo Isaaque cainipi huesti semanan huinoxon ta jahuen ocho neten sca Abrahanen jaa jahuen baquexo honantijanishqui. Isaaquen baque sca ta Jacobo Janeya janishqui. Jacobonen baquebo rihbi sca ta noquen doce xohtabo janishqui, noquen xenibo.

⁹ José qui notsi nosixon ta noquen xenibaan jaa maromaxon hinancannishqui, Egipto mai janin bohábo.

¹⁰ Jaabi ta noquen Papa Dios hahbetanbi nihxon jan yomanahyamascanon yomanahтай tihbi jaa yanapannishqui. Egipto mai janin quiquin hapon José siri joni hihqui shinannon ta José honan joni hihqui jismanishqui. Quiquin hapon sca ta Egipto mai jatihobi jaa José hihbomanishqui. Jahuen xobo hihbomaxon, jahuen xoboho jihuetaibo rihbi jatihibi hihbomaquin.

¹¹ Jaatian ta Egipto mai janin Canaan mai janin rihbi jahuenbi piti yamascaiya pihan hihcannishqui. Hihti hohmis hohmiscani. Piti merayamabirescanquin noquen xenibaan.

¹² Egipto mai janin tsinquinibho bimi bero tsama jai joi nincaxon ta Jacobonen noquen xenibo raannishqui marohi cahábo.

¹³ Jato raanhohxon raanrihbiquin. Jaatian pari ta Hea tah hen qui, Josepan jahuen huetsabo janishqui. Jaatian pari ta Tsoabo Josepan janabo quin jaa mai meha quiquin hapon honanashishqui.

¹⁴ Jahuen huetsabo raanxon cahen jahuen papa Jacobo, jahuen janabo jatihibi Josepan quenamaquin jano bohábo setenta y cinco jonibo.

¹⁵ Jahuen baquen quenamaha sca Egipto main Jacobo cahi. Canish cahen janohaxbi muhati. Noquen xenibo rihbi yosibohax janohaxbi muhati.

¹⁶ Muhataiton cahen Siquem janin jato boxon jano Abrahanen jahuen coriquinin maroni jano tsahonti main sca jato tsahoncanquin Siquem janinbi. Hamoren baquebo jan maronni tsahon janinbi.

¹⁷ Papan Abraham yohini quesca sca jaonahiya ta Egipto janin noquen caibo caípahonishqui. Hichascai, jaabo.

¹⁸ Huetsa quiquin hapo sca ta jaresscanishqui, José honannihma joni sca.

¹⁹ Jaan cahen noquen caibo paranxon jato tiromajaquin. Jaton baquexobo mahuanon hihxon jato nihii naman potabahimmaquin.

²⁰ Jaatian ta Moises baquexo jahuen maman bihnishqui. Noquen Papa Diosen jisi, baquexo siri pishca. Quimisha hoxne xobohoxon jaa coirancanquin jahuen papan jahuen maman.

²¹ Tahua naman sca jonebahinscacanquin. Jano racanahbo sca jaton quiquin hapon baque haibaan jaa meraquin. Meraxon cahen jahuen baquebi hahcajascaquin hanijaquin.

²² Haniscaiton cahen Egiptobaan quirica jatihibi jaa honanmacanquin. Haniscaxon hicha honanquin. Jan hahcai hochoxon joi nincacanquin.

²³ Cuarenta bari jaresscaxon ta jahuen huetsabo pasijahi cati shinannishqui jahuen caibo pasijacatsihquin.

²⁴ Juhuen caibo tiromajahiton egipto joni meraxon cahen jahuen caibo yanapanquin. Jaa tiromajahi joni copiquin rehtequin.

²⁵ Noque piconon Papan yanapanai joni tah qui hih ta hea yohihi janoxihcanihqui hihqui shinamehti. Hihcax bi jascayamahi.

²⁶ Hoxashinahax mohiyhxon sca noquen caibo rabe sinacananaiton meraxon cahen jato sina tantimacatsihquin yohiquin: *Jahua jenquetsahin man maton huetsabo betanbi tiromahananain?* jato jaquin.

²⁷ Jascalah bi jahuen caibo tiromajahi jonin sca Moises hueranbohanxon: *¿Tsoan yohihah min noquen hapo jacatsihquin?* *¿Noque pontenica hihnon tsoan mia yohiliquin?*

²⁸ *¿Hoa egipto joni min hahquipi quescajaquin min hea rihbi sca rehtecatsihquin?* hahquin.

²⁹ Jascarai nincacax ta Moises jabascanishqui. Madian mai janin sca jahuen nahua tocan jihuexon rabe baquejaquin.

³⁰ Cuarenta bari huinorihbi sca jaiya ta Sinaí nihi namanxon sca jihui naman tiha pishca mapohihcamahi janin Papan yonoti jisnishqui.

³¹ Jascapa merahax rahteti. Jisquin sirijacatsihquish ta hochoma pishca caxon noquen Hihbo yohuanan i nincanishqui.

³² Hea tah hen miin papabaan Papa Dios qui. Abraham, Isaaque, Jacobo jaton Papa Dios ta hea qui hihqui nincaquin. Nincacax tastahihqui. Jisti raquescai.

³³ Noquen Hihbo sca yohuanrihbibi: Hea janin tah min nich. Miin tahe xaca potasc-ahue.

³⁴ Egipto janin heen jonibo hohmis hohmisai tah hen jisi. Jaabo sai saihihcanahi tah hen nincacai. Jaa copi tah hen jato picohi sca botopaquetai. Johue hihcaisen hen mia Egipto mai janin raannon hahquin.

³⁵ Egipto janin jihuetahbaiton, Tsoan yohihah min noquen hapo jacatsihquin, pontenica mia hihnon tsoan mia yohiliquin hah jaabaan Moises janí que bi ta jaamama jaabi Papan raannishqui jaton hapo sca hihnon. Jato piconica sca hihnon raanquin. Naman tiha jihui mapohi janin jahuen yonoti raanxon ta Papan jascajaxon Moises sca raannishqui.

³⁶ Egipto mai janinxon sca cahen hahan rahtetibojaxon hahan honantibojaxon rihbi Moisesn jato picoquin. Hian Joshini janinxon rihbi jascajaquin. Nihi namanxon sca cuarenta bari rihbi jascajaribiquin hahan rahtetibojaquein. Hahan honantibojaribiquin.

³⁷ Jaa Moisesn ta noque israeli baquebo yohinishqui:

Mato tocan ta hea quescapa jahuen joi yohinic Papan cainmatihqui maton huetsabo janinhahbi, hahquin.

³⁸ Jaa Moises ta noquen caibo xenibo tsinquitai tocan nihnishqui. Papan naihoh queha yonoti betan ta nihnishqui. Sinaí mahchi janin rihbi ta Papan yonoti betan yohuannishqui. Noquen xenibo betan yohuanni Papan yonoti betan rihbi ta jaa nihnishqui. Hahan jihuetai joi ta Papan jaa hinannishqui, mato sca jaan rihbi nincamanon hixhon.

³⁹ Jaabi ta noquen xenibaan nincacatsihyanishqui. Jaa potabahinxon cahen jaton jointinin Egipto shinanrihbicanquin.

⁴⁰ Aaron sca yohicanquin: *¿Hoa Moises, Egipto mai janinhah noque picoho Moises, jahuen cahipishquin?* Non tah non honanyamahi. Noque bebon jaabo sca canon santobo noque hahxonhue jaabo sca noquen diosbo hihnon hahcanquin.

⁴¹ Jascajaxon toro quescapa santojacanquin. Jascajaxon jaton hinábo jaa santo rehtex-oncanquin. Jaton mequemanbi jascapahahax hahan jenimacani.

⁴² Jaa copi ta noquen Papan jato potabahinnishqui. Juhuen joi yohinicabaa huishaxon yohini quescajaquin jato potabahinquin, huishi, bari, jaabo jaton dios sca hihnon.

¿Man cuarenta bari nihi namanxon hinábo rehtexonxon hea mapojaxonpahonihquin; israeli baquebaan?

⁴³ Hea queenyamaxon tah man Moloquen chopa xobo bilihqui. Huishi rihbi tah man chibapanpahonihqui, Renfan janeya maton dios jai quen. Santojarihbi tah man janiqui jaa sca yocanoxon. Jaa copi tah hen Babilonia hoque tocan mato potatifi hah ta Papan jato janishqui jahuen joi yohinicaboo huishamaxon.

⁴⁴ Noquen Papan jato yohini jahan honanti chopa xobo ta noquen xenibo tocan janishqui jaabo nihi naman nihnipahoni tian. Hen mia jismaha quescapahahue hahxon ta Papan Moises yohinishqui jascajaquin jan jaa xobojanon. Jaa copi ta Papan Moises jismani quescapajanishqui.

⁴⁵ Josué betan noquen papabaan jaton mai hihbojanon sca ta neno jihuapehoni nahuabo Papan camaxonnishqui jaton mai bichinahbo. Jan camaxona ta Papan chopa xoboyabi

becannishqui nea mai hihbojahi sca. David quiquin hapo hihnon caman ta jaa xobo janishqui.

⁴⁶Jaa David cahen Papan jisquin siri joni. Jascapahxon ta Papa Dios xobojaxoncatsihxon Davidinin noquen Papa yocanishqui, jahuen xohta Jacobo yamanicaton Papa Dios.

⁴⁷Queenxon bi ta Davidinin jaa xobojayamanishqui. Salomonen ta jaa hahnishqui.

⁴⁸Jascapa xobo jai bi ta mequeman xobojahibo janin Xaba Hihbo jihueyamahihqui. Papan joi yohinica yohuanni quescarai tah qui:

⁴⁹Nai ta heen tsahoti qui. Mai ta heen taracahti qui. Jatihibi janin ta hea jai. ¿Jenquetsahpa xoboja sca min hea jaxontihin? ¿Hea jano hihti jahua jaiquin?

⁵⁰¿Hoa jatihibi hean hahyamaniquin? hih ta noquen Hihbo jaiqui hih ta Papan joi janin jaiqui.

⁵¹Nincayosmabon, Papan baquebo hihqui shinanax bi tah man jahuen nahuabo res qui. Maton jointimin shinanaxon maton pabinquinin nincaxon bi tah man Papa nincayamabiresai. Dios Yoshin tah man jaapantehi, mato jahuen shinan hinanpanan. Maton xenibo janí quescarihbi sca tah man jai.

⁵²Papan joi yohinicabo jatihibi ta maton papabaan tiromajacannishqui. Papan ponte joni joyaxihqui yohihibo rihbi ta rehtecannishqui. Maton sca tah man jaa jahuen ponte joni paranxon rehtehohqui.

⁵³Hahan jihueta joi Papan yonotinin mato hinanni que bi tah man bihníxon bi nincayamabiresai –jato jaquin Estebanen.

Esteban retehaho

⁵⁴Jascajaquin yohihah cahen sina sinacani. Sinaxon xeta yeres yeresahcanquin.

⁵⁵Jaatian sca Dios Yoshiman hihbojaha jaan nai bejisihniquin. Bejisihnxon cahen Papan xaba jisquin. Papa mécayaho Jesus níchi rihbi jisquin.

⁵⁶—Jisnahue. Nai quehpemehtai tah hen jisi. Papa mécayaho noquebaque níchi tah hen jisi —jato jaquin.

⁵⁷Jascahah bi coshin sai saihihscacani. Mequeman pabepobahini caxon jaa xecotancuin.

⁵⁸Jemama qui sca boxon macaman tsacacanquin. Jato betan níchi bebo cahen jano jai, Saulo janeya, beronan tahni. Jaan coiranxonnón hihxon jaton chopá pecaxon jaa taracanxon Esteban tsacacanquin rehtenoxon.

⁵⁹Macaman tsaca tsakahibaan bi:

—Heen yoshin bilihue, heen Hihbo Jesusen —hahquin Estebanen.

⁶⁰Jascabajahax raboxonen nichish coshin sca yohuani:

—Hea nescabajahax hohchataibaan bi jato casticanyamahue, Hihbon —hahqui. Jascahax cahen mahuascai.

8

Saulonen tiromajahi

¹Saulo rihbi cahen jaa muhuati queeni. Jaatianbi ta Jerusalen janinxon noquen huetsabo tiromajamenocannishqui hihti tiromajaquin. Tiromajahahbo jatihibi jabisi. Judea maibo janin, Samaria maibo janin rihbi jabiscani. Criston raantibo res jabayamahi.

²Papahon shinanaibaan ta hihti huinixon Esteban tsahonnishqui.

³Hoa Saulonen ta noquen huetsabo potojaquetannishqui. Jaton xoboboho hihquicaininxon cahen jato bilihui. Bebobobo, haibobo rihbi coshin bi res boxon sipo xoboboho jato tsahonquin.

Samaria janin Felipe cahi

⁴Jabisipibaan sca Papan joi yohibonaquin jaabo jano cahiton.

⁵Samaria jema janin caxon ta Felipenín jato Cristo joi yohibonanishqui.

⁶Jan yohihi nincaxon cahen jan hahan honantibojahi jisxon huesti shinanyaxon nincacoincanquin hahqui tsamajaquetaibaan.

⁷Jaan yohihah ta hicha tiroma yoshinyahpabo janinhax tiroma yoshinbo coshin sai saihihquish piconishqui. Yora honanyamajaquetaibo betan chantobo hihti caibo rihbi rohacahini.

⁸Jaa copi ta jaa jema janinhahbo hihti jenimanishqui.

⁹Felipe nocorihyamahiya cahen jaa jema huesti joni janish, Simon janeya. Jahuen yobepan hahxon cahen Samaria mai mehabo rahtehax, Hea tah hen coshi joni qui hihcachih.

¹⁰Jaa yobe yohuanaiya ta jatihixonbi nincacanpahonishqui. Jaton jonibaan, jaton patorobaan, jatihibichin nincquin. Nea joni ta Díosen coshi qui, jahuen hihti coshi hahcaibo, hahcanquin.

¹¹ Jahuen yobepan basi jan jato rahte rahtepahoni copi jaan yohihah nincacanquin.

¹² Jaabi Papan jato jihuemayaxihqui joi siri Felipenin yohihah nincacoincanquin. Jesucristo joi siri yohihah nincacoinaiton Felipenin jato nashimaquin, haibobo, bebobo rihbi.

¹³ Simoman rihbi sca nincapquin. Felipenin nashimaha Felipe manati sca hahbetanbi nichi. Hahan honantibo Felipenin hahcai, jan Papan coshiyaxon tsoan jascajani que ma bi hihi coshin hahcai jisish Simon rahte rahtescaí.

¹⁴ Samaria mai mehabaan Papan joi bichoinai honanscaxon cahen Jerusalen janinxon Criston raantibaan Pedro betan Juan jato qui raanquin.

¹⁵ Raanahbo cahaz nocoxon sca Dios Yoshin bichibio hihxon jato yocaxonquin.

¹⁶ Jesusen jane huestichin Felipenin jato nashimahi quen ta Dios Yoshin jato qui botopiqueriyamanishqui. Jaa copi cahen jato yocaxoncanquin.

¹⁷ Yocaxonxon mehehah Dios Yoshin bihresscancanquin.

¹⁸ Criston raantibaan mehehah Dios Yoshin bichibio jisxon Simon jato coriqui hinancat-sihscái.

¹⁹ —Hea rihbi jascajati hahtipahmanahue, hean mehehahbaan sca Dios Yoshin bihnón —jato jaquin.

²⁰ Pedronen sca:

—¿Papan hinanresai jahuen yoshin min coriquinin maroti shinanain? Miin coriquiyabi mia queyoyaxihnon.

²¹ Min tah min jahuabi bihtimahi. Jahuabi tah min bihyamayaxihqui. Papan jisí ta miin jointi tiromah qui.

²² Min tiromajaquin shinanai pontescahue. Hihbo yocahue, min tiromajati shinanai jan sohuanon.

²³ Jointi mocapaiya mia notsi notsihi jihuetai tah hen jisi, hohchapan hiná tah hen mia jisi —hahquin Pedronen.

²⁴ —Maton caya hea yocaxonnahue man hea yohihi quesca jayamanon —hahquin Simoman.

²⁵ Jaatian sca jaabaan jisobo yohixon noquen Hihbaan joi siri rihbi yohihax Jerusalen janin cahi caribihí. Samaritanobaan jemabo janin joi siri yohibonahi bocani.

Etiopía joni betan Felipe behchinani

²⁶ Noquen Hihbaan yonotinin sca ta Felipe yohinishqui:

—Caresscahue. Jerusalen janinhax Gaza janin cahi bahin picoti catanhue chiponqui —hahquin. Jaa bahin cahen tsoabi jihueyamahan.

²⁷ Caresscaax jano sca cahi. Picoti cahi jisí bi Jerusalen janin Papahon shinantanipish Etiopía joni jaa bahin jahui. Jaa cahen hapo. Etiopíabaan quiquin haibo hapon coriqui coirannicah. Jahuen hapon Jane cahen Candace.

²⁸ Isaíasnen huishani joi jisanan jahuen taramehtinin tsahotax cabachonen ninihah taramehquirani jahui.

²⁹ Dios Yoshiman sca Felipe yohiquin:

—Behchitanhue. Jahuen taramehti janin nanetanhue —hahquin.

³⁰ Bishquihihcanahi caxon sca Isaías janeya Papan joi yohinicaton huishani joi jisish jaa yohuanhonahi nincapquin. Nincaxon yocascaquin:

—¿Min jisi joi min honanain? —hahquin.

³¹ —¿Jenquetsahaxon hen honantihin, huetsan hea yanapanyamahiya? Hea patax tsahoti nanehue —hahquin.

³² Jan jisbenahi huishani joi ta nea qui:

Carnero rehtenoxon hiohah bi neteresai quescarihbibi ta jahua hihyamahiqui. Jahuen rani rahmaxcorohah bi carnero baque sai saihiyamabiresai quescarihbibi ta yohuanyamahihqui.

³³ Jaa rabinmaxon ta pontejayamaquin casticancaniqui.

Reheres ta Tsoa jahuen xohtabo quin hih tsoabi jayamascanon hihqui jaa quirica.

³⁴ Jaatian:

—¿Yohinica jascarai tsoa yohihiquin? ¿Jaabi nan? ¿Huetsa joni nan? Hea yohirohahue —Felipe yocapuin.

³⁵ Jaatian sca jaa quiricaya yohuanxon Jesusen joi siri Felipenin yohiquin.

³⁶ Bahin taramehcanahi cahax jano hian jaiton sca nococani.

—Jise. Jano ta jene jaiqui. ¿Jenquetsahpahi min hea nashimatimahin, Jesusen joni sca hea hihnon? —Felipe yocapuin.

³⁷ —Miin jointiboyaxonbi nincacoinaiton tah hen mia nashimatihí —hahscaquin Felipenin.

—Jesucristo ta Papa Diosen baque qui. Hen tah hen shinancoinai —hahquin.

³⁸ Jahuen taramehti janobi racarenennon cahen cabacho rebinica yohiscaquin. Jaton taramehti racarenenaiya cahen bototax rabebi jene nenichi, Felipe betan jaa Etiopía hapo. Janoxon sca cahen Felipenin jaa hihquimatanquin nashimaquin.

³⁹ Jaabo mapescaya bi Dios Yoshiman Felipebihinihniquin. Felipe jisyamascaa bi jaa huesti sca jenimahanan sca caresscaribibi.

⁴⁰ Azoto jema janin sca sanarenenxon ta jano jai jemabo janin sca joi siri Felipenin yohibonanishqui, Cesarea jema janin noconoxon caman.

9

Saulo Hihbo qui hinamehti

(Ha 22.6-16; 26.12-18)

¹ Jasca Felipe jai bi cahen noquen Hihbo qui hinamehtaibo tahtijaxon, Hen tah hen mato rehtetih, Saulonen jato jaquin. Jato tahtijahax quiquin sacerdote janin cahi.

² Caxon, yocaquin: Jayaxon joni bihti quirica hea hinanhue hahquin. Jascajaxon cahen Damasco jema janin tsinquitai judiobo qui hinanti quirica huishamaquin. Criston joi bichibo meraxon jato nexaxon jaa quiricayaxon Jerusalen janin bebobo, haibobo rihbi hionoxon jascapa quirica huishamaquin.

³ Huishamahaz jaya cahi. Damasco qui nocoti hochoma nichibo sca naihoh quehax xabacahinai xabapan jato xabajaquin.

⁴ Main paquerenenxon sca yohuanai joi nincaquein.

—Saulon, Saulon. ¿Jahua copi min hea tiromajacatsihquin chibanain?

⁵ —¿Tsoa min quin, Hihbon? —hahscuin.

—Hea ta Jesus qui, hea tiromajacatsihquin min hea chibana.

⁶ Huenihue. Jema janin catanhue. Jahueja min jatihin, jano ta mia yohinoxihcanihqui —hahquin.

⁷ Yohuanai nincaxon bi jahuabi jisyamahax hahbe nichibo rahtetax nihreneni.

⁸ Main racatax huenicahuanxon jahuen bero rahcoyamaquin bi Saulonen jahuabi jisti hahtipahyamascaquin. Jisyamahiton sca hahbe nichibaan mehuexon Damasco jema janin sca hioquin.

⁹ Quimisha neten sca jano hihqui. Jahuabi jisyamascaquin. Jahua piyamaquin. Xehaya-marihbiquin.

¹⁰ Jaa Damasco jema janin cahen Criston joni jai, Ananías janeya. Jaan cahen namaquen noquen Hihbaan quenahi nincaquein:

—Ananin.

—Neno tah hen qui, Hihbon —hihscai.

¹¹ —Huenihue. Derecha janeya bahin caxon Judasen xoboho Tarso janinha joni benanthue, Saulo janeya. Hea ta yocaqueihqui.

¹² Namaquen jismahah ta miin janeya jonijisishqui. Jahuen xoboho hihquixon jahuen bero sirinon hihxon jaa mehehi ta namaquen jisishqui —hihscai noquen Hihbo.

¹³ —Jerusalen janinxon noquen huetsabo jan hicha tiromajahi tah hen hichaxon yohihi nincarahsihi, Hihbon.

¹⁴ Neno sca roqui sacerdote hapobaan quiricaya jahui, mia yocacaibo rahsi bichí —hahqui Ananías.

¹⁵ —Jaabi cahue. Hen caisax jaya teeti tah qui. Huetsa jonibo, quiquin hapobo, israeli baquebo rihbi jan heen jane jato nincamanon hihxon tah hen jaa caisai.

¹⁶ Hea copi jan hihti teneyaxihquibo tah hen jaa jismayaxihqui —hahqui noquen Hihbo.

¹⁷ Jascayah caresscái Ananías. Jaa xoboho hihcoxon mehexon yohihi:

—Heen huetsa Saulon, min hahan jahui bahin mihqui cainipixon ta noquen Hihbo Jesusen hea raanihqui, miin bero siriscanon. Dios Yoshiman rihbi mia hihbojanon —hahquin.

¹⁸ Jaatianbi jahuen bero janinhax poto quescapa romishin pototani. Jahuen bero sircalahinscaa hueniti. Hueniscaiton cahen Ananíasnen nashimaquin.

¹⁹ Pihax Saulo tantiscái. Damasco janinha Criston jonibo betan sca basima tahni jihueta, jahuentihi nete rah.

Damascobo Saulonen nincamahi

²⁰ Jaatian sca judiobo tsinquitxi xoboboho mapecanaxon jaan jato yohibonaquin, Jesus ta Papa Diosen baque qui, hahbonaquin Saulonen.

²¹ Jaa nincacaibo rahsi rahte rahteti.

—¿Jesusya yohuanaibo rahi neatohon Jerusalen janinxon tiromajayamarahsihiquin? ¿Jato tiromajanoxon neno joyamahipishquin? ¿Jato nexaxon sacerdote hapobo qui hiohi joyamahipishquin? —hihcani.

²² Jaabo jascarai bi Saulo coshihi. Nete tihibi hashoan coshicanaxon Damasco janinha judiobo netemaquin. Jesus ta Papan caisai joni qui hihxon Papan huishamani joi yohiquin jato honanmaquin.

Saulo cahnecahini cahi

²³ Basiscaxon cahen jaa rehteti judiobaan shinanscaquin.

²⁴ Rehtenoxon bariyahpan yame rihbi jahuen xobo xehqui quexecanquin. Mia ta rehtecatsihcanihqui Saulon, hahscaquin caibaan.

²⁵ Criston jonibaan sca yame jema macan chique huinomaxon tasa qui Saulo nanexon botonpaquecanquin catannon.

Jerusalen janin Saulo nocoti

²⁶ Botonahbo cahi Jerusalen janin nocoti. Criston jonibo janin hihquicatsihqui bi raquecani jatihibi. Criston joni hihqui shinanyamacanquin.

²⁷ Mapemacatsihyamahiboya cahen Bernabé janeya jonin sca Criston raantibo janin Saulo hioquin. Hiohah bahinxonbi noquen Hihbo jisxon jan nincaquipi jato yohiquin. Damasco janinxon jan raquexonma Jesusen joi siri yohirahsihi jato yohiquin.

²⁸ Jato betan sca jihuexon Jerusalen janin jato pasijapaquexon raquexonma noquen Hihbaan joi siri yohiquin.

²⁹ Judiohax bi griego joi yohuanaibo judiobo sca huetsayohuani. Joi bichincatsihqui baan bi:

—Jascama ta qui —jato jaquin. Jaabaan rihbi jaa rehtecatsihscrai.

³⁰ Rehtecatsihqui bo honanxon noquen huetsabaan Cesarea janin sca Saulo hioquin. Janohax sca Tarso jema janin canon raancanquin.

³¹ Jaatian jatihibi janin siripih sca jihuecani; Judea main, Galilea main, Samaria main rihbi noquen huetsabo siripi jihuescrai. Coshijaquecani. Noquen Hihbo qui hohchati qui raqueti jihuetai. Dios Yoshiman rihbi jato sirijaquin shinanmaquin.

Eneas rohajahibo

³² Jato tocan ta jatihibi janin Pedro nih nipahonishqui. Lida janin jihuetai Papan baquebo qui nocorihbihi.

³³ Jano cahen Eneas janeya joni meraquin. Ocho bari yora honanyamajaquetax jahuen racatani racatai meraquin.

³⁴ —Enin, Jesucriston ta mia rohajahiqui. Huenixon miin cacajati bilihue —hahquin Pedronen. Yohihah cahen hueniscrai.

³⁵ Jaa jisxon ta Lida jema janin jihuetaibo Cristo qui hinamehnishqui jatihibi. Saron jema janin jihuetai jatihibi rihbi Cristo qui hinamehti nincacoinax.

Dorcias teehihribihi

³⁶ Jaatian ta Jope jema janin rihbi Criston joni janishqui, haibo. Tabita jahuen jane. Tabita ta chaxo hihcatsihquiqui. Jaa haibaan ta caibo siribojaxonpahonishqui hicha. Jato yanapanquin jatohon shinanxon.

³⁷ Jascapahax bi hisinax muhati. Muhascrai bi nashimaxon bochiquiha tapon racan-canquin xoboho.

³⁸ Jope ta Lida hochoma qui. Lida janin Pedro jai honanxon cahen Noque janin histon jorihue yohihi canon, Criston jonibaan rabe joni raanquin.

³⁹ Yohihahbo cahen jato betan Pedro cahi caresscai. Nocataiton janu haibo racanahbo chique janin Pedro hiocanquin bochiquiha tapo janin. Jano yononmabo rahi tsahoti may-acahuani. Huinihi tsahocani. Cotonbo, sahuetibo jan jihueparixon jato quehxexonrasahi jismahi tsahocani.

⁴⁰ Jato jatihibi picamaxon raboxonen nihxon Papa yocaxonquin Pedronen. Yocaxonxon muhuatah haibo jisxon sca:

—Tabitan, huenihue —hahquin. Jascayahah jahuen bero peehtahtanxon Pedro jisish tsahohihnascai.

⁴¹ Tsahoscrai bi mehuetanxon Pedronen huenihihniquin. Papan baquebo quenaxon yononmabo rihbi quenaxon teehihqui jato jismaquin.

⁴² Jan jascajaha Jope janin jihuetaibo jatihibi yohiscacanquin. Nincaxon hichaxon nincacoinax noquen Hihbo qui hinamehti.

⁴³ Basi tahni sca Jope janin Pedro jihuetai, Simoman xoboho. Simon ta yohina bichi poconica hihpahonishqui sapatojatijaquin.

10

Cornelio betan Pedro

¹ Cesarea jema janin ta sontaro hapo japahonishqui Cornelio janeya. Cien sontaroboy ahpa hapo. Italiano hahcaibo cahen jahuen sontarobo.

² Jaa sontaro hapo cahen Papahon shinanai joni. Jahuen xoboho jihuetaibo jatihibi hahbetan Papa qui hohchatí qui raqueti. Jema janin jahuajomabo coriqui hinanresquin. Papa Dios jaayocauquin.

³ Bari racapaquescaya cahen Papan yonoti hahqui nocoti jahui jisquin namaquen jisiaquaquin.

—Cornelion —hahquin Papan yonotinin.

⁴ Jaa jisish hihti raqueta:

—Jahua min queenain, Hihbon? —hihscai.

—Min yocaxonai ta Papan nincaquihqui. Min joni huetsa yanapannoxon coriqui hinanresai ta shinanihqui.

⁵ Jope janin canon jonibo raanscahue, jano jai Simon neno hihuehahbo. Jahuen Jane huetsa ta Pedro qui.

⁶ Huetsa Simoman xoboho ta jihuetaihqui, yohina bichi poconicaton xoboho, quebijitsima hian quexabi —hahquin Papan yonotinin.

⁷ Papan yonoti yamacahinscaya rabe jahuen hahxontibo quenaxon Papahon shinanai sontaro rihbi quenaquin jahuen xobohoxon teexonai jahuen sontaro.

⁸ Jan rahma jisibi jato yohixon Jope janin jato raanscaquin.

⁹ Raanah becani. Nichish bahin hihshinahax mohiyatax nihnichi jema hochoma sca jaabo jahuiya jaa xobo champani pamacanyaxon Papa yocacu Pedro mapeti barin manan tsacahiya.

¹⁰ Pihan hihquish picatsihscai bi cahen xobohoxon pitijaquin janquenjariyamacanquin. Jaatian namaquen jisiaquaquin jisquin.

¹¹ Nai quehpemehtai jisquin. Hani sávana quescapa hoquen panexbehcoinxon main caman botonai jisquin.

¹² Jaa chicho cahen jatihibi yohinahbo main ninotaibo rihbi, hihsabo rihbi jai.

¹³ —Huenihue, Pedron. Rehtexon pihue —hihqui nincascaquin.

¹⁴ —Hen tah hen pitimahi, Hihbon. Jahuentianbi tah hen rishtayabo piyamaniqui, pitimabo —hahquin.

¹⁵ Yohuanai nincaribiquin:

—Siri sca ta qui Papa jaiya tah min tiroma ta qui hih min jatimahi —hihqui.

¹⁶ Quimisha coti jascalahnni. Jaatian jisi bi naihohxon sávana bilininhiribiquin.

¹⁷ Jan namaquen jisibi jahua jenquetsi jascarihqui hihxon shinanscaquin. Shinan shinanaiya bi Cornelionen raanipibo xehqui janin nocoscai. Simoman xobo yocacahcani.

¹⁸ —¿Simon Pedro hahcaibo neno jihueyamahiquin? —hihcanci yocacathi.

¹⁹ Jan jisibó Pedronen shinanparihi bi Dios Yoshiman yohiquin:

²⁰ —Hoa ta mia benahi jahuibó qui. Huenihue tahca. Bototax basihaxma jato betan caresscatanhue. Hean horixon raanah ta becanihqui —hahquin.

²¹ Botoxon sca:

—Hea tah hen man benahi joni qui. ¿Jahua queenax man jahuin? —jato jaquin.

²² —Noquen hapo ta Cornelio qui, cien sontaroboyahpa. Sirijaquin shinanai joni tah qui. Noquen Papahon shinanai. Jatihibi judiobo ta jahan jenimahiqui. Jaa ta Papan yonotinin yohihipishqui, Jonibo raanhue, hahquin. Mian yohihi joi jan nincanon hihquish tah non mia bichi jahui jahuen xoboho min catannon —hahcanquin.

²³ —Mapenahue —hahxon sca jano jato hoxamashinaquin. Hoxashinahax mohiyatax sca jato betan caresscrai. Caibo Jope janinha noquen huetsabo rihbi ta jaa manahi bocanishqui.

²⁴ Nihbahinahipish huetsa neten sca Cesarea janin nococani. Pedro nocoti manahahnan jahuen jenabo jatihibi quenamaxon, jahuen hahbe rabeti siribo rihbi Cornelionen jato quenamaquin.

²⁵ Pedro mapescaya cahen behchihi cahax jahuen tahe naman betihihpaqueti.

²⁶ Jaa hueniquin Pedronen yohiquin:

—Huenihue. Hea rihbi tah hen mia quescapa joni qui —hahquin.

²⁷ Jaa yohuanquinhanan xoboho hihcoxon hicha jonibo nocohihnascai meraquin.

²⁸ Jato meraxon:

—Nahuabo pasijatima joi ta noque judiobo jai. Nahuabaan xoboho mapetima joi cahen noque jai. Jaa cah man honanai. Jaabi ta Papan hea jismahipishqui, mehetima rishtayahí

hen tsoabi jayamanon. Jato yohuanquihnx noque rishtaya jai ta tsoabi yamahihqui. Hen honannon hihxon ta Papan hea jismahipishqui.

²⁹Jaa copi tah hen joresscrai, Caresscatanhue Papan hea jaáh. Hea yohiscanahue tachcah. ¿Jahua copi man hea quenamahipiquin? –jato jaquin.

³⁰Cornelio sca yohuani: –Chosco nete sca nescaran bari racapaque sca jaiya tah hen heen xobohoxon Papa yocaxon pehnene chopaya joni hea bebon sanarenenai hean jisipi qui.

³¹Hea ta yohihipishqui: Cornelion, min yocaxonai ta Papan nincaquihqui. Min joni huetsa yanapannoxon coriqui hinanresai ta shinanihqui.

³²Jope janin jonibo raanscahue, Simon Pedro hahcaibo quenamaquin. Yohina bichi poconica Simoman xoboho ta jihuethiqui, quebijistima hian quexabi, hah ta hea jaipishqui.

³³Jaatianbi tah hen mia quenamanoxon raanipiqui. Jahuerohahi tah min nocoscrai. Neno tah non noquen Papan noque jisiya noque tsinquitai, noquen Hihbaan mia yohihi joi nincacatsihqui –hahquin.

Cornelion xoboho Pedro yohuanai

³⁴Pedronen sca jato yohiquin:

–Rahma tah hen honancoinscrai. Papan ta caibo mentan huetsabo hashoan siri jisyamahiqui.

³⁵Papahon shinanxon ponte hahcai nahuabo ta Papan siri jisiqui. Hen tah hen honancoinscrai.

³⁶Noque israeli baquebo qui ta jahuen joi raannishqui. Jatihibi jonibaan Hihbo hihxon ta Papan rahuiboma sca noque janon Jesucristonen noque hihbojahiqui.

³⁷¿Judea mai jatihibi janin jahua jahoxquin? Man tah man honanai. Galilea mai mehax ta joi behna jamenonishqui, Juaman yohixon nashimahipi pecaho.

³⁸Nazaret janinha Jesus ta Papan caisai joni qui, non honannon hihxon sca ta jahuen Yoshin siri Papan jaa hinannishqui, jahuen coshi rihbi hinanquin. Papan yanapana sca ta jonibo sirijabonahi nihnnishqui, tiroma yoshiman hihbojaha jonibo rihbi jato jatihibi sirijabonaquin. Man tah man honanscrai.

³⁹Neno noquen judiobaan mainxon jan hahpahoni, Jerusalen jema janinxonbi rihbi jan hahpahoni jatihibi tah non jisnixon yohinica qui. Jihuin hueonxon rehtehibo rihbi jisoxon tah non yohihi.

⁴⁰Jan hihquipi jahuen quimisha neten sca Papan huenirihbixon jisíbo hihxon noque qui cainmahi jisoxon tah non yohirihbihi.

⁴¹Jan hihquipish bi hahquirihbi teehihquipi non hahbetan pixon xehacahchihi ta Papan noque caisoxqui, Cristo jihueterihbiscrai joi yohihibo sca noque janon. Jatihibichin jisnon hihxonma bi noque jan caisaibaan jisnon hihxon ta noque janin jaa cainmahoxqui.

⁴²Jahuen joi siri non jonibo yohinon ta noque yohihoxqui. Jihuetaibo betan mahuanihbo jan siri hin tiroma quin hihxon jisnon hihxon ta Papan jaa yohinishqui. Jaa joi rihbi non yohinon ta noque yohihoxqui.

⁴³Cristo nincacoinai jonibo jatihibi ta jaan jaton hohcha sohuaxoniqui. Jatihibi Papan joi yohinicabo ta jascari yohuannishqui –jato jaquin.

Dios Yoshin bichibo judiomabo

⁴⁴Jascari Pedro yohuanparihi bi nincacaibo jatihibi Dios Yoshiman hihbojaquin.

⁴⁵Judioxon bi nincacoinai Pedro betan jahuex rahtescrai. Jaton nahuabo que bi Dios Yoshiman jato hihbojahi jisish rahtecani.

⁴⁶Huetsapahi yohuanai jato nincacanquin. Papa Dios qui jaabo hihti siripi yohuanai nincacax rahte rahtecani. Jato sca Pedronen yohiquin:

⁴⁷–Non haho quescajaribiquin ta neabaan Dios Yoshin bichiqui. Non jato nashimanon. Tsoanbi ta Jato nashimayamanahue noque jatimahiqui –Pedronen jato jaquin.

⁴⁸Jascajaxon Jesucriston janen jato nashimanon Pedronen yohiquin. Nashimaha sca:

–Huetsa neten cayanoxon noque qui banetahhue –Pedro jacanquin.

11

Jerusalen janinhahbo Pedronen yohihi

¹Jaa pecaho cahen Judea mainxon Criston raantibo betan janoha noquen huetsabaan nincaquin. Jaton nahuabaan rihbi Papan joi bichipi nincaquin.

²Jerusalen janin nocotaiton sca Pedro pontecatsihquin, Jato honantijati ta jaiqui hihnicabaan Pedro yocaquin:

³–¿Jahua jenquetsahin min noquen nahuabo janin hihcohipiquin? ¿Jahua jenquetsahin min jato betanbi pihipiquin? –hahcanquin.

⁴ Janjisipibo sca Pedronen jato yohiquin sirijaquin:

⁵ —Jope jema janinxon noquen Papa yocaxon tah hen namaquen jisijaquin hihihosí sábana quescapa jisipiqui, hoquen panexbehcoinxon naihohxon botonai. Hea bebonbi ta botonipishqui.

⁶ Jisquin sirijaxon tah hen yohinahbo, nami pinicahbo, ninotaibo, hihsabo rihbi jisipi qui.

⁷ Yohanai sca hean nincaquin, Huenihue, Pedron, rehtexon pihue, hea jaquin.

⁸ Hen tah hen jascajatimahi, Hihbon, jahuentianbi tah hen pitimabo rishtayabo piyamaniqui, hahquin hean.

⁹ Jaabi hahquirihbi naihoh quehax yohuani, Siri sca ta qui Papa jaiya tah min tiroma ta qui min jatimahi, hihqui.

¹⁰ Quimisha coti non jascahahnai bi naihohxon jatihibi hahquirihbi ninihihniquin.

¹¹ Jaatianbi ta noque janohi qui xobon quimisha joni nocotipishqui Cesarea jemanxon raanipi.

¹² Nahua tah qui hihquishma hen jato betan catannon ta Dios Yoshiman hea yohihipishqui. Nea seis noquen huetsabo rihbi ta hea manahi bohipicanaxqui. Jahuen xoboho tah non hihcohipiqui.

¹³ Jaan ta noque yohihipishqui. Jan jisi bi jahuen xoboho nichi Papan yonoti jahui. Nihrenenxon cahen Jope janin joni raanhue Simon Pedro hahcaibo hihuuenon, hahquin.

¹⁴ Hahan mia Papan teehihmahí joi ta mia yohixihqui qui miin xoboho jihuetaiboyabi, hah ta Papan yonotin jaa jaipishqui.

¹⁵ Hean jato yohimenohiya bi ta Dios Yoshiman jato hihbojahipishqui non yohimenohi tian jan noque hihbojaho quescajaribiqui.

¹⁶ Jaatian tah hen noquen Hihbaan noque yohini joi shinanscaipiqui, Juaman jenen nashimahi bi tah hen jenen nashimaquin hahcajaquin mato Dios Yoshin hinanyaxihqui, hah jan noque janohi tah hen shinanscaipiqui.

¹⁷ Noquen Hihbo Jesucristo nincainaiton Papan noque hinanho Yoshin jato rihbi jan hinanaiya ñahua hihxon hen Jascajaya mahue Papan hen jatihin? —jato jaquin.

¹⁸ Nincacax netecani. Papa qui sca siripi yohuancani:

—Nahuabo rihbi ta shinan pontemaxon jato teehihmahihqui, hicahisen —hihcanci.

Antioquia janinhahbo noquen huetsabo

¹⁹ Hoa Esteban rehtexon jato tiromajaha jabisaibo ta Fenicia main caman bocannishqui. Chipre mai janin, Antioquia janin rihbi ta nococannishqui. Caquin bi judiobo rahsi Papan joi yohibonacanquin.

²⁰ Caibo Chipre mai janinhahbo hihxon, caibo rihbi Cirene janinhahbo hihxon, Antioquia janin nocoxon sca jaton nahuabo rihbi noquen Hihbo Jesusen joi sca yohiquin.

²¹ Noquen Hihbaan ta jato yanapannishqui. Jaabaan yohihah ta hihti caiboxon nincainoxon noquen Hihbo bijnishqui.

²² Jascajahibino nincaxon ta Jerusalen janinxon noquen huetsabaan Bernabé raannishqui Antioquia janin canon.

²³ Nocoxon Papan jahuen shinan jato hinanai jisish jenimahi. Noquen Hihbo jeneyamahahbo hihxon cahen jaan jato yohiquin sirijaquin noquen Hihbaan yohihi quescabijaquein hahcabo hihxon.

²⁴ Janohahbo hicha joni sca noquen Hihbaan hihbojaquin. Bernabé ta sca rihbi janishqui Dios Yoshiman hihbojaha joni. Papan jato hahxontihi cahen jaan shinancoinquín.

²⁵ Saulo benahi sca Tarso janin Bernabé cahi sca cahi. Saulo meraxon Antioquia janin hihuequin.

²⁶ Huesti bari Papan caisaibo betan tsiniquxon cahen rabechin hicha joni haxemaquin. Jano pari ta Criston joni cristianobo janemenocannishqui.

²⁷ Jaatian Jerusalen janinhax Papan jismaha yohihibon nocoti Antioquia janin.

²⁸ Agabo janeya sca jato tocan nihxon jatihibi main piti pishinscaax pihan hilhyaxihqui jato Dios Yoshinyaxon yohiquin. Jan jascani cahen jascacoinscái, Claudio quiquin hapo hihqui tian.

²⁹ Jaan copi cahen Judea main jihuetai noquen huetsabo qui coriqui raanti Criston joniaba shinannish.

³⁰ Jatihxionbi hahtipahnoxon caman raanti shinancanquin. Shinanxon jaabaan shinanai quescabijacanquin. Jaton pastorobo qui hinantanon hihxon Bernabé betan Saulo jaya catannon hihxon raancanquin.

¹ Jaabo cahiya ta jaton quiquin hapo Herodesnin caibo Papan joi nincacoinaibo bishnishqui, jato tiromajanoloxon bilihqui.

² Juaman huetsa ta Jacobo janishqui. Jaa ta Herodesnin rehtenishqui.

³ Jaa retehiya judiobo jenimahi jisxon Pedro rihbi bilihqui chahoma paan fiestajahiboya.

⁴ Bihxon sipo xoboho tsahonquin. Chahoma paan fiesta pecaho rehteyaxahpan costanahbo hihxon jahuen sontarobo Pedro coiranmaquin. Chosco coiranti janahue, huesti coiranti cahen chosco sontaro, jato jaquin.

⁵ Sipo xoboho Pedro tsahotaiya cahen noquen huetsabaan noquen Papa hihti yocaxonquin.

Hihbaan Pedro picohi

⁶ Jisibo hihxon bahquish Pedero rehtenoxahpan hih Herodes jai bi sipo xoboho Pedro hoxahi. Jaa yamebi rabe cadenanen jato qui menexah rabe sontaro napon Pedro hoxahi. Xehqui janin rihbi sontaro coirani xehqui janichi.

⁷ Jaatian noquen Hihbaan raanah jahuen naihoh queha yonoti sanareneni jahui. Sipo xobo chicho xaba siri jaresscrai. Rahpasxon Pedro mohinquin.

—Huenihue histon —hahquin. Huenitaiya hahan menexipi cadena mepequehti.

⁸ Miin chopas sahuxeton tahe xaca rihbi sahuehue —hahquin Papan yonotinin. Jascajaha sahuequin.

—Miin tarin rahcoxon hea chibanhue —hahquin.

⁹ Jascahah hahbe cahi picoscrai. Papan yonotinin hahcoinai honanyamaquin. Namaqueen jisija tah hen jai hihqui.

¹⁰ Huetsa coiranai sontaro huinoxon huetsa rihbi huinohax yami xehpoti qui nococani, jano jema qui cati. Hahmebi xehpoti quehpemehti. Picotax bahin sca bocani. Cahiya bi Papan yonoti yamacahinscrai.

¹¹ Shinanscaax:

—Herodesnin hea rehteyamanon hihxon ta jahuen yonoti Papan raanaxqui heen caibaan hea jacatsihqui jatihibi rihbi hea jayamanon hihxon. Rahma tah hen honanquin sirijascrai —hihqui Pedro.

¹² Honancoinscaax Marian xobon cahi. Jaa María ta Juaman mama qui. Juaman Jane huetsa cahen Marcos. Jaa xoboho tsiniquixon ta Papa yocacannishqui hichaxon Pedro yocaxonquin.

¹³ Jemanhihti xehpoti Pedronen tontonhahcai nincacax Rode janeya xontaco jisi jahui.

¹⁴ Pedro joi nincaxon honanax hihti jenimahax quehpexonti shinanaxma bishquihicanahi caribibi xobon. Hihcohax:

—Pedro ta jemanhihti janin nichiqui —hihqui.

¹⁵ —Min tah min tehquehahqui —hahcanquin.

—Hihyama tah hen jai. Jaa coin tah qui —hiresi.

—Jahuen yoshin rah ta qui —hihscacani.

¹⁶ Pedronen xehpoti tontonhahquin jeneyamaquin. Quehpenscaxon jisish rahte rahtecani.

¹⁷ Netetahbo jahuen mequen sanaxon sipo xobo janinhah noquen Hihbaan jaa picohah jato yohiquin.

—Jacobo, noquen huetsabo rihbi yohiscatannahue —jato jabahini huetsa xoboho caresscai.

¹⁸ Xaba paquescaya sca rahtetax sontarobo coro coroti, hihti corocani. ¿Jahuen Pedro cahxquin? hihcani.

¹⁹ Jato Benatannahue hahca bi benacasquimahiboya coirannica sontaro yocapaquexon, Nea coirannicahbo rehtenahue hahscquin Herodesnin. Jascajahax Judea mai janinhax Cesarea jema janin jihueta sca Herodes cahi.

Herodes mahuatai

²⁰ Jaatian sca Tiro mai janinhahbo qui Herodes sinati. Sidon janinhahbo qui sinarihbih. Jaa copi huesti shinanyahax hahqui nococani. Nocoxon jahuen xobo coirannica Blasto yohuanquihnxon jeenihmacanquin jan jato yanapannon. Quiquin hapo sca hihti yocanquin jan jato qui sinayamascanon hihxon. Jahuen mai janinhax jaton piti jahui copi raejacatsihcani.

²¹ Jaa neten yohuanyaxahnpaan hih jan jaipi jaa nete nocotaiya jahuen quiquin hapo tari sahuehax, jahuen quiquin hapo tsahotinin tsahoxon basi yohuanquin Herodesnin jato yohi yohiquin.

²² Herodes yohuanai nincacax:

—Diosax tah min yohuanai. Joni yohuanaima ta mia qui —hihcani coshin.

²³ Jaatianbi, Jascama ta qui, Papa Dios huesti ta Dios qui, hih jan jayamahi copi noquen Hihbaan yonotinin Herodes rishquiquin. Rishquiham xenahax mahuati.

²⁴ Herodes mahuataiya sca Papan joi caícanascái. Hashoan hocho sca nococanahi.

²⁵ Jaatian antioquiabaan coriqui hinana Jerusalen janin noquen huetsabo qui jaa coriqui hinantanax Bernabé betan Saulo joribiscái. Juan rihbi becanquin, Marcos cahen jahuen jane huetsa.

13

Bernabé, Saulo canon raanaibo

¹ Antioquía janin ta Papan caisaibo tocan haxemanicahbo betan Papan jismaha yohinibabo japhamonishqui, huetsa cahen Bernabé, huetsa cahen Simon, joni huisoni hahcaibo, huetsa cahen Cirene janinhah Lucio, huetsa cahen Manaen jaton gobernador Herodesnín yanapannicah, huetsa cahen Saulo. Jaabo rahsi:

² Piti tenehahnán Papahon shinanaiton Dios Yoshiman jato yohiquin:

—Hen jato yohihi tee jatannon Bernabé betan Saulo raannahue —jato jaquin.

³ Jascajaha piti tenehahnán Papa yocaxon jato metsoncanquin, mato tah non yanapan-tih hahxon jascajacanquin. Jascajaxon jato camacanquin.

Chipre janin Papan joi nincamahibo

⁴ Jascajquin Dios Yoshiman camahah Seleucia jema janin cahax Chipre mai pishca caman quebijistima hian nontin pohquejaqueti.

⁵ Salamina jema janin mapexon judiobaan tsinquití xobohoxon Papan joi yohicanquin. Juaman rihbi ta jato yanapannishqui.

⁶ Jaa mai pishca nabebacahini cahax Pafos jema janin nococani. Jano ta yobe joni meracanishqui, Barjesus janeya. Judío. Papan jismaha yohinicahicamahi.

⁷ Jaa ta janoha tininti teexonai joni hihpahonishqui. Tininti ta Sergio Paulo janeya janishqui, honan joni. Papan joi nincacatsihxon jaa tinintin Bernabéya Saulo quenamaquin.

⁸ Jaa yobepan jane huetsa cahen Elimas, yobe hihcatsihqui. Jaan jato Jascama ta qui, hahquin, tinintin nincacoinmis hihxon.

⁹ Jaatian Pablo hahcaibo Saulo Dios Yoshiman hihbojaha jaa yobe bejisquin sirijaxon yohiquin:

¹⁰ —Mia ta min tiroma yoshiman baque qui. Jatihibi pontejaquin shinanaibaan rahui ta mia qui. Paran paramis. Hihti tiromajaquin shinanai ta mia qui. ¿Papan ponte bahibo min mayamahi tantacatsihyamahin?

¹¹ Jisresscuhue. Noquen Hihbaan ta mia mehehilihqui, benchescaxon min bari basi tahni jisymascanon —hahquin.

Jan jascahiya bi jahuen bero coropax bahquischahinscái. Tsoan hea mehuetanxon hiotihquin, hihquish joni benahi huea hueacanahi cahi.

¹² Jaa jascahi jisxon noquen Hihbaan joi nincacax rahtexon jaton tinintin nincacoinquin, jahuen jointiboyaxonbi nincacoinquin.

Antioquía janin nocotaibo

¹³ Jaatian Pablo, jaabo, Pafos mai potabahini nontin caresscaax Panfilia mai janin nocoti Perge jeman. Jano jato potabahini ta Jerusalen janin sca Juan caribinishqui.

¹⁴ Perge janinhax cahax Pisidia mai meha Antioquía qui nococani. Jaton tantiti neten sca janoha judiobaan tsinquití xoboho hihcohax tsahocani.

¹⁵ Moisesnín huishani joi nincamaxon Papan joi huishaxon yohinicabaan joi nincamaxon tsinquití xobo coirannicahbaan jano tsahotai bi jato quenaquin:

—Noque huetsabaan, jonibo yohiti joi jaxon nihhinaxon noque yohirohahue —hahcanquin.

¹⁶ Jascalahbo nihhinaxon mequen sanaxon Pablón jato yohiquin:

—Heen caibon, noquen Papa Diosohon shinanaibon, hea nincanahue.

¹⁷ Noque israelibaan Papa Díosen ta noquen xenibo caisnixon Egipto main jaabo jihuetaiya jato caíjanishqui. Jahuen coshi jismaxon ta janohax piconon jato hionishqui.

¹⁸ Cuarenta bari sca ta jato tenenishqui níhi naman níh nichaliboya.

¹⁹ Canaan mai janin sca siete quiquin hapobo jaton jihueta boyabi camaxon ta jaa mai israelibaana sca hihnon hihxon jato hinannishqui.

²⁰ Cuatrocientos cincuenta bari janu jihuescanon jato jaa mai hinanquin. Jahuen joi yohinica Samuel janon camanta jato pontenicabo hinannishqui.

²¹ Quiquin hapo sca noque hinanhue, hah sca ta jacannishqui. Yocacahbo cahen Cisin baque Saulo jato hinanquin. Jaa ta Benjamin baquebo janishqui, Saulo. Cuarenta bari ta jaan jato coirannishqui.

²² Jaa potascaxon ta Davidinin sca jato coirannon hihxon jaa sca quiquin hapomanishqui. Jaa yohihi ta Papan nescajanishqui: Isaín baque David tah hen heen shinanya jisi. Hea queenai quescabija ta jaan jatihiqui hea hahxonquin.

²³ Jaa Davidinin chini baquebo janinhah ta noque israelibo teehihmanica Papan cainmascanishqui, Jesus, jan yohini quescabijaquin.

²⁴ Jaa jonon ta jaton shinan pontexon nashimati Juaman jato yohinishqui, jatihibi noquen caibo yohiquin.

²⁵ Jato yohiquin queyoti hochoma sca: *¿Hea jahua quin shinan man Jain?* Hea ta jaama qui. Hehchon ta huetsa jahuiqui. Jaa hihti siri copi tah hen jahuen sapato risbi pecaxonti hahtipahyamahi hahquin jaan.

²⁶ Heen huetsabaan, Abrahanen baquebaan, Papahon shinanaibaan. Noquen nincanon hihxon ta Papan noque jaa joi raannishqui, hahan teehihi joi non nincanon.

²⁷ Jaa teehihmanica jisxon bi ta jaa honanyamacannishqui. Jatihibi tantiti neten Papan yohinacabaan joi nincamaha bi nincayamaribixon ta Jerusalen janin jihuetaibaan jaton hapobo betan jaa rehtemacanishqui, jayayihquibo Papan yohini quescabijaquin.

²⁸ Jahua copi rehteti yamahi bi Pilato yocacanquin jaa rehtemanon.

²⁹ Jaa yohihi huishani joi jai quescabijaxon jihuun hueonahbo mahuascái botonxon ta tsahoncannishqui.

³⁰ Hihquipi bi ta Papan teehihmarihbishqui.

³¹ Hahquirihbi teehihquish ta hahbetan Galilea janinhax Jerusalen janin cahipibo qui cainnishqui, jaabaan sca jan teehihribihi jisnicahboxon caibo sca yohinon.

³² Joi siri tah non mato yohihi, hea huetsabaan. Noquen xenibo jan hahxontijani quescabija ta Papan jaiqui.

³³ Jesus hihquipi bi hahquirihbi teehihmaquin ta jan hahxontijani quescabijaquin Papan noquen xenibo hahxonihqui, noque teehihmanica janon. Jahuen rabe behua huishaquin Davidinin yohini quescabi ta qui: *Mia tah min heen baque qui. Nea neten tah hen heen baque mia hihqui jato honanmascái.*

³⁴ Jaa hihquipish bi jahuentianbi yora pisiyamascanon hahquirihbi teehihmahai ta nescajaquin rihbi yohinishqui: *Hen jahuentianbi huetsajatima joi siri hen David yohini quescabijaquin tah hem mia hahxonscai, hih ta jaiqui huetsa quirica janin rihbi.*

³⁵ Jaa yohihi ta huetsa behua janin rihbi nescarilqui: *Min caisai miin baque tah min pisimatimahi hihqui.*

³⁶ Jihueparixon ta Papa queenai quescajaquin Davidinin hahnishqui. Mahuatai tsahonahbo ta jahuen yora payoscanishqui.

³⁷ Papan hahquirihbi teehihmahai joni ta jascayamahihqui: *jaa ta payoyamanishqui.*

³⁸ Jaan ta maton hohcha sohuaxonti hahtipahiqui. Man honanon hihxon tah non mato yohihi, hea huetsabaan. Moisesnin noque yohini quescabijaxon bi man potati hahtipahyamahi hohcha jatihibi ta jaan sohuahihqui nincacoinaibo rahsi.

³⁹ Jaa nincacoinaibo jatihibi ta Papan siri jisiqui.

⁴⁰ Papan joi yohinacabaan ta nescajaquin huishaxon yohinishqui:

⁴¹ Jisnahue, hea hosanaibaan. Rahtenahue queyoscanoxon. Man jihuetai netenbi hen hahna rahteti hahcaiyai bi tah man hihcoinai shinantimabiresai. Papan ta jascajaaxqui hih ta jahuen huisha jaiqui. Jistahi man. Jan yohihi quescabija jan mato jamis –jato jaquin.

⁴² Jascalahax cainscaiton huetsa tantiti neten rihbi noque yohirihbiyaxahnhue hihxon jato hihti yocacanquin.

⁴³ Tsinquixon yohuanaibo nincaquin queyoxon sca, jaton nahua hihpahonish bi Papahon shinanax judioscaibo betan judiobaan hichaxon Pablo, Bernabé chibanbonaquin. Chibanaaho Papan shinanai quescari jihuetahbó hihxon jato sirijaquin yohiquin.

⁴⁴ Huetsa tantiti neten sca Papan joi nincacuqui jaa jema janinhahbo jatihibi tsinquecani. Huestibio res pishini.

⁴⁵ Pablo yohuanaai nincacalbo hihti caibohi jisish notsi notsixon:

–Jascama ta qui tiroman –hahcanquin judiobaan.

⁴⁶ Pantecatsihquibaan bi raquexonma Bernabé betan Pablonen jato yohiquin:

–Mato pari tah non Papan joi nincamati jai. Queyoyamanox manatalbomaxon man jaa joi potasaiya tah non nahuabo sca yohihi.

⁴⁷ Non jascajanon ta noquen Hihbaan noque yohinishqui:
Nahuabo min xabajonnon tah hem mia yohihi jano nai chibechijaquetancahuanaiton caman hahan teehihmati joi min jato nincamanon
hah ta noquen Hihbo janishqui –jato jaquin.

⁴⁸ Jan jascarai nincacax judiomabo jenimacani. Papan joi hihti siri jiscanquin. Queyoyamanox jihueyaxihquibo rahsi noquen Hihbo qui hinamehti, Papan caisnibo rahsi.

⁴⁹ Janohax sca cahen janoha maibo janin Papan joi caícanahi.

⁵⁰ Papahon shinanax bi haibo patorobo sca ta jaa judiobaan Pablo qui sinamanishqui, jaa jema janin jihuetaibo haibo patorobo. Janoha patoro rihbi sinamacanquin Pablo Bernabé rihbi picohahbo hihxon. Sinamahabo cahen jato jaa mai janinhah picocanquin.

⁵¹ Jaabaan picohah yohitimabohi honanahbo hihxon jaton sapato poto jato quiri tahabahini Iconio jema janin sca boressacani.

⁵² Jaabi Jesusen jonibo hihti jenimahi. Dios Yoshiman hihbojaha jenimahi jihuecani.

14

Iconio janin nococani

¹ Iconio janin sca judiobaan tsinquit xoboho mapexon jato yohiquin nincacoinahbo. Yohihah hichaxon nincacoincanquin judiobaan, judiomabaan rihbi.

² Nincacoinaiboya cahen nincayosma judiobaan judiomabo sinamaquin. Noquen huetsabo jistahihmanon hihxon jato tiroma shinan hinancanquin.

³ Jaabi ta janobi basi tahni jihuescannishqui raquexonma noquen Hihbaan joi jato yohihahn. Jatohon shinanaxon Papan hahxonai joi nincacoinahbo hihxon ta noquen Hihbaan rihbi yanapanquin hahan honantiboya hahan rahtetibo jato jaxonnishqui.

⁴ Jema janinhahbo sca caibo huetsa shinanya hihnon caibo rihbi huetsa shinanya hihqui. Judiobo res caibaan nincaquin. Caibaan rihbi Criston raantibo res nincaquin.

⁵ Jasca sca jaiya cahen jato tiromajaxon macaman tsacanon benahue hihcani judiomabo, judiobo, jaton hapobo rihbi.

⁶ Macaman tsacacatsihquiibo honanax jabascacani. Licaonia main, Listra, Derbe, jaa jemabo janin bocani.

⁷ Jano sca Papan joi siri yohicanquin.

Listra janin Pablo tsacahibo

⁸ Listra janin ta chanto joni mercacannishqui, jahuen ponobo yosmahi cainniss jascabis-cai. Jahuentianbi nihti hahtipahyamani.

⁹ Jaan cahen Pablo yohuanai nincaquin. Jaa Pablonen bejisquin sirijaquin. Jisanan Papan mehehah rohatih jan shinanai honanaxon coshin sca yohiquin:

¹⁰ —Huenihue. Nhirenenhue —hahquin. Jascalah cayahihntax nich tana tanascai.

¹¹ Pablonen jascajaha jisish tsinquijsaquaetaibo coshin yohuanscrai:

—Yorayahpa quescapahax ta dios rabe noque qui botopaqetaxqui —hihcani jaton join, Licaonicabaan join.

¹² Bernabé ta Júpiter janecannishqui. Pablo cahen Mercurio janecanquin, yohuan hihbo hapo quen.

¹³ Júpiter hiná rehtexonnicah sca hicha jonibo betan cahi. Pehi toronjaxon ganado tejomaxon jema xehqui janin jano Júpiter hahcaibo jaton diosen xobo jaiton jaton ganado rehtecatsihscrai, Pablo hinancatsihquin, mapojaxonnoxon.

¹⁴ Jascajahibo nincaxon Criston raantibo Bernabé betan Pablonen jaton chopu huax-abahinxon tsamatai jonibo tocan cayatanxon jato coshin yohiquin:

¹⁵ —¿Jahueja man jacatsihquin, jonibon? Noque tah non mato quescapa jonibo qui. Nescapa tiroma shinan potabahinxon jihuematica Dios man bihnon hihxon tah non jahuen joi siri mato yohihi. Nai, mai, hian, jano jai jatihibi ta jaan hahnishqui.

¹⁶ Neateman jihuematica ta jaabo jihueta queenai quescapa jaan jihuematica.

¹⁷ Jaabi ta hahan honant jato pishinmayamanishqui jato yanapanquin naihohxon hoi paquemaquin, bimibo hinanquin, piti mato hinanquin, hahan jenimati mato hinanquin —jato jaquin.

¹⁸ Jascajahueta ibi yohihah pari ta jaabaan jaton ganado jato rehtexonquin bi rohaja-canishqui.

¹⁹ Jaatian Antioquia janinhax judiobo jahui. Iconio janinhax rihbi nocoxon judiobaan janohahbo sinamaquin, Pablo rehtehahbo hihxon. Sinaxon Pablo macaman tsacacanquin. Jemama qui ninibonaxon mahua sca ta jaiqui hihxon janobi potabehnancanquin.

²⁰ Criston jonibo jaa mayajaquetaiya huenisaax jema janin caribihi. Jano hihshinahax Bernabé betan caresscrai. Derbe jema janin cahi caresscrai.

²¹ Nocoxon Papan joi siri jato yohicanquin. Yohihahbo hichaxon nincacoinquin. Janohax sca Listra janin caribihi. Janohax sca Iconio janin. Janohax sca Antioquia janin.

²² Criston jonibo coshi hinanbonahi cahi, shinancoquin jeneyamaxahcabo hihxon jato hilhi yohiquin.

—Papan jihuematica janin noconoxon tah non hicha teneti jai —hahquin.

²³ Piti tenehahnan mequeman mehexon Papa yocaxon nincacoinaibo jano jaiton tihibi siri jonibo caixxon Mia pastorohue, Mia rihbi pastorohue hahcanquin. Jascajaxon jaabaan nincacoinipi quen noquen Hihbaan jato coirannon hihxon Papa yocaribicanquin.

Antioquia janin nocorihbicani

²⁴ Pisidia mai sca nabebacahinax Panfilia mai janin nococani.

²⁵ Perge janin sca caxon joi siri yohiscaax Atalia janin cahpaquehcanci.

²⁶ Janohax sca Antioquia janin cahi nontin boribicani. Hoa chai yohitanahbo hihxon janoxon Papa jato yocaxonnibo janin nocorihbiscacani, janohax jaabo catanni janin.

²⁷ Nocoxon noquen huetsabo tsinquiemaxon jato betan Papan hahrasihu jatihibi yohicanquin. Judiomabo jan jascajaquin nincamamenohi jato yohiquin.

²⁸ Basi sca jano Criston jonibo betan jihuecani.

15

Jerusalen janin tsinquitoiba

¹ Jaatian Jerusalen janinhahbo sca joxon noquen huetsabo yohiquin:

—Moisesnin yohini quescabijaquin honantijayamahah tah man hahquirihbi teehihtimahi —hahcanquin.

² Jaamajahibo copi ta Bernabé betan Pablonen jato pontequin sca yohinishqui. Yohihah bi hahbetan sca yohinanresi. Join bahchinani. Criston raantibo yocacahti ta jaíqui, hihxon sca Jerusalen janin bohábo sca raancanquin Pablo, Bernabé, caibo rihbi. Jerusalen janin caxon Criston raantibo yocacahbo cahen raancanquin. Noquen huetsabo shinanyahpabo yocacahti canon raancanquin.

³ Noquen huetsabaan sirijaquin camahah cahen bocani. Judiomabaan shinan pontexon Papan joi bichi jato yohihahan Fenicia mai nabebacahinax Samaria mai rihbi nabebacanahi bocani. Yohiha janoha noquen huetsabo hihi jenimacani.

⁴ Jerusalen janin nocotaiton sca Criston raantibaan jato Benahue hahquin. Janoha pastorobaan jatihibonbi jato Benahue hahcanquin. Benahue hahcabo jato betan Papan hahrasihu jato yohirihbicancun.

⁵ Fariseoboxon bi nincacoinaibo sca nihrenenxon yohiquin:

—Jato honantijaxon Moisesnin yohini quesca jaahbo tah non jato yohiti jai —hahcanquin.

⁶ Jaa joi sca shinanquin sirijanoxon cahen Criston raantibo betan pastorobo rihbi jano huesti tsinquit.

⁷ Basi yohinannan sca jaiboya nihrenenxon Pedronen jato yohiquin:

—Heen huetsabaan, neateman ta Papan hea mato tocan mehax canon hea yohinishqui jahuen joi siri hean yohihah noquen nahuabaan nincacoinnon. Man tah man honanscái.

⁸ Jonin jointi honanxon ta Papan jaabo siri hihqui noque jismanishqui, noque jahuen Yoshin siri jan hinanai quescajariquipuun jaabo rihbi hinanquin.

⁹ Noque ta jascapa rabe jisnishqui. Jaabaan nincacoinai copi jaabo rihbi jaton jointi sohuaxonquin.

¹⁰ Non papiti hahtipahyamani bi noquen xenibaan rihbi papiti hahtipahyamani hihue papimaquin hahcajaquin tah man Criston jonibo judionahue hahcai. ¿Jahua copi man jascajaquin noquen Papa Dios tanahin?

¹¹ Noquen Hihbaan noquehon shinanxon noque teehihamatihi quescajariquipuun ta jaabo rihbi teehihamatihi. Jaa tah non shinancoinai —jato jaquin.

¹² Jaatian pari netexon Pablo yohuanai nincacanquin. Nincacaiton judiobaan nahuabo janin caxon hahan honantibo hahan rahtetibo jato betan Papan hahquipi jato yohipaquequin Pablonen, Bernaben rihbi.

¹³ Yohiquin queyoscaiya Jacobo sca yohuani:

—Hea nincanahue, hea huetsabaan.

¹⁴ Jahuenaahbi jaabo hihnon hihxon jahuen joi siri noquen nahuabo Papan nincamamenoni ta Simoman noque yohiscaaxqui.

¹⁵ Papan yohinicabaan rihbi ta huishaxon jascajaquin yohinishqui. Nincanahue:

¹⁶ Jaa pecaho joribixon tah hen Davidinin xobo poxoni huenirihbixon hahcajaquin jahuen jihuetahbo hinanrihbithihi. Payonihbo hahribixon hahcajaquin tah hen jahuen jihuetahbo hinanrihbityaxihqui.

¹⁷ Texe jonibaan jaton Hihbo benahahbo hihxon tah hen jascajayaxihqui. Maton nahuahax bi hehqui hinamehtaibo jatihibichin hea benahahbo hihxon tah hen jascajayaxihqui.

¹⁸ Nea joi neateman yohinihxon ta noquen Hihbaan jascajahiqui.

¹⁹ Hean shinanah tah non jaton shinan pontexon noquen Papan joi nincacoinaibo noquen nahuabo non jatsanjatimahi.

²⁰ Jato qui raannoxon quirica huishati ta jaiqui, santoya rishtayamahahbo joni huetsa betan tsiniyamahahbo, hahsataibo piyamahabo, jimi rihbi piyamahabo.

²¹ Jatihibi jema janinxon ta neateman Moisesnin joi nincamanixon rahma caman nincamacaniqui. Nincamaxon ta jaa jahua hihcatsihquiquin hihxon yocaribicaniqui, tantiti nete tihibi jaton tsinquit xobobohoxon. Jaa copi tah non jato qui joi raantihi –jato jaquin.

²² Jeenihhxon sca jonibo raanah ta siri qui hihxon Criston raantibo, janohahbo pastorobo, jatihibi noquen huetsabo, jatihixonbi sca Bernabé betan Pablo manahi cahabo mananicabo caiscanquin, Antioquía janin jato raannoxon. Judas Barsabas hahcaibo, Silas rihbi, caiscanquin. Jaabo hihti shinanya noquen huetsabo copi jato caiscanquin.

²³ Jato betan raanti quirica sca huishamacanquin:

Maton huetsabo, Criston raantibo, pastorobo, noque rahsibixon tah non mato qui joi raanai, man jascabi jayamahin, hahquin. Antioquía, Siria, Cilicia maibaan jihuetai noquen caibohaxma bi noquen huetsabo qui tah non raanai.

²⁴ Noquen raanahma bi noque quihaz caxon yohixon mato masa shinanmahibo joi tah non nincacai.

²⁵ Nincaxon tah non jatihixonbi sca shinanquin sirijaxon noque quiha jonibo caisai, Bernabé betan Pablo manahi mato janin canon. Bernabé betan Pablo ta hahan non shinanai noquen huetsabo qui.

²⁶ Caibaan jato rehtecatsihquibaan bi ta noquen Hihbo Jesucriston joi siri yohihi caress-cahoxqui.

²⁷ Jaa copi tah non Judas betan Silas raanai, jaabaan sca non mato yohihi joi mato yohiquin sirijanon.

²⁸ Judiobaan mato jisi copi man jascajati jai joi res tah non mato yohihi, jahuabi hashoan mato hihuejayamanoxon. Non jascahah ta siri qui hihxon tah non yohihi, Dios Yoshiman rihbi noque jascajaquin shinanmaha.

²⁹ Jaa copi tah non mato yohihi, santo rehtexona nami piyamanahue, jimi rihbi piyamanahue, terehahxon rehtehibo rihbi piyamaquin. Joni huetsa betan tsiniyamanahue. Non mato yohihi quescarax tah man siritih. Jaa res tah non yohihi, hahcanquin huishaquin.

³⁰ Raanahbo Antioquía janin bocani. Jano noquen huetsabo tsinquixon jaa quirica jato hinancanquin.

³¹ Jaa quirica bihxon jisxon shinanquin sirijascacanquin.

³² Papan jismaha yohinicaboxon Judas betan Silasen jato hicha yohixon noquen huetsabo coshi hinanquin.

³³ Jano jihuetahbax cacatsihscaboya jato raanipibo qui caribinon sirijaquin jato camacanquin.

³⁴ Hihcax bi Silas cayamahi. Baneti jan shinanaiya Judas huesti cahi.

³⁵ Antioquía janin Pablo betan Bernabé baneti. Banexon jato honanmaquin. Hicha noquen huetsabo betan jaa joi siri yohicanquin.

Papan joi yohihi Pablo caribihi

³⁶ Jahuentihi ra nete jano hihxon:

–Jano non noquen Hihbaan joi non jato yohiniton caribinon cahue jato jisi. Jenquet-sahpi jacaniquin jisnon cahue jatihibi jema janin –Bernabé Pablonen jaquin.

³⁷ Juan Marcos hahcaibo Bernabenin hiocatsihqui bi Pablo queenyamahi.

³⁸ Panfilia janin jato potabhini jato betan Papan joi yohihi cayamani copi cahen jaa hioti Pablonen shinanyamaquin.

³⁹ Huesti shinanyamascaa cahchinanbehcoini. Chipre janin Marcos betan canoxon cahen Bernabé nontin naneti.

⁴⁰ Pablo cahen Silas betan cahi, noquen huetsabaan noquen Papa yocaxonah.

⁴¹ Siria nabebacahinax Cilicia mai rihbi nabebacahini cahi noquen huetsabo shinan hinanbonaquin.

Timoteo sca jato manahi cahi

¹ Derbe janin nocotax janohax cahax Listra janin nocorihbihi. Jano Timoteo janeya Criston joni jai. Jahuen mama judiohax bi nincacinnica. Jahuen papa cahen judiobaan nahua.

² Jaa Timoteo qui ta Listra janinha noquen huetsabo siripi yohuannishqui. Iconio janinhahbo jascarihbibi yohuani.

³ Jaa hiocatsihxon bihxon janobo judiobo jai copi Pablonen jaa honantijaquin. Nahua papayahpa jaa honanaiboya jaa honantijaquin.

⁴ Jemabo sca nabebacanahi caquin jato yohibonaquin. Jerusalen janinxon Criston raantibo betan jaton pastorobaan yohihipi joibo jato yohibonaquin. Jaa joi nincaxon jascari jihuetahbilo hihxon jato yohiquin.

⁵ Jaa copi ta noquen huetsabaan hashoan sca nincacoinnishi. Nete tihibi caícanahi.

Macedonio joni Pablonen namacai

⁶ Frigia mai sca nabebacahinax Galacia mai rihbi nabebacahini bocani. Asia mai janin cacatsihquibo bi Dios Yoshiman jato jano yohimayamaquin.

⁷ Misia main nocotax, Bitinia main sca cacatsihquibo bi Papan Yoshiman jato panterih-biquin.

⁸ Misia mai huinojaquetax Troas jema janin sca cahpaequehcani.

⁹ Huesti yame cahen namaquen Macedonia janinha joni Pablonen jisquin. Jaa bebon nihrenenxon jaa macedonio jonin hihti yocaquin:

—Macedonia janin noque yanapani johue —hahquin.

¹⁰ Namayama sca jan jaiya jenquetsahax non Macedonia janin caman pohquetihin hihxon hahan pohqueti benaquin noquen. Non jano jahuen joi siri yohihi canon Papan noque quenahi tah non honanquin sirijaniqui.

Filipos janin nococani

¹¹ Nontin nanexon Troas potabahinquin noquen. Samotracia quiri ponte res cahi. Nihshinahax huetsa neten sca Neápolis jema janin taxnati.

¹² Mapetax Filipos jema janin cahi. Filipos ta romanobaan tsahonni jema qui, jano jai jemabo mentan hashoan hani. Jano tah non jahuentihi ra nete hihnioui.

¹³ Tantiti neten sca tah non jema jemanhihtinin caniqui, huean quexabi. Janoxon ta judiobaan noquen Papa Dios yocaquihqui hihquish tsahopaquetax non jano behchinanai haibobo betan noque yohuani.

¹⁴ Huesti haibo ta Lidia Janeya jano janishqui. Papahon shinanai haibo. Yancon chopa maromanicah. Tiatira jema janinhah haibo. Jaan cahen nincaquin sirijaquin. Pablonen yohihi joi nincati shinan noquen Hihbaan hinanah nincaquin.

¹⁵ Jatihibi jahuen xoboho jihuetaibo betan nashimaha sca noque hihti yohiquin:

—Noquen Hihbaan joi hen nincacoinai shinanax heen xoboho botannahue. Jano sca banenahue —hahxon jano sca noque hioquin.

¹⁶ Janoxon jaabaan Papa yohihi janin sca non cahi bi huesti hiná haibaan noque behchiquin. Tiroma yoshinyahpa haibo hihxon ta jayaxon jonibo yohipahonishqui. Honancatsihquin yocacah jaan yohiquin. Jascajaxon ta jahuen hihbobo hicha coriqui cananxonpahonishqui.

¹⁷ Jaa haibaan cahen Pablo chibanbenaquin. Noque rihbi chibanbenaquin. Noque chibanhahnan coshin yohuani:

—Nea jonibo ta Xaba Hihbo Diosen jonibo qui. Hahan teehti joi ta mato yohicaniqui —hihqui.

¹⁸ Hicha neten jascarihbibi. Jatsanscaax mayacahuhanxon Pablonen jaa yoshin yohiquin:

—Jesucriston janen tah hen mia yohihi, jaa haibo janinhax picohue —hahquin. Jan yohihibah cainscái.

¹⁹ Hahan coriqui cananti yamascai jisxon jahuen hihbobaan Pablo bihquin. Silas rihbi bihcanquin. Bihxon tinintinin jemanhihti janin hioxon jaton hapobo quenacanquin.

²⁰ Jaton hapobo jahuiya:

—Neabo ta judiobo qui. Noquen jema ta tiromajacaniqui.

²¹ Noque jascatima joi ta noque yohihibi, jascapa noquen nincatimahi bi. Noque jascatimahi joi tah qui. Noque tah non romanobo qui —hihcani.

²² Jano tsamajaquetaibo rihbi jascari jato qui yohuani. Jascaraiboya jaton chopa potamaxon, jihuin jato cahrishqui cahrishquinon jaton hapobaan yohiquin.

²³ Tsehue tsehuejaxon sipo xoboho jato tsahonxon sipo xobo coirannica yohicanquin sirijaquin jan coirannon.

²⁴ Jascajaquin yohihibo chicho queha chiqueho jato niaxon hahan tabitaxtinin jato tabitaxpaquequin.

²⁵ Yame pochinicon sca Pablo betan Silasen noquen Papa yocaquin. Papa qui siripi behuahi. Hahbe sipojahipibaan cahen jato nincaquin.

²⁶ Jaatian mai coshin miuhanreneni. Xobo jihuibo taxca taxcahahqui. Jatihibi xehpoti quehpemehscai. Hahan jato menexipi cadenabo mepequehcahini.

²⁷ Sipo xobo coirannicah sca mohixon jaa xobo xehpoti jatihibi quehpemehtai jisish machitonen nacocatsihscrai. Hahmebi rehtecatsihqui sipojahipibo jabascai shinanax.

²⁸ Nacocatsihqui bi Pablonen coshin quenaquin:

—Jascari tiromayamahue. Neno tah non qui jatihibi —hahquin.

²⁹ Jascajahah:

—Johué quetejanahue —hihquish sipo xobo hihcocahinax tastahihcanahi cahi Pablo betan Silas janin taracahreneni.

³⁰ Hueniscaben jemanhihti janin jato picoxon yocauquin:

—¿Queyoyamanox mananoxon hean hen jahuejati jain, jonibon?

³¹ —Noquen Hihbo nincacoinax tah min queyoyamanox manatih. Miin xoboho jihuetaibo jascaribibi —hahcanquin.

³² Jascajaxon jahuen xoboho jihuetaibo rihbi Papan joi yohiquin sirijacanquin.

³³ Jaatianbi yamebi jato hioxon jaton tsehue chocaxon:

—Nincacoin tah hen jai. Hea nashimanahue. Heen xoboho jihuetaibo rihbi nashimanahue —jato jaquin.

³⁴ Jahuen xoboho jato mapemaxon sca jato pimaquin. Papa nincacoinax jaa, jahuen haibo, jahuen baquebo, jatihibi hihi jenimahi.

³⁵ Xaba paquescaiyai sca jaa jema hapobaan porisia raanquin, yohihi cahabo.

—Hoa jonio picotanhue botanahbo —hahcanquin.

³⁶ Sipo xobo coirannicahon sca jascajaquin Pablo yohiquin:

—Hapobaan ta joi raanihqui hen mato piconon. Picoscanahue tahca. Siripi catannahue.

³⁷ Jascalah bi Pablonen jato yohiquin:

—Noque romano jonio que bi ta jatihixonbi jisnon hihxon noque rishqui rishquimahipicanaxqui non jahuejahi honanxonma bi. Jisíbo hihxon ta noque sipojahipicanaxqui. ¿Jonexon tsoan honannonma sca noque picocatsihcanihquin? Jascajatima ta jaticaniqui. Jaabobi joxon noque piconon —hahquin.

³⁸ Hapobo yohihi sca bocani porisiabo. Romano jonio ta qui hihqui nincacax raquescancani.

³⁹ Jaabo sca joxon jato raejacatsihquin jato sirijaquin yohuanquinquin:

—Honanyamaxon tah non mato jascajahipiqui —hahxon jato picoxon sca Noquen jema potabahinrohanahue —hahcanquin.

⁴⁰ Jascari sipo xobo janinhax picotax Lidia jisi bocani. Noquen huetsabo jisxon sca jato yohiquin. Nincacoinquin jeneyamaxahnahue jato jaax caresscrai.

17

Tesalonicabo corotaibo

¹ Anfípolis jema nabebacahinax Apolonia jema sca nabebacahinax Tesalónica jema janin nococani. Jano cahen judiobaan tsinquit xobo jai.

² Jahuen hihti quescarax jano Pablo mapeti. Quimisha tantiti neten jato betan yohinani, tsoa noquen teehihmanicah quin hihqui yohinani.

³ Papan huishamani joiboyaxon cahen Pablonen jato honanmaquin. Papan caisai jahuen baque hohmis hohmisax hihquipish bi teehihribiti jaa janí jato jismaquin sirijaquin, Jaa Papan caisai jahuen baque ta Jesus qui, jaa hen mato yohihi, hahquin.

⁴ Nincacoinmaha Pabloya Silas manahi sca caibo cahi. Judiohaxma bi judiocatsihquiaan rihbi hichaxon nincacoinquin. Patoro haibobaan rihbi nincacoinquin hicha tahnixon.

⁵ Jaa copi ta notsi notsixon shinanjoma tiromabo tsinquiton jema janinhah judiobaan jato coro coromanishqui. Jasoman xoboho sca jaa corotaibo mapeti, Criston raantibo benahi. Corotaibo bebombi jato nichincatsihquin jato benacanquin.

⁶ Criston raantibo benacasquimaxon Jason sca bihxon caibo noquen huetsabo rihbi bihxon jema hapobo janin jato ninitancanquin.

—Jatihibi janin tiromajaquin jonio coromabenani ta neno sca neabo nocotipishqui. Jasoman rihbi ta jahuen xoboho jato hoxamahiqui.

⁷ Jatihixonbi ta noquen quiquin hapo Cesaro nincacatsihyamascacanighqui, huetsa quiquin hapo Jesus jaresscrai shinanaxon copi —hihcani.

⁸ Jascajaxon jonio coromacanquin. Nincaxon jema hapobaan masa shinanscaquin.

⁹ Jaabi Jason cobranxon caibo rihbi cobranxon:

—Boresscatannahue —jato jacanquin.

Berea janin nococani

¹⁰ Jaa yamebi ta Pablo, Silas rihbi noquen huetsabaan hionishqui Berea jema janin cahábo. Berea janin nocotax sca judiobaan tsinquit xoboho mapecani.

¹¹ Jaabo ta Tesalónicabo mentan hashoan shinanya janishqui. Hihti honancatsihxon Papan joi nincacanquin. Jasca coin hin hihxon jatihibi neten Papan huishamani joijisquin honancatsihquin.

¹² Hichaxon ta nincacoinnishi qui. Jaton nauua patoro haibobo rihbi hicha. Bebobo rihbi huestima.

¹³ Papan joi Berea janinxon rihbi Pablonen yohihi honanscaax Tesalónica janinha judiobio jano rihbi bocani. Nocoxon jonibo sinamaxon jato coro coromacanquin.

¹⁴ Jaa copi histon sca noquen huetsabaan Pablo camacanquin. Quebijistima hian quiri hiocanquin. Jema janin sca Silas betan Timoteo baneti.

¹⁵ Pablo hiohibaán ta Atenas jema caman jaa nocomanishi qui. Janohax jaabo caribinon ta Pablonen jato joiya raannishi qui, Silas betan Timoteo hahqui histon jonon.

Atenas janin Pablo nocotaí

¹⁶ Atenas janin jato manahahnan jatihibi janin santobo jai jisxon Pablonen masa shinanquin.

¹⁷ Judiobaan tsinquitxi xoboho jato betan yohinanax Papahon shinanai judiomabo betan rihbi yohinani. Jatihibi neten rihbi jaton janoxon maroti jemanhihti janin jano jaibo betan yohinani Papan joi nincamacatsihqui.

¹⁸ Jaton honan joi honanaibo rihbi ta jano nihnínishi qui, caibo epicúreobo, caibo estoicobo. Jaabaan ta Pablo yohuanquiñnishqui. Yohuanquiñhnax:

—¿Jahua yohuan nea parammis jaiquin? —hihqui caibo.

—Nahuan dios joi yohinica ra tahi qui —hihqui caibo rihbi. Jesus hihquipish bi hahquiri-hbi teehihqui joi jan yohihiya jascacani.

¹⁹ Jaatian sca jaa bihxon Areópago janeya mahchi janin hiohax yocacahcani:

—¿Nea min honanmahi joi behna min noque yohirohatimahi?

²⁰ Min noque yohihi nincacax tah non rahtetai. Jahua min yohirohatimahi hih tah non jai honancatsihqui.

²¹ Jatihibi Atenas janinhahbo betan huetsancohax johox jano jihuetaibo ta jahuabi teeyamapahonishi qui. Joi behna yohixon nincaqui jihueraesi.

²² Areópago mahchi naponbi nihrenenax sca Pablo yohuani:

—Atenas janinhahbon, hicha diosbo man shinanai tah hen jisi.

²³ Jema janin huinoxon tah hen maton diosbo huishaxon man tsahonxoni macanbo jisbonaxon hen nea huishayahpa huesti merahipiqui. Non honanyamahi diosenah hihqui jaa quirica. Jaa honanyamaxon bi hahan man shinanai Dios tah hen mato yohiscái.

²⁴ Nea naiyahpa mai, jano jaibo jatihibi rihbi hahní Dios ta nai hihbo qui, mai hihbo. Jaa ta jonin mequeman xobojahí janin jihueyamahihqui.

²⁵ Jaa ta jonibaan hahxonti pishinyamabiresiqui. Noquen mequeman tah non jaa jahuabi hahxontimahi. Jaan caya ta jatihibi jihuemaxon noquen piti, jatihibi noque hinaniqui.

²⁶ Huesti jonijamenonixon ta jahan sca jatihibi jonibo cainmanishi qui jatihibi main jato jihuemanxon. Janobi jihuexayahnahue. Jaatian pari jihuexayahnahue hih ta jaa janishi qui.

²⁷ Noquen Papa Dios benahahbo ta jascanishi qui. Mehebonaquin meraxon hahcajaquin merahahbo ta jascanishi qui, noque hochoma jan hihqui bi.

²⁸ Jaan ta noque yora jihuemahiqui. Hahan jatihibijati coshi hinanxon ta hahan jihuetai shinan rihbi noque hinaniqui. Caibo maton quirica huishanacabaan rihbi ta jascajaquin huishanishi qui: Noque tah non jahuen chini baquebo qui, hihqui.

²⁹ Papan chini baquebo hihxon tah non noquen Papa Dios oro quescapa hihqui shinantimahi. Yami pehnene quescapahma, macan quescapahma, jonibaan mequeman sirijaquin hahcái quescapahma, jonin shinanai quescapahma ta jaa qui.

³⁰ Honanmabo jai bi ta Papan jato tenepahonishi qui. Jato tenenixon bi ta rahma jatihibi jonibo sca jatihibi janin jaan yohiscáiqui shinan pontehahbo hihxon.

³¹ Jahuen hahan casticanti nete janoxahnon ta yohiscanishi qui. Jahuen hahan casticanicah ta jaribiscáiqui, Mia tah min jonibo pontejaquin casticannicah qui hah cahen jaa janish. Jahuen casticannicah tsoa quin non honannon ta hihquipi que bi jaa hahquiri-hbi teehihmanishi qui —jato jaquin Pablonen.

³² Hihquipi bi hahquiri-hbi teehihmahí yohihi nincacax bitsa bitsacani.

—Huetsa tian min noque yohirihbinon tah non nincayaxihqui —hihqui caibo rihbi.

³³ Jascahiya jato janinhax Pablo picoscá.

³⁴ Caibaan rihbi nincacoinax Pablo manahi bocani. Huesti cahen Dionisio Areopagito, huetsa cahen haibo, Dámaris janeya. Caibobo rihbi jato betan cahi.

18*Corinto janin Pablo nocotai*

¹ Jaa pecaho ta Atenas janinhax picotax Corinto jema janin Pablo canishqui.

² Jano ta huesti judio meranishqui, Aquila janeya. Jaa ta Ponto mai janinha joni hihpahonishqui, jahuen haibo betan Italia janinhax jahuem nocotipi. Claudio quiquin hapo hihxon Roma jema janinhax jatihibi judiobo picoti jaan yohihiya janohax Aquila jahuipi. Jato jisi sca Pablo cahi.

³ Jaa Aquila cahen chopas xobojanicah. Pablo rihbi ta jascajanica janishqui. Hahbe chopas xobojanicah honanax jaton xoboho jihueta Pablo teescas.

⁴ Tantiti netebo nocoscaya judiobaan tsinquit xoboho caxon jato betan yohinanxon judiobo, jaton nahuabo rihbi Papan joi nincamaquin.

⁵ Macedonia janinhax Silas betan Timoteo nocoscaya Papan joi yohihi sca jihueta. Jesus ta Papan caisai joni qui hihxon judiobo honanmaquin.

⁶ Honanmaha bi nincacatsihyamacani. Pablo qui tiromahi yohuancani. Jascaraiton jahuen chopas peren perenhahxon jato yohiquin:

—Nincacatsihyamahaz tah man hohchaya mahuatih. Min tah min noque honanmaya-manqui hah tah man hea jatimasca. Nahuabo sca tah hen yohitih —jato jaquin.

⁷ Jato jascabajahini cahax jaa tsinquit xobo patax jihuetai jonin xoboho mapescas. Jaa joni ta Justo janeya janishqui judiociatsihqui joni.

⁸ Jaton tsinquit xobo coirannicaonton ta noquen Hihbo nincacoinnishqui, Jahuen Jane cahen Crisp. Jahuen xoboho jihuetaibaan rihbi nincacoinquin jatihixonbi. Hihi caibos rihbi corinto jonibaan Papan joi nincaxon nincacoincanquin. Nincacoinaiton jato nashimacanquin.

⁹ Yame namaquen sca noquen Hihbo yohuanai Pablonen nincacanquin:

—Raquexonma yohireshue. Neteyamahue.

¹⁰ Mia tah hen manahi cahi, tsoanbi mia tiromajaquin jahuejayamanon. Nea jema janin tah hen hicha joni jai —hihqui.

¹¹ Huesti bari seis hoxne rihbi ta jano jihuenehqui jato tocan jihuexon Papan joi honanmaquin.

¹² Acaya main Galion sca gobernador hihquiya judiobo rahsi tsinquiscasi. Tsinquixon jatihixonbi Pablo bihti shinancanquin. Bihxon jaton hapo janin hiocanquin.

¹³ —Noquen xenibaan yohini quescajayamaquin bi ta huetsajaquin Diosohon shinanahbo hihxon neatohon janiboh yohihqui —hahcanquin.

¹⁴ Pablo sca yohuancatsihscasi bi judiobo Galionen yohiquin:

—Huetsa joni jan tiromajahiya tah hen jaa copi mato nincaquehanai, judiobon. Jan tiromahiyah tah hen nincaquehanai.

¹⁵ Man yohuanresai joi tah hen nincacatsihyamahi. Janebo, maton xenibaan joibo, jascapa joibo copi man yohinanai tah hen nincacatsihyamahi. Botannahue. Bexonahue, matobi. Jascapa joi copi tah hen tsoabi pontecatsihyamahi.

¹⁶ Jascajaxon jahuen ponteti xobo janinxon jato cainmaquin.

¹⁷ Cainmaha jaton tsinquit xobo coirannica bihcanquin, Sóstenes janeya. Bihxon hapon ponteti xobo xehqui ponte nihxon rishqui rishquicanquin. Jascajahibaan bi Galion jahua hiyamahi, jisresquin.

Antioquia janin nocotax caribili

¹⁸ Basi tahni jano jihuetahbax, Hen ta hen caresscasi noquen huetsabon, hah jato jaax Pablo caresscasi. Hen yohihipi quescabija tah hen jai hihxon honanahbo hihxon Cencrea jema janinxon sca jahuen boo maxcorohamabahinquin. Siria main caman nontin pohquejaquenoxon janohax nanecani. Priscila betan Aquila rihbi cahi hahbetan.

¹⁹ Efeso jeman pari taxnatax jato potabahini cahi, judiobaan tsinquit xoboho mapet. Janoxon judiobo yohuanquihquin.

²⁰ Basi pari banetahhue hahcabo bi Pablo queenyamahi.

²¹ —Hen tah hen caresscasi. Noquen Papa queenaiya tah hen joribitihi —jato jaquin.

Nanerihbixon Efeso jema potabahinquin.

²² Cesarea jema janin sca mapetax Jerusalen janinha noquen huetsabon pasijatan joress-caax Antioquia jema janin cahpaquehcahini cahi.

²³ Jano ta jihuenehqui basima tahni. Janohax sca cahax Galacia mai nabebacahini cahax Frigia mai rihbi nabebacahini cahi. Noquen huetsabon shinan coshijabonahi cahi.

Efeso jema janin Apolos yohuanai

²⁴ Huesti Apolos janeya judio ta Efeso janin noconishqui Alejandría janinha joni. Joi yohinica. Papan huishani joi honanquin sirijahi.

²⁵ Criston joi honanmahabo hihti yohicatsihxon jaan jato yohiquin. Jesus joi jato yohiquin sirijaquin jaamama. Hihcax bi jatihibi honanyamaquin. Juaman nashimati joi honanxon Criston janen nashimati joi honanyamaquin.

²⁶ Raquetaxma ta jaton tsinquitit xoboho yohuanishqui. Jan yohanai nincaxon jaton xoboho boxon Priscila betan Aquilanen hashoan sirijaquin Papan joi honanmaquin.

²⁷ Acaya main jaa cacatsihquiton, Catanhue, hahxon noquen huetsabaan quirica huishaquin, jaya cahiton Criston jonibaan sirijaquin bihnnon hihxon. Cahi nocoxon nincacoinaibo hicha shinan hinanquin.

²⁸ Papan huishani joi jismaxon ta Cristo ta Papan caisai joni qui hihxon judiobo yohinishqui. Jatihixonbi nincacahbo hihquish ta janibi nichish yohuanishqui. Sirijaquin jato yohihiya ta nincacoinaibaan shinan bhnishqui.

19

Efeso jema qui Pablo nocotai

¹ Corinto janin Apolos jaiya manan cahpoquetax Efeso janin sca Pablo cahpaqueti. Jano Papan jonibо huestibo meraquin.

² –¿Nincacoinxon man Dios Yoshin bihyamahn? —jato jaquin.

—Dios Yoshin joi tah non honanyamaparihi —hihcanci.

³ –¿Tsoan janen mato nashimacannishquin? —jato jaquin.

—Juaman nashimapahoni quescajaquin rahan —hihcanci.

⁴ —Jaa hahchon jahui joni nincacoinahbo hihxon yohixon ta Juaman nashimapahonishqui shinan pontehiton. Jaa hahchon Joni joni ta Jesus qui —jato jaquin.

⁵ Jaa honanscaxon cahen noquen Hihbo Jesusen janen sca jato nashimanon yohicanquin.

⁶ Pablonen jato mehehiya Dios Yoshin jato qui nocohihnat jahui. Jaa bichish huetsapahi yohuancani. Papan honanmaha yohuanscancani.

⁷ Doce joni rah ta jaabo janishqui.

⁸ Judiobaan tsinquitit xoboho mapetax sca tsoanbi chihtehahma Pablo yohuani. Quimisha hoxne jato betan yohinani, Papan jihuemayaxihqui joi yohinani. Yohuanqui-hnannani.

⁹ Jaatian ta nincayosma jointi chahomayahpabo noquen Hihbaan joi qui tiromahi yohuanscanishqui, janibi sca hichaxon nincacahbo. Jaa copi ta janohax Pablo picoscaxon Criston jonibо hioxon jatihibi neten Tiranno escuela xobohoxon jato yohinishqui.

¹⁰ Janoxon ta rabe bari haxemanishqui. Jaan jato haxemahiya jatihibi Asia janin jihue-taibaan noquen Hihbaan siri joi nincacuin. Judiobo betan judiomabaan nincacanquin.

¹¹ Pablo ta noquen Papan hahan hihti rahtetibo hahmanishqui.

¹² Payon bixhon, jaa hihyamahiya chopas pishca bixhon jayaxon Pablo mehexon ta jaton hisinabo sca hahan rahoncannishqui. Rahona jaton hisinbo picoti, jaton tiroma yoshinbo rihbi picoti.

¹³ Nihresai judio yobebo sca nocoti jahui. Nocoxon tiroma yoshinyahpabo meraxon noquen Hihbo Jesusen janen jaton yoshinbo yohicanquin picotahbo hihxon:

—Hoa Pablonen yohihi Jesusen janen tah non mia yohihi —hahcanquin.

¹⁴ Jaton papa ta Esceva janeya janishqui, judiobaan quiquin sacerdote. Jahuen baque-baan siete hihxon jascajaquin.

¹⁵ Jascajaquin yohihiton tiroma yoshiman jato joi bichinquin:

—Jesus tah hen honanai. Pablo rihbi tah hen honanai. ¿Mato man tsoabo quin? —hahquin.

¹⁶ Jato jascajaxon jaa yoshinyahpa jonin jato qui cayatan cayatanxon jato bahchinguin. Jato jatihibi taponbi potaquin. Jaan huekahch chopanma tsehue tsehuey sca jaa xobo janinhax jabascacani.

¹⁷ Efeso jema janin jihuetai judiobaan ta jaa joi nincanishqui jatihixonbi. Judiomabaan rihbi jatihixonbi nincacuin. Nincacax ta hihti raquescacannishqui. Noquen Hihbo Jesus hihti coshi honancanquin.

¹⁸ Nincacoinaibo hicha joxon tiromajaquin hahpahoniboxon jaton hohcha yohipaque-canquin, jascaja jenebahinnoxon.

¹⁹ Hicha yobe hihpahonibaan rihbi jaton yobepan quirica bexon jatihixonbi jisnon hihxon janibixon jaton quirica mapojacanquin. Jaabaan mapojahi quirica topolah ta cien mil soro copinshqui.

²⁰ Jaatian ta noquen Hihbaan joi hashoan sca caícananishqui. Huetsa joi potaxon jaa sca bihcanquin.

²¹ Jaa pecabo cahen Jerusalen jema janin cati sca Pablonen shinannish. Macedonia mai nabebacahini cahax Acaya mai rihbi nabebacahini cahax Jerusalen jema janin nocoti shinanquin. Janohax tah hen Roma jema janin catihi hihqui.

²² Jaatian Macedonia janin bebotanon hihxon jahuen yanapannica rabe raanquin Timoteo betan Erasto. Jato raanax Asia main jihuetahbibi.

Efesobo coro corotai

²³ Jato raanipi pecaho ta noquen Hihbaan joi copi rainyamahax hihti caibo corocahinchirrani nocohihncannishqui.

²⁴ Demetrio janeya joni ta jano janishqui, yami charajahi teenica. Jaton santo Diana xobojaxonnica. Jascajaquin ta jahuen hahbe santo xobojanicahbo hicha jato cananmanishqui.

²⁵ Jato quenamaxon jascapahbo hahnicahbo rihbi quenamaxon ta jato yohnishqui:

—Nescapahbojaquin tah non coriqui cananai. Man tah man honanquin sirijahi.

²⁶ Hihti caibo yohixon ta Pablones jato honanmahiqui jaa sca chibanaahbo. Efeso janin res ma bi ta jathibibi janin jato jascajaquin yohihiqui. Casi jathibibi Asia mai mehabo ta jato nincamascaiqui. Jaa tah man jisxon nincarihbibi. Jonin mequeman hahcaibo ta diosmabo qui hih ta jaiqui.

²⁷ Jan jascajaquin noquen tee tiromajamis hihxon tah hen mato yohirihbihi. Jascajaquin yohihah ta noquen dios xobo caibaan jahuama shinanscatihiqui, noquen hihti siri haibo dios Diana xobo. Jaa rihbi ta jahuama shinantihcanihqui. Asia mai janin jihuetaibaan jathixonbi hahan shinanai que bi ta jahuama sca jathiqui —jato jaquin. Jathibibi mai janin jihuetaibaan hahan shinanai que bi jahuama sca.

²⁸ Jan yohuanai nincacax hihti rainyamahax sai saihhcanci.

—Noque Efeso janin jihuetaibaan Diana ta hihti shinanya qui —hihcanci.

²⁹ Jaa jema bahibo janin jathibibi coro cororescani. Jahua nincatimascai. Pablon companihro rabe sca bihxon ninibonahi bocani. Janoxon yohuanaibo nincati mai xanqueman sca bishquihicanahi bocani. Pablon companihro cahen Gayo, huetsa cahen Aristarco, Macedonia janinha rabe.

³⁰ Pablo rihbi jano hihquicatsihqui bi ta caibaan Criston jonibaan huinómayamanishqui.

³¹ Caibo patorobo rihbi Pablon amicobo hihxon joi raanquin, jan jaton jaho tsinquitai mai xanqueman cayamanon hihxon, rehtecanmis hihxon.

³² Corotaibo Pablo qui chanicatsihquish caibo huetsa yohuanya janon caibo rihbi huetsa yohuanya sai saihhcanci. Coro coroquin nincatimajacanquin. Jahuejahi non tsinquitain hihxon hichaxon honanyamarihbicanquin.

³³ Mia sca yohuani cahue hihxon judiobaan pehueraanbonaha janohax yohuantia janin Alejandro mapeti. Jonibo nincamacatsihquin jahuen mequen sanaquin.

³⁴ Jahuuen mequen sanahihnihiya hihti sai saihhescacani. Judio tah qui hihquish sai saihhresscacani, jaa yohuanai nincacatsihyamahax. Rabe horabo jano coro corocani.

—Noque Efeso janin jihuetaibaan haibo dios Diana ta hihti shinanya qui —hihcanci coshin.

³⁵ Corotaibo tantimascaax jaton tiniti yohuanai:

—Efeso janinhahbaan, noque Efeso janin jihuetaibaan tah non noquen hihti shinanya Diana xobo coiranxonai. Naihoh quehax paqueni jahuen santo rihbi tah non coiranxonai. Non jascajahi ta jathixonbi honancaniqui.

³⁶ Jascama ta qui, hih ta tsoabi jatimahiqui. Jaa copi tah man tantitihi. Sirijaquin shinanyamaxon jahuabi jahuejayamanahue.

³⁷ Jaabaan maton dios xobo jahua tiromajahi que ma bi tah man nea rabe joni neno hihuehahqui. Maton dios qui rihbi tiromahai yohuanai que ma bi.

³⁸ Demandanaibo nincati netebo ta jaiqui. Noquen gobernadorbo rihbi ta neno jaresscacioui. Nea jonibo qui chanicatsihxon jahuen hahbe teenica betan Demetriionen jato demandantannon.

³⁹ Huetsa joi rihbi nincamacatsihxon janoxon jascajati jai janinxon hahtannahue.

⁴⁰ Man rahma coro corotai joi nincacax, noque rah ta potacatsihcanihqui romano hapobo jamis. Jaa copi tah hen mato yohihi. Jahua copi man coro corocanahi tsinquitain hahcah tah non jahua yohiti yamahi —jato jaquin jaton tinintinin.

⁴¹ Jato jascajaha jaton xoboho boresscacani.

¹ Coroyama sca jaiboya Criston jonibo quenamaxon nincacoinquin jeneyamaxahnnon hihxon jato yohihax, Hen tah hen caresscrai, hihquish Macedonia mai janin cahi Pablo caresscrai.

² Macedonia maibo nabebacahini caquin jano jai noquen huetsabo hicha yohiquin. Jato yohibonahi cahi Grecia main nocoti.

³ Jano sca quimisha hoxne hihqui. Siria main caman pohquenoxon nontin nanepanan ta jano sca jaa cacatsihqui honansaxon judiobaan jaa bihti shinannishqui. Bihcatsihquibo nincaribbihax Macedonia main caribihax janohax sca cati Pablonen shinanscaquin.

⁴ Hahbetan ta caibo rihbi canishqui. Huetsa cahlen Sópater, Pirron baque, Berea janinhah. Huetsa cahlen tesalónicabo rabe, Aristarco betan Segundo. Huetsa cahlen Gayo, Derbe jema janinhah. Huetsa cahlen Timoteo. Huetsa cahlen Asia mai meha rabe, Tíquico betan Trófimo.

⁵ Jaabo rahsi bebotanax Troas jema janin noque manati bocani.

⁶ Chahoma paan fiesta huinotipish Filipos jema janinhax noque cahi. Pichca nete nihxon Troas janin jato merahax jano sca siete neten rihbi noque baneti.

Troas qui Pablo nocotai

⁷ Hahan semana pehocohtai neten sca pih noque tsinquit. Bahquish sca cayanoxon jato betan Pablo yohuan yohuani. Yame pochinicon caman jaa yohuani.

⁸ Jano noque tsinquitai chiqueho cahlen hicha ramparin xabati.

⁹ Jano ta xehqui pishca janin huesti berongan tsahonishqui Eutico janeya. Pablo basi yohuan yohuanaiya ta hoxa teneyamascaax paquenishqui. Jaton quimisha tapoyahpa xobohoh quehax paqueti bochiquihax. Mahauscai bihtancanquin.

¹⁰ Hahqui botopaquescaxon Pablonen jaa racatai hicobahinquin.

—Masa shinanyamanahue. Jihue ta jaiqui —noque jaquin.

¹¹ Jaatian sca maperihbixon posen tehcaxon pihx, xaba paquenon caman yohuanrih-hax, caresscrai.

¹² Jaa berongan mohitahpa mapemahiya ta sirijaquin sca shinancannishqui.

Troas jenebahini Mileto jema qui nocotai

¹³ Ason jema caman Pablo main cacatsihquiya tah non nontin bebohi caniqui. Cahax Ason jema janin Pablo bichi taxnati.

¹⁴ Jano noque merahi jorescaya tah non nanemahax Mitilene jema caman noconihqui.

¹⁵ Jano hoxashinahax mohiyahtax tah non caribiniqui. Cahi Quío mai pishca qui nocoti. Janohax caxon hian naponbi racatai mai pishca huinobahinquin, Samos janeya mai pishca. Janohax jahuen quimisha neten sca Mileto jema janin nocotax taxnati.

¹⁶ Janin Pentecostes fiesta noconon hihquish ta Jerusalen janin Pablo histon nococatsi-nishqui hahtipahax. Jaa copi ta Asia mai janin basiyamanoxon Efeso jema huinoresti shinannishqui.

Efeso pastorobo Pablonen yohihi

¹⁷ Mileto janixon sca Efeso janinha pastorobo jaan quenamaquin.

¹⁸ Nocotaiton jato yohiquin:

—¿Asia main noconish jenquetsi hen mato tocan jihuenehqui? Man tah man honanquin sirijahi.

¹⁹ Jahuabi hapo quescaxonma tah hen noquen Hihbo teexonniqui. Heen caibaan hea tiromajacatsihquin tana tanahah tah hen masa shinani jihuenehqui.

²⁰ Mato sirjanoxon tah hen jahuabi mato yohiquin pishinmayamaniqui. Tsinquitaiton yohixon tah hen heen xobohoxon rihbi yohixon mato honanmaniqui.

²¹ Papan joi nincaxon shinan pontexon noquen Hihbo Jesucristo sca nincacoinnon hihxon tah hen heen caibo yohixon heen nauhabo rihbi yohicoinnihqui.

²² Dios Yoshiman hiohah sca tah hen Jerusalen janin cahi. ¿Janoxon hea jahuejati-caniqui? Hen tah hen honanyamahi.

²³ Jatihibi jema janin ta Dios Yoshiman hea yohihiqui. Cadenanen nexaxon ta mia hihti tiromajayaxihcanihqui, hah ta hea jaiqui.

²⁴ Jaabi hea rehtecanmis hih ta hea jayamahi. Noquen Hihbo Jesusen hea yohini quescabijaquin Papan jatohon shinanai joi siri yohiti res tah hen queenai. Papan hea yohihi cahue hahca tah hen cahi, jano hea raanaiton.

²⁵ Mato tocan caquin tah hen Papan mato jihuemahi joi mato yohiniqui. Hea tah man jisyamascatih. Hen tah hen honanai.

²⁶ Jaa copi tah hen mato rahma yohihi. Maton hohchayabi muhauatax tah man Joi siri Pablonen yohiyamahah bi tah non muhauatai, hih man tsoabi jatimahi.

²⁷ Papan noque yohihi jatihibi tah hen mato sirijaquin yohiniqui.

²⁸ Coiramenahue. Criston jonibo rihbi coirannahue. Jaabo man coirannon hihxon ta Dios Yoshiman mato pastorobomanishqui. Carnero pimaquin hahcajaquin man Papan caisaibo shinan hinanon hihxon ta mato jaa tee hinannishqui. Jahuen jimi potaquin ta Criston jahuen caisaibo bijnishqui jahuen carnerobo.

²⁹ Hea careessaho pecaho ta mato tocan tiroma jonibo nocoyaxihquiqui carnerobo reteresai hinobaan hahcajaquin.

³⁰ Hea chibannahue Criston jonibon hihnicah rihbi ta mato quihabo caibo jayaxi-hquiqui.

³¹ Jaa copi coirannahue. Quimisha bari tah hen matohon hihti shinanxon yame, bariyahpan rihbi hen mato yohipaquehi tantiyamanihqui. Jaa shinannahue.

³² Jato coiranhue Hihbon, hahbahini tah hen cahi. Jahuen joi bihquin jeneyamanahue, hahan tah man jihuethihi, matohon shinanxon hinanai jahuen joi. Jaan ta mato shinan hinanxon jatihibi jahuen baquebo tocan mato jahuen jihue hihbobo sca jaan mato hihmati hahtipahiqui.

³³ Maton oro, maton coriqui, maton chopas tah hen jahuentianbi mato bichincatsihya-manihqui.

³⁴ Heen mequeman teexon tah hen hen pishinaibo bijniqui. Heen hahberabetibaana rihbi tah hen bihxonnihqui. Man tah man honanai.

³⁵ Hea hihqui quescaribhi man janon hihquish tah hen jihuenihqui. Jascajaquin teexon noquen Hihbo Jesusen joi shinanxon yomanahquetaibo yanapanti tah hen mato hexemaniqui. Hinanti ta bihti mentan hashoan siri qui, hah cahen noquen Hihbaan janish-jato jaquin.

³⁶ Jatihibixonbi sca raboxonen nihxon Papa yocacanquin.

³⁷ Huaohihscacani jatihibi. Pablo mehuetanax hicotanax huaohihcanci.

³⁸ Jan jato yohihah nincacax jaa jisyamascatihni nincacax bena benatax nontin caman jaa manahi bocani.

21

Jerusalen janin Pablo cahi

¹ Jaatian tah non nanetax jato potabahini caniqui. Cos mai janin caman tah non ponte caniqui. Jano hoxashinahax mohiyahtax cahax Rodas mai janin sca nocoti. Janohax Pátara jema janin taxnati cahi.

² Fenicia mai janin pohquejaqueti cahi, nonti jano merahax hahan sca nanetax quebijistima hiaman caribih.

³ Caquin tah non noque memiho Chipre mai jisniqui. Jaa potabahinax Siria mai janin cahax Tiro jeman taxnatax mapeti. Jahuen jahuaborabo nonti hihbaan jano mapemahi cahiya tah non jano mapenihqui.

⁴ Tiro janin tah non Criston baquebo meranhqui. Jato betan tah non siete neten banetahnihqui. Dios Yoshiman shinanmaha Pablo yohicanquin, Jerusalen janin cayamahue hahxon.

⁵ Jahuentihi ra neten jano hihquish tah non caribiniqui. Jema jemanhihti janin ta jaabo jaton haibobo jaton baquebo noque manahi canishqui. Jemanhihtin sca tah non raboxonen nihxon Papa yocanihqui.

⁶ Papa yocacax nontin noque naneti, jaabo xobon boribihahbo.

⁷ Tiro potabahinax Tolemaida jeman taxnatax noque mapeti, main sca canoxon. Jano noquen huetsabo jisi caxon huesti neten rihbi jato pasijaquin.

⁸ Hoxashinahax mohiyahtax caribihax Cesarea jeman nocotax Felipen xoboho mapeti. Felipe ta Papan joi siri nincamanicah hiphahonishqui hoa siete caisnibo quihah. Jahuen xoboho tah non banejaquenihqui.

⁹ Jaa ta chosco haibo baqueyahpa janishqui bebo honanyamahibo rahsi. Papan shinan-maha ta jaabo yohuanpahonishqui.

¹⁰ Jahuentihi ra neten non jano jaiya Judea mai janinhax Agabo janeya joni nocoti, Papan shinanmaha yohuannica.

¹¹ Nocoxon Pablón sintoron bichinax jahan sca tanexehtax menexehtax yohuanscái:

—Dios Yoshiman ta yohihiqui: Nescajaquin ta Jerusalen janinha judiobaan nea sintoron hihbo nexayaxihcаниhqui. Nexaxon ta nahuabo sca jaa hinanyaxihcаниhqui —hahqui.

¹² Jan yohuanai nincaxon tah non Jerusalen janin jaa cayamascanon hihxon Pablo noquen yohiniqui. Janohahbaan jascajaribiquin.

¹³ Jascajahabaan bi Pablones yohiquin:

—Jahuejanoxon man huaohihxon hea masa shinanmacatsihquin? Hea noquen Hihbo Jesusen joni copi hea nexayaxihquibo bi tah hen cati shinanai. Jerusalen janin hea rehteyaxihquiaan bi tah hen cati shinanai —hahquin.

¹⁴ Banemati hahtipahyamahax noque netescai.

—Noquen Hihbo queenai quescarí janon —hihquish.

¹⁵ Jaa pecaho sca non pishinaibo bichish Jerusalen janin noque cahi.

¹⁶ Cesarea janinha noquen huetsabo caibo noque betan caxon Mnasoman xoboho noque hiocanquin. Mnasom ta Chipre janinha joni qui, Criston joni xeni. Jaan ta noque jahuen xoboho hoxamanishqui.

Jacobo jisi Pablo cahi

¹⁷ Jerusalen janin noco sca non jaiya jenimahanan noquen huetsabaan noque bihquin.

¹⁸ Hoxashinahax mohiyahtax sca noque betan Pablo cahi, Jacobo jisi. Jano ta jatihibi jaton pastorobo tsinquinishqui.

¹⁹ Man jascabi jayamahn hahxon jaton nahuabo tocan Papan hahan honanti jaa hahmatanho jato yohipaquequin.

²⁰ Jan chanishi nincaxon:

—Papan ta hahquipui —hahxon yohicanquin:

—Noquen caibo nincacoinaibo ta jahuentihi ra mil jaresscapiro. Jatihixonbi ta Moisesnin joi chibancaniqui. Min tah min honanscapiro.

²¹ Mian roqui min hochó jabisnihbo noquen caibo mian honanmahi Moisesnin joi jenebahinno. Jaton baquebo honantijayamati roqui mian jato yohihi. Moisesnin yohini quescayamascribihbi jiuhuenon roqui mian jato yohihi. Jascaraibo ta nincacaniqui.

²² ¿Jahueja sca min jatihi? Min nocotai ta honannoxihcanihqui.

²³ Jaa copi non mia yohihi quescabijahue. Neno ta chosco beronan jaiqui, Hen yohihi quescabijaquin tah hen jatihi hihquipiboo yohuani.

²⁴ Jato hiohax jato betan nashitanxon jaton mapo maxcorohabahinno copijaxonhue. Min jascajahi jisxon ta jaabaan nincacai jahuama hihqui honannoxihcanihqui. Man Moisesnin joi chibancaniqui ta honannoxihcanihqui.

²⁵ Santo rehtexona nami nincacoinai judiomabaan piyamanon hihxon jimi rihbi piyamanon hihxon terehahxon retehhibo rihbi piyamanon hihxon joni huetsa betan tsiniaman hihxon tah non jato moa huishaxon yohiniqui. Jaa ta honanscancaniqui —hihqui Jacobo.

Papan xobohoxon Pablo bichibo

²⁶ Jascaha jaa beronanbo hiohax huetsa neten sca jato betan nashihax Papan xoboho Pablo mapeti. Mapexon:

—Jatihi neten hihquish tah non mequejaqueti queyoscathi. ¿Jahua neten non jatihibichina noquen hinanti non betihin hinannoxon? —hihqui Pablo, hapo yocacahti.

²⁷ Jahu en siete nete nocoti pishca pishinaiya Asia janinhax judiobo nococani. Papan xoboho Pablo meraxon jonibo coro coromaxon Pablo bihcanquin.

²⁸ Coshin sca quenacanquin:

—Noque yanapannahue, noque caibon. Nea ta jatihibi janin nihxon noque qui tiromahi yohuanai joni qui. Nea ta Moisesnin joi qui yohuaniqui. Nea xobo qui tiromahi yohuanrihbihi. Jascajahax ta Pishin pari ta jaiqui hihquish, Papan xoboho nahuabo rihbi mapemaxon nea mequejonti xobo rishtajahiqui —hahcanquin.

²⁹ Efeso janinha joni betan Pablo jaton jema janin nichí jisipixon Papan xoboho Pabloneen jaa mapemahi shinancanquin. Trófimo cahen jaa joni.

³⁰ Jascajahiboya jema jatihibi cobinai quescapi jonibo rainyamahax bishqui bishquihihcanax Papan xoboho nocohihnat. Pablo bihxon jemanhihi janin ninixon xehpotiboo xehpobahancanquin.

³¹ Jaa retehhiba bi ta sontaro hapo qui cahax caibo chaninishqui, Jerusalen janin ta jatihibi coro corocaniqui, hihqui.

³² Sontarobo quenamaxon jaton capitano rihbi histon quenamaxon jato betan jema janin hishtocahinquihrani sontaro tininti jahui. Jaton hapo betan sontarobo jahui honanxon Pablo rishquiquin jenebahinscancanquin.

³³ Nocoxon Pablo bihxon cahen rabe cadenanen nexahahbo hihxon sontaro hapon jato yohiquin. Jascajaxon sca:

—¿Tsoa min quin? ¿Jahuejahi meraxon mia jascajacaniqui? —hahquin.

³⁴ Corotaibo cahen mesco yohuanyahpabo. Coro corotaiboya jahuabi honanquin siri-jati hahtipahyamaxon sontarobo sca yohiquin: Xoboho hiotannahue —jato jaquin jaton hapon.

³⁵ Rehtenahue hihqui coro corocanahibo sina sinataiya tapiti qui Pablo nocotaiboon sontarobaan jaa hiascancanquin.

³⁶ —Rehtenahue —coshin hihcanacani coro corotaibo.

Pablonen jato yohicoainai

³⁷ Sontarobaan xobo xehqui qui nocoscaxon sontaro hapo Pablonen yohiquin:

—¿Hen mia pishca yohinon min hea nincarohatimahin? —hahquin.

—¿Griego join min yohuanain?

³⁸ ¿Mia min hoa Egipto mai meha jonomah quin? ¿Hapobo potanon hihxon jato sinamaxon cuatro mil rehtemisbo nihi naman sca hiohipi, mia min jaamah quin? —hahquin yocauin sontaro hapon.

³⁹ Jascajaha Pablonen yohiquin:

—Hea ta Tarso janinha judio qui. Cilicia main hani jema janinhah. Nea jonibo hea yohimarahahue —hahquin.

⁴⁰ Jan jeenihquiya tapitinin mapexon jato qui jahuen mequen Pablonen sanaquin. Netecahinscacani. Jaton joinbi sca Pablo yohuani, judiobaan join sca.

22

¹ —Hea huetsabaan, heen papabaan, hea tsoa quin hen mato rahma yohinon nincanahue —jato jaquin.

² Jaton joinbi jan yohuanai nincacax hashoan sca netecani. Pablo yohuanparihi:

³ —Hea ta judio qui, Cilicia mai Tarso janinhax cainni joni. Nea jema janinxon ta maton haxemanicahbaan hea haxemapahonishqui. Gamaliel ta heen haxemanica hihxon hea haxemaquin sirijanishqui. Noquen xenibaan yohini quescabijaquin hen hahnon ta hea haxemanishqui. Man hihqui quescaribhi tah hen noquen Papan joi hihti jenipahichai.

⁴ Hean rahma nincacoinai joi nincacoinaibo tah hen rehtenoxon caman jato chibapanhonihqui. Cadenanen nexaxon tah hen haiboya bebo jato sipojapahoniqui.

⁵ Hen jascajapahoni ta sacerdoteaan hapon, jatihibi noquen hani hapobaan rihbi mato yohitihiqui. Jaabaan ta hea jayaxon jato bihti quirica hinannishqui, Damasco janinha noquen huetsabo hen hinantannon hihxon. Jaya caxon janu jaibo cadenanen nexaxon casticannoxxon sca neno Jerusalen janin jato hihuehi tah hen caniqui.

*Noquen Hihbo qui tah hinamehniqui hihqui Pablo
(Ha 9.1-19; 26.12-18)*

⁶ Barin manan tsacahiya ta Damasco hochoma bahin cahiton naihohxon sca hani xabapan hea xabajanishqui.

⁷ Main paquexon sca hea yohihi joi hean nincquin: Saulon, Saulon, ¿jahua copi min hea tiromajaquin chibana? hea jaquin.

⁸ ¿Tsoa min quin, Hihbon? —hahquin hean. Hea ta Jesus Nazareno qui, min hea tiromajaquin chibana, hea jaquin.

⁹ Hehbetan cahibaan ta jaa xaba jisxon bi hehbetan yohuanai joi nincayamanishqui.

¹⁰ Hean hen jahuejati Jain Hihbon, hean jaah ta Huenihue. Damasco janin catanhue. Jano ta mian hea hahxonti jai mia yohinoxihcanihqui hah ta hea noquen Hihbaan janishqui.

¹¹ Hoa xabapan bechaxah tah hen jisti hahtipahyamascaax hehbe cahibaan mehue-tanxon hiohah sca Damasco jema janin noconihqui.

¹² Jano ta Ananías janeya joni janishqui, Moisesnin joi nincanica. Jano jihuetai judiobaan ta jatihibonbi jahan shinannishqui.

¹³ Hea janin nocoxon ta hea pataxxon sca, Heen huetsa Saulon, jise, hea janishqui. Jaatianbi tah hen jisresscaxon jaa meranilihqui.

¹⁴ Noquen papabaan Papa Diosen ta mia caisihqui, mian jaa hahxonti jan shinanai min honannon hihxon. Jahuen nincanica baque min jisnon, jan yohuanai min nincarihbinon ta mia caisihqui.

¹⁵ Min jisibo, min nincacalbo rihbi tah min jatihibi jonibo yohiyaxihqui.

¹⁶ ¿Jahuejahi sca min basitihin? Mia nashimanon huenihue. Noquen Hihbo yocaxon miin hohcha sohuamascahue, hea jaquin.

Noquen nahuabo yohinon ta noquen Hihbaan hea raannishqui hih Pablo jai

¹⁷ Jerusalen janin nocorihbixon tah hen Papan xobohoxon Papa yocaxon namaquen hahcajaquin noquen Hihbo jisniqui.

¹⁸ Histon Jerusalen janinhax carihue. Hean hen jato hahxonai min jato yohihah ta nincayamaxihcanihqui, hea jaquin.

¹⁹ Hihbon, noquen tsinquit xoboboho hihcoxon mia nincacoinaibo meraxon hean sipojaxon jato rishqui rishquipahoni ta honancaniqui.

²⁰ Miin joi yohinica Esteban rehtehiboya rihbi tah hen janu rihbi nihxon jascajanahue hihxon jaa rehtehibaan chopas hean coiranxonnihqui, hahquin hean.

²¹ Catanhue, hocho tah hen mia raantihi nahuabo janin, hea noquen Hihbaan jaquin – hihqui Pablo.

Hapon Pablo bichi

²² Jano caman res nincacanquin. Jaton nahuabo yohihi Pablo catihi nincacax coshin sca sai saihilcani:

—Jascapa joni main yamaskanon rehtenahue. Jascapah ta jihuetaimahiqui – hihcani.

²³ Jaton chopas pecaxon mai poto rihbi bochiqui potahihncanquin.

²⁴ Jascabajibon jisxon Xoboho botannahue hapon jahuen sontarobo hahquin. Jahua copi jonibon hahqui jatiho sinatiquin hihxon sca rishqui rishquixon hisinjanon jato yohirih-biquin.

²⁵ Yohihah rishquinoxon nexacanquin. Jano jai capitana sca Pablone yocaquin:

—Jahuen hohcha honanxonma romano joni rishquiti joi man jain?

²⁶ Jan yocacai nincacax hapo janin caxon capitana yohiquin:

—Jahueja min jacatsihquin? Jaa ta romano joni qui – hahquin.

²⁷ Hahqui caxon sca hapon yocaquin:

—Mia min romano quin?

—Hea rahan – hahquin.

²⁸ —Hea tah hen hicha copijahax romanoscariqu – hahquin hapon.

—Hea tah hen romano cainnihqui – hahquin Pablone.

²⁹ Histon sca jaa hisinjacatsihquibo picoti bocani. Romano que bi jan cadenanen jaa nexahi copi hapo rihbi raquesca.

Judiobo hapobo bebon Pablo nich

³⁰ Jascabajibon huesti nete sca jahua hahqui yohuan jacoquin hihxon Pablo pecaxon sacerdotebaan hapobo, judiobaan hanibo jatihibi betan tsinquinon yohiquin. Jato qui hioxon sca jato bebonbi Pablo nichinquin.

23

¹ Tsinquitai hapobo jisanan Pablone jato yohiquin:

—Hea huetsabaan, shinanquin sirijahax, tiromahaxma jihuetaimahue tah hen rahma caman jascarai, Papan hea jisi honanax.

² Pablone jascabajahya jaa pataxaibaan Pablo copasnon sacerdotebaan hapon jato yohiquin.

³ —Papa Diosen ta miabi rishquiyaxihqui, maoxen sicaha chiquepan. Jascajatima Moisesn yohin que bi min hea jato copasmahin? Jascajauquin min hea Moisesn yohini quescajaquin min hea pontecatsihquin? – hahquin Pablone.

⁴ Jaa pataxaibaan sca:

—¿Papa Diosen sacerdote hapo min jascajauquin tiromajaquin yohihin? – hahcanquin.

⁵ —Sacerdotebaan hapo tah hen honanyamahahqui, hea huetsabaan. Maton hapo tah man tiromajaquin yohitima hah ta huishani joi jaiqui – hahquin Pablone.

⁶ Jaatian caibo fariseobo caibo rihbi saduceobo honanscaxon hapobaan nincacabho coshin sca yohuani:

—Hea ta fariseo qui, hea huetsabaan. Fariseobaan baque ta hea qui. Mahuanibon ta Papan hahquirihi teehihmayaxihqui qui hen jai copi ta hea casticancanihqui.

⁷ Jan jascaraiya fariseobo betan saduceobo join bahchinanscay. Jaa copi caibaan Pablo casticancatsihqui bi caibo queenyamascay.

⁸ Mahuanibon ta Papan teehihmaribitimahqui. Papan naihoh queha yonotibo ta yamahihqui, yoshin rihbi ta yamahihqui, hih saduceobo jai bi ta Hah ta jatihiqui, jaí rahan, jaí rahan, fariseobo jaiqui.

⁹ Join bahchinani corotaiboya fariseo huishani honanbo nihrenenxon hani join coshin jato yohiquin:

—Noquen jisi ta nea joni hohcha yamahihqui. Yoshiman jaa yohuanquihniya jaa hiyahamahiya Papan yonotinin jaa yohuanquihniya mato jahua hihtihin? – hahcanquin.

¹⁰ Hashoan sca rainyamacani. Nininanquin Pablo huaxabahincanmis hihxon, Jato bichinnahue hapon jahuen sontarobo jaquin. Mehuetani caxon bichinxon coshin ninibehnantanxon jaton xoboho sontarobaan Pablo boresscaquin.

¹¹ Jascabajibon huesti neten sca yame Pablo janin noquen Hihbo sanarenenxon:

—Raquyeamahue. Neno Jerusalen jema janinxon min hehqui jato yohicoinai quescajaribiquin tah min Roma jema janinxon jatihi – hahquin.

Pablo rehteti shinanaibo

¹² Xaba paquescaiy Pablo rehteti shinancanquin judiobaan.

—Non jaa rehtenoxon caman tah non pitimahi, xehatimarihbibi. Non jaa rehteyamahiya noque sca Papan rehtenon —hahcanquin.

¹³ Cuarenta joni hihxon jascajacaquin.

¹⁴ Jascajahax jano sacerdote hapobo betan jaton hanibo jaiton bocani. Nocoxon:

—Non yohihi quescabijaquin non hahyamahiya Papan noque rehtenon hihxon tah non yohihahqui, Pablo rehtenoxon caman tah non jahuabi piti nohuejatimahi.

¹⁵ Tsinquitai hapobo yocaxon sontaro hapo rihbi yocanahue jan neno mato janin jaa bexonnon. Pablo yohuanai man sirijaquin sca nincacatsihqui janahue. Janin noconon tah non rehtetih, non tah non manascai —hahcanquin.

¹⁶ Rehteti shinanaibo honanax Pablón pihasha pishca cahi sontarobaan xoboho caxon Pablo yohiquin.

¹⁷ Jaan sca capitan quenaquin. Jahuiton:

—Nea beronan miin hapo janin hioxonhue jan nincabehnanai jan yohitannon —hahquin.

¹⁸ Jaahuen hapo janin sca capitanen hioquin.

—Non bichipi Pablonen ta hea quenaxon nea beronan mihqui hihuexonnon hea yocacaxqui. Mia roqui nincamacatsihqui.

¹⁹ Jascajaha mehuetanxon hahmebi hiohax sca yocacahti:

—Jahua min hea yohicatsihquin?

²⁰ —Heen caibaan ta hashoan sirijaquin honancatsihquin hahcajaquin mia nescajaquin yocati shinanihqui. Non Pablo yocanon hapobo tsinquitai janin bahquish Pablo hioxonyaxahnhue hih ja acanihqui.

²¹ Jaabo hihcoinai shinanyamahue. Cuarenta hihxon hashoan hicharihbixon ta jaa rehtenoxon caman pitimahi, xehatimahi yohicaniqui, rehteyamahiboya jaabo sca Papan rehtenon hihxon. Rahma ta quexescacanihqui rehtecatsihquin. Min jeenhahnnon res ta manacaniqui —hahquin beronanen.

²² —Hea min jascajahi tsoabi yohiyamatahin min. Caresscatanhue —hahquin hapon.

Gobernador Félix janin sca Pablo raanaibo

²³ Rabe capitan sca quenaxon jato yohiquin:

—Doscientos sontaro tsinquinahue. Cabachonen nichibo rihbi setenta sontaro. Jashiyahpabo rihbi doscientos sontaro. Yame sca jaiya Cesarea jema janin caman Pablo botannon jato raannahue.

²⁴ Hahan Pablo rihbi cati cabacho bexonnahue, gobernador Félix janin caman sirijaquin hionoxon.

²⁵ Jato jascajaxon quirica sca nescajaquin huishaquin:

²⁶ Hea Claudio Lisias hihxon tah hen mia noquen gobernador Félix mihqui joi raanai.

¿Min jascabi jayamahin?

²⁷ Hen mihqui raanai joni judiobaan rehtepanan tah hen sontaroya nocoxon romano joni honanxon jato bichinipiqui.

²⁸ Jahua tiroma jaiquin hihxon hen jaton hapobo jano tsinquitaiton hiohipiqui.

²⁹ Jaton xenibaan joi jan nincayamarai copi res jaabaan sinajahi bi ta jahua copi rehteti yama qui. Jahua copi sipojati yamarihbibi tah hen honanscaipiqui.

³⁰ Jaa rehtenoxon caman piyamaxihqui bo jai chanihah tah hen histon res mihqui raanti shinanscaipiqui. Hahqui yohuanai rihbi tah hen yohihipiqui, hahqui yohuantí joi jaxon mia hihbaan yohuantanon, hahquin huishaquin.

³¹ Hapon yohiha quescabijaquin cahen Pablobihxon nihshinaxon Antípatris jema janin caman sontarobaan hioquin.

³² Bariyahpan sca cabachonen nichibo hahbetan catannon texe sontarobo jaton xobon caribibi.

³³ Hiotanxon Cesarea jema janin nocoxon cabachonen nichibaan janoha gobernador qui jaa quirica hinanquin. Hinanxon Pablo rihbi hahqui hihuecanquin.

³⁴ Jaa quirica jisxon jahuerahnaha mai meha mia quin hihxon Pablo yocascaquin. Cilicia mai meha rahau jan hihnon:

³⁵ —Min yohihi tah hen nincatihí mihqui yohuanai rihbi tah hen nocotaiya —hahxon Herodesnin quiquin hapo xobohoxon coiranahbo hihxon jahuen sontarobo yohiquin.

24

Felixnín quenamahá Pablo yohuanai

¹ Jan jano nocotipi pichca neten sca sacerdotebaan hapo Ananías nocoti jahui. Hahbetan rihbi caibo jaton hanibo. Yohuanxon yanapannicah rihbi Tértulo janeya. Jaa rahsi jahui. Pablo qui jaabo yohuantí jai joi jaton gobernador nincamacanquin.

² Pablo quenamaha noco sca jaiya hahqui yohuani Tértulo pari yohuani:

³ —Mia copi ta noquen caibo siripi jihuetaqui, Félix hapon. Mia tah min hihti siri qui. Mian yohihah ta pontejaquin sca shinanxon nea noquen caibo coirancaniqui. Jatihibi janinxon tah non jatihibijaquin, Min tah min noque hahxonai, hahcai, mia yohiquin.

⁴ Jaabi tah hen mia hashoan jatsanjacatsihyamaxon hen mia pishca yohicatsihqui. Siri joni hihxon min hahcai quescajaquin hea nincarohahue, hen mia yohinon.

⁵ Nea joni ta hisin pahe quescapah qui. Non tah non honanscái. Jatihibi main jihuetai noquen caibo ta jan rainyamamahi qui, noquen quiquin hapobo non potanon hihxon. Jaa ta nazareno joi chibanaibaan hapo qui.

⁶ Noquen Papa Diosen xobo rishtajahiton tah non jaa bichipiqui.

⁷ Noquen xenibaan yohini quescajaquin non jaa japanan ta sontaro hapo Lisias joxon coshin noque bichinipishqui. Mia hihbaan sca non demandani jonon ta noque yohihipishqui.

⁸ Queenax miabi jaa yocacahhue. Jascaxon tah min non mia yohihi joibo jaa yohuanmaribitihi —hihqui.

⁹ —Jascacoin tah qui —hihcani hahbetan jahui judiobo.

¹⁰ Jaa sca yohuannon gobernadornen mequen sanahiya Pablo yohuani:

—Hicha bari sca min noquen caibo pontehi honanxon tah hen sirijaquin shinanhahnan mia yohihi, jahuea hen Jain min honanon hihxon.

¹¹ Doce nete res sca tah qui, hen Jerusalen janin Papahon shinani cahipi. Yocacahxon tah min hea hihcoinai hea honantihí.

¹² Jahuensi ta hea jonibo betan yohinanaiton merayamahipicanaxqui ni Papa Diosen xoboho, ni jaton tsinquitxi xoboboho, ni jema bahinbi. Jonibo sinamaxon coromahiton ta hea jahuensi merayamahipicanaxqui.

¹³ Hehqui rahma yohuanai joi rihbi ta jenquetsahaxon bi jan hihcoinai mia honanmatimahiqui.

¹⁴ Min honanon hihxon tah hen mia yohihi. Heen papabaan Papa Dios tah hen shinancoinai. Moisesnín huishani joi jatihibi, Papan joi yohinicabaan huishani joi jatihibi rihbi tah hen nincacoinai. Criston bahin caxon tah hen nincacoinai, jaa bahi cahen nazareno joi neabaan yohihi.

¹⁵ Sírioya tiromabo Papan huenirihbiyaxihqui jaabaan shinanai quescajaquin tah hen shinanai.

¹⁶ Jaa copi tah hen hea tiromayamahi Papan jisnon hihxon, jonibaan rihbi jascajaquin jisnon hihxon, pontejaquin shinanax hea jihuetai.

¹⁷ Hicha bari cayamanish tah hen jahuajomabo heen caibo yanapannoxon coriquiya cahipiqui, Papa Dios rihbi pishca hinani tah hen cahipiqui.

¹⁸ Jaatian ta nashihax Papa Diosen xoboho nichiton hea merahipicanaxqui, noque janin tsamajaquetaibo yama, noque jahuabi coroyamahi.

¹⁹ Asia mai mehax jahui judiobaan ta neno jahuex hehqui yohuanti jaiqui, hehqui yohuanti jaax.

²⁰ Jaa joyamahiya, jaton hapobo tsinquitai tocan hea nichiton jahua hen tiromajahi jaton hapobaan merahipishqui? Neabobi yohimahue.

²¹ Nea res tah hen jato tocánxon coshin yohihipiqui: Muhanuihbo Papan huenirihbiyaxihqui hen shinanai copi ta hea casticancatsihcaniqui. Jascajaresquin —hahquin Pablonen.

²² Jan yohihi bahi ta Felixnin honanquin sirijanishqui. Honanxon bi ta jaa netenbi jato nincacatsihyamanishqui.

—Sontaro hapo Lisias jahuiya pari tah hen mato jisyaxihqui —jato jaquin.

²³ Jascajaxon capitán sca yohiquin Pablo coirannon. Jan xoboho nihnon, jahuen amicobo rihbi pitibo hinani hihcocatsihcaniqui jato hihcomanon capitán yohiquin.

²⁴ Felixnin haibo cahen judío, Drusila janeya. Jato jascajahipish jahuentihi nete ra jahuen haibo betan joxon Pablo quenamaquin. Quenamaxon non Cristo nincacoinai joi Pablo yohimaquin.

²⁵ Non ponte jihuetai jai, non coirameti jai, Papan casticanyaxihqui joibo rihbi Pablonen yohihiya Félix rahte rahteti. Nincaxon:

—Caresscahue. Hen tee hichayamahiya tah hen mia hahquirihbi quenamatihí —hahquin.

²⁶ Jaa pecaho coriqui Pablonen hinannon hihxon quenamaricahtixon yohuanquihquin.

²⁷ Rabe bari huinoscaya Porcio Festo sca Félix xahbanen haposcai. Judiobo jenimanon hihxon jaan rihbi haho sipojati xoboho Pablo banemaquin.

25

Feston Pablo quenamahi

¹ Jaa mai janin Festo nocoscai. Nocotipish quimisha neten hihquish Cesarea janinhax Jerusalen janin cahi.

² Janoxon sca sacerdote hapobo betan judiobaan hanibaan Pablo qui yohuanti joi jaa yohiquin.

³ Bahin jahuiton quexexon rehteti shinanxon Jerusalen janin Pablo hihuexonn Festo vocacanquin.

⁴ —Jaa ta Cesarea janinbi xehpó qui. Hea rihbi tah hen jano caresscatihi basihaxma.

⁵ Jaa copi hahqui yohuanti jaax maton hanibo hehbetanbi canon janohax yohuannoxon —jato jaquin Feston.

⁶ Ocho neten hihiyamahiya chonca neten jato janin hihquish Cesarea janin caresscrai. Nocotipish mohiyahxon janoxon jonibo ponteti xoboho tsahoxon Pablo quenamaquin.

⁷ Quenamaha nocotaiya Jerusalen janinhax nocotipi judiobo jaa nihaquehtancahuani. Hicha hahqui yohuancani. Jaa ta hihti tiroma qui, hihcani. Jascaxon bi hihcoinaibo jismati hahtipahyamacanquin.

⁸ Jaatian:

—Noquen xenibaan joi qui tah hen hohchayamahi. Papa Diosen xobo qui rihbi tah hen hohchayamahi. Cesaro qui rihbi tah hen tiromayamabiresai —Pablonen jaa jaquin.

⁹ Judiobo jenimanon hihxon sca Feston Pablo yocaquin:

—Jaabo mihqui yohuanai jatihibi hen nincquin sirijanon min Jerusalen janin cacatsihyamahin? Janoxon hen nincanon —hahquin.

¹⁰ —Quiquin hapon pontexonnica bebon tah hen nichi. Nenoxonbi hea pontehue. Judiobo qui tah hen jahuabi tiromayamahi. Min tah min honanai.

¹¹ Hen tiromahi copi hea rehteti jaiya tah hen Hen tah hen mahuacatsihyamahi, hen hiiptimahi. Huetsa joni hen tiromajani copi hea rehteti jaiya tah hen jascarihibitimahi. Hehqui yohuanabo quesahiya ta tsoanbi jato hea hinantimahiqui. Cesaronen sca hea jisnon hahqui hea raanhue —Pablonen jaquin.

¹² Feston sca jahuen yanapannicahbo betan yohuantahxon:

—Cesaro qui hea raanhue hah tah min jai. Hahqui sca tah min catihi —hahquin Feston.

Quiquin hapo Agripanen Pablo quenamahi

¹³ Jan jascajahipi pecaho Berenice betan quiquin hapo Agripa jano nocoti jahui Festo jisi Cesarea jema janin.

¹⁴ Jano jahuenti ra neten hih jan jaresscaya Pablo cahehipibo Feston yohiscaquin:

—Felixnin xehpobahinni joni ta neno jaiqui.

¹⁵ Jerusalen janin hea cahiya ta sacerdote hapobo betan judiobaan hanibaan hahqui yohuanxon Pablo rehteti yocaquipicanaxqui.

¹⁶ Hahqui yohuanabaan nincanon bi jan jato joi bichinon hihxon yohimayamaxon tah non noque romanobaan hahqui yohuanaboya jascajaquin reteresiyamahi, hah ta hen jato jaipiqui.

¹⁷ Jaa copi ta hehbetan behipicanaxqui. Non nocotipi mohiyahtax tah hen janoxon jonibo ponteti janin tsahoscaxon jaa joni quenamahipiqui.

¹⁸ Hahqui yohuanaboi nincaxon bi tah hen hean shinanipi quescapa tiroma hean merayamahipiqui.

¹⁹ Jaton dios hahxonti joibo copi res ta yohinanipicanaxqui. Huesti Jesus yamanicaton joi copi rihbi. Jihue ta jaiqui, hih ta Pablo jaiqui, jaa yohihi.

²⁰ Jenquetsahaxon jato sirijaquin nincatinhin, honanyamaxon tah hen Pablo yocaquipiqui: ¿Jerusalen janinxon hen mia jisnon min jano cacatsihyamahin?

²¹ Hen jascajaha bi ta queenyamahipishqui. Cesaronen sca jaa jisnon hihxon hen xehpotahxon raanyaxahnnon hea yocacah tah hen xehpomahipiqui Cesaro qui raanti hahtipahnoxon caman —hahquin Feston.

²² —Jaa joni tah hen nincacatsihqui heanbi —Festo jaquin Agripanen.

—Bahquis tah min jaa nincanoxihqui —hahquin.

²³ Hoxashinahax mohiyahtax sca Agripa betan Berenice jaton quiquin hapo chopa sahuehax jaton joniboya joribibi. Jaton sontaro hapobo betan jaa jema janinha hapobo betan rihbi janoxon nincatin xoboho mapecani. Janoxon sca Feston Pablo quenamaquin.

²⁴ Quenamaha nocotaiya sca Festo yohuani:

—Agripa quiquin hapon, noque betan tsinquitibaan, nea tah qui. Jerusalen janinxon hea yocaxon ta nenoxon rihbi jatihibi judiobaan hea coshin yocaquipishqui nea hen muhuamascanon.

²⁵ Jaabi tah hen jahua copi casticanxon rehteti merayamahipiqui. Cesaro janin hen raannon hihxon hea yocacah tah hen raanti sca shinanipiqui.

²⁶ Huishaxon joi raantihi bi tah hen hahqui hihcoini yohuanaibo shinanyamahipiqui. Jaa copi tah hen man nincanon hihxon quenamaribahqui. Mian nincaxon hashoan honanxon min hea yohiha jaa sca huishaxon tah hen mia jaa nincamahi, Agripa quiquin hapon.

²⁷ Hahan caheti joi huishaxonma bi sipojaxon joni raanah ta tiroma qui hean jisi –jato jaquin.

26

Hapo Agripa janin Pablo yohuani

¹ Queenxon jato joi bichinhue –Pablo jaquin Agripanen. Jaatian nincakahbo mequen sanahihinxon:

² –Jahuerohajaquin tah hen mia nincamati hahtipahi, Agripa quiquin hapon. Heen caibo hehqui yohuanai joi bichinquin tah hen mia nincamahi.

³ Jenquetsih noque judiobo jihuetain, mian tah min honanquin sirijahi. Non yohinanai joi tah min hashoan honanai. Jaa copi hea tenexon hen mia yohihi nincarohahue.

Noquen Hihbo qui hinamehriyamaxon tah hen jato hihti tiromajapahonihqui hih Pablo jai

⁴ Beronanax tah hen Jerusalen janin haninbihqui heen caibo tocan. Jatihixonbi ta heen caibaan jaa honanbihqui.

⁵ Hihcoini yohuancatsihxon ta mia yohixihcanihqui. Fariseohax tah hen fariseobaan shinanai quesvari hen basi jihuenihqui. Moisesnin yohini quesvari caibo judiobo jihuetai bi ta fariseobaan hihti nincacoinax jihuenicabo qui.

⁶ Noquen Papa Diosen noquen xenibo hahxontijanixon jan jato hahxoncoinscrai hen shinanai copi ta hea demandancaniqui.

⁷ Jan noque hahxonnon ta noquen caibaan bariyahpan yame rihbi hahan shinanbihqui. Jaa ta hihti manacaniqui. Jan noque hahxonscrai hen shinanai copi ta hea demandancaniqui, quiquin hapon.

⁸ ¿Mahuanihbo Papa Diosen huenicointima shinan man jain?

Noquen huetsabo Pablonen tiromajapahoni

⁹ Jesus Nazareno joi nincayamahahbo hihxon hen jato hihti tiromajati ta Papa queenihqui hihxon tah hen Jerusalen janinxon jascajapahoniqui.

¹⁰ Jano tah hen hicha jahuen baquebo sipo xoboho tsahonihqui. Hen jascajati joi ta noquen hapobaan, noquen quiquin sacerdotebaan rihbi hea huishaxon hinancannishqui. Jaa jonibo retehiboya tah hen Jascajanahue hihpanoniqui.

¹¹ Jatihibi tsinquiti xoboboho hihquixon tah hen hicha bihxon Cristo qui jato tiromahi yohuanmanoxon hihxon jato rishqui rishquipahonihqui. Jato qui hihti rainyamahi tehquehixon tah hen hocho queha nahuabaan jemabo janin caman hen jato chibanpanohiniqui.

Noquen Hihbo qui jan hinamehni Pablonen yohirihbihi

(Ha 9.1-19; 22.6-16)

¹² Jato jascajanoxon tah hen noquen hapobaan quirica hinanah Damasco jema janin cahi caniqui.

¹³ Barin manan tsacahiya tah hen babin caquin naihoh quehax xabatai jisniqui, quiquin hapon. Bari mentan hashoan coshin xabatai. Hea, hehbetan cahibo rihbi xabajaquin.

¹⁴ Noque jascajaquin xabajaha jatihibi racareneni. Noquen join yohuanai sca hea quenahi hean nincapau: Saulon, Saulon, ¿jahua copi min hea tiromajaquin chibainai? Hahan toro chichachiti tahuah cahchihohri jamaquihcamahi tah min hisinai.

¹⁵ Jaatian: Tsoa min quin Hihbon, hahquin' hean. Hea ta hen Jesus qui, min hea tiromajaquin chibainai.

¹⁶ Huenitax nihresscuhue. Mia caisnoxon tah hen mihqui cainai. Min hea teexonnon tah hen mia caisai. Min hea jisresscrai tah min jonibo yohiyaxihqui, hen mia jismayaxihquibo min yohicinnon hihxon tah hen mia caisai.

¹⁷ Miin caibaan mia rehtecatsihqui bi tah hen mia rehtematimahi. Jato qui tah hen mia raanyaxihqui. Miin caibomabaan rihbi mia rehtecatsihqui bi tah hen mia rehtemaya-mayaxihqui.

¹⁸ Min jato xabajaxonnon hihxon tah hen mia raantihi bahquish chian jaabo nichish bi xabapan sca nihnnon hihxon. Satanasnen jato hihbojani bi Papa sca jato hihbojamanon

hihxon tah hen mia raantihi. Papan jaton hohcha sohuaxonah hea nincacoinaibo tocan jaabo jihueyaxihnon hihxon ta hen mia raantihi hea jaquin.

Noquen Hihbaan yohini Pablonen nincacoinai

¹⁹ Papan hea jismaxon yohini quescabijaquin tah hen yohiquin pishinmayamaniqui, Agripa quiquin hapon.

²⁰ Damasco janinxon pari yohixon Jerusalen janinhahbo sca yohixon Judea mai mehabo jatihibi yohixon judiomabo rihbi sca tah hen jato yohinikhqui. Shinan pontexon Papa Dios sca nincaxon behnajaquin shinanxon quescabijaquin sca hahcabo hihxon tah hean jato yohinikhqui.

²¹ Jaa copi res ta Papan xoboho hea bihxon heen caibaanbi hea rehtecatsihquipicanaxqui.

²² Papan yanapana tah hen rahma caman jaa joi yohiquin jeneyamahi, hanibo yohixon jahuaborajomabo rihbi yohiquin. Papan yohinicabo betan Moisesnin ta jayaxihquibo yohinishqui. Jaa joi res tah hen jato honanmahi huetsa joima.

²³ Papan caisai joni tiromajayaxihquibo ta yohicannishqui Moises, jaabaan. Hihquipish bi jaa pari huenixon noquen caibo jan xabajaxonyaxihqui noquen nahuabo rihbi jan xabajaxonyaxihqui ta yohicannishqui. Jaa joibi tah hen yohihi, huetsama –jato jaquin Pablonen.

Noquen Hihbo qui Agripa hinamehnnon hihquish Pablo yohuanai

²⁴ Jascajaquin joi bichinaiton Feston coshin yohiquin:

–Min tah min tehquehihqui, Pablón. Hashoan hicha quirica honanax tah min mapo masascai –hahquin.

²⁵ –Tehquehiyama tah hen jai, Festo hapon. Hen yohihi ta hihcoinai yohuanti qui, shinanquin sirijahax yohuanti.

²⁶ Noquen quiquin hapo hihxon tah min hen yohuanai min honanquin sirijahi. Jaa copi tah hen shinanquin sirijahanan yohuanai. Hen yohuanai tah min honanscái. Hen tah hen honanai. Hen mia rahma yohihi tah hen jonéxon hahyamaniqui.

²⁷ ¿Papan yohinicabaan huishaxon yohini joi min nincacain, Agripa quiquin hapon? Ninca tah min jai. Hen tah hen honanai –hahquin Pablonen.

²⁸ –Hicha tahma res ta pishinihqui, min hea Cristo qui hinamehmati –Pablo jaquin Agripanen.

²⁹ –Hicha tahma pishinyamahax hicha pishinai bi tah hen Mian nincacoinpahinon hen jai. Mia huestima bi hea rahma nincacaibo jatihibi hea hihqui quescari japahinon. Nea cadenabo res man yamanon –hahquin Pablonen.

³⁰ Pablo jascaraiya quiquin hapo, gobernador, Berenice, jato betan tsahotaibo jatihibi nihrenenscái, canoxon.

³¹ Picoscaibo yohinani:

–Nea jonin ta jahua copi casticanxon rehteti hahyamahiqui, jahubi. Jahua copi sipojatima ta jaiqui –hihcáni.

³² –Cesaro qui raanti yocayamahipiya tah non jaa picoquehahnai –Festo jaquin Agripanen.

27

Roma qui Pablo raanahbo cahi

¹ Italia mai janin sca non nontin canon ta hapobaan yohinishqui. Yohihiya ta Pablo, jahuen hahbe sipojanibo rihbi Julio janeya capitanen jato coirannishqui, jato coiraní cahue hapon jaah. Jaa capitan cahen Augusto janeya tsama quiha.

² Adramitio mai meha nontin tah non nanenihqui Asia mai meha jemabo janin nihuén xotonah taxnatí cahiya. Huesti Macedonia mai meha joni tah non hionihqui, Aristarco, Tesalónica janinha joni.

³ Janohax cahax nihshinahax nihbahinahax Sidon jema janin taxnatí. Hahan shinanxon ta Julionen Pablo mapemanishqui jano jan honanai jan jistannon, jato jissón jan pishinaibo rihbi jan maronon.

⁴ Janohax cahax tan non nihuen noque behchihiya Chipre mai quexa caniqui, jano jaa main nihue pantehiton.

⁵ Cilicia, Panfilia, jaa maibo ponte sca quebijistima hian pohquejaquetax Licia mai quiri Mira jema janin taxnatí.

⁶ Jano ta Alejandría janinha nonti noquen sontaro capitanen meranishqui. Italia mai janin jaa nonti cacatsihquiya hahqui sca noque nanebohanquin.

⁷ Janohax cahax tah non jahuentihi ra neten honahax bi caniqui. Huina huinabonahax Gnido ponte nocoscai. Nihuen noque behchirihbihiya cahen janohax Creta main cahi Salmon hochoma.

⁸ Jano honahaxbi quexa cahax Puerto Bueno hahcaibo janin nocoti. Jaa hochoma ta Lasea jema jaiqui.

⁹ Non basili jisxon bari tian huinoscai bi nontin cahax reocohtax non jene meran camis hihxon Pablonen jato yohiquin:

¹⁰ —Jisnhue, amicobaan. Nontin cahax non querabequemis. Behchoman ta noque tsahcatihiqui, man bohi jahuabora manoscanon, nea nonti rihbi manoscanon, noque rihbi hihquiscanon —jato jaquin.

¹¹ Pablonen yohihah bi ta capitanen nincayamanishqui. Jaabi canon cahue nonti hihbo jaiya, nonti chibimica rihbi jascaraiya ta capitanen jato nincanishqui.

¹² Behchoman nonti tiromajatih hihxon cahen janoxon jene tian huinomatima nonti hihbaan shinanquin. Janohax cati shinancanquin, hashoan hichaxon. Fenice jema janin nocoxon pari jene tian huinomati shinancanquin. Fenice ta noa hani qui, ramaho quexa bari hihquihi chipon hori, ramaho quexa bari hihquihi rebo hori naxba qui.

Quebijistima hiaman caxon nihuenhuan behchihibo

¹³ Jaatian hian reboquihax nihue siri pishca jahuiya, cati siri sca ta jaiqui hihqui boyta, mai potabahinax Creta mai quexa cahi.

¹⁴ Non quexa cahi bi jari bari cainai chiponhohrihax nihue coshin nocoreneni.

¹⁵ Mai quirihax joxon jaa nihuen noquen nonti hueranbohanquin. Jaa behchihahnhan huinacasquimaxon, noque xotonresnon noquen jenequin.

¹⁶ Claudia janeya mai pishcaton nihue pantehiton sca caxon tee teexon noquen nonti pishca noquen hani nontin nanequin noquen.

¹⁷ Hahan nihuen xotonti chiarihbixon nonti caxquemis hihxon noquen nonti rahnex-canquin. Jaatian sca Sirte janin mai chahchimis hihxon, hahan nihuen xotonti sebixon sca, nihuen noque xotonnon jenerihbiquin.

¹⁸ Jascajahipish nihshinahax cahi bi behchoman noque coshin tsahca tsahcahiya nonti hihueyamanon hihxon texe jaton jahuabora jenenencanya potascacanquin.

¹⁹ Jahuuen quimisha neten sca jaabaanbi jaton nonti jahuabora sca potacanquin.

²⁰ Jahuuentihi ra neten bari jisyamascaxon, huishi jisyamascaxon, nihuen rihbi jascabi coshin tsahcaha jihuetaima shinanscaquin noquen.

²¹ Basi piyamahipiboa jato qui caxon Pablonen jato yohiquin. Hen yohihipi man nin-cacax tah man hashoan siri jaquehahna, amicobaan. Creta non potabehnanyamahipish tah non nescari tiromayamaquehahna. Non tah non jahuabi manomayamaquehahna.

²² Jaabi raque potanahue. Nonti huesti ta tiromatihqui. Tsoabi tah non mahuatimahi.

²³ Hea ta Papa Diosen joni qui. Hean tah hen jaa teexonai. Nea yamebi tah hen jahuuen naihoh queha yonoti jisiqui.

²⁴ Raqueyamahue, Pablon. Cesaro janin tah min nihyaxihqui. Mihbetan cahibo jatihibi ta Papan mia hinanihqui, hah ta hea jaaxqui.

²⁵ Jaa copi raqueyamahue, amicobaan. Papan hea yohihi quescabi ta jatihiqui. Hen tah hen honana.

²⁶ Mai pishca janin rah tah non nocoti cahi —jato jaquin.

²⁷ Rabe semana huinotax yame sca Adria quebijistima hian janin nihuen noque jascabi nontanontanaiya yame pochinicon sca mai hochoma sca jai shinancanquin nonti mehax teenicabaan.

²⁸ Jahuentiho nemin hin hihxon topnah ta veinte brasa janishqui. Caribixon topnah-ricanquin. Quince brasa sca jai.

²⁹ Jene bemacanya macan chahchimis hihxon nonti chishqui quiri chosco hahan mai mespoti nexaxon potacanquin. Xaba paquepahinon hihxon manaquin.

³⁰ Nonti potabahinti shinanxon nonti rexo qui huetsa hahan mai mespoti nexahihcamaxon nontin teenicabaan jaton nonti pishca jenenencanya paquequin.

³¹ —Hoa jonibo nea hani nontin baneyamahiya tah man jihuetaima —sontaroboya capitán Pablonen jaquin.

³² Jascajaha ta sontarobaan risbibo xatenishqui, nonti pishca jabascanon.

³³ Xaba paquescai bi piti pinon hihxon Pablonen jatihibi yohiquin:

—Rabe semanan sca tenehahnhan tah non pihaxma nonotai. Jahuabi tah non piyamerasihi.

³⁴ Piti piresscanahue hah tah hen mato jai, hahan coshilax man jihuuenon. Tsoabi tah man mahuatimahi, jahuabi tiromayamahi.

³⁵ Jato jascajaxon jatihibixonbi nincanonbi Papa yocaxon piti tehcaxon piresscaquin.

³⁶ Piti shinanscaxon jatihibichin sca picanquin.

³⁷ Noque jaa nontin cahibo rahsi cahen doscientos setenta y seis.

³⁸ Pihi yaniscaxon nonti hihueyamanon hihxon trigo sca jenenencanya potacanquin.

Jaton nonti hihquihi

³⁹ Xaba paque sca jaiya mai meraxon bi jahua mai hin honanyamacanquin. Mashiyahpa hani noa jisxon hahtipahxon jano nonti taxnacatsihcansi.

⁴⁰ Jenenencanya banenon hahan mai mespotibo pecacanquin. Hahan chibiti nexahipibo pecaxon jahan nihuen xotonti chiahihnicanquin. Nihuen xotonah sca mashihohri cahi.

⁴¹ Caquin bi bemacanya mashi chachihax nonti peracahti. Jahuen rexo mashi peracahrenenax tsequetimahi bi jahuen chishqui behchoman caxque caxquequin.

⁴² Nonahax jabacamus hihxon sontarobaan jaton sipojanibо rehtecatsihscrai.

⁴³ Rehtecatsihscibaan bi Pablo jihuemacatsihxon capitaren jeenhyamaquin. Nonati honanaibo pari jenenencanya cayahax nona nonahi mai qui canon sca jaan yohiquin.

⁴⁴ Caibo sca jihui caxque xecoyamaxon nonti quexe xecohax canon yohiquin. Jascahax mai qui nococani jatihibi.

28

Malta mai pishca qui Pablo nocotai

¹ Main sca nihxon tah non jaa mai jane Malta honannihqui.

² Janohahbaan ta noque sirijaquin bijnishqui. Hoiyahpa matsu jahuiya sca chihi requenjaxon non jatihibi pehchihi canon noque quenacanquin.

³ Pablonen ta caro bihxon chihi janin tsamanihni bi xanahax caro mehax rono picoxon mequen qui jaa pinishqui.

⁴ Jahuen mequen qui rono hueotaijisish janohahbo yohuani:

—Jaa rah ta joni rehtermin qui. Hiaman rehtequin bi cahnehah bi ta ponte yoshiman jihuematimahiqui —hihcansi.

⁵ Mequen qui ronon piha hueotai bi cahen meshbishcohquin chihi qui potaquin. Jahuabi hisinyamahi.

⁶ —Rahmabi ta soohihquish mahuati sca paquexihqui —hihcansi. Basi manaxon jahuabi yamahi jisxon shinan huetsajascacanquin.

—Jaa rah ta dios qui —hihscacani.

⁷ Jaa hochoma ta jaa mai patoronen maibo janishqui Publio janeya patoro. Noque bihquin sirijaxon quimisha neten jahuen xoboho noque jihuemaquin.

⁸ Publion papa bachilo hisinax racati yonati, chixoti. Hahqui caxon Papa yocaxon Pablonen mehequin. Jascajaha rohascrai.

⁹ Jaajisish jaa mai janinha hisinaibo sca becani. Jaabo rihbi rohajaquin.

¹⁰ Jaabaan rihbi sca noque hicha hinanresquin. Noque janohax caresscacatsihquiya non pishinaibo jatihibi noque hinancanquin.

Roma jema qui Pablo nocotai

¹¹ Quimisha hoxne huinohax tah non Alejandría janinhax joho nontin noque nanenihqui. Jaa nonti cahen jene tian huinonon caman jano taxnani. Jahuen Jane cahen Rabe nane. Jahuen rexo janin jaa Jane jai, hahan jaa nonti honanti.

¹² Cahax Siracusa jema janin taxnatax jano sca quimisha neten hihqui.

¹³ Janohax cahi quexa cahax Regio jeman nocoti. Nocotipish mohiyahxon jisi bi reboquihax nihue siri jaresscrai. Jaan xotonah tah non jahuen rabe neten sca Puteoli jema janin nocotax mapenihqui.

¹⁴ Jano tah non noque huetsabo meranhqui. Banenahue hahcabo tah non jato betan siete neten rihbi hihniqui. Janohax Roma jeman sca cahi cahi, main sca.

¹⁵ Non cahi joi honanax ta Roma meha noque huetsabaan noque behchihi becannishqui, Foro de Apio hahcaibo jema janin noque behchinonoxon. Tres Tabernas hahcaibo jema janin sca caibaan rihbi noque behchiquin. Jato meraxon, Hahxon tah min hea jai Papan, hahxon sirijaquin sca Pablonen shinanquin.

¹⁶ Roma janin non nocotaiya ta hahmebi Pablo jihuemacannishqui jahuen coirannica sontaro betan.

Roma janinxon Pablonen yohihi

¹⁷ Jan nocotipi quimisha neten sca judiobaan hanibo Pablonen quenamaquin. Tsinquitaiton sca jato yohiquin:

—Noquen caibo qui tah hen jahuabi tiromajayamaniqui, hea huetsabaan. Noquen papabaan joi qui tah hen jahuabi tiromajayamarihbibi.

¹⁸ Jerusalen janin hea bihxon ta nahua hea hinancannishqui. Jaabaan sca ta hea yoca yocaxon jahua copi hea rehteti merayamaxon hen catannon hea jeneti shinannishqui.

¹⁹ Jaabaan hea jenecatsihqui bi ta noquen caibo queenyamanishqui. Jaa copi tah hen Cesaronen sca hea jisnon hea hahqui raanmaniqui. Heen caibo qui tah hen jahuabi demandanti yamahi.

²⁰ Jaa copi tah hen mato jiscatsihquipiqui, mato yohuanquihncatsihquin. Noquen caibo jan yohini quescabijaquin Papan noque hahxonai hen shinanai copi res tah hen nea cadenayahpa qui –jato jaquin.

²¹ —Judea mai mehax mihqui yohuanai ta noque qui joi nocoyamahihqui. Mihqui yohuanai noquen huetsabo rihbi ta tsoabi nocoyamahihqui.

²² Jaa Jesusya joihibo qui ta jatihibi janin tiromahi yohuancaniqui. Jaa tah non honanai. Jaa copi tah non miabi yohuanmacatsihqui —hahcanquin.

²³ Jaa netenbi tah non joribiyaxihqui hihquish bocani. Cahipish hicha sca jahuen xoboho mapeti became. Papan noque jihuemayaxihqui joi ta Pablonen jato yohnishqui. Yamequiribi yohixon, yohibahinaxon yame caman Moisesnin joi jismaxon Papan joi yohinicabaana huishani joi rihbi jismaxon Jesus joi jato honanmaquin.

²⁴ Jan yohihi caibaan nincacoinquin. Caibo nincacatsihyamahi.

²⁵ Jan shinanai quescajayamaquin shinanax boresscacani. Cahiton Pablonen jato yohiquin:

—Hihcoinjaquin ta Papan joi yohinica betan Dios Yoshiman noquen papabo yohihi nescajanishqui:

²⁶ Nea jonibo yohitanhue: Maton pabinquinin tah man nincaxon bi honanyamayaxihqui. Jisquin tah man jisxon bi meratimahi.

²⁷ Nea jonibaan jointi ta xehpo qui. Jaton pabinquinin nincapanan ta nincayosmabo qui. Jaton bero ta beracocanihqui, jisxon honanmis hihxon, pabinquinin nincamis hihxon, jointinin honanmis hihxon. Shinan pontehiton hean jato rohajamis hihxon ta jascajacaniqui

hih ta jaiqui huishani joi.

²⁸ Jaa copi honannahue. Noquen caibomabo qui ta nea hahan Papan noque teehihmahi joi Papan raanscailqui. Jaabaan ta nincatihiqui.

²⁹ Jato jascajahiya judiobo sca bocani. Joi bichinnannani bocani.

³⁰ Copijaha hinantahni xoboho ta Pablo jihuenshqui rabe bari. Jano jihuexon ta jaa jisi jahuiboa jaan jisnishqui.

³¹ Jato jisanan Papan jihuemahi joi yohixon tsoanbi chihtehahma jato honanmaquin. Jahuatohonbi pantehahma noquen Hihbo Jesucristo joi honanmaquin.

ROMANOBO **Romanobo qui Pablonen raanni joi**

Roma janin jihuetaibo qui Pablonen joi raanai

¹ Hea Pablo Jesucriston joni hihxon tah hen mato qui raannoxxon nea joi huishahi, hea huetsabaan. Heen tee hea hinanquin ta Jesucristonen hea yohinishqui, Papan joi siri hean yohibonascanon. Jaa copi tah hen huishahi.

² Jahuen joi yohinicabo huishamaquin ta neateman bi res Papan yohinishqui, noquen Hihbo Cristo jan raanyaxihqui yohiqui.

³ Jan raanscrai ta jahuen baque qui, Cristo. Tsoa jahuen xohtabo quin hihxon ta toponpaquexon quiquin hapo yamanica David jahuen xohta coin hihpahonishqui, non honanah.

⁴ Noquen naihoh queha Papan ta jahuen coshiyaxon noquejismanishqui, jahuenahbi jahuen baque Cristo hihqui non honannon. Jan hihquipi bi hahquirihbi teehihmaxon huenixon ta Papan noquejismanishqui. Jaa jahuen baque Jesucristo ta noquen Hihbo qui.

⁵ Jaan ta heen tee hea hinannishqui, jahuen raanti sca hea janon. Jatihibi jonibo yohinon ta hea raanihqui. Jaabo queyoyamanox mananon tah hen jato nincacointi yohihi, Criston jihuetahbajo jaabo.

⁶ Mato rihbi tah man jascapahbo qui, hea huetsabaan. Jesucriston caisahbo tah man qui. Man Roma jema janin jihuetai noque huetsabohon ta Papan hihti shinanihqui.

⁷ Mato tah man caisahbo sca qui, jahuenahbi man janon. Noquen Hihbo Jesucristo betanbi ta Papan mato mehehiqui. ⁸Jahuen yoshin siripan mato mehehah man sirijaquin shinanyamahin, hea huetsabaan?

Roma janin Pablo cacatsihqui

⁸ Hahxon tah min noque jai, Papan, hah tah hen Jesusen janen jai, mato jatihibi vocaxonquin. Tiromahahbo bi man tenehi ta jatihibi janinxon honancaniqui.

⁹ Mato vocaxonnikon tah hen Hahxon tah min hea jai, Papan, hahscrai. Hicha bi res hen mato vocaxonai ta Papan honanihqui. Heen jointiboyaxonbi jahuen baquen joi yohinixon tah hen shinanbehnoxonma mato vocaxonai.

¹⁰ Papa vocaxon tihibi tah hen mato vocaxonai, hea huetsabaan. Mian jisi, texe maibo janin catanish Roma janin sca hea cahá siripaiya, jano sca hea camahue, Papan, hah tah hen jai yocaquein.

¹¹ Mato jisi tah hen hihti cacatsihqui, hea huetsabaan. Hahan coshiti shinan tah hen mato yohicatsihqui.

¹² Non tah non hinanhahnantihi. Hea jai shinan mato hinanah tah man matona jai shinan rihbi man hea hinantihi, jatihibonon Criston shinanyaxon sirijaquin shinannon.

¹³ Hicha coti tah hen mato janin cacatsihquish bi tee hichahiya hen rahma caman cati hahtipahyamahi. Caibo jonibo hen yohihi quescajaribiquin tah hen mato rihbi Papan joi sira yohicatsihqui, man Papan shinanyahpahax shinan caicanascanon. Man honannon hihxon tah hen mato yohihi, hea huetsabaan.

¹⁴ Jatihibi jonibo hean yohiti ta noquen Hihbo queenihqui, hea huetsabaan. Jema janin jihuetaibo, cahchihi jihuetaibo, hicha quirica honanaibo, quirica honanyosmabo, jatihibi tah hen yohiti jai.

¹⁵ Jaa copi tah hen caxon mato rihbi jaa joi siri yohicatsihqui.

Papan joi ta coshi qui hihqui

¹⁶ Jaa joi yohiti qui tah hen rabinyamabiresai, hea huetsabaan. Papan coshi joi tah qui. Jayaxon ta nincacoinaibo rahsi jaan jihuemahiqui. Nincacoinaiton ta jato bichiqui, queyoyamanox manatahbo. Jato qui nocoxon tah hen judiobio pari yohihi. Jaa pecaho sca judiombao rihbi yohiqui.

¹⁷ Jaa joiyaxon ta Papan noque honanmahiqui, nincacoinaiton jaan noque bichi non honannon. Non nincacoinaiton ta noque bichiqui. Jahua ta hashoan pishinyamahihqui, nincacointi res. Huishani joi jai quesca tah qui. Nincacoinaiton Papan bichibo ta queyoyamanox manatihiqui hihqui.

Jaton hohchabo jan hihbomahibo

¹⁸ Tsaoaboo jan casticanyaxihquiquin hihxon ta noquen naihoh queha Papan noque honanmaribihiqui, jahuen rahuibo rahsi jan casticantihi non honannon, nincayosmabo rahsi. Jahuen joi pantecatsiquin tiromajahibo rahsi. Jascapahbo jatihibi ta casticanyaxi-hquiqui.

¹⁹ Noquen naihoh queha Papa jenquetsahpa quin ta honantihbires qui. Jaabaan rihbi ta honanihqui, Papan jato jismahäh.

²⁰ ¿Noquen Papa jenquetsahpa shinanya quin? ¿Jahuen coshi jenquetsahpa queyoyosma quin? ¿Jaa huesti jatihibi hihboyamahiquin? Honantih bi res ta jaa jaiqui, jan jonijanibo jisxon honanquin. Jaa copi ta Honanyamaxon tah non tiromajanihqui, Papan, tsoanbi jati htapahyamahiqui.

²¹ Tsoa noquen naihoh queha Papa quin honanax bi ta Mia tah min noquen naihoh queha Papa qui hahyamacannishqui. Papan jato hahxonah bi ta Hahxon tah min noque jai, Papan, hahyamarihbicannishqui. Jascahaxma ta honanmabo sca banecannishqui, shinanjomabo. Pontejaquin shinanyosmabo sca.

²² Hea tah hen honan qui hihquish bi ta hihti honanmabo sca banecannishqui.

²³ Jascaphahax ta noquen Papahon queenyamacannishqui, queyoyosma noquen Papa hihqui que bi jahan queenyamacanni. Papan shinan siri queenyamaxon ta jaton mequemanbi santobo jacannishqui, joni quescapahbo santobo, caibo rihbi hihsabo quescapahbo, caibo ninotaibo quescapahbo. Mahuanica rahsi quescapahbo santojacanquin. Jaton mequemanbi jascaphahbo jacanquin, hahqui sca yocanoxon.

²⁴ Jaa copi ta Papan rihbi jato jenebahinnishqui, jaabo queenai quescar sca hashoan sca tiroma sca jaahbo. Jan jenehah ta jaton yoraquibi hohchanxon sca tiromacannishqui.

²⁵ Noquen Papa coin queenyamaxon ta dios que ma bi dios romishin sca bihcannishqui. Papan hahnibo qui sca tisquihapaequon ta jascaphahbo qui sca yocacannishqui. Noquen Papan jatihibi jonijani que bi jahan queenyamacani. Noquen Papa ta hihti siri qui. Hahqui jascabili siripi yohuantih bi ta huetsa shinan bihcannishqui.

²⁶ Jaabo jascanica copi ta Papan jato jenebahinnishqui, tiroma bi res tiromabo rahsi sca jaábo. Jaton haibobaan ta jaton bebobo jenebahinxon hahbe haibobo sca benejacannishqui.

²⁷ Jascajaribiquin ta jaton bebobaan haibo hihquihinti shinanyamascannishqui. Haibobo jenexon ta hahbe bebobo sca hahcannishqui, hahbe bebobo hihti hahcatsihqui hahcannani. Hahbe bebo betan ta hihti jaroma sca jacannishqui. Jaa copi ta jaton shinan hihti tiroma sca janishqui. Shinan sirijomabo sca ta banecannishqui.

²⁸ Noquen Papa shinancatsihyamahibo quen ta Papan jato jenebahinnishqui, jaton shinan masascanon. Jaa copi ta jascacannishqui.

²⁹ Jahuabi siri ta jayamacannishqui, tiromati res shinancanquin. Caibo tiromajati shinancanquin. Caibaan jahuabora jato bichincatsihcami. Yohuashihtax sinacahanani. Rehteti res shinanquin. Rehtenanti res shinanquin. Paran paranquin. Jistahihmahanan-nani. Caibo qui yohuan yohuani.

³⁰ Caibo qui quesahi. Noquen Papa jistahihmacanquin. Jaton caibo hichaquin. Siribohi-hcamaxon bi caibo rahninquin. Hahmebi siripihamahi yohuan, coshihihcamahi. Jaton huetsabo tiromajati shinancanquin. Jaton papabaan yohihah bi nincayosmabohi.

³¹ Shinanjomabohi. Yanapanyosmabohi. Mia hahxonxahnpa hihquinanax bi yanapannyamarihbhi. Caibo yomanahmarestcanquin.

³² Jascaphahbo ta jascabi sca mahuatahbo jayaxihqui Papan yohihah honanax bi ta hihrescannishqui. Rahma caman rihbi ta jascacanqui. Hahresquinma bi caibo rihbi hesequin, tiromajati queenahbo hihxon.

2

Sirijaquin shinanxon Papan casticanai

¹ Caibaan tiromajahi honanax copi tah min Honanyamaxon tah hen jascaniqui, Papan, min jatimahi. Caibo yohihi, Jaa ta tiroma qui hihquish bi tah min jascari miin yora qui bi min yohuanai. Jaabo tiromahi hihqui quescaribibi tah min mia qui.

² Jascapa tiromahibo ta Papan hihti casticanyaxihqui. Tsoabi ta cahnetimahiqui. Jahuen quirica jisxon tah non jaa honanai.

³ Jascaphahbo ta tiroma qui hihquish bi mia rihbi jascaphahax, ¿Papan mia casticanya-manon hihquish min cahneti shinanain?

⁴ Papan ta mia hicha hahxonihqui. Tiromahi quen mia histon casticantih bi ta basi sca mia tenehiqui. Papan mia jascajaxonah bi Jahuama tah qui ¿hih min Jain? Pontejaquin sca min shinannon hihxon ta jaan tenehiqui. ¿Honanxon bi min jaamahi nan?

⁵ Min pontenon hihxon mia tenexonai bi tah min nincayosmahi. Shinan coinjoma tah min qui. Jaa copi ta hashoan sca mia casticanyaxihqui. Siribo hihqui jisxon sirijaquin jahuen jonibo bihxon sca ta tiromabo sca casticanyaxihqui. Jaatianbi ta hihtijaquin mia casticanyaxihqui.

⁶ Noquen shinanbo honancoinxon ta tiromabo jaan tiromajayaxihqui qui. Siribo rihbi ta sirijaquin bilyaxihqui qui.

⁷ Queyoyamanox manati queenxon sirijahibo ta Papan yohiyaxihqui qui: Mato tah man siribo qui. Maton tah man sirijapahoniqui. Queyoyamanox manataibo sca janoxihnahuue hah ta noque jayaxihqui qui.

⁸ Papa nincayosmaboxon ta jan yohihi nincacatsihyamaxon bi tiromati caibaan hesehah pari nincaquihqui. Jascapa ta Papan sinajayaxihqui qui. Mato tah hen hihti tiromajanoxihqui, heen rahuibaan, hah ta jato jayaxihqui qui.

⁹ Jascajaxon ta jato hihti casticanayaxihqui qui. Jaan casticanah ta tiromapahonibo rahsi hihti hohmis hohmisyaxihqui qui. Judiobo pari casticanxon ta judiobomabo sca jascajaribiyaxihqui qui.

¹⁰ Sirijapahonibo caya ta jascajayamayaxihqui qui. Mato tah man siribo qui. Man tah man sirijapahoniqui. Queyoyamanox manataibo sca hehbetan jihuenuhue hah ta jato jayaxihqui qui. Judiobo pari jascajaxon ta judiomabo sca jascajaribitihi qui, siribo rahsibi.

¹¹ Non jenquetsahpabohin ta Papan honanquin sirijahqui, hea huetsabaan. Jaa copi ta tsoabi cahnetimahihqui, tiromabo casticanxon siribobih qui.

¹² Tiromabo ta jenquetsahax bi cahnetimahihqui. Papan huishamani honanaxma hohchanihbo ta jascabi sca casticana jathihi qui. Papan huishamani honanax bi hohchanihbo rihbi ta Papan jascajaquin casticanayaxihqui qui, jan Moises huishamani jai quescajaquin.

¹³ Moisesnin huishani joi nincaresaibo ta sirima qui, Papan jisí. Jaan jisí ta Moisesnin huishani jai quescabijaquin hahcaibo siribo qui.

¹⁴ ¿Moisesnin huishani jojomaxon copi judiomabaan ponte jihuetai honanyamahihqui? Honan ta jacanihqui. Papan huishamani jojomaxon bi ta hahmebi shinanxon, jan huishamani jai quescari jihuetai yohicaniqui, Papan huishamani jai quescabijaquin yohiqui.

¹⁵ Ponte jihuetai honannon ta jaton jointi janin jaa honan Papan nianishqui. Jaa copi ta jascari jihuetai yohinanancanihqui. Jaa copi rihbi ta jaton jointinin shinani, Tiroma ra tah hen jai, hihiyamax Sirija rah tah hen jai hihcanihqui. Caibo betan yohinani ta cahenannancaniqui. Caibo rihbi sca, Jaan ta hea jascamahaxqui hihqui, hohchamati yohihi.

¹⁶ Papan shinanyaxon hean yohihi quesa ta jayaxihqui qui, hea huetsabaan. Jonetax jahponibohi ta Papan yohiyaxihqui qui, Man tah man jascari janiqui hahquin. Jan jaa copi jato casticantihonantih bi res sca janon ta jonibo jascajayaxihqui qui, casticanti nete nocotaiya.

Moisesnin huishani joiyahpabo

¹⁷ ¿Hea tah hen judio qui hih man jain? ¿Moisesnin yohini joiyahpa tah non qui hih man jain? ¿Noque tah non Papa Diosen jonibo qui, hih man jain, judiobon?

¹⁸ ¿Non jenquetsahpi jihuetai Papa queenihqui? ¿Noque judiobaan tah non honanai hih man jain? ¿Jenquetsahpabohi siribo quin Papan joi honanxon tah non honanai hih man yohuani jain?

¹⁹ Hean caya tah hen benchebo bahi honanmaquin hahcajaquin Papan joi honanyamahibo haxematihi, hih tah min jai. Xabajaquin hahcajaquin tah hen Papan jojomabo honanmacointihi, hih tah min jai.

²⁰ Shinanjomabo tah non honanmatihi hih tah man jaribili. Baquebo hanijaquin hahcajaquin tah hen jato haxematihi hih tah man jaribili. Moisesnin huishani joi tah non jai. Jaa copi tah non shinancoinyahpabo qui. Non yohihi ta quesa joima qui hihnicra rihbi tah man qui.

²¹ Jascanicaxon tah man huetsa jonibo haxemahi. ¿Siripi jihuetai jato haxemahax bi mianbi min yohihi quescaraxma min jihuetai? Yometsohyamanahue hihnicahax bi ¿min yometsohtai?

²² Tsiniyamanahue jaax bi ¿min miabi tsinihin? Santobo jistahihmahihax bi tah min Papahon shinanihcamahax jahuen xoboho cahax Papahon shinanaxma tsahoresai.

²³ Hea caya tah hen Papan joiya qui jaax bi tah min Papan joi jai quescama jihuetai. Min tah min jaamahi, judiobon.

²⁴ Mian tah min tiromajaquin caibo shinannahi, noquen Papa sirima hihqui shinannmaquin. Papan jato caheni jai quescapahbo tah man qui. Man tiromahi jihuetai jisish ta nahuabo tiromahi hehqui yohuancaniqui hah ta Papan jato janishqui cahequin. Mato rihbi sca tah man jascapahbo qui, judiobon.

²⁵ ¿Jahan judiobo honantiyahpa min quin? Min jaya hihqui bi ta Papan mia casticanayaxihqui qui. Jaa honantiyahpahax Moisesnin yohini jai quescari min jihueraibhiya pari ta

Papan mia yanapantihiqui. Jaa honantiyapahax min jascari jihuayamahiya ta Papan jisí mia jayajoma quescapah qui, jahuenahma.

²⁶ Jahan judio honantijomahax bi Moisesnin huishani jai quescari jihuetaibo ta Papan jisí jahuen joni coin qui, jahuen shinanyahpabo.

²⁷ Jahan judiobo honanti yamahax bi Moisesnin yohini jai quescapa tahni ta caibo jihuethiqui. ¿Mia cahran, judion? Jaa honantiyahpahax bi tah min jascayamahi jihuetai. Jaa copi ta Papan casticanti neten maton nahuabaan mato yohiyaxihquiqui, Mato caya tah man noque mentan hashoan nincayosma qui hahquin.

²⁸ Bemacanya res judio quescapahbo hihquibo ta judioboma qui. Hahan judiobo honantiyahpahax bi hihresaibo ta judiomabo rihbi qui.

²⁹ Judion ta jahuen jointiboyaxon bi Papahon shinanihqui. Caibaan jisnon hihxon res hahcaiboma bi ta hahcoinaibo Papan judiobo qui. Hea siri hihqui caibaan shinanaahbo japan hihquibo ta Papan judioma qui. Papan hea siri jisnon jaa queenai quescari jihuecoinpan hihquibo ta jahuen judio qui, jahuen caisahbo.

3

¹ ¿Papan noque jascajaquin jisiya tsi ra noque judio baquebo jahuamabo non quin? hih sca rah tah min jai. Jascari yocacahyamahax rah tah min ¿yanca bi res non honantiyahpabo quin? hih min jai. Min jascarai bi tah hen Yancama rahan hih hen jatihi.

² Jascapahbo non janon ta jahuen joi huishamaxon Papan noque hinannishqui, non jaya hihnon.

³ Noque hinanah bi caibo nincayosmabohi copi Papan noque hahxonti hahtipahyamas- caiquin?

⁴ Hahtipahi rahan. Hen mia yohinon nincahue: Papa ta hihcoiniqui. Noque jonibo res tah non jaamajanicaahbo qui. Papan huishamani quescabi tah qui:

Mian tah min pontejaquin casticanai, Papan, hah ta caibaan jatihi qui. Caibaan rihbi ta Jenquetsahaquin min casticanain, Papan jacatsihxon bi Ponte bi res tah min qui Papan hah jayaxihsaniqui, yohicoinqui.

Jascá ta jaa huishani joi janin jai qui.

⁵ Non hohchataiya ta noque quescapahma Papa hashoan ponte hihqui jisyaxihcanni-hqui jonibaan. Jaa copi ta noque casticanah pontema qui ¿hii non jatihi? Hihyamahi rahan. Noquenahbi noquen tiroma shinaman pari tah non jascatih.

⁶ Jaan pontemabo casticana siriyamahiya ta jenquetsahxon bi jatihibi tiromabo casticanti hahtipahyamaquehahniqui.

⁷ Jan yohini quescajaquin hahtihi bi non quesa jahiyta Papan hahcoinaijiscantihiqui. Noquen Papa siri hihqui jiscanquin. ¿Jascacoinaiya jahua copi sca noque casticanthiqui han non jatihi? Hahyamabiresquin rahan.

⁸ Caibo ta hehqui quesa jahiqui. Papa huesti siri banenon tiromanonhue hih roqui hea jai. Quesa ta jacanihqui. Jascapa shinanyahpabo quen ta Papan jato casticancoinyaxihquiqui.

Non hohchayahpabo rahsi jai

⁹ ¿Papan joiyahpabohax copi noque judiobo hashoan siribo quin? Hihyamabiresi. Jascapa rabe tah non qui, hohchayahpabo rahsi, judiobo, judiomabo rihbi. Ma tah non jaa yohiscahaqui.

¹⁰ Papan huishamani joi jai quescabi tah qui:

Ponte joni ta yamahihqui, ni huestibi.

¹¹ Ponte shinanya jonibo yamabiresi. Papahon shinancoinaibo yamahi.

¹² Papan babin nihyamahibo rahsi tah qui, tiromahibo rahsi. Siribojanicabo ta yamabire-sihqui, ni huestibi yamahi.

¹³ Jaton yohuan ta rishtaya qui. Mahuatipi tsecaxon quehpenxon xetehah pisi hihqui quesa ta jaton jana jai qui. Jaton jana rebo ta hahan paranti res qui. Ronon shinanyahpa ta jacanihqui, joni tiromajati res.

¹⁴ Roa roati, hichá hichati res ta shinancaniqui.

¹⁵ Joni huetsa rehte rehthei cacatsihqui ta hishto hishtocaniqui.

¹⁶ Jano jaabo huinotah quen ta masataibo sca jaiqui, hihti hohmis hohmisaibo.

¹⁷ Caibo betan siripi jihuetai ta honanyamacaniqui.

¹⁸ Jaton Papa Dios ta ni pishcabí shinanyamacaniqui.

Jaabo yohihi ta Papa jascarihqui, jahuen joi janin.

¹⁹ ¿Tsoabo yohihi jascanishquin nan? Jatihibi jonibo rahan. Jahuen jonibo ta jahuen joi Papan hinannishqui, jaa joi jai jatihibichin sca nincacahbo. Jaa copi ta neteti jacanihqui jatihibi. Nincayosma tah hen qui hihquish, neteti.

²⁰ Papan yohihi quescari jihuetaibo ta yama qui, Papan jisí. Jahuen joi jaxon tah non jaa honanai. Hohchamisbo rahsi non hihqui honanquin. Honanax copi tah non neteyaxihqui.

Noquen Hihbo qui hinamehtax queyoyamanox manati

²¹ Hohchayahpa rahsi non hihqui bi ta Papan jahuen bahi noque jismahihqui, siribo sca non nihnon. Huishaxon ta Moisesnin noque yohinishqui, non Cristo qui hinamehtax jihueta jai. Jascapa ta Papan jisí siri qui. Hahqui hinamehtax non siribo sca jai ta neateman Papan huishamanishqui, Moises, texe jahuen joi yohinicabo rihbi jaa joi huishamaquin.

²² Cristo nincacoinax hahqui hinamehtaibo rahsi res ta siribo qui, Papan jisí.

²³ Jatihibi jonibo hohchamisbo copi ta jascapa rahsi noque jisiqui, hahbe jihueta hahti-pahyamahibo.

²⁴ Noque jascapa rahsi que bi ta Papan noque hihti hahxonishqui, Cristo raanxonquin. Mahuaquin ta Criston noquebihnishqui, hohchapan hinábo non jayamascanon. Criston noque hahxonah ta Papan noque siribo sca jisiqui.

²⁵ Neateman ta hicha bi res noquen xenibo tiromapahonishqui. Tiromahibo que bi ta Papan jato tenexon jato queyobahinyamanishqui. Jaa ponte hihxon jato teneni non jatihxonbi honannon hihxon ta janibi sca Jesucristo raannishqui. Noque copi jan mahuan quen tah non hahqui hinamehtax noquen hohcha copi non mahuatimascai.

²⁶ Noquen Papa ponte bi res hihqui non honanscanon hihxon ta jascajaquin Cristo raanxonishqui. Jaa copi honannahue: Papa ta ponte bi res qui. Jaan jisí ta Jesus qui hinamehtaibo pontebo qui, jahua copi chihi janin catimascai.

²⁷ Papan noque jascajaxonah tah non Hea caya tah hen siri qui hihtimabiresai. ¿Jahua copi non jascatimahin? ¿Non jahuabi hahyamabiresai copi nan? Jaa copi ma. Non hahqui hinamehtaiya Papan noque sirijaquin bichi copi tah non jascari yohuantimahi.

²⁸ Non sirijaquin hahni copima ta Papan noque bichiqui. Non hinamehtai copi res ta noque bichiqui.

²⁹ ¿Papa Dios tsoabaan Papa quin? ¿Judiobaana res nan? Jatonah res ma rahan. Caibaana rihbi rahan.

³⁰ Noquen Papa Dios ta jaa huesti Papa Dios qui. Nincacoinax hinamehtai judiobo ta sirijaquin bichiqui. Caibo rihbi jascajaribiquin: nincacoinaya jato sirijaquin bilihqui.

³¹ Cristo nincacoinxon tah non Moisesnin huishani joi sca tiroma hihqui shinantimabiresai. Hashoan sca tah non siri hihqui shinanai.

4

Abraham janí quescajati non jai

¹ Shinanscanahue. Abraham ta noquen xohta qui, noque cah non jahuen chini baquebo qui. ¿Jahua copi Papan jaa siri jisnishqui?

² ¿Min sirijaquin hahcái copi tah hen mia siri jisi hah Papan jaa janishqui? Hahyamaquin rahan. Jascajaha ta Abraham jaya joiti jaquehahnishqui. Hea caya tah hen siri qui hih ta jaquehahnishqui. Hihcaxbi jascayamahi. Papa Dios bebon nichish tah non jenquetsahax jascatimahi.

³ Papan huishamaní joi ta nescari qui: Papa Díos yohihah ta hihcoinjaquin Abrahanen shinannishqui. Jaa copi ta Abraham siri hihqui Papan jisnishqui, hihqui jaa huishamaní joi.

⁴ Teexonnicahton cananai quescama tah qui. Teexonnica copijaquin tah non copijacoinai, noque teexonai copi. Mia tah hen hinanresai hah tah non copijaquin jatimahi.

⁵ Papan noque hahxonai ta jascayamahiqui. Hen sirijaquin hahcái copi hea siri jise Papan, hihnicia ta tiroma qui, Papan jisí. Papan siri jisi joni ta nescanica qui: Min hihcoinai tah hen shinanai, Papan. Min yohihi quescabíhi ta jacointihiqui. Min tah min hea sirijaquin bihtihi, hihqui. Papa hihcoinai non shinanaiya ta siri hihqui noque jisiqui.

⁶ Non hahcái copima bi ta hahxonresquin Papan siri hihqui noque jisiqui. Jaa copi tah non hihti jenimati jai. Davidinín rihbi ta jascajaquin yohinishqui, jahuen behua huishaquin.

⁷ Papan noquen hohcha sohuaxona tah non hihti jenimati jai. Noquen hohcha yamascaiya tah non jenimati jai.

⁸ Hen hohchani Papan hea caheyamahah tah hen hihti coincointi jai hih ta Davidinín huishaquin janishqui.

⁹ ¿Papan hahxonah, tsoabo sca hahan jenimati jaiquin? ¿Judiobo res nan? ¿Caibo rihbi nan? Jatihibi rahan. Hen yohihah quescia tah qui: Hihcoinai Abrahanen shinanni quen ta jaa siri Papan jisnishqui.

¹⁰ ¿Papan jaa siri jisiya jenquetsahpa Abraham janishqui? ¿Judiobo honantiyahpa sca janishqui? Jayajoma pari janishqui? Jayajoma pari rahan.

¹¹ Hahan honantijoma pari xon ta Mia jascaraiya ta jacointi qui Papan Abrahanen janishqui. Jaa pecaho sca ta jaa siri hihqui jisxon, Honantiyahpa sca jahue, Papan janishqui. Papan siri joni jaa hihqui honanahbo hihxon jascajaquin, Jaa copi ta jatihibi nincacoinaibo Abrahanen xohtabo qui, jahuen honantijomahax bi Papa qui hihcoinai. Jan jaa jisní quescajaribiquin ta noque siribohi jisiqui, Papa hihcoinai non shinanai quen.

¹² Hahan honantiyahpaxon nincacoinaibo rihbi ta jahuen xohtabo qui. Jahuen honantijoma pari xon Abrahanen Papa Dios nincacoini quescaribibi jaabo jai, jahuen xohtabohi. Jaa cahen jaton quiquin xohta.

Hahqui hinamehtaibo Papan hahxontijahi

¹³ Papan ta Abraham nescajaquin yohinishqui: Minabo hihnon tah hen mia jatihibi jonibo hinanrestihu, miin xohtabaana rihbi hihnon, hahquin. Jan hahni copima bi jan hihcoinjaquin shinanni copi ta siri hihqui jisxon Papan jascajaquin hinantijanishqui.

¹⁴ Abraham ponte res jihuensi copi hinantijanixon ta hinanresquin hinanah jayamascaquehahni. Jaatian ta Papa hihcoinai non shinanai rihbi jahuama sca jaquehahni.

¹⁵ Papan noque jahuabi yohiyamahah tah non jahuabi rihbi nincati yamaquehanai. Jaan noque yohihah tah non nincati jai. Nincati jaxon bi tah non jaamajaresai. Jaa copi ta noque casticanti jaiqui.

¹⁶ Jaa copi ta jan hihcoinai non shinanaiya noque hahxonresiqui. Queenxon res hahxonti hahtipahnoxon ta nincacoinaibo hahxontijanishqui. Hahxoncatsihxon copi res hahxonti yohinihxon ta jan yohini quescabijaquin jaan hahxontihi, Abraham xohtabo hinanquin. Jahuen honantiyahpabo res ma bi jaa xohtahi nincacoinaibo rahsibi jahuen xohtabo sca janon ta Abraham hinantijanishqui. Jaa copi ta Abraham noquen xohta qui, jatihibichina.

¹⁷ Papan huishamani jai quesa tah qui: Mesco jonibo tah hen mia hicha xohtamayax-ihqui hihqui jaa joi. Papan jascajaha ta Abrahanen yohinishqui: Min yohihi quescabi ta jacointihiqui, Papa, hahquin. Non muhuatai bi Papan noque jihuematihu ta Abrahanen honannishqui. Jayaxihqui bo jariyamahi bi ta jaresscái quescapahbo jato Papan yohihi. Jaa rihbi ta Abrahanen honannishqui.

¹⁸ Jatihi ta miin xohtabo jayaxihqui Papan jaáh, hihcoinjaquin shinanquin. Yamayax-ihqui shinanthi bi hicha xohtaboyahpa sca jayanoxon nincacoinquin.

¹⁹ Cien baribo nocotaiya, yosiboscaa mahuati hochoma qescapahxon, jahuen haibo Sara jisi bi baque bihyosma janish rahma hihti yoxaboscai, jenquetsahxon baque bihtimascái. Non nescaphaj bi ta noquen baque jayaxihqui, hihqui.

²⁰ Papan yohini quesa rah ta jatimascaiqui shinanyamaquin. Hea rah ta baque hinanyamayaxihqui hihyamahi. Jascaxonma bi hashoan sca nincacoinquin. Min tah min hea hahxonyaxihqui, Papan.

²¹ Hen tah hen honanai. Min yohini quescabijati tah min hahtipahi. Min hea baque hinanthi tah hen honanai, hahquin.

²² Jan jascajaquin shinanni copi ta jaa siri Papan jisnishqui.

²³ Jaa siri jisnixon ta jaa joibi Papan huishamanishqui. Abraham jascabihí copi Moises huishamaquin.

²⁴ Abraham jascabihí copi res ma bi ta jascarihí non janon hihxon huishamanishqui, hea huetsabaan. Noquen hohcha non yamascanon ta noquen hihbo mahuanishqui, Jascuhue Papan jaáh.

²⁵ Hihquipish bi ta hahquirihbi teehihnishqui, Papan huenihah. Noque rihbi hahxonquin ta jascajanishqui. Jan huenicoinni non jointinín shinancoinaiya ta noque rihbi siri jisiqui.

5

Papan sirijaquin bichibo hahanjenimati jai

¹ Jaa copi ta non nincacoinaiya siribo sca noque Papan jisiqui hea huetsabaan. Noquen Hihbo Jesucriston noque hahxonah ta Papan noque sirijaquin bichiqui, siriresi non hahbetan jihuemon.

² Noquen Hihbaan noque hahxonni quen tah non noquen Papa betansca non nichí. Hahbetan nichibo sca tah non qui, jahuen jihuetahbó hahan hihti shinanai. Non hahbetanbi jihueyaxihqui honanax tah non hihti jenimascaí.

³ Jaa copi jenimaxon bi tah non tiromabo tenehax hashoan rihbi jenimahi. Tiromabo tenequin tah non coshi shinan bichi. Jascapa non bihtihu honanax tah non tiromajahabo bi htih jenimahi.

⁴ Hahan teneti coshiyahpasmaax tah non shinanyahpa sca non jatihi. Shinanyahpahax res sca tah non honanyahpa sca non jai, Papa janin non jihuethi honanax sca.

⁵ Noque ta jahuen yoshin siri noquen jointi janin niaxoniqui. Jaan sca ta noquen jointinin non honannon noque hihti honanmahiqui, noquehon jahuentiho queen noquen Papa jaiquin hihxon non honannon. Jaa honanxon tah non noquen Papa betanbi non hilcoini jihueyaxihqui non honancoinrihbih.

⁶ Shinanscanahue. Nincayosmabohax non mahuatihhi bi ta noque jihuemanoxon Cristo mahuanishqui, yosmabo non jai bi. Jahuen joti neten jonish ta noquen hohcha copi mahuanishqui.

⁷ Noquen jisi, huetsa ponte jihuetai joni jai bi tah non jaa jihuenon hihxon nohri jato rehtemati hahtipahyamahi, mahucatsihyamaquin. Jahuen siri amico jihuenon hihxon pari rah ta caibaan hahri jato rehtemati shinantihiqui.

⁸ Papan ta noque jascajaxonihqui. Hohchayahpabo non hihqui que bi ta noque copi mahuatihhi jeron Papan jaa raanxonnishqui. Jaa copi tah non honanai: Jahuentiho queen jan noquehon jaiquin ta Papan noque jismanishqui, noquen Hihbo Cristo raanxonquin.

⁹ Noque copi Cristo mahuani quen Papan noque siri jisiya cahen non Cristonahbo jaiya noque xahbanon noquen casticanti paqueyaxihqui.

¹⁰ Papan rahuibo non janí que bi ta jahuen baque noque copi mahuani copi noque sirijaquin bichiqui, jahuen jihuetahbo sca non janon. Cristo jihuerahbiscai quen ta hashoan rihbi sca noque jahuen jihuetahbo Papan sirijaquin jihuemayaxihqui.

¹¹ Jaa copi tah non sirijaquin shinanai. Sirijaquin shinani res ma bi hihti jenimaribipi. Noquen Hihbo Jesusen noque hahxonah tah non Papan baqueboscaax hihti jenimaribipi.

Adan betan Cristo

¹² Jaan noque hahxonah quen tah non honanai, hea huetsabaan. Jamenoni joni huesti ta hohchamenonishqui. Hohchatax ta mahuanica sca janishqui. Jaa xohtahi ta jatihibi sca hohchayahpa sca jacannishqui. Jaa copi tah non mahuanicabo sca non jai.

¹³ Papan Moises huishamariyamahi bi ta hohchayahpabo rahsi jaresscanishqui. Hohchataibohi bi ta Man tiromahibo copi tah hen mato casticanpaqueyaxihqui Moises huishamaquin jato yohiriyamanishqui.

¹⁴ Jaa bi ta Adan pecaho Moises janon caman mahuanicabo rahsi japonishqui. Rahma caman rihbi tah non jascapahbo rahsi jai. Adaman hahni quescajayamahax bi ta mesco hohchayahaz mahuanicabo rahsi non jai. Adaman bebonica janí quescajihbi ta Cristo sca noquen quiquin bebonica scah qui.

¹⁵ Hihcax bi jascapa rabe hiyamanish. Adaman ta noque mahuamanishqui. Criston sca ta noque queyoyamanox jihuemahiqui. Hohchatax Adan mahuanica hihni quescajihbihi tah non noque jai, hohchatax mahuanicabo sca. Hohchanish bi jihuemicabo sca non janon ta hihti sirijaquin Criston noque hahxonishqui, noquehon hihti shinanxon.

¹⁶ Adaman noque mahuamani que bi ta Criston noque jihuemahiqui. Hohcha hohchayahpa rahsi non hihqui bi ta Cristo copi Papan noque sirijaquin bichiqui.

¹⁷ Noquehon ta Papan hihti shinanihqui. Non nincacoinaiton ta hihti hahxonquin siribo sca noque jisiqui. Jaa copi honanquin sirijanahue, hea huetsabaan: Adan hohchani quen non mahuacoren mahuanicabo qui, cahnetima quescapahbo non hihpahoni bi tah non jascayamascai. Hihti huetsapah sca tah non jai, Criston noque hahxonah tah non queyosyosma jihue hihbotihi.

¹⁸ Jasca tah qui. Bebonica joni hohchamenoni quen tah non jatihibi sca hohchamisbo qui, casticantibo. Huetsan sca sirijaquin hahxonni copi sca tah non siribo sca qui, jihue hihbobo.

¹⁹ Hohchamenoxon Adaman noque hohchayahpabo rahsi hihmani quescajayamaquin ta nincanicaxon Criston noque Papan shinanyahpabo hihmahihqui, jahuen caisahbo sca.

²⁰ Noquen hohcha hihti jaroma hihqui honanahbo hihxon ta Papan Moises huishamanishqui. Hashoan jaroma non hihqui bi ta hashoan sirijaquin rihbi Papan noque hahxonribihiqui.

²¹ Hohchapan hinábo rahsi tah non hihpahoniqui, jenquetsahax hohchajomatimahi. Mahuanicabo rahsi tah non janíqui. Rahma tah non jascayamascai. Papan ta noque hihti hahxonihqui, Cristo noque raanxonnikon. Honanscanahue: Noquen Hihbo Jesucristo copi res tah non queyoyamanox jihuescái.

6

Hohcha qui mahuataibo, Cristo qui jihuetaibo

¹ ¿Papan noque hihti hahxonah non hashoan hohchacanatihin? ¿Noque hohcha sohuanon hohcha hohcharesnonhue hih non jatihin?

²Jascayamahi rahan. Mahuatahbo ta tiroma yoshiman hohchamayamascaiqui. Mahuatahbo sca tah non qui, jaan hohchamatimasca. ¿Jahua copi non hashoan hohcha benabonatihin? Hahyamaquin rahan.

³ Hahan honantijaquin ta mato jeneho hihquimatannishqui, hea huetsabaan, Jesucristo maton Hihbo hihqui honanahbo. Mihinquin hahcajaquin jene chicho mato hihquimatatanah tah man mahuascaibo quescanihqui, Cristo betan mahuanihbo sca. Jaa tah man honanscrai.

⁴ Jaa copi tah man hihquimatanah hahbe mihinahbo qui. Jaa hihquipi bi Papan jahuen coshiyaxon hahquirihbi teehihmahah quesca tah man behnabo sca jihuetai.

⁵ Hahbe muhatahbohax tah non hahbe teehiribihibo sca qui. Behna jihue sca tah non bichi.

⁶ Cristoyabi mato rehtenih quesca tah man qui, hea huetsabaan, maton shinan xeni man jenescanon. Man tiromati queenpahoni quescayamascanahue. Hohchapan yonotimabo sca janahue.

⁷ Mahuanixon sca tah non jahuentianbi hahquirihbi hohchati shinantisca.

⁸ Cristo betan non mahuaní quen tah non hahbetanbi jihuescái. Jaa tah non honanai.

⁹ Noquen Papan hahquirihbi teehihmahah ta Cristo hahquirihbi mahuatimascaiqui. Mahuatima jihuescai.

¹⁰ Noquen hohcha copi mahuaquin ta huestijaquin res noque sohuaxonnishqui, jahuentianbi mahuatimascai. Jihue hihbo sca jaax ta Papa queenai quescari jihuethqui, hahbetanbi.

¹¹ Matobo sca jascarihbinahue. Tiromahax tah hen mahuanihqui hihnahue. Mahuanish bi tah hen Cristonah sca qui, Papan ta hea jihuemahiqui hihnahue.

¹²Jaa copi hohchatí qui raquescanahue. Man tiromajati res ta Satanas hihti queenihqui. Jahuen shinan tiromabo man bihmis.

¹³ Mato tiromamanoxon ta mato bihcatsihquiqui. Bihmayamanahue. Hahqui hinamehtaxma noquen Papa Dios qui caya hinamehnahue. Mahuatipish bi rahma hahquirihbi teehihnica baqueboscaax Papa qui hinamehnahue. Ponteres jihuenahue.

¹⁴ Maton shinaman res tah man Moisesnin yohini quescacatsihqui. Jan yohini quescati hahtipahyamahax bi tah man Papa qui hinamehtax sca man jihuethi, Satanasnen yono yonohahma sca.

Joni hina quescapahbo

¹⁵ ¿Jahua sca non shinanti jain? Moisesnin yohini quescatima sca ta jaiqui. Hohchares-nonhue, Papan noque sohuaxonresnon ¿zihih non jatihin? Jahuentianbi tah non jascajaquin shinantimahi.

¹⁶ Nincanahue mato yohinon: Jahuen joni sca hihnoxon patoro qui hinamehtax tah man jahuen yonoti sca qui. Jaan yonohah tah man nincatihu. Jascaribhi: Hohchati qui hinamehtax tah man Satanasnen yonoti sca man jatihi, nincayosmascaax mahuanoxon. Papa qui hinamehtax tah man jahuen jihuetahbo man jatihi. Rahma rah tah man jaa honanscái.

¹⁷ Neateman tah man hohchapan hinabo hihpahoniqui, hea huetsabaan. Rahma tah man jascapahbomascai. Maton jointiboyaxonbi tah man Cristo bihniqui, caibaan mato yohihah.

¹⁸ Hohchati shinanbo man jai ta Papan mato sohuaxonnishqui. Papa qui hinamehtax tah man pontejaquin shinani sca man jihuetai. Jaa copi tah hen mato yocaxonquin Hahxon tah min jato jai, Papan, hahcrai.

¹⁹ Jaabi, hahquirihbi tiromamis hihxon tah hen mato yohihi, man nincanon hihxon. Tiromati qui tah man hinamehpahoniqui, hea huetsabaan. Hohchapan hinabo sca tah man janiqui. Jahuuen patoronen yonohah jahuuen yonotinin nincati jai hahcajahi tah man hohchapan hinabo hihpahoniqui. Tiromabi res nincayosmahi jihueta. Jascayamas-canoxon Papa qui sca hinamehnahue, jaa queenai quescari sca siri bi res jihuuenoxon.

²⁰ Hohchapan masajaha tah man ponte jihueyosmabo man japahoniqui.

²¹Jascaphabxonox tah man siri shinanbo bihyamaniqui. Man japhahoni shinanax tah man hihtimahscai. Tiroma hahcaibohax tah man mahuanicabo man iapahoniqui.

²² Rahma man hinaboh hiyamasca honannahue. Papan mato hahxonah tah man jahuen jihuetahbo sca jai. Jaa copi tah man hashoan ponte sca jihuetai jai. Papa betan queyoyamanox manatibo sca tah man qui.

²³ Jaton ribin jismaquin hahcayaquin ta hohchataibo Papan jismapaqueyaxihqui qui, jato masa masamascanoxon. Jato masajaxon bi ta noque hahxonrestihi qui. Noquen Hihbo Jesucristonem noque hahxonni quen tah non quevovama sca ianoxihqui non manatihi.

Hahan haxeti joi

¹ Caibaan tah man honanai, Papan huishamani joi. Mato sca tah hen yohihi, hea huetsabaan. Moises huishamani jai quesvari jihuetaibo ta jihueparihax Moisesnin yohini quesvari jihuetai jaiqui.

² Jahuem bene mahuanon caman ta jahuen haibo jascabihi hahbetan jihuetai jaiqui hih ta jaiqui jaa joi janin.

³ Jaa copi ta jahuen bene jihueparihax bi jaa haibaan huetsa bebo bichiya hahqui yohuan-cantihiqui, jaa haibo ta tsini qui hihcanci yohuani. Moisesnin yohini jai quescayamahi jihuetai quen jascacani. Hihcanci bi jahuen bene mahuanon pecaho huetsa sca jaa haibaan bichiya Tsini tah qui hihyamacani.

⁴ Mato tah man jascarihibi. Maton hohcha copi Cristo mahuanon quen tah man Moisesnin huisha janin jai casticanti qui man cahnescatihi. Mahuanon copi sca tah man huetsanah sca qui, Cristonah sca. Jaa mahuatipi bi ta Papan hahquirihbi teehihmanishqui. Jahuem sca tah man qui. Papa queenai quescra sca man siri sca jihuemon.

⁵ Papan shinanjomaboxon tah non hicha tiromabohahponiqui. Jascayamanahue hahca, hashoobi bi res tiromacatsihsciai. Jaa copi tah non mahuanicabo hihpahoniqui.

⁶ Hohchanish bi tah non mahuanicabo hiyamasca jai. Cristo bichish tah non noquen hohcha copi mahuascanibio sca qui. Behna shinanyahpabo sca tah non qui. Papan jihuetaiboxon tah non jaa queenai quescajquin noquen jointinin non jaa hahxonai. Noquen shinan xeniya jihueyamasca.

Hohchapan noque pantehi

⁷ ¿Behnaboxon sca shinanah, Moisesnin joi jenquetsahpa hin? Moisesnin joi ta tiroma qui hih tah non jatimabiresai, ni jahuentianbi. Jaa quirica yamaxon tah hen heen hohcha hilta jaroma hihqui hen honanyamaquehanai. Caibaan jahubora non bichincatsihqui ta tiroma qui. Jaschah tiroma hihqui tah hen Moisesnin quiricajomaxon hen honanya-maquehanai.

⁸ Tiroma shinanyahpahax tah hen tiromayamahue hahca bi hohchacatsih sca janiqui. Jascapa hohcha hohchamis hea hihqui tah hen honanyamaquehanai, Moisesnin huishanijomaxon.

⁹ Huetsa tian tah hen jahubabi Papan joi honanyamapahoniqui. Tiromayamahue Papan hea jaah bi tah hen hihti tiromati res queenpahonihqui.

¹⁰ Jaa copi ta hea mahuatihen honannihqui. Papan joi nincayosmahax ta mahua-coin sca hea janiqui. Papan joi hahan ponte jihuetai hihqui bi tah hen nincayosmahax mahuanica sca janiqui.

¹¹ Hohchayamahue hahca bi tah hen hihti tiromati res sca queennihqui. Hen tah hen hihti tiromatimahi hihquish paramehsciai. Parametax tah hen hohchatax mahuanica sca janiqui.

¹² Jaa copi honannahue, hea huetsabaan. Moisesnin huishani ta Papan joi qui. Papan noque honanmani joibo ta siri bi res qui. Ponte bi res hihcoinaibo rahi can.

¹³ Papan huishamani joi ponte que bi tah hen jan huishamani copi mahuatihai jai ¿hih hen yohuani jatihin? Hiyamabiresi rahan. Hohchatax caya tah hen mahuatihai. Hihti nincayosma hea hihqui hen honanscanon ta jaa joi Papan huishamanishqui.

¹⁴ Papan huisha ta jahuen yoshin siriyahxon huishacannishqui. Jaa huesti nincatihai bi tah hen tiroma yoshiinan shinanmaha jaamajaquin sca shinanai.

¹⁵ Jascajati ta jaiqui hihxon bi tah hen hahyamahi, sirijati honanxon bi. Jascajatima ta jaiqui hihxon bi tah hen jaabi hahcái. Tiromascaax tah hen shinamehtai, Jhua copi hen jascajquin hahcaini hihqui.

¹⁶ Queencoinyamahax bi tah hen tiromahi, hih tah hen jai. Hen jascari yohuanah ta hahan honantihai qui, Papan joi siri hihqui hen mato yohihi.

¹⁷ Jasca tah qui. Queencoinxona bi tah hen tiromajaquin hahcái. Jenquetsahax bi tah hen pontetimahi. Hohchapan heen jointi tiromajaquemahax tah hen hihrescahini hohchatai.

¹⁸ Heanbi shinanax tah hen siripi jihuetaimahi, hohchapan heen shinan tiromajaquemahax. Sirijaquin shinanax bi tah hen yosmajaquetai. Hen shinanai quescabijaquin hahcatisihquin bi tah hen hahtipahyamahi.

¹⁹ Jascati ta jai qui hihnicahax bi hahcoinyosmahi can. Jascatima ta jaiqui hihquish bi jascabihi.

²⁰ Queencoinyamahax bi tah hen jointi chicho hohchapan tiromajaquemahax jascabihi tiromahi.

²¹ Jascanica tah hea qui. Sirijaquin shinanai bi ta tiromati res teema qui.

²² Moisesnin huishani joi jai quescabih tah non jihueta jai hihquin tah hen pontejaquin shinanai.

²³ Jaa huisha joi siri hihqui honanxon bi ta jaamajamis joni hea qui hen honanribihi. Sirijati shinanax bi tah hen sirijayosma hea qui. Hohchapan tiromajaquemahah tah hen jascapahi.

²⁴ Jaa copi tah hen hihti masa shinanai. Mahuacatsihbahinaxon shinangquin hahcaja tah hen jai. Hen hihpahoni quescayama sca jihuexon tah hen hea yanapannica sca queenai.

²⁵ Jaa hea yanapannica ta Cristo qui. Hahxon tah min hea jai, Papan. Jesucristo raanxonquin tah min hea yanapanai hah sca tah hen jai. Jascá tah qui, hea huetsabaan. Papan joi ta siri qui hah tah hen jai, heen shinaman shinanaxon. Jascajaquin shinanaxon bi tah hen jaan yohini quescari jihueyamahi.

8

Dios Yoshiman noque jihuemahi

¹ Hashoan sca hen mato yohinon nincanahue, hea huetsabaan. Non Cristo qui hinamehtaibo yohihi ta Jascabi casticanabo sca banenahue hah Papan noque jatimahiqui.

² Min Cristo qui hinamehtaiya ta jahuen Yoshiman mia jihuemahiqui, hohchapan hiná hihyamascanon. Jaa copi ta mia muhuati Papan yohiyamascaiqui.

³ Noquen yora quescapahya jan jonon ta jahuen baquebi Papan raannishqui. Jonish ta noquen hohcha copi muhanishqui. Jaa muhuamaquin ta noquen hohcha Papan noque queyoxonnishqui. Jan yohini quescabih non jihueta hahtipahyamahi bi ta noquen hohcha sohuaxonnishqui, jascabi casticana non banequehanai.

⁴ Noquebi non queenai quescayamascai bi jan yohini quescari non jihuemon sca ta jascajanishqui. Dios Yoshiman jahuen shinan noque hinanah tah non jihuecoinscrai. Papan shinanyahpabo sca.

⁵ Noquenbi non shinanai quescra jihuecatsihxon tah non Satanas queenai quescajaquin shinanai. Dios Yoshiman shinanyahpaxon tah non Papa queenai quescajaquin shinanai.

⁶ Hahmebi shinanax jihuecatsihquibo ta masa masanoxon muhuathiqui. Dios Yoshiman shinan hinanah ta jascapahma qui. Jascapahmabo ta queyoyamanox mananica qui, siri shinanya sca jihuemah.

⁷ Hahmebi shinanax jihuetaibo ta Papan rahuibo qui, jahuen joi nincayamahax copi. Hohchapan pantehah ta nincati hahtipahyamacanahiqui.

⁸ Jascapah ta Papan jenimayohuanquihnyamabiresiqui.

⁹ Mato tah man mahmebi shinanax jihuetaiboma qui. Maton jointi janin jahuen yoshin siri Criston niahah tah man jahuen shinanyahpabo sca qui. Criston yoshinjomabo ta Cristonahmabo qui.

¹⁰ Maton jointi janin Cristo jihuetai quen tah man jihuecointihi, Papan mato siribo jisi copi jihuecoini. Maton yora hohchapan muhuamaha bi tah man jihue hihbobo sca jacoinyaxihqui.

¹¹ Noquen Hihbo Jesus huenihihixon ta mato rihbi yora behnaya Papan huenihihniyaxihquihi. Jahuen yoshin siri maton jointi janin jai quen ta jayaxon mato behnajaxon sca huenihihniyaxihquihi.

¹² Jaa copi tah non noquenbi shinanax quescayamahi non jihueta jai, hea huetsabaan. Behnabo jihuetai sca tah non jai.

¹³ Matonbi man shinanai quescari jihuetax tah man jascabi sca muhuatahbo man jatihi. Dios Yoshin queenai quescajaquin tah man man japhahoni shinanbo jenebahinti jai. Jaatian tah man noquen Papa betan jihuetaihi, jahuen baqueboscaax.

¹⁴ Jahuem yoshin siripan shinanmahibro rahihi tah non jahuen baquebo qui.

¹⁵ Dios Yoshin tah man bihnihi, hea huetsabaan, hohchati qui hinamehyamascanoxon. Papan baquebo sca janoxon tah man jahuen yoshin siri bihnihi, hea huetsabaan, jahua copi raquetimascai.

¹⁶ Jaan shinamaha tah non noquen Papa Dios yohiquin Papan hah non jai.

¹⁷ Noque jahuen baquebo quen ta jahuen jihue hihbobo noque hihmayaxihquihi. Cristo jaa hinanquin ta noque rihbi jaabi rihbi hinanyaxihquihi. Cristo betan tiromabo tenehah tah non hahbetan rihbi Papan jihuetaihi jahuen hihboyaxihqui.

¹⁸ Hean shinanah ta Cristo betan sca hihboscaxon non tenepahoni non jahuama sca jisyaxihquihi.

¹⁹ Cristoya Papan noque hihbomayaxihqui jenquetsahpa hin hihxon ta manacaniqui, hea huetsabaan. Papan jonijani jahuaborabo jatihibichin ta hihti jiscatsihquin manacaniqui.

²⁰ Jahuen jahuaborabo queenai copima bi ta queenxon res Papan jato yohinishqui: Hen mato behnajanon caman manaresnahue, hahquin. Jaa copi ta rahma caman manácaniqui.

²¹ Payonicabó jayamascanon ta Papan jato behnajayaxihqui. Jaan jahuen baquebo jato hihbomahi tian ta jatihibi rihbi behnajayaxihqui. Jaan jahuen baquebo jato behnajanon caman.

²² Jan jonijani jatihibi ta payomisbonish rahma caman jascapah rahsi qui. Jascapahboxon ta tene tenecaniqui, Papan jato behnajanon caman.

²³ Jahuen jahuaborabo behnacahincatsihqui hihqui quescaribhi tah non jato betanbi noque rihbi jascaribhi. Noquen yora behnabo Papan noque hinanti tah non queenai. Texe rihbi jan noque hinantiani non bihcointihi tah non honanrihbihi.

²⁴ Noquen hohcha noque sohuaxonxon ta Papan yohinishqui, Hen maton yora behnajayaxihnon mananahue hahquin. Jaa copi tah non manatai, noquen yora behnabo jisriyamaxon bi bihcatsihqui. Jisriyamahibo ta manánicabo qui. Jisresscaax cah non jisti manayamascaequehanai. Jisresscaax tah non jisyanoxon manatahpan hih non jayamahi.

²⁵ Jaa copi tah non jisyamaparixon bi non jisyaxihqui manáhahnan non tenehi.

²⁶ Non coshi pishinaiya ta Dios Yoshiman noque yanapaniqui, coshi shinan hinanquin. Jayaxon tah non teneti jai, noquenahbi noquen coshin teneti hahtipahyamaxon. Yocati honanyamaxon tah non Papa queenai quescajayaquin texe yocácai. Jaa copi ta Dios Yoshiman noque yocaxoniqui. Joinma bi ta jahuen shinaman noque hihti yocaxoniqui.

²⁷ Papa queenai quescabijaquin ta Dios Yoshiman noque yocaxoniqui. Jaan shinanai ta Papan honanrihqui. Jatihibichin shinanai honannicaxon honanquin. Jaa copi ta Dios Yoshiman noque yocaxonai jaan yocaxonai quescabijaquin noque hahxonihqui.

Tenecoinaibo

²⁸ Mesco tah non masa tenehi, hea huetsabaan. Jaabi tah non tenexonai. Noquen jisi jascapahbo tiroma que bi ta siri sca noque hihmanoxon Papan noque jascapahbo huinomahiqui. Jaa copi ta noque hahan jan queenai noquebo qui jascapahbo noque huinomahiqui, hea huetsabaan. Non tah non honanai: heen baquecoin janoxihnahue noque janixon ta jascapa masa noque tenemahiqui.

²⁹ Jahuenahbo non jayaxihqui honannihxon ta yohinishqui: Heen baquecoin hihqui quesca sca tah man jayaxihqui hahquin noque yohiquin. Jaa jahuen baque noquen huetsahax bi noquen Hihbo rihbi hihnon ta jascajaquin yohinishqui.

³⁰ Jascajaxon ta Heen baquebo sca janoxihnahue hah sca noque janishqui. Jascajaxon sca Heen siri baquebo sca janahue hahscapro. Jascajaxon sca Heen baque betanbi hahbe hapobo sca hihnahue hahquin.

³¹ Hen mato yohihah nincaxon, honannahue, hea huetsabaan. Papan to noque hihti hahxonihqui. Jaa copi ta noquen rahuibo qui non raquetimabiresai.

³² Noquen hohcha copi jahuen baque mahuati jahui bi ta Papan jaa panteyamanishqui. Pantexonma ta hashoan sca jomanishqui. Jahuen baque yohuashihxonma ta noque hinanxon jaya jatihibi rihbi noque hinanrihbiyaxihqui.

³³ Papan noque caisah ta tsoanbi sca noque caheti hahtipahyamahiqui. Siribo Papan noque jisiya cahen tsoanbi noque non japahoni cahetimasrai.

³⁴ Cristo ta mahuatipish bi hahquirihbi teehihnishqui, Papa mecyaho sca hihti hihbosca tsahonoxon. Jaan ta noque yohuanxoniqui. Jaa copi ta Tiromabon hah tsoanbi noque jatimahiqui.

³⁵ Cristo noquehon shinanyamascanon hihxon noque jenemacatsihquin bi ta tsoanbi jahuejati hahtipahyamahiqui, hea huetsabaan. Jaa ta jascabihi noquehon shinanrihqui. Non yomanahaiton ta noquehon shinanrihqui. Non masa shinanai bi noquehon shinanquin. Caibaan noque tiromajahi bi noquehon shinanquin. Non pihan hihquiya bi rihbi, non chopanma hihquiya rihbi. Noque tiromajacanmis hih non jai bi. Noque rehtecanmis hih non jai bi. Criston noque jenenon hihxon hahquin bi ta tsoanbi noque Cristo jenemati hahtipahyamahiqui.

³⁶ Papan huishamani joi jai quescari jaiboya bi ta noquehon jaashinanihqui.

Minabo non hihqui copi ta noque rehtebahinacaniqui, Papan. Yohinahbo rehteresquin hahcajaquin ta noque queyocaniqui hihqui jaa huisha joi.

³⁷ Jascapahbo non tenehi bi ta noquen Hihbaan noque shinanbehnoyamahiqui. Noquehon hihti shinanxon ta hashoan sca non teneti hahtipahnon noque coshijahiqui.

³⁸ Noquehon shinanxon ta noquen Hihbo Jesucristo Papan raanxonishqui. Noquehon shinanquin ta jahuentianbi Papan noque jenebahaintimahiqui, ni jenquetsahpabi. Non muhauatai bi noque jeneyamaquin. Non jihuetaiya jeneyamaribiquin. Yoshiman

sontarobaan bocabi ta jaa noque jenematinahiqui. Main jai tinintibaan jenemaya-maribiquin. Rahma jaibaan rihbi jenemati hahtipahyamaquin. Jayaxihquiaan rihbi hahtipahyamaribiquin. Quiquin tiroma yoshiman bocabi hahtipahyamaquin.

³⁹ Ni naihoh jaibaanbi, ni nai naman jaibaan rihbi. Ni jahuatohonbi ta noquen Papa jenemati hahtipahyamahiqui.

9

Jahuen baquebo Papan caisni

¹ Cristo queenai quescajaquin tah hen mato yohicoinal, heen huetsabaan. Hen tah hen mato paranyamahi. Dios Yoshiman hea shinanmaha tah hen heen jointiboyaxonbi mato yohiscai.

² Hen tah hen hihti benatai. Heen caibo shinanxon tah hen heen jointi xecahihnihi.

³ Heen caibaan Cristo nincacoinpahinon. Heen caibobi heen caibo hean nincamaha nin-cacoincanpahinon. Jaabo bixinxon Criston hea potahah que bi cahen jaabo jahuenahbo sca hihquiha hea jenimaquehanai.

⁴ Israelito ta Papan caisahbo janish qui. Heen baquebo janahue hah ta Papan jato janishqui. Jahuen xaba rihbi ta jato machi xabacananishqui. Hen mato hahxonnon hen mato yohihi quescabijaquin hahnahue jato jaquin. Jascajaxon ta jahuen joi siri rihbi huishamaxon hinannishqui, jihueta honanahbo. Huishaxon ta jato honanmanishqui, Papa yocati honanahbo. Jaa huishapan rihbi ta jato hahxonquin jihuemanica jan raanx-ontihi jato yohirihbinishqui.

⁵ Jaton xohta xenibo ta Papan caisnihbo rahsi janishqui. Caisxon ta jato yohinishqui, jaton chinibaquebo jan hahxontihi yohiquin. Cristo rihbi ta jaton caibo qui, Quiquin Hihbo. Jaa ta noquen Dios qui. Jaa yohihi tah non Mia tah min Xaba Hihbo qui, Hihbon, hihqui. Jascacoini rahan.

⁶ ¿Heen caibo nincayosmabohiya jahua yohuan sca hen jatihin? ¿Papan ta jato yohinhxon bi jan yohini quescajamaquinma jahuen jonibo hahxonyamascaqui hih hen jatihin? Jahuentianbi tah hen jascatimahi. Papan caisahbo ta judio rahsima qui.

⁷ Abrahanen chini baquebo jaabo hihqui que bi ta Mato jatihibi tah man Abrahanen xohtabo qui hah Papan jato jayamahihqui. Jascanaxonma bi ta Abraham Papan yohinshqui: Isaaquen chini baquebo sca hihnon hean mia hinanyaxihquibo miin xohtabo ta jayaxihqui qui.

⁸ Abrahanen chini baque copi jaa jimi jahuen jenabo hihqui que bi ta jaa rahsiboma Papan baquebo qui. Jaan Abraham hinantijani jonibo caya ta Abrahanen xohtabo qui, Papan jisí.

⁹ Papan yohini quescia tah qui: Mihqui joribiyanoxon tah hen mia yohihi, min hahqui baquejaha ta miin haibo Sara baquexoyahpa sca jayaxihqui qui hah ta Papan janishqui Abraham yohiquin.

¹⁰ Yosiboscaaax noquen xohta Isaaque yamanica janí quescarihibi ta jai qui. Jahuen haibo Rebeca baque bihyosma que bi ta Papan yohihah jahuen benen hahqui baquejati hahtipahscanishqui, rabe nane sca jahuen baque janon.

¹¹ Jaa rabe nane cainrihyamahi bi ta Papan yohinishqui: Miin bihmeno baquen ta jahuen chini teexontihi qui, hahquin. Jaabo rabe cainrihyamaxon jahuabi siribojaquin hahriyamahi bi ta Papan yohinishqui, jan shinanai quescabi sca janoxihnon. Jahuabi rihbi tiroma hahriyamahibaan bi Papa jascari yohuani.

¹² Jaabaan hahcái copima bi ta hahmebi queenxon Papan Jacobo caisnishqui. Jaa copi ta Rebeca yohinishqui. Miin bihmeno baquen ta jahuen huetsa teexontihi qui hahquin.

¹³ Jahuen joi huishamaxon Papan yohini quescia ta janishqui: Jacobonenhon jenimaxon bi tah hen Esau queenyamabiresai hihqui noquen Papa.

¹⁴ ¿Jan jascani honanax jahuhah sca non jatihin? Papan ta tiromajahqui hih tah non jatimabirestihi.

¹⁵ Jaan Moises huishamani quescia ta jai qui. Heabi queenxon tah hen caisai. Jahuen chinihon queenax copi res tah hen jahan shinanai hih ta jai qui, Moisesnin huishani joi.

¹⁶ ¿Jahua copi Papan noque jihuemahiquin? ¿Non jihuecatsihqui copi nan? ¿Non coshi coschiahinai copi nan? Jaa copima bi ta noque caisnixon copi noque jihuemahiqui.

¹⁷ Jan Faraon yohini quescia tah qui: Heen coshi jato jismanoxon tah hen mia quiquin hapomaniqui, Faraonen. Hea coshi hihqui jatihibi janin jihuetaibaan honanahbo hilxon tah hen mia nea mai hihbomaniqui. Jasca ta Papan huishamani joi jaiqui.

¹⁸ Jaa copi honannahue: Queenxon copi res ta noquehon shinanihqui. Queenxon copi rihbi ta huetsa rihbi jahuen jointi xehponihqui.

¹⁹ Jaa copi rah tah man hea yocatihu: ¿Jahua copi sca Papan noquen hohcha noque hihbomahiquin? Jan queenai quescajaquin ta Papan hahquiqui, tsoanbi tah non jaa jascayamahue hahti hahtipahyamahi hih sca rah tah man jatihi.

²⁰ Man hea jascahah bi tah hen yocatihu, ¿Jahua hihxon man noquen Papa Dios joi bichincatsihquin? hahquin. Hihbo hihxon ta jaa queenai quescabijaquin Papan hahquiqui. Quentijanicaton quentijajaquin hahcai quesca tah qui. Yohuanti hahtipahxon Jahua copi min hea poo hahyamahaquin hah quentipan jatihiquin? Jascayamabiresi.

²¹ Jaa queenai quescajaquin ta quentijahnicton quentijahiqui. Queenxon ta jahuen mapo toncobihxon quenti huestijaxon quene queneya poojascatihiquin.

²² Jaa queenai quescajanicaxon ta Papan jascajaribihiqui. Caibo jonibo ta tiromabo picotihqui, chacabahinti res. Tiromabo casticannica Papa hihqui non honannon jato casticantih bi ta Papan jato tenetenehiqui. Jahuentiho coshi noquen Papa quin non honannon ta tiromacahinaibo tenehihqui.

²³ Caibo rihbi ta hahan jan shinanaibo qui. Jahuen hihti siri shinan noque hinannoxxon ta noque jonianishqui. Jahuentiho siribo shinan jaan noque hinantihiquin non honannon ta jato tenerihbiqui.

²⁴ Jahuen caisahbo tah non qui, hea huetsabaan. Caibo judiobo, caibo rihbi judiomabo ta noque caisnishqui.

²⁵ Oseas Papan huishamani jai quesca tah qui:
Jahuen joni hiyamapahonibo ta Heen jonibon Papan mato jatihiqui. Jan queenyamaphonibo ta Heen siribon mato jatihiqui.

²⁶ Huetsa janin jaibo yohihi sca Mato tah man heen joniboma qui jato janixon ta Mato tah man heen baquebo sca qui, jihuemanicahton baquebo, hah jato jatihiqui.

Jasca ta Oseasnen quirica janin jaiqui.

²⁷ Isaías ta jascapa joi rihbi Papan huishamanishqui: Israel baquebo hichahax huean quexxa mashi bero hicha jai quescarai bi tah hen texe pishca res jato jihuemayaxihqui, texe sca queyoquin, hih ta noquen Hihbo jaiqui.

²⁸ Jan yohini quescabijaquin ta noquen Hihbaan jaiqui, hahcoinquin. Histon bi res ta hahtihiqui jatihibi janin. Jasca ta Isaíasnen huishani joi jaiqui.

²⁹ Isaíasnen ta nea joi rihbi huishamanishqui:

Noquen naihoh queha Papan noque pishca texejayamaha tah non Sodon jema quesca queyónihbo non jaquehahnai. Gomorra jema janin queyonihbo quesca tah non jaquehahnai, queyobahinah.

Judiobo yohihi ta Isaías jascanishqui.

Nincacoinaibo betan judiobo

³⁰ Judiobo casticanxon bi ta jahuen jonibo Papan bichiqui. Jaa copi honannahue, hea huetsabaan. Judiobaan nahuabaan ta Moisesnin joi honanyamapahonishqui. Papan siribo jati ta shinanyamacanpahonishqui. Jascapahbo que bi ta Cristo qui hinamehtaiton Papan jato sirijaquin bichiqui.

³¹ Judiobo ta hinamehyosmabo janishqui. Papan yohihi quescabijati ta jaiqui hihquish ta tee teepahonishqui. Non sirijaquin hahcai copi tah non Papan siribo qui hihquish ta coshi coshicannishqui. Jascahax bi ta Papan yohini quescayamacannishqui. Huetsapa-haquin. Jaa copi ta Papan jato bihyanishqui.

³² Papa hihcoinai shinanax bi ta hahqui hinamehxonma jaton coshinbi Papa qui nocohihnat shinancannishqui. Bahin naracatai macamahhuan qui joxcorohтай hahcayaquin ta hahcannishqui, jaamajaquin.

³³ Jascapahbo ta Papan huishamanishqui:

Jistahi man. Maton hani jeman tah hen macamahhuan janahi, bahi xehpoquin. Man hahqui joxcorohmis. Jaa merahax man bahinma sca camis. Jaa hen janahi qui hinamehtaibo tah hen hen yohihi quescabijaquin hahxoncointihi.

Jascá ta Isaíasnen huishani joi jaiqui.

10

¹ Jan jato jihuemanon noquen Papa qui heen caibo hinamehpahinon hih tah hen jai, hea huetsabaan. Hinamehtahbo hihxon tah hen jato yocaxonai.

² Papan babin nihti shinanax ta coshi coshicaniqui, heen caibo. Jascapahbohax bi ta honanaxma nihcanihqui caresi.

³ Papan siribo jenquetsahpabo jihueta jaiquin ta honancatsihyamacaniqui. Jaa honanaxma bi ta jaabaanbi shinanai quescajaquin tanatanacaniqui. Jascajaxon ta Papa nincacatsihyamacaniqui.

⁴ Nincacoinax ta Cristo qui hinamehcanquehanhiqui. Papan huishamani joi ta Cristo yohihi joi qui. Papan jisíta Cristo qui hinamehtaibo rahsijahuen siribo qui. Non honannontajaan jaa joi huishamanishqui.

⁵ Moisesnin ta jaa rihbi huishamanishqui: Jaan jato siribo jisnon hihxon Papan yohini quescajaquin hahcaibaan ta hahrestimahiqui. Hahcoincatsihquibohax tah man jan yohihi quescabihijiuheti jai, jahuabi ninctati pishinmahaxma, hah ta Moisesnin janishqui.

⁶ Cristo qui hinamehtai jahuen siribo ta huetsapahbo qui. Huetsa shinanyahpabohi yohihi ta huetsa quirica huishaquin Moisesnin yohirihbinishqui. Miin jointinin yohuani tah min Tsoa cahra naihoh catihiquin hih min jatimahi. Tsoan Cristo botomatihiquin hih ta jacatsihquiqui jaa joi.

⁷ Tsoa cahra mahuanihbo janin botopaqetax joti hahtipahiquin hah tah man jatimaribih. Mahuanihbo janin caxon tsoan Cristo bexontihiquin hihyamanahue hih ta jacatsihquiqui jascari. Cristo ta hocho qui, jaan yohihi tah non hahtipahyamahi hihyamanahue.

⁸ Papan huishamani joi jai quesca tah qui: Heen joi ta mia hochoma qui. Miin jana janinbi tah qui, miin shinan janinbi tah qui, hih ta jaa huisha jaiqui. Jan yohihi ta Cristo joi qui, non hahqui hinamehtaibo Papan noque sirijaquin sca bihtihi jai.

⁹ Noquen Hihbo Jesus ta Papan hahquirihbi huencioinnishqui hihxon, jointinin hihcoinai shinanxon, miin janan rihbi Jesus ta heen Hihbo qui hihquish tah min jihue hihbo sca min jatihi, Papan jihuemahah.

¹⁰ Noquen jointinin hinamehxon, noquen janan rihbi non Papa yohihiya ta jaan noque siri jisiqui, noque jihuemanoxon.

¹¹ Papan huishamani jai quesca tah qui. Hihcoinai shinanax hehqui hinamehtaibo jatihibi tah hen hean yohihi quescabijaquein hahxoncointihi hihqui.

¹² Mesco jonibo rahsi noque jonjanixon ta judiobo jascajaquin yohixon judiomabo rihbi jascajaquin rihbi Papan yohihiqui. Hea hihbojahue Papan hih non jaah ta jaabahinxon noque hihti hahxonihqui.

¹³ Jaa yohihi ta Papan nescajaquin huishamanishqui. Hea hihbojahue Papan hihquibo rahsi tah hen jihuemayaxihqui, hihqui.

¹⁴ Hihcoinai shinanyamaxon ta jenquetsahaxon bi Hea hihbojahue Papan jati hahtipah-timahiqui tsoanbi. Jahuen joi nincayamanihxon ta hihcoinjaquin shinanti hahtipahyamaribicaniqui.

¹⁵ Tsoanbi raanyamahah ta tsoanbi rihbi Papan joi jato yohiyamahihqui. Tsoanbi yohiyamahah ta tsoanbi rihbi nincayamahiqui. Jahuen joi nincayamanixon ta hihcoinai shinanyamaribicaniqui. Hihcoinai shinanyamaxon ta jenquetsahxon bi Hea hihbojahue Papan jatimaribicaniqui tsoanbi. Jaa copi ta non raanah hihti siri qui, huishani joi jai quesca. Siri joibo noque yohinoxon nocotaiya tah non hihti jenimatihi hih ta jaiqui jaa huishani joi.

¹⁶ Joi siri nincamaha bi ta jatihixonbima nincacaniqui, caibaan res. Isaíasnen ta nescajaquin jaa yohinishqui: Miin joi hen yohihah bi ta nincayamacaniqui Hihbon hahquin.

¹⁷ Hen yohihah quesca tah qui, hea huetsabaan. Jaa joi siri ta Criston joi qui. Jaa joi siri nincamaha pari ta hihcoinjaquin shinancantihiqui.

¹⁸ Tsoanbi jato nincayamanishqui? Noque yocacah tah non nincamaquin rahan hah non jatihi. Huishani behua jai quesca tah qui:

Jatihibi janin ta yohihi bocannishqui. Jonibo yama sca jaiton caman ta yohihi bocannishqui

hihqui jaa behua.

¹⁹ Yohihah bi tsi ra judiobaan honanyamaphonishquin hih sca rah tah non jatihi yocacahi. Honanquin rahan hihxon ta Moisesnin nescajaquin sca huishamanishqui, Papan huishamaha:

Maton nahuabohon shinanxon jato sirijaquin hahxonquin tah hen mato notsimayaxihqui. Honanma nahuabohon shinanxon tah hen mato sinamayaxihqui

hah ta Moisesnin huishaquin janishqui.

²⁰ Isaíasnen ta hashoan sirijaquin sca yohinishqui, nescajaquin:

Maton nahuabaan ta benayamaxon bi hea meranishqui. Jaabaan quenahahma bi tah hen jato qui caniqui

hihqui.

²¹ Judiobo sca yohiquin ta nescajanishqui Heen mequen rabe sanaxon tah hen jato Benahue Benahue jababinahi. Hen jato quenababinaha bi ta nincayosmaboxon joi bichinrescaniqui. Papa jascari yohuanai ta Isaíasnen huishamanishqui.

11

Nincacoinaibo Papan baquebo

¹ Jahuen jonibo Papan potabahinyamanishquin yocacah bi tah hen Hahyamaquin rahan hahcai. Hea rihbi tah hen judiobo qui, Abrahanen chiní baquebo can, jahuen xohta Benjamin baquebo.

² Papan ta jahuen caisahbo potabahinyamahiqui. Papan huishamani joi jisxon tah non jaa honanai. Papa yohiquin ta Elíasnen nescajanishqui, israelibo cahequin:

³ Papa Dios. Miín joi yohinicabo ta rehtecanhxqui. Tsoanzi mia shinanyamascanon hihxon ta janoxon mia yocatibo potojaquetancanhoxqui. Hea huesti banetaiya sca ta retequín bi cahnexon hea benacaniqui, hea rehtenoxon, hihqui.

⁴ Elíasnen jascahah bi ta Papan yohinishqui: Jascama tah qui. Siete mil bebo tah hen paxajahoqui. Jaabaan ta santo qui raboxonon tisquihapaqueyamahiqui hahqui.

⁵ Rahma ta jascarihbiqui, hea huetsabaan. Texe judiobo nincayosma que bi ta noquehon shinanxon texe pishca huestiboa sca Papan noque caisihqui.

⁶ Jaan noque caisah ta non hahcai copima qui. Jaan noquehon shinanxon copi res. Non hahcai copi res noque caisti jaxon ta noquehon shinanxon res caisti yamascaquehahniqui.

⁷ Jaa copi nincanahue, hea huetsabaan, hen mato yohinon: judiobo ta Papan siribo hihcatsihquish bi hihiyamacannishqui. Papan caisahbo res ta jahuen siribo qui. Texe ta nincatima shinan sca Papan hinannishqui.

⁸ Huishan joi jai quescas tah qui. Honanyosmati shinan ta Papan jato hinannishqui. Beroyahpaxon bi jisyamahabo ta jato mehenishqui, pabinquiyahpaxon bi nincayamahabo jato mehequin. Rahma caman ta jascapahbo qui hihqui jaa joi.

⁹ David yamanica ta jascarihbibi yohuannishqui, nincayosmabo yohiquin: Papan baquehihcamaxon pipi pipichaeton bi Papan jato yahtanpahinon. Jaton pitin paranduin hahcajaquin jan jato yahtanxon tiromajapahinon. Siri siri tah non jai hihquibaan bi jan tiroma bi res jato qui paquepahinon. Rohahihriti shinanaiboya bi jato casticanpahinon. Jaan jato tiromajabahinon.

¹⁰ Benchecahinxon quescajaquin jahuabi sca honanyamacanpahinon. Jascabi sca huehro huehrocanas quescas sca jaahbo jato hihuejapahinon hihqui jaa huishani joi.

Judiomabo Papan jihuemahi

¹¹ Jaa copi tah hen yocacahai: ¿Cristo jenebahinax jascabi sca Papan rahuibo jaya mayaxihcanhquin? Hihiyamahi rahan. Jaabo bahimma cahiya ta jaton nahuabo sca Papan sirijaquin bichiqui. Jan mato sirijaquin bichi jisish ta jaabo rihbi Papan bahin sca nihibinoxon Papahon queenrihbiyaxihsanahui.

¹² Jaabaan noquen Hihiyabon potabahinaiya ta jatihibi janin sca Papan joi siri nocotihqui. Judiobo jahuen shinan siribo bichinxon ta mato sca jaa shinan Papan sirijaquin hinanihqui. Jaa copi ta judiobaan hahquirihbi jaton shinan pontehax Cristo qui hinameh胎aya hashoan sca Papan mato hihui hahxonihqui.

¹³ Hen mato yohinon nincanahue judiomabon. Jahuen joi siri hen mato yohinon ta Papan hea mato qui raannishqui. Jaa copi tah hen coshin bi res teetai.

¹⁴ Hihui queentsain, huestiboa tahni hehbe judio Cristo qui hinamehnon hihquish tah hen coshin bi res teetai, Papan joi siri yohihi. Jaabo rihbi Cristo betan jihuetai tah hen hihi queenai.

¹⁵ Jahuen judiobo potabahinxon ta jahuen sinatahbo hihpahoni mato Papan sirijaquin bishnihqui. Hahquirihbi sca jahuen judiobo Papan sirijaquin bichiya tah non jatihibi hihui jenimayaxihqui, noquen huetsa mahuatax bi hahquirihbi teehihqui merahax quescari.

¹⁶ Noquen Papa qui jahuabora hinancatsihxon tah non sirimahin hihxon tehexacon sca jisxon, jatihibi siriscanon non honanribihi. Jihui ta jascarihbibi qui. Jahuen tapon siri hihquiya ta jahuen mebibio rihbi siri qui. Judiobo ta jascarihbibi qui: texe Papan hahquirihbi sirijaquin bichiya ta jatihibi rihbi bihti siri qui.

¹⁷ Jahuen bana jihui coiranquin hahcajaquin ta Papan noque jisiqui. Xanahiton texe mebibio tsecaxon ta miabo sca nihi naman meha mebi que bi jano mia rechihiqui. Texe jahuen yora quiha mebi tocan mia joconnon jano mia rechiquin. Jano rechihah sca tah min jahuen coshin hanishi, texe mebibio hihqui quescari.

¹⁸ Papan mia jano rechihah bi Hea ta hashoan siri qui, Siri copi ta huetsa mebibio tsecaxon hea sca rechihiqui hihiyamahue. Jascacatsihqui honanscahue: Mebixon tah min jihui yora qui coshi hinantimahi. Jihui yoran caya ta jahuen mebi coshi hinanihqui.

¹⁹ Hea tah hen hashoan siri qui hihiyamahue hen mia jaah bi Hea rechinoxon ta huetsa mebi tsecanishqui hah rah tah min jatihi joi bichinquiu.

²⁰ Hihcoini. Hihcaxbi mia hashoan siri copima. Nincacoinyamahi copi ta jato tsecanishqui. Min hinamehtai copi res ta mia bijnishqui. Jaa copi tah min Hea tah hen caibo mentan hashoan siri qui min jatimahi. Shinanquin tiromajahiton mato rihbi potaribhimis.

²¹ Jahuen mebi coinbo yohuashihxonma potanixon ta hinamehyamahiton mato rihbi sca jascajarihbitaliqui.

²² Honannahue. Papan ta mato sirijaquin bichiqui. Heen caibo ta potaresnishqui. Nincacatsihyamahibo copi jato potaresquin. Jaabo potanixon bi ta matobo sca sirijaquin hahxontijahiqui. Man jascabibi hinamehtaiya ta jascabi jaquin mato sirijaquin hahxontihiqui. Man nincayosma hihquiton ta reraquin hahcajaquin mato potatihiqui.

²³ Heen caibo potanixon bi ta jaton chini baquebo hahquirihbi hinamehtaiton jato bihibitihiqui. Rechiquin hahcajaquin ta jato hahquirihbi sirijaquin bihitihiqui. Heen xenibo potanixon bi ta Papan jaton baquebo hahquirihbi rechiti hahtipahiqui.

²⁴ Nihi naman meha mebi bikhon baná yora qui rechixon hahcajaquin ta Papan mia sirijaquin bichiqui. Hashoan sca ta baná mebibo rechiquin hahcajaquin jahuen judiobo jaan sirijaquin bihibitihiqui.

Israeli baquebo Papan jihuemayaxihqui

²⁵ Hen mato yohinom nincanahue, hen huetsabaan. Hashoan siribo copi Papan mato sirijaquin bichi man shinamhis hihxon tah hen tsoan honanihma joi mato rahma yohihi. Hashoan hicha ta heen caibo jointi xehpotihqui. Jaton nahuabo janin sca jahuen jonibohi Papan caisquin queyoonan caman ta jointi xehpóyahpa judiobo jayaxihquiqui.

²⁶ Jascajaquin judiobo notsimaxon ta jahuen jonibo rahsi Papan caisyaxihquiqui jan huishamani jai quescabijaquin. Jaa huishamani ta nesca qui: Judiobo janinhax ta quiquin jihuemanica joyaxihquiqui. Joxon ta judiobo jaton hohchatishinanbo sohuayaxihquiqui.

²⁷ Hinamehtaiton tah hen hean yohini quescabijaquin jaton hohcha sohuaxontihi hihqui jaa quirica.

²⁸ Matohon shinanxon jahuen joi siri mato qui nocomanoxon ta judiobo Papan rahuijanishqui. Jato rahuijanixon bi ta jaton xohtabo hahxontijanixon jato caisnixon rihbi Papan jathon shinanribihiqui.

²⁹ Hahxonti yohixon ta huetsajati sca Papan shinanyamahiqui. Jahuen joniboscanon noque caisnixon ta Papan shinanquin huetsajayamahiqui. Jaa copi ta judiobo Papan jascabijaquin potatimahiqui.

³⁰ Nincayosmapahonixon bi tah man rahma Papan joi siri bihcoinai, jan mato sirijaquin bihnon. Judiobaan rahma nincayamahi bi tah man maton nincacoinai.

³¹ Jascajaquin rihbi ta jaabaan rahma nincayamaxon bi man hahcai quescajaquin Papan joi siri bihcoinyaxihcaniqui. Man nincacoinquin hahcai quescajaquin rihbi ta jaabaan nincacoinyaxihquiqui.

³² Nincayosmabo rahsi non hihqui non honannon ta Nincayosmabon hahquin noque janenishqui. Jascapahbo rahsi non hiphahoni bi ta noquehon shinanxon noque hicha caisihqui jahuen jonibo sca non janon.

³³ Noquen Papa ta hihti siri qui. Sirijaquin ta noquehon shinanihqui. Jahuejati sca non Jain non jai bi ta jaan honanquin sirijahiqui. Hihti siri shinanyahpa ta jaa qui. Jahuen shinan ta hihti coshi qui, noquen honantimahi. Jahuen honan betan tah non senentimahi jahuentianbi.

³⁴ Papan shinanai ta tsoanbi honanyamanishqui. Jahuentianbi rihbi ta tsoanbi noquen Papa haxemayamanishqui.

³⁵ Papan jato copi hinanribinon hihxon bi ta tsoanbi jaa pari jahuabi hinanyamanishqui.

³⁶ Papan ta jatihibi shinan siriyahpaxon noque jihuemahiqui. Jahuenahbi jahuen jihuetaahbo rahsi non janon ta noque hahxonihqui. Hahxon tah min noque jai Papan. Mia tah min hihti siri qui hih tah hen jascabibi jai.

12

Noquen Hihbaan jihuetaahbo

¹ Jaa copi tah hen mato hihti yohihi, heen huetsabaan. Noquen Papa Dios qui yohuashihjaquetanaxma hinamehnahue. Matohon jaan hihti shinanai copi hahan queenax copi rihbi hinamehnahue. Jahuenahbo sca jihuemon, hohchajoma siri janoxon, hahan janjenimahibo janoxon hinamehnahue. Jascajaxon tah non Hahxon tah min noque jai Papan non jacointihi.

² Nincayosmabo jihuetai quescayamahi jihuenahue. Jaabo hihqui quescaxonma behnabo hihnoxon maton shinan pontejaquin shinan behnabo bihnahue. Papa queenai quescajaquin shinannoxon, shinan behnabo bihnahue. Shinan behnabo bihxon tah man honantihu, jahua siri quin, jahua Papa queentihiquin, jahua ponte quin. Man tah man honantihu.

³ Papan hea raanah tah hen mato yohihi, hea huetsabaan. Shinan behnabo bihnahue, jatihixonbi. Papan ta mesco shinanbo hinanpaquehiqui. Hinanpaquehah bihxon jayaxon man jahua jaa hahxontihon honanquin sirijanahue. Man hashoan coshi hihqui shinamis. Sirijaquin shinanxon, jahuejati shinanyahpa min quin honanquin sirijahue, paramehxonma.

⁴ Papan ta mesco shinanbo mato hinanpaquehiqui, man mesco teebo rihbi hahxonnon. Noquen yora hihqui quesa tah non qui. Non tah non hahan jisti jaax, hahan xecoti jaax, hahan nihti jaax, hahan nincati jai. Jascapahbo mesco mebiboa jaax bi ta noquen yora huesti qui.

⁵ Noque Criston baquebo tah non hichahax bi jascarihbibi. Hichahax bi tah non huesti yoraya qui. Criston yora tah non qui. Noquen Hihbo nincacoinax huesti yorahax bi mesco jonibo, jahuenahbo rahsi, yanapanhananaibo rahsi.

⁶ Mesco jonibo man hihqui quescarihbibi ta Papan mato hinanai mesco teebo jaiqui. Mesco teebo mato hinanpaquexon ta hahan hahxonti shinanbo rihbi mato hinanpaquehiqui, mesco shinanbo. Jaa copi jayaxon sca jaa hahxonnhue. Heen joi siri yohinicahue mia jaah, honanquin sirijaxon yohihue.

⁷ Miin huetsabo yanapannicahue mia jaah jato hahxoncoinquin yanapanhue. Caibo haxemanicahue jan mia jaah, jato haxemahue.

⁸ Hahan jenimati shinan hinannicahue mia jaah hahan jenimati shinan jato hinanhue. Pishinaibo yanapannicahue mia jaah, jaa pishinaibo hinanreshue, bichinrihbiti shinanxonma. Jonibo teemanicahue mia jaah chiquishxonma hihti teexon jato teequivinhue. Yomanahaiba yanapannicahue mia jaah jenimahanan jato yanapanhue.

Shinancoini non jihuetai jai

⁹ Caibohon shinanihcamaxonma jato yanapanquin hahxoncoinhue. Tiroma joibo rahinxon bi siri joibo jeneyamahue.

¹⁰ Joni huetsahon shinanquin jato sirijaquin yohuanquihnhue. Sirijaquin shinanax joni huetsa qui siriresi yohuanhue.

¹¹ Coshin noquen Hihbo teexonhue. Chiquishaxma tee teeti. Dios Yoshiman yanapana jenimahue. Jenimahanan noquen Hihbo teexonquin.

¹² Papan mia hahxonyaxihqui honanax coincoini jaq joti manahue. Masá tenehue. Papa yocauquin rihbi jeneyamahue.

¹³ Mihbe nincacoinaibo yomanahaiton jaa pishinai hinanhue. Mihqui noquen huetsabo nocotaiya jato pimaxon jato janox hoxati rihbi hinanhue.

¹⁴ Caibaan mato tiromajahah bi jato yocaxonnahue. Jato join bahchinnanxonma bi Papa jato yocaxonnahue, jan jato shinan siri hinanon hihxon.

¹⁵ Hahan jenimati jaax copi caibo jenimahiya jato jenimaquinhue. Caibo rihbi benataiya benáquin bi jato tenequinhhue.

¹⁶ Caibo betan siripi yohinani jihuenahue. Caibo mentan mia hashoan siri hihqui shi-nanyamahue. Jascajaxonma bi jahuaborajomabo yohuanquinquin sirijaquin. Jaabaan mia yohihah bi caibo mentan mia hashoan honan hihqui shinanxon min jato nincayamamis.

¹⁷ Caibaan mia tiromajahah bi jato copiyamahue. Jatihibi jonibo yohuanquihnoxon siri yohuanyahue.

¹⁸ Hahtipahax, jatihibi jonibo betan siripi jihuehue. Caibo sinatai bi hahtipahxon jato siri shinan hinanhue, siri sca jihuixonoxon.

¹⁹ Tsoabi tah min jahua copibi copitimahi, noque huetsan. Papan ta mia copixontihiqui. Jaa copi tenehue. Jaa copi ta huishani joi jaiqui; Heanbi tah hen copitihu. Jaabo tiromahibio jihuetai copi tah hen jato masajabahintihu hih ta noquen Hihbo yohuani jaiqui.

²⁰ Jaa copi miún rahuí copixonma bi picatsihquiton pimahue. Jiricatsihquiton xehamahue. Jascajaquin tah min jaa jahuen shinan pontexontihu.

²¹ Caibaan mia tiromajahah, mian rihbi sca min tiromajamis. Jaton tiroma shinanbo potamanoxon sirijaquin jato hahxonnhue.

13

¹ Gobierno hapobo nincanahue jatihixonbi. Jascapa hapo jatihibi ta Papan mato hinanah qui. Papan hinanahma ta yamahiqui; jaan hinanah rahsi ta jaiqui.

² ¿Hapon yohihah bi min nincacatsiyamahin? Papan hinanah hapo tah min nincayamahi. Min nincanon hihxon tah hen mia yohihi. Nincayosmabo ta hapobaan casticanti qui.

³ Sirijahibo ta casticanyamacaniqui. Tiromajahibo caya ta casticanti qui. Jaa copi tah min siripi jihuecatsihxon jato nincatih. Min sirijaquin hahcaya ta mia yohiyaxihqui qui. Mia tah min siri joni qui hahquin.

⁴ Min siripi jihuenon ta hapobaan tiromabu casticaniqui. Noquen naihoh queha Papan jascabajue hahca ta tiromabu casticanquin noquen Papa hahxonihqui. Jaa copi tah min tiromahax min raquetihi. Policia ta hahan casticanti qui. Yncaresma ta jaa jaiqui. Tiromabu qui noquen Papa sinataiya ta jascapahbo noquen hapobaan casticaniqui, Papa hahxonquin.

⁵ Tinintinin mia casticanmis hihxon tah min Papa queenai quescayamahi hea japaho hihxon rihbi mia tinintinin yohihah min nincatih.

⁶ Jaa copi rihbi tah min gobiernobu copijati jai. Coriquin ta gobiernobaan jaton tee hahquiqui, sontarobo copijaquin. Jascajaquin ta Papa hahxoncaniqui. Jaa copi tah min jato copijati jai. Copijanahue hahca copijaquin.

⁷ Huetsa joni ribinax tah min hahqui miin coriqui min yohuashihtimahi. Ribinyahpaxon tah min miin ribin queyobahintihi. Coriqui cobranah copijaquin. Teeti yohihah teex-onquin. Hapobaan yohihah, nincaquin. Jaabaan yohihi quescabijaquin hahxonquin, joi bichinxonma. Hapobaan yohihah, can.

⁸ Man ribinai jatihibi tah man copijacointihi. Copijaquin queyobahinquin. Joni huetsa yanapanti shinan hashoan sca bihbonanahue. Joni huetsahon shinanquin tah non hahxoncoinqui Papan yohini quescabijaquin sca non jai.

⁹ Tsiniyamahue. Joni huetsa rehkeyamahue. Yometsohyamahue. Caibaan jahuabora bichinti shinanyamahue. Nincayosmayamaxon tah min joni huetsahon shinanxon, miabi min queemehtai quescajaribiqui joni huetsahon shinantihu.

¹⁰ Joni huetsahon shinanxon tah min jahuentianbi jaa tiromajatimahi. Joni huetsahon shinani jihuetahbou hihxon ta jascapa joibo jatihibi Papan noque yohinishqui.

¹¹ Noquen Hihbo tah man hahxonti jai, hea huetsabaan, coshin hahxonquin. Min hihti hoxahax mohixon jisi bi bari queyasca jaiya tah min coshin sca tee teetai, tee hichahi copi. Jascajaquin rihbi noquen Hihbo coshin teexonnanahue. Noque bichi jaa joribiti hochoma tahniscái honanxon coshin sca teexonquin. Non nincamenoni tian jaa joribiti hochoma tahni hihnish bi ta rahma nea pishcasca jaiqui.

¹² Hihshinahax xaba paqueti nea pishcasca quescarihbi tah qui. Cristo joti hochomahi copi man tiromahi jihuetahbou quescayamanahue. Sirijaquin hahxonshi shinanyabu sca janahue.

¹³ Papahon shinanaibaan hahcaya quescajanahue. Pahen pahentimascai. Paheni coro corotimascai. Tsinitimascai. Haibo mehehax jaya yohuani jayamascai. Sinacanantimascai. Caibaan noque mahuinah bi notsi notsimascai.

¹⁴ Noquen Hihbo Jesucriston shinan bichish jihuetahbou. Nincayosmabo jai quescayamanahue, jaabo jascarai bi queenyamabiresnahue.

14

Caibo qui yohuanyamahue hihqui

¹ Caibaan ta Cristo qui hinamehxon bi man honanai jatihibi honanyamaparihiqui. Jan honanyamaparihi bi tah man jaa pontecatsihquin join hihquinantimahi. Jahuabo non pitimahi hihquish joinannoxonma nocataiton bihquin sirijanahue.

² Jatihibi piti tah non pitih hih huetsa jai bi ta non tah non nami pitimahi hihxon huetsan nami piyamahiqui.

³ Nami pinicahxon, nami piyosma yohiquin Honanman hahyamahue. Nami piyosmaxon tah min miin huetsan nami pihya Pitima tah min pih, hohchayahpan, hah min jatimaribihi. Nami pinicaboya nami piyosmabo ta Papan jato rabebi sirijaquin bichiqui, Cristo qui hinamehtaiton jato rabebi sirijaquin bihquin.

⁴ ¿Mia jahuaxon huetsa joni teexonnicia min sinajatihin? Jahuuen patoro jan teexonai bi jan teetai mian costanyamaxon tah min jahuen patoro hihyamaxon jaa sinajatimahi. Jahuuenahbi jahuen patoronan ta jaa yohithihiqui jan sirijaquin hahcaya jisxon sirijaquin yohiquin. Jan tiromajaquin hahcaya jisxon sinajascaquin. Jahuuenahbi jahuen patoronan ta yohithihiqui. Jascajaquin rihbi tah min noquen Hihbaan joni huetsa mihbe honanyahpa hihyamahiya mian jaa sinajatimahi. Noquen Hihbaan ta shinan hinanti hahtipahxon jaa hinantihiqui, jan hahcaya sca noquen Papan siri sca jisnon.

⁵ Jaa copi mianbi min hahcaya jisxon shinanquin sirijahue, noquen Hihbaan mia Sirijaquin tah min hahcaya hah mia janon. Huesti nete ta tantiti nete qui, Papa shinanti nete

hih huetsa jai bi ta huetsa sca Jatihibi nete ta jascapah rahsi qui Papa shinanti nete rahsi hihribihiqui. Jascapa mesco honanyahpa hihqui bi hahbetan join hihquinanyamanahue.

⁶ Huesti nete ta tantiti nete qui hihquish ta jaa neten noquen Hihbohon shinani caibo tantihiqui. Noquen Hihbo hihti siri copi jascacani. Nami pinicabaan rihbi ta Mia copi tah hen pih Papan hahxon, nami pihiqui. Noquen Hihbo hihti siri copi jascajacanquin. Nami piyosmabaan rihbi ta Mia copi tah hen pih Papan hahxon, jaton huai mehabo pihiqui. Noquen Hihbo hihti siri copi rihbi jascajacanquin.

⁷ Papan noque jisima tah non jihuayamahi. Papan noque jisima tah non muhuaya-maribibi.

⁸ Jihuetaibohax tah non noquen Hihbo queenai quescari non jihuetai. Noquen Hihbaan noque johue hahca tah non jaa queenai tian non muhuarihbibi. Jaa copi tah non jihueparihax non noquen Hihbaan jonibo qui. Muhuatax rihbi jascabibi noquen Hihbaan jonibo.

⁹ Noquen Hihbo ta noque jatihibi hihbohi qui, jihuetaibo, muhuataibo rihbi. Noque jatihibi hihbonoxon ta muhuatipish teehihribinischqui.

¹⁰ Papan ta noque jatihibi jispaqueyaxihqui, non hahpahonibo siri quin tiroma quin hihxon noque jispaquequin. Jaa copi ta min hahcai quescajayamaquin miin huetsan pih i mian jaa sinajatimahi. Jaan rihbi ta mia yohiquin honanman hahtimahiqui.

¹¹ Papan huishamani jai quescabibi ta jayaxihqui. Tsoabi cahnexonma tah hen hea naman jato tisquihpaquemayaxihqui. Hea quiquin Hihbo hihqui ta yohiyaxihcanihqui. Mia tah miñ Papa Dios coin qui hah ta hea jayaxihcanihqui hihqui jaa huishani joi.

¹² Jaa copi honannahue. Mianbi min hahcai ta Papan mia yohiyaxihqui, Min tah min sirijaniqui hahyamaxon Min tah min tiromajaniqui hahquin.

Miin huetsa hohchamayamahue hihqui

¹³ Jaa copi joni huetsa betan join hihquinannanyamascanahue. Join hihquinannanx-onma bi miin huetsa min hohchamamis hihxon shinanquin sirijahue. Hohcha qui min paquemamis. Noquen Hihbo min jenemamis.

¹⁴ Pitima pihax copi non hohchayahpa sca jai caibaan shinanah bi ta jascapa pitima yamahihqui, hea huetsabaan. Noquen Hihbaan hea shinanmaha tah hen honanquin sirijah. Jascapa pitimabo yamahi bi ta jascapa jai shinanxon jaabi pipan hihxon pihax, non hohchayahpa sca jai, pitimahi shinanxon bi pihax hohchayahpa sca jai.

¹⁵ Mian piti bi pitimahi miin huetsan shinanaiya ta jan pinon Jaabi pihue mian jaah tiroma qui. Hahan shinanyamaxon pari tah min jascajaquehahnai. Miin huetsa copi rihbi ta Cristo muhanishqui, noque huetsan. Jaa copi miin huetsahon shinanhue. Pitimahi jan shinanaiya Jaabi pihue hahyamahue. Miin huetsa min masajamis.

¹⁶ Miin piti mian piha siri que bi jaa hohchamaxon miin piti qui min jaa tiromahi yohuanmamis.

¹⁷ Papan jihuetabboxon tah non jahuabo pitima quin, jahuabo xehatima quin hihxon shinantimahi. Papan jihuetabboxon tah non ponte jihueti shinantihi, noquen huetsabo betan siripi jihueti, coin coini jihueti, Jascatí caya tah non shinantihi jahuen yoshin siriyahpaxon.

¹⁸ Jascajaquin caibohon shinani jihuexon tah min sirijaquin noquen Hihbo Cristo teexontihi. Min jascapa hihquiya ta noquen Papa mihon jenimahiqui. Jonibaan rihbi ta mia siri jisiqui.

¹⁹ Jaa copi joni huetsa betan siripi jihueti shinan bihcoinnahue. Joni huetsa coshi hinanhahnannahue, hashoan sca noquen Hihbo betan nihnon hihquish.

²⁰ Jaan pitimahi bi mian pihue pihue hahca, pihax, masa shinani sca noquen Hihbo betan jan siripi niyamascamis. Jatihibi piti ta siri qui, noquen Hihbaan jisí. Siri que bi pitimahi shinanxon miin huetsan picatsihyamahi bi mian Pihue hahca piresax, tiroma hi.

²¹ Jaan pitima shinanxon jaan pimis hihxon miin huetsa nami piquihinyamahue. Jascajaquin rihbi ta pahe xehati xehayamahah, siri qui, miin huetsa min hohchamamis hihxon xehayamahah. Jahuabi tah non noquen huetsa non hohchamatimahi, hahan shinanxon.

²² Jaa copi join hihquinanyamanahue. Miin Hihbaan mia jisi honanxon mihmebixon sca min honanai quescajaquin pihue. Shinanquin sirijahax tah min pitima tah qui hihxonma pihax min coin cointihi.

²³ Pitima ta qui hihxon bi pihax tah min Hohcha tah hen jai hihscatihi. Jaatian tah min masa shinantihi. Pitima ta qui hihxon bi pihax hohchayahpa sca jai. Jatihibi ta jascari qui. Jascatimahi hihquish bi jascarax hohchayahpascai.

15

Miin huetsa coshinon jahue hihqui

¹Jascajaquin tah non non honanai betan senenyamahibo non teneti jai, hea huetsabaan. Noquebi non queenai quescajaquinma bi tah non jatohon shinanti jai.

²Jatihibijaquin tah non jascajati jai. Noquen huetsan hashoan sca nincacoinnon hihxon res tah non hahan shinanax noquebi non queenai quescatimahi.

³Noquen Hihbo Cristo rihbi ta jaabi queenai quesecayamahi bi noquen naihoh queha Papa queenai quescanishqui. Jaa copi ta hahqui rainyamacannishqui, jonibo. Jaa yohihi ta huishani joi jaiqui: Mia hichacaibaan ta hea sca hichaquiqui hihqui jaa joi.

⁴Papan huishamani joibo jatihibi ta non haxenon hihxon huishamanishqui. Tiromabo tenehanhan, jahuen joi siri jisxon, jaa noquehon shinanax honanxon, jahuen shinan bichish, noque bichi jaa joti non jenimahanan mananon ta jaa joibo huishamanishqui.

⁵Noquen naihoh queha Papan ta siri shinan hinanihqui, noque sirijaquin shinamaquin. Hahan jenimati shinan hinanquin ta noque jenimamahiqui. Jahuen shinan siri hinanah man siripi joni huetsa betan jihuenon tah hen mato yocaxonai, hea huetsabaan, man jaa shinanyahpa rahsi jihuenon hihxon, Cristo queenai quesecari man jihuenon.

⁶Jaa shinan huestiyahpa rahsihax man jaa yohuan huestiya noquen Papa qui siribiresi yohuannon hihxon tah hen noquen Papa Dios mato yocaxonai. Noquen Hihbo Jesus Criston Papa qui bi man siribiresi yohuannon hihxon tah hen yocaxonai mato.

Judiomabojoi siri yohihi

⁷Jaa copi sirijaquin joni huetsa Johue hahnahue. Noquen Hihbo Criston mato sirijaquin Johue hahn quen maton rihbi joni huetsahon shinanaxon sirijaquin Johue hahnahue. Jaatian ta Papa Dios ta hihti siri qui hihyaxihcanihqui, mato jisish.

⁸Papan raanah ta judiobo hahxon Cristo jonishqui. Noquen xenibo hahxontijanixon Papan yohini quescabijaquin hahxon jahui.

⁹Judiomabohon rihbi shinanaxon ta Papan jato sirijaquin bichiqui. Mato judiomabohon jahuen jihuetauhbohax sca Hahxon tah min noque jai, Papan, jaahbo hihquish ta hahxon Cristo jonishqui. Papan huishamani jai quesca ta jatihiqui.

Judiobaan nahuabo ta siripi yohuanyaxihquiqui. Jato tocan tah hen mihqui siriresi yohuanyaxihqui. Jano tah hen mihqui behuayaxihqui hihqui jan huishani.

¹⁰Huetsa jan huishamani ta jascarihbihiqui:
Papan jonibo betan jenimanahue judiomabon
hihqui.

¹¹Huetsa rihbi sca:

Hahxon tah min noque jai, Papan, hahnahue judiomabon. Mia tah min Quiquin Hihbo qui,
Papan, hahnahue jatihibi jonibon
hihqui jan huishani.

¹²Isaásnen rihbi ta jascajaribiquin huishamishqui:
Isaínen chini baque ta jayaxihquiqui. Jaa ta jatihibichin Quiquin Hapo hihyaxihquiqui.
Jaan jato hahxonah ta sirijaquin shinanax manayaxihcanihqui, jato bichi jonon
caman,

hihqui Isaásnen huishani joi janin.

¹³Papa Dios mato yocaxonquin tah hen Jaton jointi janin min shinan hicha niaxonhue Papan hen jai. Hahan jenimati shinan hinanxonhue. Miin hahan sirijaquin shinannmati shinanbo jato hinanhue, hihti jenimahabo. Miin yoshin siripan jato hihbocahinhue, min jonon caman manati tenenon, hah tah hen jai, mato yocaxonquin.

¹⁴Man sirijaquin shinanaxon joni huetsahon shinanax tah hen honanai, hea huetsabaan. Papan joi man hicha honanscái tah hen honanrihbíhi. Joni huetsa yanapannocon yohinanti man hahtipahi tah hen honanrihbíhi.

¹⁵Man honanscái bi tah hen texe noquen Hihbaan joi rihbi mato shinanaxon hen hihtimahxonma nea joibo huishahi. Jesucriston joi mato yohinon ta Papan hea yohinishqui, judiomabohon jatihibi hen yohinon. Jaa copi tah hen nea huishahi.

¹⁶Papan joi mato yohihah, Dios Yoshiman rihbi mato shinan siri hinanah, noquen Hihbo qui hinamehtah matohon noquen Papa jenimanon hihxon tah hen mato jaa joi siri yohihi, heen huetsabaan.

¹⁷Jesucristonen hea yanapana tah hen Papan joi siri yohiquin sirijahi. Jascabajue Papan jaah tah hen jascabajhi.

¹⁸Judiomabaan nincacoinnon hihxon heyaxon Criston hahcai tah hen mato yohitihu. Heanbi shinanaxon hahcai tah hen yohitimuhi.

¹⁹ Jahuen shinanyaxon yohixon jahuen coshiyaxon hahxon tah hen yohibonanihqui. Jahuen coshiyaxon tah hen hahan honantibojaniqui. Jahuen coshiyaxon rihbi tah hen hahan rahtetibojaniqui. Jascajaquin tah hen Dios Yoshiman coshiyaxon jahuen joi siri nincamabonaniqui. Jerusalen janinhax yohibonahi cahax, mayátani cahax tah hen Ilirico mai janin caman noconihqui, Criston joi siri yohijaquetancahuanax jahuex janocoti.

²⁰ Jano tsoanbi Criston joi yohiyamahi janin yohitanpan hihquish tah hen jascanhqui, hea huetsabaan. Caibaan jato yohiscai janin tah hen yohicatsihyamahi, behna yohicatsihqui.

²¹ Huishani joi jai quesca janon hihquish tah hen jascahi: Tsoanbi jato yohiyamapahonih bi ta honanscayaxihcanihqui. Tsoan yohinid que ma bi ta nincacoinyaxihcanihqui hihqui jaa huishani joi.

Roma jema janin cayaxahpan hihqui

²² Nenobi heen tee hashoan hichahiya tah hen mato qui cati hahtipahyamaniqui, hea huetsabaan.

²³ Cati hahtipahyamapahonish bi neno yohiti pishinyamascaax tah hen mato sca jisi cacatsihscrai. Mato jisi jahuentihi ra baritian cacatsihpahonish tah hen España janin cahi caquin mato qui banejaquetahyaxihqui, huinocahinscanoxon.

²⁴ Huinonoxon mato qui banejaquetahxon tah hen mato sirijaquin yohanquinhyaxihqui. Jaa pecaho sca tah man hea yanapantihi, hen caribiscanon.

²⁵ Jascayahnoxon tah hen rahma Jerusalen janin pari catahabahi. Jano tah hen noquen huetsabo coriqui pishca hinani cahi.

²⁶ Jerusalen janin ta texe noquen huetsabo yomanahiqui. Jaa copi ta Macedonia janinhahbo betan Aciaya janinhahbaan jato yanapanti shinanxon coriqui tsinquecanhoxqui, jato qui raannoxon.

²⁷ Hen yohihah ta jaabaan bi shinanxon raancaniqui. Jerusalen janinhahbaan pari jaton caibo jato qui raanah ta judiomabaan Papan shinan siri bihcannishqui. Jaa copi ta jaabaan sca copiquin sca jaton coriqui pishca raanti jaiqui.

²⁸ Jaa pishca tah hen jato hinani cahi. Jato hinantanax tah hen España janin sca cahi caquin mato jisbahinyaxihqui.

²⁹ Nocoxon, hen honanai joibo yohiquin tah hen hicha Criston shinan mato hinanyaxihqui, man hihti sirijaquin sca shinannon.

³⁰ Noque jatihibi tah non Jesucristonahbo qui, hea huetsabaan. Dios Yoshiman ta noque shinanmahiqui, non joni huetsahon shinannon. Jascahananxon noquen Papa hea yocaxonnahue.

³¹ Judea mai janin cahiton janohah nincayosmabaan hea tiromajayamanon hea yocaxonnahue. Coriqui hinanah sca noquen huetsabaan rihbi sirijaquin bihnon hihxon hea yocaxonribiquin.

³² Jaa pishca jato hinantanax Papa queenaiya sca hen mato qui sca canon hea yocaxonnahue. Jaatian tah non shinan hinanhananax non mato betan jenimatihi.

³³ Mato rihbi tah hen yocaxonai, noquen naihoh queha Papan mato shinan hinannon mato yanapannon. Jascari rahan.

16

Jato shinanpaquexon yohihi

¹ Noquen choca Febe ta mato qui nocoti cahiqui, hea huetsabaan. Cencrea jema janin jihuexon ta janoha noquen huetsabo yanapancahchihiqui.

² Criston joniboxon non Criston jonibo bihti jai quescabijaquin jaa noquen choca sirijaquin bihnahue. Jan jahua pishiniquin honanxon hinannahue, hahxonresquin. Jaan rihbi ta hicha noquen huetsabo yanapanxon hea rihbi hahxonnishqui.

³ Priscilaya Aquila yohixonnahue, man jascabi jayamahin hahquin. Rabechinbi ta hehbetanbi Jesucristo teexonpahonishqui.

⁴ Tiromabaan jato rehtequin bi cahnenon ta hea hihti yanapancannishqui. Jaabo rabe copi tah hen jihueparahi. Jaa copi tah hen Maton tah man hea hahxonnihqui hahcai. Jatihibi nenobo jai noquen huetsabaan ta jascajaquin rihbi yohihiqui judioxonma bi nincacoinaiboxon.

⁵ Jaton xobo janin tsinquejaquetai noquen huetsabo rihbi yohixonnahue Man jascabi jayamahin hahquin. Heen huetsa Epeneto rihbi yohixonnahue. Jahan tah hen hihti shinanai. Jaan pari ta Acaya main jihuexon nincacoinnishqui, chiní sca jahuen caibaan.

⁶ María rihbi yohixonnahue. Jaan ta mato hicha yanapannishqui.

⁷ Andrónicoya Junias rihbi yohixonnahue. Jaabo rabe ta heen caibo qui. Heyabi tsahonahbo ta hehbetanbi sipo xoboho rabebi tsahopahonishqui. Criston raantibaan ta jato honanquin sirijahiqui, hihti nincacoinaibo copi. Jaabo Cristo qui hinamehni pecaho ta hea sca hinamehniqui, jaton chiniscanon.

⁸ Amplias jascajaribiquin yohixonnahue. Jahan hen shinanai tah qui, noquen Hihbaan shinanyaxon hen shinanai joni.

⁹ Urbano rihbi salud yohixonnahue. Jaan rihbi ta hehbetanbi Cristo tee teexonpahonishqui. Estaquis rihbi saludanxonnahue. Hahan tah hen hihti shinanai.

¹⁰ Apeles rihbi salud yohixonnahue. Criston shinancoinyahpa tah qui. Aristóbulo jenábo rihbi salud hinanxonquin.

¹¹ Heen caibo Herodion jascajaribiquin yohinahue. Noquen Hihbo qui hinamehtaibo Narciso baquebo rihbi yohixonnahue.

¹² Noquen choca rabe Trifenaya Trifosa salud hinanxonrihbinahue. Rabebichin ta tee teexon noquen huetsabo hicha yanapannishqui. Heen choca Pérsida rihbi yohixonquin. Hahan tah hen shinanai. Jaan rihbi ta noquen Hihbo hihti tee teexonnishqui.

¹³ Rufo rihbi yohixonquin. Jaa ta teemis qui, noquen Hihbo teexonnica. Jahuen mama rihbi saludanxonquin. Jaa tah hen hean rihbi Maman hahcái.

¹⁴ Asíncrito rihbi yohixonnahue. Flegonte rihbi. Hermas rihbi. Patrobas rihbi. Hermes rihbi. Jato betan hihqui noquen huetsabo rihbi.

¹⁵ Filólogo rihbi yohixonquin. Julia rihbi. Nereo rihbi. Jahuen choca rihbi. Olimpas rihbi. Jato betan hihqui noquen huetsabo rihbi, jatihibi.

¹⁶ Noquen Hihbaan shinanyaxon jatihibi noquen huetsabo hicottannannahue. Nenobo tsinquiaquetañai noquen huetsabaan rihbi ta mato saludanihqui, Criston joniboxon.

¹⁷ Nea tah hen matohon shinanxon hihti yohiscái, heen huetsabaan: Man join bahchinnon hihxon ta caibaan mato huetsa shinan hinanti tanayaxihqui. Cristo joi haxenihxon bi man huetsa joi sca bihnon hihxon ta mato caibaan huetsajaquin sca shinamati tanayaxihcanihqui. Jascapahbo honanquin sirijanahue. Jascapahbo honanxon jato yohuanquhnyamascanahue.

¹⁸ Jascapahbaan ta noquen Hihbo teexonyamahiqui. Jahua mato bichinpan hihxon ta mato hihbojacatsihcanihqui. Jaa copi ta siripihami yohuanxon parancaniqui. Hihcoinaibohi shinanxon caibaan jato chibannon hihxon ta paran parancaniqui. Jascapahbo qui coiramenahue.

¹⁹ Noquen Hihbo man histon nincacoinai ta chanihahbo jatihibi janinxon honancaniqui, heen huetsabaan. Hen huishaxon mato yohihah man jascajaribiquin nincatihí tah hen honanrihbihí. Jaa copi tah hen jenimahi. Honanbohax man siripi jihuenon hihxon tah hen jenimahanan nea huishahi, tiromayosmabo man jihuñon.

²⁰ Sirijaquin jihuemanicahxon ta Papan mato coshi hinannoixihqui, jamabahinquin hahcaja man janon, Satanas yosmajaquin. Noquen Hihbo Jesusen mato hicha shinan hinannon tah hen mato yocaxonai, heen huetsabaan.

²¹ Nenoxon ta hehbe teenica Timoteonen Man jascabi jayamahin hahquiqui. Lucionen rihbi. Jasoman rihbi. Sosípatronen rihbi. Jaabo quimisha ta heen caibo qui, mato salud raanaibo.

²² Pablo nea huishaxonquin tah hen hean Tercio mato salud raanai, mahbe Criston shinanyahpaxon.

²³ Gayon rihbi ta salud raanihqui. Jaa ta xobo hihbo qui, jahuen xobohoxon tah non huishahi. Haho rihbi tah non neno behuahi tsinquiaquetai.

²⁴ Erastonen rihbi ta jahuen salud mato qui raanihqui. Jaa ta nenohah agente municipal qui. Noquen huetsa Cuartonan rihbi ta salud raanihqui.

Hahxon tah min jai hihqui

²⁵⁻²⁶ Noquen Papa ta Quiquin Hihbo qui, heen huetsabaan. Jesucristo ta jihuemanicah qui hibbonahi non canon ta Papan jahuen joi siri noque hinannishqui. Neateman ta jaa joi siri Papan tsoabi honanmayamapahonishqui. Nea rahma tahni ta noque honanmanishqui, non honanon hihxon. Jahuenbihax piconihma bi jascabihi janíon ta Papan rahma tahni jahuen joi huishanicabo yohinishqui, huishahabo. Jaa huishanihbo jisson, Papan rihbi noque honanmaha honanxon tah non honanquin sirijascai. Jatihibi jonibaan nincacoinax hinamehtax queyoyamanox sca jihuenon hihxon ta noque honanmahiqui, noquen Papan. Jaa joi siri tah hen jaayohihi. Jaa joi siri nincacoinxon man jahuentianbi potayamanon ta Papan mato coshijati hahtipahiqui, heen huetsabaan.

²⁷ Jaa huesti ta shinan Hihbo qui, honan Hihbo. Jesucristo raanxonquin ta noque hihti hahxonishqui. Mia tah min Quiquin Hihbo qui, Papan. Hahxon tah min noque jai hahnahue jascabi sca. Jascacoin sca janon rahan.

1 CORINTO

Corinto janinhahbo qui Pablonen raanni joi

Corinto qui Pablonen joi raanai

¹ ¿Papan shinanya man jascabi jayamahin, corinto jonibon? Hea tah hen Pablo qui. Jesucriston raanti joni mia jahue Papan hea janí. Noquen huetsa Sóstenes betan tah hen nea joi huishahi.

² Papan ta mato quenanishqui Jesucristo betan ta Papan mato Heen baquebaan hahquiqui. Jatihibi janinxon noquen Hihbo Jesucristo yocacaibo ta jahuen baquebo qui, jaa rihbi jaton Hihbo, noquenah rihbi.

³ Juhuen shinanya man jihueyamahin? Noquen Papa Dios betan noquen Hihbo Jesucriston shinanmaha ¿man jointi siripax jihueyamahin?

Criston noque hahxonai

⁴ Jesucristo qui man hinamehni copi ta Papan matohon shinanxon mato hihti hahxonihqui. Jaa copi tah non Hahxon tah min noque jai, Papan, hahcai. Noquen Papa yocaxon tihibi tah non jascajahi.

⁵ Mato ta hicha jahuen shinan hinanihqui, sirijaquin honanax man siripi yohuannon hihxon. Jaa copi tah hen Hahxon tah min jato jai, Papan, hahcai.

⁶ Cristo ta noquen Hihbo qui hih man janon hihxon ta jahuen shinan mato hinanihqui.

⁷ Dios Yoshiman ta mato jatihibijahti coshi hinanihqui, noquen Hihbo Jesucristo sanarenen Jonon caman man mananon.

⁸ Jonoxon caman ta noquen Hihbo Jesucriston mato coshijatihqui, nete queyotaiya mato qui jahua yohuan yamanon.

⁹ Noquen Papan ta mato jenetimahiqui. Mato ta caisnishqui, noquen Hihbo Jesucristoya man janon hihxon. Jaa jahuen baque ta noquen Hihbo qui.

Mesco shinanya hpa

¹⁰ Juhuen janen tah hen mato hihti yohihi, hea huetsabaan; huesti joiya hihnahue jatihibi. Join bahchinnanyamanahue. Huesti shinanya rihbi janahue, jaa huesti yohuanyahpabo.

¹¹ Man sinacanananai ta Cloen jonibaan hea yohihipishqui, hea huetsabaan. Jaa copi tah hen mato yohihi.

¹² Hean tah hen Pablo chibanai hih huetsa janon ta Hean tah hen Apolo chibanai hihquiqui huetsa. Hean tah hen Cefas chibanai hihqui huetsa rihbi. Hean tah hen Cristo chibanai hihqui huetsa rihbi sca. Jascapahbo tah man qui.

¹³ ¿Cristo huestima hin? ¿Hea Pablo maton hohcha copi jihuin hueoncannishquin? ¿Hea sca man chibannon mato nashimacannishquin?

¹⁴ Jahuerohajaquin tah hen heanbi mato tsoabi nashimayamaniqui. Crispo huesti, Gayo rihbi, jaa res.

¹⁵ Jaabi hen chibannon ta Pablone hea nashimanishqui hih man jamis.

¹⁶ Estefana jaabo rihbi tah hen nashimaniqui. Tsoa rihbi hen nashimaniquin hen honanai ta yamahihqui.

¹⁷ Hen nashimanon hihxonma bi joi siri hen yohinon hihxon ta Criston hea raannishqui. Hihti yohuanti honannihcamahaxma hen yohiresi canon hihxon hea raanquin, retehahbo noquen hohcha copi Cristo muhuani hean yohihah nincacoinax jihuetahbo.

Criston joi Papan coshijoi

¹⁸ Queyoyaxihibaaan jisi ta Cristo muhuani joi nincatima joi qui. Papan noque teehihmahibaan jisi ta jaa join jahuen shinan noque hinanihqui.

¹⁹ Papan ta huishamanishqui:

Honanaibaan honan tah hen queyobahintihi. Jaton joi honan hihqui jaabaan shinanai bi tah hen jascapa joi tiromahi jismatihi.

²⁰ ¿Honan jonibo cahran? ¿Moisesnin quirica honanbo cahran? ¿Mai meha joi bichinmisbo cahran, jahuerahnon hin? Jascapahbaan ta quesajaquin honanmahiqui. Papan noque jismahah tah non honanai.

²¹ Noquen Papa ta honan qui. Honan hihxon ta Maton shinaman res hea honannahue noque jayamanishqui. Jaa copi ta jaton shinaman res mai mehabaan noquen Papa honanyamahiqui. Jaton shinaman honanyamahibaan bi ta Criston joi nincacoinaibo Papan teehihmahiqui, Honanma joi tah qui honanquin hahcajahibo jai que bi.

²² Hahan honanti noque jismahue hah ta judiobaan jaiqui. Hashoan honan joi tah non queenai hah ta jaton nahuabaan jaiqui.

²³ Jaschibaan bi tah non jihuin hueonahbo Cristo mahuani joi non yohihi. Judiobaan shinanah, rahninti joi. Jaton nahuabaan shinanah, nincatima joi.

²⁴ Papan quenahibaan shinanah ta jaa joi noque nincamaxon jahuen coshiyaxon Papan noque hahxonihqui. Jan hihti honanai ta noque honanmahiqui. Judio hihxon, jaa hihyamahax jaton nahuabo hihxon tah non nincacoinxon non honanai.

²⁵ Papan joi ta hihti honan joi qui, jahuama hih mai mehabaan shinanai bi. Mai mehabaan shinan shinanax yohanahcahnen tiroma, honanma. Papan ta coshinma pishca hahxon mai mehabo hihti mahuinihqui.

²⁶ *¿Man jenquetsahpabo jaiya Papan mato jahuen joi nincamanishquin, hea huetsaba?* Honannahue. Mai mehabaan jisi tah man honan joni hichayamahi. Patorobo rihbi tah man hichayamahi. Patoro baquebo rihbi tah man nincacoinaibo hichayamahi.

²⁷ Mai meha honanbo rabinmanoxon ta Papan noque caisnishqui, noquen non honanyamahi mai mehabaan shinanah bi. Mai meha coshíbo rabinmanoxon ta coshijomabohi rihbi noque caisnishqui, coshijomabohi mai mehabaan shinanah bi.

²⁸ Mai meha haniboa jahuamaboscanon hihxon ta noque jahuamabo caisnishqui. Noque jistahihmhibaan bi ta Papan noque caisnishqui, non jahuamabo que bi noque caisquin.

²⁹ Jaa copi ta Papa Dios bebonxon, non coshi hihxon hahpahonibo non tsoanbi yohiti hahtipahyamayaxihqui.

³⁰ Papan yohihah ta Criston mato hihbojanishqui. Hihbojaxon ta noque jatihibi shinan hinannishqui. Noquen hohcha rihbi ta queyoxonnishqui, jahuen baquebo sca non janon. Non jihueyaxihnon ta jaa hinamehnishqui, Jascahue Papan jaah.

³¹ Jaa copi ta huishani joi jai quescarí qui: Yohicatsihxon mianbi shinanxon min hahcaima bi Papan mia hahxonai yohihue hihqui jaa huishani joi.

2

Noquen hohcha copi mahuani yohiti jai

¹ Mato janin nocoxon tah hen Papan joi mato yohicoinnihqui.

² Criston joi res yohiti ta jaiqui hihxon tah hen noque copi jan jihuin hueonahbo mahuani mato yohinihqui. Huetsa yohuan tah hen jayamaniqui.

³ Yora yosmamax raquetax tastahihqui cah hen mato tocan nihpahoni.

⁴ Jonibaan shinanax yohuanai jai quescapa joi tah hen mato yohiyamanihqui. Hahan paranti yohiquinma bi tah hen Papan coshi jismaxon mato yohinihqui. Dios Yoshiman hahcai man jisnon hihxon tah hen mato yohinihqui.

⁵ Honanax yohuanai no nincaxon man nincacoinnonma bi Papan coshin hahcai man jisxon nincacoinnon hihxon mato yohiquin.

Dios Yoshiman honanmaha non noquen Papa honanai

⁶ Yohixon tah non nincati hahtipahibo non honanmahi, hashoan honan sca jaábo. Non hinanai shinan ta mai mehabaanama qui. Jaton hapobaanamaribibi. Jaabo ta queyoti cahiqui.

⁷ Tsoan honannihma joi tah non yohihi. Papan jone joi tah qui. Jahuabi jariyamanon jaan yohini joi. Jaa joiya cahen tsoabi yamani. Jahuuen shinanya non jihuenon hihxon ta Papan noque yohinishqui.

⁸ Jaa joi ta rahma jihuetai hapobaan honanyamahiqui. Honanaxon cahen noquen xaba hihbo rehteyamanah.

⁹ Huishani joi jai quescatah qui.

Beron tsoanbi jisyamanibo, pabinquinin nincayamanihbo, jointinin shinanyamanihbo, jascapahbo ta Papan noque hahxonishqui. Noquen Papahon non queenaibo ta noque jascapahbo hinanyaxihqui qui
huh ta jahuen huishani joi jaiqui.

¹⁰ Jascapa joibo non honanon hihxon ta Dios Yoshiman noque honanmahiqui, Jascajahue, Papan jaah. Dios Yoshiman ta jatihibi honanihqui. Noquen shinaman non honantimahi bi ta jaan honanihqui, noquen Papan shinanyaxon.

¹¹ Noquen jointinin non shinanai ta huetsa jonin honantimahiqui. Noquen res tah non jaa honanai, noquen jointinin honanquin. Papan shinanai ta jascarihbihiqui, tsoanbi ta jaa honanyamahiqui, Dios Yoshiman res.

¹² Papan ta jahuen Yoshin siri noque hinanihqui. Mai meha yoshinma bi jahuenahbi. Jan noque yohihi non honanon hihxon cahen noque jahuen yoshin hinanquin.

¹³ Jan noque hinanai joibo tah non yohihi. Jaanbi shinanax jonibo yohuanai quescajaquinma bi Papan yoshinyaxon yohiquin. Jahuen Yoshinyahpabaan honanon hihxon tah non honanmahai, Papan joi honanahbo.

¹⁴ Jonin shinanyahpaxon res tah non Dios Yoshiman hinanai joibo honantimahi. Dios Yoshinjomaxon shinanah ta jaa joi tiroma qui. Nincatima joi. Dios Yoshinyaxon honantihi bi jayajomaxon nincacah cahem nincatima.

¹⁵ Dios Yoshiman noque hinanah tah non jahuen shinanyaxon jatihibi honanai, jan noque yohihi jatihibi. Jahuen shinanyahpabo non hihqui copi ta mai mehabaan noquen shinan honanyamahihqui.

¹⁶ Tsoanbi ta noquen Hihbo honanmati hahtipahyamahihqui. Noquen Hihbaan shinanai ta tsoanbi honanyamanishqui. Tsoan honannih que ma bi tah non Criston shinanya non jihuescái, jaan hinanah.

3

Papa hahxonaibo rahsi

¹ Papan shinanyahpabo haxemaquin quescajaquin hen mato yohipanan tah hen hahtipahyamaniqui, hea huetsabaan. Jonin shinanya quescapahbo tah man janiqui. Cristo qui hinamehtipi baquexo quescapahbo cah man jahuen shinan hichayamarparini.

² Piti pimaquin hahcajaquinma bi tah hen chocho jene xehamaquin hahcajaquin mato honanmaniqui. Chahoma pitibo tah man piti hahtipahyamaniqui. Rahma caman rihbi tah man hahtipahyamahi.

³ Jonin shinanyahpabo tah man qui. Join bahchinnanaibo tah man qui, sinacananaibo. Jascapahbo man jonin shinanyahpahax res jihueyamahin? ¿Cristo qui hinamehyamahi jonibo jai quesa man jayamahin?

⁴ Hean tah hen Pablo chibanaí hih huetsa janon, Hean tah hen Apolo chibanaí hih man huetsa jai. ¿Jascanax jonibaan shinanai quesa man jayamahin?

⁵ ¿Apolo jahua quin? ¿Hea Pablo jahua quin? Papan joni tah non qui, rabebi. Jato yohitannahue Papan jaah tah non rabechin mato yohinihqui, man nincacoinnon. Papan noque yohini quesa man jayamahin?

⁶ Jai banaquin hahcajaquin tah hen mato yohinihqui. Joconsaibo jenen mehchajaquin hahcajaquin ta Apolonen sca mato yohinishqui. Banabo hanijaquin hahcajaquin ta Papan mato nincacoinmanishqui.

⁷ Jaa copi ta bananica jahuama qui. Mehchajanica rihbi jahuama. Papa huestichin ta hahquiqui, hanijaquin.

⁸ Bananica betan mehchajanica ta jascapah rabe qui, hahxonnicá rabe. Noquen tee jisxon ta Papan noque copijayaxihqui qui. Sirijaquin hen hahxonaíya, sirijaquin hea hahxonquin, sirijaquin huetsan hahxonaiya, jaa rihbi sirijaquin hahxonquin.

⁹ Papan hahxonnicá rabe tah non qui. Mato cah man jahuen huai quescapahbo, jan xobojahi quesa capahbo.

¹⁰ Papan hea yohini quesa bidaquejiaquin tah hen xobojati honanxon xobo jihui nichinquín hahcajaxon mato yohimenonihqui. Huetsan sca ta hahqui xobojaquejiaquin hahcajaquin hahxemahihqui. Hahqui xobojaquejiaquin hahcajaquin jisnahan, sirijanoxon.

¹¹ Jesucristo huesti ta hahqui xobojati quesa qui. Xobojaquejiaquin hahcajaquin ta huetsa xobo jihui tsoanbi nichinti hahtipahyamahihqui.

¹² Xobojaquejiaquin hahcajaquin sca Cristo hahxonquin, ¿jahuatohan man hahqui xobojahin, mapoyosma xobo hahcatsihxon jahuatohan man hahtihin, oron, yamin, copi macaman, jihuin, pehin, huasin?

¹³ Noquen Hihbo noque bichi jahuiya sca ta non hahxonnihbo jenquetsahpa hin honanahbo Papan mapojayaxihqui qui. Chihin ta non hahqui xobojahi jaan tanayaxihqui qui, jenquetsahpa hin hihxon.

¹⁴ Non hahqui xobojahi mapoyamahiya ta Papan noque copijayaxihqui qui.

¹⁵ Noquen tee mapohiya tah non mequen sca hihtihi, noquen tee yamacahini, Papa bebonbi mequen bi res noque nichí.

¹⁶ Mato tah man Papan xobo qui ¿man honanyamahin? Jahuen Yoshin ta maton jointi janin jihuethqui ¿man honanyamahin? Papan xobo non tiromajahiya ta jaan rihbi noque tiromajatihi qui.

¹⁷ Mato tah man jaa xobo qui. Jahuen xobo janin ta tiroma jatimahi qui.

¹⁸ Paramehyamahue. ¿Mai meha shinan min hicha jai shinan min jain? Jayajoma hihresscahue, honancoinscanoxon.

¹⁹ Nea mai mehabaan shinan ta honanma qui, Papan jisi. Huishani joi jai quescari: Shinanihcamahibo ta jaton shinamanbi jaan masajahiqui.

²⁰ Huetsa huishani ta jaribihiqui: Honan jonibaan shinan ta jahuama qui. Papan ta jaton jointi honaniihqui.

²¹ Jaa copi mai mehabaan shinanai yohuan jayamanahue: jaa huesti tah hen chibanai hiyamanahue. Papan joi yohinica jatihibi tah man nincatihu.

²² Hea Pablo, Apolo, Cefas, mai naman jaibo, jihueta, muhuati, rahma jaibo, jayaxi-hquibo, jatihibi ta matonah qui.

²³ Mato rihbi tah man Cristonah qui. Cristo rihbi cahan Papanah.

4

Criston raantibaan hahxonai

¹ ¿Noque quescapahbo haxemanicahbo non jahua quin? Criston hahxontibo can. Tsoan nincanihma Papan joi yohixonnicaahbo. Jascapahbo tah non qui, honannahue.

² Yohixonnicaah ta yohiresquinma bi jahuen hihbaan yohihi quescabijaquin pontejaquin shinanti jaiqui.

³ Jaa copi tah hen masa shinanyamahi. Siri hin, tiroma quin hihxon man hea jisí bi ta jahuama qui. Huetsa jonibaan hea jascajaquin jisí bi ta hea jahuama rihbi qui.

⁴ Hen honanai heen tiroma ta yama qui. Jaa yamahi bi tah hen jaa copi ta Papan hea siri jisiqui hen jatimahi. Jaanbi ta siri hin, tiroma quin hihxon hea jisiqui.

⁵ Jaa copi siri hin, tiroma quin hihxonon sca hea jisnahue, noquen Hihbo jonon caman. Joxon ta bahquish chian xabajaquin hahcajaxon rahma jonehibo jaan jismayaxihqui qui. Jaton jointinin jonibaan shinanai shinanbo rihbi ta yohipaqueyaxihqui qui. Jaatian pari ta jatihibi non siribojanibho quen jaan yohiyaxihqui qui: Siri jaah min janiqui, hahquin.

⁶ Hehqui bi tah hen yohuanai, hea huetsabaan, Apolo qui rihbi, man haxenon. Papan huishani joi jai quescari man jihueta haxenon hihxon tah hen nea huishaxon mato yohihi. Huetsa haxemanicah nincacatsihyamaquin man tiromabojaquein shinanax Jaa caya ta quiquin haxemanicah qui hih man jamis.

⁷ Mato yohihi tah non tsoanbi non Mia caya tah min caibo mentan hashoan honan bi res qui non jayamahi. Papan mia hinanyamahah cah min jahuabi jayamahan. ¿Miabi coshixon shinan bichi quescaaux sca min yohuanain, Papan mia hinanresai bi?

⁸ Rahma rah tah man jahuabi pishinyamascai. Rahma rah tah man jatihibi jaresscái. Quiquin hapobo sca rah tah man jai, noque non janoo hihyamahiya. Quiquin hapobo mato jacoinpahinon, mato betan hihxon non noquen rihbi yononon.

⁹ Hear shinanah ta noque jan raanaibo Papan chini picohihqui, noque jisxon costanahbo. Quiquin hapobo rehtenani catanxon jaton rehtetibо picoquin hahcajaquin. Jascapahbo noque. Jonibo hahqui manahitabo picohah quesa ta noque qui. Papan yonotibaan jisnon, jonibaan rihbi jisnon.

¹⁰ Noquen Cristo joi non yohihi copi tah non honanmabo qui, maton jisí. Mato cahen honanbo, Criston shinanyahpabo copi. Noque cahen yosmabo, mato cahen coshiyahpabo, maton jisí. Noque jahuamabo, maton shinanah. Mato siribo, maton shinanax.

¹¹ Rahma caman tah non pihan hihqui. Xehan hihqui. Chopanma nichí. Rishqui rishquihahbaan bi tah non tenehi. Noque jahuerahnon hoxati yamahi.

¹² Noquen mequeman noque tee teeti. Noque qui tiromahi rainyamahibo bi noquen tenexon jato yocaxonquin. Noque tiromajahibaan bi noquen tenequin.

¹³ Noque qui tiromahi yohuanaboya noquen sirijaquin jato yohuanquihnuqui. Rish-taya quescapahbo ta noque jiscanihqui. Jatihibi jonibo mentan hashoan tiromaboo quescapahbo ta noque jiscanihqui.

¹⁴ Mato rabinmanoxonma bi tah hen matohon shinanxon mato pontenoxon mato jascajaquin yohihi, heen baqueebaan.

¹⁵ Criston joi haxemanicahbo man hicha jai que bi tah man papa hicha yamahi. Criston jonibo sca man hihnon hihxon cahen hea huestichin mato joi siri yohiniih.

¹⁶ Jaa copi tah hen mato hihti yohihi, heen hahcái quescajanahue.

¹⁷ Man jascajanah hihxon tah hen mato qui Timoteo raannihqui. Heen baque tah qui, hahan hen hihti queenai, noquen Hihbaan joi hean yohini copi cahen heen baque. Noquen Hihbaan yohihi quescajaquin ta jaan hahqui qui. Criston joi nincaxon hen hahcái joi mato yohinon hihxon tah hen raanihqui. Jatihibi janin noquen huetsabo hean yohihi quescajaribiquin jaan rihbi mato yohirribinon hihxon tah hen raannihqui.

¹⁸ Hea jari catimascai shinanax tah man caibo coshi coshihax yohuan yohuanscái.

¹⁹ Noquen Hihbo queenaiyahue tah hen histon mato qui catihí. Nocoxon tah hen maton yohuan tanaxonma bi maton coshi hean honantihu.

²⁰ Jahuen jihuetaahbo non nincamanon ta Yohuanresnahue Papan noque jayamahiqui. Noque ta jahuen coshi rihbi hinaniqui.

²¹ Shinannahue. ¿Hean mato jahuejati man queenain? ¿Caxon mato rishquití? ¿Caxon matohon shinanaxon honaxonbi yohiti? ¿Jahua man queenain?

5

Tsinihiton casticanti

¹ Caibo man joni huetsa betan tsinihi tah hen nincascai hea chanihadbo. Nincayosmabo jascaraima bi ta mato tocan jahuen mama betan huesti joni hihqui qui.

² Jatihibi honanquin hahcajahax bi tah man honanmabo jihuetai. Benatihi bi tah man benayamahi. Mato tocan jascapa hohchamis hihyamascanon potanahue.

³ Mato janin hihyamaxon bi tah hen mato betan hihxon quescaxon mato yohiscai.

⁴ Hoa jascanica copi: Noquen Hihbo Jesucristohon shinanax tsiniquixon, jahuen coshiyahpaxon, hea rihbi jano hihqui hahcajaquin shinanaxon, hahnahue.

⁵ Satanás res sca jaa joni hinannahue, jahuen yora rehtenon hihxon. Noquen Hihbo Jesus jahuiya jaa jonin yoshin teehihyaxahnón hihxon Satanás hinanscanahue rehtenon.

⁶ Man shinanquin hahcajahax yohuanai ta tiroma qui. Hahan paan soohihmati pishca niahah ta tonco jatihibi sca soohihihiqui. Hohcha ta jascarihbihiqui. ¿Man honanyamahin?

⁷ Hahan soohihmati tiroma potaquin hahcajaquin janahue, soohihmahahma tonco siri quescapa sca janoxon. Hohchatí jihuetaibo mato tocan jayamanon jascajanahue. Noquen hohcha copi ta Cristo mahuanishqui, non hohchajomabo sca janon.

⁸ Hohchajomabo jihuenahue. Maton shinan tiromabo potanahue, behnabo sca bihnoxon. Hihcointi shinanbo bihnahue, parantima shinanbo.

⁹ Joni huetsa betan hohchataibo yohuanquihnyamanahue hah tah hen mato janiqui, quirica huishaxon.

¹⁰ Jascapahbo man yohuanquihnyamanon hen hihqui bi tah hen noquen Hihbo qui hinamehyamaparibho yohiyamanihqui, joni huetsa betan jan hohchatí hihresai bi, yohuashihtai bi, yometsohtai bi, santo qui betihihpaquetai bi. Jascapa nincayosmabo yohihi tah hen yohuanquihnyamanahue jayamanihqui. Jaabo yohuanquihnyamanoxon cah man nea mai potabahini cahan.

¹¹ Tiromahibo noquen huetsabo yohuanquihntima tah hen mato yohinihqui. Joni huetsa betan hihqui noquen huetsabo yohuanquihnyamanahue. Yohuashihtaibo, santoyahpabo, rainyamahi jihuetaibo, pahen pahenaibo, yometsohtaibo, jascapa noquen huetsabo yohuanquihnyamanahue. Jascapahbo piquihnyamanahue.

¹² Nincacoinyamahibo casticanti tah hen mato yohiyamahi. Noquen huetsabo caya, jato pontequin casticannahue.

¹³ Nincacoinyamahibo ta Papanbi casticanyaxihqui qui. Mato tocan hihquiton maton huetsa nincayosmabo camanahue hah ta Papan noque janishqui.

6

Noquen huetsabo non demandantimahi

¹ Noquen huetsabo betan rainyamahi yohinanxon tah man nincayosmabo janin demandandi cahi. ¿Jenquetsahaquin shinanaxon man jascajahin? Noquen huetsabaan noque yohinon jato tsinquinonhue hahtihi bi tah man tininti janin demandani cahi, nincacoinai tininti que ma bi.

² ¿Papan jihuetabboxon man jatihibi janin jaibo pontequin jihuemayaxihqui man honanyamahin? ¿Jascapahbo man ponteyaxihqui bi man rahma nincacai teemabo man ponteti hahtipahyamahin?

³ ¿Papan yonotibo rihbi man pontejaquin yohiyaxihqui man honanyamahin? ¿Jascapahbo pontequin yohiyaxihquiboxon non rahma nete meha teemabo non pontequin yohiti hahtipahyamahin?

⁴ Noquen huetsabaan noque jistihi bi tah man jascapahbo joi romishin copi sinacananxon nincayosmabo janin demandani cahi.

⁵ Hen mato yohihah rabinnahue. ¿Noquen huetsabo maanhiihquinannanaiya, jato yohiti shinanya joni mato tocan yamahihquin?

⁶ Jascatihí bi ta huetsan jahuen huetsabi demandaniqui, nincayosmabo janinxoncabí.

⁷ Demandahanannanax tah man tiromascái. ¿Huetsan bichinnón jenquetsahpahi man demandanxonma sca jascabi sca banenon jeneyamahin? ¿Jenquetsahpahi man teneyamahin?

⁸ Matobi tah man tiromahi. Man tah man yometsohtai, maton huetsanahbi.

⁹ Hohchayahpabo Papan jihuemayamayaxihqui ¿man honanyamahin? Paramehyamanahue. Joni huetsa betan hihquibo, santoyahpabo, queeyahpa betan hihquibo, benoyahpa haibo betan hihquibo, hahbe bebo hahmahibo, hahbe bebo hahcaibo,

¹⁰ yometsohbo, yohuashihtaibo, pahenmisbo, tiromahi yohuanaibo, raquejaxon bichi-naibo. Jascapahbo ta Papan jihuemayamayaxihqui.

¹¹ Jascapahbo tah man hihpahoni. Jascapahbo ta Papan mato sohuaxonnishqui. Mato ta yohinishqui, Mato tah man heen baquebo sca qui, hahquin. Noquen Hihbo Jesucriston jahuen jimin maton hohcha copijani quen ta mato yohinishqui: Hohchajomabo sca tah man qui, hahquin. Dios Yoshiman rihbi jascajaquin. Jaa copi tah man huetsabo sca qui.

Non coirameti jai

¹² Hea queenai quescajati tah hen hahtipahi. Hahtipahxon bi tah hen texe hahyamahi, jaa texe hahan noquen shinan tiromati copi. Hen queenai quescajaquin hahtipahax bi tah hen jahuatohon bi hea hihbojati hea queenyamahi.

¹³ Piti ta piti qui. Noquen poco rihbi ta hahqui piti naneti qui. Rabebi ta Papan queyoyaxihqui. Noquen yora ta joni huetsa betan hahan tsinitima qui. Noquen Hihbaanah sca tah qui, jaan hihbojati. Noquen Hihbo cahen noquen yora hihbo.

¹⁴ Noquen Hihbo huenihhninxon ta noquen yora rihbi jahuen shinaman Papan hueniyaxihqui.

¹⁵ Maton yora ta Cristonah qui. ¿Man honanyamahin? ¿Criston yora bihxon hahresti haibo hen hinantihin? Jahuentianbi.

¹⁶ Hahresti haibo betan hihqui joni ta hahbetan huesti yora sca qui. ¿Man honanyamahin? Jaabo rabe ta huesti yora sca qui, hih ta huishani joi jaiqui.

¹⁷ Noquen Hihbo betan hihqui joni ta hahbetan huesti yoshin sca jaiqui.

¹⁸ Tsiniti qui raquenahue. Huetsa hohcha jatihibi ta noquen yora qui hahcama qui. Tsini joni ta jahuen yora qui bi hohchatihqui.

¹⁹ Maton ta jahuen yoshin Papan hinannishqui. Maton yora chicho ta jahuen yoshin mato manahihqui. Maton yora ta jahuen xobo qui ¿man honanyamahin? Matonahma sca ta maton yora qui.

²⁰ Copijaxon ta mato bijnishqui. Jaa copi noquen Papa queenai quesca man jihuetai honanahbo hihquish jihuena, ponte res.

7

Noquen hihquihinti betan jihuetai

¹ Quirica huishaquin man hea yocaho joi sca tah hen mato yohihi. Bebaan haibo bifyamaha ta siri qui.

² Jaabi queejomahax man hohchati queenmis copi queeyahpascanahue. Jatihibi haibo rihbi beneyahpascanahue.

³ Haiboyahpahax miin haibo qui hinamehhue, huetsan. Mia rihbi miin bene qui hinamehhue, chocan.

⁴ Beneyahpahax tah min mihri miin yora hihboyamahi. Miin benen ta miin yora hihbojahi. Mia rihbi tah min mihri miin yora hihboyamahi, huetsan. Miin haibo ta miin yora hihbojahi.

⁵ Miin bene haibo queenaiya, Hen ta queenyamahi, hihyamahue, chocan. Miin haibo bebo queenaiya, Hen ta queenyamahi hihyamahue, huetsan. Papa hihti yocanoxon jatihi nete hihyamaparinonhue hihqui rabexonbi shinanax pari jascanahue, basima. Jaa pecaho rabebi hihresscaribili. Maton hihquihinti betan hihyamahiton Satanasnen mato hohchamamis hihquish, jascanahue.

⁶ Maton hihquihinti hoxaquahnyamanahue hah ta hen mato jayamahi. Hen mato yohihi quescajati queenaiho res jascanon.

⁷ Hea hihqui quesca man jatihibi japhanon. Jaabi ta Papan hinanahqui, hihquihintiyahpabo janon, jayajomabo jaribon. Huetsan ta jahuen bichiqui. Huetsan rihbi jahuenah.

⁸ Queejomaboya yononmabo sca tah hen yohihi: hea hihqui quesca hihquish tah man siripi jihuethi.

⁹ Jaabi, teneti hahtipahyamaxon maton haibo benanahue heen huetsabaan, maton bene rihbi heen chocabaan. Hisinaxcamahi haibo hihti queenah ta tiroma qui. Jaa tiromahi bi ta matonahbi maton haibo bichí siri qui.

¹⁰ Queeyahpaboya beneyahpabo sca tah hen yohihi, heen joima bi Papan joi yohiquin. Beneyahpaxon miin bene potayamahue, chocan.

¹¹ Miin bene potahax huetsa bebo betan hihyamascahue. Bebo queenax miin bene xení betan hihribihue. Mian rihbi miin haibo potayamahue, huetsan.

¹² Texe tah hen yohihi. Noquen Hihbaanma bi hean. Nincacoinyamahax bi mihbetan jihuetaiton miin haibo potayamahue, noque huetsan.

¹³ Miin bene rihbi nincacoinyamahax bi mihbetan jihuetaiton potayamahue, chocan.

¹⁴ Min nincacoinai copi ta Papan miin bene shinan hinantihiqui. Min nincacoinai copi rihbi ta miin nincacoinyamahi haibo Papan shinan hinantihiqui, noque huetsan. Jasca copi ta maton baquebo rihbi shinan siri hinantihiqui. Jascayamahah cahen maton baquebaan Papan shinan siri bifyahamah.

¹⁵ ¿Nincayosma beban jahuen haibo potabahinaya cahran? Cacatsihquish jan catannon. Jascapahton potahah ta jahuen haibaan chibantima sca jaiqui, queenyamaxon. Jasca rihbi nincayosma haibaan noquen huetsa potahax cacatsihquish, jan catannon, jahuen benen chibantimascai. Non maanhiihquinanaxma jihuenon ta noque Papan yohinishqui.

¹⁶ Mia copi rah ta miin benen nincacointihiqui, chocan. Mia copi rihbi rah ta miin haibaan nincacointihiqui, huetsan.

¹⁷ Noquen Hihbaan mia hinanai betan jihuehue. Hahbetan jihuexon nincacoincaax hahbetanji jihuehue. Jasca tah hen jai, jatihibi janin Papan baquebo jihueti yohiquin.

¹⁸ ¿Hahan judio honantiyahpa hihxon min nincacoin sca janiquin? Jaa hahan judio honanti potaquin tanayamahue. ¿Jaa honantiyahpajomaxon min nincacoin sca janiquin? Jaa honantiyahpati queenyamaxue.

¹⁹ Jaya hihqui ta jahuama qui. Jayajoma hihqui jahuamaribihi. Papan joi res tah non nincati jai.

²⁰ ¿Jahua jonixon min nincacoinnihquin? Jaa noquebo rihbi jascabi jahue.

²¹ ¿Patoronejoni hihxon min nincacoin sca janiquin? Jasca rihbi jahue. Jascapa jonihax bi miin cuenta copijati hahtipahax patorojoma sca jihuehue.

²² Hina hihxon bi noquen Hihbo nincacoincaax tah min hina hihyama sca jai, noquen Hihbaan picohah. Jasca rihbi patorojomaxon bi nincacoinax tah min Criston joni sca qui.

²³ Copijaxon ta mato bijnishqui. Jonibaan mato hihbojayamanon jato qui hinamehyamanahue.

²⁴ Nincacoinax man jani quescari janahue, heen huetsabaan, Papan yanapanah.

²⁵ Benejomabo sca tah hen yohihi. Noquen Hihbaan yohini joi mato yohiti yamahi bi tah hen noquen Hihbaan yanapano shinanquin sirijaxon hean mato yohihi.

²⁶ Noque rahma tiromajacatsihquibo copi ta man rahma jai quescari jascabi jaah siri qui.

²⁷ ¿Mia queeyahpa hin? Miin haibo jeneti shinanyamaxue. ¿Mia queejoma hin? Haibo benayamahue.

²⁸ Jaabi tah min haibo bichish hohchayamahi. Haibo rihbi jahuen bene betan hihquish hohchayamahi. Hohchataxma bi tah man hohmis hohmisihi. Jaa copi tah hen mato yohihi.

²⁹ Basimahax res sca ta tiroma netebo nocotihiqui hih ta hen jai, hea huetsabaan. Jaa copi haiboyaahpahax bi haibojoma quescapahax jihuenahue.

³⁰ Benataibo benayamahax quescapi jihuenahue. Coin coinaibo coin coinyamahax quescapi jihuenahue. Marohibo maton jahuabora yamahihcamahi jihuenahue.

³¹ Teeyahpabo tee yamahi quescapi jihuenahue. Noquen hihti quescayama sca tah non jatihi.

³² Man masa shinanyamanon hihxon tah hen mato yohihi. Queejoma jonin ta noquen Hihbaan joi shinanihqui. Noquen Hihbaan yohihi quescabijati shinanquin.

³³ Queeyahpa jonin ta jahuen teebo rahma hahti shinanihqui,bihxona jahuen haibo jenimanon hihxon.

³⁴ Noquen Hihbo huesti janin ta jahuen shinan camayamahihqui. Xontaconen ta noquen Hihbaan yohihi quescabijati shinanihqui. Benejoma haibaan jascajaribiquin. Jaton yora jaton shinan rihbi mequejaquehcatsihqui. Beneyahpa haibaan ta jahuen teebo hahti shinanihqui, jahuen bene jenimanon hihxon.

³⁵ Maton hihquihintibo man jenenonma bi man honanon hihxon tah hen mato yohihi. Man sirijaquin shinannon hihxon tah hen yohihi, noquen Hihbo huesti man shinannon hihxon.

³⁶ Min hinanah bi jahuen benejahtinin bifyamatatahbahi miin haibo baque yoxabocat-sihscai jisxon hinancatsihquin hinanhue queenxon. Hinanah ta tiromama qui.

³⁷ Juhuen copi hinanti yamahiya, shinanquin sirijaxon hinanyamati queenxon rihbi haibo rihbi huanoti queenyamahiya miin baque xontaco hinanyamaxue. Hinanyamahah ta hashoan siri qui.

³⁸ Miin haibo baque hinanah siri. Hinanyamahah hashoan siri rihbi.

³⁹ Juhuen bene mahuanon caman ta jahuen haibo hahbetan hihti jaiqui. Juhuen bene muhuataiya huetsa bebo bihtiscai. Nincacoinai bebo res ta bihtihiqui.

⁴⁰Jaabi ta yononma banetah hashoan siri qui, hen mato yohihah quesca. Dios Yoshiman hea shinanmaha tah hen yohihi, hih tah hen jai.

8

Santo rehtexona nami non pitihin

¹¿Santo rehtexona hina nami cahran? ¿Non pitihin? Non tah non honanai, hih tah non jai jatihibi. Non tah non honanai hihxon tah non shinan hichajaquin bi quesajahi. Huetsa jonilhon shinanxon hahxonquin tah non noquen shinan hichajacoinai.

²Honan tah hen qui, hihxon tah min honanyamatahbahi, honantihu bi.

³Papahon min shinanaiton ta jaan mia honanscaiqui.

⁴Jaa copi tah hen mato yohihi: ¿Santo rehtexonai nami non pitihin? Santo ta jahuabima qui. Papa huesti ta Dios qui. Non tah non honanai.

⁵Dios hahcaibo ta jaiqui, naihoh, main rihbi. Jascapa diosbo hichahi. Hihbo hahcaibo rihbi ta jascari qui, hichahi.

⁶Noquenah ta huesti res qui, Dios, noquen Papa. Jaan shinanah cahen jatihibi jai. Jatihibi tah non jahuenahbo qui. Noquen Hihbo rihbi cahen huesti res, Jesucristo. Jaan yohihih cahen jatihibi janish. Jaan jihuemaha cahen noque jihuetai.

⁷Jaa hen mato yohihi ta caibaan honanyamahihqui. Jano santo jaiton haninixon ta Santo rehtexonai nami tah qui, hihxon bi caibaan pihiquipi. Pitimahi shinanax, Hohcha ta hen jai, hihresscái, pihxas sca.

⁸Pitimabo pihxas tah man hohchayahpa qui hah ta Papan noque jayamahiqui. Pitimabo piyamahax tah man siribo qui hah ta Papan noque jayamaribihiqui. Jascapa nami piyamahax bi tah non jascabi jai. Pihxas cahen jascarihbih.

⁹Queenxon piquin. Queenyamaxon piyamaquin. Pixon bi coirannahue, noquen huetsa man tiromamamis. Man pihi jisxon ta jaan rihbi sca pihxas jaan shinana pitima que bi pihxas hohcha tah hen jai hihquish noquen Hihbo betan siripi nihyamascathiqui. Pixon cahen masa shinanscaquin.

¹⁰Santobo ta jahuama qui hihxon mian santo xoboho pihi tsahotai bi mia janu meraxon ¿santo rehtexonai bo pitima hean rihbi pipan jan jatimahiquin?

¹¹Jascanax ta mian pihi jisxon jahuen pitima pihxas noquen huetsa masatihiqui, jahuen hohcha copi Cristo muhanai que bi.

¹²Jascajati que ma bi tah min jascajaquin miin huetsa jahuen pitima queenmatihi, rishquihah quescajaquin jan masa shinanscanon. Jaan pitima que bi piti shinan hinani tah min hahqui hohchatai. Cristo qui rihbi hohchatai.

¹³Jaa copi tah hen Hea jisxon ta heen huetsan noquen Hihbo jenebahintihiqui hihxon hean jahuentianbi nami piyamahi. Jascaphabho piti hahtipahxon bi cahen hean piyamaquin, heen huetsa hean hohchamamis hihxon.

9

Papan raantibaan yocati hahtipahibo

¹Hahtipahxon bi tah hen piyamahi. Shinannahue: hea tah hen Criston raanti joni qui. Noquen Hihbo Jesus tah hen heanbi jisniqui. Hean yohihah tah man noquen Hihbo qui hinamehniqui, jahuen baquebo sca.

²Hea jahuen raanti man honanai bi ta caibaan honanyamahiqui. Mato tah man hahan honanti qui, noquen Hihbaan raanti hea hihqui honanahbo.

³Jaama tah min qui hihnicahbo tah hen yohihi, nescajaquin:

⁴Nincacaibaan mato pimanon, mato xehamanon, ¿heen joi jato yohitannahue noquen Hihbaan hea jayamanishquin?

⁵Huetsa jahuen raantibo hihqui quesca, noquen Hihbaan jochicabo hihqui quescahibihi, Cefas rihbi hihqui quescahibihi ¿non noquen haiboo betan nihti hahtipahyamahin?

⁶¿Hea, Bernabe, noque rabe res non tee teexon pari piti noquen Hihbaan noque yohinishquin? ¿Man jascajaquin shinanain?

⁷¿Copijaha ma bi tsoa sontarohi catihquin? ¿Jahuen bimi piyanoxonma bi tsoan huaijahiquin? ¿Jaton xoma jene pishca bihyamahue hahca tsoan sca ganado coirantihiquin?

⁸Heanbi shinanax yohuanai shinan rah tah man jai. ¿Noquen Moisesnin joi janin jascapa yohuan yamahihquin?

⁹Moisesnin ta huishanishqui: Xehmemanoxon bana bero jamamaquin miin toro cotaneyamahue, hahquin. ¿Torohon shinanxon Papan jascajanishquin?

¹⁰¿Noquen non honannon hihxon res yohiyamanishquin? Non honannon hihxon ta huishamanishqui. Huai bananica ta yohinishqui, bimi piyanoxon jan huaijanon. Bimi tsinquinica rihbi ta yohinishqui texe piyanoxon jan tsinquinon.

¹¹ Banaquin hahcajaquin non mato Papan joi hinannihxon Ɂbimi tsinquipuin hahcajaxon sca texe maton tee non bihtimahin?

¹² Jascajati ta jaiqui. Texe maton tee bihti caibo jaiya Ɂnoquen sca non hashoan sca bihtimahin?

Noquen bihti jai bi tah non maton tee bihyamahi. Bihti hahtipahxon bi tah non non bichiya caibaan nincacoinyamamis hihxon non jatihibi teneresai.

¹³ Papan xoboho teexonaibaan ta janoha piti piliqui Ɂman honanyamahin? Papa hinanquin hinabo rehtexonquin yanapanibaan rihbi ta jaa hina nami piliqui Ɂman honanyamahin?

¹⁴ Jascajaribiquin ta jahuen joi siri non mato yohihah man jai romishin man noque hinanti noquen Hihbaan yohinishqui, non hahan jihuemon.

¹⁵ Papan joi mato yohinixon bi tah hen mato cobranyamahi. Jahuabi cobranyamanoxon rihbi tah hen rahma huishahi. Mahuanoxon caman tah hen jahuabi copi yocayamahi, Papan joi mato yohiquin tah hen mato cobranyamanihqui mato jayanoxon.

¹⁶ Papan joi siri yohinish bi tah hen Papa bebon sca jahua copi yohuan yohuanti yamatifi, hen hahnibo yohicatsihquin. Papan yonohah tah hen joi siri yohihi. Jaa copi tah hen Papan joi siri yohiyamahax Hahraai hih hen jatihibi.

¹⁷ Heabi yohiti queenxon joi siri hen yohihiya ta Papan hea copijatihiqui. Yohiti queenyamaxon bi cahen jaabi yohihan, yonohah copi. Papan yonohah can.

¹⁸ ɁYohihax res sca hen jahua jain? Yohixon tah hen nea honan jai. Cobrantih bi cobranxonma hean yohihi tah hen honanai.

¹⁹ Mato jatihibi cobranti hahtipahxon bi tah hen jatihibi joni hahxonresai. Hashoan hicha jonibo nincamanoxon hahxonresquin.

²⁰ Judiobo nincamanoxon tah hen jato tocan judiobo quesca sca jai. Moisesnin huishani joiyahpabo nincamanoxon jato tocan jaa joi hahnica quesca sca jai, hean nincati joi que ma bi.

²¹ Moisesnin huishani joi honanyamahibo nincamanoxon cahen jato tocan jaa joijoma quesca sca jai, noquen nincati Papan joi hahnica hihquish, Criston joi hahnica rihbi hihquish.

²² Coshijomabo nincamanoxon tah hen jato tocan coshijoma quesca sca jai. Jatihibi jonibo nincamanon cahen jaabo hihqui quescaribibi hea rihbi jai. Caibo teehihmanoxon tah hen jascajahi.

²³ Criston joi siri nincamanoxon copi res tah hen caibo hihqui quesca hea jai, Cristo betan teenica sca janoxon.

²⁴ Tsoa pari non nocotihin hihquish ta bishquihnicahbo hishtohihqui. Jatihibi hishtocanahax bi huesti res nocomenohi, nocomenonicaton maitibihnoxon. ɁMan honanyamahin? Nocomenonoxon hahcajaquin janahue.

²⁵ Jaton coshi tananannicahbo ta yobacahinxon jatihibi teneti haxehihqui. Payonica jahuaborabihnoxon ta teneti haxecaniqui. Noquen cah non payoyosma jahuaborabihnoxon non tenetih.

²⁶ Ponte res hishtocanahihcama tah hen jai. Nihue res rishquiquin hahcajayama tah hen jai.

²⁷ Teneti haxenoxon tah hen heabi rishquitai, hean shinanai quescajati hahtipahnoxon. Caibo hean Papan joi siri nincamanish bi potabohanah sca hen jamis hihquish tah hen jascaquin teneti haxehi.

10

Santo qui non coirameti jai

¹ Honannahue, hea huetsabaan. Noquen xenibo ta jatihibi hoa nai cohin naman nihpahonishqui. Hian joshini rihbi ta jatihibi pohquejaquenishqui.

² Moises chibanaahbo hihxon ta Papan jato nashimaquin hahcajaquin nai cohin naman jascajaquin huinomanishqui. Jascajahabo jaa hiaman jato pohquenquin.

³ Papan hinana piti ta jatihixonbi picannishqui.

⁴ Jaan hinanah cahen jene nomicanquin. Papan bahimahah macaman mehax jabatai jene xehacanquin. Cristo ta jaa macan hihnishqui.

⁵ Jato xehamaxon bi ta Papan jato tiromabohi jisnishqui. Jaa copi ta jato muhamabahin-nishqui nihi naman.

⁶ Noquen non honannon hihxon ta jascajaxon Papan huishamascanishqui, jaabo tiro-majati jenipahihni quesccayamahi non tiromajati jenipahihyamanon hihxon.

⁷ Jato yohihi ta nescajaquin huishanishqui: Pihi ta jonibo tsahopaqetihqui, xehahi tsahocani. Pihax ta shirohi sca huenicahuancaniqui hahquin. Jaabo jascari santoyahpa japahoni quescayamanahue.

⁸ Joni huetsa betan tsinihi hihnibo quescayamanahue. Joni huetsa betan hihquish ta huesti neten res veintitres mil mahuanishqui.

⁹ Hihcoin cahra jaiquin hihxon noquen Hihbo tanahax ta mahuaribicanishqui, ronon piyah. Noquen Hihbo tananibho quescayamanahue hih ca hen jai sen.

¹⁰ Reren rerenaiton ta queyonicator jato queyonishqui. Reren rerennihbo quescayamanahue.

¹¹ Non jascari hohchayamanon hihxon ta Papan jato jascajaquin casticannishqui. Nete queyoti hochoma noque chini jihuetaibaan honannon hihxon ta jaa joi huishamanishqui.

¹² Jaa copi coiramehue: ponte min nichi shinanax bi min hohcha qui paquemis.

¹³ Jatihibi jonibo jan tanahi quescajariquipu ta tiroma yoshiman mato hohchamaquin tanahihqui. Jan mato jascajahi bi ta tsoan tenenihma Papan mato huinomatimahiqui. Jaan yohini quescabijaquin ta mato hahxonihqui, mato paxajaquin. Man tenecasquimati ta mato huinomayamahiqui. Tanahah bi man tantiribiti ta mato hinantihiqui, man teneti hahtipahnon hihxon.

¹⁴ Jaa honanax sca santo yocati ni shinanti bocabi queenyama sca janahue, hea huetsabaan. Hihti queenyamanahue. Matoon shinanxon tah hen yohihi.

¹⁵ Mato tah man shinancoinaibo qui. Hen yohihi ¿jenquetsahpa quin? shinannahue.

¹⁶ Criston noque haxemani quescajaquin tah non Mia copi tah non xehahi, Hihbon hahxon non xehahi. ¿Noque copi Cristo mahuanini shinanaibo rahsixon non jascajaquin xehayamahin? Non tehcaxon hinanpaquehi paan ta jascapha rihbi qui. Noque copi jan yorayahpahax mahuati joní honancoinaibo rahsixon tah non jascapa pihi.

¹⁷ Huesti tonco tehcapaquexon tah non jatihixonbi pihi. Jascarihbih ta noque hichahax bi huesti yora qui, huesti piti tonco jai quescarihbih.

¹⁸ Moisesnin yohihah israelibaan hahcai sca shinannahue: Papa Dios hinanquin ta jaton hina pishca rehtexon picanihqui. Jaton hohcha copi jaton hina muhuatai hihxon cahen picanquin, jaton hina betan huesti yora hihnoxon.

¹⁹ Hen yohihi jahua hihcatsihquiquin honannahue. Santobo ta jahuma qui. Santo rehtexonaibo ta jahuma rihbi qui, nami res.

²⁰ Jascaphabho jahumabho que bi ta tiroma yoshinbo rehtexonquin hihxon Cristo qui hinamehyamahibaan jaa nami pihiqui. Jascapa piti ta noquen Papanahma qui. Tiroma yoshinbaan jonibo quescaphabho man hihyamanon hihxon tah hen mato yohihi.

²¹ Papan xehati xehaxon tah man tiroma yoshinbaana rihbi xehatimascai. Papan piti pixon tah man tiroma yoshinbaana rihbi pitima sca jai.

²² ¿Noquen Hihbo non sinamacatsihqui? ¿Noque non jaa mentan hashoan coshi quin? Shinannahue.

Joni huetsahon shinanax coirameti

²³ Queenxon piti hahtipahxon bi tah non caibo piti non piyamahi, jaa pihá siriyamahi quen. Non queenaijati hahtipahxon bi cah non joni huetsa tiromajati queentimahi.

²⁴ Mia res siripi jihuexonoma bi caibo sirinon hihxon jise.

²⁵ Nami maroxon yocacahxonma pireshue, santo rehtexonaibo hin hihxonma.

²⁶ Noquen nete jatihibi ta noquen Hihbaanah qui. Jatihibi main jaibo rihbi jahuenah.

²⁷ Nincacoinyamahibaan mato Pihi benahue hahca picatsihquish botannahue, mato hinanai piti jatihibi yocacahxonma piresquin. Santo rehtexonaiboma hin hihxonma.

²⁸ Nea ta santo rehtexona nami qui, noque huetsan, jaiboya piyamascaquin. Jaa noquen huetsa copi piyamaquin, jan masa shinanmis hihxon.

²⁹ Mianbi min jaa nami pixon masa shinanyamahi bi mian piquihina noquen huetsan masa shinanmis hihxon piyamaquin.

Jascapa nami jaan pitimahi copi tah non piquin jeneyamahi. Non piquihina jascapa pihax jaa hohchatai copi tah non jenetih, piyamascaquin.

³⁰ Mia copi tah hen pih Papan hihxon hean res pihya ta jahua copibi huetsa hehqui yohuantimascatihqui, Papan hea hinanai piti quen.

³¹ Jaa copi piquin, xehauquin, man hahcái jatihibi jaquin, noquen Papa hihti shinanyahpa hi honanahbo janahue, jatihibi.

³² Jahua copi bi mato caheti yamanon janahue, judiobaan jisí hahqui yohuantimabó. Jaton nauabaan jisí jasca rihbi. Papan caisai noquen huetsabaan jisí jasca rihbi.

³³ Jatihibijaquin tah hen jatihibi jonibaan sirijaquin shinanahbo hihxon hen hahcái. Hea res siripi jihuexonoma bi caibo siripi jihuexon hihxon tah hen hahcái, hicha jonibo Papan teehihmanon hihxon.

11

¹ Criston hahcai quescajaquin tah hen jascajahi. Jascajaribiquin hean hahcai quescajanhue.

Tsinquitaibo tocan jenquetsei haibobo jai

² Hen mato yohini joi tah man shinanbehnoyamahi. Jaa copi tah hen jenimahi. Hean mato honanmapahoni quescaja tah man jai rahma caman.

³ Man jascajahi bi tah hen nea yohiscai, man honannon hihxon: jatihibi bebo yononica ta Cristo qui. Haibaan yononica ta jahuen bene qui. Criston yononica ta noquen Papa qui.

⁴ Rabinnoxon pari ta bebaan maiti maihahnan Papa yocatilhqui, jahuen mapo qui hihtimahscai, haibocatsihqui quescahi.

⁵ Haibaan cahen jahuen mapo mahpoxonma bi Papa yocacax jahuen mapo qui rabiniti jai, bebaan hahcajaquin yocacax. Mahpoxonma Papan joi yohihax cahen haibo hahqui rabinti jaresscái, mamapoxonma yohihax. Maxcorohaquin mancojabahina quescaha tah qui.

⁶ Mahpocatsihyamaxon min boo maxcorohabahinmahue, haibon. ¿Haibo mancroyati hihtimahquín? ¿Haibo maxcoroyati hihtimahquín? Mancoya quescayamanoxon mahpóhue, haibon.

⁷ Bebo ta mahpotimahqui. Bebo ta jaa jisxon Papa Dios jahuen hihbo jai shinanti qui. Jaa jisxon tah non Papan shinan noquen honanai. Haibo ta jaa jisxon jahuen benen jaa hihbojahi non honant qui.

⁸ Haibaan pishi xao ta Papan bebojayamanishqui. Bebaan pishi xao cahen haibojanish.

⁹ Haibaanbihnon cahen bebojayamanish. Bebaanbihnon caya haiboaquin.

¹⁰ Jaa copi ta haibo mahpoti jaiqui, hihboyahpahi honanahbo. Papan yonotibaan rihbi siri jisnon.

¹¹ Haibo mahpónica hihquish bi ta bebo hihqui quescahi qui, hahbe shinanyahpa. Bebo jascarihbibi, haibo hihqui quescahi, hahbe shinanyahpa.

¹² Bebaan pishi xao ta haibojanishqui. Jascarihbibi cahen haibo quehax sca bebo cainscái. Jatihibi caini, Papan shinanaiya.

¹³ Yocacahananscanahue joni huetsa shinanmanoxon hihxon ¿Mahpoxonma haibaan noquen Papa yocacah siri qui?

¹⁴⁻¹⁵ Boo chaiya bebo rabintihbi bi haibo boo chaiya siri, ¿maton shinamanbi man honanyamahin? Jahuen boo ta jahuen mahpoti qui, Papan hinanah.

¹⁶ Huetsa shinanyaxon honanhue: huetsa noquen hihti joi tah non yamahi. Huetsa jaton hihti ta noquen huetsabo rihbi yamahihqui.

Piquin bi tiromajahibo

¹⁷ Huetsa joi sca hen mato yohinon. Sirija tah man jai hah ta hen mato jayamahi. Shinanbihnoxonma tah man tsinquitai. Tiromacananoxon can.

¹⁸ Noquen Hihbohon shinanax man tsinquitax caibo huetsa shinanya hihnon caibo rihbi huetsa shinanya man jai tah hen nincacai. Jasca coin rah tah man jai.

¹⁹ Jahuemehabaan sirijaquin shinanihqui honanahbo rah tah man jascari joi bichinanai.

²⁰ Jaa copi tah man piquin bi noquen Hihbaan noque yohini quescajaquinma man pihi, tsinquixon.

²¹ Picatsihxon tah man joni huetsa manaxonma matonahbi man piresai. Huetsa pihan hihnon ta huetsa pahenihqui.

²² ¿Jiricatsihxon picatsihxon hahoxon piti xobo man yamahin? ¿Papan caisaibo jistahimamaxon man pitijomabo rabinmahin? ¿Jahua hen mato yohitihin: Sirija tah man jai hah hen jatihin? Hahyamabiresquin.

Noquen Hihbaan noque yohini piti

(Mt 26.26-29; Mr 14.22-25; Lc 22.14-20)

²³ Noquen Hihbaan yohihah ta hean sca mato yohinihqui, jaabi rihbi. Judasen jaa paranxon porisia bihmanoxihqui yame ta noquen Hihbo Jesusen jahuen haxenicabo yohinishqui.

²⁴ Posen pari bihxon Papa yohixon tehcacoxon, Nea ta heen yora qui. Man jihuemon hihxon tah hen hehri jato retemahi. Hea shinanaxon pinahue, hah cahen jato janish.

²⁵ Jaabijahiboya sca tason bihxon jascajaribiquin. Behna sca tah hen mato hahxon-tijaquin yohihi. Jahuentianbi hen huetsajatimahi honanahbo tah hen heen jimi potahi. Heen jimi shinanti ta nea xehati qui, xehanahue. Man xehahi tian tihibi jascajanahue, hea shinanaxon, jato jaquin.

²⁶Jahuen piti pixon jahuen xehati rihbi xehaxon tihibi tah man jismahi, mato copi maton Hihbo mahuanji sisbo. Jan jonon caman jascajaquin jismanahue.

Jenquetsahaquin non pitithin

²⁷Jaa copi ta shinanyamaxon man noquen Hihbaan piti piresxon jahuen xehati rihbi man xeharesah tiroma qui, noque huetsan. Noquen Hihbaan yora jahuen jimi rihbi cah man jahuaama quescajahì.

²⁸Shinanquin sirijaxon jaa piti pihue, jaa xehati rihbi xehaquin.

²⁹Pixon xehaxon bi Criston yora copi man pih shinanyamaxon tah man Papan mato tiromajan man jai.

³⁰Jaa copi tah man hicha yora yosmahi, caibo rihbi hisini. Caibo rihbi cahen mahuascaibo.

³¹Noquebi non pontejananaiya cahen noquen Hihbaan noque casticanyamahan.

³²Noque pontequin ta noquen Hihbaan noque casticaniqui, mai mehaboyabi noque casticanyamayaxahnnoxon.

³³Jaa copi pih tsinquitax manahahnannahue, heen huetsabaan.

³⁴Pihan hihxon maton xobohoxon pari pih yaninahue. Tsinquixon sca piquin siri-jaquin. Tiromahiton noquen Hihbaan mato casticanmis hihxon tah hen mato yohihi, hea huetsabaan. Texe man hea yocahoh tah hen mato qui nocoxon sca yohitihi.

12

Dios Yoshiman noque hinanai shinan

¹Dios Yoshiman noque hinanresai sca tah hen mato yohicatsihqui, heen huetsabaan, man honanon hihxon.

²Maton tah man noquen Papa honanyamapahonihqui. Jenquetsaha ra jaquin mato paranquin ta maton caibaan mato haxemacanishqui, yohuanyosma santobo man yocanon.

³Jaa copi tah hen mato yohihi: Jesus Dosen queyopahinon hih ta tsoabi jatimahiqui, Dios Yoshiman shinanmahah. Man honanon hihxon tah hen mato yohihi. Dios Yoshiman shinanmayamahah ta Jesus ta noquen Hihbo qui hih tsoabi rihbi jatimahiqui.

⁴Jaa huesti Dios Yoshin hihxon ta mesco shinan siribo noque hinanpaquehilihqui.

⁵Mesco tee rihbi non jai bi tah non jatihibi jaa Hihbo huestiya qui.

⁶Mesco teebi non hahnon ta jaa huestichin noquen Papan noque mesco coshi hinanpaquehilihqui, non jatihibijanon.

⁷Non joni huetsa coshijanon ta jahuen shinan Dios Yoshiman noque hinanpaquehilihqui.

⁸Shinanyahpahax yohuannon ta caibo rihbi jaa shinan hinanihqui. Honan joi yohinon ta caibo rihbi jaa honan hinanihqui, jaanbi.

⁹Shinancoinxon Papa Dios yocanon cahen caibo sca shinancoinxon yocati shinanbo rihbi hinanquin. Caibo rihbi sca joni huetsa rohajati hinanquin.

¹⁰Caibo rihbi sca hinanquin, tsoan jascajani que ma bi Papan coshiyaxon hahti. Caibo rihbi sca hinanquin, Papan yohihi joi chaniti. Caibo rihbi sca honan hinanquin, jan merahi jenquetsahpa yoshin hin honanti. Caibo rihbi sca hinanquin, huetsa join yohuanti. Caibo rihbi sca hinanquin, nincakahbo yohuanxon mahnexonti honanti.

¹¹Jascapahbo mesco hahxontibo ta jaanbi noque shinanmahiqui, Dios Yoshin huestichin. Jaanbi shinanxon ta noque hinanpaquehilihqui.

Jahuenahbo rahsi non hihqui

¹²Noquen yora huestihax bi ta noquen mequenbo, noquen tahebo huestima qui. Jascaribihì cahen noquen tahebo noquen mequenbo hichahax bi noquenah rahsi hihqui quescaribihì noque jai, Cristonahbo rahsi. Noque cahen jahuen tahebo, jahuen mequenbo quesa, jahuenahbo.

¹³Noque jatihibi hichahax bi huesti yora janon ta Dios Yoshin huestichin noque nashimahiqui, Noquen caibo, noquen nahuabo, patoroyahpabo, patorojomabo, noque nomimapaquequin hahcajaquin ta noque coshi hinanihqui, Dios Yoshiman.

¹⁴Noquen yoran mehabo mesco hihqui bi cahen jascapahbo rahsima.

¹⁵Hea ta mequenma qui. Jaa copi tah hen yoran mehama qui hih noquen tahe jai que bi cahen jascabi noquen yoran meha jaquehahna.

¹⁶Hea ta beroma qui. Jaa copi tah hen yoran mehama qui hih noquen pabinqui jai que bi cahen jascabi noquen yoran meha jaquehahna.

¹⁷¿Bero rahsi noquen yora hihxon cahran jahuatohon nincatihquin? ¿Pabinqui rahsi noquen yora hihxon cahran jahuatohon xehatihquin?

¹⁸Shinanquin sirijaxon ta noquen yora Papan niahahnishqui, noquen berobo noquen pabinquibo noque hinanquin.

¹⁹ ¿Poyan rahsihax cahran jahuen noquen yora jatihiquin?

²⁰ Jaa copi ta noquen tahebo, noquen mequenbo hichahax bi jatihibi jaa yora huesti qui.

²¹ Hea tah hen miama qui. Jaa copi tah hen jahuama qui hah cahen noquen beron noquen mequen jatimahi. Hea ta matoma qui. Jaa copi tah hen hea jahua hihtimahi hah cahen noquen mapon noquen tahe jatimaribih.

²² Jascayamabiresi. Noquen coshimabo cah non hashoan pishinai.

²³ Non siriymah shinanai noquen yora mehabo tah non siri hihnon chopan sahuehi. Noquen jistimabo rihbi cah non chopan mahpohi.

²⁴ Noquen jistibo ta mahpoti pishinyamahihqui. Papan ta noque niahahnishqui, noquen yoran meha coshiyamahibo siribo jaquin.

²⁵ Jaa copi ta huesti yoran mehabo jaabo rahsibi rehtenantimahiqui. Jatihixonbi jaton hahbe yoran mehabaan shinanquin.

²⁶ Jaa yoran meha huesti yomanahatiya ta jatihibi hahbetan yomanahiqui. Jaa yoran meha huetsa qui siripi yohuanaiya cahen jatihibi hahbetan jenimaribih.

²⁷ Criston yora sca tah man qui, mescohax bi jaa yoran meha rahsi.

²⁸ Mesco tee ta Papan yohihihqui, caibo cahen jahuen raantibo janon. Jaatian sca cahen jahuen joi yohixonnicaahbo janon. Caibo cahen honanmanicahbo janon. Caibo cahen tsoan jascajanima hahnicahbo. Caibo cahen rohajanicaahbo. Caibo cahen yanapannicahbo. Caibo cahen teemanicahbo. Caibo cahen huetsa join yohuannicabo.

²⁹ ¿Jahuen raantibo rahsi non quin? ¿Jahuen joibo yohinica rahsi non quin? ¿Honanmanicahbo rahsi non quin? ¿Tsoan jascajanahma hahnicahbo rahsibo non quin?

³⁰ ¿Rohajanicaahbo rahsi hihnon Papan noque hinanihqui? ¿Huetsa join yohuannicabo rahsi noque quin? ¿Joi mahnexonnicaahbo rahsi noque quin?

³¹ Hiyamahi. Jascayamahi bi Hihbo hahxonnoxon jahuen hashoan siri hinantibo queennahue. Hashoan sirijahti rihbi tah hen mato rahma yohiscanoxihqui.

13

Joni huetsahon shinanti

¹ Joni huetsahon shinanaxma bi jonibo jai quescarax yohuanax cah hen cororesan. Joni huetsahon shinanyamahax bi Papan yonotibo jai quescarri yohuanah cah hen corotihcamahan. Jihui behman rishquihah peenhahcacamahi.

² Jayaxihquibo yohiti honan jaxon, jatihibi jone joi rihbi honanxon, jatihibi honan rihbi jaxon, mahchibo potahahtanti hahtipahnoxon caman shinanxon bi joni huetsahon shinanyamahax cah hen jahuamascan.

³ Hena jatihibi hinanresax, heen yora rihbi mapojahabo hen hinamehxon bi joni huetsahon shinanyamaxon cah hen jahuabi bifyamahan.

⁴ Joni huetsahon shinanxon tah non jatsanti tenetih. Joni huetsahon shinanxon cah non jato hahxonan. Notsi notsiyamarihbbitihi. Caibo mahuinax jaya joihi nihyamahi. Joni huetsahon shinanxon cah non yohiresyamahan; nincaribbihan.

⁵ Joni huetsahon shinanxon cah non jato sirijaquin yohuanquihntihi. Noquenahbi res benayamarihbiquin. Histon rainyamayamahi. Copiti shinanyamarihbiquin.

⁶ Tiromahiboya jenimayamahi. Sirijahiboya jenimahi.

⁷ Joni huetsahon shinanax cah non hahqui jatsanyamahi. Jaan ta jahuentianbi shinanquin sirijatimahiqui hiyamahi. Sirija ta jatihiqui hihqui. Jascaxon teneresquin, jatihibi noquen huetsabo tenequin.

⁸ Joni huetsahon shinanxon hahxonti shinanbo ta queyoyosmabo shinanbo qui. Caibo shinanbo cahen jascayamahi. Jayaxihquibo yohiti ta yamacayaxihqui. Huetsa join yohuanti yamascai. Haxeti honan yamacatih.

⁹ Rahma tah non honanquin bi pishimahi. Yohiquin bi tah non pishinmaribih.

¹⁰ Noquen Hihbo janin tah non pishinyamascatih. Honancoinax jahuabi haxeti pishinyamascrai. Jaa copi ta non rahma hahquin bi pishimahi shinanbo yamacahinscayaxihqui.

¹¹ Baquehax tah hen baque quescarri yohuanihqui. Baquen hahcái quescaribjajaquin tah hen shinanpahonihqui. Baquen hahcái quescajaquin rihbi yohiquin. Beboscaxon cahen baqueebaan hahcái quescapahbo jenebahinscrai.

¹² Rahma tah non bahquishjaquin jisquin hahcajaquin honanai. Noquen Hihbo janin sca tah non bejisquin honanquin sirijayaxihqui. Rahma texe res honanxon bi tah hen jaatian sirijaquin honanyaxihqui, jaan hea honanquin hahcái quescajariquipu.

¹³ Jaa copi ta quimisha res banetihqui: Noquen Papa non nincacointi, Papan noque hahxonyaxihquibo honanti, joni huetsahon shinanti. Jaabo quimisha jai bi ta joni huetsahon shinanti hashoan siri qui.

14*Honantima join yohuanaibo*

¹ Joni huetsahon shinanxon hahxonti hihti queennahue. Papan joi jato nincamanoxon Dios Yoshiman hinanai shinanbo queenrihbinahue.

² Honantima join non noquen yoshiman yohuanaiya ta tsoanbi noque nincatimahiqui, Papa Dios huestichin.

³ Papan joi yohiquin tah non jascajayamahi. Jaa joi yohiquin tah non joni huetsa shinan hinanai, jan coshi bihnnon, jan teeti rihbi shinannon, jan masa shinanyamarihbina.

⁴ Huetsapahi yohuanax tah non noque res coshihi. Papan joi yohixon tah non jascajayamahi. Jahuem joi yohixon tah non Papan caisaibo coshijahi. Jascajaha ta siri qui.

⁵ Honantima join yohuanti man jathixonbi hahtipaati queenxon bi tah hen mato yohihi, noquen huetsabo coshijanoxon Papan joi jato nincamanahue. Papan joi nincahama ta hihti siri qui. Honantima join yohuanah cahen jahuama tahni. Yohuanxon mahnexonyamahiya cahen noquen huetsabaan jahuabi nincayamahan. Jahuabi shinan bihyamahan.

⁶ Man honannon hihxon tah hen mato yohihi, hea huetsabaan. Mato qui nocoxon huetsapahi yohuanxon *zjahuua* shinan hen mato hinantihin? Dios Yoshiman hea yohihi mato yohixon pari tah hen shinan hinantih. Jaan hea honanmaha mato yohixon Papan joi mato yohixon, Papa queenajati mato haxemaxon, jascajaxon pari tah hen mato shinan hinantih.

⁷ Jahuaborabo ta jasca rihbi qui, rehue, tempora, jaabo. Sirijaquin rehue hahyamahiboya *zjenquetsahaxon* non jaton jee honantihin?

⁸ Sontarobo quenaquin non haco jaamajaquin chinchinaiya ta jaton tahuaya jaton jashiya tsoabi becantimahiqui.

⁹ Mato jascarihbibi. Nincacahbo honantima join man yohuanaiya *zman* yohuanai joi tsoan nincatihiqui? Jascajaquin tah man nihue res yohitih. Honantima join yohiquin *cah man* tsoan nincanonma man yohitih.

¹⁰ Nai naman ta hicha joi jaiqui. Jatihibi jonibo jaton joiyahpa.

¹¹ *Zjaabo* yohuanai jahua hihcatsihquiquin? Honanyamahax tah hen jahuen nahuascai. Jaa rihbi heen nauua.

¹² Jasca copi nincati joibo yohinahue, hea huetsabaan. Dios Yoshiman hinanai shinanbo tah man hihti queenai. Jascahax noquen huetsabo shinan hinanti queenbiresnahue.

¹³ Jaa copi huetsapahi yohuanyahpaxon Papa yocahue, mahnexon sca yohinoxon.

¹⁴ Honantima yohuanyahpaxon tah hen yohuanxon noquen Papa heen yoshiman yohihi, jahua hihcatsihquiquin hen honanyamaxon bi.

¹⁵ Jascachiya, *zhen* jahuejatihin? Heen yoshiman Papa yohixon tah hen heen shinaman rihbi Papa yohitih. Heen yoshiman behuahax tah heen shinaman rihbi behuatihi.

¹⁶ Miin yoshiman yohuanai Hahxon tah min hea jai Papan hih min jaiya *zjenquetsahax* jano rihbi tsahotaibo Jascajaquin rahan hihtihiquin, min yohuanai honanyamahax?

¹⁷ Hahxon tah min hea jai hah min sirijaquin jaiya bi ta jano tsahoxon nincacaibaan jahubi shinan bihtimahiqui.

¹⁸ Mato tah hen jatihibi mahuinai, huetsapahi yohuanquin. Jaa copi tah hen Hahxon tah min hea jai, Papan, hahcái.

¹⁹ Hicha nincatima joibo yohiti hahtipahxon bi tah hen noquen huetsabo betan tsin-quixon nincati joibo rahsi nincamahi. Huestibo res nincati joibo rahsi jato nincamaha ta siri qui. Nincatima joibo tsamanah bi cahen tiroma, jahubi shinan hinanyamaquin.

²⁰ Baquen shinanya jayamanahue, hea huetsabaan. Baquexo tiromayamahi ques-canahue, hanji shinanyaribinahue.

²¹ Isaafashen huishani joi jai quesa tah qui: Nahuau join tah hen nea joibo yohiyaxihqui, nauau janan jato yohiquin. Jascahah bi ta hea nincacatsihyamayaxihcanihqui hih ta noquen Hihbo janishqui hihqui Isaías.

²² Nincayosmabaan nincacahbo hihxon ta rahtequin sca honantima joi Papan jato nincamahiqui. Jaa copi ta Isaías jascari yohuannishqui. Nincacoincaibo ta rahteti pishinyamahiqui. Nincacoincaibo quen. Papan joi ta hahan rahtetima qui, hahan shinan bihti. Jascapa ta nincacatsihqui nincamat qui.

²³ Jaa copi honannahue. Papan caisaibo rahsi tsinquitax jatihibi huetsapahi yohuanai boyta bi hixerihyamahi joibo sca jano mapexon *zjahua* shinantihiqui? Nincacoinyamahi joibo jano rihbi mapexon *zjahua* yohitihiqui? *zman* tah man tehquehiehqui mato jatimahiqui?

²⁴ Papan haxemati yohuan man jatihibi jaiya ta jascayamatihiqui. Hixerihyamahi joni jano rihbi mapetaiton, jaa hihyamahax nincacoinyamahi joni jano rihbi mapetaiton tah

man jatihixonbi jaa joni jointinin shinanmatihi, jahuen hohcha copi. Jatihixonbi tah man jaa honantihu.

²⁵ Jahuen jointinin jan shinanaibo man yohihah ta Mato tocan ta Papa Dios jaiqui hihxon betihihpaquexon Papa yocascatihi.

Huesti yohuannon caibaan nincaquin

²⁶ Jaa copi hen mato yohinon nincanahue, heen huetsabaan. Tsinquitax cah man huetsa jahuen behua jai. Huetsa joni rihbi cahen jahuen honanmati joi jai. Huetsa joni rihbi cahen Papan joi yohiti jai. Huetsa joni rihbi cahen huetsapa yohuan jai. Huetsa rihbi cahen jahuen mahnexon yohiti joi jai. Jaa copi tah hen mato yohihi: Joni huetsa coshi hinannoxon res janahue.

²⁷ Huetsapa join yohuancatsihquiboya rabe res yohuanmanahue. Yohuanmaquin quimisha huinomayamaquin. Huesti rahsi yohuannon texe netemanahue. Huetsa rihbi mahnexonmanahue, nincacahbo.

²⁸ Mahnexonniya yamahiya tsinquitaibo tocan huetsapa joibo yohuanyamahahbo jascaha netemanahue, jatihibi. Jaton jointinin res yohuannon Papa huesti res yohihahbo.

²⁹ Dios Yoshiman ta hea shinanmahiqui, hen mato yohipan hihnicahbo yohuancatsihquiboya rabe res yohuanmanahue. Quimisha huinomayamaquin. Jan yohuanai nincaxon, Dios Yoshiman shinanmaha yohuanihquin hihxon jaa honannahue.

³⁰⁻³¹ Dios Yoshiman shinanmaha tah man huesti hestibo jatihibi yohuantihi. Huesti yohuanmenohi bi huetsa rihbi jano tsahoxon Dios Yoshiman shinanmaha joi merahax yohuancatsihquiya jaa yohuanmenoha netescanon, hoa huetsa sca yohuannon.

³² Dios Yoshiman shinanmaha yohuancatsihqui jonin ta yohuanti teneti hahtipahiqui, jahuen yoshiman yohuancatsihxon bi.

³³ Noquen Papa ta nincatimahi yohuani coro corotaibo queenyamahiqui. Jointi siripax hihquibo ta queenihqui.

Jatihibi janinbo noquen huetsabo tsinquitax jai quescanahue.

³⁴ Tsinquitaibo tocan yohuanaiton haibobo netemanahue. Jato yohuanmayamanahue. Jaabaona ta nincati jaiqui, Papan huishamani joi jai quescajarihbiquin.

³⁵ Honancatsihxon xobohoxon sca jaton bene yocanon. Papan caisaibo tocan haibo yohuanah ta tiroma qui.

³⁶ ¿Mato janinhax bi Papan joi pehocohnishqui shinan man jain? ¿Mato qui res Papan joi noconishquin?

³⁷ Nea hen mato huishaquin yohihi joi ta Papan mato yonohi joi qui. Dios Yoshiman shinanmaha yohinicabo man hihqui shinanxon honannahue. Dios Yoshiman shinanyahpa janibio man hihqui shinanxon hen huishaxon yohihi joi noquen Hihbaan mato yohihi honannahue.

³⁸ Jascama ta qui hihnicah ta honanma qui. Jascapa nincayamanahue.

³⁹ Jaa copi Papan joi yohiti queencoinnahue. Huetsapahi yohuanya jayamabiresnahue hahquin yohiyamaribinahue.

⁴⁰ Corotaxma yohuannahue, huetsa yohuannon caibaan nincaquin.

15

Cristo teehihribini

¹ Hen mato yohini joi siri sca tah hen shinanmaquin mato yohirihbihi, heen huetsabaan. Man bijnixon rahma caman jeneyamahi joi siri.

² Noquen Hihbaan hea yohini joibi tah hen mato nincamaniqui. Jaa copi ta jaa joi man jeneyamahiya Papan hahan mato teehihmahiqui.

³ Jaan hea yohini joi tah hen mato qui nocoxon mato yohiniqui. Nescajaquin tah hen mato yohiniqui: Huishani joi jai quescajarihbiquin.

⁴ Tsahonipibaan bi ta jahuen quimisha neten Papan jaa huenirihbinishqui, huishani joi jai quescajaquin.

⁵ Hahquirihbi teehihquish ta Cefas janin sanareneni cainnishqui. Jaa pecaho ta jahuen doce janin cainnishqui.

⁶ Jaa pecaho sca quinientos noquen huetsabo, hashoan rihbi, jano huesti tsinquitaibo janin caini. Jaabo ta rahma caman hicha jihuetai. Jihuetai bi ta caibo hihnicahchiqui.

⁷ Jaa pecaho sca ta Santiago janin cainnishqui. Hahqui cainipish, jatihibi jahuen raantibo qui sca cainrihbibi.

⁸ Chini sca ta hehqui cainrihbinishqui. Baquexo jahuen hoxne huinomahax cainai quescajaquin tah hen hean chini jisniqui.

⁹ Papan nincacoinaibo queyocatsihquin tah hen jato tiromajapahonihqui. Jaa copi tah hen Papan raantihax bi hen rabinti jai, hen japahoni shinanax. Jascapa hen japahoni copi tah hen texe Papan raantibo mentan hea hashoan naman qui, hean shinanax.

¹⁰ Papan hehon shinanai copi res tah hen hea jahuen raanti qui. Jahuen raanti jan hea janehah ta yancama qui. Texe mahuinbahini tah hen hea hashoan coshin teetai. Hihcax bi heabi teeyamahi. Jahuen shinaman ta Papa teetihqui, heyabi.

¹¹ Jaa copi ta hea teetah, jaabo teetah, jasca rabe qui. Jaa joi huesti tah non jatihixonbi yohihi. Jaa joibi rihbi tahan man nincacoinnihqui.

Mahuanihbo teehihribiyaxihqui

¹² Cristo hihquipi bi ta Papan jaa huenirihbinishqui. Jasca tah non jai, joi siri yohiquin. ¿Jenquetsahax sca man Mahuanihbo ta tsoabi huenitimascaiqui hih man caibo jain?

¹³ Hueniyosmabo rahsi mahuanihbo jaiya cahen Cristo rihbi hahquirihbi hueniyamahan.

¹⁴ Cristo hahquirihbi hueniyamaniya cah non joi siri yanca res yohihan. Yanca res cah man nincacoinan.

¹⁵ Hahquirihbi teehihcoinyamahiya cah non quesascan, noquen Papa qui quesahi. Cristo ta Papan hueninishqui hihqui quesahan, huenicoinni que ma bi. Tsoabi Papan huencointimahiya cahen Cristo rihbi hueniyamahan.

¹⁶ Mahuanihbo Papan hueniyamahiya cahen Cristo rihbi huenirihbiyamahan hih cah hen jai sen.

¹⁷ Cristo huenirihbiyamahiya cah man yanca res nincacoinan. Maton hohchaya rihbi cah man jascabihai banetan.

¹⁸ Cristo nincacoinax bi hoxanihbo rihbi cahen queyonihboscan.

¹⁹ Rahma res main jihuuenoxon res Cristo non nincacoinax cah non jatihibi jonibo mentan hashoan homisbatibo non jaquehahnai.

²⁰ Papan ta Cristo huenicinnishqui. Hashoan hicha sca biminon jihui bimimenohi quescapi ta hoxanihbo janinhax jaa huenimenonishqui.

²¹ Huesti joni hohchanii copi jatihibi jonibo mahuanicabo sca jai quescaribihai ta huetsa huesti copi noque hueninicabo jaribibi.

²² Adaman baquebohax non mahuanicabo rahsi jai quescapri rihbi tah non Criston baquebohax huenirihbinicabo rahsi qui.

²³ Jatihibi tah non noquen cati tian huenihihnayaxihqui. Jaa pari hihquipish bi teehihribinixon ta Criston noque beboxonnishqui. Jaa joribiscaya ta jahuenahbo sca huenihihnayaxihqui.

²⁴ Jaatian pari ta jatihibi hapobo, jatihibi yono yonohibo, jatihibi hihbohibo, jascaphaboh jatihibi queyobahinxon Papa Dios sca jahuen jihuetahbo Criston hinanyaxihqui, nete queyoscanon.

²⁵ Jatihibi miin rahuibo namanjaxon queyohue Papan jaah ta Criston jato queyobahinyaxihqui, jato namanjaquin.

²⁶ Jan chini queyoyaxihqui jahuen rahui ta hahan jonibo mahuati qui.

²⁷ Jatihibi namanjaxon jato queyohue hah ta Papan janishqui, jaa yohiquin. Jatihibi hihbojahue jan hihqui bi ta jaa yohihi jahuen Papa jan hihbojati yohiyamahiqui. Jaa ta honantihbiresiqui.

²⁸ Jatihibi hihbojati sca jan jaiya ta jaa jatihibi hihbomahi jahuen Papan sca jayabi jatihibi rihbi hihbojayaxihqui, jaa sca jatihibichina hihti bi res hihbo hihnon, jatihibi jahuenahbo rahsi.

²⁹ Noquen yamanica ta noquen Hihbo qui hinamehtax bi nashimahama mahuatiqishqui, nincacoinnica hih honanahbo hihxon jaa xahbanen hea sca nashimahue hih ta jacaaniqui. ¿Mahuanihbo tsoabi Papan hueniyamabiresaiya jahua copi sca jascacaniquin?

³⁰ ¿Jahua copi rihbi jatihibi neten noque rehteti jaibo non tenetihin?

³¹ Noquen Hihbo Jesucriston noque hahxonah copi tah hen matohon hihti jenimaxon mato yohihi, heen huetsabaan: nete tihibi ta hea rehtequin bi cahneceaniqui.

³² Jonibaan hahcai quescayanoxon res hen Efeso janin sina yohinahbo tenenixon ¿jahua hen bihtihin? Mahuataibo Papan huenicoinyamahiya tah non Pinonhue, xehanonhue, bahquish tah non mahuayaxihqui hih sca non jatihibi.

³³ Mato paranmayamanahue. Tiromabo manahax tah man tiromaborihbiscatihai hih ta huishani joi jaiqui.

³⁴ Maton shinan pontehax hohchayamascanahue. Caibaan tah man noquen Papa honanymabiresai. Hen mato yohihah rabinnahue.

³⁵ ¿Jenquetsahaxon mahuanihbo hueniyaxihqui qui? ¿Jenquetsahpa yorayabo hueniyaxihcanihqui? hah ra tah man caibaan jai yocaquin.

³⁶ Honanman. Mian banaha bero ta queyonox joconihqui.

³⁷ Xequi hihyamahax huetsa bero rah. Jayaxihqui yora rihbi tah min banayamahi, jahuen bero res.

³⁸ Jaanbi caisai yora ta Papan jaa bero hinanihqui, jatihibi bero jahuen yora hinanquin.

³⁹ Jatihibi nami ta jascapa rahsimia qui. Jonibaana cahen huetsapah, yohinahbaana cahen huetsapah, hihsapana cahen huetsapah, tsatsanah cahen huetsapah.

⁴⁰ Naihoh queha yoraboo ta jaiqui. Mai meha yoraboo jaribhi. Naihoh queha yorabaan coshi ta huetsapah qui. Mai mehabaana huetsapah rihbi.

⁴¹ Bari huetsapa xaba janon, hoxne huetsapa xabaya, huishibo rihbi huetsa xabayaha. Huetsa huishi jahuen janon, huetsa rihbi jahuen jai.

⁴² Mahuanihbo huenihah ta jascarihibi qui. Queyonica yora banaquin hahcajaquin tah non tsahonai, queyoyosma yora sca Papan hueniyaxahnnon.

⁴³ Yora tiroma non banahi bi ta xabayaha Papan huenirihbiyaxihqui qui. Coshijoma non banahi bi ta coshiyahpa Papan huenirihbiyaxihqui qui.

⁴⁴ Mai meha yora non banahi bi ta naihoh queha yora Papan huenirihbiyaxihqui qui. Nea nete meha yora jaiya cahen naihoh queha yora jaribhi.

⁴⁵ Jascapa yohihi ta huishani joi jaiqui: Jan jonijamenoni Adan ta mohitahpa joni Papan janishqui, hihqui. Chini Adan ta jascapahma qui, teehihmanica can.

⁴⁶ Non yoramenoji ta naihoh quehamo qui, mai meha can. Mai meha yorayahpa jamenohax can non naihoh queha yorayahpa sca jatih.

⁴⁷ Papan jonijamenoni joni ta mai meha hihpahonishqui, mai jan jonijani. Noque jihuemanicah ta naihoh queha qui.

⁴⁸ Mai mehabo ta jan mai jonijani quescapahbo qui. Jascarihibi ta naihoh quehabo yoraboo naihoh queha jai quescapahbo qui.

⁴⁹ Mai meha joni quescapahbohax tah non naihoh queha jai joni quescapahbo rihbi jatih.

⁵⁰ Nea tah hen mato yohihi, hea huetsabaan: namiya jimiyahpabo ta janoxon Papan jihuemahji janin nocotimabiresihqui. Queyonica yorayahpaxon tah non queyoyosmabo bihtimahi.

⁵¹ Jisnahue. Tsoan honannihma joi tah hen mato yohihi. Non tah non jatihibi hoxayamayaxihqui, caibo res. Jaabi tah non jatihibi yora huetsacahinyaxihqui.

⁵² Histon res, naihoh queha rehue hahan queyoti sca hahcaiya ta non bextihitanai quescas histon res Papan noque yora huetsajarenenyaxihqui qui. Jahuen rehue corotaiya bi ta mahuayosmaboscanon mahuanihbo Papan hueniyaxihqui qui. Jaabo huenixon noque rihbi sca huetsajarenenquin.

⁵³ Nea payonica yora ta payoyosma yorayacahinti jaiqui. Nea mahuanica yora mahuayosmacahinti jai.

⁵⁴ Noquen payonica yora payoyosma sca jaiya, mahuayosma rihbi sca jaa noquen mahuanica yora jaiya ta huishani joi jai quescabi jatihibi qui. Noquen Hihbaan ta noquen mahua queyoxonihqui, noquen rahui queyoquin, non mahuayamascanon.

⁵⁵ Hea tah min jahuejatimascai, Mahuanican. ¿Jahuen hin, miin pahe? hihqui jaa huishani joi.

⁵⁶ Jahuen pahe ta hohcha qui. Non nincayosmabo copi ta hohchapan noque rehthihqui.

⁵⁷ Hohchapan noque rehtepanan ta noquen Hihbo Jesucristo raanxon Papan noque mahuayosmabomajahiqui, jahuen jihuetaahbo sca. Jaa copi Hahxon tah min noque jai, Papan hahnhue.

⁵⁸ Jaa honanxon shinancoinquin jeneyamaxahnnahue, hea huetsabaan. Jahuabi mato shinanbehnomayamanahue. Man noquen Hihbo teexonai ta yancama qui. Jaa honanxon jascabi jaa hahxonnahue hicha.

16

Coriquinin noquen huetsabo yanapanti

¹ Noquen huetsabo yanapanti coriqui sca tah hen mato yohihi, hea huetsabaan. Galacia mai janin noquen huetsabo hen yohini quescajaribiquin tah hen mato rihbi yohihi, man coriqui tsinquinon.

² Hahan semana pehocohtai neten man cananipi coriqui texe mequexon bexojanahue. Hicha tahma cananipixon texe bexojaquin, hashoan hicha tahni cananipixon hashoan hicha tahni rihbi bexojaquin. Jascajanahue jatihixonbi, hea janu nocotaiya moa bexojarasihixon hinanti hahtipahscanoxon.

³ Jano nocoxon tah hen man caisaibo raantihi, quiricaya jaa coriqui Jerusalen janin bohabo.

⁴ Hea rihbi cati siripaiya ta hea manahi boyaxihcанихqui.

Pablonen cati shinanai

⁵ Jari caquin tah hen Macedonia nabebacahinyaxihqui. Jaa nabebacahinax tah hen mato sca jisi catihi.

⁶ Jaatian rah tah hen mato betan basi tahni hihtihi, jene tian huinonon caman rah, janohax hen caribicatsihquiton man hea cati yanapanyaxahnon, hea janو cacatsihquiton hen noconon.

⁷ Huinoquin res mato yohuanquihnbahinti tah hen queenyamahi, hea huetsabaan. Noquen Hihbo queenaiya tah hen mato betan basitihi.

⁸ Efeso jema janin pari tah hen banethihi, pentecostes fiesta caman.

⁹ Jano ta hicha jonibo nincamatiriscaiqui, heen rahuibo rihbi hicha jai bi hean yohihah nincayaxihquibo rihbi hichahi.

¹⁰ Timoteo mato qui nocaiton sirijaquin bahnahue, jahua qui raquetaxma jan mato janin hihnon. Jaan rihbi ta Papa teexonihqui, hen hahcai quescajaquin.

¹¹ Jaa ta beronan res qui hihiyamanahue, tsoabi. Jan siripi hehqui joribinon yanapanyaxahnhahue. Noquen huetsabo betan jaa joti tah hen manatai.

¹² Noquen huetsa Apolo tah hen hihti yohihipiqui, texe noquen huetsabo betan mato pasijahi cati. Yohihah bi ta rahma cati queenyamabiresipishqui. Hahtipahax tian ta catihiqui.

Huishquin queyohi joibo

¹³ Coiramenahue. Papan joi jeneyamanahue. Yobacahinax coshin teenahue. Maton jointi rihbi coshijanahue.

¹⁴ Joni huetsahon shinanxon man hahcai jatihibi hahnahue.

¹⁵ Estéfanas, jaabo tah man honanscái, hea huetsabaan. Jaabo ta Acaya mai janin nincacoinmenonihbo qui. Noquen huetsabo yanapanti tee sca ta bihcannishqui. Jaa copi tah hen mato hihti yocacai.

¹⁶ Jato nincanahue. Hahbe teenicabo, hahbe yanapannicahbo jatihibi rihbi nincanahue.

¹⁷ Estéfanas betan Fortunato, Acaico rihbi nocotipi quen tah hen jenimahi, mato xahban-jaxon bi jato nincacax jenimahi.

¹⁸ Mato shinan hinanxon ta hea rihbi hinancaniqui. Jascaphabho honannahue.

¹⁹ Asia janinha noquen huetsabaan ta mato Man jascabi jayamahin hahqui qui. Aquila betan Priscilanen rihbi ta mato qui hicha joi siri raanihqui, Man jascabi jayamahin noquen huetsabaan hahquin. Jaton xoboho tsinquitaibaan jascajaribiquin.

²⁰ Jatihixonbi ta noquen huetsabaan jascajaquin joi raanihqui. Noquen huetsabo hicocanannahue, noquen huetsa copi.

²¹ Heen mequemanbi tah hen nea huishahi, hea Pablon.

²² Noquen Hihbohon queenyamahibo jaiya Papan jato queyobahinnon. Johue, Hihbon hih tah hen jai.

²³ Noquen Hihbo Jesusen mato shinan hinannon tah hen mato yocaxonai.

²⁴ Noquen Hihbo Jesucristonen noque hahxonah tah hen matohon shinanai.

2 CORINTO

Corinto janinhahbo qui Pablonen raanni joi, jahuen rabe sca

Noquen huetsabo qui Pablonen joi raanai

¹ ¿Man Papan shinanya jascabih iihueyamahin, hea huetsabaan? Jesucriston raanti joni jahue, Papan hea jaah tah hen hea Pablo jahuen raanti hihxon nea joi raanai. Noquen huetsa Timoteo betan tah hen huishahi, man Corinto jema janin jihuetaibo qui raannoxon, Acaya maibo janin jihuetaibo noquen huetsabo qui rihbi raannoxon.

² Noquen Papa Dios betan noquen Hihbo Jesucriston shinanmaha ¿man jointi siripax jihueyamahin? ¿Jahuen shinanya man jihueyamahin?

Pablonen hisin tenenih

³ Noquen Papa Dios ta noquen Hihbo Jesucriston Papa Dios qui. Noquehon hihti shinanai noquen Papa tah qui. Jaan ta noque jointi hihti sirijahiqui. Jaa copi tah hen Hahxon tah min noque jai Papan hen jai.

⁴⁻⁵ Non tiromabo tenehi tian tihibi ta jaan noque jointi sirijahiqui. Criston teneni quescapahbo tiromabo tah non tenehi, hicha. Non hicha tenexonai quescajaribiquin ca-hen hicha bi res jaan noque jahuen teneti shinan siri noque hinanah. Yomanajaquehtaibo jatihibi noquen sca non jato jointi sirijanon ta noque jointi sirijahiqui, jaa shinamanbi non noquen rihbi jato jointi sirijanon.

⁶ Jaa copi tah non tenehi, man jointi siripax jihuecoinnon. Non tenehi quescapahbo tiromabo man maton rihbi tenehiton mato jointi sirijabahinno cahen Papan jahuen teneti shinan siri noque hinanquin.

⁷ ¿Hehbetanbi yomanajaquehtaibohax man hea hihqui quescari man jointi sirijaquetax jihueyamahin? Hen ta hen honanai. Man tenetih tah hen honanquin sirijahi.

⁸ Asia mai janinhax tah non hohmis hohmisnihqui, hea huetsabaan. Man honannon hihxon tah non mato yohihi. Hihti hohmis hohmisajahaboh tah non noquen coshi senenyamascaxon jihuetai shinanyamascaniqui.

⁹ Mahuti shinan sca tah non janiqui. Noquen coshiyaxonbi teneti non shinanyamanon ta Papan noque jascajamanishqui, yamanicabo huenihihnnicaxon Papan noque yanapantihi non honannon.

¹⁰ Asia mai janinhahbaan ta noque rehtequin bi rohajanishqui, Papan noque jato xahbanjamahah. Noque xahbanjamanixon ta hahquirihi xahbanjamayaxihqui, noquen Papan. Noque hahquirihi xahbanjamaxihqui honanxon tah non shinanquin sirijahi.

¹¹ Maton rihbi Papa yocaxonnahue, noque yanapanquin. Noque copi Papa qui hicha siripi yohuanahbo yocaxonnahue. Hahxon tah min jaa jai Papan, hichaxon yocacah tah min sirijaxonai Papan, jaábo noque yocaxonnahue.

Corinto janin Pablo cayamaho

¹² Mai mehabo tocan jihuehahnan tah non jaabaan honanquin hahcаяyamahi. Papan yanapanra tah non hinamehti jihuetai, jan shinanai quescajaquin shinanax jihuetai. Mato tocan hashoan rihbi jascari jihuetai. Noquen jointinin tah non honanquin sirijahi. Jaa copi tah non jointi siripax yohuanscrai.

¹³ Man jisnixon honanscrai joibo res tah non huishaxon mato yohihi, huetsama. Noquen Hihbo qui canoxon caman tah man jaa joibo honanti jai.

¹⁴ Man noque honantahniscrai quescajaribiquin honanbonanahue. Noquen Hihbo Jesus jahuiya non mato copi siripi yohuantih quescarihibihi tah man noque copi man siripi yohuantih.

¹⁵ Rabejaquin sca mato shinan hinannoxtah hen sirijaquin shinanax mato janin caribcatsihoqui.

¹⁶ Macedonia janin caquin mato jisbahinax joribixon sca matojisribiti tah hen shinanhohqui, maton yanapanah sca hen Judea main sca cayaxahnon.

¹⁷ Jascari cati tah hen hihresyamahohqui. Mai mehabaan shinanquin hahcаяi quescayaquin tah hen yohihi. Cayamahi rahan hihresyamahi. Cahi rahan hihresyamaribih.

¹⁸ Cahi rahan hahxon tah hen chini sca cayamahi rahan jatimahi. Papan ta honaniqui. Jaan ta yohicointihiqui.

¹⁹ Silvano, Timoteo, jaabo rabe betan tah hen Jesucristo joi mato yohiniqui, Papan baquen mato manascanon. Criston ta Jeen hahxon Hatimahi rahan yohiyamascatihihi. Jeen hahresquin.

²⁰ Noque hahxontijaxon Papan noque yohini jatihibi non yocacah ta Criston jeen hahtihiqui. Jaa Cristo copi tah non Jascari rahan hahcai, noquen Papa shinan siriya hihqui honanahbo.

²¹ Jaa noquen Papan ta Cristo nincacoinquin jeneyamatishinan noque hinanihqui. Mato ta hinanihqui. Noque rihbi hinanquin. Noque ta caisihqui.

²² Noque honantijaxon ta jahuen coshi rihbi noque hinanihqui. Noque bihinihniyahnoxon ta noquen jointi janin jahuen yoshin hihquimascaiqui.

²³ Honannahue, mato tah hen yohihi. Mato casticanyamanoxon tah hen Corinto janin cayamascahohqui. Hen ta hen hihcoinai. Papan ta honanihqui.

²⁴ Mato yono yononoxonma bi mato jenimaquihhnnoxon tah hen mato yohihi. Man noquen Hihbo qui hinamehcoinni quen tah hen mato yonoti pishinyamahi.

2

¹ Mato jisi caribixon tah hen hahquirihbi mato benámamis hihquish hen cayamascahohqui, hea huetsabaan.

² ¿Hen mato benámahiya tsoan sca hea jenimamatihquin? ¿Hean mato benámahoh man hea jenimamatihbi tsoan sca hea jenimamatihquin?

³ Mato qui nocotax matohon hea jenimatihbi bi benámis hihxon tah hen huishaxon mato yohihohqui. Hahan hea jenimahi man mato rihbi jatihibi hahan jenimatihhi honanxon tah hen huishahohqui.

⁴ Benatax jointi tiromahax bero jene manontamecahlenxon tah hen huishaxon mato yohihohqui. Man benánon hihxonma bi matohon hen hihti shinanai man honannon hihxon tah hen huishahohqui.

Hohchaya hiphahoni joni yohuanquihinti

⁵ ¿Hoa jonin hea benámahoxquin? Hea res ma bi ta mato jatihibi benámatahnihoxqui. Hashoan joi hichajacatsihyamahi ta hen jascaresi yohuanai.

⁶ Tsinquxon casticanquin tah man senenjahoqui.

⁷ Jaa copi jahuen hohcha shinanyamascanahue. Jahuen hohcha shinanyamascaxon sirijaquin sca yohuanquihnnahue, hihti masa shinanxon jihueta shinanbahin jan jamis hihxon.

⁸ Jaa jonihon man shinanai honanahbo hihxon tah hen mato yohihi.

⁹ ¿Hen yohihi tihibija man Jain? Honancatsihquin tah hen mato qui huishahi, maton shinan honannoxtion hihxon.

¹⁰ Huetsana man shinanyamascaj jahuen hohcha tah hen hean rihbi shinanyamascaj. Hean shinanbehnomaxonai bo tah hen Cristo bebonxon shinanbehnomaxonai, man shinan bahn.

¹¹ Satanasnen noque tiromajayamanon hihxon tah hen shinanbehnomaxonai. Jaan noque jahuejacatsihquin tah non honanai.

Troas janinxon Pablonen masa shinanai

¹² Troas jema janin Criston joi siri yohihi nocoxon tah hen yohiti siribiresi jisoqui, hea huetsabaan, noquen Hihbaan jato nincati siri shinan hinanxonah.

¹³ Yohiti siri que bi tah hen heen huetsa Tito jano merayamaxon shinanquin sirijayama-hoqui. Jaa copi tah hen Ca res sca tah hen jai, hihcahinax Macedonia mai janin sca cahi cahoqui.

Criston hahxonah sirijaquin shinanaibo

¹⁴ Yanca res tah hen mato copi masa shinanhohqui, hea huetsabaan. Jahuen rahuiro queyohax jahuen sontarobo bebohi hahcajahi ta noquen Papan noque beboxoniqui. Jaa copi tah hen Hahxon tah min noque jai Papan hahcai. Jatihibi janin hininjaquin hahcajaquin ta Papan jato noque honanmamahihqui, Cristo honanahbo hihxon.

¹⁵ Papan teehihmahibbo tocan, mahuanicabo tocan rihbi tah non Criston hinin quescapahbo qui, Papan xetenon.

¹⁶ Mahuanicabo tocan tah non hahan muhuateibo hininjati qui. Papan teehihmahibbo tocan hahan jihuetaibo hininjati. ¿Jaa nincati tsoan hahtipahiquin?

¹⁷ Coriquibihnoxon Papan joi maromabonahi quescapahbo tah non hahyamahi. Yohitannahue Papan jaah cahen yoninicabo noque. Hihcoini yohuannicabo. Papan noque jisi honanxon tah non yohihi, Criston janen.

3

Papan hahxontijahi joi behnabo

¹ Hea ta hen jascapa qui hihcatsihxonma sca tah hen jascajahi. Hea honanscanish tah man hahan hea honanti quirica pishinyamahi. Maton huishati cahen hea rihbi pishinyamahan.

² Matobi tah man hahan hea honanti qui, hea huetsabaan. Non matohon hihti shinanai tah non noquen jointi qui bi huishaquin hahcajahi, jatihixonbi jisxon honanahbo. Noquen shinan honanahbo can.

³ Non jenquetsahpabo shinanya quin hihxon ta mato jisxon honanti bi res qui. Criston huishaxon heyabi raanah joibo quescapahbo tah man qui. Tintan huishahahma bi Dios Yoshiman huishahah quescapahbo. Macan Champani qui huishahah quescapahboma. Huishaquin hahcajaquin ta noquen jointi janin jahuen shinan janahihqui. Jaa shinan jenquetsahpabo quin hihxon jistibo tah man qui, hea huetsabaan.

⁴ Papan jahuen shinan noque jascajaquin hinanai tah hen honanai, hea huetsabaan. Noquen Hihbaan noquehon hihti shinanai copi tah hen honanai.

⁵ Noquenbi shinanxon tah non jahuejati hahtipahyamahi. Papan res ta noque coshi hinanahqui.

⁶ Jaan ta noque hahxontijaxon bi noquen rihbi hahnon hihxon noque joi behna yohihihqui. Jaa joi behna non yohinon hihxon cahen noque caisnish. Huishani joi jisxon non noquen coshiyaxon hahtima joi tah qui. Noquen coshiyaxon hahti joi ta hahan muhati joi qui. Noquen Hihbaana ta jahuen yoshinyaxon hahti qui, hahan jihuetai joi.

⁷ Macan qui huishaxon ta hahan muhati joi Papan hinannishqui. Xaba shinanyahpaxon Papan jaa joi hinanah ta Moisesnin bemanan xabanishqui. Israelibaan ta jaa bejisti teneyamanishqui, xabatai copi. Queyonica xaba que bi jaa jisti hahtipahyamacanquin, jaan bechaxah.

⁸ ¿Jascapa coshiyahpa joi hinannixon jahuen yoshinyaxon hahti joi sca Papan hinanah, non hashoan sca coshi jatimahin?

⁹ Hohchayahpabo tah man qui hihqui joi xabaya hinannixon cahen jahuen siribo sca hahan jihuetai joi noque hinanxon hashoan rihbi noque hihti xabaya hihmayaxihqui.

¹⁰ Rahma ta xabaya hinanni joi xabaya quescayamascaiqui, hashoan coshi xabapan sca xabajahah.

¹¹ Queyónica joi xabaya jahuiya cahen queyotima joi sca hashoan coshi xabaya joti jai.

¹² Jascapa coshi xabaya joi non jai honanxon tah non jahua qui bi raquexonma yohihi.

¹³ Moisesnin hahni quescayama tah non jai. Jaa ta jahuen bemanan beracohnishqui, jahuen xaba queyotai israelibaan jisyamanon hihquish.

¹⁴ Jahuabi jonexonma non yohihah bi ta jaton jointibo chahomacannishqui. Rahma caman rihbi ta beracohxon Moisesnin joi jiscanihqui. Moises hahan beracohni beracohxon hahcajaquin cahen jaa quirica jiscanquin. Cristo bihxon res non hahan beracohtai potaxon non jiscoinai ta honanyamacaniqui.

¹⁵ Jasca tah qui. Rahma caman ta jaton shinan mahpoxon hahcajaquin Moisesnin huishani joi jiscanihqui.

¹⁶ Noquen Hihbo qui hinamehtaibon pari ta jaan jaton bebepohti jato bichinbihqui, honancoinahbo.

¹⁷ Noquen Hihbo qui hinamehtaibon ta jahuen yoshinyahpabo qui. Juhuen yoshinyahpabo cahen hinamabo sca.

¹⁸ Noque rihbi bebepohxonma sca ta bejisihiti jisquin hahcajaxon noquen Hihbaan xaba jisish, jan hihqui quescaribhi noque jatihibi jatihi, hashoan xaba shinan hanicanahi. Noquen Hihbaan Yoshin noquen jointi janin teetaiya ta jahuen xaba noque qui mahnechanahihqui.

4

¹ Heen shinan tiroma tenexon ta Papan hea yohinishqui, jahuen joi siri hen yohixonnon. Jaa copi tah hen jointi sirijaquescái.

² Hahqui rabintinoxon ta jonexon caibaan jaiqui. Noquen Hihbo qui hinamehxon jascapa jenebahinscanish tah hen paran parani nihtimahi. Papan joi rihbi yohiquin quescayamaquin. Hihcoini yohuanxon tah hen jato nincamahi, jatihixonbi jaton jointinin hea honanahbo. Noquen Papa bebon nihxon hahcaja tah hen jai.

³ ¿Hen yohihi joi siri nincaxon bi beracohxon honancasquimacanihqui? Jascapahbo ta queyónicabo qui. Queyónicabon ta honancasquimacanihqui.

⁴ Nea mai meha diosien ta nincayosmabo jato shinan chihtehihqui honanyamahahbo. Noquen Papa jenquetsahpabo quin hihxon tah non Criston joi nincaxon non honanscái. Juhuen joi ta xaba quescá siri qui. Juhuen xaba jisyamanon hihxon ta tiroma yoshiman jato chihtehihqui.

⁵ Hea maton hapo copi hea nincanahue hah tah hen jayamahi, joi siri yohiquin. Noquen Hihbo ta Jesucristo qui, hih ta hen jai. Noque cahen maton janibo, Jesus teexonai noquebo.

⁶ Bahquish chian xaba jahue, hah noquen Papan janíxon ta jaan rihbi noquen jointibo xabajahiqui, xabapan jismahah Cristo bejisquin hahcajaquin non noquen Papa Xaba Hihbo honannon.

Shinancoinax jihueta

⁷ Jahuuen hahxontibo res non hihqui que bi ta jahuuen coshi shinan Papan noque hinanihqui. Mai meha yorayahpabo res hihquish bi Papan coshi shinanyahpá. Noquenahma bi Papana, jaa coshi. Noquen honannon hihxon cahen noquen jointi janin jaa shinan siri janaquin.

⁸ Jatihibijaquin hea tiromajahibaan bi tah hen shinan yosmayamahi. Jatsanhah hea jaábaan bi hean tiromajaquin shinanyamahi.

⁹ Hea rehtecatsihquin chibanaibaan bi ta Papan hea jenebahinyamahihqui. Main hea potahhaabaan bi hea muhuyamahi.

¹⁰ Rehtehahbo Jesus muhuani quescri tahn hen jascabi jai, nete tihibi heen yora rehtecatsihquiaan bi. Heen yora janin hahan Jesus jihuenu jai jisíbo cahen Papan hea tenemahah.

¹¹ Noque jihuetaibo ta Cristo noquen Hihbo copi Papan noque jascabijaquin muhuamaquin bi rohajahiqui, noquen muhuonica yora janin Jesus jai jisíbo.

¹² Jasca tahn qui, hea huetsabaan: non noque muhuatai bi tahn mato jihuetai.

¹³ Nincacoinxon tah hen jaa joi rihbi yohihi, hih ta huishani joi jaiqui. Nincacoint shinanyahpaxon ta jascajanishqui. Noquen rihbi tahn non jaa shinan bilihxon nincacoinxon jascajaquin rihbi yohihi.

¹⁴ Noquen Hihbo Jesus huenihhninixon ta noque rihbi huenihhnixayihqui, noquen Papan. Noque huenixon ta matoyabi noque hiyoxayihqui, jaa jano jaiton. Jaa honanxon tahn non mato yohihi.

¹⁵ Man shinan bilihnon hihxon ta Papan jatihibijahiqui. Hashoan hichaxon sca shinan bichish tahn non hashoan hicha rihbi noquen Papa qui siripi yohuanyayihqui, Nete Hihbo jisibo.

¹⁶ Jaa copi tahn non jointi yosmayamahi. Noquen yora pechohi bi ta jatihibi neten noquen shinan behnatihqui.

¹⁷ Non rahma hahan yomanahatái hisin romishin tenexon tahn non jahuentianbi queyotima xaba bihyaxayihqui, jahuentihopah ra tsoan shinannihma xaba bilihqui, noquen.

¹⁸ Non jisi ta queyónicabo qui. Non jisyamahibo ta queyoyamahihqui, jahuentianbi. Jaa copi tahn non jisíbo non shinanyamahi. Non jisyamahibo caya tahn non shinanai noquen.

5

¹ Noquen yora ta nea mai meha tapas quesca qui. Non haho jihuetahbahi bi basima tahn sca payoti. Jascapahton non jihuetai bi cahen noquen yora muhuatai yai naihoh sca noquen Papan noque hahxonah haho jihuetai jai. Mequeman xobojahama. Jahuentianbi queyotima haho jihuetai. Jaa tahn non honanai.

² Neno tahn non Hea tsi hinanhue hi sen hihresai, noquen naihoh queha xobo bilihcatsihqui.

³ Bichish cah non chopanma quescapahbo jayamascaan.

⁴ Nea tapasoho jihuehahnan tahn non mahneti hihti queenxon jointi xecahihnihi, noquen yora potacatsihyamahi bi hahquibi hashoan siri yora sca bilihcatsihqui. Jascabi jihuematicon sca queyónica mahpobahinnon jaa bilihcatsihqui, sahuequin hahcajaquin.

⁵ Non jascapa bihyaxahnnon noque sirijahi ta noquen Papaas qui. Noque jascapa hinanyahnoxon ta noque jahuuen Yoshin hinan sca jaiqui.

⁶ Jaa copi tahn non jascabi sirijaquin shinanai. Noquen yoraya jihuehahnan tahn non noquen Hihbo janin jayamahi.

⁷ Jaa jisishma tahn non jihuetai, jahuuen joi nincacax res jihuetai.

⁸ Jascaxon bi cah non shinanquin sirijascai. Noquen Hihbo janin jihuexon tahn non noquen yora potabahinti queenscái, neno manati queenyamatahnihi.

⁹ Jaa copi tahn non yorayahpahax jihuetax, jascayamahax jaa janin jihuetax, jan queenaijati res queenyorahi.

¹⁰ Siri hin, tiroma quin hihxon janoxon jan noque jisi janin tahn non jatihibi nihyaxayihqui. Yorayahpaxon non hahcái quescabijaquin noque yohinon tahn non jano nihti jai. Non sirijaquin hahnibó cahen noque sirijaquin yohiquin. Non tiromajaquin janíbo cahen sinajaquin noque tiromajaquin.

Hihbo qui hinamehtax jahuen baque sca

¹¹ Jaa copi tah non noquen Hihbo qui raqueti honanxon non mato hihti yohihi. ¿Jenquetsahpa shinanya non quin? Papan ta honanihqui. Maton jointinin maton rihbi honanti tah hen queenai.

¹² Noque tah non jascapa shinanya qui, noque honannahue hihribixonma tah non mato yohihi. Man noquehon jenimahax jaya yohuanti janon hihxon tah non mato yohihi. Caibo ta bemacanya resjisish jenimanica qui. Jenquetsahpa shinanya quin hihyamacani. Man jascapahbo joi bichinti hahtipahnah cahen mato yohihi.

¹³ ¿Hea tequehiehqui joni quin? Noquen Papa queenaiyah tah hen jascapa jatihi. ¿Hea siri shinanya joni quin? Man Papan shinanya janon tah hen jascapa jatihi.

¹⁴ Cristohon hihti queenxon tah hen jascajahi. Jatihibichina ta noquen hohcha copi jaa huesti mahuanishqui. Jaa mahuayamahiya cahen noque jatihibi mahuatan. Jaa tah non honanquin sirijahi.

¹⁵ Non queenai quescayamascaax sca non jihuemon cahen jaa mahuanish. Noque copi mahuatipi bi hahquirihbi hueniha queenai quescari sca cah non jihuetai jai, noque jihuetaibo.

¹⁶ Jaa copi tah hen ¿Jenquetsahpa hin? hihxon jisxon res joni huetsa honanti shinanyamascái. Jenquetsahpa hin hihxon Cristo jisxon res honanti shinannixon bi tah hen jascajatima sca jai.

¹⁷ Cristo qui hinamehtax tah min mia behna noque sca qui. Mia queenpahoni quescayamascaai, jathiobi behna.

¹⁸ Papa queenai jatihibi sca tah min queenti jai. Cristo raanquin ta noquen rahuiti shinan Papan noque sohuaxonmishqui. Jahuen rahuibo que bi noque raejaquin. Noquen sca non huetsabo jaton rahuiti shinan pontexonnon ta noque yohihihqui.

¹⁹ Noquen hohcha copi noque casticanaxma ta Cristo betan noque hohcha sohuaxoniqui, jahuen rahui non hihpahoni que bi jahuen hahberabetibo sca non janon. Non jaa joi yohihi sca canon ta noque raanihqui.

²⁰ Jaa copi tah non Criston yohixonnicaahbo qui. Non yohihi join Papa yohuanai quescapi. Maton hohcha potahax jahuen rahuibo que bi Papan hahberabetiboscanahue, hah tah non jai.

²¹ Noque hohchajomabo janon ta Papan jaa noquen hohcha hinannishqui, jan hohcha honanyamanah bi. Hahqui hinamehtax non noquen Papa ponte siri hihqui quescaribibi non ponte siribo janon hihxon ta noquen hohcha jaa hinannishqui.

6

¹ Papa betan teenicaxon sca tah hen mato hihti yohihi. Matohon shinanxon ta jaan mato hihti hahxonihqui. Nincaquin bi quescayamanahue.

² Nincati siripai tian bi tah hen mato nincascai. Mato teehihmati netenbi tah hen mato yanapanai

hah cahen jaan janish. Rahma ta nincakah siri qui. Mato teehihmati nete ta nocoscainqui.

³ Nincacoinyamacamnis hihquish tah non hihti coirametai. Non siriresi jihuetai honanax jahua copibi noque qui tiroma yohuanti tsoabi yamanon tah non Papan joi yohinicaahce ponte res jihuetai.

⁴ Papan yonotiboxon tah non jatihibijaquin jato jismati jai, jahuen teexonnicaahbo non hihqui honanahbo. Hihti tenexon tah non jato jismahi. Hisinbo tenequin. Yomanahxon bi tenequin. Tiromabon tenequin. Tiroma netebo tenequin.

⁵ Tsehuejahabo bi tenequin. Sipo xoboho tsahonahbo bi tenequin. Rehtenannanaiboya tenequin. Tee teexon tenequin. Hoxa tenequin. Piti tenequin. Papan teexonaibon non hihqui honanahbo jaa rahsi tenequin.

⁶ Jascapa noque honanahbo siriboxon jatihibijaquin. Papan joi rihbi honanxon, caibo teneresquin. Jato yanapanquin. Dios Yoshinyaxon yohiquin. Jatohon shinancoinquini.

⁷ Hihcoinai join res jato yohiquin Papan coshiyaxon hahxonquin. Ponte shinanyahpaxon yohiquin tah non noque cahehahbo pontexon noque join bahchincatsihqui rihbi sirijaquin yohixon non pontehi.

⁸ Caibaan noque nincacai bi caibaan rihbi noque hosanguin. Caibo noque qui siripi yohuani. Caibo tiromahi yohuani. Hihcoinjaquin non yohihi bi ta Man tah man paranai caibaan jaiqui.

⁹ Caibaan ta noque honanquin sirijaxon bi noque honanyamaquin hahcajahiqui. Mahuacatsihquish bi teehihscal quescia tah non jai. Casticanaxon ta noque retequin bi rohajacaniqui.

¹⁰ Benátihi bi tah non jenimahi. Jahuabijomaxon bi tah non hicha noquebo hicha shinan hinanai, hicha shinan jaábo. Jahuabijomahax bi jatihibiyahpa quescapi. Jasca tah non jai, Papan noque hahxonai honanahbo.

¹¹ Noquen jointinin matohon shinanxon tah non mato yohihi, corinto jonibaan.

¹² Hean tah hen mato panteyamahi. Hehon man shinapanan tah man maton jointin-inbi man pantetai.

¹³ Copiquin sca hen hahcai quescajaquin maton jointiboyaxon hehon shinannahue. Heen baquebo yohiquin hahcaja tah hen jai.

Non Papan xobo quescapahbo jai

¹⁴ Pontejaquin shinanaibo ta tiromajaquin shinanaibo betan mescotimahihqui. Jano xaba jaiton ta yame jatimahiqui. Jaa copi nincacoinyamahi hihquihinti bihyamanahue.

¹⁵ Tiroma yoshin betan ta Cristo nihtimabiresiqui. Nincacoinaibo betan ta nin-cayamahibaan jasca rabe shinanyamahihqui.

¹⁶ Tiroma yoshiman hahan parantibo jahuen santobo ta Papan xoboho jatimabiresiqui. Noque tah non jihuenuca Papan xobo qui, jan yohini quescari:

Jato chicho tah hen jihuetahi jato tocan nichi. Hea tah hen jaton Papa Dios hihtihi, jaabo rihbi heen jihuetaho.

¹⁷ Jaa copi jato janinhax piconahue. Matobi res jihuenuahue. Jahua bi tiromabo meheymaquin. Jaatian tah hen mato bihtihi.

¹⁸ Hea tah hen maton Papabi hihtihi, mato rihbi heen bebo baquebo, heen haibo baquebo. Jasca ta jatihibijati hahtipahnica noquen Hihbo jaiqui.

7

¹ Jascajaquin ta noque hahxonti yohinishqui, hahan hen shinanaibaan. Jaa copi hahan yora tiromati, hahan shinan tiromati rihbi potabahinnahue. Noquen Papa Dios hihti shinanya hihqui honanax, jatihibi mequejaquenahue, jahuenahbo rahsi hihnoxon.

Jaton shinan pontetiji

² Noque shinannahue. Tsoa qui bi tah non mato qui tiromayamaniqui. Tsoabi tiromajayamaquin. Tsoabi paranyamaquin.

³ Mato tah man tiromabo qui hahquinma tah hen mato yohihi. Mato tah hen jaashinanai hah ca hen mato jai sen. Mato betan jihuetai, mato betan muhati, jascabi mato betan hihqui.

⁴ Noquen Papa man nincatihi tah hen honanai. Jaa copi tah hen sirijaquin shinanax jointi siripai, hicha cahen mato qui siripi yohuanti jai. Hicha tenehax bi tah hen hihti jenimahi.

⁵ Tenehax bi cah non jenimahi. Noque tiromajaquin jeneyamahahbo tah non Macedonia janin rihbi nocoxon yora tantiti hahtipahyahohqui. Jatihibi janin rehtenancatsihqui-bohi. Noque hihti raqueti jihuetai.

⁶ Jasca non jaiya bi cahen masa shinanaibo siri shinan hinannica hihxon Papan noque siri shinan hinannish. Tito rihbi jano nocamaxon Papan noque shinan siri hinanquin.

⁷ Man jaa raanah joxon ta noque shinan siri hinanipishqui. Man jaa hinanipi shinan siri ca hea sca jaan rihbi hinanipish, hen jaa copi rihbi sirijaquin shinannon. Man bena benatai, man huunihi, man noquen yohihi quescabijaquin hihti hahcatsihqui jan yohihipi tah hen hashoan sca jenimahi.

⁸ Huishaxon mato benámahoxon bi cah hen masa shinanyamahi. Jaatian masa shinanhohxon bi tah hen jascajayamasca, basima tahni res heen quiricanen mato benáma honanaxon.

⁹ Rahma tah hen jenimasca. Man benataiya hea jenimayamahi bi tah hen man benaxon shinan pontehiya hea jenimahi. Papan benáma tah man benáhohqui, hean mato jahuejayamanon.

¹⁰ Papan benáma tah non shinan pontehi, jaan noque teehihmanon. Jascaxon shinan pontexon cah non masa shinanyamasca. Mai mehabaan benáma cahen hahan muhati.

¹¹ Papan benáma benatax tah man jahuen joi nincati hihti queensca. Man cah man hihti yohicatsihscasai, man ponte sca jai hen honannon hihxon. Hihti rainyama cah man joni huetsa qui jai. Hihti raque rihbi. Hihti jenipahichi, Papan joi nincaxon hihti jacatsihquin. Hihti castican cah man jai. Hen mato yohiho maton hohcha man yamabiresca cah man jismahi.

¹² Hoa hohchatai copima tah hen mato yohihohqui, quirica raanxon. Hahqui hohchatai copima rihbi. Noquen yohihah quescabijaquin man hihti hahcatsihqui Papan mato jismanon hihxon tah hen jaa quirica raanhohqui.

¹³ Jaa copi tah hen shinanquin sirijascai.

Mato jisxon ta Titon rihbi shinanquin sirijahiqui. Jaa jenimahiya tah non hashoan rihbi shinanquin sirijahax jenimahi.

¹⁴ Mato qui siripi yohuanxon hen Tito yohihiya tah man hea hiitimahmayamahohqui. Jatihibi hihcoinjaquin non mato yohini quescajaribiquin tah non hihcoinjaquin Tito yohihohqui, Ninca ta jatihcanihqui hahquin. Man nincacoinai ta honanscαιqui.

¹⁵ Honanxon ta hashoan sca mato shinanihqui. Man raquetax tastahixon, Johue man jatihixonbi jaa jaho ta shinanihqui.

¹⁶ Noquen yohihah quescabijaquin man hahcoinai honanxon tah hen shinanquin siri-jahi.

8

Yohuashihxonma non Papa hinanti

¹ Papan ta jahuen shinan noquen huetsabo hicha hinanhoxqui, hea huetsabaan. Macedonia mai janinhahbo jahuen shinan jato hinanquin, yanapanquin jaton coriqui hinanahbo. Man honannon hihxon tah hen jaa mato yohiscai.

² Hihti tiromajahahbaan bi ta hihtijenimacanihqui. Jahuabijomaxon bi ta hicha hinancanhoxqui, jaabo jai pishca hinanresquin.

³ Heen jisnonbi ta shinan caman hahtanxon hinancanhoxqui, hashoan rihbi. Jaabobi queenxon res hinancanquin.

⁴ Noquen huetsabo hicha pishinaiboya ta Non jato yanapannon noque rihbi jato hinamarohahue hahcanhoxqui, noque hihti yocaquin.

⁵ Jaabaan hinanrestih non shinanah bi ta noquen Hihbo qui hinamehtax noque qui rihbi sca hinamehcannishqui, noquen Papa queenai quescari.

⁶ Jaa copi tah non Tito yohihohqui, jan mato hinanmamenoni quescajaribiquin mato jaa tee siri jan janquenjamanon hihxon.

⁷ Jatihibijaquin tah man hichajahi: hicha shinanquin, hicha yohiquin, hicha honanquin, hicha coshin teequin, noquehon hicha shinanquin. Joni huetsahon shinanxon hinanquin sca jascajaribinahue, hichajaquin.

⁸ Mato yonoquinma bi caibo coshin teetaiboya tah hen mato yohihi, maton rihbi man joni huetsahon shinancoinai jismanahue hahquin.

⁹ Noquen Hihbo Jesucristonen matohon shinanai tah man honanscαι. Jatihibi hihbohax bi ta jahuabijomanishqui, matohon shinanax. Jan jahuabi yamahiya man hicha bignon hihquish ta jahuabijomanishqui.

¹⁰ Man nescajaha ta siri qui hihxon tah hen mato yohiscai: huetsa bari tian man hinanti shinanxon texe tsinquinixon janquenjascanahue.

¹¹ Yanapanti man histon jenipahini quescajaribiquin man jaibo hinanquin queyoscanahue.

¹² Hinancatsihquin non hinanah ta siri qui, Papan jisi. Jahuara jaxon hinancatsihxon hinannahue, hah ta Papan noque jaiqui. Yamaxon bi hinannahue hah ta noque jayamahiqui.

¹³ Caibo hicha janon, pishinnoxon caman hinannahue, hih ta jayamaribihiqui.

¹⁴ Jasca rabe jayaxahnnon hihxon man hicha jaibo texe hinannahue, pishinaiboya, man pishinaiboya sca jaabo rihbi hicha jaxon mato hinanyaxahnnon. Jascapahbo rabe jaábo jascajanahue.

¹⁵ Huishani joi jai quescari: Hicha tsinquiuhahbaan bi jahuabi texeyamahi. Hicha tahma tsinquiuhahbaan bi jahuabi pishinyamaribih.

Tito, jahuen hahberabetibo

¹⁶ Non matohon shinanai quescajaribiquin Titon rihbi matohon shinannon ta jahuen shinan Papan hinanihqui.

¹⁷ Non benahah ta jeen hihquish jaa bi queenax mato janin cahiqui, Papan joi jai quescabi hihti jacatsihqui. Jaa copi tah hen Hahxon tah min jato jai, Papan, hen jai.

¹⁸ Hahbetan canon tah non noquen huetsa rihbi raanai. Jaa noquen huetsa ta Papan baquebaan honancaniqui jatihixonbi, Papan joi siri jaan jato yohihah.

¹⁹ Jaa honanxon ta yohicannishqui, noque betan jan nihnon. Jaa copi cahen noquen huetsabo coriqui boxonquin noque betan nichi, noquen Hihbo Shinan Hihbo jisíbo, non yanapanhanananai rihbi jisíbo.

²⁰ Hicha coriqui tsinquinxon sca tah non coiranquin sirijascai, tsoabi noque qui tiromahi yohuyamahahbo.

²¹ Papan noque siri jisnon hihxon tah non hahcái, jonibaan rihbi siri jisnon hihxon.

²² Jato betan tah non huetsa rihbi noquen huetsa raanai. Jaa tah non hicha coti tanaxon jan noquen Papa hihti hahxoncatsihqui non honanscαι. Man nincacai honancoinxon sca ta hashoan rihbi hahxoncatsihqui.

²³ Tito rihbi ta heen hahberabetixon hehbetanbi mato hahxonihqui. Noquen huetsabo rabe ta Papan baquebaan raanahbo qui, jato jisxon Criston shinanya hihquibo honanahbo.

²⁴Jaa copi Papan baquebaan jisnon hihxon noquen huetsabohon man shinanai jismanhue. Man hinancointihi tah non nea noquen huetsabo yohirahsihi. Jasca coin sca janon jato jismaxon maton coriqui hinannahue.

9

Noquen huetsabo yanapannoxon coriqui tsinquihibo

¹Noquen huetsabo yanapannoxon coriqui hinannahue hahquin hen mato yohirihbiti tah man pishinyamahi.

²Man hinancatsihscrai tah hen honanai. Macedonia janinhahbo tah hen moa yohiho-hqui: Acaya janinhahbaan ta hinanti jaresscαιqui, huetsa barin tsinquinib, hahquin. Man hinancatsihqui nincacax ta jaabo rihbi queenscαιqui, hinanti.

³Man hinanti jaresscαι hen jato yohiho quescayama man jaiya cahen hea rabinan. Jaa copi cahen noquen huetsabo raanscrai. Hen yohiho quescabi jacoinnon hihxon cahen jato raanai.

⁴Man tsinquiscrai non shinanah bi caibo macedoniobo hehbetan cahi nocoxon man tsinquiayamiton mato merahiya tah non hihtimahitihi. Non hihtimahmis hihxon tah non mato yohihi. Man hahcointihi non shinanah bi man hahyamahiya cahen mato rihbi man hihtimahpan.

⁵Jaa copi tah hen noquen huetsabo yohihipiqui, jaabo pari mato janin nocoxon man hinancatsihqui coriqui tsinquiayamiton. Tsinquiscaxon tah man hinanti res pishinyaxihqui. Copijanahue hahcama bi queenxon copi man hinanyaxahnnon.

⁶Banaquin hahcajaquin hinannahue. Hicha tahma huai chian banahoxon cah non hicha tahma rihbi bimi tsinquitih. Hicha banahoxon hicha rihbi tsinquiscaquin.

⁷Shinanquin sirijaxon hinannahue, man hinancatsihqui tih hinannocon. Hinancatsiyamaxon hinanyamaquin. Queenxon res. Hinanyamahax rabinpaho hihyamahi. Jenimahanan hinanai jonihon ta noquen Papa hihti jenimahiqui.

⁸Man pishinailbo jatihibi ta Papan mato hicha hinanti hahtipahiqui. Jaan hinanah tah man jahuabi pishinyamascaxon jatihibi siribojaxonquin hahtipahscatihi.

⁹Huishani joi jai quescari:

Jabisaque ta Papan hinanresiqui, jahuabijomabo hinanresquin. Pontejaquin shinanxon hahcaibo ta Papan jahuentianbi shinanbehnotimahihqui hihqui jaa joi.

¹⁰Papan ta bero hinanihqui, bananication bananon. Piti rihbi ta hinanihqui, pihabo hihxon. Mato rihbi ta hinantihi, man jaibo rihbi hichajaquin. Man pontejaquin shinanxon hahcai rihbi ta hichajaxihqui, bimi hichajaquin hahcajaquin.

¹¹Jatihibijaquin ta mato hicha hinantihi, man hicha rihbi hinanrihbinon. Man hinanah tah non bihxon boxontihi, Hahxon tah min noque jai Papan hihquibo.

¹²Jaa coriqui hinanquin tah man noquen huetsabo hihti yanapanai, pishini jihuetax bi siri sca jaábo. Hinanquin tah man jato hicha yohuanmarihbibi, Hahxon tah min noque jai Papan hihquibo.

¹³Jascajaquin hihti sirijaquin yanapanxon tah man Criston joi siri man nincacoinai man jato jismatihi, noquen Papa qui siripi yohuanahbo. Yohuashihxonma man jato hinanxon texe jonibo rihbi hinanah ta Hahxon tah min noque jai Papan hihyaxihcanihqui.

¹⁴Noquen Papa qui siripi yohuanxon ta matohon shinanxon mato yocaxonyaxihcanihqui. Hicha shinan siri tah min jato hinanhohqui Papan, hahxon tah min jai, hih ta jayaxihcanihqui.

¹⁵¿Papan noque hinanai jahuentiho siri quin? Hihti siri copi tah non mato yohiti hahtipahyamahi.

10

Papan raantixon Pablonen yohiti hahtipahi

¹Heanbi Pablone tah hen mato hihti yocasrai. Mato tocan hihtimahpax bi hocho sca hen coshicahinscrai hih roqui man jai, hea yohihi. Cristo ta hihti siri qui. Noque ta honaxonbi yohihi.

²Jaa copi tah hen mato hihti yocacai, mato tocanxon sca hihtimahxonma bi mato raquejaxon yohiyamayanoxon. Mai mehabaan shinanai quescajaquin noquen rihbi jai man caibaan shinanah bi tah hen hihtimahxonma mato yohiti shinanai, hen yohiti honanai quescajaquin. Mato tocanxon sca jascajati jayamanoxon tah hen mato rahma yohihi.

³Yorayahpahax bi tah non yoran rehtenanyamahi. Noque tah non huetsarihbihi rehtenanai.

⁴ Hahan mai mehabo rehtenana cah non yamahi. Noquen hahan rehtenanti ta huetsapah qui, Papan coshiyahpa. Jayaxon tah non Satanasnen coshi shinanbo potojaquetanai. Jahuuen coshiyaxon noque pantecatsihquibo cah non joi bichinai, jahuabi yohuanti shinanyamascaábo.

⁵ Noquen Papa Dios honancanmis hihxon pantehibo cah non jaton coshi jato bichinai. Cristo huestichin mato shinan hihboxon jahuuenah sca mato hinanah man nincacoinnon tah non Papan coshiyahpahax yohuanai.

⁶ Maton nincayosmabo man matobon ponteron tah non manatahbahi. Man pontequin texejahiya can non jato casticanti jaresscaí.

⁷ Criston raantibo ta honantih bi res qui. Shinannahue. ¿Cristona min quin min honanquin sirija sca Jain? Cristona mia hihqui quescaribih ta non noque jai, honannahue.

⁸ Jahuuen joi yohinicaxon non mato coshi hinannon ta noquen Hihbaan noque caisnishqui. Mato tiromajanomma. Hea janexon ta jahuuen coshi hea hinanihqui, hicha coti mato yohihax bi tah hen hihtimahtimahi, honanxon mato yohicoinx.

⁹ Quirica huishaquin hen mato rahtecatsihqui shinanyamanahue.

¹⁰ Quirica huishaquin ta coshin yohixon noque rahtehihqui. Nocotax sca ta jahuama quesca sca qui, jan yohuanai rihbi jahuama, hih roqui man caibo jai, hea yohihi.

¹¹ Jascapahxon honannahue: hochoxon quirica huishaxon non yohihi quescajaribiquin tah non mato tocanaxon rihbi yohiti jai.

¹² Shinanyahpa joni tah qui hihquibo ta caibo yohuanihqui. Hea tah hen hahbetan senenai. Hean tah hen jaa mahuinai, hih ta jacanihqui, hahbe honanma yohuanmis betan merananax. Hea cahen jascayamahi. Tsohbetanbi senenti shinanyamaquin. Jascapa yohuanai mentan tah hen hashoan siri qui, hih tah hen jatimaribibi.

¹³ Noque tah non jaa qui hihxon tah non Papan noque yohiti hinanai non huinonyamahi. Mato qui non jahuuen joiya canon noque yohini quescabijaquin tah non mato yohihi.

¹⁴ Non mato qui nocoyamani hahcаяyama tah non jai. Papan hea yohini tah hen huinonyamahi: Noque pari tah non Criston joi siriya mato qui noconihqui.

¹⁵ Caibaan Papan joi nincamaha nincacoinaibo jaiya tah non noquen jato nincamaha hahcаяyamahi. Hashoan hicha tah hen yohuanyamahi. Man hashoan sca nincacoinaiya tah non mato janin noquen tee caicanahi quescahashoan hichaxon man nincacointi non queenai.

¹⁶ Jaatian tah non mato hoque pacho sca huetsa maibo janin joi siri yohihi catihi. Caibaan yohihi janinxon hean rihbi yohihax bi tah hen Hean yohihah ta nincacoincaqui hihyamahi.

¹⁷ Jaabo tah hen nincamatana hihcatsihquish bi Noquen Hihbaan ta noque hahxonihqui hihnahue.

¹⁸ Hea tah hen siri qui, mia tah hen hahxonai Papan, hah non jaiya cahen Papan noque siri jisyayaman. Noque yohihi, jaa ta siri qui, hih noquen Hihbo jaiya cahen Papan noque siri jisi qui.

11

Papan raantibocamahibo Pablonen yohihi

¹⁻² Bebaan honanahma xontaco jahuuen Papan hinanquin hahcajaquin tah hen Cristo mato shinannihqui, jaa huestichin mato hihbojanon. Noquen Papa Dios queenai quescaquin mato nincamati tah hen jai. Jaa copi tah hen mato yohihi. Shinanyahpa joni hihqui man shinanon hihquish caibo yohuanah bi ta jaton yohuan honanma qui. Jascapa yohuanbo nincanicabxon hea sca nincanahue, jascapah hen mato nincamanon.

³ Ronon jahuuen honanam Eva paranni quescajaribiquin mato sca tiroma yoshiman paranxon tiroma shinan hinanmis, hih tah hen jai. Jaan paranah, man mesco shinanyah-pahax res sca Cristo huesti queenyamascamis.

⁴ Non mato yohinimha bi huetsa Jesus joi mato yohihi jahuibo cah man jato nincacai. Non mato yohinimha bi huetsa Dios Yoshin caibaan mato bihmahah cah man bihresai. Non mato yohini joi sirima bi huetsa joi yohihahbaan cah man nincaribiscay.

⁵ Mato qui noconihbo quiquin raantibo hihqui man shinanah bi ta hea huinonyamacaniqui. Honanxon copi tah hen mato yohihi.

⁶ Yohuani sirixonma bi tah hen honanquin sirijahi. Jaa tah non jatihibijaquin mato jaajismanihqui.

⁷ Papan joi siri tah hen jahuabi cobranxonma mato yohinimha. Hea jahuama quescaxon mato jahuabi yocayamaquin, mato siribo quesca. ¿Hen jascani tiroma qui?

⁸ Mato yanapannoxon tah hen noquen huetsabaan coriquinin mato janin noque jihuenehqui. Jaabaan hinanah tah non jaa coriquinin jihuexon non mato yohinimha.

⁹ Mato tocan jihuetax pishinxon cah hen tsoabi jatsanjayamanih. Macedonia janinhax nocotai noquen huetsabaan ta hea pishinaibo hea hinannishqui. Mato jahuentianbi jatsanjayamanixon tah hen jenquetsahaxonbi mato jatsanjayamaribiyaxihqui.

¹⁰ Hen mato jahuabi yocayamahi ta shinanbehnotimacaniqui, Acaya main jihuetaibaan. Jaa hen hihcoini yohanai ta Criston honanihqui.

¹¹ ¿Matohon shinanyamaxon hen jascajaniquin? Matohon shinanxon hen jascajani ta Papan honanihqui.

¹²⁻¹³ Hea Papan raanti hihqui quesvari ta mato qui noconihbo jacatsihqui. Jaabo ta quesahiqui. Paranxon ta yohicaniqui. Raantihicamahibo can. Papan yohihahma bi ta heheba raantibo jacatsihquish yohuancaniqui. Jahua yohuanti yamahahbo hihxon tah hen hen hahcái quescajaquin jascabijaquin hen hahtihí, maton coriqui mato bichinyamabireshquin.

¹⁴ Jaabo jascarai bi tah hen rahteyamahi. Satanás ta jascarihbiqui, Papan xabayahpa yonothicamahi.

¹⁵ Satanás hihqui quesvari jahuen hahxontibo rihbi siri hahxontibocamahiboya tah non rahtetimahi. Jaabo tiroma hihqui quescajarihbiquin ta Papan jato tiromajayaxihqui, casticanquin.

Papan yonotixon Pablonen tenenih

¹⁶ Mato tah hen yohirihbi: hea honanma hihqui shinanyamanahue. Hea honanma hihqui shinanxon bi tenexon hea nincanahue, hea jahua quin hen mato joi pishca yohinon.

¹⁷ Nea hen mato yohicatsihqui tah hen noquen Hihbaan yonohahma sca mato yohihi. Honanma yohuanihcamahax tah hen yohuanscái, caibo muhuinax hahqui sca yohuanoxon.

¹⁸ Hicha ta yohuancaniqui, nea nete mehabo muhuinax. Mai mehabohax ta jasca-caniqui. Jascaraiboya hea rihbi jascapan.

¹⁹ Honanquin hahcajaxon man jascapa nincacatsihqui copi tah hen hea rihbi jascascai, mato nincamanoxon.

²⁰ Jaabaan mato hihbojaha bi cah man jato tenehi. Mato jatihibi bichinah cah man teneresi. Paran paranah cah man tenehi. Shinanyahicamahax yohuanaibo cah man nincacai. Bepasah bi tenexon tah man nincacai.

²¹ Coshijomaxon rah tah non jaabaan hahcái quescajayaniqui. Hiitmáh sca rah tah hen jai.

¿Jahuajahah jaabo yohuanihqui? Jaabo jai yohuan tah hen hea rihbi jaa jai, Honanma joni jaicamahax yohuan sca tah hen jai.

²² ¿Jaabo hebreobo quin? Hea rihbi tah hen jaa qui. ¿Jaabo israelitobo quin? Hea rihbi tah hen jaa qui. ¿Abrahanen baquebo jaabo quin? Hea rihbi tah hen jaa qui.

²³ ¿Jaabo Criston yonotibo quin? Hea hashoani. Tehquehihticamahax quesca tah hen yohuanaí. Jato ta hen muhuinai, hashoan coshin teequin. Hashoan hichajaquin ta hea sipojacannishqui. Topontimajauquin ta hea rishqui rishquicannishqui. Hichajaquin hea tsehue tsehuejahabo bi tah hen muhuatih bi rohánihqui.

²⁴ Rishquitiyaxon ta judiobaan hea rishquicannishqui, huestijaquinma. Hichajaquin cuarenta qui nocoti huesti rishquitipishinmaquin. Pichca coti hea jascajacanquin.

²⁵ Quimisha coti hea jihuín rihbi rishqui rishquicanquin hichajaquin. Macaman rihbi ta hea tsacacannishqui rehtecatsihquin. Quebijistima hian janin nontin cahi bi ta behchoman tsahcayah noquen nonti hihquinishqui, quimisha coti rihbi. Quebijistima hiaman noquen nonti hihquiya cahen nonabahinahax nonashinarihbinih.

²⁶ Hicha bi res tah hen nihnnihqui. Heamean nichish rihbi jene meran cahi bi rohati. Tiromabaan ta hea heen jahuaborabo bichincatsihxon rehtequin bi rohajanishqui. Heen caibaan rihbi ta hea rehtequin bi rohajanishqui. Heen nahuabaan rihbi sca hea rehtequin bi rohajaquin. Jemabo janinxon caibaan rihbi hea bihquin bi rohajaquin. Nihi naman cahax muhuatih bi rohati. Quebijistima hiaman cahax hihquihi bi rohati. Nincaquin bi quesajahibaan hea bihquin bi rohajaquin.

²⁷ Téeteeti hea, yomanahti. Yame teeshinahi. Piham hihqui. Xehan hihqui. Piti tenequin. Matsu tenequin. Jahuatohonbi rahcoti yamahi.

²⁸ Hashoan hicha rihbi tiromabo tenexon tah hen nete tihibi noquen huetsabohon shinanai, Jenquetsa jacanilhquin hihxon.

²⁹ Noquen huetsa huesti yosmahiya tah hen hahbe yosmaxon quescaxon jaa yanapan-catsihqui. Noquen huetsa hohchamahiboya tah hen hahbetanbi hihti benatai.

³⁰ ¿Hea tah hen coshi qui hih non jatihin? Hihyamahi rahan. Heen coshi yamahi jisibo hihquish tah hen yohuantihi.

³¹ Noquen Hihbo Jesucriston Papa ta Papa Dios qui. Hahqui tah non jascabi yohuani siritihi. Jahuentianbi yohuanquin queyoyamaquin. Hea quesayamahi ta jaan honanihqui.

³² Damasco janin ta quiquin hapon joni Aretasnen hea bihti shinanxon jaa jema jahuen sontarobo coiranmanishqui.

³³ Hea bihcatsihquiaan bi ta jaton jema chique xehqui pishcaten noquen huetsabaan hea cainmaxon tasa qui nanexon rontanpaquexon botonah hea cahnenihqui.

12

Jismaxon Papan yohinh

¹ ¿Hea caya ta honan qui hih cahra non jatihquin? Jascari yohuanxon jahuabi bihtimaxon bi tah hen noquen Hihbaan hea jismaniib, jan hea yohinhbo rihbi mato yohiscai.

² Criston hea jismaha tah hen hea naihoh cahi jisniqui. Catorce baritian sca tah qui, hen jisni, naihoh hea cahi.

³ ¿Yorayahpa hen caniquin? ¿Yorajoma hen caniquin? Hen tah hen honanyamahi. Papan ta honanihqui.

⁴ Janoxon sca tah hen tsoan yohitima joi nincanhqui, joni yohuantima joi.

⁵ Papan hea jascajaquin jismani copi tah hen jaya joiti jai. Heanbi hahxon muhuinax hahcajayama tah hen jai. Heabi coshijoma jisibo res yohuani.

⁶ Hea tah hen honan qui hihquish bi cahen honanma yohuanai quescayamahi yohuani. Hihcoini yohuani. Jascari yohuanti hahtipahax bi tah hen hiyamahi. Hea jisxon, nincaxon res jascapa hea hihqui shinanahbo hihquish tah hen yohuanai. Hea jahua hashoan quin shinanyamahahbo ta hen jascaraí.

⁷ Hicha jan hea jismaha jisish, Hea tah hen hihti siri qui, hen jamis hihxon ta Papan hea moxan chahchiquin hahcajaquin hahan jatsanti hisin hea hinannishqui. Hea tah hen hashoan siri qui hen jayamanon hihxon ta hea jaa hisin hinannishqui, Satanasnhen hisinjaha tenequin hahcajaquin hen tenenon.

⁸⁻⁹ Jaa hea potamahue Hihbon, hen quimisha coti jaá bi ta hea yohinishqui: Heen shinanyaxon tah min tenetihu. Miin coshiyaxon bi tah min tenetimahi. Heen coshiyaxon min tenehiya ta heen shinanyaxon min tenehi sirijaquin honantihcanihqui, hihqu. Jaa copi tah hen hihti jenimahanan, Henabi tah hen coshi yamahi, hih hen jatihi, Criston shinan bijnxon.

¹⁰ Cristo shinanxon tah hen yosmahihti tenexon, tiromajaquin yohihahbo bi tenexon, yomanahi tenexon, hea tiromajacatsihquibo bi tenexon, tiroma netebo tenexon, sirijsquin hean shinanai. Heen coshi yamahax bi tah hen coshihi, jaan coshijahah.

Jatohon Pablonec hihti shinanai

¹¹ Honanma yohuanai quescatah hen huishahahqui, maton hea yohuanmahah. Mia caya tah min Papan raanti qui man hea jatihi bi tah man jayamahi. Hea jahua man shinanai bi ta maton shinanah maton siri shama raantibaan hea muhinyamahihqui, ni pishcabi.

¹² Maton jisnonbi tah hen hahan Papan raantibo honanti hahniqui. Tiromabo tenexon tah hen hahan honanti hahxon, hahan rahtetibo jaxon, tsoan jascajani que ma bi Papan coshiyaxon hean hahniqui.

¹³ Texe noquen huetsabo yohiquin quescabijaquin tah hen mato yohinhqui, jaabi-jaquin. Maton coriqui res tah hen bihyamaniqui, huetsa janinhah noquen huetsabaan hea hinannon bi. Matonah cah hen yocayamanah. Hen mato cobranyamahah bi rainyamaya-manahue.

¹⁴ Shinanscanahue. Rabe coti canish tah hen hahquirihbi mato qui cacatsihscái. Mato tah hen jahuaibi yocayamayaxihqui. Maton jahuaraboro tah hen queenyamahi. Matobi tah hen queenai. Jaton papaya jaton mama jahan jihueyaxahnon tsinquixonti cahen baquebaan jayamahi. Jaton Papabaan cahen jaton baquena tsinquixonti jai.

¹⁵ Criston shinan man bijnon hihxon tah hen jenimahanen hena jatihibi queyotihu, heabi queyócahinnoxon caman. Man hehon hashoan hichama sca shinanai que bi tah hen matohon hashoan rihbi shinanthi.

¹⁶ Jahuabi yocayamaxon mato jatsanjayamaxon bi tah hen honan hihxon mato bijniqui.

¹⁷ Caibo mato qui raanxon rihbi tah hen jahuaibi mato bichinyamaniqui.

¹⁸ Tito canon hihxon tah hen jaa yohihohqui. Hahbetan rihbi tah hen noquen huetsa raanhohqui. ¿Jahua Titon mato bichinhoxquin? ¿Jaa shinan huestiya non noque rabebe jayamahin? ¿Jascapa rabe non jayamahin?

¹⁹ ¿Jenquetahpa shinanyahpabo non quin, man honannon hihxon non hahquirihbi huishahí shinan man jain? Jascama ta qui. Papan noque nincacai honanax tah non

Criston janen yohuanai. Criston shinanya man janon hihxon res tah non yohuanai, noque huetsabon. Matohon shinanxon tah non yohihi.

²⁰ Mato qui nocoxon hea queenai quescapahboma hen mato meramis hih tah hen jai, maton rihbi man queenai quescapahma man hea meramis. Sinacananaiton mato meramis. Notsi notsihiton, sinajahiton, rehtenanaiton, tiromahi yohuanaiton, caibo qui baxexaiton, caibo mentan hashoan siri hihqui shinanaiton, cahchinan nininanaiton hen mato meramis.

²¹ Papan hea jascaphabo meramaxon hea hihtimahmamis hih tah hen jai. Caibo tah man rishtaya qui. Caibo tah man tsinili, joni huetsa betan hihqui. Caibo haiboya joihi. Jascari hohchahohxon bi man rahma caman maton shinan ponteyamahiton merahax hea huaohihihi jamis hih tah hen jai.

13

Quirica queyonoxon hihti yohihi

¹ Mato qui rabe coti canish tah hen hahquirihbi mato qui cacatsihscrai. Noquen huetsa hohchataiya hahqui chanicatsihxon jan hohchatai rabexonjisish pari chaninahue. Rabe hihyamahax quimisha hihxon jisish chaninon.

² Neateman hohchanihbo tah hem hihti yohinihqui, jan jaibaan jatihixonbi nincacahbo. Jano hihxonma sca tah hen nocorihyamaxon mato yohirihbihi, huetsa coti caribixon hen mato yohini quescajaribiquin. Mato qui nocorihbixon tah hen mato cahnetimascai.

³ Heen janayabi Cristo yohuanai man honancoincatsihqui copi tah hen jascajahi. Jaan ta tanamaxon hahcаяjamaquin mato pontehihqui. Coshin bi res ta mato chicho teetihqui.

⁴ Coshijoma quesa jihuи qui hueonxon rehtenihbaan bi ta Papan coshiya sca jihuetihqui. Jaa bebon nichish noque coshijoma bi tah non jahuen coshi Papan hinanah hahbetan jihuetai, mato shinan hinannoxon.

⁵ Cristo man nincacoinain hihxon man jihuetai shinannahue. Matobi shinamehnahue. ¿Mato chicho Jesucristo jihuetai man honanyamahin? Nincayosmabo man hihyamahiya ta jano jihuethihqui.

⁶ Non quesarayamahi tah man honanyaxihqui. Hen tah hen honanai.

⁷ Man jahuabi tiromayamanon hihxon tah non noquen Papa mato yocaxonai. Honanxon non yohihi man honanon hihxonma bi ta man pontejaquin hahnon hihxon res non yocacai, noque honanma hihqui man shinanai bi.

⁸ Hihcoinai joi cah non panteti hahtipahyamahi. Cajjati res tah non yanapanti hahtipahi.

⁹ Noque coshijomabo hihqui bi mato coshi jonibo jaiya tah non jenimahi. Man hashoan coshion hihxon ta mato yocaxonai.

¹⁰ Hahan hen jato tiromajanona bi ta hahan hen jonibo coshimanon hihxon noquen Hihbaan hea shinan hinannishqui. Mato qui nocoxon hahan mato tiromajayamanoxon tah hen hochoxon pari nea quirica huishahi.

¹¹ Jahua yohiti tah hem yamascai, hea huetsabaan. Jenimanahue. Criston shinan bahnahue. Joni huetsa yohinahue. Jaa shinan huestiya jihuuenahue. Texe noquen huetsabo betan siripi yohuannahue. Jaatian ta matohon shinannica noquen Papan mato yanapantihqui, noquen jointi sirjanica noquen Papan.

¹² Noquen huetsabo hicotanxonannahue, noquen Papa shinanhahn.

¹³ Nenoxon ta noquen huetsabaan jatihixonbi mato qui joi siri raanihqui.

¹⁴ Jahuen shinan noquen Hihbaan mato hinanon hihxon tah non mato yocaxonai. Noquen Papan matohon shinannon hihxon yocaxonxon tah non Dios Yoshin mato betan jihuuenon hihxon rihbi non mato yocaxonai.

GALATABO **Galatabo qui Pablonen raanni joi**

Galacia mehabo qui Pablonen joi raanai

¹ Hea Pablo tah hen Papan raanti joni qui. Jaabaanbi shinanxon ta hea jahuen raanti hihti tsoanbi yohiyamanishqui. Papan jato shinanmaha yohiyamaribiquin. Noquen Papa Dios betan noquen Hihbo Jesucristonen yohihah tah hen jahuen raanti qui. Hihquipi bi Papan teehihmaribihah ja jaanbi hea yohinishqui.

² Hea manahi noquen huetsabo betan tah hen mato yohihi, Galacia mai meha noquen huetsabon.

³ ¿Papan shinanya man siripi jihueyamahin? Noquen Hihbo Jesucristonen shinan hinanah man siripi jihueyamahin?

⁴ Nea tiroma nete queha noque bilihniyanoxon ta noquen hohcha copi mahuanishqui, Jascahue noquen Papa Diosen jahah.

⁵ Hahxon tah min noque jai Papan hahqui jihuenahue.

Huetsa hahan hohcha potati joi yamahi, Cristona huesti

⁶ Papan ta matohon shinanxon Cristo raanxon Heen baquebo sca hihnahue janishqui. Jan jascajaquin hahxonah bi tah man histon jaa jenehax huetsa joi qui mahnejaquescai. Rahte tah hen jai, man jascaraia.

⁷ Man hahqui mahnetai ta Criston joi ma qui. Caibaan ta mato tiromajahiqui. Criston joi siri ta mato huetsa shinanmacatsihcaniqui.

⁸ Non mato yohini joi huetsajacatsihquin huetsa joi sca non mato yohihi jaiya, noque hani chihi perehinhnatai qui noque potanon. Papan yonotinin que bi huetsajaquin jan yohihiya, hani chihi perehinhnatai qui jaa potanon.

⁹ Mato yohixon bi tah hen hahquirihi yohihi: Non mato yohini joi huetsajacatsihquin huetsa joi sca mato yohihibo jaiya, hani chihi perehinhnatai qui Papan jato potanon.

¹⁰ ¿Jascajaquin hen mato yohihi tsoa queenaiya hen yohihi? ¿Jonibo queenai hin? ¿Papa queenai nan? ¿Jonibaan costanai quescari hea yohuanai nan? Jonibaan costanai joi yohinicahax cahen Cristo hahxonica jayamahan.

Criston Pablo jahuen raanti jani

¹¹ Hen mato yohinon, nincanahue, hea huetsabaan. Hen mato yohini joi siri ta jaabaanbi shinanax jonibo yohuanai ma qui.

¹² Noquen xenibo yohuanai ma ta qui, tsoanbi ta hea jaa joi haxemayamanishqui. Jesucristonbi ta hea yohinishqui, hea jahuen yohinica hihnon.

¹³ Judio joi nincanica hihparixon hen hahpahoni tah man chanihah nincanihqui. Jato hihti tiromajanoxon tah hen Papan baquebo chibanpahonihqui. Tiromaja tah hen jato japahoniqui, Papan joi nincacaibo queyocatsihquin.

¹⁴ Heen xenibaan joi hihti nincanicacatsihxon tah hen coshin teexon hehbe haxehibo hean muuinbabinnihqui, jato yohinicascanoxon.

¹⁵ Jascapahax bi tah hen pontenihqui. Heen maman hea bihnon ta Papa Diosen hea janenishqui, jahuen raanti hen janon. Hani sca hen jaiya ta hehon shinanxon hea yohinishqui, jahuen baque hehqui raanxon. Jaatian sca tah hen pontenihqui.

¹⁶ Hehqui cainxon ta hea yohinishqui judiomabo hean jahuen joi siri yohihi canon. Hea yohihah tah hen manataxma caniqui, tsoabi yohuanquihnoxon manayamaquin.

¹⁷ Caibo jahuen raantibo rihbi neateman jan yohini tah hen Jerusalen janin jisi caya-maniqui. Arabia main tah hen caniqui. Jano canish tah hen Damasco jema janin joribiniqui.

¹⁸ Noquen Hihbaan hea yohini pecaho quimisha bari hihquish tah hen Jerusalen janin sca caniqui, Pedro jisi. Rabe semanan tah hen hahbetan janiqui.

¹⁹ Papan raanti huetsa tah hen jisyamaniqui. Jacobo huesti, noquen Hihbaan jochica.

²⁰ Huishaxon hen mato yohihi ta hihcoinai siri qui. Hen tah hen quesayamahi. Papan ta honanihqui.

²¹ Jaa pecaho tah hen Siria mai janin caniqui, Cilicia mai janin rihbi.

²² Judea mai janinha noquen huetsabaan ta hea jisyamanishqui.

²³ Hea jisxonma ta joi res nincacannishqui, Noque tiromajapahonixon bi ta rahma Papan joi yohiscaiqui, jaa joi queyocatsihpahonixon. Hea pontéscai yohihah ta nincanishqui.

²⁴ Hea noquen Hihbaan teemascai honanax ta Hihti siri bi res tah min qui Papan, hihcannishqui.

2

Jahuen hahbe raantibo

¹ Catorce bari jano nichish tah hen Jerusalen janin caribiniqui. Bernabé rihbi ta hehbetan canishqui, Tito rihbi.

² Jano cahue noquen Hihbaan jaah tah hen caniqui. Nocoxon tah hen hean yohihi joi siri jato nincamaniqui, judiomabo hean yohipahoni joi siri Jenquetsahpa hin hihxon janohahbo yohiquin. ¿Yanca tee tee hen Jain? Jaamajaquin hean coshichahinxon yohiphonihquin hihxon tah hen jaton xenibo sca hahme rihbi yohinihqui.

³ Hehbetan Tito cahi bi ta jaton nahua hihqui bi judiocahinax noquen honantiyapahue hahyamacannishqui.

⁴ Moisesnin yohini quescajati ta jaiqui, Papan jihuetahbno janon tah non jato honantijati jai hih quecaso jai bi tah non jeen hahyamaniqui, ni pishcabi. Jaa quecaso ta noquen huetsabohicamahax hihcoxon noque quexenishqui, hahan honanti yamahiquin hihxon. Non tah non jato yohinihqui: Criston jihuetahbno janoxon tah non Moises nincati pishinyamahi, Cristo qui hinamehxon jaa huesti sca nincaquin, hahquin.

⁵ Criston joi coin huetsajayamahahbo hihxon tah non jato honantijati jeen hahyamaniqui. Criston joi siriya res man banenon, huetsa joi mato yohiyamahahbo.

⁶ Jerusalen janinhahaan ta noque mahuinyamahiqui, hapo quescapahboxon bi. Papan jisi ta jatihibi jascapah rahsi qui. Hea nincaxon ta jahua hashoan yohiti pishinyamahiya Jasca tah qui hahxon, hean haxemahi joi qui jahua bi hashoan tsamanyamacannishqui.

⁷ Jahua hashoan yohiti yohiyamacanquin. Judiobo yohinicica Pedro hihnon quescajaribiquin Judiomabo yohinicica hea hihnon Papan noque caisni jisxon, Man haxemahi quescajaquin haxemanahue hahcanquin.

⁸ Judiobo nincamaquin sirijanoxon ta Pedroyaxon noquen Hihbaan jato nincamahiqui. Jascajaquin rihbi ta judiomabo nincamanoxon heyaxon judiomabo nincamahiqui.

⁹ Hea rihbi Criston raanti joni hihqui jisxon ta Jacobo, Pedro, Juan, jaabo rahsi hapo quescapahboxon, Jascanonbonahue, judiomabo yohitannahue, noquen non judiobo yohinon hahcannishqui. Noque jascajaxon ta noque jomaquin sca hehbetan Bernabé jaton hahbe teenicabo copi noque mehuetannishqui.

¹⁰ Jerusalen janinha yomanahtaibo non shinanbehnoyamanon ta noque yohicanishqui, jaa res. Noquen rihbi tah non yanapanti queenxon jascajati yohinihqui.

Pablonen Pedro ponteni

¹¹ Jaa pecaho ta Antioquia janin Pedro jonishqui. Jan janoxon jaamajahiya tah hen ponte res yohinihqui caibaan nincanonbi.

¹² Jacobo janinhax huetsa hahbe judiobo nocorihyamahiya ta judiomabo noquen huetsabo betanbi Pedronen pinishqui. Nocoscaiboya ta judiobo hahqui yohuanmis hihxon jato piquihnyama sca janishqui, huetsa shinan hahcajaquin.

¹³ Texe judiobo rihbi ta hahbetanbi huetsapahcahinnishqui, jaton nahua betan pitimahicamahi. Bernabé rihbi jascari, shinan cahcoya sca.

¹⁴ Cahcotax ponteyamascaibo jisxon tah hen jatihibichin nincanon Pedro yohinihqui: Mia tah min judio hihquish bi judio quescayamahi jihuetai. Judio quescapahmaxon jahua copi sca min judiomabo judionon jato yohihin?

Jascapah rahi queyoyamanox manatai

¹⁵ Rabebi tah non judio qui. Noquen papabo cahen nincayosma nahuabo hihyamanish.

¹⁶ Moisesnin yohini quescabijaquin hahxon bi cah non jascaquin noquen hohcha potatimahi, Papan noque siri jisnon. Jesus Cristo qui hinamehxon non nincacoinaiya pari ta Papan noque siri jisiqui. Jaa copi tah non non rabebi hinamehni qui, jaan noquen hohcha sohuahiya Papan noque siri jisnon, Moisesnin joi nincacoinax jihuexon tah non hohcha potatimabiresai, tsoanbi. Judioxon bi tah non rabexonbi honanai.

¹⁷ Cristo huestichin ta noque hohcha sohuati hahtipahiqui, Papan noque siri jisnon. Judiomabo hohchayahpa hihqui quescra rihbi tah non hohchayahpabo qui, noque rihbi. Jaa copi non Criston ta noque hohchamahiqui non hihtihin? Hihyamabiresi rahan.

¹⁸ ¿Non jenenji joi non bihtihin? Joi siri jenenihxon pari, nincati joi copi.

¹⁹ Moisesnin joi ta noquen nincati joima sca qui. Jaa joi nincaquin jaxon tah hen hea hohchayahpa hihqui hen honannihqui. Hahqui muhauatah quescaxon tah hen jaa nincayamasca. Noquen Papa Dios qui sca tah hen jihuetai.

²⁰ Cristo betanbi tah hen muhuanihqui. Hen queenai quescayama sca tah hen jai. Cristo queenai quescascae, hahbetanbi jihuetai. Papan baque nincacoini tah hen jihuetai, jan hehon shinanax hea copi hinamehni honanax tah hen nincacoini jihuetai.

²¹ Noquen hohcha copi Cristo mahuani ta hani shinan qui. Papan noque hahxonai jahuama quescapi tah hen jayamahi. Moisesnin yohini quescajaquin hahxon noquen hohcha potati non hahtipahiya cahen Cristo yanca res mahuatan.

3

Cristo huesti qui hinamehti

¹ Honanmabo tah man qui, Galacia mehabon. Jatihixonbi nincacahbo tah non sirijaquin mato yohinihqui. Jesucristo noquen hohcha copi jihuin hueonah mahuani mato yohiquin. ¿Tsoan parana man huetsa joi sca bichin?

² Nea res hea honanmanahue: ¿Jenquetsahaxon man Papan yoshin siri bihniquin? ¿Moisesnin yohini quescajaxon nan? ¿Noquen Hihbo qui hinamehxon man bihyamaniquin?

³ ¿Yotihonanayama man Jain? ¿Papan yoshinya pehocohxon non mai mehabaan shinanai quescajaquin sca noquen shinan cajatihin?

⁴ ¿Papan mato yanca res hihti hahxonihquin? Yanca hahyamapahinon.

⁵ ¿Jahuen yoshin siri mato hinanxon hahan rahtetijaquin Papan mato hahxonai cahran? ¿Man jahuejahiya mato hahxoniquin? ¿Man Moisesnin joi chibaniaya nan? ¿Man nincacoinax noquen Hihbo qui hinamehtaiya nan? Hinamehti rahan.

⁶ Papan Abraham yohini quesa tah qui. Abrahanen nincacoinaiya ta Papan siri jisnishqui.

⁷ Nincacoinaibo ta Abrahanen baquebo qui. Jaa cah man honanai.

⁸ Nincacoinaiya jatihibi jonibo Papan siribo jisyaxihqui ta neateman jaan yohinishqui. Abraham yohiquin: Min nincacoinai quescapahiya tah hen jatihibi nahuabo hahxoncoinyaxihqui hihqui jan huishani joi.

⁹ Jaa copi honannahue: nincacoinaiya Abraham hahxonquin ta texe jonibo rihbi Papan hahxonihqui, nincacoinaiboya.

¹⁰ Papan jato siribo jisnon hihxon Moisesnin joi chibaniabo ta jaan hahxonaiboma qui; jaabo ta jaan casticanaibo qui. Huishani joi jai quesa tah qui. Nea quirica janin jai joi jatihibi tah man nincatih, hahxonon. Nincati pishinaibo jatihibi tah hen casticantih hihqui jahuen huisha.

¹¹ Moisesnin yohini quescajahibo tsoabi Papan siri jisyamahi ta huetsa huisha joi janin jaiqui, hahan honanti bi res: Papan siri jisi joni ta nincacoinax hinamehtax jihuetai qui, hihqui.

¹² Moisesnin ta hinamehti yohiyamanishqui. Nea joi nincacuin tah man hahqui jihuetai hih ta janishqui.

¹³ Moisesnin yohini casticanti noque qui paquepanan ta noquen casticanti bihxon Criston noque paxajanishqui. Huishani joi jai quesa: Jihuin hueonah ta casticana rahsi qui, hihqui.

¹⁴ Jesucristonen noque hahxonni copi sca ta jan Abraham yohini quescajaquin juidomab Papan siribo sca jisiqui. Jaa copi tah non nincacoinax hinamehxon jahuen yoshin sca bihresscái, jan hinantijani.

Cristoyahpabo res Papan hahxonai

¹⁵ Non hinantijaquin hahcai quesa tah qui, heen huetsabaan. Mahuaquin noque hinantijahax noquen huetsa mahuatipi pecaho tah non tsoanbi jan hinantijaquin yohihipi joi huetsajayamahi, jahuabi tah non jaa joi qui rechiyamaribhibi.

¹⁶ Papan ta Abraham jahuen baqueyabi hinantijanishqui. Hinantijaquin jan yohihi ta Miin baqueyabi tah hen jaa rahsi mia hinanyaxihqui, hahnishqui. Miin baqueboyabi hih ta jayamanishqui, hicha yohiyamaquin. Huesti res, Miin baqueyabi, hihqui, Cristo yohihi.

¹⁷ Hinantijanixon ta cuatrocientos treinta bari pecaho Moises sca huishamaxon jaa huisha join jan hinantijani joi Papan huetsajati hahtipahyamanishqui.

¹⁸ Moisesnin joi cananquin hahcajaquin jonibaan jahuen jihuetai bichiya cahen jan hinantijani quescayama sca jaquehahna. Jascabi hinanresti cahen jan Abrahan yohinish.

¹⁹ ¿Jascaraiya jahua copi sca Moises huishamanishquin? hih ra tah man jai. Jaa joi ta hahan honanti qui, jenquetsahpa tiromanicahbo non quin non honannon. Jahuen quiquin baque jonon caman res jaa joi nincacahbo ta Moises huishamanishqui, jan hinantijani jahuen baque noconon caman. Jahuen yonotiboyaxon ta Moises nincamanishqui, yohinichaxon Moisesnin sca jahuen caibo yohinon. Hicha yohihibo jaiya ta yohuanxonnicahihquitihiqui.

²⁰ Huestichin yohihiya cahen yohuanxonnicapishinyamascan. Hinantijaquin ta Papa huestichin yohinishqui, jaa copi tah non yohuanxonnicapishinyamascaí.

Jato haxemanoxon Moisesnin yohini

²¹ Papan hinantijati joiya Moisesnin joi bahi cahchinanicama jayamahiquin hih sca rah tah man jai. Hihyamahi rahan hih sca tah hen jatihi. Moisesnin huishani joi hahan jihuetai joi hihquiya cah non jaa joi nincquin noquen hohcha potati hahtipahan.

²² Jaa join tah non honanai, hohchayahpabo rahsi non hihqui. Jaa copi ta Jesucristo qui hinamehtaibo rahsi qui jan hinantijani Papan hinanyaxihqui, jaa nincacoinaiboya.

²³ Jesucristo qui hinamehti noque yohiyamaparixon ta Moises pari Papan huishamanishqui, jaa joi jai quescabijahi non jihuemon. Jasca tah non japhoniqui, noquen Hihbo qui hinamehti noque yohiscanon.

²⁴ Jaa copi ta Moisesnin joi noque hanijaquin hahcajaquin quescanishqui, non Cristo sca bihnon. Hahqui hinamehtax hohchajomabo sca Papan noque siri jisnon hanijaquin hahcajaquin noque honanmaquin.

²⁵ Ma hinamehscax tah non hanijanica pishinyamasca.

²⁶ Jesucristo qui hinamehtax tah man Papan baquebo rahsi qui.

²⁷ Cristo qui nashimaha tah man Criston sahuemaha jahuenehbo rahsi sca qui.

²⁸ Judioboya nauabohi non hihyamasca. Patoroyahpaboya patorojomabo hihyama sca jai. Haiboboya bebobo hihyamasca. Jatihibi scah tah man Criston yoraya qui, jaa huesti.

²⁹ Cristonah hihquish tah man Abrahanen baquebo sca qui. Abrahanen baquebo man jaiya cahen mato hinantijanixon Papan mato hinantihi.

4

¹ Non japhonni ta patoronen jahuen baque hanijati yohihi quesa qui. Baque pishca parihax ta jahuen papan joni quescapah qui, jahuabi hihboyamahi. Jahuen papan jahuaborabo jatihibi hihboyahnoxihqui bi jahuabi hihboyamaparihi.

² Haxemanicahton haxemahah ta haxehiqui. Hanijanicahton yohihah, nincquin, jahuen papan yohini nete noconon caman.

³ Jascapahbo tah non japhoniqui. Cristo qui hinamehyamaparixon tah non baque pishca hahcajaquin noquen nincati joibo nincapahonihqui, haxehax noquen xenibo hihni quescari jihueyahnxon.

⁴ Non jascapahbo jihuetai bi ta jahuen raanti nete nocosaiya jahuen baque Papan raannishqui. Jaan raanah ta haibaan baquexo sca cainnishqui. Moisesnin yohini quesa ta jaxonnishqui.

⁵ Noque ta hahxonnishqui, Moisesnin joi nincuai non jihueyamascanon, Papan baquebo sca.

⁶ Jahuen yoshin sca ta noquen jointi janin Papan jananishqui, jaan yohanmaha non Papan hihnon, noquen joinbi. Jaa copi honannahue, Papan baquebo man hihqui.

⁷ Hinabo tah man hihyamasca, Papan baquebo sca. Jahuen baquebo jaan mato hihmahah cah man jahuen baqueboxon jan hinantijani man bihtihi.

Shinan rabeyahpabo qui Pablonen masa shinanai

⁸ Noquen Papa Dios honanyamaparixon tah man huetsajaquin shinapahonihqui, huetsabo dios hihqui man shinanah bi tah man jaamajapahonihqui.

⁹ Papa Dios tah man honanscaniqui. Hashoan ponte yohuanah bi hen Papan ta mato honannishqui, hih hen jatihi. Jascapahboscaxon, jenquetsahpahi man japhonni quesa sca hahan hanitima shinanbo man bihribicatsihquin? Jenquetsahpahi man yanca res yohuanai joi chibanhobicatsihquin?

¹⁰ Netebo, hoxnebo, baritianbo, jenetianbo, jascapahbohya tsinquinicabo tah man qui Papan noque sca jisnon hihquish tsinquit.

¹¹ Jaa copi tah hen tiromajaquin shinanai. Yanca bi res cahran hen Papan joi mato nincamaniqui hih tah hen jai.

¹² Mato tah hen hihi yohihi, heen huetsabaan. Hea hihqui quescanahue. Mato quescapah tah hen janiqui. Hea jano cahiya tah man nincaniqui.

¹³ Hisinax copi tah hen mato qui banenihqui. Hisinax banexon cah hen Papan joi sca mato nincamani.

¹⁴ Hea hisinyahpa que bi tah man hea rahinxonma Johue hahniqui. Hea tenexon tah man Papan yonoti yohiquin hahcajaxon hea Johue hahniqui. Jesucristo yohiquin hahcajaxon hea sirijaquin bihquin.

¹⁵ Hen yohihah tah man hihi jenimaniqui. Hahtipahxon tah man maton bero tsecaxon hea hinanquehannihqui. Jahuahua copi sca man shinan huetsajahin?

¹⁶ Hen mato pontejaquin yohihah man maton rahui sca hea jisin?

¹⁷ Mato tiromajanoxon ta Maton tah man sirijahi hihcaniqui. Bahi xehpoquin hahcajaquin ta mato mayamacatsihcaniqui, huetsa bahi man chibannon hihxon.

¹⁸ Sirijahiton yohihah ta siri qui, Mian tah min sirijahi hahquin. Jaa ta jatihibi tian yohihah siri qui, heen baquebaan, hea mato janin hihquiya, hen janohihyamahiya, jascarihbibi.

¹⁹ Man Criston shinanbihnon tah hen hihti queenai, heen baquebaan, hisini quesca tah hen jai.

²⁰ Jenquetsahpa shinanya man quin hihxon tah hen masa shinanai, heen jananbi sca mato yohinoxon hea janohihpahinon.

Agarya Sara

²¹ Moisesnin yohini joi chibancatsihxon hea yohinahue. ¿Nea jahuen huishani joi man honanyamahin?

²² Abrahanen ta rabe baque janishqui, huetsa cahen jahuen xobohoxon teexonnicaah haibo quiyah, huetsa cahen jahuen haibo quiyah.

²³ Huesti cahen jaanbi jahuen hina haibo qui baquejanish. Huetsa cahen jahuen haibo quiyah, jaa jayaxihqui Papan yohinh.

²⁴ Jaa haibo rabe janí quesca ta rahma jaibo qui. Rabejaquin Papan yohini quesca tah qui. Jan yohimenoni ta Sinaí mahchi janinxon noquen xenibo yohinishqui, hinapan baquebo sca jaábo. Agar ta jaa hiná qui, jahuen Jane.

²⁵ Agar ta jaa Arabia mai janin Sinaí mahchixon yohini joi quesca qui, rahma jai Jerusalen quesca. Jahuen baquebo ta hinabo qui, jaton mama quescapahbo.

²⁶ Huetsa ta quiquin Jerusalen qui, hinama, jaa cahen noquen mama.

²⁷ Huishani joi jai quesca tah qui:

Baqueyosma ta baque bilyamanish bi hihti jenimascaiqui. Jahuentianbi camitaxma bi ta jenima behuahihqui. Baquejoma hihnish bi ta hicha baqueyahpascaiqui, beneyahpa haibo muhuimbahinquin

hihqui jaa huisha joi.

²⁸ Mato tah man Papan hinanni baquebo qui, jan hinantijani. Isaac quesca tah man qui, hea huetsabaan.

²⁹ Jaa hina haibaan baquebaan neateaman Dios Yoshiman baquebo tiromajapahoni quescajaribiquin ta rahma jacaniqui.

³⁰ ¿Jaabo yohiquin jahua jan Papan janishquin? Jaa baqueyabi hina haibo potahue, hinapan baquen ta hinantijani baque betanbi heen hinanti bihtimahiqui, hahquin.

³¹ Jaa copi honannahue, hea huetsabaan. Hinapan baquebo tah non hihyamahi. Quiquin haibaan baquebo tah non qui.

5

Man queenai quescarijihuenuhue

¹ Hinabo non hihyamascanon ta Criston noque piconishqui. Papan noque siribo jisnon tah non Moisesnin yohini quescajatihi hihxon mato hihboyahpabo hihmarihbicanmis. Hiná tejoquin hahcajaquin mato bihcannis. Jato nincayamanahue.

² Hea Pablonean tah hen mato hihti yohihi: Papan mato siri jisnon hihxon hahan judio honantiyahpajaquin maton yora man honantijahiya ta Criston mato jahuabi hahxontimahiqui.

³ Jascajaquin hahan honanti bichibo jatihibi tah hen sirijaquin mato yohihi: honantiyahpaxon tah min Moisesnin yohini jatihibi sca min hahtihi, jahuabi pishinmayamaquin.

⁴ Papan mato siri jisnon hihxon Moisesnin joi chibanax tah man Cristojomabo sca qui, Papan mato hahxonni tah man yamascai.

⁵ Noquen tah non hinamehxon jan noque siri jisi non honanai. Jahuen yoshin siripan noque manahah tah non tenehi, jan noque hahxontijani hihti jiscatsihquin.

⁶ Jesucristo qui hinamehtaiboxon tah non nincacoinxon joni huetsahon shinanti jai, jato betan yanapanhanani. Judio honantiyahpa jaah ta jahuajoma qui. Jaa honantijoma jaah jahuajoma rihibi.

⁷ Siripi tah man nihpahoniqui. ¿Tsoan pantehah man joi coin nincayamasca?

⁸ Jaa nincacointi shinanya man jai ta noquen hihbaan mato hinanyamahihqui. Mato quenanixon ta jascapah hinanyamahihqui.

⁹ Hichatahma hahan paan soohihmati niahah tonco moanman soohihqui quesca tah man jai.

¹⁰ Hen mato yohihi quescabijaquin tah man shinanxihi qui. Honan tah hen jai. Criston ta mato yanapantihiqui. Mato jatsanjabo ta Papan casticayaxihqui qui. Tsoabo rah ta qui.

¹¹ Judio honantiyahpati ta jai qui hih roqui hea jai. Jascari yohuanpahonish bi tah hen jascayamascai. Jaa copi ta hea tiromajacaniqui. Honantijati yohixon tah hen Cristo qui hinamehti yohiyamaquehanai. Tsoabi ta hehqui sinayamaquehanihqui.

¹² Mato honantijacatsihquin jatsanjahibo jaabobi xatehintax jobojomascapahinon hih tah hen jai.

¹³ Moisesnin joi nincaqui jihueta ta Papan mato yohiyamahihqui. Man queenai quesca jihueta ta yohihihqui, heen huetsabaan. Man queenai quescarax jihueta bi man hihpahoni quescayamanahue, mai mehabaan shinanai quescayamahi. Joni huetsahon hihti shinanxon, joni huetsa yanapanquin hahxoncoinnahue.

¹⁴ Papan huishani hani joi ta nea qui: Miin hahbe jihuetai jonihon shinanhue, min miabi shinamehtai quescajaquin, hihqui. Jaa joi huesti nincaxon hahxoncoinquin tah non Moisesnin yohini jatihibi hahresscrai.

¹⁵ Yohinahnen hahcajaquin man joni huetsa jamis joni huetsa piquin xehahihnihax man queyocahinhmis.

Rabe shinan:

Dios Yoshimana,
mai mehabaana

¹⁶ Papan yoshin siripan mato shinamahi quescanahue. Jaatian tah man mai mehabo queenai quescayamascatihi.

¹⁷ Mai mehabo queenai quescati ta huetsa qui, neaho jahui. Dios Yoshin queenai quescati ta huetsarihbi qui, jaho cahi. Noque nininanbehcoinai shinanbo tah qui. Huetsa, jonibaana. Huetsa, Dios Yoshimana. Jaa copi tah man man shinanai quescajacatsihqui bi huetsan ninihah man hahyamascai.

¹⁸ Jaa copi ta Dios Yoshiman mato shinamaha man Moisesnin huishani nincati pishinya-mascai.

¹⁹ Mai mehabaan shinanbo ta honantih bi res qui: tsiniti, rishtaya yohuanti, huetsa haibo betan hihresti,

²⁰ yoshinbo qui samati, yobeti, sinati, rehtenanti, yohuashihti, sinajati, notsiti, huesti shinanya hihtima, joni huetsa qui rainyamatii,

²¹ caibaan jahuaborabo bichinti, joni rehteti, pahenti, pahenax cahtimahti, texe jascapa shinanbo rihbi. Hen mato yohini quescajaquin tah hen mato yohirihbiscrai, jascapahbo shinanya ta Papan jihue janin hihcotimabiresihqui.

²² Dios Yoshiman hinanai shinanbo ta nescapahbo qui: joni huetsahon shinanti, jenimahi jihuetai, joni huetsa betan coincoini jihuetai, teneti, sirijaquin yohuanquihnti, caibo hahxonti, nincacointi,

²³ sinaxonma honaxonbi yohiti, yobacahinti. Jascapah ta siri qui. Jascatima joi ca jahuenbi yamahi.

²⁴ Criston joniboxon tah non rehtequin hahcajaquin noquen mai meha shinanbo potani-hqui, mai mehabo queenai quescayamascai, mai mehabaan shinanai quescayamascai.

²⁵ Dios Yoshiman noque jihuemaha, jaa queenai quescari sca jihuenaheue.

²⁶ Shinanihcamaxon paranaibo hihyamascanahue, joni huetsa qui rainyamayamascai, huetsa jonin jahuabora jisish jahuena hean bihpahinon hihyamascai.

6

Yanapanhanannahue jato jai

¹ Jaamajahax hohchataiton noquen huetsa meraxon, Dios Yoshiman shinamahiboxon honaxonbi yohixon pontenahue, sirijaquin yohixon. Coiramexon yohinahue, mato rihbi man paquemis.

² Hiacaibo yanapanquin hahcajaquin noquen huetsabo teneti yanapannahue, tene-hahbo. Jascajaquin tah man Criston yohihi quescajatihi.

³ Jahuabi hihyamahax bi hihti shinanya hpa hihqui shinanax tah non paramehscrai.

⁴ Jenquetsahpa hin hihxon miin jihue jise. Jaatian tah min hicha tahni sca shinan jaax, hen tiromaphoni quescayama sca tah hen jai hih min jatihi. Caibo tah hen muhuinai hih tah min jatimahi.

⁵ Jatihibichin papiquin hahcajaquin tah non tenetih noquenahbi.

⁶ Papan joi mato yohihi joni yanapannahue, piti siriboya jahuaborabo jatihibi hinanquin.

⁷ Paramehyamanahue. Jan yohini quescabijaquin ta noquen Papan jaiqui: man nin-cayosmamis, Non bananah quesa tah non jai.

⁸ Non queenai quescajaquin mai meha shinanbo bananixon tah non tiromabo bihtihi. Dios Yoshin queenai quescajaquin jahuen shinan sca bananixon tah non queyoyamanox manati bihtihi.

⁹ Caibo sirijaquin hahxon jatsanyamanahue. Non yosmayamahiya ta jaa queenai tianbi copiquin sca noquen Papan noque sirijaquin hahxonrihbiyahqui.

¹⁰Jaa copi hahtipahxon tihibi joni huetsa hahxonquin yanapanannahue. Noquen huetsabo hashoan hahxonquin yanapanquin.

Queyonoxon jan hihti yohihi

¹¹Heanbi tah hen nea huishahi. Haniboaquin hen huishahi jisnahue.

¹²Jaton jonibo man janon ta mai mehabaan mato hahan judio honantiyahpati yohicanniqui. Papan noque siribo jisnon ta mahuaquin Criston hahxonnishqui hihti bi ta judiobo jato qui sinamis hihxon, honantiyahpati yohicaniqui.

¹³Jaa honantiyahpabaan ta Moisesnin yohini quescajayamacaniqui. Jaabo tah non honantijatanai hihnoxon res ta mato yora honantijacaniqui.

¹⁴Mahuakin ta noquen Hihbo Jesucriston hea hahxonnishqui. Jaa huesti copi ta Papan hea siri jisiqui. Huetsa joi ta yamabiresi qui. Criston hea hahxonah tah hen mai mehabaan shinan queenyamabiresai, muhuatahbo quescari. Hea rihbi jascapa shinan qui muhuatah quescas, hehqui jotimascai.

¹⁵Papan jisi ta judio honantiyahpabo jahuen siriboma qui. Jaa honantijomabo rihbi jahuen siriboma. Behna shinanyahpa jonibo res ta jaan siribo jisiqui.

¹⁶Behna shinanyahpahax jihuetaibohon Papan shinannon, jan jato hohcha sohuanon, hih tah hen jai, jahuen quiquin israelibo yohihi.

¹⁷Moisesnin huishani joi copi hea yocayamascanhue, hih tah hen jai. Heen yora janinbi tah hen hahan honanti hicha jai. Jesusen joi hen yohihi copi hea rishquinhbo nabaya tah hen qui.

¹⁸Noquen hihbo Jesucriston shinan maton jointi janin janon tah hen yocaxonai, hea huetsabaan. Jascari rahan.

EFESIOBO

Efesiobo qui Pablonen raanni joi

Efeso janin jihuetaibo qui raanti

¹ Noquen Papa Dios queenaiya ta Jesucristonen hea yohinishqui, jahuen raanti hea Pablo janon. Jahuen raantixon sca tah hen mato yohihi, ¿Man jascabijaquin Cristo chibanyamahin, Criston baquebon?

² Hashoan sca noquen Papa betanxon noquen Hihbo Jesucristonen mato hahxon-rohayamahiquin hih tah hen jai, hea huetsabaan. Jaan mato sirijaquin shinamayamahiquin hihxon tah hen nea joi pishca raanaai.

Criston noque hahxoncoinai

³ Noquen Hihbo Jesucristonen Papa ta hihti siri qui hihnahue, heen huetsabaan. Jahuen naihoh queha shinanyahpabo sca non janon hihxon ta noque hihti hahxonnihqui. Noque hahxonquin ta jahuabi cahneyamahihqui, non Criston baquebo quen.

⁴ Naiyahpa mai hahriyamaxon bi ta noque caisnishqui, non Cristo bihyaxihqui honanxon. Ponte siribo non janon hihxon ta noque caisnishqui, jaan jisi jahuabi tiroma non yamanon.

⁵ Non jariyamahi bi ta noquehon hihti shinanxon yohinishqui jahuen baquebo sca non jayaxihnon. Hahmebi shinanax queenxon copi ta jascajanishqui. Jesucristo bichish jahuen baquebo sca non janoxihnon.

⁶ Non Cristoyahpa quen jan noque hihti hahxonai jisish ta Papa Diosen ta hihti coshi shinanyaxon jato hahxonresiqui jayaxihcainhqui. Jascari jaahbo hihxon ta Papan noque caisnishqui, hea huetsabaan.

⁷ Noque copi ta jahuen jimi potanishqui, noquen hohcha sohuanoxon. Non tiromani que bi ta Cristo non binih quen Papan noque siri jisiqui. Criston noque jascajaxonai copi ta noquehon shinanxon non tiromani Papan shinanyamascaiqui.

⁸ Jatihibi honanyaxon ta jan honanai quescajaquin jascapahbojaquin noquen Papan noque hihti hahxoniqui.

⁹ Jascajati queenxon jan noque huesti yoraja sca jayaxihqui ta tsoabi nincamayamanishqui. Tsoabi nincamayamanixon bi ta noque sca jaan nincama sca jaiqui, jan shinannihbo non nincascanon hihxon.

¹⁰ Hen jato caisnixon haxemabonanixon sca jaton hohcha sohuaxona sca ta huesti yora sca jaticaniqui. Naihoh quehaboya nai naman mehabo huesti yora sca janon hih ta janishqui, Cristo huesti sca jatihibichina janon noquen hihbo.

¹¹ Non jarí janonma bi ta Papan shinannishqui, jaanbi jan shinanai quescabijanicaxon noqueyaxon jahuen coshi shinan jismati shinanquin.

¹² Non jascahiya ta Papan yohinishqui, noqueyaxon jahuen coshi shinan jismati.

¹³ Maton rihbi sca tah man Cristo betan jihuenoxon nincacoinnihqui. Maton hohcha copi ta Cristo mahuanishqui hihcoinai nincaxon tah man Cristo bihcoinnihqui. Man nincacoinaiton ta jahuen yoshin siri rihbi mato hinanxon mato honantijanishqui, Criston-abho man hihqui man honanscanon. Jan jascajaquin noque qui Dios Yoshin hinantihi ta neateman noque yohinishqui, joi huishamaquin.

¹⁴ Jahuen yoshin siri jan noque hinanscái quen tah non noquen Papa betanbi non jihueyaxihqui non honanribibi. Tsoanbi noque jahuen yoshin bichintimahi honannahue. Cristo noque bichi joyaxahnnon caman tah non jaaya hihtihi. Nea hen mato yohihi joibo honanax, noquen Hihbo ta hihti siri qui hihqui jihuenahue.

Shinan jato hinanxonhue Papan, Pablonen jai

¹⁵ Jan noque hahxonai copi tah hen mato yocaxonai, heen huetsabaan. Man noquen Hihbo Jesus nincacoinxon jahuen jonibo jatihibi man siribojaxonai yohihihi tah hen Hahxon tah min jato jai Papan hih hen jai.

¹⁶ Jascabibi jascaxon tah hen mato jaayocaxonai, hea huetsabaan.

¹⁷ Papan Dios, mia tah min noquen Hihbo Jesucristonen Papa Dios qui. Mia tah min Shinan Hihbo qui. Miin coshi shinan jato hinanxonhue, Papan. Shinancoinya jaahbo jato hinanpaquehue. Hashoan sca mia honanbonahaho jaton jointi janin miin shinan siri niaxonhue. Mia honanbonahi jihuetaibo jato hinanxonhue Papan, hih tah hen jai, mato yocaxonai.

¹⁸ Papan mato caispaqueni quen jenquetsahpabo sca man jaa janin jayaxihquin man honannon hihxon tah hen mato yocaxonai, hea huetsabaan. ¿Nai hoque jahuen baquebo

jano janon hihxon Papan mato bexojaxonai jahuentiho siri quin, heen huetsabaan? Man honannon hihxon tah hen mato yocaxonai.

¹⁹ ¿Noquen Papa jahuentiho coshi quin? Jahuen shinan jahan jan rahma mato hahxonai jahuentiho coshi quin? Man honannon hihxon tah hen yocaxonai.

²⁰ Jahuen coshin ta Cristo teehihmaribinishqui. Jaa huennihhniribixon ta naihoh sca jaa mécayahoh, janoxon jatihibi hihbojati janin jan tsahonon, jano jaa tsahomaribinishqui.

²¹ Jaa huestichin sca ta jatihibi yohan hihbo, jatihibi quiquin yoshin, jatihibi hapohhuan, jatihibi yonomis, jatihibi res jaan jato huinonihqui hashoan hihbojaquin. Jatihibi ta muhuinnihqui, naihoh quehabo, nai nequebihahbo rihbi. Rahma jaibo, jayaxihquibo rihbi. Jaa muhuinnica ta yamahihqui.

²² Jatihibichin hihbo jahue hah ta Papan jaa janishqui. Noque jahuen baquebo rihbi sca janon ta yohinishqui, Cristo sca noquen hihbo hihnon.

²³ Noque tah non Criston yora sca qui. Jatihibi tian jatihibi janin hihnicahax bi ta yorayahpa rihbi qui, noque cah non jahuen yora.

2

Noquehon shinanxon Papan jihuemahi

¹ Man tah man jirijomabo japahoniqui, hea huetsabaan, maton hohchapan mato rehte-hah mohitahpamabo Papan mato jisquin.

² Texe hihqui quesvari tah man tiromahi janiqui. Quiquin yoshiman jihuetauhbohax tah man jan queenai quesvari man japahoniqui. Tiroma shinanbo hinanpaquenecaxon ta nincayosmabo qui hinanquin mato qui rihbi jascapa hinannishqui, man bihresnon.

³ Noque rihbi tah non jascapaho rahsi japahoniqui nincayosmabohax honammbobohax yohina quescapahbo japahonihqui. Queenax quesvari tah non tiromapahoniqui. Shinanquin bi tiromajaquin shinanribiquin. Texe hihqui quesvari tah non jascapahbohax non Papan sinatahabo janíqui, jan casticanyaxihquibo.

⁴ Non jascapahbo hihqui bi ta shinanyahpaxon noquehon hití shinanxon hahxonquin Papan noque hahquirihbi teéhahmanishqui.

⁵ Noqueyabi hahquirihbi Cristo teehihmanixon ta noque mohitahpabo sca janishqui, Cristo betanbi non jihuenon. Jahu copi mato hahxontimahi bi ta queenxon res mato queyóyamanox sca manataibojahiqui, heen huetsabaan, man jirijomabo japahoni que bi.

⁶ Noqueyabi Jesucristo teehihmanixon ta noque yohinishqui: Naihoh sca cahax hahbetanbi tsahopaqueñahue. Jahuenaaho sca tah man qui hahquin noque yohiquin.

⁷ Jan noquehon hihti shinanai ta jatihibi jayaxihquibo rahsichin honanahbo hihxon noque jascajaxonihqui. Non Jesucristonahbo copi ta jascajaquin jan noque hahxonihqui. Jatihixonbi honanahbo hihxon rihbi ta jascajaquin noque jihuemanishqui.

⁸ Jahu copi hahxontimahi bi ta queenxon res mato queyoyosmabo hahxonihqui. Man nincacoinata bi jascajaxonihqui, hea huetsabaan, man siripi janí que ma bi.

⁹ Man sirijaquin hahcái copima ta mato queyoyosmajañahiqui, heen huetsabaan. Jaa copi tah man Hen sirijaquin hahcái copi ta hea queyoyosmajañahiqui hih man tsoabi jatimahi.

¹⁰ Papan jonijanibo tah non qui, hea huetsabaan. Joni huetsahon shinanxon yanapanmisbo non janon hihxon ta jascapa shinan noque neateman hinantijanishqui. Jayaxon non joni huetsa hahxonon jihueman sca ta Jesucristonahbo janahue hahquin noque jonijanishqui.

Criston hahxonajahuen jihuetauhbo sca

¹¹ Shinannahue, hea huetsabaan. Noque judiobaan xohta yamanica Israel ta Papa Diosen yohinishqui, jahuen chini baquebo caixon jahuen joi sca chibannicabo sca non janon, jahuen honantiyahpahaz noque rahsibi non jihuuerihbinon. Jaton mequeman sca noquen papabaan noque honantijahah tah non jaa honantiyahpaboxon mato yohihi nauhabon non mato japahoniqui, maton yora janin jaa honant yamanah quen.

¹² Cristojomabo tah man japahoniqui. Noquen caibomahax tah man noquen hihqui-hintima japahonihqui. Jahucaisai joni jan noque qui raanxonti Papan yohinib bi tah man shinanyamapahonihqui. Ni jenquetsahax bi Papa qui catimabo tah man japahoniqui, Papa Dios honanyamahibo.

¹³ Hocho jihuetaibó quescapahbonish bi tah man jascayamascaí. Muauaxon Criston mato jihuemaní quen tah man nea pishca sca jai, Papa janin sca.

¹⁴ Criston ta noque rabebi raejanishqui. Moisesnin noque yohini quescajaya man jani quen tah non mato jistahihmapahonihqui. Non jascapahbo jani que bi ta Moisesnin yohini quescajaya Criston sirijaquin hahxonishqui, non hahtipahyamahi bi, hea huetsabaan. Yorayahpahaz main jihuexon ta hahxonishqui, non hahyamascanon. Non rabe jonibo japahoni que bi ta noque huesti yoraja sca janishqui. Jema naponbi chique jai potojaquin

hahcajaquin ta non janoo huesti jihuenon Moisesnin noque yohini joi noque hahxonquin jaa joi queyoxonnishqui noquen hahtima sca jaa joi janon.

¹⁵ Behnabohax huesti yora sca non janon hihxon ta hahxonishqui, rabebi yorabo noque huestijaquin, jahuenah sca. Jaa copi tah non sirijaquin sca shinanai.

¹⁶ Noquen shinan noque rabebi pontequin ta jahuen Papa janin noque rabebi hiyahanon noque copi mahuanishqui. Mahuaquin ta hahan nincayosmati shinan jaan noque sohuaxonnishqui, hea huetsabaan.

¹⁷ Jascajaxon ta mato hocho hihquibo nincamahiqui man shinanquin sirijabahinnon. Hochoma hihquibo rihbi ta nincamarohahiqui, noquen rihbi non shinanquin sirijabahinnon.

¹⁸ Dios Yoshinyaxon ta noque hiohiqui, rabebi jonibo non Papa janin sca hihnon.

¹⁹ Jaa copi tah man noquen nahuaboma sca qui, hea huetsabaan. Noque rihbi maton nahuaboma. Papan jihuetahbbo sca tah man qui. Mahbe nincacoinaiboxon tah non mato yohihi, noquen caibon hahquin.

²⁰ Shinan hihboxon ta xobojaquein hahcajaquin Jesucristonen noque huesti yorajahiqui, hea huetsabaan. Noque ta bihresyamahihqui. Jahuen joi yohinicaboya jahuen raantibo raanxon ta joi nincamaxon noque tsiniquihiqui. Hahqui xobojati hahcajaquin hahqui pehi pohentibo, hahan xehuatiibo hahcajaquin noque tsiniquiqui.

²¹ Jaya sca sirijaquin xehuahihnbahinquin hahcajaquin ta huesti yorajahiqui. Non hichahi bi huesti yora janin noque jatihibi niaquin, jahuen jihuetahbbo sca. Jaa rihbi noquen Hihbo hih.

²² Mato rihbi ta jano niahahiqui, hea huetsabaan. Jahuen yoshin siri jano jihuenon ta mato jano jihuetajhiqui.

3

Judiomabo yohinica Pablo jai

¹ Jaa copi tah hen mato yocaxonai, hea huetsabaan. Mato heen caibomabo hen Jesucriston joi nincamani quen ta sipo xoboho hea tsahoncannishqui. Tsahonnihibo ta rahma caman hea Pablo neno tsahotai.

² Matohon jan hihti shinanai yohinica hen janon ta Papan hea yohinishqui. Jaa rah tah man honanscrai, caibaan yohini.

³ Neateaman jato janibijaquin yohiyamanihxon bi ta Dios Yoshiman hea honanmascaiqui. Jaa tah hen pischa yohi sca jahahqui, nea huishaquin.

⁴ ¿Papan raanah jahuejahi Cristo jonishquin hen honanyamahishinan man Jain? Nea hen huishahi jisxon tah man hen honanbiresai man honanbonatihi.

⁵ Noque jahuen raantiboya jahuen joi chaninicabo ta rahma tahni honanmascanishqui. Jahuen Yoshehiri siriyaaxon noque honanmaquin. Neateaman ta jascajayamanishqui. Neateaman ta jihuetahbbo texe res honanmapahonishqui, hea huetsabaan.

⁶ Papan jihuetahbboxon ta jahuen jihuetai janin jihuetai judioobaan shinannishqui. Shinanxon bi ta jaton caibomabo rihbi jaton hahbe jihuetahbbo jatih shinanyamacanpahonishqui. Jaton Papa Dios maton Papa rihbi jatih shinanyamacanquin. Papan jato hahxontihi shinanxon bi jan mato hahxontimahi shinancanquin. Jesucriston joi nincacoinax man hahqui hinamehtai copi mato rihbi man Papan baquebo hiltihai ta shinanyamacanpahonishqui.

⁷ Jahuen joi nincamanica hen janon hihxon ta noquen Hihbaan hea yohinishqui. Jatohon shinanxon Papan jato hihti hahxonai yohinica mia jahue hahquin ta hea tee hinannishqui. Heanbi shinanxon hen jahuejati hahtipahyamahi bi ta jahuen coshi shinanyaxon jaan hea teemahiqui.

⁸ Hean shinanah texe nincacoinaibo hashoan siri que bi ta hehon shinanxon jaa tee hea hinannishqui. Jahuen shinan hihti caibohiya tah non shinanhantannoxon caman toponxon bi jahuentihi shinanya hin hihxon non toponquin queyotimahi. Hea jahuama que bi ta heen caibomabo yohiti tee hea hinannishqui, jahua Papan shinanihquin honanahbo.

⁹ Nai, mai, neno jaibo rihbi jonijariyamaxon ta jan hahyaxihquibo jatihibi Papan shinannishqui, Cristoyaxon matoya noque huesti jonijati shinanquin. Jascajati shinanihxon ta jato yohipahonishqui. Yohiquin bi ta texejanishqui. Rahma pari ta jaa jone joi noque sirijaquin yohixon honanmascanishqui, hen sirijaquin yohiscanon hihxon.

¹⁰ Noque jahuen caisahbo ta naihoh queha yoshin coiman jisiqui, jahuen sontaro hapobo betanxon. Jaabaan jisxon honan sca jaahbo hihxon ta Papan hea joni huetsa yohimahiqui. Jatihibi jahuen joi nincamayamanihxon bi ta rahma Papan noque nincamahiqui. Noquen Papa jahuentihi honanya quin honanahbo tah hen yohiti jai.

¹¹ Neateman bi res jascajati shinanihxon quescabijaquin ta noquen Hihbo Jesucristoy-axon noque bihxon jahuen shinan jenquetsahpa quin non honannon hihxon jaan jismascaiqui.

¹² Noquen Hihbaan noque hahxonni copi tah non raquexonma hihtimahxonma ribbi noquen Papa non yocacai. Non yocacah ta Papan nincatihqui. Jesucristo qui hinamehxon tah non Papan noque nincatih non honanai.

¹³ Hen mato yohihi honanxon tenenahue, hea huetsabaan. Hen mato nincamahi copi nahuabaan hea sipo xoboho tsahonyaxihquibo que bi ta hean mato nincamati noquen Hihbaan yohinishqui. Jaa honanxon masa shinanxonma tenenahue.

Noquehon Criston hihti shinanai

¹⁴ Mato tah hen yocaxonai, hea huetsabaan.

¹⁵ Noquen Papa Dios ta jatihibichin papa qui, naihoh quehabaana, nai namana mehabaana rihbi. Nescajaquin tah hen vocaxonal:

¹⁶ Miin coshi shinan jato hinanxonhue, Papan. Hani shinan hihboxon jato mehepaque-hue. Miin yoshin siripan jaton jointi coshijamahue.

¹⁷ Joni huetsahan shinanhahnani jihuexon jahuentianbi mia jenebahintima shinan hinanx-onhue jato.

¹⁸ Miin jointiboyaxonbi min jatohon shinanai honanahbo, miin shinan siri jato hinanhue. Jahuentiho queen min jatohon Jain honanahbo jato jascajaxonhue, Hihbon. Nincacoinaibo rahsibichin honanahbo jato mehexonhue, Hihbon.

¹⁹ Min hicha hahpahoni non jatihibi honantimahi bi jatohon shinanxon min hahxonai jato honanmahue. Jaton jointi, jaton shinan, jato jatihobi hihbojababinhue, Hihbon. Jatihobi sca mina jaahbo miin shinan siribo jato hinanxonhue hah tah hen jai mato vocaxonquin.

²⁰Jahuen coshiyaxon ta jaan noque shinan hinanihqui, heen huetsabaan. Yocacatsi-hquin non shinanai quesca res ma bi ta tsoan shinannihma hashoan hihtijaquin jaan noque hahxonti hahtipahiqui.

²¹Jaa copi Hahxon tah min noque jai Papan hahnahue, Criston jonibon. Criston noque hahxonai copi jascabijaquin Hahxon tah min noque jai Papan hahnahue, jaayohiquin. Jascari rahan.

4

Dios Yoshiman noque huestijahi

¹ Noquen Hihbaan joi siri yohininica quen neno sipo xoboho tsahonnihbo tah hen nenoxon huishaquin mato yohihi, hea huetsabaan. Noquen Hihbaan jihuetahbhox sca jaa queenai quescari jihuenuhue.

² Caibo mentan mato hashoan honan hihqui shinanyamanahue. Sinayosmabonahue. Shinancoinya janahue. Caibaan jatsanjaha bi sinayamahi. Sirijaquin shinanax joni huetsahon tenehahnannahue. Jascapa shinanyahpaboxon joni huetsahon shinancoinnahue.

³ Jahu copi sinacananaxma bi hahan jenimati shinan hinanhahnannahue. Dios Yoshiman hinanai shinanbo hinanhahnanax tah man huesti shinanya rahsi man jihuethi.

⁴Mescó jonibo non japhonish bi tah non jaa yora huestiya sca jai, huesti yora sca. Papan hinanai jahuen yoshin ta huesti qui. Papan noque johue hahca tah non jatihibi catihi, noquen Hihbo huesti qui.

⁵ Cristo huesti nincaxon bihcoinaibo res ta queyoyamanox manatiqui. Criston Jane huestichin ta noque jeneho hihquimatanti jaiqui.

⁶ Noquen Papa Dios ta jaa huesti qui. Jaan ta noque jatihibi hihbojahiqui. Jatihibiyaxon ta jaan hahquiqui, jan queenai quescajaquin jatihibiya jaa hihqui.

⁷ Jan queenai quescabijaquin ta noque jatihibi mesco tee Criston hinanpaquehihqui.

⁸ Jaa copi ta Davidinin huishani joi janin nea jaiqui: Jahuen rahuibo bihtanax ta hinahihhnatax bebohi caxon jahuen jonibo jahuen hinantibo hinanpaquehihqui, hihqui.

⁹ Hinahihntai jan hihqui bi ta nai naman main caman bototax res sca hinatai yohihqui.
¹⁰ Jaa bototai ta jaa hinatai joni qui, huetsama. Naihoh sca hinatax ta jatihibi hihbo jaan

¹¹ Jan hinanai teebo ta nescapa qui: caibo jahuen raantibo, caibo sca jahuen joi yohinicabo, caibo rihbi sca jahuen joi nincacoinmahi nihnicahbo, caibo rihbi sca pastorbo,

¹² Nincoinaibo jahuen teexonnihcabo rahsi janon ta jayaxon teexonti shinan noque hinanihqui. Jahuen teexonnihcabolah res sca non yohinani, shinan hinanhahnanax, non eschinan. Juhuen ionibi coshi shinanya bihnon ta jascapa noque hinanihqui.

¹³ Cristo chibancoinaibo rahsi non janon caman tah non shinan hinanhahnanti jai, jatihixonbi non Papan baque honancoinnon caman. Shinancoinaibo rahsi rihbi non janon, Criston coshi shinanyahpabo rahsi.

¹⁴ Baquen shinanya non jayamas canon. Pehi pishca nihuen fotojaquetanxon boresai quescapahbo ta baquen shinanyahpabo qui. Joi coin yohihicamaxon bi quesa join paran parahan sca nihnichi bahinma sca nich, neri jahui, hori cahi, behnoti.

¹⁵ Jascapahboma bi hihcoini yohuanai bo janahue. Joni huetsahon shinanxon yohiquin sirijahahn Cristo queenai quesa japan hihnahue, jatihibi tian jahuen shinanya sca nihnoxon. Jaa huesti noquen Hihbo quen jascajanahue.

¹⁶ Mesco tee noque hinanxon ta mesco shinan rihbi noque hinanpaquehiqui, siripax res sca non joni huetsa yanapanhananon. Non jascari siripi jihuetaiya ta jaan noque coshi shinan hinanihqui. Jaatian tah non joni huetsahon shinanxon hahxonquin shinan hichajabonahi.

Shinan behnaya jihuetaibo

¹⁷ Criston shinanyaxon tah hen mato yohico sca jai, hea huetsabaan. Papan jojomabo jihuetai quescayamanahue. Tiroma shinanya ta jaabo jihuetai qui.

¹⁸ Shinan siribo camabahinxon ta tiromabo res bihcanchiqui. Tiromati queenax ta honannabo sca banecaniqui, jahuen nahuabohax ta Papan jihuetai janin jaabo nocotimahiqui.

¹⁹ Rabinyamascaax ta jonetax res sca tiromayamascaax janibi sca jacaniqui, hochiti quescascai. Tiromajaquin joni huetsa hahcatsihxon ta hahrescaniqui. Jaton shinan tiromabo huinomabahinrihbicanquin.

²⁰ Jascapahbonoxonma tah man Jesucristo bhniqui, hea huetsabaan.

²¹ Jahuen joi coin yohihah tah man bhniqui.

²² Cristo bhihriyamahax man tiromapahoni quescayamascanoxon tah man Cristo bhniqui, hea huetsabaan. Tiromati jenipahichish tah man paramehtax hashoan sca tiromati shinanya japhaniqui. Jascapa shinan jenebahinquin behnábo sca bhnahue.

²³ Coton payo potabahinquin hahcajaquin shinan xenibo potabahinxon shinan behnabo sca bhnahue.

²⁴ Dios Yoshiman mato shinan behnabo hinannon hinamehnahue. Joni behnascaax Papan shinanai quesa sca janahue, pontebo sca, Papahon shinancoinaibo.

²⁵ Jaa copi joni huetsa betan yohuani quescayamascanahue. Hihcoinjaquin yohiquin. Jatihibi tah non huesti yora qui. Jaa copi paranyamascanahue.

²⁶ Caibaan sinamaha bi hohchayamanahue. Sinatax bi tah man histon siricahinti. Sinaya bepiyamanahue.

²⁷ Ni jenquetsahpa yoshimanbi mato hohchamayamanon janahue. Sinataiton mato hohchamamis.

²⁸ Yometso hihxon min Cristo bhniqui? Min tah min yometsohima sca jai. Yometsohtaxma tah min teemis sca jatihi. Noquen huetsabo yomanaiton jahuar pishca jato bhnxonnoxon tah min miin mequeman siripi teetihu.

²⁹ Yohuani tiromabohi jayamabiresnahue. Siripi yohuannahue. Masa shinanaibo meraxon hahan jenimati shinanbo hinannoxon sirijaquin yohinahue.

³⁰ Criston mato bichi jonon caman tah man honantiyahpabo qui, Dios Yoshiman mato honantijahah. Jaa benámayamanahue. Tiromahi yohuantquin man benámanis.

³¹ Jointi mocayahpa jayamanahue. Joni huetsa hichaquin shinan jayamanahue. Joni huetsa qui rainyamatima. Join bahchintima. Huetsa joni qui tiromahi yohuantima. Joni huetsa tiromajatima. Jascapa yohuantibo jenebahinscanahue.

³² Jascapahma bi joni huetsa yanapanti, joni huetsa hahxonti, jascapabo shinanbo caya bhnahue. Min tiromani Papan shinanyamasca quescajaquin rihbi, huetsan mia tiromajahah bi jaa shinanyamascahue.

5

Shinancoinaibo Papan baquebo jihueti

¹ Jahan jan queenai jahuen baqueboxon tah man Papan shinanai quescajaquin man shinantihi.

² Matohon ta Criston hihti shinannishqui, hea huetsabaan. Noquehon jenimaxon Papan bihrohanon ta noque copi jaa hinamehnishqui, noquehon hihti shinanax. Jascari joni huetsahon shinani jihuenaheue.

³ Miin haiboma betan hihtima shinanhue, huetsan. Miin benema betan hihtima shinanhue, chocan. Jahuentianbi jascari jihuetai shinanyamanahue. Rishtaya joibo jatihibi

rihbi tah man jatima sca jai. Minamahbo meheti shinanyamahue. Jascapabo shinanbo ta Papan caisaibo jatimahi qui.

⁴ Haiboya yohuanti, honanma yohuanti, hosan yohuanti, jascapa yanca yohuanbo jayamanahue, hea huetsabaan. Jascapahma bi hahxon tah min hea jai Papan janahue.

⁵ Jano noquen Papa jaiton ta noquen Hihbo Jesucristonen noque jihuemayaxihqui qui. Jano ta tiromabobocanaxon mato noquen Hihbo Jesucriston noque jihuemayaxihqui qui. Jano ta tiromabobocanaxon mato noquen Hihbo Jesucriston noque jihuemayaxihqui qui. Jascapahbo noque betan jihuemayaxihqui qui.

⁶ Jascapahbo ta tiromama qui hihxon quesa joi yohuanquin mato parancanmis hihxon tah hen yohihi, hea huetsabaan. Nincayosmahax tiromahibo copi ta jascapa Papan hihti casticanyaxihqui qui.

⁷ Jaa copi jascapa tiromahibo jayamanahue.

⁸ Bahquish chian jihuetax quesvari tah man honanmabo jihuetai jahuenahmabi. Rahma tah man jascapahbo yamasca. Xaba chian jihuetaibo tah man qui, noquen Hihbaan mato honanmahah.

⁹ Xabayahpabo ta siribo qui, pontebo, hihcoinaibo can. Xabayahpabo sca jihuetai jahuenahue.

¹⁰ Noquen Hihbaan jisi jahuejaha siri quin hihxon, maton shinaman jatihibi tanapaque-nahue.

¹¹ Yamebaquebaan hahcai ta tiroma qui, jahuabi siri yamahi. Jato hihquihinyamahue. Jato yanapanquinma bi hihtimahabo xabajaquin quescayaquin jato yohinahue. Tiromahi honanahbo hihxon yohinahue.

¹² Jonexon jaabaan hahcai ta tiroma qui, jaya joitimahi.

¹³ Non johuepan xabajaha ta janibi sca jatihi qui. Janibiscaia honantihbiresi. Yame chianxon non xaba jisi quescarihbibi honantih bi resi.

¹⁴ Jaa copi ta behua jaiqui.

Mohihue hoxahhuan, Criston mia xabajanon jirijomabo janinhax huenihue hihqui jaa behua.

¹⁵ Man honancoinnon hihxon tah hen mato yohirihbihi, hea huetsabaan: Jano man nichi jisquin sirijanahue, Papan bahinbi nihnoxon. Honanmabo nichi quescayamahax bi honanscaax nihnahue.

¹⁶ Hashoan tiromabocanaxon mato noquen Hihbo teexontimajacanmis hihxon chiquishxonma siribojanahue noquen Hihbo hahxonquin.

¹⁷ Jaabo tiromacanahi bi tah hen mato yohihi, hea huetsabaan. Non jahuejati noquen Hihbo queenihquin shinannahue.

¹⁸ Pahenyamanahue. Pahe xehahax pahenax tah non noquen shinanbo tiromahi. Pahenti qui hinamehtaxma Dios Yoshin qui caya hinamehnahue.

¹⁹ Hinamehti behuanahue, Papan join behuahi, noquen Hihbo qui behuahi, matonbi shinanax joni huetsa yohiquin sirijahi behuahi. Maton jointinin noquen Hihbo qui jenimaribihax behuaribinahue.

²⁰ Papan hahxonai tihbi yohihi Hahxon tah min noque jai, Papan, hihqui janahue noquen Hihbo Jesucriston janen. Jascabihi jascanahue hea huetsabaan.

Haibo betan bebo siri res jihuetai jai

²¹ Criston baquebohax nincakahahnani janahue.

²² Noquen Hihbo queenai quescayaquin maton benebo nincanahue, chocabaan.

²³ Noque jihuemanica Cristo noque hihbohi quescajaribiquin ta jahuen benen jahuen haibo hihbojatihi qui.

²⁴ Criston noque yohihah non nincatihi quescajaribiquin ta jahuen benen yohihah jahuen haibaan jatihibi nincatihi qui.

²⁵ Maton haibohon queennahue, hea huetsabaan, jan caisaibohon queenax noque jihuemanoxon noquen Hihbo hinamehni quescarihbibi janahue.

²⁶⁻²⁷ Shinannahue. Tiromajoma ponte siribo non janon ta jaa hinamehnishqui. Rishta-jomabo non hihnon, jahuabi tiromajomabo non janon. Hihti siribo sca noque bilyanoxon ta noque pontenishqui. Choquaquin hahcajaquin ta jahuen join noquen rishta potanishqui. Potanoxon ta hahmebi hinamehnishqui, noquen hihti shinanax.

²⁸ Jascarihbibi maton haibohon queennahue, maton yorahon man queenai quescapi. Jahuen haibohon queenai joni ta jahuenahbi jahuen yorahon queenihqui.

²⁹ Tsoabi tah non noquen yorabi non rahnimehyamahi, jahuentianbi. Picatsihxon tah non pihi. Hiquinax tah non rahcotal. Jascari tah non noquebi queemehtax coirametai.

³⁰ Jascajaribiquin ta Criston noque coiraniqui, noque jahuen yora quen.

³¹ Moisesnin huishani quescapah tah qui: Jaa copi ta bebaan jahuen papaya jahuen mama jenebahinxon jahuen haibo sca hihquihihiqui, jaabo rabehax bi huesti yora sca janon hihqui Moisesnin huishani joi.

³² Jaabo rabehax bi huesti yora hihqui quescaribibi ta noqueya Cristo huesti yora qui. Jaa ta honanyamacanpahonishqui, Papan jato yohiriyamahah. Rahma pari ta noque nincamanishqui. Honanquin sirijanahue.

³³ Mato jatihibi tah hen yohihi: miin haibohon queenhue, huetsan, mihri min queemehtai quescari. Joi bichinxonma miin benen mia yohihah nincahue, chocan.

6

¹ Baquebo sca tah hen yohihi. Maton papan, maton maman mato yohihah nincanahue, baquebon. Noquen Hihbo nincacoinnicaxon jaabo rihbi nincatahi man. Man jato nincakah ta siri qui.

² Papan yohini diez joi quiha ta huesti jaiqui, non nincacaiya jan noque hahxonti yohimenoni: Miin papa miin mama nincquin sirijahue.

³ Nincacoinax tah min siripi jihuethi, basi rihbi tah min main jihuethi, hah ta noque Papan janishqui. Jaa shinannahue, baquebon.

⁴ Maton baquebo rainyamayamanahue, baqueyahpabon. Sinamaxonma bi noquen Hihbaan shinanyaxon sirijaquin yohixon, pontejaxon jato hanijaquin sirijanahue.

⁵ Patoro teexonnicaahbon. Maton patoronen yohihah sirijaquin nincanahue. Paranxonma bi hahcoinquin jato hahxonnahue. Man Cristo nincacoinai quescajaribiquin jato hahxoncoinnahue.

⁶ Patoronen jisiya res hahxonquinma bi hahcoinquin. Jascajaquin man Cristo hahxonai honanxon maton jointiboyaxonbi jato teexonnahue. Non jascajati ta noquen Papa queenihqui.

⁷ Noquen Hihbo tah man hahxonai, joniboresma. Jaa copi maton shinanboyaxon bi teexonnahue.

⁸ Patoroyahpaxon, jascapa hihyamahax patorojomaxon man sirijaquin hahxoncoinai tihibi ta noquen Hihbaan honanihqui. Man hahcoinai quen ta noquen Hihbaan mato hinanah jahuabora siribo sca man bihyaxihqui. Jaa honanscaxon hahcoinnahue.

⁹ Patorobo sca hen yohinon: Maton jonibaan naihoh queha Hihbo ta matonah rihbi qui. Jaan jisi tah man maton joniboya man jascapa rabe qui, patorobon. Huetsabo patoro hihqui, huetsabo rihbi jaton jonibo hihqui jaan jisyamaquin. Jaa copi maton jonibo tahtijayamascanahue, patorobon. Tahtijaxonma bi hen jato rahma yohihah quescajaribiquin jato hahxoncoinnahue maton.

Hahqui paxatibo

¹⁰ Huetsa joi sca hen mato yohinon. Jaya hihnoxon sca noquen Hihbaan coshi bahnahue, jahuen hihti coshi shinan bihquin.

¹¹ Tiroma yoshin mato qui nocotaiya, tenenoxon hahqui paxatibo bahnahue, Papan mato hinanah hahqui paxatibo.

¹² Jonibo betan tah non rehtenanyamahi, hea huetsabaan. Quiquin yoshinbaan ta noque rehteti shinanihqui. Jaabo ta hahbe yoshin tinintiyahpabo qui, nai namanxon yonohi yoshinbo, tiroma shinanyahpa yoshimahhuanbo.

¹³ Jaa copi Papan hinanaibo bahnahue hahqui paxatibo. Yoshinbo mato tiromajahi jahuiton sca hahqui paxatiyaxon tenexon bahnahue. Yoshiman tsacahah bi hihquihamahui quesa ta jatihibiqui. Man tah man yobatiba.

¹⁴ Sontaronen ta rehtenannocon jahuen hahqui paxatibo sahuehiqui. Jahuen yami chinexhti pari bihquin, hahqui chipaxti. Jaatian sca jahuen xohpaxti sca sahuequin. Jaatian sca ta jahuen hahqui tapaxtibo sca bihxon sahuehiqui. Jaatian sca ta jahuen hahqui rahpaxti sca bihxon, jahuen boxpaxti rihbi maixon, jahuen machito sca bichiqli. Jatihibiyaxon ta tenescaiqui. Jascajaquin rihbi tenenahue, Papan hinanai shinanbo bihxon.

¹⁵ Quesatima shinanbo bihxon ponte res jihueta shinanbo rihbi sca bihxon, Criston noque sirijaquin jihuequihnti joi yohiti shinan rihbi bihquin.

¹⁶ Jaatian sca Cristo nincacointi shinan sca bihquin. Jahan caya tah man tiroma yoshin cahnematihi, jahuen chihiyahpa tahanan jan mato tehpishaha bi jahuen tahuwa nocajahanguin.

¹⁷ Mato xahbanen tiroma yoshin paquenon Papan mato bihbohantih shinan sca bahnahue. Papan joi maton jointi janin bexojati shinan rihbi sca bahnahue, jayaxon Dios Yoshiman mato haxemanon.

¹⁸ Jascapa shinanbo bihxon, jatihibi tian noquen Papa yocanahue hicha. Dios Yoshin qui hinamehxon yocaxonnahue. Tiroma yoshin quexequin hahcajaquin coiranhanan yocaxonti jenebahinyamanahue. Yocaxonnahue, Papan baquebo jatihibi yocaxonquin.

¹⁹ Hea rihbi yocaxonnahue. Raquexonma Cristo joi siri nincamanoxon hen yohuanti honannon hea yocaxonnahue, heen jananbi noquen Hihbo yohuannon.

²⁰ Jaa joi siri hen yohini quen ta hea neno sipo xobohoh tsahoncannishqui. Jaabi raquexonma hashoan sca yohiquin sirijanon hea yocaxonnahue, Papa queenai quescarih sca hen yohuannon.

Hahan quirica queyoti

²¹ Hea Jenquetsahpi Jain jan mato nincamanon hihxon tah hen Tíquico mato qui raanai, hea huetsabaan. Jaan ta mato jatihibi yohitihiqui. Hahan hen queenai noquen huetsa tah qui, hea huetsabaan.

²² Sirijaquin ta noquen Hihbaan joi yohihiqui. Jaa copi tah hen jaa raanai, noque neno jai joibo jan yohihah honanxon man sirijaquin shinannon hihxon.

²³ Janohah noquen huetsabo tah hen yocaxonai, noquen Papa betanxon noquen Hihbo Jesucristonem mato mehenon. Maton jointi siricahinnon hihxon, joni huetsahon shinanhahnan hashoan sca nincacoinnon hihxon rihbi tah hen yocaxonai.

²⁴ Noquen Hihbo Jesucristohon shinancoinaibo jatihibi noquen Hihbaan hahxonnon tah hen yocaxonai.

FILIPOS **Filipos janinhahbo qui Pablonen raanni joi**

Filipos janinhahbo qui Pablonen raanai

¹ Jesucriston joni hihxon tah non nenoxon Timoteo betan Pablonen mato qui joi pishca raanai, noque huetsabaan. Man Jesucristo qui hinamehtax Filipos jema janin jihuetaibо jatihibi qui tah non raanai, maton pastorobo qui, jaton yanapannicabo qui rihbi man jascabi jayamahin hahquin.

² Papan shinanyahpahax man jahuen xabapan jihueyamahin hah tah hen mato jai. Noquen Hihbo Jesucriston shinanyahpa rihbi man jatihi honanax tah hen jascahi.

Pablonen jato yocaxonai

³ Noquen Papa Dios yocaxonquin tah hen mato shinanxon tihibi Hahxon tah min jato jai Papan hahcai.

⁴ Mato yocaxonquin tah hen jenimahanan mato yocaxonai.

⁵ Papan joi hen yohihi canon tah man hea yanapanai. Hea honanmenonixon yana-panxon tah man hea rahma caman rihbi yanapanai. Jaa copi tah hen Hahxon tah min jai Papan hahcai, mato shinanxon.

⁶ Maton jointi janin jahuen shinan siri Papan nianhxon ta mato shinan hinanbonayax-ihqui, hihti siribo sca noquen Hihbaan mato merahi jonon. Jaa tah hen honanquin sirijahi.

⁷ Hehon tah man shinanai. Sipo xoboho hen tsahotai bi tah man hea yanapanai. Papan joi hen yohihi cahiya tah man hea jascajaribibi. Papan joi siri hean honanmahi copi caibaan hea demandanaiya tah man hea yanapanrihbibi. Hehbe teenicabo tah man qui. Jaa copi tah hen honanquin sirijahi: Maton jointi janin ta jahuen shinan siri Papan hicha janaxontihqui.

⁸ Hean rihbi ta heen jointiboyaxonbi matohon shinanai, hea huetsabaan. Papan ta honanhiqui. Matohon shinanxon copi tah hen mato yocaxonai.

⁹ Joni huetsahon man hashoan sca hihti shinanhahnannon tah hen mato yocaxonai. Man shinanhahnanon jatihibi honanbonahax hihti shinanyahpa man janon hihxon tah hen mato yocaxonai.

¹⁰ Jaatian tah man jahue mehabo man hahnon noquen Hihbo hashoan queenihquin man honantihi. Hihti bi res shinan siriboyahpa sca tah man jatihi, jahuabi tiromabо yamascai. Noquen Hihbo Jesucristo joribixon sca ta jascapahbo man hihqui merabenayaxihqui.

¹¹ Siri shinanbo Jesucriston mato hinanah, man jaya tihxon sca pontejaquin shinanax jihue man jaiya ta caibaan sca honantihqui. Hihcoin ta Papan shinanya jihuecaniqui hih ta jaxyaxihcanihqui, noquen Hihbo qui siripi yohuani. Man jascanon tihxon tah hen mato yocaxonai.

Cristo hahxonai tah hen jihuetai hihqui

¹² Man honannon tihxon tah hen mato yohiscai, hea huetsabaan: Hea sipo xoboho tsahonxon bi ta Papan joi panteti hahtipahyamacaniqui. Hashoan sca ta caicanahiqui.

¹³ Criston joi siri hean nincamahi copi hea neno tsahonni quen ta hean yohihah quiquin hapon sontarobaan nincacaniqui, jatihxonbi. Texe jonibaan rihbi ta nincascacaniqui.

¹⁴ Sipo xoboho noque tsahonabо jenquesi non jatihin tihxon ta hea jisish hihti caibo noquen huetsabo shinan coshicanahihqui. Hashoan sca ta noquen Hihbo qui jaton shinan camacaniqui. Hashoan rihbi sca ta raquemenohax bi raquetaxma sca coshin sca Papan joi siri yohihi jatihibi janin bochanhqui.

¹⁵ Caibaan rihbi ta hashoan sca hea tiromajahahbo tihxon Criston joi nincamahiqui, hehqui sinaxon. Huetsabaan ta shinancoinxon Criston joi nincamahiqui, jahan shinanaxon.

¹⁶ Jahuen joi siri hen nenoxon bi sirijaquin yohinon Papan hea jomani honanaxon ta jaa joi siri nincamacaniqui.

¹⁷ Hoa jonibaan ta Cristo joi pantecatsihqui. Pantecatsihxon ta nincamacaniqui. Honanyamaxonma bi hea hashoan hohmis hohmismanoxon tihxon tiromajacatsihquin nincamacanquin.

¹⁸ Jascapahbo noque qui jahuiya cahra jahua hi non jatihin? ¿Non benatihin? Hihyamahi rahan. Jatihibi janin ta Criston joi nincamacaniqui. Caibaan noque tiromajati shinanaxon nincamanon, caibaan rihbi pontejaquin shinanaxon yohiquin. Nincamanicahbo jaiya tah hen jenimahi. Rahma jenimahax bi tah hen hashoan sca jatihi.

¹⁹ Rahma sipo xoboho hen tsahotai bi ta man hea yocaxona Papan hea manatihiqui. Jahuen yoshin siripan rihbi hea coshijaha tah hen tenetihu. Hahan jenimati sca tah hen jai.

²⁰ Criston hea coirantihi honanquin sirijaxon tah hen jaabo queenai quescajaquin hea jaahbaan bi hen sirijsquin shinanai. Raquexonma tah hen yohipahonihqui. Jascajaribibquin tah hen rahma rihbi coshihnhnatai, Cristo heen hihbo hihqui honanahbo. Hea rehtehahbo bi tah hen tenetihu. Rehteyamahah cahen jihueparixon jascajaribibquin tenetihu, Cristo heen hihbo hihqui honanahbo.

²¹ Hea rehteyamahiboya cah hen Cristo teexoni jihuetihi. Rehtehah cahen hashoan siri rihbi jatihi.

²² Hea jihueparixon tah hen noquen Hihbo teexoni jatihi. Jenquetsi hen jatihin, jihueti, muhuati, hen tah hen honanyamahi.

²³ Juhue meha hashoan siri quin hihxon tah hen caiscasquimahi. Muhuatax noquen Hihbo Cristo janin pontecahincatsil sca tah hen jai. Jaa ta hashoan siri qui.

²⁴ Jaa siri que bi cahen hea mohitahpa pari baneti man hashoan pishinai.

²⁵ Jaa copi tah hen honanscrai. Banetahxon tah hen mato jatihibi yanapantih man hashoan sca sirijaquin nincanon, man hashoan jenimahanan sca Criston shinan bihbonanon.

²⁶ Papan hea picomaha hen mato qui hahquirihbi nocotaiya tah man noquen Jesucristo qui siripi yohuantih, Noquen Hihbaan ta noque hihti hahxonihqui hih tah man jayaxi-hqui.

²⁷ Criston joi siri nincaqui jihuenahue, hea huetsabaan. Hen janu caxon jisxon, cayamahax rihbi banexon joi nincaxon, man jenquetsahpa shinanyabo sca man jain hen honannon. Man huesti shinanyaxon tenehi, huesti shinanyahax man teetai hen honanyaxahn.

²⁸ Mato raquejahabaan bi raqueyamanahue. Jahua qui bi raqueyamahi. Mato masa tenemahibo ta hahan honanti qui. Mato jascajaxon tiroma janin jaabo cayaxihquibohi honancanquin. Man tenehi rihbi ta hahan honanti qui, man queyoyamanox manatihi man honannon. Papan ta jascajaquin yohihiqui.

²⁹ Matohon shinanxon ta mato yohihiqui: Cristo qui hinamehtax man hahbetan ji-huescatihi yohihiqui. Cristo qui hinamehnixon bi masa tenexonribitihi.

³⁰ Maton jema janinxon hean tenehi jisnixon tah man rahma rihbi hean tenehi joi nincaxon maton rihbi sca masa tenexonai.

2

Jahuen quiquin jati jenebehnani Cristo jahui

¹ Criston jonibohax tah non yohinanti jai, shinan hinanhahnani. Joni huetsahon tah non hihti shinanti jai. Jahuen yoshin noquen jointi janin jai quen tah non nincacahananti jai. Yomanathaibohon shinanti tah non jai. Jaa copi hen mato yohihi nincanahue.

² Hen hihti jenimascanon huesti shinanya jihuenahue. Criston matohon shinanni quescajanahue, joni huestahon shinanhahnani. Huesti shinanyahpabo res janahue, huetsajaquin shinanyamaquin.

³ Jahuabi sinataxma teenahue. Hihcoinicamayamanahue. Noquen huetsa yohuanqui-hnnoxon mia mentan hashoan shinanya siri jaa hihqui shinanhue.

⁴ Mina res shinanyamahue. Mina res shinanxonma bi caibaana rihbi hahxonhue.

⁵ Noquen Hihbo Jesucristonen hahni quescajanahue.

⁶ Papa quescapahax bi ta jeenhihquish jonishqui, jahuen coshi jenebehnani.

⁷ Jahuun coshi xaba jenebehnani jonish cahen jonin yorayahpa sca janish. Yorayah-pahax bi jonibo hahxonnicra res quescasrai. Joniscaax, caibo mentan hashoan jahuuma quesa sca jai.

⁸ Jaabo jihuemanoxon mahuahue Papan jaah muhuati. Jihui qui hueonahbo bi nincanicaxon mahuanoxon caman tenequin.

⁹ Jaa copi ta Papan jaa yohinishqui: Mia tah min jatihibichin hihbo sca qui. Miin jane ta jatihibi Jane mentan hashoan hani qui.

¹⁰ Jatihibi jonibaan sca raboxonen nihxon jahuen janen yocayaxihnon ta jascajanishqui, naihoh quehabaan, nai naman jihuetaibaan rihbi, mai chicho quehabaan rihbi. Jaabo yohihi ta jascanishqui.

¹¹ Mia tah min noquen Hihbo Jesucristo qui hih ta jayaxihcanihqui, jatihibi. Jaatian ta Papa Dios hihti coshi shinanya hihqui honanyaxihcanihqui.

Xabayahpabo non jai

¹² Jaa copi hea nincanahue, hea huetsabaan. Hea jano hihqui tian res ma bi hea jano hihyamahiya hashoan sca nincquin sirijaxon, Criston shinanyahpaboxon mato janin jahuen shinan hichajahanhue. Heen Hihbo queenai quescayama japaho hihquish jihuuenahue.

¹³ Maton jointi janin teetai ta Papan coshi qui. Teeti shinan mato hinanxon ta hahan teeti coshi rihbi Papan mato hinanihqui, jan costanai quescia sca man teexonnon.

¹⁴ Man hahcái jatihibi tah man join hihquinanxonma man hahtihi, tsohquibi yohuanxonma hahquin.

¹⁵ Ponte shinanyahpabo sca jihuuenahue, jahuabi tiroma shinanaxma. Papan siri baquebo tah man nincayosmabo tocan man jihuetahi, tiromabo tocan hihquish bi ponte res jihuetai. Mai mehabo tocan tah man huishi xabatai quescia man jatihi, Papan xabayahpabo sca jai.

¹⁶ Johuepan xabajaquin hahcajaquin Papan joi honanmanahue. Jaatian ta Cristo jahuiya hen jenimayaxihqui, yanca res hen teeyamani hihquish copi. Mato copi tah hen Cristo bebon mequen nihyamayaxihqui.

¹⁷ Hean joi yohihah man noquen Hihbo nincacoinscái copi hea nenoxon rehtenoxi-hquiaan bi tah hen jenimaresai. Mato betanbi tah hen jenimahi.

¹⁸ Jascarihibi jenimanahue, hea hihqui quescari jenimanahue.

Timoteo betan Epafroditó

¹⁹ Histon tahni tah hen mato qui Timoteo raanti shinanai, jenquetsi man jihuetai honannoxon. Noquen Hihbo queenaiya tah hen basima tahni raantihi, joiya joribiscaya sca hen jointi sircayahinno.

²⁰ Timoteo quescapah tah hen neno huetsa yamahi, matohon shinancoinxon mato sirijaquin coirannicah.

²¹ Texen ta jatona res coiraniqui, Cristona jisxonyamaquin.

²² Timoteo tah man honanscái. Jahuuen papa betanbi teeti quescia ta hehbetan Papan joi yohihi tee teenishqui, maton jisnonbi. Jenquetsahpa shinanya hin hihxon tah man honanscái.

²³ Jaa copi tah hen jaa raanti shinanai. Jenquetsaja cahra hea janoxihcanihquin, rehetequin, reheteyamaquin, honanxon sca tah hen jaa raanscatihi.

²⁴ Jaabi ta heabi mato janin histon tahni catihi, Criston hea picohah. Jan hea jascajaxon-ti tah hen shinanai.

²⁵ Epafroditó pari raanti ta jaiqui hihxon tah hen jaa pari raantihi. Jaa ta heen huetsa qui, hea yanapannicah. Hehbe sontaro can. Man raanah ta joxon hea hihti yanapancachihiqui, sirijaquin hahxonquin.

²⁶ Jaa hihti hisinai joi man nincaho honanxon ta masa tenehax mato jisi hihti cacatsih-scái qui. Jaa copi tah hen raanti shinanai.

²⁷ Mahua hisin ta jahoxqui. Mahuatihí bi ta rohatipishqui, Papan rohajahah. Jahan shinanxon, hehon rihbi shinanxon ta Papan jaa rohajahipishqui, tiroma honanya hihquish hashoan bena sca hen jayamanon.

²⁸ Jaa copi tah hen rahmabi jaa raanti shinanai, jaa jisish man jenimascanon. Jano caxon mato yohihah tah man jenimatihi, nenohax ta hea rihbi jointi sircahintihi.

²⁹ Jaa copi jenimaxon bahnahue mato qui nocotaiton. Hahxon tah min noque jai, Papan, jaax jenimanahue. Papan joi yohinica jatihibi Johue hahxon, jaabo pishinaibo jato hinannahue, yanapanquin.

³⁰ Cristo teexonquin ta mahuatihí bi rohatipishqui. Hea yanapanquin tah man jaa neno raanhohqui. Joxon ta Hahrai mahuapaho hihxonma bi tenexon Cristo hahxonnoxon hea yanapancachihiqui.

3

Ponte jihuecointi

¹ Huetsa joibo sca hen mato yohinon, hea huetsabaan. Noquen Hihbo qui jenimanahue. Mato yohixon bi hahquirihbi yohihi tah hen jatsanyamahi. Hen mato yohihah ta hihti siri qui.

² Mato judio honantiyahpa hihmacatsihqui qui coiramenaheue. Tiromabo qui coiramenaheue, honantiyahpajacatsiqui noquen nami tiromajahibo qui coiramenaheue.

³ Noque cah non Papan honantiyahpabo sca. Jahuuen yoshin siriyaxon cah non jaa hahxonai. Jahuerohahi ta Cristo noquen jihuemanicah qui hih tah non jai. Jahuerohahi ta Cristo noquen hochá copi mahuanishqui, Papan noque hihti siri jisnon, hih tah non jai. Jonibaan res shinanxon hahcái ta jahuabi siriyamahihqui, Papan jisi, non tah non honanai.

⁴ Jonibaan res shinanxon hahcai Papan jisi siripaiya tah hen yohuanti jaquehahnai. Caibo mentan hashoan yohuanti jaquehahnai.

⁵ Ocho nete hen jaiya cah hen hea honantijacannish. Hea cahen israeli baquebo, Benjamin cahen heen xohta xeni. Hea tah hihti judio hihpahoni qui. Moisesnin joi chibannicahax cahen fariseo sca hen janí.

⁶ Hihti nincati shinanxon tah hen Cristo joi nincacaibo hean tiromajapahonihqui. Moisesnin joi chibankuin cahen jahuabi pishinmayamani.

⁷ Hen japhoniboa shinanhixton sca tah hen sirí hihqui shinanyamascaniqui. Jaama-jaquin res hen hahpahoni honanscaquin. Cristo nincatih bi tah hen jaamajaresni qui.

⁸ Jaamajaquin rahan. Yanca bi res hen tee teeni tah hen honanscaniqui. Heen hihbo Jesucristo betan nichi caya hihti siri. Jaabihnoxon tah hen hen japhoniboa jatihibi jenenihqui. Hen japhoniboa ta pohi tsamanah quescia tiroma qui. Criston shinan caya tah hen hashoan honancatsihqui.

⁹ Jaan hea jihuemati tah hen queenai. Papan hea siri jisnon Moisesnin yohini quescajati tah hen shinanyamasca. Cristo qui hinamehxon nincacoin sca tah hen jai, Cristo copi Papan hea siri hihqui jisnon.

¹⁰ Criston shinan tah hen honanbonacatsihqui. Hahan jan huenirihbini coshi rihbi tah hen honancatsihqui. Hahbetanbi rihbi nihni nihnxon tah hen tiromabo tenecatsihqui, muhuatax jan janí quescia jayanoxon.

¹¹ Cristo huenini hihqui quescarihibi sca jayanoxon tah hen jascajahi, hahtipahyamaquin bi hahtipahxon.

Coshin hahxoncointi

¹² Pishinyama ta jai hih tah hen jayamahi. Pishin ta jai, haxeti. Hashoan sca Criston hea haxemabonati tah hen queenai. Jaa copi tah hen coshin hahcai, Criston pari hea bihni quen.

¹³ Honan sca tah hen jai, honanbonayamascapan hih tah hen jayamahi, hea huetsabaan. Nescaja tah hen jai: Hen hahxoniboa shinanxonma tah hen noquen Hihbo hen coshin hahxonnoxihquibo hen shinanai.

¹⁴ Jan yohini quescia tah hen jacatsihqui, jan hea bochiquixon bilihinhon caman.

¹⁵ Baquen shinanya hihyamaxon tah man hen mato yohihah quescajatihi. Hen mato yohihi quescayama man shinanaiya ta Papan mato jaa rihbi honanmayaxihqui qui.

¹⁶ Non mato hinanni shinanbo jenebahinyamanahue.

¹⁷ Hen hahcai quescajanahue, hea huetsabaan. Hen mato tocan jihuepahoni quescapi jihuetaibo honannahue, jascari jihuexonoxon.

¹⁸ Mato tocan jascacanmis hihxon hen hicha coti mato yohini quescia sca ta jaiqui. Criston baquebo tocan ta jahuen rahuibo jaresscainqui, hicha. Heen jointi janin huaohi-hanan tah hen mato yohihi.

¹⁹ Jascapahbo ta Papan queyoyaxihqui qui. Jaton pocobo ta jaton dios qui pahenaibo. Jaton shinan ta hahqui hihtimati qui, hihti siri hihqui jaabaan shinanah bi. Jaton shinan ta mai meha res qui.

²⁰ Noquen jihue ta nenohah quescapahma qui, noquenah ta naihoh queha qui. Janohax noque jihuemanica noquen Hihbo Jesucristo jonon caman tah non manatihi.

²¹ Noquen muhanica yorabo ta jaan huetsajaxonyaxihqui qui, jahuenahbi quescia hihnon, hihti siri. Hahan jatihibi hihbojati coshiyahpaxon ta jaa coshiyaxon noquen yora behnajaxonyaxihqui qui.

4

Noquen Hihbo qui jenimati

¹ Jaa copi tenenahue, huetsabaan. Noquen Hihbo betanbi tenenahue. Mato tah man jahan hen hihti queenai heen huetsabo qui, heen jointiboyaxonbi hen matohon shinanai. Matohon tah hen hihti jenimahi. Mato copi tah hen shinanquin sirijahi.

² Mato betan jai haibo rabe sca tah hen hihti yohihi: Evodiaya Síntique. Noquen Hihboh shinanbehcoinax huesti shinanya sca janahue.

³ Jascari rahan. Mia rihbi tah hen jascajaquin yocacai, huetsan, mia cah min hehbetanbi teecoinni. Jato rabebi yanapanhue, jaa huesti shinanya jaahbo. Rabebi ta hehbetanbi tee teenishqui. Clemente, texe noque betan teeniho rihbi betan ta tee teecannishqui. Jaabo rahsichina ta Papan quirica janin jaton jane jaresscainqui, Papa betanbi jihueyaxihqui huisha sca.

⁴ Jascabih noquen Hihbo qui jenimahi jihuemanahue. Jascari jenimahi jihuemanahue hih tah hen jai.

⁵ Jatihibi jonibaan mato siri hihqui honanahbo tenehahnannahue. Noquen Hihbo ta nea pishca qui, hochoma.

⁶ Jahua copibi masa shinanyamanahue. Man hahan tiromajaquin shinanai jai jatihibi Papa yohinahue. Noquen Papa yocaxon, jan mato hahxonai rihbi Hahxon tah min noque jai Papan, hahxon man hahan masa shinanaibo yocanahue.

⁷ Jaatian ta mato coiranhanan jahuen jenimati shinan Papan mato hinantihiqui. Jonibaan honanti hahtipahyamahi shinan siribo ta mato hinantihiqui, man jointi siricahinon, noquen Hihbo Jesucristo betan hihxon man sirijaquin sca shinannon.

Non bihcointi shinanbo

⁸ Nescapa joibo tah man nincaxon bihtihi, hea huetsabaan: hihcoinai joibo, shinanyah Paxon honanti siri joibo, ponte siri joibo, rishtajoma siri joibo, costanti siri joibo, nincati siri joibo, jatihibichin shinanah hihti siribo joibo, hahqui siripi yohuanti joibo. Jascapa siribo rahsi bahnahue.

⁹ Hen mato honanmani quescabijanahue, hen mato haxemani quescabijaquin. Hean hahcai nincanhixon, hean hahcai jisnixon, jascajaribinahue. Jaatian ta sirijaquin shinamanicaton mato manatihiqui, noquen Papan.

Coriquinin yanapananaibo

¹⁰ Rahma man hehon shinanxon hahquirihbi hehqui coriqui raan sca jaiya tah hen noquen Hihbaan shinanyahax hihti jenimahi. Hehon shinancachihixon bi tah man raanti hahtipahyamahohqui.

¹¹ Pishincachihixon bi tah hen jaa copima mato yohihi. Jatihibi tian jenimati haxe tah hen janiqui.

¹² Pishinxon bi cahen sirijaquin shinanti honanai. Hicha jaxon bi cahen sirijaquin shinanti honanrihbibi. Jatihibi janin, jatihibijaquin tah hen yanixon sirijaquin shinanti hexenihqui, pihan hihxon bi sirijaquin shinanrihbiquin. Hicha jaxon bi jascajaribiquin, pishinxon bi jascajaribiquin.

¹³ Coshi hinannicaton coshijaha tah hen sirijaquin shinanti hahtipahi.

¹⁴ Jaabi tah man hea yanapanquin hahxonbiresai.

¹⁵ Mato nincamamenohax Macedonia mai janinhax hen caribihiya tah man hea yanapanribiniqui. Caibaan ta hea yanapanyamanishqui, mato huestichin tah man raanxonniqui, man honanai quesa, Filipobaan.

¹⁶ Tesalonica janin hen hihquiton cah man hehqui raanih. Jaa pecaho cah man hahribihoxon raanrihbinih, hean bihnou.

¹⁷ Maton coriqui jenipahixonma bi tah hen man hea hinanah copi Papan mato hashoan hicha sca hinanrihbinon hihxon hen bhniqui.

¹⁸ Man Epafroditto betan raanipi bichish tah hen hicha sca jai. Hen tah hen pishinyama sca jai. Man raanah ta Papan jisi hihti siri qui. Man hahqui raanah quesa tah qui, jaa copi ta matohon jenimahiqui.

¹⁹ Jaan ta man pishinaibo jatihibi mato hinanyaxihqui qui. Nete hihbo hihxon ta tsama bi res mato hinanti jaxon Jesucriston mato hinanrestihiqui.

²⁰ Noquen Papa Dios ta queyoyosma xabayahpa qui, jascabihi hahqui siripi yohuanhue hah tah hen jai. Jascari rahan.

Hahan quirica queyoti joi

²¹ Min jascabi jayamahin hahxon, jatihibi noquen huetsabo hea yohixonnahue, noquen Hihbo Jesucriston janen. Neno jai noquen huetsabaan rihbi ta mato jascajaribicaniqui.

²² Texe noquen huetsabo jatihibichin rihbi ta mato jascabajiqui. Quiquin hapon xoboho teetai noquen huetsabaan rihbi ta jaabaanbi shinanxon mato jascajaquin raanihqui.

²³ Noquen Hihbo Jesucriston xabapan jihuenuahue.

COLOSAS

Colosas janin jihuetaibo qui Pablonen raanni joi

Noquen huetsabo qui Pablonen raanai

¹ Noquen Papa Dios queenaiya ta Jesucriston hea yohinishqui jahuen raanti hea Pablo janon. Noquen huetsa Timoteo betan tah hen nea quirica huishahi.

² Man Cristo jeneyamahibo qui raannoxon tah non huishahi, heen huetsabaan. Man Colosas jema janin jihuetaibo qui tah non nea joi raanai. ¿Papan shinanya man jayamahin? ¿Papa Diosen sirijaha man jointi siripax jihueyamahin?

Noquen huetsabo Pablonen yocaxonai

³ Noquen Hihbaan Papa tah non jascabijaquin yohihi, Hahxon tah min jato jai Papan Dios, hahquin. Non mato yocaxonai tihibi tah non jascajahi.

⁴ Man noquen Hihbo Jesucristo nincacoxon jatihibi noquen huetsabohon man shinanai yohihah tah non jascajajaquin noquen Papa yohihi.

⁵ Noquen naihoh queha Papan mato jihuemayaxihqui honanxon tah man noquen huetsabohon shinanxon jato hahxonai. Papan joi coin nincanihxon tah man jan mato jihuemayaxihqui joibo man honanscrai.

⁶ Jaa joi coin ta Criston joi siri qui, mato qui noconih. Jatihibi janin nocoxon jano jihuetaibo shinan hinanaxa ta jaa joi caicanahihqui. Mato tocan ta jascarihbihihqui. Papan matohon shinanai tah man yohihah nincamenonihxon honanrihbibi. Jaan mato hahxoncoinai tah man nincanihxon honanrihbibi.

⁷ Jaa joi siri ta Epafrasnen mato nincamanishqui. Jaa ta hahan non queenai noque betan teenica qui. Criston teexonnicaah, hehbe teexonnicaah. Sirijaquin ta Criston joi mato yohixonnishqui jano caxon.

⁸ Neno nocoxon sca ta Dios Yoshiman shinanmaha man noquehon shinanai jaan noque yohipishqui.

⁹ Jaa copi tah non nincamenohipixon mato yocaxonquin jeneyamahi noquen rihbi. ¿Man jenquetsahpao jihuetai Papa queenihquin? Man honancoinnon hihxon tah non mato yocaxonai. Dios Yoshiman mato jatihibi shinan hinanquin mato honanmanon hihxon rihbi tah non yocaxonai.

¹⁰ Papa queenai quesca sca man jihuemon. Man hahcai jatihibi jaquin hahan jan jenimahibo man janon hihxon tah non mato yocaxonai. Jascapahboxon tah man Papan shinanai quescajaquin jatihibi sirijatihi. Jaatian tah man hashoan sirijaquin sca noquen Papa honanbonayaxihqui.

¹¹ Jatihibi shinan hinanquin Papan mato coshijanon hihxon tah non yocarihbibi, jahuen hihti siri shinan bichish man coshilon hihxon. Jaa shinanyaxon tah man jatihibi tenetih, yosmayamahi, sinayamaribibi. Jenimaresi.

¹² Noquen Papan ta mato yohihihqui, Heen baquebo jano jihuemon hihxon hen hahxonai xabapan sca tah man jihuetaihi, hahquin. Jaa copi tah man Hahxon tah min noque jai Papan, hah man jatihi.

¹³ Tiroma yoshiman noque hihbojani bi ta Papan noque bichinxon noque mahnebo-hanihqui jahuen baquen jihuetaibo sca non janon hahan jan queenai jahuen baquen sca noque jihuemanon.

¹⁴ Jaa jahuen baquen ta noquen hohcha sohuanihxon non hohchanihbo shinanyamas-caiqui.

Cristo mahuani quen noque jahuen jihuetaibo

¹⁵ Noquen Papa jisyamaxon bi tah non jaa jahuen baque honanxon noquen Papa jenquetsahpao quin hihxon honanscrai. Jaa Papan baque ta jatihibi hahnicalax jatihibi hihbo rihbi qui.

¹⁶ Jaan ta jatihibi janishqui, naihoh quehabo, main jaibo rihbi. Non jisibo, non jisyamahibo rihbi jaan jaquin. Meyayahpa yoshinbo, hapo yoshinbo, yonohi yoshinbo, sontaroyahpa yoshinbo rihbi, jatihibija ta jaan jato janishqui jahuen jaábo.

¹⁷ Jahuabi jariyamahi bi ta jaa janishqui. Jaan rihbi ta jatihibi jaxon jatihibi man-amahiqui. Jaan manamayamaha cahen jatihibi queyoquehanai.

¹⁸ Noquen Hihbo ta jaa qui, noque jihuemanicah. Hihquipish bi huenimenonish jihué hihboscai jatihibi hihbohi. Noque jan caisai tah non huesti yora qui, jahuenah.

¹⁹ Queenxon copi ta jaa huesti Papan hihbomanishqui, jaa huesti jatihibichin quiquin hihbo janon.

²⁰ Jaa mahuamaquin ta jatihibi noquen rahuiti shinan potamanishqui noque jahuen jihuetahboscanon. Naihoh quehabo, nai naman mehabo, noque jatihibi hahbetan siripi yohuannon ta jihuin hueonmaxon jahuen Papanbi noquen hohcha copi Cristo jimi potamanishqui mahuamaquin.

²¹ Mato rihbi tah man Papan nahuabo hihpahoniqui. Jahuen rahuibohax tah man tiromajaquin shinanax tiromahi japhaponiqui.

²² Jahuen sinatahbo que bi ta mato sirijaquin bichiqui jahuen baquebo sca man janon. Noquen yora quescapahax noque copi mahuanhxon bi ta mato sirijaquin Criston bichiqui. Jahuenahbo rahsi Papa bebonbi sca mato nihmanoxon mato sirijaquinbihquin. Hohchajoma siribo sca tah man jatihi. Papa mato hinanyahnoxon cahen mato sirijaquinbihquin.

²³ Criston joi jascabijaquin nincacoinaibo tah man jano nihyaxihqui jaa joi jeneyamahibho, jaa mato yohimenoni yohuan huetsajayamahibho, huetsa joi qui mahnejaqueyamahibho jano nich. Jaa joi huesti tah hen jatihibi noquebo yohihi, Jaa yohinica sca mia jahue Pablón, Papan hea janí.

Papan joi nincamanicah, Pablo

²⁴ Papan shinan man bihnon hihxon jahuen joi siri hen mato yohini copi ta hea rahma tiromajacaniqui. Tiroma hea jaábo bi tah hen tenehax jenimahi. Noquen Cristo ta tiromajacannishqui. Jaa tiromajaquin pishinmanixon ta hea sca tiromajacaniqui. Heen yora jaabaan tiromajahah bi tah hen Cristo tenexonai. Jahuen caisaibo ta jahuen yora qui. Jaabaan jahuen shinan bihnon hihxon tah hen tenehi.

²⁵ Matohon shinanaxon ta mato jahuen caisaibo yohinica hea janon hihxon Papan hea yohinishqui, jahuen joi hen nincamaquin sirijanon.

²⁶ Neateman japhonibio honanmayamapahonixon bi ta rahma jaa jone joi jahuen caisaibo honanmati jaan yohihhqui.

²⁷ Mato tocan Cristo jihuethi ta honanyamacanpahonishqui Papan jato honanmayamahah. Maton man honanscanon ta mato judiomabo honanmati noque yohinishqui. Mato chicho Cristo jihuetaiya man jahuentiho siri shinanyahpa jaa jaiquin man honannon hihxon ta mato honanmahiqui. Jaa Cristo huesti ta noque jihuemanicah qui.

²⁸ Hahqui hinamehhue hahquin tah non jatihibi joni sirijaquin yohihi. Jatihibi joni sirijaquin honanmaquin honanahbo. Jatihibi joni shinanyahpa siri sca Cristo bebon nihmanoxon hihxon tah hen yohihi.

²⁹ Jascapahbo janon hihquis tah hen shinan caman hahtanax tee teetai. Jan hea hinanai coshin tah hen coshin bi res tee teetai jato yocaxoni.

2

¹ Hicha bi res hen mato yocaxonai man honannon hihxon tah hen mato yohihi. Laodicea janinhabo rihbi, jatihibi hea jisyamanibio rihbi tah hen jaayocaxonai.

² Joni huetsahon shinanaxon honanmahananax maton jointi sirinon hihxon tah hen mato yocaxonai. Jaatian tah man Papan honanya jacointihi. Jahuen jone joi tah man honanquin sirijascatih, Cristo honancoinquini.

³ Cristo ta jatihibi honan siri jaiqui, jatihibi siri shinan rihbi.

⁴ Siripi yohuanhcama jaibaan mato paranyamanon hihxon tah hen mato yohihi.

⁵ Hocho jaax bi tah hen mato betanbi hihquish quesca hea jai. Jaa shinan huestiya man jihuetai siripai nincacax tah hen jenimahi. Cristo qui hinamehxon man jeneyamabiresai yohihih tah hen hihti jenimahi.

⁶ Noquen Hihbo Jesucristo bijnish res sca jaa shinanya sca jihuenuahue.

⁷ Noquen Hihbo honanquin sirijanahue. Jahuen shinanya rihbi haninahue hen mato haxemani quescajaquin hashoan sca jahuen joi bihbonaquin. Hahxon tah min noque jai Papan, hahquin hicha bihbonanahue.

Criston shinanyahpa non behna jihuetai

⁸ Mato hihbojanoxon honanihcama jaxon quesa joibo mato nincamacanmis coirame-nahue. Honancoinxonma bi jonibaan shinanai joi res ta mato honanmacatsihcanihqui. Cristonahma bi huetsa joi mato haxemacanmis yoshiman joi.

⁹ Cristo ta Papan shinanya qui, Papan coshiyahpa.

¹⁰ Jaa ta hihbo qui, jatihibi quiquin yoshimana, jatihibi hapo yoshimana rihbi. Jatihibichin hihboxon ta mato shinan hinancoinhqui.

¹¹ Mato ta honantijanishqui Papan jihuetahbó man hihqui honanahbo. Jonin meque-man honantijahahma bi Criston honantijahahbo tah man qui jahuen honantiyahpabo. Mai mehabo queenai quescajaquinma bi Cristo queenai quescaja non jai ta jaa honanti qui.

¹² Jeneho hihquimaha tah man Cristoyabi tsahonni quesca janiqui. Jene chicho queha huenihnihah sca tah man Cristoyabi huenihnihini quesca jai.

¹³ Hohcha hohchayahpabohax tah man muhuascaibo japhahonihqui. Maton yora janin jahuen honanti yamani jahuenahmabo quen. Man jascapahbo que bi ta Cristoyabi Papan mato jihuemanishqui maton hohcha jatihibi mato sohuaxon, noquenah rihbi.

¹⁴ Non tiromajapahoni copi ta noque casticanti joi janishqui. Noquen hohcha copi hihqui bi ta Cristo jato rehemaquin noquen casticanti Papan queyonishqui, yamascanon.

¹⁵ Jascajaquin ta hihi tiroma yoshinbo Papan jaton yohuanbo bichinshqui netetahbo. Jaton tiroma sontaro yoshinbo rihbi jascajaquin jaton yohuanbo bichinquin. Janibi ta jato hihtimahmanishqui. Cristo muhuamaquin ta jato netemanishqui.

Naihoh quehabo shinannahue hihqui

¹⁶ Jaa copi nescapa joibo nincayamanahue. Noquen pitibo, pitimabo, xehatibo, xehatimabo, non nescajaquin fiesta netebo huinomatibo, jascajaquin huinomatinahibo, hoxne xoo hihquiya non jascajaxonma nescajati jaibo, tantiti neten non jascajaxonma nescajati jaibo. Jascapahbo joibo mato yohihahbo bi nincayamanahue.

¹⁷ Pitibo, xehatibo, fiestabo, hoxne xoo netebo, tantiti netebo, jaa joibo ta janishqui. Jahua jan noque hahxonyaxihqui qui honanahbo hihxon res ta jaa joibo Papan yohinshqui. Cristoyahpaxon tah non jaa joi xenibo jenescai.

¹⁸ Caibo ta namaquen jahua ra jisish, shinancoinhcama sca jaiqui. Jahua copi jascatimahi bi jascari. Papan shinanjomahax res sca yanca bi res yohuani. Jascapahboxon ta mato haxemacanihqui man piti tenenon hihxon mato haxemaquin. Papan naihoh queha yoshinbo qui sca man horanon hihxon mato haxemaquin. Jato nincayamanahue. Papan shinan mato bichincannis.

¹⁹ Jascapahbaan ta noquen Hihbo bihcoinyamahqui. Noquen Hihbo huestichin ta noque coshi hinanihqui huesti yora sca jaax non haninon. Criston shinanyahpa rahsi jaax tah non yanapanhanani jihuetax coshi hinanhahnanax hashoan sca Papan shinan bihbonah.

²⁰ Cristo betan mahuanhbo tah man qui, mai meha shinan potanibho. Jahua copi sca man mai mehabaan hahcai quescajaquin man mai mehabo nincacain jaabaan mato haxemanon?

²¹ Xecoyamahue, piyamahue, meheyamahue, hah ta jacanihqui.

²² Jaaban yohihibo ta non piquin queyobahinaibo rahsi qui. Jaton yohuan ta jonibaan shinanax yohuanresai qui, Papan jascahue hahcama.

²³ Honan quescpa hihquish bi honancoinaima joi tah qui. Noquen Hihbo queenai quescajaquinma bi ta hahmebi shinanxon noquen Hihbo hahxonti jacanihqui. Noquen Hihbaan yohinsh qui quescajayaquin. Piti jaxon bi piti tenequin. Jascajaxon tah non mai mehabo shinanbo non potatimahi jahuentianbi.

3

¹ Cristo betanbi ta mato hahquiribh huenihnihnishqui. Jaa copi jaan hinanabo shinan benanahue. Noquen naihoh queha Papa patax tsahoxon ta noque hinanihqui. Jahuen shinan benabonanahue.

² Jaa janin res maton shinan hahnahue. Mai mehabo janin hahyamaquin.

³ Man tah man muhuascaniqui. Cristo betanbi sca tah man jihuetai, Papanahbo sca. Mahuati qui raquetimasci.

⁴ Noque jihuemanica Cristo sanareneni jahuiya tah man mato rihbi hahbetanbi janibi sca niyayaxihqui xabayahpabo sca.

Tiromapahonish bi behna shinanyahpa

⁵ Jaa copi maton shinan tiromabo jenebahinnahue, Cristojomaxon man bijnibo shinanax. Joni huetsa betan hihqui hohchati. Haiboya yohuanti. Tsiniti. Tiromahihti queenti. Caibaan jahubora jato bichinti shinanai. Jascaxon bichinah ta santo chibahan jasca rabe qui.

⁶ Jascapahbo copi ta nincayosmabo Papan casticanpaqueyaxihqui qui.

⁷ Mato rihbi tah man jascapahbo hihpahoniqui, jascapa shinanya jaax.

⁸ Jascapahbo hihníxon bi jenebahinscanahue nea jatihibi: rainyamati, sinati, tiromajati, huetsa joni qui yohuanti, rishtaya yohuanti. Jascapa yohuanbo jenebahinscanahue.

⁹ Man shinanpahoni jenebahinax res sca joni huetsa betan yohuani quesayamanahue.

¹⁰ Shinan behna sca tah man bichi. Papan rihbi ta mato honanmabonaquin shinan behnajaxonihqui. Mato jonijanicahton shinanai quescajaquin sca man shinannon maton shinan behnajabonaquin.

¹¹ Noque behnabo tah non judiobaan nahuaboma sca jai. Judioboma rihbi sca jai. Judio honantiyahpaboma sca jai. Jaa honantijomaboma sca jai. Nahuabo hihyamascai. Nahua bi res nahuabo hihyamascai. Hinabo hihyamascai. Hinaboma hihyamascai. Jascapahboma sca jaax bi Cristoyahpabo rahsi. Criston jonibo rahsi.

¹² Papan ta mato caisihqui, jahuenahbi jahuen baquebo man janon mato yohiquin. Matohon shinanquin. Behna shinanyahpaboxon sca, Papan caisaiboxon rihbi sca joni huetsa yanapanti shinan bihnahue. Joni huetsahon shinanxon hahxonti shinanbo bi-hquin. Huetsan yohihah nincati shinanbo, honaxonbi yohiti shinanbo. Jatsanjaha bi copitima shinanbo. Jascapa shinanbo bihnahue.

¹³ Tiromahibo tenenannahue. Heen huetsa ta hehqui tiromahiqui hih min jacatsihxon bi jan mihqui tiromahibo shinanyamahue. Maton Hihbaan maton hohcha shinanyamascai quescajanahue.

¹⁴ Jaa shinanbo jatihibi bilihxon bi noquen huetsabohon shinanti shinanbo hashoan bihbonahue. Noquen huetsabohon shinanquin tah man texe maton shinan sirijabahinai shinanyahpa siri sca janoxon.

¹⁵ Criston maton jointibo sirijanon hihxon rihbi janahue caibo betan siripi sca ji-huenoxon. Man jascari jihuenon hihxon ta mato huesti yorajinishqui. Hahxon tah min noque jai Papan, hahribinahue.

¹⁶ Criston joi rihbi maton jointi janin bexojanahue hicha. Shinanquin sirijahax honan-mahanannahue pontejauquin yohinani. Behuaribinahue. Papan huishani behuahi. Matonbi shinanax behuaribinahue noquen Hihbo qui behuahi. Maton jointinin shinanax Hahxon tah min noque jai Papan hihqui behuahi.

¹⁷ Man hahcai jatihibi noquen Hihbo Jesusen janen hahnahue. Maton janan yohuan-quin, maton mequeman teequin rihbi jahuen janen hahquin. Jahuen janen rihbi yohiquin, Hahxon tah min noque jai Papan, hahnahue.

Papa nincaxon jonibo yanapanti

¹⁸ Maton benebaan yohihah nincanahue, haibobon. Man jato nincati ta noquen queeni-hqui.

¹⁹ Maton haibohon queennahue, bebobon. Jato rainyamahaxma jihuenaahue.

²⁰ Maton papan, maton maman mato yohiha jatihibi nincanahue, baquebon. Man nincati ta noquen Hihbo hihti queenihqui.

²¹ Baqueyahpabon, maton baquebo yohiquin sirijaxon jato sinamayamanahue. Tiromajaquin shinancamis.

²² Maton patoronen mato yohiha jatihibi nincanahue, patoroyahpabon. Sirijaquin jato hahxonnahue jaabaan jisnon hihxon res ma bi hahcoinquin noquen Hihbo shinanhah-nan. Patorobaan jisnon hihquish hihquibo quescayamanahue.

²³ Jonima bi noquen Hihbo man teexonai honanxon man hahcai jatihibi coshicahinxon hahcoinnahue.

²⁴ Noquen Hihbo Cristo tah man teexonai. Jaan ta mato copijaquin sca jan mato bexojaxonai mato hinanyaxihqui.

²⁵ Tiromajanicabo rihbi ta copiyaxihqui jai tiromajahi copi. Casticanquin ta tsoabi cahnetimahiqui.

4

¹ Sirijaquin maton jonibo copijanahue, joniyahpabon. Sirijaquin honanxon jato copija-coquin. Naihoh maton Hihbo rihbi jai honanxon sirijaquin jato copijaquin.

² Papa yocaquein jeneyamanahue. Jaa yocacahnah coiramenahue huetsa janin maton shinan camayamaquin. Hahxon tah min noque jai Papan hahti shinanbehnoyamarihbinaahue.

³ Criston joi siri hen nenoxonbi yohiti hahtipahnon hea yocaxonnahue. Papan nincamayamanixon bi rahma nincamascai joi siri tah qui hen jato yohihi. Jaa copi tah hen nea sipo xoboho tsahotai hea tsahonhohbo.

⁴ Hen sirijaquin jato jaa joi nincamanon hihxon Papa hea yocaxonnahue, hean yohiti jai quescajaquin hen yohinon.

⁵ Shinanquin sirijaxon Cristojomabo yohuanquihnnahue. Yohiti siripai tihibi jato nincamanahue.

⁶ Nincati queenahbo hihxon shinanya yohuantiyaxon jato yohuanquihnnquin. Jahua min shinanain hahca tah man jascapa yohuantiyaxon jatihibi joni yohiti honanscatihi.

Hahan quirica queyoti

⁷ Tíquiconen ta jatihibi hen huinotaibo mato yohiyaxihqui. Hahan hen shinanai noquen huetsa tah qui. Sirijaquin ta hea yanapaniqui, hehbe Criston yonotixon.

⁸ Non jenquetsahpi jihuetain hihxon tah hen mato qui jaa raanai man honannon hihxon. Jaan mato yohihah man sirijaquin sca shinannon hihxon tah hen jaa raanai.

⁹ Onésimo rihbi ta hahbetan cahiqui. Jaa rihbi ta hahan non shinanai noquen huetsa qui, Papan joi nincanica. Maton caibo rihbi tah qui. Nenoha joibo jatihibi ta mato yohiyaxihcanihqui rabexon.

¹⁰ Bernaben chahi Marcos mato qui cahiya sirijaquin bihnahue. Nocotaiya jaa yanapanyaxahnahue, hah tah hen mato janiqui. Aristarco ta heyabi sipo xoboho tsahoncan-hoxqui. Aristarco, Marcos, Jesus Justo hahcaibo, jaabo rahsichin ta mato qui joi raanihqui man jascabi jayamahin, hahquin.

¹¹ Jaabo quimisha res ta heen caibo qui, hea yanapannicahbo. Papan jihuetahbo hichanon hihxon ta yanapanquin hea sirijaquin shinamacanihqui.

¹² Maton caibo Epafras rihbi ta Criston yonotixon nenoxon mato qui joi siri raanihqui. Noquen Papa yocaxonquin ta mato jascabijaquin shinanxon mato yocaxoniqui. Papan coshiyahpahax sca man hohchati queenyamabiresnon. Man jahuejati Papa queenihquin man honanquin sirijaribinon ta mato hihti yocaxoniqui.

¹³ Mato hihti yocaxonxon ta Laodicea janinhahbo rihbi hahxonxon Hierápolis janinhahbo rihbi jato hahxonihqui. Man honannon hihxon tah hen mato yohihi.

¹⁴ Noquen rahonnica Lucasen ta mato qui joi raanihqui. Demasen rihbi ta mato qui joi raanihqui, man jascabi jayamahin, hahquin.

¹⁵ Laodicea jema janinha noquen huetsabo yohixonnahue, man jascabi jayamahin, hahquin. Ninfas, jahuen xoboho tsinquitai noquen huetsabo rihbi jascajaquin yohixon-quin.

¹⁶ Nea quirica jisxon, Laodicea jema janinha noquen huetsabo scajismanahue. Hen jato qui raanho quirica rihbi jisnahue, maton.

¹⁷ Arquipo yohinahue, noquen Hihbaan tee hen hinanni hahxonquin sirijanoxon janjisnon.

¹⁸ Heanbi huishaxon tah hen mato man jascabi jayamahin, hahcai. Hea sipo xoboho tsahotai shinanbehnoyamanahue. Noquen Hihbaan mato shinan hinannon hihxon tah hen mato yocaxonai.

1 TESALONICABO

Tosalonicabo qui Pablonen raanni joi

Raannoxon Pablo betan huishahibo

¹ Pablo, Silvano, Timoteo, noque rahsibi hihxon tah non mato qui joi raanai, noque huetsabon. Man Papa Dios betan hihquibo, man noquen Hihbo Jesucristo betan hihquibo qui tah non nea joi raanai Tesalónica jema janin. ¿Jahuen shinanya man jihueyamahin? ¿Man shinanquin sirijahax sca jihueyamahin?

Ponte res jihuexon nincacoinaibo

² Noquen Papa Dios yocaxon tihibi tah non Hahxon tah min jai Papan, hahcai, matohon jatihibi shinanxon. Jascajaquin tah non cahnexonma mato yocaxonai.

³ Nincacoinxon man noquen Hihbo hahxonai, joni huetsahon shinanxon man teexonai, noquen Hihbo joyaxihqui honanxon man tenehi, man jascajahi honanxon tah non mato yocaxonai.

⁴ Matohon ta noquen Papa queenihqui. Papan caisaibo tah non mato honanai, noquen huetsabaan.

⁵ Yohuanquin res tah non joi siri mato yohiyamanihqui. Papan coshi jisxon, Dios Yoshiman coshin hahcai rihbi jisxon, Papan joiya non hihqui honancoinxon tah man nincacoinnihqui. ¿Mato qui nocoxon, matohon shinanxon, non tenexon mato hahxonyamanihqui? Man tah man honanai.

⁶ Caibaan mato tiromajanon bi Dios Yoshiman mato hihti jenimamanon tah man Papan joi bihcoinniqui, noquen hahcai quescajanicahbo sca janoxon, noquen Hihbaan hahni quescajanicahbo rihbi sca janoxon.

⁷ Man tenexonai honanxon ta Macedonia mai janin jihuetai nincacoinaibaan jatihixonbi sca jascajaribicanishqui, Acaya mai janinhahbaan rihbi jascajanon.

⁸ Mato janinhax ta noquen Hihbaan joi yohuanchanicanacaniqui. Macedonia janin res ma, Acaya janin res ma. Jatihibinco ta jahuen joi nocotihqui. Man Papan joi nincacoinai ta jatihibincoxon nincacaniqui, jahua yohiti non pishinyamascanon.

⁹ Man noque Johue hahxon maton santobo potaxon jihuenuca Papa Dios coin man hihbojamahi ta yohicaniqui jatihibi janinxon.

¹⁰ Jahuen baque naihoh quehax jonon tah man manascai. Jaa jahuen baque ta Jesus qui, hihquipi bi Papan hahquirihbi huenini. Jayaxihqui casticanti ta jaan noque xahbanjamatihiqui.

2

Janoxon Pablonen hahní

¹ Yanca res ma tah non mato qui noconihqui, heen huetsabaan. Matonbi tah man honanai.

² Filipos jema janinxon noque hihti tiromajahipibaan bi tah non tenexon, noquen Papa shinanxon, raque potaxon, Papan joi siri mato yohinihqui, hihti pantehibaan bi.

³ Yohuan rishtaya tah non jayamahi. Sirijaquin honanxon tah non yohihi, paranxonma.

⁴ Noque honanxon non yohiti siriscai jisxon. Joi siri yohiscatannahue Papan noque jaah tah non jaa joibi yohihi. Jonibo queenai quescajaquinma bi noquen Papa queenai quescajaquin tah non yohihi. Jaan ta noquen shinan honanihqui.

⁵ Siripi yohuanhcama tah non jayamahi. Hahan paranti joi tah non jahuentianbi yohiyamanihqui. Man tah man honanai. Jahuabi paranxonma jahua maton coriqui bichinnoxonma tah non joi siri mato yohinihqui. Papan ta honanihqui.

⁶ Jonibo noque qui siripi yohuannon hihxonma tah non yohihi ni matobi ni huetsabo noque qui siripi yohuannon hihxonma.

⁷ Criston raantixon tah non pishinxon mato yocati hahtipahi. Coshin yocati hahtipahxon bi tah non honaxonbi res mato yohinihqui. Jahuen maman jahuen baquebo coiranquin hahcai quescajaquin honaxonbi mato yohiquin.

⁸ Jascajaquin matohon shinanxon tah non jenimahanan Papan joi siri mato hinanax noquebi rihbi mato qui hinamehniqui, matohon hihti shinanxon.

⁹ Yobacahini non tee teeni tah man honanai, noque huetsabaan. Mato jatsanjaya manoxon tah non mato jahuabi yocayamanihqui. Papan joi siri mato yohihahnan jahuabi pitibo mato yocayamanoxon tah non teebahinahax tee teeshinapohnihqui.

¹⁰ Mato nincacoinaibo tocan tah non noquen Papa qui mequejaquetax jihueneihqui ponte res. Noque qui tiromahi yohuanti ta yamanishqui. Man tah man honancoinai. Papan rihbi ta honancoinihqui.

¹¹ Noquen baquebo sirijaquin yohiquin hahcajaquin tah non mato huesti huestibo sirijaquin yohipaquenihqui.

¹² Janoxon jan jihuemahi janin man canon hihxon ta Papan mato quenahihqui, jano jahuen xaba jaiton man canon. Jaa queenai quesvari man jihuenon hihxon tah non mato yohinihqui. Hihi yohi tah non mato janiqui, hea huetsabaan, jascari jihueti man honannon hihxon. Man tah man honanai.

¹³ Non mato yohihi joi nincaxon tah man Jonin joimah ta qui, Papan joi ta noque yohicoinihqui hihxon man bihcoinniqui. Papan joi coin tah qui. Man nincacoinaibaan jointi janin ta jahuen joi teetihqui. Man sirijaquin bihni copi tah non jascabijaquin noquen Papa yohihi, Hahxon tah min jai Papan, hahquin.

¹⁴ Judea mainxon Papan joi nincacoinax Jesucristo qui hinamehtaibaan hahni quescajanicahbo tah man qui, noque huetsabon. Jaton caibaan jato tiromajani quescajaribiquin ta maton caibaan mato tiromajarihbinishqui.

¹⁵ Papan joi yohinicabo rehtexon ta noquen Hihbo Jesus rihbi sca rehtexon noque sca jaa judiobaan rehtecatsihcanci qui, Papan joi nincayosmabaan.

¹⁶ Jaton nahuabo sca Papan teeihmanon non yohicatsihqui bi ta nincayosmaboxon jaabaan noque pantehihqui, jatihibi jonibaan rahuixon. Jascajaquin ta jaton hohcha senenjacanihqui. Pantehibaan bi ta sinaxon Papan jato jascabijaquin sca casticanyaxi-hqui qui.

Tesalonicabo Pablonen jiscatsihqui

¹⁷ Basima tahnisi sca tah non mato betan hiyamascaxon mato jisyamascaxon bi matohon hihi shinanax mato hihi jiscatsihquish mato qui cati non queenbiresai, heen huetsabaan.

¹⁸ Mato jisi hea Pablo cacatsihquish cahi bi ta hea cahi tihibi Satanasnen hea pantehihqui.

¹⁹ Noquen Hihbo Jesus jahuiya tah non jaa bebonxon mato hihi jiscatsihyaxihi qui. Jaa bebon tah non matohon hihi jenimatih. Jaa jahuiya tah non hihi jenimatih, nincacoinnich man jano rihbi hihquiya.

²⁰ Man nincacoinaiyah tah non jenimahi, hihi jenimahi.

3

¹ Basi mato jisyamascaxon tah hen joi hihi nincacatsihxon Atenas janin hea banenoxon hihxon noquen huetsa Timoteo mato qui raanhohqui.

² Jaan ta Criston joi siri yohiquin noque yanapaniqui, Papa hahxonquin. Jaan yohihah man coshixon hashoan nincacoinnon hihxon tah non raanhohqui.

³ Mato tiromajacatsihquibaan bi man nincacoinquin jeneyamanon hihxon mato coshi hinanon jaa raanquin. Tiromabo non tenenon ta noquen Hihbaan noque yohihihqui. Man tah man honansca.

⁴ Mato betan hihparixon tah non jayaxihquibo mato yohinihqui, Noque ta jascajayaxihi-canhqui, hahquin. Hen yohini quesca sca ta jaiqui. Man tah man honanai.

⁵ Jaa copi tah hen honancatsihquin teneyamascaxon, man nincacoinparihin hihxon honannoxon mato qui jaa raanhohqui. Jenquetsahaxon ra tiroma yoshiman mato tanahah noquen tee yamacahinmis hihxon tah hen raanhohqui honancatsihquin.

⁶ Mato jistani joxon sca ta noque yohihipshqui. Man nincacoinai, joni huetsahon man shinanax, jascabijaquin man noque shinanax, mato jiscatsihqui non hihqui quescajarihihi man mato jai, noque ta sirijaquin yohihihqui.

⁷ Man shinancoinai yohihah tah non jenimarenenipiqui, heen huetsabaan. Nenoxon noque tiromajaxon hohmis hohmisjahibaan bi tah non jenimasca.

⁸ Man noquen Hihbo nincacoinquin jeneyamahi joi nincacax tah non sirijaquin sca shinanax.

⁹⁻¹⁰ Mato qui nocoxon man honanti pishinaibo mato yohinoxon tah non yame yocaxon bariyahpan rihbi noquen Papa hihi yocacai. Jascajaquin yocaxon bi tah non mato shinanax Hahxon tah min noque jai Papan hah non jai, matohon shinanax hihi jenimahanan.

¹¹ Noquen Papa Dios betan noquen Hihbo Jesusen noque bahi jismanon tah non yocacai mato qui canoxon.

¹² Non matohon shinanax hahxonai quescajarihihi man hashoan sca joni huetsahon shinanax hahxonnon tah non mato yocaxonai. Papan mato jahuen shinanax hinanon, jatihibi jonibohon shinanax man jato yanapannon mato yocaxonai.

¹³Jatihibi noquen huetsaboya noquen Hihbo Jesus jahuiya noquen Papa Dios bebon man rishtajoma jatihobi mequexona nihyaxahnon, jan mato shinan coshijanon, tah non mato yocaxonai.

4

Noquen Papa queenai quescajati

¹Nea quirica janquenjanoxon sca tah hen mato hihti yohihi, hea huetsabon. Mato tah hen hihti yocacai. Non mato haxemani quesca jihuenahue. Noquen Papa queenai quescajati jihuetai hexenish jascabihi jihuenahue. Man rahma jihuetai quescahax bi hashoan rihbi sca jihuenahue.

²Noquen Hihbo Jesusen janen non mato yohini joi honanax jascabihi jihuenahue.

³Papan baquebo man jihuemeconta Papa queenihqui, man tsinilahxma jihuuenon.

⁴Shinancoinax man maton haibo betan man jihuetai sirinon.

⁵Papa Dios honanyamahibaan haiboyati res shinanai quescajaya maquin.

⁶Jascajaquinma tiromahazma maton huetsa qui hohchayamanon. Noquen Hihbaan ta jascapa jatihibi copinica qui. Non tah non mato sirijaquin yohi sca janiqui.

⁷Non rishtanomma bi jahuen baque siribo non janon ta Papan noque quenanishqui.

⁸Jaa copi honannahue: nea hen mato yohihi joi nincayosmabaan ta joni yohuanaima bi Papa Dios yohuanai joi nincayamahihqui. Jahuen yoshin siri mato hinannica ta noquen Papa Dios qui. Jaa ta yohuanihqui.

⁹Papanbi honanmaha tah man maton huetsabohon shinanai. Noquen huetsabohon shi-nannahue hen mato yohi yohihahma bi tah man Papan shinanyaxon jatohon shinanscrai.

¹⁰Macedonia mai janin jihuetai noquen huetsabohon shinanxon tah man jato jatihibi yanapanscrai. Man jato hahxonscrai bi tah non mato yohihi, noquen huetsabaan, hashoan rihbi man hahxonbonanon.

¹¹Siripi jihuetai shinan queennahue. Tsoabi jatsanjayamanahue. Maton mequeman teenahue, non mato yohini quescajati.

¹²Man jascapahbohi jisxon ta yohitimabaan mato honantihqui. Jascajahax tah man jahuabi pishintimahi.

Noquen Hihbo joribiyaxihqui

¹³Jenquetsahax hoxanihbo jihuerehbiyaxihqui qui. Hen tah hen mato yohiscrai, heen huetsabaan, nincayosmabaan hahcai quescajauquinma man masa shinanyamanon hixon.

¹⁴Jesus hihquipish bi hahquirihbi huenini tah non honanai. Jascarihbibi huenitahbo ta hoxanihbo Papan hahbeyaxihqui qui, Jesus betan.

¹⁵Noquen Hihbaan yohihah tah non nea joi mato yohihi. Noquen Hihbo jonon caman jihuetai banexon tah non hoxanihbo beboxontimahi.

¹⁶Noquen Hihbobi ta coshin quenatax botopaqueyaxihqui qui. Jahuen qui qui yonotin rihbi ta coshin quenayaxihqui qui. Huetsan rihbi ta jahuen corneta rehue hahyaxihqui qui. Jaatian ta noquen Hihbobi botopaquequi hryanyaxihqui qui. Joxon ta noquen huetsabo mahuanihbo pari hueniyaxihqui qui.

¹⁷Jaatian ta noque jihuetai banetaibo jaaboyabi jaan bilihiniyaxihqui qui, jato betan nai cohin tocan noquen Hihbo non behchinon naihohxon sca. Jaa pecaho tah non jascabihi sca noquen Hihbo betan hihtihi.

¹⁸Jaa copi nea joi yohiquin joni huetsa sirijaquin shinanmahanannahue.

5

¹Jenquetsahpabo netebo jayaxihqui qui. Jenquetsahpabo bari tian jayaxihqui qui. Man tah man honanscrai. Jaa copi tah non jahuabi mato huishati pishinyamahi.

²Yame yometso sanarenemi jahuicamahi ta noquen Hihbo joti nete nocorenenentihi qui. Man tah man honanquin sirijasrai.

³Tsoabi ta rehtenanyamasca qui, jahua qui raquetima ta jai qui jaibaan bi ta histon bi res Papan jato queyoyaxihqui qui. Haibo tohoya baque bihcatsihquish hisinrenenihcamahi histon jahui. Tsoabi ta cahnetimahi qui.

⁴Mato tah man jaabo quescajama bi bahquish chian jihuemah, noquen huetsabaan, yometso quescajama bi jaa nete mato qui nocoyaxihqui qui.

⁵Xaba baquebo rahsi tah man qui, nete baquebo. Noque tah non yame baqueboma qui, bahquish baqueboma.

⁶Jaa copi caibo hihqui quescajama bi hoxan hihyamanahue. Mohinahue, pahenihcamayamahi.

⁷Hoxanicabo cahen yame hoxahi. Pahenicabo cahen yame pahencani.

⁸ Nete mehabo hihquish coiramenahue. Hahan xohpaxti sahuexon hahcajaxon ninca-coinnahue, joni huetsahon shinanxon. Boxpaxti maixon hahcajaxon man teehihribitihi honannahue.

⁹ Noque rainyamanoxonma bi ta noquen Hihbo Jesucristonen noque teehihmanon Papan yohinishqui.

¹⁰ Noquen Hihbo ta noque copi mahuanishqui, mohiyamahax mahuatax non hahbetan hihnon.

¹¹ Jaa copi coshijahanannahue, sirijaquin shinanahbo. Yohiquin joni huetsa shinan hinanhahnannahue, man hahcai quescajaquin.

Noquen huetsabo jihueta Pablone yohihi

¹² Maton pastorobaan ta mato beboxoniqui. Beboxonquin mato sirijaquin yohihih nincanahue, noque huetsabon. Jaa tah non mato hihti yohihi.

¹³ Jaton tee copi man jatohon hihti shinannon tah non mato yohihi. Maton huetsabo betan rihbi siripi jihuannahue.

¹⁴ Chiquishaibo teetahbo jato sirijaquin yohinahue, noquen huetsabaan. Man jascajati tah non hihti queenai. Yobacahinyamahibo coshihahbo jato shinan hinannahue. Yos-mahibio yanapannahue. Noquen huetsabo jatihibi tenexon honaxonbi yohinahue.

¹⁵ Caibaan mato tiromajahah bi copiyamanahue. Copixonma maton huetsabo hahxon-nahue, jatihibi jonibo rihbi hahxonquin.

¹⁶ Jenimahi jihuannahue.

¹⁷ Noquen Papa jaayocanahue.

¹⁸ Hahxon tah min noque jai Papan hahnahue, jatihibi copi. Man Jesucriston jonibo jascati ta noquen Papa queenihqui.

¹⁹ Dios Yoshiman mato shinanmahiya jointi chahomayamanahue.

²⁰ Papan joi yohihiboya nincanahue.

²¹ Hihresyamanahue: jatihibi honannahue, siriti caisnoxon.

²² Jahuabi tiromahi quescapajati shinanyamabiresnahue.

²³ Mato tah hen yocaxonai, sirijaquin shinanmanica hihxon Papanbi mato jatihobi mequexonnon noquen Hihbo Jesucristo jonon caman. Maton yoshin, maton shinan, maton yora, jatihobi mato hohchajoma bexojanon, mato qui jahua tiroma yohuanti yamanon.

²⁴ Mato quenanicaton ta jan yohini quescabijaquin mato hahxonyaxihqui. Jaan ta pishinmatimahiqui.

Quirica janquenjahi

²⁵ Noque rihbi yocaxonannahue, noque huetsabon.

²⁶ Jatihibi noquen huetsabo noque yohixonannahue, Man jascabi jayamahin, hahquin.

²⁷ Noquen Hihbaan yonohah tah hen mato hihti yohihi, nea quirica man jatihibi noquen huetsabo nincamanon.

²⁸ Noquen Hihbo Jesucristonen jahuen shinan siri mato hinana jihuannahue hah tah hen jai.

2 TESALONICABO

Tosalonicabo qui Pablonen raanni joi, jahuen rabe sca

Raannocon Pablo betan huishahibo

¹ Pablo, Silvano, Timoteo noque rahsibi hihxon tah non mato qui joi raanai, noque huetsabon. Man noquen Papa Dios betan hihquibo, man noquen Hihbo Jesucristo betan hihquibo qui tah non joi raanai, Tesalónica jema janin.

² ¿Noquen Hihbo Jesucristo betan Papa Diosen jahuen shinan mato hinanyamahihquin?
¿Jahuen shinan bichish man sirijaquin shinanax sca jihueyamahin?

Tiromabo Papan casticanyaxihqui

³ Papan joi nincacoinquin tah man shinan hihti caibojahi, noque huetsabon. Jatihixonbi tah man joni huetsahon shinanax hahxonannanai yanapanhanani. Jaa copi tah hen jascabijaquin Hahxon tah min jai Papan hahcai, mato yocaxonxon. Hahxoncoinquin ta mato coshi hinanihqui.

⁴ Tiromabaan mato hohmis hohmisjaxon tiromajahibaan bi man tenexon jenexonma shinancoinai tah non noquen huetsabo tocaxxon noquenbi jato yohihi.

⁵ Mato tiromajahiboya honannahue. Papan ta ponte shinanihqui. Janoxon jan ji-huemahi janin man hihyaxahnon ta mato sirijahiqui. Jaa copi tah man yomanahaquehtai.

⁶ Mato tiromajahibo copixonquin ta Papan jato hihti tiromajayaxihqui qui, jascajaha ta ponte qui hihxon.

⁷ Hihti perehinhatai chihiyahpa ta naihoh quehax noquen Hihbo Jesus sanarenenyaxi-hqui qui, jahuen coshi yonotibo betan. Joxon ta matoyabi noque tantimayaxihqui qui, man rahma tenehibo.

⁸ Noque tantimaxon bi ta copixonquin noquen Papa Dios honancatsihyamahibo, noquen Hihbo Jesucristo joi siri nincayosmabo jaan casticanyaxihqui qui.

⁹ Jaan casticana ta jascabi sca queyonhbo hihyaxihcanihqui. Noquen Hihbo janin ta jaabo jahuentianbi jatimahiqui. Jahuuen xabapan xabataima qui ta jato potayaxihqui qui.

¹⁰ Jaa noquen Hihbo jahuiya tah non noque huetsabo rahsixon jaa hihti coshi non jisyaxihqui, nete hihbo. Hihti coshihiya tah non rahte rahteyaxihqui, jahuen joi nincacoinnihbo. Mato rihbi tah man janobi hihtihi, non yohihah nincacinnish.

¹¹ Jaa copi tah non mato jascabijaquin yocaxonai: Min jato yohini betanbi senenahbo jato sirijahue Papan, pishinyamahahbo. Sirijaquin shinanax hahcatsihquibo jatihibi hahcábo miin coshiun jato jascajamahue, shinancoinax teetai tihibi rihbi hahcábo jato coshi hinanhue Papan, hah tah non jai mato yocaxonquin.

¹² Jascapahboxon tah man jato noquen Hihbo Jesucristo hihti shinanyahi man jismatihi, mato rihbi jahuen shinanyahpabo jisíbo. Noquen Papan ta mato jascajaxonihqui, noquen Hihbo Jesucriston rihbi.

2

Jayaxihqui yohitima joni

¹ Noquen Hihbo Jesucristo jahuiton behchinoxon non tsinquijaqueyaxihqui joi sca ta hen mato yohihi, noquen huetsabaan.

² Noquen Hihbo ta johuanhoxqui jaibaan bi jato nincayamanahue. Yoshiman jasca-jaquin yohihah bi nincayamanahue. Jonin rihbi jascajaquin yohihah bi nincayamaquin. Noquen huishahacama joi rihbi mato qui nocotaiya bi nincayamaquin. Jasca jaibaan bi rahteyamanahue.

³ Ni jenquetsahpabi mato paranmayamanahue. Papa Dios potacatsihquibo pari ta jotihi qui. Hoa yohitima yoshin pari rihbi ta caintihiqui, hihti tiroma yoshin.

⁴ Jatihibi Dios hahcaibo potacatsihquin ta hahqui jonibo betihipaquetai jatihibi rihbi potaquin tanayaxihqui qui, jaabi sca dioscatsihqui. Janoxon Papa yohiti xoboho tsahotax ta Hea ta hen dios qui, hihtihi qui parani.

⁵ ¿Mato betan hihxon pari hen jaa joi mato yohini man shinanyamahin?

⁶ ¿Jahuen nete nocotaiya pari jaa yoshin cainyaxahnon jahuatohon rahma jaa pantehi-hquin? Man tah man honanai.

⁷ Jaa yoshin jotihi tsoan honannih que ma bi ta teescaiqui. Hashoan teepanan ta pantenication jaa pantehihqui, jahuen pantetima nete noconon caman.

⁸ Jaan panteyamascaiya ta yohitima yoshin cainscatihiqui. Jaa ta noquen Hihbo Jesusen yohuanxon res rehteyaxihqui qui. Sanareneni joquin jaa queyobahinquin.

⁹ Noquen Hihbaan jaa queyoyaxihqui ta cainxon yohitimaton jatihibi hahti hahtipahahcamayaxihqui, Satanasnen yanapanah. Hahan honanti quescapahbo hahxon ta hahan rahteti quescapahbo hahtihiqui, hahcoinquinma bi paranquin.

¹⁰ Papan jato teehihmapanan ta hihcoinai joi nincacatsihyamahibo hihti tiromajaquin jaa yohitima yoshiman paranyaxihqui, queyonicabo.

¹¹ Nincacatsihyamahibo copi ta paramehti shinan Papan jato hinanyaxihqui, yoshin quesahi bi hihcoinai shinanaahbo.

¹² Hihcoinai joi nincacatsihyamaxon bi tiromajati jenipahichaibo jatihibi hihti casticanonoxon ta jascapa shinan Papan jato hinanyaxihqui.

Papan caisai jahuen jihuetaahbo

¹³ Jato jascajayaxihqui bi ta matohon noquen Hihbo queenihqui. Maijamenoxon ta Papan mato caisnishqui, mato teehihmayahnoxon, Dios Yoshiman mato sirijaha hihcoinai joi man shinancoinaiton mato teehihmanoxon. Jaa copi tah non noquen Papa Dios jascabi yohiti jai: Mia copi ta teehihcnihqui Papan, hahquin.

¹⁴ Mato teehihmanoxon ta Papan mato quenanishqui, noquen Hihbo Jesucristonen xaba man bihyaxahnnon hihxon. Non mato yohini joi siripan ta mato quenanishqui.

¹⁵ Jaa honanxon shinancoinquen jeneyamaxahnahue, noquen huetsabaan. Non mato honanmahi joi bihquin siriyanahue, noquen janan non mato yohini joi bihxon, huishaxon rihbi non mato yohini bihquin.

¹⁶ Noquehon shinanxon ta Papa Diosen noque jahuentianbi queyotimahi hahan sirijsaqin shinanti noque hinanihqui. Hahan jointi sirijahti noque hinanquin.

¹⁷ Noquen Papa Dios betan noquen Hihbo Jesucristonen mato jointi sirijanon tah hen mato yocaxonai. Jahuen shinan siri maton jointi janin nianon, man siribo janon, sirijaquin shinanax yohuanaibo man janon.

3

Noque yocaxonnahue hih Pablo jai

¹ Nea quirica janquenjanoxon sca tah non mato yohihi, noquen huetsabaan. Noque yocaxonnahue, mato tocan noquen Hihbaan joi janí quescajarihbibi neno rihbi sca caicananon hichaxon nincacahbo.

² Nincayosmabo ta jaiqui tiroma jonibo. Jaabaan noque bihyamanon noque yocaxonnahue. Nincacoinnica rahsima ta jacanihqui hihxon tah non mato yohihi.

³ Noquen Hihbaan ta mato jenebahintimahihqui. Mato ta coshi hinantihiqui. Tiroma yoshiman mato jahuejayamanon ta mato jistihiqui.

⁴ Non mato yohihi quescabijaquin tah man hahtih. Hahxon bi tah man hahribiyaxihqui, noquen Hihbo shinanxon tah non honanai.

⁵ Noquen Hihbaan mato honanmati tah hen mato yocaxonai, matohon noquen Papa hihti queenai man honannon, Criston mato tenexonni quescajaquin man teneti hahtipahnon.

Teeti ta jaiqui

⁶ Noquen Hihbo Jesucriston janen tah non huetsa joi rihbi sca mato yohihi, noquen huetsabaan. Non mato yohini quescayamahax bi chiquishax noquen huetsabo jihuetaiya hahbetan hiyamabiresnahue.

⁷ Mato tocan tah non chiquishax jihueyamaphonihqui. Man tah man honanai. Non coshin teepahoni quescaribinahue, non teeni man honanai quescaribibi.

⁸ Copijaxonma tah non tsoanahbi piti pihanyamanihqui. Bariyahpan teebahinahax tah non yame rihbi niscan niscanax tee teexon hahpahonihqui, pishinxon mato yocaxon jatsanjamis hihxon.

⁹ Mato yocaxon res piti hahtipahxon bi tah non noquen coriquinin maronihqui, non hahcái quescajaquin maton rihbi janon hihxon.

¹⁰ Mato betan hihxon cah non mato yohinh, teecatsihyamahibo man pimayamanon.

¹¹ Caibo man chiquishax teeyamahi yanca res yohuan yohuanaibohi cah non nincacai.

¹² Jascapa jonibo tah non hihti yohihi, noquen Hihbo Jesucristonen janen yonoquin. Siripi teenahue, matonahbi maton piti pinoxon.

¹³ Caibo yanapanquin hahxonquin jeneyamanahue, noque huetsabon.

¹⁴ Nea huishaquin non mato yohihi joi nincacatsihyamahibo honannahue. Hihtimahpax jan pontenon hihxon jascapa manayamascanahue.

¹⁵ Jascapa tah man maton rahui quescama bi maton huetsa quesa pontequin yohitihi.

Janquenjanoxon yohihi

¹⁶ Jahuen shinan siri hinanquin noquen Hihbaan mato jointi sirijanon tah hen mato yocaxonai, jatihibi tenehax man jointi hihti sirinon hihxon. Mato betanbi jaa jihuenon tah non yocaxonai.

¹⁷ Heen mequemanbi huishaxon tah hen hahan queyoti joi huishascai. Jasca ta hen jai, hean raanai joi jatihibi ta heen huishaya qui.

¹⁸ Noquen Hihbo Jesucristonen jahuen shinan siri mato hinanah jaya jihuenahue.

1 TIMOTEO

Timoteo qui Pablonen raanni joi

Timoteo qui Pablonen raanai

¹ Jesucriston raanti joni jahue hah ta Papan hea janishqui, noque teehihmanicaxon. Jesucriston rihbi ta hea jascajaquin yohinishqui. Jahuen raanti joni sca tah hen qui. Jaan noquen hohcha sohuaxona hahbetan sca non queyoyamanox manayaxihqui tah non honancoinai.

² Hea Pablón tah hen mihqui nea joi raanai, heen baque Timoteon. Heen baque coin tah min qui, hean yohihah min Papa Dios qui hinamehni. ¿Papan shinanya min jihueyamahin? ¿Mihon shinanxon noquen Hihbo Jesucristo betan Papan sirijaha min jointi siripax jihueyamahin?

Hihcoinicamaquaquin haxemahibo qui coirametabho

³ Macedonia main cacatsihxon hen mia yohini quescabibi Efeso jema janin banehue jaamajaquin honanmahibon pontenoxon.

⁴ Judiobaan shinanax yohuanai joibo nincayamascahabo jato yohihue. Tsoabo noquen xenibo quin hihxon ta jaton xohtabo caibaan toponpaquehiihqui, tantixonma. Jascapa joibo ta yanca qui, hahan jahua bihtima. Jascapa join tah non noquen Hihbo nincacointi haxeyamahi. Jascapa joibo nincayamahahbo jato yohihue.

⁵ Jaabaan jascapa joi haxemahi bi tah non joni huetsahon shinanahbo hihxon non jato haxemahi noquen. Noquen Papa nincacoinxon ponte jihuetai honanax jascari jihuexon hohchataxma jihuexon joni huetsahon shinanscanon hihxon tah non jahuen joi siri yohihi.

⁶ Papan joi jenebahinax ta caibo yanca res yohuan yohuansciqui.

⁷ Honanxonma bi ta Moisesnin huishani joi honanmacatsihcanihqui. Yohuanax ta Jasca tah qui hihcanihqui, yanca res. Jaabaan haxemahi joi honanxonma bi ta honanmacatsihcanihqui.

⁸ Pontejaquin haxemaha ta Moisesnin huishani joi siri qui. Non tah non honanai.

⁹ Ponte jihuetaibo pontenoxonma bi ta siripi jihueyamahibo pontenoxon Papan Moises huishamanishqui. Jaa honanxon tah non jaamajaquin hahyamahi. Pontema jihuetaibo; yohitimabo; Papahon shinanyosmabo; hohchataibo; tiromabo; Papan shinanjomabo; jaton papa, jaton mama rishquihibo; joni rehtemisbo;

¹⁰ tsinihibo; hahbe bebo betan hihcatsihquibo; joni yometsohbo; quesamisbo; paramisbo; ponte joi nincayamahibo. Jascapahbo copi ta Papan Moises huishamanishqui.

¹¹ Criston joi siri ta ponte joi qui, hahan Papan shinan honanti. Jaa hihti siri noquen Papan ta hea yohinishqui, jaa joi siri hen honanmahi sca jihuemon.

Hahxon tah min jai hahti

¹²⁻¹³ Mian hea coshijaha tah hen miin joi siri jato honanmahi, Hihbon, hih tah hen jai. Hea tah hen tiromahi noquen Hihbo qui yohuanpahonihqui. Jaa tiromajacatsihquin tah hen noquen huetsabo hean tiromajapahonihqui. Jaa hichaqui tah hen jihuepahonihqui. Hea jascapa jihuetai bi ta hea caisnishqui, hen sirijayaxihqui honanxon. Criston noque hahxoncoinai honanyamahax tah hen jascapa jihuepahonihqui. Jaa copi ta hehon hihti shinanax hea caisnishqui. Hahxon tah min jai Hihbon hih sca tah hen jai.

¹⁴ Jahuen shinan yohuashihxonma ta hea hinanresnishqui, jahan hen shinannon hixxon, jahuen joi hen shinancoinnon hihxon rihbi.

¹⁵ Hohchataibo teehihmahia ta Jesucristo main jonishqui. Jaa ta bihcointi joi qui, jathihxonbi bihti. Jatihibi jonibo hohchayahpabo hihqui bi tah hen hea hashoan hihti hohchaya hilpahoniqui.

¹⁶ Hea jascapa hihqui bi ta hehon hihti shinanaxon hea tenexon jaan heen hohcha sohuaxonnishqui. Jahuentiho tiromabo jaan tenehi honanahbo ta hea tenenishqui. Nincacoinax queyoyamanox jihueyaxihquiaan honannon hihxon ta hea tenehishqui.

¹⁷ Noquen Papa ta jathihbichina noquen quiquin hapo qui, japhahonibaana, jayaxihquiaana rihbi. Mahuayosma, noquen Papa. Noquen jistimahi. Jaa huesti ta noquen Papa qui. Jaa yohinahue: Mia tah min Quiquin Hihbo qui Papan. Shinancoinya siri tah min qui, hahquin jascabijaquin yohinahue.

¹⁸ Mia tah hen hihti yohihi, heen baque Timoteon, Papan shinanyaxon mia yohinibho quescajahue. Jaabaan yohini joi shinanhahnan hihti shinancoinnon Papan joi nincamahue.

¹⁹ Shinancoinquín jenexonma ponte jihueta shinan jenexonma rihbi jato nincamahue. Ponte jihueta shinan jenexon ta caibaan shinancoinyamascaíqui. Tiromabo sca jai.

²⁰ Jascapahbo ta Himeneo betan Alejandro qui. Jaabo rabe tah hen Satanás hinanscaí, Papa qui tiromahi yohuantima honanahbo hihxon.

2

Noquen Papa yocaxonti

¹ Jaa copi tah hen nea pari mato yohihi. Papa yocanahue. Pishinaibo yocaxonnahue, Papan jato hahxon pishinaibo rihbi yocaxonquin. Jan hahxonai copi Hahxon tah min jato jai Papan hihnahue, jatihibichina.

² Quiquin hapobo yocaxonxon texe hapobo rihbi yocaxonnahue, non raquetaxma sca jihuemon hihxon, rehtenanaibo jayamanon hihxon rihbi, shinan siriyabo non jihuemon hihxon rihbi. Papahon shinanhahnán non siripi jihuemon hihxon rihbi yocaxonquin.

³ Non jascajaquín Papa yocaxona ta siri qui. Non jascajati cahen noque jihuemanica noquen Papa queenih.

⁴ Jaan ta jatihibi jonibo teehihmacatsihqui, hahan jihuematici joi jato nincacoinmaquin.

⁵ Jaa huesti ta naihoh queha Papa qui. Noquen Papa janinxon noque yocaxonai ta huesti rihbi qui, joni hax bi Jesucristo. Jaan ta noque noquen Papan joi yohihiqui.

⁶ Jatihibi noquebo queyoyamanox manatahbo hihquish ta hinamehnishqui noquen hocha copi mahuanoxon. Jonibo nincamatí siriscayia ta jaa joi Papan nincamascanishqui.

⁷ Hen jascajanon hihxon ta hea caisnishqui, jahuen joi yohicinnón hihxon, jahuen raanti joni rihbi hea janon hihxon. Hihcoin tah hen jai. Quesayamahi. Judiomabo honanmanica hea janon hihxon ta hea caisnishqui, Papan joi coin yohixon hean jato nincacoinmanon.

⁸ Jatihibi janinxon bebobaan noquen Papa yocati jato honanmahue. Sinaxonma, join bahchinnanxonma, hohchajomaxon, jatihxonbi noquen Papa yocacahbo tah hen yohihi.

⁹⁻¹⁰ Haibobo rihbi yohihue. Chopá siribo sahueresnahue, haibobon. Chopá sirihax bi hahan tsinitima. Hahan tsiniti bohuexetijoma janahue. Oro morobo, copi joxo morobo, copi chopabó shinanyamanahue. Jascapahbo shinanquinma bi jato yanapannoxon caibó hahxonti shinannahue. Papahon shinanai haibobaan ta jascajanicah qui hahquin jato yohihue.

¹¹ Tsinquitaito tocan haibobo netexon nincacahbo jato haxemahue.

¹² Haibobaan ta bebobo honanmatimahiqui. Bebo yonoyamarihbiquin. Netexon nincacoinahbo jato yohihue.

¹³ Adan pari ta Papan joni janihishqui. Jaa pecaho cahen Eva.

¹⁴ Adan ta Satanásnen paranyamanishqui. Jahuen haibo caya ta parannishqui. Paranah hohchayahpascaí.

¹⁵ Jaabi ta haibobo Papan teehihmayaxihqui, baquebo bihxon hanijahanan shinancoinquín jeneyamahiboya, joni huetsahon shinanquin jeneyamahiboya, tsinixonma Papahon shinanquin jeneyamahiboya.

3

Pastoroyaxihquibo honantijati

¹ Nincacointi ta nea joi qui. Pastorocatsihquibo ta siri tee queenihqui.

² Pastorobo janon nescapahbo jonibo caishue. Jahua hahqui yohuantí yama. Huesti haiboya hpa. Tiromati qui hinamehyamahi. Hahri coirametai honan. Sirijaquin shinanax yohuannica. Jahuen xoboho nocotaibo jato sirijaquin bhnica. Papan joi nincamatí shinanya.

³ Pahen Yamahi. Joi coshin yohuanaima. Sinayamahi. Join bahchinanti shinanyamahi. Coriqui bhmisma.

⁴ Jahuen xoboho jihuetaibo sirijaquin jihuemanicah. Jaan yohihah jahuen baquebaan joi bichinxonma nincacai.

⁵ Jahuen baquebo jihuematici honanyamaxon ta jenquetsahaxonbi jaan Papan caisaibo nincacatinahiqui.

⁶ Rahma Papa qui hinamehtipibo ta pastorotimahiqui. Hea ta hen hashoan shinanya qui hih jan jamis, paramehtax. Jascani copi ta Papan tiroma yoshin casticanyaxihqui. Jascapa tiroma shinan bhmis hihxon behnabo pastoromayamahue.

⁷ Nincacoinyamahibo siripi hahqui yohuanai nincaxon pari pastoromahue. Tiromahi hahqui yohuanaboya Satanásnen jaa tiroma shinan hinanmis.

Pastor yanapananaxihquibo honantijati

⁸ Pastorobaan yanapannicahbo rihbi ta shinanya jonibo hihihiqui. Yohuanresaima. Pahenyoosma. Coriqui bihmisma.

⁹ Papan yohinihxonma bi rahma nincamahi joi ta Criston joi qui. Jaa joi ta jaton jointinin yanapannicahbaan bihihiqui, ponte jihueta honanax jascabih sca jihueta.

¹⁰ Jato tanatahhue. Siribohi honanscaxon jato caishue, yanapannicahbo hihnon hihxon.

¹¹ Jaton haibobo rihbi ta shinanya hihihiqui. Tsoa qui bi yohuanyamahi. Pahenyoosma. Shinanquin sirijaxon hahcae.

¹² Yanapannica cahen huesti haiboyahpa. Jaton baquebo, jaton xobon jihuetaibo sirijaquin jato jihuemaquin.

¹³ Sirijaquin yanapanaiyoya ta jato qui siripi yohuancantihqui. Sirijaquin yanapanax sca ta Jesucriston joi yohiti qui hihtimahtimahi qui.

Yohinihxonma bi Papan nincamascai

¹⁴ Mihqui histon cacatsihxon bi tah hen huishaxon mia yohihi.

¹⁵ Hea basi sca jaiya tah min honantihi, Papan baquebo jenquetsahpi jihuetaihqui hihxon. Papan baquebo rahsi ta jan caisaibo qui, jihueticaxon jan caisai. Jaabo ta Criston joi coin bihnica hoi qui, Cristo qui hihcoini yohuanaiba.

¹⁶ Papan yohinihxonma bi rahma noque nincamahi joi ta hahan rahteti qui, tsoan nincanihma joi. Jasca coin tah qui.

Yorayaphahax ta Cristo cainnischqui. Ponte shinanya jan hihqui ta Dios Yoshiman sca noque jismanishqui. Jan main nichi ta Papan yonotibaan jisnishqui. Judiomabo sca ta jahuen joi yohicaniqui jahuen jihuetahbaan. Nai namanxon ta nincacoincaniqui. Naihoxon sca ta Papan bihinhninishqui.

4

Papan joi jenebahinyaxihqui

¹ Dios Yoshiman sirijaquin yohihi joi sca tah hen mato yohihi. Noquen Hihbo joti hochoma sca jaiya ta caibaan Cristo jenebahinyaxihqui. Tiroma yoshiman joi nincaxon Cristo jenebahinqui, parannica yoshin nincaxon.

² Jenebahinahbo hihxon ta Criston joi yohicoinihcamaxon yoshiman joi honanmayaxih-canihqui parannicaabaan. Ponte jihuetai honanpahoni que bi jaton shinan masascai, ponte jihuetai shinanyosmabo sca.

³ Queeyahpatima joi ta yohicaniqui. Bebo rihbi haibaan bihtima sca ta jacanihqui. Samati ta jato jayaxihcanihqui. Jascaya ta jacanihqui, jahuen haibo betan bebo jihuemon Papan janí que bi. Piti rihbi ta Papan hinannishqui, nincacoinnicabaan bihnon. Bihxon Criston joi honancoinxon, Hahxon tah min noque jai Papan, hahcabio noque hinanquin.

⁴ Papan hahní jatihibi ta siri qui. Mia copi tah non jaresscrai Papan hih non jaiya ta non bihtimabo yamahihqui.

⁵ Non jascachiya ta noquen piti Papan hinanah pitibo sca jatihi qui, jahuen joi yohixon non Papa yocacai copi.

Jesucriston joni siri

⁶ Hen mia yohihi joibo rahsi noquen huetsabo honanmahax tah min Jesucriston teex-onnica sca jatihi. Jascapahax Criston joi nincacoinax hen mia nincamani joi siri rihbi honanquin sirijahax tah min miin shinan coshi sca jatihi.

⁷ Honanma yohuanbo nincayamayaxahnhue. Quesahi yohuanbo nincayamabireshue. Papahon shinanti caya shinan shinanhue.

⁸ Tee teequin tah non noquen yora coshijahi, hicha tahma. Jascayaquin hicha tahma coshi bihxon bi tah non Papahon shinanquin jatihibi shinan sca non bichi. Rahma jascapa shinaman jihuetax tah non jahan rihbi noquen Hihbo betan sca non jihueyaxihqui.

⁹ Jasca coin tah qui. Jatihibichin jaa nincacoinpahinon.

¹⁰ Honanahbo hihquish tah non tee teetai, coshi coshihi. Noquen Papa ta jihuetaihqui. Jatihibi jonibaan jihuemanicahxon bi ta nincacoinax hahqui hinamehtaibo rahsi jaan jihuematihqui. Jaan noque jihuemayaxihqui honanxon tah non sirijaquin sca shinanai.

¹¹ Hen mia yohihi joibo honanmaquin jato yohihue jascahahbo.

¹² Beronanxon bi hiitmahxonma jatihibi jonibo nincamahue. Mia ponte res yohuanai quescari noquen huetsabo rihbi yohuanahbo hihquish yohuanhue. Mia ponte res jihuetai quescari jihuetahbo hihquish jihuetahue. Mian joni huetsahon shinanai quescayaquin hahcabio hihxon jahue. Noquen Papa mian nincacai quescayaquin nincacahbo jahue. Mian pontejaquin shinanai quescayaquin shinanahbo hihxon jahue.

¹³ Hea noconon caman tsinquitaito Papan huishani joi jato nincamahue. Jaa nincamaxon siripi jihuetahbo jato yohirihbihue honanmaquin.

¹⁴ Noquen Papa yocaxon ta jahuen pastorobaan Papa hahxonti tee mia hinannishqui. Papan shinanyaxon ta mia yohicannishqui, Papan joi nincamanica mia janon. Jaa joiya teeti shinanbehnoyamayaxahtahi min.

¹⁵ Hen mia yohihi quescabijahi jihuehue. Jaa res shinani jihuetai. Min hashoan shinan hichacanahi jisibo hihquish jascahue.

¹⁶ Coiramehue. Honanmaquin rihbi coiranquin. Hen mia yohiha joibo bihcoinhue. Jascajquin tah min Papan jihuematii bahin nihxon mia nincacaibo rihbi min nihqui-hinyaxihqui.

5

Noquen huetsabo yohiti haxemahi

¹ Yosibobo pontequin coshin yohiyamahue. Miin papa yohiquin hahcajaquin tah min jato sirijaquin yohithi. Yosibomabo rihbi miin huetsabo hahcajaquin yohuanquiuhnhue.

² Yoxabobo rihbi miin mama hahcajaquin yohuanquiuhnhue. Yoxabomabo rihbi miin chocabo hahcajaquin yohuanquiuhnhue, sirijaquin shinanxon.

³ Yononmacoinai haibobo yanapanhue jaabo pishinaibo hinanquin.

⁴ Baqueyahpa yononma jaiya, jahuen baque yamahi bi jahuen bababo jaiya, jaabo pari yohihue yanapanaboo, jatom maman jato hanijani copiquin sca yanapanaboo. Nincacoinnicaxon ta jaabaan pari jaton papa jaton mamabo yanapantihiqui. Jascajati haxehaboo hihxon jato honanmahue. Papan jisi ta jascajaha siri qui.

⁵ Yononmacoinai haibaan ta jaa huesti sca jihuexon Papa res shinanihqui. Jascapahton ta Papa yocabahinaxon yocashinaxon joni huetsa yoca yocaxoniqui.

⁶ Jahuen bohuexehtibo jahuen rajotibo jahuen chopas siribo shinani nichi yononma ta jascajayahamahiqui. Jascapa ta mohitahpahax bi shinan yamahi qui, mahuatax quescapi.

⁷ Nea hen mia yohiha joibo jato sirijaquin yohihue, jato qui yohuanti yamanon.

⁸ Nincacoinnicaton ta jahuen baquebo, jahuen haibo, jahuen huetsabo, jahuen papa, jahuen mama, jaabo pari bihxontihiqui, piti, jahuaborabo rihbi. Jaatian sca jahuen jenabo rihbi bihxonquin. Jato bihxonyamahibaan ta Criston joi potascaiqui. Nincayosma mentan hashoan tiromascái.

⁹ Noquen huetsabo tsinquixon noquen chocha yononmabaan jane huishapaquehue. Nescapahbo rahsi huishahue: sesenta bari huinoscaibo. Huesti bebo betan hihniño.

¹⁰ Jan yanapanquin siribojaxonpahoni hichaxon honanaibo haibo. Jahuen baquebo sirijaquin hanijapahoni. Jahuen xobohoxon nincacoinaibo pimapahoni. Jahuen baque hahcajaquin nincacoinnicabo yanapanpahoni. Nincacoinaibo yomanahaiton yanapanpahoni. Jatihibijaquin sirijaxonti shinanya jihuapehoni.

¹¹ Yoxabohaxma bi yononmabaan jane huishayamahue. Jascapahbaan ta Cristo shinanyamascaxon bebo bihribicatsihcanihihqui.

¹² Jascapahbo ta Papan jato siri jisyamahiqui, noquen huetsabo yocaxonnica japanixon bi jenesecaiton.

¹³ Chiquishaibo sca ta jathihi. Xobo tihibi betseti. Chiquishax yohuan yohuanresi. Jahuen caibo qui yohuanrihbi. Honanihma yohuanresi.

¹⁴ Jaa copi tah hen mato yohihi. Yoxabohaxma bi yononmaxon ta bebo bihtihiqui. Jahuen baquebo hanijaquin sirijaquin. Jahuen xobon jihuetaibo coiranquin. Jascajahiya ta maton rahuí mato qui yohuantimahiqui.

¹⁵ Caibaan ta Satanas sca chibanihqui, bahinma sca bocani.

¹⁶ Jenaboyahpa yononma jaiya ta jahuen nincacoinai jenabaan jaa yanapantihiqui, noque huetsabaan jaa yanapanyamanon. Noque huetsabaan ta jenajoma yononmabo yanapantihiqui.

¹⁷ Sirijaquin nincamahi pastorobo rabejaquin copijati shinannahue hinanxon tian tihibi. Papan joi yohixon honanmahi nincamanicahbo hashoan sca hinanhitiquin.

¹⁸ Huishani joi ta nescapah qui: Trigo bero xehmequin jamacai vaca tah min conex-timahi, hihqui. Teenicaton ta jan cananai bihtihiqui hihqui huetsa huishani joi rihbi.

¹⁹ Pastorobo qui tiromahi yohuanai nincayamahue. Rabe hiyamahax quimisha chani-coinnica jaiya pari nincaquin.

²⁰ Hohchaquin jenecatsihyamahibo jato pontejaquin yohihue tiromati qui raquetahbo. Jatihixonbi nincanon bi jato hihti yohihue.

²¹ Papan noque jisnon bi Jesucriston rihbi noque jisnon bi jan caisai jahuen naihoh queha yonotibaan rihbi noque jisnon bi tah hen mia yohihi. Hen mia yohihi joibo bihcoinhue caibo mentan huetsahon hashoan shinanxonma bi jascapahbo rahsi hahquin hahan shinanxon.

²² Pastorobo janon hihxon jato honanquin sirijaxon pari jato caishue. Huetsa joni hohchaya hihquiya hahbe hohchaya jayamahue. Hohchajoma siri jihuehue.

²³ Jene paxa rahsima bi hompa pishca rihbi xehascahue, miin poco hisinrahshihi rohanoxon.

²⁴ Noquen jisnon bi ta caibo hohchatihqui, Papan jato casticanyaxihqui non honannon. Huetsabo cahen hohcharihbihi, chini sca non honanyaxahnnon.

²⁵ Yanapanquin hahxonaibo ta honantib bi res qui. Non rahma honanyamahi bi ta Papan copiquin jato hahxonaiya non honanyaxihqui.

6

¹ Jatihibi patoroyahpabo yohihue, jaton patorobaan yonohah hahcabo. Jato nincati ta jaiqui hahxon, noquen Papa qui jaton patorobo tiromahi yohuanyamahahbo jaton jonibo jascjahue. Papan joi qui rihbi tiromahi yohuanyamahahbo.

² Nincacoinnica patoroyahpabo rihbi yohihue. Jaton huetsascaxon yonohah bi nincayamascati shinanyamahahbo jato honanmahue. Hashoan sca nincati ta jaiqui, jaabaan teexonai joni nincacoinnica sca copi. Jahan shinanxon copi hashoan rihbi teexonquin. Jascjahabo jato yohi yohihue honanmaquin.

Nincacoinnax siri jihueta

³ Jaamajaquin yohihibo honanhue. Jaabo ta noquen Hihbo Jesucriston ponte joi bihyamahibo qui. Hahan Papa honanti joibo rihbi biyamahibo, honamabo.

⁴ Jascapahbaan ta honan hihqui shinanxon bi jahuabi honanyamahihqui. Join bahchianti res shinanquin. Yohuanai nincaxon joi bichinti res shinanquin. Jascapa shinanyabaan ta jonibo notsi notsimaresihqui. Sinacannati shinanmaresquin. Noquen huetsa qui yohuanti shinanmaresquin. Huetsahon tiromajaquin shinanmaquin.

⁵ Jascapa joi bichish ta tiroma shinanyabo join rehtenanscainqui Papan jojomabohax. Noquen Hihbo bihxon ta jayaxon coriqui bihti shinancaniqui honanyamaxon.

⁶ Noquen Hihbo bihxon tah non jayaxon coriqui bihti shinantimahi. Huetsa caya tah non hicha bihcoinai, coriqui tsamancatsihxonma bi shinanquin sirjaxon.

⁷ Jahuajomabai tah non nea nete qui cainnihqui. Jahuabi rihbi tah non caquin sca boti hahtipahyamahi.

⁸ Piti jaxon chopra rihbi jaxon tah non jayaxon shinanquin sirijascatih jahua hashoan queenyamahi.

⁹ Coriquiyahpacatsihquibo ta tiroma yoshiman paranihqui. Jato bihnoxon cahen jato shinan hinanquin. Jonibo tiromajanoxon ta jato mai meha shinanbo queenmahi qui jato queyobahinnoxon. Hicha tiroma queenti shinan cahen jato hinanquin. Masataibo sca janon cahen jato jascapahbo shinanbo hinanquin.

¹⁰ Coriqui queenyoraxon ta jatihibi tiroma shinanbihresscacanihqui. Coriqui queenxon rihbi ta Criston joi jenebahinscacanihqui caibaan. Criston joi jenebahinxon sca masa shinanscacanquin hicha.

Hihcoinqaquin Cristo jenetima

¹¹ Jascapahbo queenyamabireshue, Papan baquen. Ponte hihti shinanhue, Papa shinanquin. Jan noque hahxonai honanrihbiquin. Joni huetsahon shinanrihbiquin. Noquen Hihbo jenexonma tenequin Honaxonbi rihbi caibo yohiquin.

¹² Shinan camahahtanxon Cristo hahxonhue jaa chibanquin. Hichaxon jisibo tah min Cristo bihniqui. Jaatianbi ta mia queyoyamanox mananica sca Criston mia yohinishqui. Min queyoyamanox manascai honanquin sirijahue.

¹³ Noquen Papan ta jatihibi mohitahpabo janianishqui. Jahuen nincanon bi tah hen mia yohihi. Jesucriston nincanon bi rihbi. Jaan ta Poncio Pilato yohinishqui: Hea tah jihuemanicah qui, hahquin.

¹⁴ Noquen Hihbo Jesucristo jonon caman jahuen joi jascabijaquin nincahue rishtaxonma. Mihqui jahuabi yohuan jayamanon siriresi jihuehue.

¹⁵ Noquen Hihbo joti tianbi ta Papan jaa raanyaxihqui, jaa huesti noquen quiquin hapo siri hihxon. Jaa ta jatihibi quiquin hapobaan quiquin hapo qui. Jatihibi hihbobaan hihbo rihbi.

¹⁶ Jaa huesti ta mahuayosma qui. Jonibaan teneyosma xabapan ta jaa jihueta. Tsoanbi ta jaa jisyamanishqui. Tsoanbi rihbi tah non jaa jisti hahtipahyamahi. Mia tah min Xaba Hihbo qui Papan, Noque jascabijaquin hihbojahue hahnhue, jascajaquin rahan hih hen janon.

¹⁷ Coriquiyahpabo sca sirijaquin yohihue, coriquiyahpahax tah hen hea hashoan shinanyahpa qui hihyamahue hahquin yohiquin. Jaton coriqui ta yamacahintihqui. Jaton

coriqui shinanyamahahbo jato yohihue. Coriquima bi noquen Papa Dios shinanahbo jato honammaquin. Noquen Papan ta noque jatihibi hinanihqui non jenimanon.

¹⁸Jaa coriquiyahpabo yohihue caibo rihbi yanapannon. Siribojaxonnon jato yohiquin. Pishinaibo jato hinanon yohuashihxonma.

¹⁹Jascajaquin ta jaya jihuecointi tsinquicaniqui jihuecoinyahnoxon.

Quirica queyoxon yohihi

²⁰Papan mia hinanni tee jisquin sirijahue, Timoteon. Rishtaya yohuan yohuanaibo nincayamayaxahnhue. Honanihcamaxon mia joi bichinaibo rihbi nincayamaquin.

²¹Honanihcamaxon ta Papan joi bihquin bi cahnecaniqui caibaan.

Papan shinanya jihuenahue, mato.

2 TIMOTEO

Timoteo qui Pablonen raanni joi, jahuen rabe sca

Timoteo qui Pablonen raanai

¹ Hea Pablo tah hen Jesucriston raanti joni qui, jascajahuhe Papan hea janí. Non jihuemon Papan yohini quescabijaquin ta Jesucriston noque teehihmahihqui. Jaa joi yohinica tah hen qui.

² Mihon shinanxon tah hen nea quirica huishaxon mihqui raanai, heen baque Timoteo. ¿Papan shinanya min jihueyamahin? ¿Mihon shinanxon noquen Hihbo Jesucristo betan Papan sirijaha min jointi siripax jihueyamahin?

Cristo qui hinamehxon caibo scayohiti

³ Ponte jihueta honanax jascarihbi jihuehahnan tah hen heen xohtabaan hahpahoni quescajaquin noquen Papahon shinancoinai. Hahxon tah min jaa jai Papan, hih tah hen jai, mia yocaxonbahinaxon mia yocaxonshinaquin.

⁴ Hea jahuiya min benani shinanrihbixon tah hen mia hihti jiscatsihqui, hihti jenimanoxon.

⁵ Papan joi min nincacoinai tah hen shinanrihbibi. Miin chichi Loidanen pari nincacoinni quescabijaquin tah min nincacoinai. Miin mama Eunicinin rihbi nincacoinni quescabijaquin tah min mian rihbi nincacoinscai. Honancoin tah hen jai.

⁶ Jaa copi tah hen mia yohirihbibi, min shinanbehnoyamanon hihxon. Noquen Papa hen yocacaiya ta Papan mia tee hinannishqui jahuen joi yohiti shinan min bihnnon. Jaa shinan behnajahue.

⁷ Raqueti shinan ta Papan noque hinanyamahihqui. Coshiti shinan caya ta noque hinannihqui, joni huetsahon shinanti shinanbo rihbi, teneti shinan rihbi. Jascapahbo shinanbo ta noque hinannihqui.

⁸ Noquen Hihbaan joi yohiti qui hihtimahyamahue. Noquen Hihbo copi hen sipo xoboho tsahoxonai bi hea shinanax hihtimahyamahue. Noquen Hihbaan joi copi mia tiromajahibaan bi tenehue, Papan mia coshijahah.

⁹ Papan ta noque teehihmanishqui. Non jihuecoinscanon ta noque quenanishqui. Non sirijaquin hahcaí copima bi jaabi queenxon noque teehihmaquin. Jahuen shinanya non jihueyaxahnnon hihxon Criston noque teehihmanon ta Papan yohinishqui, neateman bi res.

¹⁰ Jan jascajahi non honanscanon hihxon ta noque teehihmanica Jesucristo main jomanishqui. Non mahuayamascanon bi queyoyamanox mananon hihxon ta jahuen joi siri noque honanmanishqui.

¹¹ Jaa joi siri yohinica hea janon hihxon ta hea caisnishqui. Jahuen raanti joni rihbi hea janon. Jahuen joi siri nincamanicah rihbi hea janon.

¹² Jaa copi tah hen nescari hohmis hohmisai. Hohmis hohmisax bi tah hen hihtimahyamahi. Jaa hen shinancoinai tsoa quin tah hen honanai. Jahuen joi siri hen yohinon ta hea raannishqui. Castican sca jonoxon caman jan yohini quescabijati jan hahtipahi tah hen honanai.

¹³ Jesucriston mia joni huetsahon shinanti shinan hinanah bijnixon jan yohini rihbi nincacoinax jihuehue. Mia tah hen joi coinbo yohiniqui. Jaa joibo shinani jihuehue.

¹⁴ Dios Yoshin ta noque betan hihquiqui. Jaa ta mia yohinishqui, noquen Hihbaan joi min yohinon hihxon. Jaa joi huetsajaxonma jeneyamanoxihhue.

¹⁵ Hea yanapancatsihyamaxon ta Asia janinhahbaan jatihibichin hea jenebahinhoxqui. Min tah min honanscrai. Figelonen bocabi hea potabahinquin. Hermogenesnen bocabi hea potabahinquin.

¹⁶ Onesiforo, jaabo tah hen Papa yocaxonai, jatohon jan hihti shinannon. Hicha coti ta Onesiforonen hea yanapanpahonishqui, hen sirijaquin sca shinannon. Hea sipo xoboho tsahotai bi ta hea jisi joti qui hihtimahyamanishqui.

¹⁷ Hihtimahxonma bi Roma jema janin nocoxon, hea bena benaquin, hea meranoxon caman.

¹⁸ Efeso jema janinxon rihbi ta hea hihti yanapannishqui. Jaa tah min sirijaquin honanai. Noque bichi joxon tian noquen Hihbaan hahan hihti shinanxon hahxonti tah hen yocaxonai.

¹ Mia rihbi Jesucriston shinanya jihuehahnan coshiscahue, heen baquen.

² Hichaxon nincanon bi hen mia haxemani joibo shinanyahpa jonibo haxemaribihue, jaabaan sca caibo rihbi haxemanon hihxon.

³ Jesucriston siri sontaroxon yobaxon sca tenehue.

⁴ Sontarohax tah non noque sontarohihmahiton yohihi quescabijaquin hahnoxon tsoabi non huetsa tee janin cayamascai.

⁵ Jaton coshi tanacatsihquibaan rihbi ta bishquihihti hihbaan yohihi quescabibi bishquihiyamaxon jahuabi bihtimahiqui.

⁶ Teemis huaijanicahten pari ta jahuen huai bimihi bihtihiqui.

⁷ Hen mia yohihi joibo sirijaquin shinanhue. Noquen Hihbaan ta mia jatihibi sirijaquin honammatihiqui.

⁸ Jesucristo shinanbehnoyamahue. Jahuen joi siri yohiquin hen chanicoinai quescabibi ta jaa mahuatipish bi huenirhbinishqui. David ta jahuen papa xeni japahonishqui.

⁹ Jaa joi siri hen yohicoinni copi tah hen sipo xoboho tsahotai, tiroma joni sipo xoboho tsahona quesa. Hea jascajahibaan bi ta Papan joi pantehahma caichihqui.

¹⁰ Jaa copi tah hen jatihibi tenehi, Papan caisaibo nincamanoxon hihxon. Jaabaan rihbi Jesucristo bihcoinax queyoyamanox mananon hihxon tah hen tenehi, jahuen queyoyosma xabapan jihuetahbo hihxon.

¹¹ Hihcointi ta nea yohanbo qui. Hahbetanbi muhutax tah non hahbetanbi rihbi sca jihueyaxihqui.

¹² Tiromajahahbaan bi tenexon tah non hahbetan rihbi jonibo jihuemayaxihqui. Jaa ta heen jahuama qui hih non jaiya ta jaa rihbi noque qui jascarihiyaxihqui, jaabo ta heen jahuamabo qui, hihqui.

¹³ Jan yohihi quescabija non jayamahi bi ta jaan hahquiqui, jan yohihi quescabijaquin. Jahuen joi yohihi ta Henama ta qui, jaa jatimahiqui.

Hahcoinai teexonnica

¹⁴ Jascapa joibo jato yohihue, shinanbehnoyamahahbo. Noquen Hihbaan jisnon bi tah hen mato yohihi hihxon jato yohihue, yohuanabio joi bichiinnannanyamahahbo. Join bahchinnannanxon tah non nincacaibo shinan hinanyamahi. Jato tiromajaresquin.

¹⁵ Siri teexonnica mia Papan jisnon hihxon min hahtipahi tih hahhue, jahua copi hihtimati yamanon. Jato pontequin jahuen joi jato honanmacoinhue.

¹⁶ Papan rahninay yohanbo nincayamahue. Jascapa yohanbo nincacax ta hashoan sca Papan shinanjomabio jaticaniqui.

¹⁷ Shomon haniihcamahi ta jaton yohan caitihiqui. Jascapa yohuanya rabe ta Hime-neo betan Fileto qui.

¹⁸ Papan joi coin jenebahinax ta yohuancaniqui: muhutabio ta Papan hueniscahoxqui, hihqui. Jascapahbo yohanquin ta caibo nincacointi jenemacanihqui.

¹⁹ Jascajahibaan bi ta Papan joi coin jascabi sca banetihqui, huetsajahama. Papan ta honantiaquin nescajaquin huishamanishqui: Jahuenaabio ta Hihbaan honanrihqui hihqui. Noquen Hihbo hihbomahibaan ta hohchati jenetiaiqui hihqui huetsa jahuen huisha rihbi.

²⁰ Hapon xoboho ta horo quentiboya copi yami quentibo jatihi. Jascapa rahsimia bi jihui xaxobo rihbi, mai quentibo rihbi jatihi. Caibo quenti ta hahqui pitibo naneti qui. Caibo rihbi ta hahqui huecaxbo naneti qui.

²¹ Jahuen rishtachoiqutai joni ta siriscainqui, rishtajoma quenti quescapah, hahqui pitiboni quescapah can, siri. Xobo hihbo jaya teeti sca. Jayaxon siri teebo hahti sca jai.

²² Jascapahue: mai meha beronanbo hihqui quescari rishta shinanyahpabo jaiya jato tecayacahinhue. Pontehihti shinanhue. Noquen Hihbaan noque hahxonai honanrihbi. Joni huetsahon shinanrihbi. Jointi siripax jihuehue. Rishtajomaxon noquen Hihbo hihbomahibo betan tah min jascari jihuetai jai.

²³ Honanmabo hihresi yohan yohanax join bahchinanaibo betan hihyamahue. Jascapa yohuaman ta jonibo sinamahiqui. Min tah min honanai.

²⁴ Rainyamaxonma bi tah min jatohon shinanxon Papan jonixon jatihibi jonibo yohitihi. Sirijaquin jato honanmaquin. Jato tenequin.

²⁵ Mia nincacatsihyamahibo honahax bi yohanxon pontejaquin yohihue. Huetsa shinan rah ta Papan jato hinantihiqui, jahuen joi nincoinahbo hihxon.

²⁶ Tiroma yoshin queenai quescabijaquin jaabaan hahnon hihxon ta tiroma yoshiman jato hihbojanishqui. Jan jato bihni que bi ta Papan joi honanxon yoshin tenetihiqui.

¹ Nea honanhue: nete queyoti nea pishcascaia ta hohmis hohmis yaxihcanihqui.

² Nescapahbo ta jayaxihqui qui. Hahmebi jahuen yora queemehtaibo. Coriqui hihti queenaibo. Hea tah hen siri bi res qui, hihqui bo. Hea tah hen joni huetsa mentan hashoan shinanya qui hihqui bo. Rishtaya yohuanmisbo. Jaton mama, jaton papa nincayosmabo. Hahxonah bi Hahxon tah min hea jai hihcatsihyamahibo. Noquen Papahon shinanyosmabo.

³ Jonibohon shinanti shinanjomabo. Rainyamati jeneyosmabo. Joni qui tiromahi yohuanmisbo. Jaton yora coirameti honanyosmabo. Sinabo. Siriti queenyosmabo.

⁴ Paranmisbo. Shinanjomaxon hahresaibo. Jaton jointi soohihqui camahax Hea tah hen shinanya qui hihqui paramehtaibo. Papahon shinanihma bi mai mehabo jai quescajati jenipahichaibo.

⁵ Papahon shinanihcama jaax bi Papan coshijoma jihuetaibo.

Jascapahbo tecayacahinhue. Jato nincayamahue.

⁶⁻⁷ Jascapa jonibo ta xobo hihbo paranax xoboho hihcoihqui. Hihcoxon ta honanma haibobo nincamaxon huetsa joi jato yohihqui. Yohihah ta jascapa honanma haibobaan jaabo hohchani shinanax rabe shinanyahax haxe haxexon bi jahuentianbi Papan joi coin honantimahi qui.

⁸ Janes betan Jambresnen Moises joi bichinni quescajaquin ta jaa jonibo jaton shinan masascaxon Papan joi nincacoinihcama jaxon sca Papan joi coin huetsajacatsihqui qui.

⁹ Basima ta jaabaan jonibo nincamayaxihqui qui. Moises joi bichinni bo quescapahbo jaabo honanmabo hihqui ta jisyaxihcanihqui, jatihixonbi.

Jan Timoteo yohicoinali

¹⁰⁻¹¹ Heen honanmati joi tah min sirijaquin honanscrai. Jenquetsahpi hen jihuetain tah min honanrihbibi. Jahua copi hen honanmahin tah min honanrihbibi. Noquen Hihbaan hahtihen hen shinancoina. Noquen Hihbo hen jeneyamahi. Joni huetsahon hen shinanai. Hea tiromajahibaan bi hen tenehi. Hea hisinjahibaan bi hen tenehi. Jaa rahsi tah min honanscrai. Antioquia janinxon hea tiromajanihbo tah min honanrihbibi. Iconio janinxon hea tiromajanihbo rihbi. Listra janinxon rihbi. Janoxon hea hihtijaquin tiromajahibaan bi ta hea jato noquen Hihbaan xahbanjamanishqui.

¹² Jesucriston joi nincacoinax Papahon shinanhahnan siripi jihuecatsihqui bo jatihibi ta caibaan tiromajayaxihqui qui.

¹³ Jasca ta tiroma jonibo hashoan tiromabahin sca jatihiqui. Siripi hcamahibo rihbi hashoan tiromacanascai. Caibo paranquin. Caibaan rihbi jato paranquin.

¹⁴ Jaabaan jascajahi bi jascajayanahue, mian. Hean mia honanmapahoni quescajaquin jeneyamahue. Hen mia sirijaquin haxemani quescabijaquin.

¹⁵ Baque pishcahax tah min Papan huishamani joi haxepahoni hihqui. Jaa shinanhue. Jaa joi honanxon tah min Jesucristo nincacoincaax queyoyamanox manati min honanrihbibi.

¹⁶ Papan huishamani joi jatihibi ta Papan shinamaxon huishamanishqui. Jaa huisha jisxon ta honanmati siri qui. Hohchataibo yohiti siri. Hahan ponteti siri. Hahan jihuecointi.

¹⁷ Jaa joi honanax ta Papan joi honanmanica jahuabi pishinyamascati hihqui. Jatihibi hahti siriscrai.

4

¹ Papan noque jisnon bi tah hen mia yohihi. Siri hin, tiroma quin hihxon ta jihuetaibo jisxon mahuataibo rihbi Jesucriston jisyaxihqui qui. Jahuen jisnonbi rihbi tah hen mia yohihi. Jan hahquirihbi joyaxihqui honanxon jan jihuemayaxihqui rihbi honanxon tah hen mia yohihi.

² Jahuen joi yohihue. Tantixonma yohi yohihue, yohiti siripaiya yohixon siripaima bi rihbi yohirihbiquin. Jaabo hohchatai jato nincamahue. Jato yohihue, hohchayama sca jaabo. Siripi jihuetaibo sirijaquin jato yohihue. Tenexon jato honanmaquin jeneyamahue.

³ Ponte joibo nincacatsihyama bi res ta jaticaniqui. Huetsa joibo nincacatsihxon ta jaa queenai joibo res nincanoxon sca honanmanicahbo hichajayaxihcanihqui.

⁴ Papan joi coin nincati jenebahinxon ta hihcoinaima joibo sca nincaticaniqui.

⁵ Jascaraibaan bi mihi miin yora coirameti jihuehue. Hohmis hohmisquin bi tenehue. Papan joi siri yohinicahax teehue. Noquen Hihbo queenai quescabijaquin noquen Hihbo hahxonhue.

⁶ Noquen Papan joi hean yohihi copi hea rehteti ta nea pishcascaiqui. Hea huetsa main cati ta nocoscainqui.

⁷ Shinan camahahtanax tah hen teenihqui. Hen tah hen queyo sca jai. Cristo chibanguin tah hen jeneyamanihqui.

⁸ Mia tah min heen siri baque qui hihxon jan hea hinanyaxihqui jahuen hinanti ta Papan hea bexoja sca jaxonihqui. Pontejaquin siri hin tiroma quin hihnicaxon ta jaa hinanti hea hinanyaxihqui qui, jahuen baquebo bichi joxon. Hea huestima bi jaa joti jenipahichaibo jatihibi ta jascapa hinanyaxihqui qui.

Hea hahxonhue hahquin jan yohihi

⁹ Hehqui joriyaxahnhue, histon.

¹⁰ Hea yanapancatsihyamascaax bi mai mehabohon queenax ta Demas hea potabahini cahoxqui, Tesalónica janin sca canoxon. Galacia janin ta Crescente cahoxqui. Tito ta Dalmacia janin cahoxqui.

¹¹ Lucas huesti ta hehbetanbi hihqui qui. Marcos benaxahnhue, hihueyahnoxon. Jaan ta hea sirijaquin yanapaniqui.

¹² Efeso janin tah hen Tíquico raanhohqui.

¹³ Joquin heen tari hea bexonyaxahnhue. Troas janin tah hen Carpon xoboho jaa potabehnanhohqui. Heen quiricabo rihbi hea bexonhue. Heen documentobo rihbi tah hen hashoan queenai.

¹⁴ Yami charajanica Alejandronen ta hea hihtijaquin tiromajahoxqui. Jan jascaho quen ta Papan jaa copiyaxihqui qui.

¹⁵ Hahqui coiramexahtahi min. Coshin bi res ta jaan hea pantenishqui, hen yohicatsi-hqui bi.

¹⁶ Hea demandamenohi tian ta yohuanxonquin tsoanbi hea yanapanyamahoxqui. Jatihibichin hea jenebahinqui. Jaabaan hea jascahi bi Papan jato casticanyamapahinnon.

¹⁷ Hea jenéhiboya bi ta Papan hea yanapanhoxqui. Jatihibi judiomabaan jahuen joi nincanon ta hea coshi hinanhoxqui, jahuen joi hen sirijaquin yohi yohinon. Tiroma hapon hea rehtepan ta Papan hea hihti yanapanhoxqui.

¹⁸ Jatihibi tiromabo quiha ta noquen Hihbaan hea xahbanjamatihi qui, jano jan naihoxon jihuemayaxihqui janin hea jihuemanoxon. Jascabijaquin sca tah non Hahxon tah min noque jai Hihbon, hah non jatihi, jahuentianbi tantixonma. Jascari rahan.

Raannoxon quirica queyoscai

¹⁹ Priscaya Aquila hea yohixonhue man jascabi jayamahin hahquin. Onesíforo jaabo jascajaribiquin.

²⁰ Corinto janin ta Erasto banehoxqui. Mileto janin tah hen Trófimo hisinai potabehnanhohqui.

²¹ Janin matsu tian noconon joriyaxahnhue, histon. Eubulonen ta mihqui salud raanihqui. Pudente, Lino, Claudia, noque huetsabo jatihibichin ta jascajaribiquin mihqui joi raanihqui.

²² Noquen Hihbaan mia sirijaquin mananon yocaxonon tah hen jan mato shinan rihbi hinannon hen mato yocaxonai.

TITO

Tito qui Pablonen raanni joi

Tito qui Pablonen huishahi

¹ Hea Pablo ta hen Papan yonoti qui, Jesucriston raanti. Hea ta raannishqui, Papan caisaibo hen hashoan sca nincacoinmanon. Papan shinanai quesca jaahbo ta hihcoinai joi hen jato yohihi jonon hea raannishqui.

² Papa Dios ta jahuentianbi quesayamahihqui. Naiyahpa mai jariyamahi bi ta neateman noque hahxontijanishqui, non queyoyamanoxihnon. Jaa honanxon tah hen hahqui heen shinan camahi.

³ Neateman hahxontijanixon ta jonibo honanmati siripai tian sca Papan honanmas-caiqui. Noque teehihmanicaxon ta Jesucriston joi jato yohitanhue hea jaxon jahuen joi honanmahiqui. Jascahah tah hen jato queyoyamanoxihqui joi hean yohihi.

⁴ Mia tah min heen baque coin qui, Titon, hean yohihah min noquen Hihbo qui hinamehni copi. Mihqui tah hen nea joi raanai. ¿Noquen Papa Dios betan noquen Hihbo Jesucristonen mia jointi sirijaha min jahuen shinanya jihueyamahin?

Creta main teeti Pablonen yohihi

⁵ Hen mia yohipi quescajaquin jema tihibi janin jaton pastorobo caisxahnhue hahxon tah hen jaabo pishinaibo mian pontenon hihxon Creta mai janin mia potabehnanhohqui.

⁶ Nescapahbo pastorobo caishue: hahqui jahua yohuant yamahi, huesti haiboyahpa, jaton baque nincacoinnica, yohitima jaton baque yamahi, jaton nincayosma baque yamahi.

⁷ Pastoro ta Papa hahxonica qui. Papan baquebo jisxonnicca copi ta hahqui yohuant yamatihiqui, jaabi queenai quescajanicahma bi noquen Hihbo queenai quescajanica, histon sinayamahi, pahenyosma, rainyamayosma, coriqui bihcatsihqui tiromajatimahi.

⁸ Jahuen xobohoxon noquen huetsabo pimaxon hoxamanica. Sirijati costannica. Shinanyahpa. Pontejaquin shinannica. Noquen Hihbo qui hinamehti jihuetai, hahri coirameti.

⁹ Papan joi siri haxemaha bihxon jeneyamanica. Jaa joiyaxon caibo rihbi sca pontejaquin yohixon jascajaquin rahan jascjahue yohiquin janicah, joi bichinaibo rihbi netemanica. Jascapahbo caishue pastornon.

¹⁰ Nincayosmabo ta hicha qui, yanca res yohuanresaibo, paranmisbo. Judiobo ta hashoan rihbi jascapahbo qui.

¹¹ Jato netemati ta jaiqui. Tiromajaquin coriqui bihnnoxon ta jascjatima joi honanmaxon caibo masajacanihqui, jaton jenaboyabi jato masajaquin.

¹² Cretanobo ta jascabi quesabo qui, yohina tiromabo, pihanhuan chiquishbo hah ta janishqui jaton joi huishanicaton.

¹³ Jan yohini ta hihcoinihqui. Jaa copi jato sirijaquin pontehue, ponte joi rahsi nincacoinahbo.

¹⁴ Judiobaan hihresai yohuan xeni nincayamahahbo jato pontehue. Ponte joi potabahinti caibaan jato yohihah bi jeneyamahabo jato honanmahue.

¹⁵ Hohchajomabaan yohuan ta jatihibi siripihqui. Nincacoinyamahi rishtayahpbabaan jai ta jahuabi siri yamahihqui. Jaton shinan, jaton jointi rihbi rishta bi res.

¹⁶ Papa Dios tah hen honanai hih jan jai bi tah non jan hahcai jisxon jan Papa Dios honanyamahi non honanai. Rahnintibo tah qui, yohitimabo, Papan jisi jaabaan jahuabi siribojaxontimahi.

2

Nincati joi siribo

¹ Mia tah min jascapahma qui. Ponte joi rahsi nincacax jihuetahbo jato yohihue, mian.

² Yosibobo yohihue, pahenyamahahbo, pontejaquin shinanax jihuetahbo, shinanyah-paxon tenehi jihuetahbo, ponte joi rahsi bihcoinabo, sirijaquin noque huetsabohon shinanaxahbo, yobaxon tenehahbo.

³ Yoxabobo rihbi jascajaquin yohihue, noquen Hihbo qui hinamehtax jihuetahbo, caibo qui yohuanyamahahbo, pahenyosma jaahbo, siri joibo honanmahabo.

⁴ Siri joibo honanmaxon ta yoxabobaan texe haibobo jaton benehon queenti haxemari-hbitihiqui, jaton baquehon rihbi queenti haxemaquin.

⁵ Shinanyahpa haibobo jihuemon ta yoxabobaan jato haxematihiqui, tsiniyamahahbo, jaton xobo coiranabo, siri haibobo janon, jaton benen yohihah nincanicabo. Nincacoinyamahib Papan joi qui tiromahi yohuanyamanon jato jascajaquin yohihue.

⁶ Bebobó rihbi jascajaquin yohiquin sirijahue, shinanyahpahax jihuetaħbo.

⁷ Mia jihuetai jisish jascariħbihi jihuetaħbo jatiħibи sirijaquin shinanax jihuehue. Ponte joi res honanmahue. Noquen Hihbo qui min hinameħtai jato jismahue.

⁸ Jahua tiroma yohuanaxma siri join res yohuanhue, noque qui jahua yohuanti yamajahax noquen rahuibo rabinno.

⁹ Patoroyahpabo yohihue, jaton patoronen yonohah nincacahbo, patoronen yohihi quescabijaquin jaahbo, jaton patoronen yohiha joi bichinyamahahbo.

¹⁰ Jahuabi yometsohyamahab. Jatiħibijaquin ponte bi res sirijahab jato yohihue. Noque teehihmanica Papan noque yohihi joi hihti siri jisibo hihquish jihuetai jato haxemahue.

¹¹ Noquehon shinanxon ta hahan jan jatiħibи jonibo teehihmanica joi Papan noque hinanħiġqui.

¹² Noquen Hihbo shinanaxma jihuetai tah hen shinanyamascai, mai meħabaan jenipahħai tah henjenipahħiyamascai hih non janon jahuen joi siri noque hinanquin. Non shinanyahpahax jihuenon, ponte res Papan shinanai quescari non main jihuenon jahuen joi siri noque hinanquin.

¹³ Hihti coshi noquen Papa ta noque teehihmanica Jesucristo betan xabaya joyaxi-hquiqui. Jaa honanax manati jihuetai ta noque yohihiġqui.

¹⁴ Hohchapan noque hihbojaqueħħenna ta noquen Hihbo hinameħnħiġqui, noquen risħta noque soħuanoxon, jahuenahbo sca non hihnon. Caibo sirixjonti jenipahichaib oħra noque janon jaabi hinameħti.

¹⁵ Hen mia yohihi jato yohiquin sirijahue. Sirijaquin jato hihti yohihue, min jascajanon Papan mia yonohi honanxon. Jato nincayosmabomayamahue, tsoabi.

3

Nincaquin sirijahax jihuetai

¹ Jato shinanax, jaton gobernadorbaan yohiħah nincacahbo, tinintin rihbi yohiħah nincacahbo, jatiħibи siribojahha queenahbo.

² Tsoħqubi tiromahi yohuanyamahab. Sinacananyamahab, sinataxma siripi jihuetaħbo. Jatiħibи joni sirijaquin yohuanquħnaħ bato shinanmaquin.

³ Noque rihbi tah non honanma ħilpaphoni, yohitima, parameħtah, Haitara hihquish jaa shinani nhiresai. Tiromajaquin shinanax jihuetai. Notsi notsihi jihuetai. Huetsabaan noque jistahimjaquin. Noque rihbi jistahimħanani.

⁴ Non jascapahbo jihuepahoni que bi ta noque jihuemanica noquen Papan noque hahxonnishqui, noquehon shinanax noquen Papa hihti siri.

⁵ Non pontejaquin hahċai copima bi ta noquehon hihti shinanxon res noque teehihmanicahqui. Hahquriħbi noque jonijanoxon noque chocaxon jahuen Yoshin siripan noque behnajxon noque teehihmaquin.

⁶ Noque teehihmanica Jesucriston jihuetaħbo non hihqui copi ta noque jahuen Yoshin siri hinanħiġqui. Jahuabi yohuashħixonma noque hinanresquin.

⁷ Jan noque jascajoxonah tah non jahuen ponte siribo qui, jahuen jihuetaħbo, jan yohini quesa non queyoyamanoxiħnon non jihuenon.

⁸ Jasca coin tah qui. Jascajaquin yohiquin jeneyamahue, mian. Papan joi ninca-coinaibaan siribojaxonti haxexon shinanbeħnōyamahab. Hen mia yohihi joi ta siri qui. Haxexax jascari jihuetaħ, siri.

⁹ Hihresai yohuanyahpabo betan join bahchinnanyamahue. Tsoabo miin xenibo quin hahxon Papan baqequ honant shinanaibaan bi jato joi bichinyamaquin. Sinacanancat-sihqubi bi jato sinamayamaquin. Moisessin huishani joi copi join bahchincatsihqubiāan bi jato betan join bahchinnanyamah. Yohuani ta hihres hihrescaniqui, jahua honan-timahi.

¹⁰ Huesti shinanyahpabo noquen huetsabo japanan huetsa jonin huetsa joibo sca jato nincamacatsihqui jaib oħuestijaquin hihti yohihue. Huestijaquin hahyamaxon rabejaquin yohiquin sirijaxon jascapa joni potabahinsahue.

¹¹ Jascapa joni jahuen shinan tiromahi cahcoyahax hohchatai honanscaxon jenehue. Jaanbi ta jahuen jananbi jahuen hohcha yohihiġqui, Papan casticanyaxahnon.

Pishinaibo hahxonti

¹² Artemas hen mihqui raanaiya, jaa raanyamaxon hen Tíquico mihqui raanaiya, Nicópolis jema jañin hea behchihi joyaxahnhue histon. Janoxon tah hen jene tian huinomacatsihqui.

¹³ Yohuannonnica Zenas betan Apolos mihqui nocotaiya shinanquin sirijaxon jaabo pishinaibo hinanhue, jahuabi pishinaxma caribħabo.

¹⁴ Pishincoinaibo yanapanabo jatihibi hahxonti noquen jonibo honanmahue, hicha bimiyahpa quesca hicha shinan jaahbo.

Jahan quirica queyoti

¹⁵ Hea manahibaan ta Min jascabi jayamahin huetsan hahquin mihqui joi raanihqui jatihixonbi. Noquehon shinanaibo yohixonhue, noquen Hihbaan shinanya man jayamahin hahquin, Papan shinanya janahue jatihibi.

FILEMON

Filemon qui Pablonen raanni joi

Filemon qui Pablonen joi raanai

¹ ¿Noquen Hihbaan shinanya man siripi jihueyamahin, noque huetsabaan? Sipo xoboho hea tsahonihbaan tah hen sipo janinxon noquen huetsa Timoteo betan nea quirica huishahi, mato qui raannoxxon. Noquen Hihbo Jesucristo copi ta hea tsahoncannishqui.

² Mia Filemon hehbe teenica, noquen choa Afia, noquen Hihbaan hehbe sontaro Arquipo, miin xoboho tsinquitai noquen huetsabo rihbi, mato jatihibi qui tah hen nea raanai.

³ ¿Noquen Papa betan noquen Hihbo Jesucristonen mato xabajahah man jenimahi siripi jihueyamahin?

Filemonen noquen Hihbo nincacoinai

⁴ Papa Dios yocaxon tihibi tah hen mia rihbi yocaxonai, noque huetsan.

⁵ Noquen Hihbo jenexonma min jaa hahxonai, noquen huetsabohon rihbi shinanxon min jato hahxonai joi nincaxon tah hen Hahxon tah min jato jai, Papan, hahcai.

⁶ Noquen Hihbohon shinancoinxon min joni huetsabo hahxona jaabaan sca nincacoinnon tah hen mia yocaxonai. Criston noque hinanai jahuentiho siri quin jonibaan honanxon mia jai quescapa shinan bichibó hihxon tah hen mia yocaxonai.

⁷ Pishinaibo min jato hinanah ta noquen huetsabo jointi siricahinhqui, noquen huetsan. Min jato hahxonai joi nincaxon tah hen shinanquin sirijahi hihti jenimahi.

Onésimobihrohahue Pablonen jai

⁸ Jaa copi tah hen mia yocascai, noquen huetsan. Criston raanti hihxon mia yonothi bi tah hen mia yonoyamahi. Mia tah hen yocaresai, min hea hahxonnon.

⁹ Yonohahma bi joni huetsahon shinanax miabi queenxon copi min hahxonnon hihxon tah hen mia yocaresai. Jesucriston raanti hihxon bi tah hen jahuen sipojahacamaxon mia yocaresai.

¹⁰ Heen baque Onésimo copi tah hen mia yocacai. Sipo janin jihuexon hean Cristo joi nincamaxon bilmaho ta heen baque coin qui.

¹¹ Neateman miin joni nincayosma hihpahonish bi ta rahma siriscaiqui, mia hahxonica, hea hahxonica rihbi.

¹² Mihqui caribinon tah hen jaa raanscrai. Jahan hen shinanai heen baque tah qui.

¹³ Mian yohihah quescra jan hea yanapannon hen jaa banepanan tah hen baneyamahi. Sipo xoboho tsahoxon Papan joi hen yohinon hea manatihi bi tah hen baneyamahi.

¹⁴ Jaa banehue min hea Jayamaha copi tah hen jaa banecatsihyamahi. Min queenxonma hahti tah hen queenyamahi. Queenbochibi min hahxonnon tah hen raanscrai.

¹⁵ Miin Jonima bi miin huetsascaaax mihqui caribiyahnon rah tah min jaa xahbanjaniqui. Poyan tihxonpajaquin min jaa yamajani que bi jascabi sca mia mananon.

¹⁶ Rahma ta miin joni mentan hashoan hihti siri qui, miin huetsabi sca. Jahan min hihti queenai. Hean jisi ta jascapha qui. Mian jisi rah ta jascaphah bi hashoan siri rihbi qui. Miin Jonihax bi ta noquen Hihbo copi miin huetsa coin sca qui.

¹⁷ Heen raanah sca sirijaxon sca bilihue. Heen huetsa hihxon min hehon shinanxon hea Johue hahcai quescajaxon, jaa rihbi jascajahue.

¹⁸ Mia tiromajahi jan janí tian, hea sca copi yocahue. Ribin jan mia janí tian hea sca copi yocahue.

¹⁹ Mia tah hen copijatihi. Hea Pablonen tah hen heen mequemanbi huishaquin mia yohihi. Miin jointimin min hea ribinai que bi tah hen mia jascabi.

²⁰ Hihcoini. Ribin tah min hea jai. Noquen Hihbaan noque rabebi jihuemahi honanxon hea pishca hahxonscahue. Cristo queenai quescajaquin hea jenimamahue.

Jan quirica queyohi

²¹ Hen yohihah min hahxoncointihi honanxon tah hen mihqui jascajaquin huishahi. Hen yocacai quescajaquinma bi hashoan rihbi min hea hahxoncointihi tah hen honanai.

²² Hea jaho hoxati chique hea mequexonhue. Man hea yocaxona copi Papan hea picohah tah hen mato qui catihi. Hean shinanah ta hea picoti pishcascai.

²³ Min jascabi jihueyamahin hahxon Epafras yohixonnahue noquen Hihbaan janen. Noquen Hihbaan joi yohihi copi ta sipo xoboho tsahotihqui, hea hihqui quescari.

²⁴ Hehbe teenicabo rihbi jascajaquin yohixonnahue, Marcos, Aristarco, Demas, Lucas.

²⁵ Noquen Hihbo Jesucriston xabapan jihuennahue.

HEBREOBO

Hebreobo qui raanni joi

Jahuen baqueyabixon Papan yohihi

¹ Noquen xenibo nincamanoxon ta hicha coti jahuen joi Papan jato nincamanishqui, mesco yonotiyahpaxon. Jahuen joi yohinicaboyaxon jato yohiquin.

² Noquen xohtabo nincamanixon ta nete queyoyaxahnon jahuen baqueyabixon sca noque nincamanishqui. Jaa jahuen baqueyaxon jatihibi hahmenonixon ta jatihibi rihbi jaan hihbojanon Papan yohinishqui.

³ Jahuen xaba jenquetsahpa quin hihxon xaba jisxon non honanai quescajariquin ta Papan shinan jenquetsahpa quin hihxon jahuen baque yohanai nincaxon non honanscrai. Noquen Papa jenquetsahpa quin hihxon tah non jahuen baque jisxon non honan sca jai. Jascapahxon ta jahuen coshi shinaman yohixon jahuen baquen jatihibi hihmahi. Jaan hihmayamahah cahen queyotan. Noquen hohcha sohuahax ta quiquin hihbo sca Papa patax tsahoscaqui, jatihibichin hihbo sca.

Papan baque hihti shinanyahpa

⁴ Jascapahax ta Papan yonotibo mentan hashoan coshi qui. Papan yonotibo ta Papa betan hahbe shinanyahpa ma qui, yonoti cahron. Papan baque ca hahbe shinanyahpa. Jaa copi ta Baquen hahquiqui.

⁵ Papan huishani joi ta jascaribiqui:

Mia tah min heen baque qui. Baquen hah sca tah hen mia jai hihqui jaa huisha. Jahuen yonotibo ta quenaquin jascajayamanishqui, jahuen baque huesti. Huetsa jahuen huisha ta nesca qui:

Hea tah hen jahuen Papa hihthi, jaa rihbi heen baque hihnon hihqui jaa huisha.

⁶ Huetsa janin rihbi ta jahuen baque beboquiha yohihi nea huisha jaiqui: Jaa bebon ta Papan yonotibo jatihibi raboxonen tisquihahpaqueyaxihquiqui hihqui.

⁷ Jahuen yonotibo yohihi ta nescari yohuannishqui: Jahuen yonotibo ta Mia nihuetanhue yohihi. Jahuen hahxontibo cahen chihi perehiah-matanhue hahcan.

⁸ Jahuen baque yohihi cahen nescari: Jascabi sca tah min jatihi, Diosen quiquin hihbo. Miin hihboti ta jahuentianbi quey-otimahqui. Hahan ponteti shinaman tah min miin jihuetahbbo jihuemahi.

⁹ Sirijahibo tah min siri jisi. Tiromajahibo tah min casticanai. Jaa copi ta Papa Dios miin Papa hihxon, mia hihti jenimamahqui, caibo jenimaribinon bi mia rihbi sca hihti jenimahi

hihqui jaa huisha.

¹⁰ Huetsa huishani joi rihbi:

Mian tsahonah ta mai jamenonishqui, Hihbon. Miin mequemanbi tah min naijaniqui.

¹¹ Coton payocanahi hihqui quescaribibi ta jatihibi payotihqui. Jaabo queyocahinyaxi-hqui bi mia queyoyamanox manatai.

¹² Rahcoti hahcayaquin tah min jato sebibahinyaxihqui, coton cahtoquin hahcayaquin. Jascajaha ta huetsapahcahinyaxihcanihqui. Jaabo huetsapahi bi ta mia jascabiyax-ihqui huetsapahyamahi. Mia tah min queyoyosma qui

hihqui jaa huisha joi.

¹³ Huetsa jascapa huisha rihbi ta jaiqui, jahuen yonotibo jan yohiyamahi bi jahuen baque jan yohihi nescari:

Hea mécayaho tsahotihue, nenohax jatihibi hihbonoxon. Miin rahuibo tah hen mia bikhontihi, namanjaquin miin hinabo sca jaahbo

hihqui jaa huisha joi, jahuen baque yohihi.

¹⁴ Jahuen yonotibo ta huetsabo qui. Jaabo jatihibi ta jahuen hahxonnicabo qui. Jahuen jihuetahbbo yanapannon hihxon ta jato raanihqui.

² Noquen xenibo nincamamenonoxon ta jahuen yonotibo raanxon jayaxon Papan jato jahuen joi yohinishqui. Jaa joi nincamanixon ta jan yohini quescabijaquin noquen xenibo casticannishqui. Jascajahue hahca bi nincayamahiboo copi casticanquin. Jascajayahue hahca bi nincayamahiboya jato casticanquin.

³ Hihti sirijaquin jahuen jihuetahbbo jihuetajaxonxon ta jahuen baqueyaxon sca noque jahuen joi siri nincamanishqui. Jahuen joi siri nincamamenquoquin ta jaabi yohinishqui noquen Hihbaan. Jaa nincanihbaan sca ta noque sirijaquin yohirihbinishqui. Nincacatsihyamaxon tah non jenquetsahaxon bijahuen casticant noque xahbanen paquematimahi.

⁴ Yohicoinnicabohi non honannon hihxon ta Papan yanapannishqui. Yanapanquin ta hahan honantibo jismaxon, hahan rahtetibo jismaxon jahuen coshi jismaxon, non jahuen yoshin siriyaxon hahxonti teebo noque hinanpaquenishqui. Jaabi queenxon ta jascajanishqui, nincacahbo hihxon.

Noque quescapa yoraya Cristo jahui

⁵ Papan noque jihuetajaxonai tah hen mato yohihi. Jahuen yonotibo ta jihuetajaxonyamahiqui; noquenah ta qui.

⁶ Huetsa huisha joi ta jascari qui:

¿Jahua copi min noquehon shinanain, Hihbon? ¿Jahua copi min jonibo sirijaxonain?

⁷ Miin yonotibo mentan hashoan naman hihtatahnnon tah min joni jananihqui. Hihti hapo sca tah min huenihihnihqui.

⁸ Jatihibi sca jaan hihbojanon tah min hueninilihqui hihqui jaa joi. Jatihibi jan hihbojanon jan hihqui ta jahuabi hihbojahama yamahi qui. Jan jascari yohuanai bi tah non jan jatihibi hihbojahi non jisyamaparihi.

⁹ Jatihibi hihbojahi jisyamaparixon bi tah non Jesus jisniqui, basima tahni Papan yonotibo mentan hashoan naman hihquish bi noquen hohcha copi mahuanish rahma quiquin hihboscai, hihti shinanya hihti coshi hihboscai. Jascahue Papan jaah ta jatihibi noquen hohcha copi mahuanishqui, noquehon shinanxon Papan yohihah.

¹⁰ Jascapabo japan hihxon ta queenxon copi Papan jatihibijanishqui. Jatihibi hihbboxon ta queenxon copi rihbi hicha baquebo jahuen jihue janin hihuehahnan jato beboxonica hihti jihuemanica hihnon tiromaboo tenemanishqui. Jaa copi ta yonotibo mentan hashoan naman Papan jaa hihmanishqui, basima tahni.

¹¹ Papan baquebo rahsi non janon ta noque beboxonnicathon noque hiohiqui. Jahuen Papa ta noquena qui, jaa papayahpabo rahsi. Jaa copi ta noque yohihi, Heen huetsabo tah man qui hihti jaa hihtimayahamahiqui.

¹² Papan huishani joi ta jascarihbihiqui:

Mia tah min jascanicia qui. Honanahbo hihxon tah hen heen huetsabo yohitihi. Tsinguitaiboo tocan rihbi tah hen mihqui behuatihi hihqui jaa joi.

¹³ Huetsa huishani joi rihbi ta nescari qui:

Jan yohihi quescabijaquin hea hahxontihi tah hen shinancoinai.

Huetsa huishani joi jascarihbihiqui:

Neno tah hen qui. Papan hea hinanai baquebo betan tah hen qui hihqui jaa joi.

¹⁴ Noque huetsa copi ta jonibo yorayahpabo hihqui quescarihbihiqui jaa janishqui, yorayahpabo sca. Tiroma yoshiman ta mahuati jonibo hihbojanishqui. Noquen Hihbo sca ta mahuaquin tiroma yoshin jahuen coshi bichinnoxon yorayahpanishqui.

¹⁵ Non muhamis hihquish raqueya jihuetaiboo Satanasnien hinabo hihquibo bi ta Satanasn yosmajaxon noquen Hihbaan noque picohiqui, non Satanasnien hinabo hihyamasancon.

¹⁶ Jahuen yonotibo jascajaxonnoxonma bi ta Abrahanen chini baquebo jascajaxonnoxon yorayahpanishqui.

¹⁷ Jaa copi ta jahuen huetsabo hihqui quescaribiti janishqui, noque quescapahxon ca jaamajaquin jaibohon jaan shinanai. Papa bebonxon sca noque sirijaquin yohuanxonai. Jascapahxon noquen hohcha sohuaxonquin.

¹⁸ Tiroma yoshiman hohchamacatsihquin tanahah bi tenenixon ta rahma tenehibo rihbi jaan yanapanti hahtipahiqui.

3

Jesusen Moises mahuinquin

¹ Jaa copi noquen Jesus shinanquin sirijanahue, hea huetsabaan. Hehbe Papan baquebo hihxon, Papan noque jatihibi quenahi honanxon rihbi noquen Jesus shinannahue. Papan

ta jaa raannishqui. Noquen yohuanxonnica hihnon rihbi ta jaa janenishqui. Jaa tah non jatihixonbi honanai.

² Papan jihuetahbó jisxonquin Moisesnin jatihibi sirijaquin hahxonni quescajariquipuin ta noquen Hihbaan jaiqui.

³ Xobojanicanton sirijaquin xobojahiya tah non jahuen xobo siri jisi. Jascarax bi cah non xobo hihbo qui hashoan rihbi siripi yohuanai, xobojati honanai copi. Jascarihbibi tah non Moises siri jisxon, noquen Hihbo hashoan sca siri jisi.

⁴ Xobojanicanton xobojaha copi noquen xobobo jai quescra rihbi ta noquen Papan Jahue hahca jatihibi sca jaiqui.

⁵ Papan noque nincamayaxihqui joi non nincacoinnon ta Moisesnin sirijaquin teexon-nishqui, Papan xobohoxon teexonai joni hihxon.

⁶ Jahuen teexonai jonima bi Papan baque hihxon ta Criston sca Papan baquebo jisxon-ihqui. Papan baquebo hen hihqui bi tah hen noquebi yohihi. Jointinin honanax, jonibo qui hihtimahpaxma non noquen Hihbo jenehaxhma, jaya non joihibo tah non jahuen siri baquebo qui.

Haho tantiti Papan hahxonai

⁷ Jaa copi Dios Yoshin Siripan yohini joi nincacoinnahue:

Rahma jahuen joi nincacax nincayosmayamanahue.

⁸ Papan jato teneresnon hihxon nihi naman cahuan cahuanai nincayosmabo janí quescayamanahue.

⁹ Jahuentiho tene Papan jaiquin hihxon ta maton papabaan hea janoxon tana tanacan-nishqui. Coshixon hen jato hahxon hahxonai jisxon bi ta cuarenta bari hea tanarescannishqui.

¹⁰ Jaa copi tah hen jato qui sinaxon yohiniqui: Huetsajaquin shinanax ta jascabihi paramehcaniqui. Heen bahibo honanaiboma ta qui.

¹¹ Sina sinaxon tah hen hihti yohiniqui: Heen jihue janin ta jaabo jahuentianbi hihquiya-mayaxihcaniqui.

¹² Coiramenahue, hea huetsabaan. Nincatima tiromabo shinanbo maton jointi janin jamis, tiromahi. Jascapa shinanaxbaan ta mato noquen jihuemanica Papa Dios nincamatimajahiqui.

¹³ Tsoabi hohchapan paramehtax nincayosmayamanon hihquish jatihibi neten joni huetsa betan yohinannahue. Rahmabi nincacoinhue Dios Yoshiman yohihah histon nincacoinahbo yohinannahue.

¹⁴ Nincacoinmenoxon non muhanoxon caman jascabijaquin sirijaquin nincacaibo tah non Criston hahbe jihuetebo qui.

¹⁵ Rahma sca jahuen joi nincacax nincayosmayamanahue. Papan jato teneresnon hihxon nihi naman cahuan cahuanai nincayosmabo janí quescayamanahue.

hih ta janishqui.

¹⁶ Papan jato nincamaha bi ta noquen papabo nincacatsihyamanishqui. Egipto mai janirhax Moises betan jonibó jatihibi ta jascapahbo janishqui.

¹⁷ Papan ta cuarenta bari jato qui sina tenenishqui. Hohchanish copi ta nihi naman mehax muahatah sca racarenencannishqui.

¹⁸ Nincayosmabo copi ta jaabo yohihi, Heen jihue janin ta jahuentianbi hihquiayamayax-ihcaniqui, Papan janishqui.

¹⁹ Jan yohini quescabi ta janishqui: nincayosmabo copi jano hihquitii hahtipahyamahibo.

4

¹ Jaa copi coiramenahue. Jahuuen jihue janin hihquitii mato yohiparihi bi jano hihquitima quescapahbo man jamis.

² Jahuuen joi siri jan jato nincamani quescajaribiquin ta noque rihbi nincamahiqui. Nincacuin bi nincaraesai bo copi ta yanca bi res jato nincamanishqui.

³ Nete jamenonon ta jahuen jihue noque hahxonishqui. Jaa jahuen jihue yohihi ta Sina sinaxon tah hen yohiniqui, Heen tantiti janin ta jaabo jahuentianbi hihcoyamayax-ihcaniqui

Papan janishqui, caibo sca jano hihcoyaxahnon. Non nincacoinax hinamehtaibo tah non jano hihconica qui.

⁴ Jahuuen tantiti yohihi ta huishani joi nescapa jaiqui:

Jan hahrasihu jahuen teebo jatihibi queyohax sca ta jahuen siete neten Papa tantiscan-ishqui.

⁵ Jahuuen jihue yohihi ta hen yohiscai huisha jaiqui:

Heen tantiti janin ta jaabo jahuentianbi hihcoyamayaxihcaniqui

hihqui.

⁶ Jan nincamamenonibo ta nincayosmabohax jano hihcoyamanishqui, caibo sca jano hihcoxihnnon.

⁷ Huetsa huisha janin rihbi ta David yohuanni joi jaiqui, Papa tantini pecaho basihax sca jahuen nete yohihi jan nescari yohuanni:

Rahma sca jahuen joi nincacax nincayosmayamanahue
hihqui.

⁸ Papan tantiti ta nai naman meha ma qui. Papan tantiti janin Josuepan jato hihcomaha jano hihresscaibaan cahen Papan tantiti janin hihconahue jato jayamahan.

⁹ Jaa copi ta Papan tantiti janin jahuen jonibo hihcoti japharihi non honanai.

¹⁰ Jahuen teebo queyohax Papa Dios teeyamascai quescajibhi ta Papan jihue janin hihquihibo jihue jihuettihqui, tee teeyamascai.

¹¹ Nincayosmabo hihquihiboxma quescajamanoxon sca Papan jihue janin hihquinoxon histon hinamehxon hihti nincacoinnahue.

¹² Papa Dios yohuanaiya tah non nincati jai. Jahuen joi ta jahuen yoshinyahpa qui. Noquen jointi janin ta jaa join teetihqui. Hoquenbehcoinbi quehsho machitonen non histon nacoti hahtipahi quescahax bi ta hashoan rihibhi jahuen joi noquen jointi janin hihquihibi. Noquen yoshin, noquen shinan, noquen xao rechi, noquen xao napo caxquexon jisxon hahcajaquin ta noquen jointi janin non yohuanabio, non shinanaibo jaan honanahqui.

¹³ Jaan jisi ta jonetai jahuabi yamahihqui. Mahpohahbo ta mahpohahma qui, janibi racatai quescapahbo, jaan jisi. Noque jascajaquin jisi yohuanai tah non nincati jai.

Jesus noquen quiquin yohuanxonnicah

¹⁴ Naihoh huinocahini cahax ta Papa bebon noquen quiquin yohuanxonnicah jaiqui, Jesus, Papa Diosen baque. Jaa copi jascabi jahan shinannahue.

¹⁵ Paquemacatsihquin tiroma yoshiman noque tanahi quescajariquin ta noquen yohuanxonnicah rihibi tananishqui. Tanahah bi ta hohchayamanishqui. Jascapahbo tenenixon ta noquehon shinanihqui. Non hohchataiya ta noque yohuanxoniqui.

¹⁶ Jaa copi jenimahanan Papa yocanahue. Noquehon shinanxon jan noque yanapantihi honanxon, yocaresnahue. Non pishinai tian ta noque hahxontihqui.

5

¹ Mainxon Papa bebonxon yohuanxonnicahbo ta Papan caisah joni rahsi janishqui. Yohuanxonnicah meraxon ta jato janepahonishqui, jaa bebonxon sca caibo yohuanxonnon. Hohcha copijaxonquin hahcajaxon ta hohchataibo jaiya jaton hinanti hinanxonquin jato yohuanxoniqui.

² Hahbe joni hihxon ta honanyamahax tiromahiboya jato teneti hahtipahiqui. Papan bahin catihi bi bahinma cahiboya ta jaton hahbe joni hihxon jato teneti hahtipahiqui.

³ Hahbe coshijoma hihxon ta janibaan hohcha copi hiná rehtexon Papa hinannoxon jahuenahbi jahuen hohcha copi jascajarihibi jaiqui.

⁴ Noquenbi shinanax tah non yohuanxonnicahtimahi, tsoabi. Papan janelah pari tah non jascatihi, jan Aaron janeni quescapi.

⁵ Cristo ta jascarihibi qui. Jaabi hapocatsihqui ma bi ta Papan yohihih pari noquen yohuanxonnicah jaa jai qui. Jaa yohihi ta nea huisha joi jaiqui:
Mia tah min heen baque qui. Baquen hah sca tah hen mia jai.

⁶ Huetsa rihbi ta jaa yohihi jaiqui:

Jascabi yohuanxonnicah ta mia qui, Melquisedec japhahoni quescapah.

⁷ Main pari hihxon ta Papa hihti yocanishqui, hicha. Coshin quenaxon huaohihxon ta Papa yocanishqui, muhuatimajati Papan hahtipahi copi. Jaabi Papa queenai quescapah janon hihxon jan yocacah ta nincaxon Papan hahxonnishqui.

⁸ Papan baque hihxon bi ta Papa queenai quescapah jati haxenoxon tiromabo tenenishqui.

⁹ Jatihibi huinosca jaax ta jihuemanicah sca jaa qui. Jaa nincacoinaibo jatihibi queyoyamanox mananon ta jato hihbohiqui.

¹⁰ Melquisedec japhahoni quescapa quiquin yohuanxonnicah hihnon ta noque jihuemanica janon Papan jaa janenishqui.

Nincacoinyamamis, nincanahue

¹¹ Jaa yohihi non hicha yohiti jai bi tah man pabe sca jai. Jaa joibo mato nincamatati ta tee qui.

¹² Neateman nincanixon man haxemanicahboscatihi bi tah man honanyamahi. Haxemanicahbo sca man hihtihi bi ta Papan joi haxemenotibo mato yohirihbiti man pishinai. Xoma hahmatibo tah man qui; chahomabo piti hahtipahyamaparihibo.

¹³ Xoma hahcaibo ta baquexobo hihxon, pontejaquin shinanax jihueta honanyamaparihiqui.

¹⁴ Chahomabo ta hanibaan piti qui. Hanibaan ta jahua Papan costanhquin, jahua jan costanyamahiquin hihxon haxexon honanscawai, Papa queenai quescascajanoxon.

6

¹ Moto hanijanoxon sca tah hen hahan pehocohti joi yohirihbixonma hahan haniti Criston joi sca mato nincamacatsihqui. Non nincamenoti joi man honanscrai quen tah hen jaa joi mato hahquirihbi yohiti queenyamahi. Jaa joi tah man honanscrai: Papa noquehon jenimanon hihquish non quescashi hihrespahoni tah non jenebahinscatihi, Papa nincacoinxon.

² Nashimati joibo, mamanjaxon tee hinanti joibo, jenquetsahax muhuanihbo hueniyaxihqui joibo, Papan jascabijaquin casticanyaxihqui joibo. Jaa joibo man honanscrai quen hahan haniti joibo sca hen mato yohinon.

³ Papa queenaiyah tah hen jascatih.

⁴ Hinamehnixon bi noquen Hihbo jenebahinscabo tah non jenquetsahaxon bi jato hahquirihbi hinamehmatismahi. Jaa copi tah hen mato hahquirihbi hinamehti yohicatsihyamahi.

⁵ Non jenimanon ta siri joibo Papan yohihiqui. Jayaxihqui coshi ta noque hinanihqui jaya non jihuemon.

⁶ Jascabijaquin noque hahxonah bi tah non jenebahini bahimahhuan cahax jenquetsahax bi hahquirihbi hinamehtimascai. Papan jisi ta jascapahbaan jahuen baque hosanxon hahquirihbi jihuui hueonaibio qui.

⁷ Noquen jointi ta huai quescapha qui. Bexon hoin mehchajaha ta bana siribo joconihqui, huai hihbaan piti siri bihnon. Jascapa huai ta Papan hicha bimijahiqui.

⁸ Moxaya mohue boncohi huai ta tiroma qui, casticanti res pishini. Jascapa tah non mapojahi, jan jabiyahpa queyonon.

Hahan teneti shinan

⁹ Jascari yohuanxon bi tah hen jascapahboma mato honanai, hea huetsabaan. Papan mato jihuemayaxihqui tah hen mato honanai.

¹⁰ Jatohon shinanaxon tah man Papan joiya cahibo yanapanniqui. Nincacoinaibo tah man sirijaquin hahxonpahonixon rahma caman jato hahxonai. Jaa ta Papan shinanbehnotimahihi.

¹¹ Jascabajonti hihti queennahue. Jatihibi man jascanon tah hen queenai. Muhanoxon caman jato hahxonti hihti queenxon hahxoncoinquin man Papa qui hinamehtai jismanahue.

¹² Jascajati shinan jaax tah man pabebo hihtimascai. Jan yohini quescabijaquin ta Papan noque hahxoncointihqui hihxon jaa honan jeneyamahibo ta Papan jihuetahbosca qui. Jan yohini quescabijaquin ta jato hahxonihqui.

¹³ Abraham hahxonti yohiquin ta tsoa quenati yamahiya jahuen yorayabi Papa yohuanishqui.

¹⁴ Hihcoini. Mia tah hen hihti hahxontihi. Mia tah hen hihti caijatihi, hahquin.

¹⁵ Jaa honanyaxon tene sca Abrahanen jaiya ta Papan jaa hahxoncoinnishqui.

¹⁶ Non hihcoin yohuanain honanahbo hihxon tah non hashoan coshi joni quenanica qui, non hihcoinyamahiya noque muhamamanon. Joni huetsa betan join bahchinanaxon tah non jascapa quenaxon coshi joi tantimahi. Sinacananyamascanon.

¹⁷ Jascabijaquin rihbi ta Papan yohinishqui. Jahuen jihuetahbosca jahuen jihuetahihi ta yohicoinnishqui. Jahuentianbi jan shinan huetsajatimatih non hihti honannon hihxon ta jahuen yorayabixon jato yohinishqui.

¹⁸ Yohuani ta Papa jahuentianbi quescatimahihi. Quesayosmaxon ta rabejaquin yohicoinnishqui. Jahuentianbi huetsatima joi rabe nincaxon, hahqui hinamehtax jahuen baquebosaxon non sirijaquin shinanaxon jahuen joi bihnon hihxon ta jascajanishqui.

¹⁹ Jaa joi copi tah non hihti honanax jaa honanya jihuetai, jahuatohonbi noque boti hahtipahyamascaquin. Jano Papa Dios jai janin tah non hihcoti hahtipahscrai, Papa yocanoxon.

²⁰ Jano cahi ta Jesus bebonishqui, Melquisedec janí quescapa yohuanxonnicah tah qui, jascabi sca noquen yohuanxonnicah.

¹ Melquisedec ta Salem jema janin jaton quiquin hapo hiphahonishqui. Quiquin hapohax bi noquen naihoh queha Papa bebonxon yohuanxonnicah. Nahua hapoboya jaton sotarobo rehtetani jahuiton ta Abraham behchihi caxon Melquisedecnen noquen Papa jaa yocaxonnishqui.

² Abrahanen rihbi ta jan bihtanai jatihibi tsamanxon chonga tsama jaxon Melquisedec huesti tsama hinannishqui, Papa bebonxon yohuanxonnicah quen. Melquisedec ta ponte hapo hihcatsihqui. Jaa ta jahuen quiquin jane qui. Huetsa jahuen jane cahen Salem hapo. Jaa Jane ta siri hapo hihcatsihqui, shinanyahpa joni.

³ Jaa Melquisedec ta papajoma, mamajoma janishqui. Jahuen xohtabo rihbi ta tsoanbi honanyamahiqui. Jahuentian cainnishquin jahuentian mahuanishquin ta tsoanbi honanyamarihbiqui. Jasca copi ta Papa Diogen baque quesca janishqui, jascabihi yohuanxonnicah.

⁴ Noquen quiquin xohta Abrahanen ta hihti siribo rahsi caisxon jahuaborabo jaa hinanishqui, Papan yohuanxonnicah copi. Jaa shinannahue. Abraham mentan Melquisedec hashoan hapo hihqui honannahue.

⁵ Leví baquebo ta texe Abrahanen xohtabo quescapahbo qui, jahuen jenabo. Jaabi ta jaabo yohuanxonnicahbo jati Papan yohinishqui. Yohuanxonnicahbo copi ta Papa Dios hinanquin jaton caibaan jato texe bimati jaiqui, jascajanahue Papan jaah.

⁶ Melquisedec ta levitobaan caibo hihyamanishqui. Jaton caibo que ma bi ta jahuen metoti tihibichina tsamanpaquexon jahuen jahuaborabo Papa Dios hinanquin Melquisedec Abrahanen bimanishqui. Mia tah hen hahxonyaxihqui Papan Abraham yohini quen tah non Abraham shinanya hiphahoni non honanai. Jaabi ta Papan jato hahxonti yohuanyahpaxon Melquisedecnen jayaxon Abraham yohinishqui Papan jaa hahxonnon.

⁷ Hashoan coshi yohuanyahpaxon ta jascajaquin huetsa joni yohinica qui. Jaa tah non jatihixonbi honanai.

⁸ Rahma jaibaan ta mahuanicabxon bi noquen hinanti bihcaniqui, Papa hinanquin non jato bimahi. Melquisedec ta huetsapah qui: jaa jihuetai ta yohihihqui Papan huishani janin.

⁹⁻¹⁰ Abraham behchihi Melquisedec cahiya ta Papa Dios hinanquin Abrahanen Melquisedec jahuen jahuaborabo bimanishqui. Jaa bimahi tian ta levitobo yamaparinishqui, Abraham xohtabo yamaparinon. Chini sca ta jaa xohtati levitobo janishqui. Jaa xohtanicaxon ta hahbe bimanicabo qui, Papa hinanquin Melquisedec bimanica.

¹¹ Moises yohixon ta jahuen joi Papan noque hinannishqui, jaa joiya teenicabohax sca levitobo noque yohuanxonnicahbo janon. Jaa levitobaan noque yohuanxonca non Papa bebon jahuabi pishinyamahiya cahen Melquisedec quescapa yohuanxonnicah sca Papan janeyamahan. Aaron baquebo cahen janehan.

¹² Noquen yohuanxonnicah huetsajaxon ta jaa yohuanxonnicahton joi rihbi Papan huetsat jaiqui.

¹³ Levitobo rahsi noque yohuanxonnicahbo hiphahoni bi ta huetsa sca jatihiqui, Jaa huetsa jan yohihi ta levitomabo qui, judabo sca, levitobaan tee hahyamapahonibo.

¹⁴ Noquen Hihbo ta judabo qui. Jaa jonibo yohuanxonnicah jati ta Moisesnin yohiyamanishqui, jahuentianbi.

¹⁵ Huetsa joiyahpa huetsa joni sca jan yohuanxonnicah hihmati ta sirijaquin yohihiqui, Melquisedec quescapah sca yohuanxonnicah jati.

¹⁶ Yohuanxonnicahbo mahuataiye huetsa levitobo sca jato xohtati ta Moisesnin yohinshqui. Nea huetsa ta jascayamahi qui; nea ta coshiyahpa qui, mahuayosma.

¹⁷ Jaa yohihi ta nea huisha joi jai qui:

Mia tah min jascabi yohuanxonnicah jatihi, Melquisedec japoconi quescapah.

¹⁸ Moisesnin yohini joi res nincacax bi tah non hohchayahpabo banenica qui, jaa join noque sirijati hahtipahyamahiya. Jaa joi coshima copi ta Papan noque jaa potamascaqui, hahan jahuejatimahiya.

¹⁹ Huetsa sca ta noque yohihiqui, jaa nincacax noquen Papa Dios qui cati.

²⁰ Non honancoinnon hihxon ta jahuen yorayabi Papa yohuannishqui. Levito jonibo yohuanxonnicahbo hihnon ta jascari yohuanxonma Papan jato janenishqui.

²¹ Noquen quiquin yohuanxonnicah sca janon ta jahuen yoraya yohuanxon janenishqui. Jahuuen huisha joi janin ta jaa yohihiqui:

Mia tah min jascabi sca yohuanxonnicah qui. Papan ta yohixon jahuen joi jahuentianbi huetsajatimahi qui. Honanahbo hihquish ta jahuen yorayabi yohuannishqui hihqui jaa huisha joi.

²² Jascaxon jan yohini honanxon sca hashoan siri joi jan noque hinanai honanrihbinauhue. Jesus jaa yohuanxonnicahue, hihqui quen hashoan sirijaquin Papan noque hahxoncointihi honancoinnahue, hihti honanquin.

²³ Mai meha yohuanxonnicahbo jascabih iohuanxonnicahue japanan ta muhatax queyocanacaniqui. Jaa copi ta hicha jaiqui, huetsa muhataiya jaa xahbanen huetsa hihquinon.

²⁴ Noque quiquin yohuanxonnicahue ta queyoyamanox jihuematihqui. Jaa copi ta jascabijaquin noquen yohuanxonnicahue qui.

²⁵ Queyoyosmaxon ta jahuen joi nincacoinax Papa qui jahuibo jaan jascabijaquin yohuanxonti hahtipahiqui. Jaa copi ta jascabijaquin jato jihuematici hahtipahiqui.

²⁶ Queyoyosma yohuanxonnicahue tah non hihti pishinpahonihqui. Jaa ta joni siri qui, hohchajoma, jahuabi jahuen tiroma yamahi, tiromabo manayamahi, naihoh hihti hapo sca jaa jai.

²⁷ Levito yohuanxonnicahbo jati jai quescayama ta jaa jaiqui. Levitobaan ta jatihibi neten jaton hohcha copi hinab rehteti jaiqui, jatonahbi jaton hohcha copi rehtexon, jaton caibaana sca huetsa rehterihbiquin. Jascajaquinma bi ta noquen quiquin yohuanxonnicahton huestjaquin noquen hohcha queyonishqui, jaabi hinamehtax mahuaquin noquen hohcha copijaxoni.

²⁸ Moisesnin ta hohchayahpabo janeti yohinishqui, yohuanxonnicahbo janon. Jan jaa yohini pecaho ta Papan jahuen baque sca noque yohuanxonnicahue janenishqui, jascabi hohcha yosma.

8

Behna hahxontijaxon Jesusen noque yohuanxonai

¹ Hashoan nincati joi sca tah hen mato yohihi: Hen mato yohiha quescapa quiquin yohuanxonnicahue tah non jaresscrai. Papa Dios janin caníxon ta Papa Dios betanbi quiquin hapoxon jatihibi hihbojahiqui.

² Papan quiquin jati janin tah qui. Jaa jahuen jati ta jonibaan xobojahi quescapahma qui. Panbihi hahnih tah qui. Janoxon ta noquen Hihbaan noque yohuanxoniqui.

³ Jatihibi quiquin yohuanxonnicahue ta jonibaan hohcha copi jahuabora hinanxonnicah qui. Jascapahbo hinanxonxi ta jahuen tee qui, Jascajahue Papan janí. Jaa copi ta noquen quiquin yohuanxonnicah rihbi jahuara hinanxonnicah qui, noquen hohcha copi.

⁴ Moisesnin yohihah ta levitobaan hiná rehtexon hinanxoniqui, hinanxonnicahboxon. Jaa copi cahen rahma caman noquen Hihbo main jihueparihax yohuanxonnicahue jaa hihyamahan.

⁵ Levitobaan ta hahcoinyamacaniqui. Papan xobo hahxoncatsihquiton ta Papan Moises yohinishqui: Jatihibi hen mia mahchi janin jismahipi quescabijaquin hahhue, hahquin. Naiho jascapa jahoxon hinanti jai non honanon hihxon ta jascajaquin Moises xobojamanishqui. Jahoxon levitobaan hiná rehtexon hinanxonxi ta jascapahax bi jaamah qui.

⁶ Hashoan sca noque sirijaxontijaxon ta hashoan siri joibo sca Papan yohihiqui, jahuen jihuetaibohi coin sca non janon. Jaa siri joibo nincamanicah ta noquen Hihbo qui. Jahuen noque nincamatii joibo hihti siribo hihqui quescaribibi ta hihti sirijaquin sca noque hahxontihi qui.

⁷ Jahuun jihuetaibohi jati ta noquen xenibo Papan yohinishqui. Jaa huesti jaton Papa Dios hihnon, jaabo rihbi siripi jihuetaiya jato hahxonnoxon jato yohiquin. Jaabo jihuetaibohi cahen huetsa joi sca jato yohiyamahan.

⁸ Tiromahi jihuetaibohi ta huetsajaquin sca jato yohinishqui:

Huetsajaquin sca tah hen heen israelibohi yohiyaxihqui: Heen Judea main jihuetaibohi tah hen huetsajascaquin behna joi sca yohiyaxihqui. Heen jihuetaibohi jati tah hen jato yohiyaxihqui hih ta Papa Dios jaiqui.

⁹ Jaton xenibo hen yohini quescajayamaquin tah hen behna sca jato yohiyaxihqui. Mehuetanxon tah hen jato Egipto mai janinhah hihuenihqui. Heen jihuetaibohi jati tah hen jato yohiyaxihqui hih ta Papa Dios jaiqui.

¹⁰ Heen jihuetaibohi jaabo janon ta israeli baquebo hean yohiyaxihqui hih ta Papa Dios jaiqui. Hea queenai quescati shinan tah hen jaton jointi janin niatithi. Jointinin honanahbo tah hen jascatih. Hea ta jaton Papa Dios hihtihi, jaabo rihbi heen jonio.

¹¹ Jaatian ta jaton caibo betan yohinani, jaton huetsabo betan yohinani, Noquen Papa Dios honannahue hihquinanyamascatihqui. Jatihixonbi ta hea honanscatihqui. Baquebaan, xenibaan, jatihixonbi.

¹² Jaton shinan tiromabo tah hen sohuaxonyaxihqui. Jaton hohcha tah hen shinanyamascatihi, hahquin.

¹³ Behna joi jan yohihi ta jan yohimenoni joi xeniscaiqui hihcatsihquiqui. Xeni jahuabora cahen payotax queyocahinnicah, jahua yohitimascai.

9

Papan jihue jenquetsahpa quin honanahbo hihxon mainxon xobojanibo

¹ Jahuen jihuetahtboti jato yohimenoxon ta xobojati yohixon, hea yocacatsihquin jahoxon nescajanahue jato janishqui.

² Jaa copi ta xobojacannishqui. Jaho sca ta misa tsahonxon, johuebo pejanxon paan janacannishqui. Jaa xobo yohihi ta Papan xobo hihcaniqui.

³ Chicho sca ta xohpesahca qui rontamehtai chopas janishqui, hahan chiqueti. Hahan chichoxon chiquecái yohihi ta Papan jati hihcaniqui.

⁴ Hahan hininjatibo jano quetejanoxon cahen oro quencha jano janish. Oron rahco bohnanti jano jai, oro rahi. Jaa cahen Papan jihuetahtboti joi bohnanti. Jaa chicho cahen oro quencha maná pitiya. Aaroman jihu taxo rihbi, joconnica taxo. Papan jihuetahtboti joi macan champani qui huishá, jaa rihbi jaa bohnanti chicho bexojahah.

⁵ Bohnanti cahchian sca cahen Papa jisxonai yoshin quescapahbo rabe hahxon bohnanti cahnimahah. Joni huetsa behchinanbecoinai rabe, jaa rihbi oro bi res. Hohcha sohuamati jimi potohahtani janin jisi cahen cahnichi. Jaabo yohiti hicha jaibi tah hen rahmabi yohitimahi.

⁶ Jascayaquin xobojahax ta nerí xobo xehqui janin jano teetaibo jatihibi neten hihconicabo qui, jaton tee hahqui hihcohi.

⁷ Hihcax bi hoa chicho queha chiqueho boyamacani. Jano cahen yohuanxonnica huesti, hihcoti. Jimiya caxon cahen jahuen hohcha copi, texe jonibaan hohcha copi rihbi, jimi hinani hihcohi, jatihibi bari huesti coti res, jaa huesti jano hihconicah.

⁸ Jato jascajati yohixon ta Dios Yoshiman noque honanmahiqui, jaa xobo yamascaiyapari non Papan jati janin hihconica.

⁹ Noquen hohcha copi hinabo rehtexon jaa xoboho Papa Dios hinanxon bi tah non jascayaquin jahuentianbi noquen hohcha potatimahi. Potacointi non haxenon hihxon res ta jascajati Dios Yoshiman yohinishqui.

¹⁰ Pitimabo piyamaxon, xehatimabo xehayamaxon, jahuaborabo nashimaxon jai joibo ta basima tahni janishqui: joi coin nocoscaya ta jamenohi joi yamascatihqui.

¹¹ Nea ta jaa joi coin qui: Cristo ta quiquin yohuanxonnica qui. Hihti sirijaquin noque hahxonnoxon ta jonishqui. Hashoan siri xobo janin sca ta canishqui. Xobo non hihqui bi tah non mequeman xobojahi yohiyamahi, nea neten mehama.

¹² Chibon jimi ta Criston boyamanishqui. Toro baque jimi rihbi boyamaquin. Jahue-nahbi jahuen jimi ta bonishqui. Jascabi queyohah noquen hohcha janon ta huesti coti res hihcoxon jahuen jiminbi noquen hohcha copijanishqui.

¹³ Caibo betan tsinquití hahtipayamahibo qui ta jimi potojaha tsinquití hahtipahscainqui. Jato qui chibon jimi potojaxon toro jimi potojaxon, vaca mapojaxon jahuen chihi mapo jato qui potojaha ta tsinquinicabó japhanonishqui.

¹⁴ Jascajaha hihconica jaa jaiya ta Criston jimin nashimaha hashoan sca noque Papa janin tsinquinicabó qui. Dios Yoshin ta queyoyosma qui. Jaan yanapano ta jihuetai Papa qui Cristo hinamehnishqui. Jahuabi tiroma yamaxon copi ta jahuen jimin noquen hohcha copijati hahtipahxon noquen hohcha queyobahinnishqui. Jaa copi tah non noquen Papa yocati non hahtipahscái.

¹⁵ Moisesnin yohini quescabijahax bi jascabihí noquen hohchaya non banetai quen ta mahuaquin noquen Hihbaan jahuen jimin copijaxonnishqui. Jaa copi ta behna joi noque yohinica qui. Papan jihue janin non jascabi sca hahbetan jihuemon ta Papan noque jano huinomati yohinishqui. Noque jano huinomanicahxon ta Criston noque behna joi yohinica qui.

¹⁶⁻¹⁷ Jihueparixon noquen papabaan jaton jahuaborabo noque hinanrihyamacatsihquin bi hihxon sca noque hihbomayanoxon ta noque hinantijacaniqui, jaa hinantijati joi copi sca non biyahixihqui. Jaa mahuascaiyapari tah non bihtihi. Jihueparihiya cahen biyahamahan.

¹⁸ Jaa copi ta hinantijaquequin noquen xenibo nincamamenquoquin Papan jato hina rehemanishqui, mahua janon.

¹⁹ Jascajati jai copi ta noquen xenibo tsinquixon, Papan huisha joi jatihibi jato nincamaxon, chibon jimi bihxon, jaa hihiyamahiya toro baque jimi bihxon, jeneya hichajaxon,

carnero rani joshinjaxon toncojaxon, tahuia qui queonxon, jimi qui maosahxon, jaa quirica qui huishcoahantanxon, jatihibi jonibo qui rihbi huishcoahattannishqui.

²⁰Jato mechchajaxon ta jato yohinishqui: Mato hinantijaxon ta jaa queenai quesca man jihuuenon Papan mato nincamahiqui. Nea jimi ta hahan mato jahuen jihuetahbojati qui.

²¹Jato qui huishcoahantanxon sca ta jaa Papan xobo qui rihbi jascajaxon, jano jai jahuaborabo qui rihbi jascajapaquenishqui.

²²Jahuen jati janin jahuabi tiroma non huinomayamanon ta jimin sirijati Papan yohinishqui, Moises huishamaquin. Jaan yohihah ta hina rehtexon pari hohcha sohuamatiqui.

Hinamehquin Criston noquen hohcha copijaxoni

²³Papan quiquin jati janin cati jenquetsahpa hin non honannon hihxon ta noquen xenibo xobojamanishqui. Yohina jimin jano jaibo jaabaan sirijati jaiya cahen Papan naihoh jati sirijanxon hashoan siri rehtexon pari sirijatihu.

²⁴Mainxon xobojanibo ta hahan haxeti res qui, naihoh noquen Papan quiquin jihue janin cati non hexenon. Cristo ta mequeman xobojanibaan hihcoyamahiqui. Naihohbi hihcoxon ta Papa janinxon sca noque yohuanxoniqui.

²⁵Mai meha yohuanxonica jonibo ta jaa chicho queha chiqueho yohina jimi boxoni jatihibi bari hihcohihqui. Cristo ta jascayamahiqui. Jascanicahax cahen hinamehti cari carichin.

²⁶Huesti coti res noque copi mahuayamahax cahen netejamenoni pecaho hicha coti mahuati jaquehan. Hicha coti ta hihyamanishqui. Nete queyoti hochoma ta huesti coti res jahuem hinamehxon huestijaquin noquen hohchabo queyobahinnishqui.

²⁷Noque jonibo rihbi ta huesti coti res mahuanicabo qui. Jaa pecaho cahen hohchayabo Papan casticanayaxihi.

²⁸Jascarihbibi ta huesti coti hicha jonibaan hohcha copi hinamehtax, noquen hohcha queyoxonnish joribiyaxihi qui, jaa joti manataibo jihuemanoxon.

10

¹Noquen bari yoshin res jisxon noquen bemanan jenquetsahpa quin non honanyamahi quescaribibi ta Moisesnin huishani joi qui. Jaa jisxon tah non Papan noque hahxonyaxihi qui non shoco res honanai, honanhihiyamaquin. Moisesnin yohini quescabijaquin jatihibi bari jaton hinanti hinani cari carixon bi ta jascapa hinanxon jahuentianbi jaton hohcha queyobahintimahiqui.

²Jascapa hinanxon jaton hohcha queyobahinxon cahen hinanyamascan. Huestijaquin jaton hohcha queyobahinti hahtipahxon cahen jaton hohcha shinanyamascan.

³Jatihibi bari hinani caxon ta hinanxon, jahanbi jaton hohcha shinanrihbicaniqui.

⁴Toro jimi, jaa hihyamahiya chibo jimi, jascapahbaan tah non jahuentianbi noquen hohcha potatimahi.

⁵Jaa copi ta noquen neten jahuem jan nescari yohuanni joi jaiqui:
Hinantibo tah min queenyamanihqui. Jaa queenxonma bi tah min hea yorajaxonai.

⁶Jaton hohcha copi yohina rehtexon mapojati tah min costanyamahi.

⁷Neno tah hen qui, Papan Dios. Min huishani joi hea yohihi jai quesca, Min queenai quescajati tah hen jahui
hihqui jaa huisha.

⁸Hohcha potanoxon Moisesnin yohini quescabijaquin jaibaan bi ta jascapa hinanti Papa queenyamahiqui, non yohihi quesca: Hinantibo tah min queenyamanihqui. Hohcha copi yohina rehtexon mapojati tah min costanyamahi, hihqui.

⁹Jascaxon cahen nea rihbi yohinish: Neno tah hen qui, Papan Dios, hea yohihi miin huisha joi jai quesca Min queenai quescajati tah hen jahui, hihqui. Jan yohimenohah yamascanon ta chini joi janishqui.

¹⁰Papa Dios queenai quescajaquin ta jahuen yora hinamehxon huestijaquin Jesucristonen noque sirijahiqui, non Papa qui cati hahtipahscanon.

¹¹Jonibaan hohcha copi hina rehtexon jimi hinanxonquin ta jatihibi hinanxonicahton jaahinanihqui. Jatihibi neten nihxon ta jascapa rahsi hinanxoncaniqui. Hinanxon bi ta jascajaquin jahuentianbi hohcha potati hahtipahyahamahiqui.

¹²Criston caya, jaabi hinamehxon ta huestijaquin noquen hohcha queyobahinnishqui. Queyobahinax ta Papan mecayaho quiquin hapo sca tsahonishqui.

¹³Papan jahuen rahuibo namajanon caman ta jano manatihqui.

¹⁴Jascabi sca siribo jahuen caisahbo janon ta huestijaquin hinamehxon noquen hohcha queyobahinnishqui. Jaa copi ta manati res jaa jaiqui.

¹⁵Dios Yoshiman rihbi ta Papan joi huishamaquin jaa yohinishqui.

¹⁶ Hinantijaquin tah hen huetsa tian nea joibo jato nincamayaxihqui hih ta Hihbo jaiqui.
Hea queenai quescati tah hen jaton jointi janin niatih. Jointinin honanahbo tah hen huishaquin hahcajaquin heen shinanbo jaton jointi janin hihquimatihi.

¹⁷ Jato jascahax nesca sca janish:

Jaatian tah hen jaton hohchabo, jaton tiromabo hean shinanyamascatihi hihqui.

¹⁸ Noque jascajaquin sohuaxon hohcha shinanyamascai copi tah non hina rehtexon jimi hinanti yamascai.

Papa pataxti

¹⁹⁻²¹ Papan jati janinbi non hihconon ta chique janin xehqui behna quehpenxonquin hahcajaquin jahuen yora hinamehnishqui. Xehqui quiri non pontecahini cahi quescaribhihi tah non noquen jihuetai hihbo qui cahi, Papa qui bi nocoti cahi. Papan jihue janin jahuen jihuetahabaan quiquin yohanxonica jaresscai quen raque potahax hihconon bonahue, hea huetsabaan.

²² Papan noque Benahue jaiquin honancoinax hihconon bonahue. Shinanihcama-haxma bi shinancoinax hihconahue. Non hihconon ta noquen jointibo huishcohah-taniqu, non tiromapahoni non shinanyamascanon. Noquen yora ta jene nexnanin nashimaquin hahcajahiqui.

²³ Noque hinantijanicanton noque hinancoinyaxihqui honanquin sirijaxon caibo ninca-maquin jeneyamanahue.

²⁴ Hashoan sca joni huetsahon shinanxon yanapanhananahbo hihxon noquen huetsabo yohanquihnnahue. Caibo hahxonti jato shinanmanahue.

²⁵ Tsinquitaibo betan behuahi tsinquinahue. Caibo tsinquiyamahi quesca man jamis. Papan casticanti nete nocoti jahuijisish hashoan sca joni huetsa yohinannahue, jaton shinan coshijanoxon.

²⁶ Noquen hohcha copi Cristo mahuanishquin honanquin sirijahax bi jaabi queenax copi non tiromahi jihuetaiaya tah non huetsa hahan hohcha potati yamascai.

²⁷ Hahqui raquetijaquin Papan casticanyaxihqui honanax, jaa shinanya jihuemanahue. Johuehinhnatai chihin nincayosmabo Papan queyoyaxihqui honanax, jaa shinanya jihuetai.

²⁸ Jascatimahi Moisesnin yohinib bi nincacatsihyamaxon hahresai joni tiromahijisish chanilahbo ta jaa rehtecanpahonishqui. Rabexon jisxon, rabe hihyamaxon quimisha jonixon jisxon yohihah ta jaa tiromahi rehtecanpahonishqui, homisbaxonma reteres-canquin.

²⁹ ¿Jahuentiho castican cahra Cristo jama jamacaibo jatihiquin? Jato jihuemanoxon jahuen jimi Criston potanib bi ¿Criston jimi jahuama hihqui quescajahibo copi Papan jato tiromajatimahiquin? ¿Jahan shinanxon Dios Yoshiman jato hihti hahxonah bi hosanaibo copi Papan jato casticancointimahiquin?

³⁰ Nea noque yohini tah non honanai: Heanbi tah hen jato copitihi. Hean tah hen jato casticanyaxihqui, hihqui. Huetsa rihbi jaa yohanai ta nesca qui: Papan ta jahuen jonibocasticanyaxihqui, hihqui.

³¹ Hihcoini Papan queyoyosma mequen ta hahqui raqueti qui.

³² Criston joi nincacoinxon man tenepahoni shinannahue. Hihti tiromaja mato jaahbo bi tah man tenenihqui.

³³ Caibaan ta mato hicha hichanishqui. Caibaan rihbi ta janibijaquin mato hosanhahnatiromajanishqui, costanahbo. Jascapa tenehibo rihbi tah man yanapanniqui, hahbe tenehibo sca janoxon.

³⁴ Sipo xoboho tsahonah tenehibo rihbi tah man yanapanniqui. Tiromajaquin maton jahuaraborabo mato bichinahbaan bi tah man jenimahanan tenenihqui. Naihoh man hashoan siribo queyotimabo jai honanxon tah man jenimahanan tenenihqui.

³⁵ Jascapahonihboxon jaa teneti shinan potayamanahue. Man tenehiya ta Papan mato hihti hahxonyaxihqui qui.

³⁶ Jaa queenai quescajia man jai quen mato hahxontijani jai bihyanoxon, tenenahue.

³⁷ Basima sca ta hihtihiqui. Jonicah ta joyaxihqui qui, basiyamahi.

³⁸ Heen siri joni ta nincacoinax jihuetahiqui. Bahinbi jahueb xi banejaquetax jarihax jan jahui qui caribihiya tah hen jahan jenimatimahi

hih ta Papa jaiqui.

³⁹ Jahan jan jenimayamahi yohihi ta noquenahma qui, hea huetsabaan. Bahin banetax queyotaiboma tah non qui, jointinin nincacoini queyoyamanox manataibo tah non qui.

¹ Papa yohuanai nincacoinnicaxon tah non nincaxon jan noque hahxonyaxihqui non honanquin sirijahi. Jan noque hahxonai jisxonma bi tah non honancoinai.

² Jascapa honanya japahonibo copi ta noquen xohtabo qui Papa Dios siripi yohuanishqui siri yohiquin.

³ Jistimahiboya ta jistibo sca janon yohuanxon res Papan nea netejanishqui. Papa hihcoini yohuanai honanyaxon tah non jan netejani non honanai.

⁴ Jascapa nincacoinnicaxon ta Papa Dios hinanquin Cain mentan hashoan sirijaquin Abelhin jahuen hinanti hinannishqui. Nincacoinnicaxon hinanai copi ta siri joni Papan jaa jisnishqui. Siri joni jisxon, jahuen hinantibihquin. Abel neateman mahuanib bi tah non jaa shinanaxon, jascapa nincacoinnica non hihquiya noquehon Papa Dios jenimahi non honanrihbihi.

⁵ Jascapa nincacoinnica hihqui copi ta Enoc Papa Diogenes bilihinnishqui. Jaa copi ta yamacahinnishqui. Bilihinniyahnoxon ta jaa yohihi jahuen hahan jenimati joni jaa hihqui Papan yohinishqui. Mohitahpa bilihinnini copi ta mahuayamanishqui.

⁶ Jascapa nincacoinnica non hiyamahiya ta jahuentianbi noque siri jisyamahi qui. Papa qui canicahton ta Papa Dios jai shinantihi qui. Non Papa Dios benabonaha jaan noque meramatihai tah non shinantihi.

⁷ Tsoan jisnima paqueyaxihqui Papan yohihah ta nincacoinxon Noeman nontijanishqui. Nincacoinax ta jahuen haiboya jahuen baqueyoya nanetax jihuenishqui. Caibo ta jascapa honanya hiyamahax jene meran cahax queyocahincannishqui. Jascapa honanyahpabo rahsi res siribohi jisxon ta Noen rihbi Papan siri joni jisnishqui.

⁸ Hen mia jismayaxihqui mai janin catanhue mina sca jaa mai hihnon Papan jaah ta nincacoinax Abraham canishqui, jahuen hen nocoti cahin hihcanahaxma bi honanaxma jabiyahpa carescrai.

⁹ Papan hinanyaxihqui main nocotax sca ta janohahbibaan nahuahax bi jano jihuenishqui. Jahuen baque Isaaque, jahuen xohta Jacobo rihbi ta hahbetan jaa xoboho jihuenishqui, jaa mai hahbetan hihboyaxihqui.

¹⁰ Papan jato jemajaxonxihqui ta manaquin tapasax res jano jihuecannishqui. Xoboyalpa queyoyosma jema manacani.

¹¹ Abrahanen haibo cahen Sara. Baque bihyosmaxon bi ta nincacoin sca jaax baqueti coshi bihresscaxon, yoxabohax bi toho sca hihxon, baque bilihishqui. Hihcoini yohuanxon Papan hahxoncointihi honanaxon copi ta jahuen baqueti queyoscanixon bi jaa baque bilihishqui.

¹² Jaa copi ta muhuascasi quescahi huesti joni janish bi caicanacannishqui, huishi hicha jai quescarihbi caichi, huean quexa mashi bero jai quescarihbihi, topontimahi.

¹³ Nea hen yohiha jonibo ta nincacoinax bi jatihibi muhuacannishqui. Papan jato hinantijani bichishma muhuacani. Hocho jisi quescarax ta jenimacannishqui. Noque tah non mai mehabaan nahuabo qui, nai naman tah non pasijaresai hih ta jacannishqui.

¹⁴ Jatonahbi hihnon jaton mai manaparihibo ta jascanicabo qui. Jaa copi jascacani.

¹⁵ Janohax piconihbo mai ta shinanyamasacacannishqui. Shinanparihax cahen jano boribicanan, queenax tian.

¹⁶ Hashoan siri mai queenax ta boribiyamanishqui, naihoh queha mai queenax. Jaa copi ta Papa Dios jaton Papa hihti hihtimahyamahi qui, huetsa jema jato bexojaxonnish.

¹⁷ Miin baque hea hinanquin rehthue Papan jaah ta nincacoinxon Abrahanen hinannishqui, jaa huesti jahuen baque que bi. Papan hinantijani mai jahuen baquen bihtihi bi jahuen baque Papa Dios hinanquin.

¹⁸ Miin baque Isaaque tah hen caijayaxihqui, hicha sca miin chini baquebo janon hah ca Papan janish.

¹⁹ Isaaque muhuascasi bi ta Papan hahquirihbi teehihmati hahtipahqui hihxon ta Abrahanen hinannishqui. Jaa copi ta rehthymahue Papan hahca rehtexonma bilihixon sca hahquirihbi teehihqui quesca jahuen baque jisnishqui.

²⁰ Nincacoinnicaxon rihbi ta Isaaquen sca jahuen yohuanxon jahuen baque rabe yohinishqui, Papan jato hahxonyaxihnon yohiquin, jahuen baque Jacoboya Esaú.

²¹ Papa yohuanai nincacoinnicaxon rihbi ta muhuacatsihscaxon Jacobon sca Josepan baque rabe yohinishqui, Papan jato hahxonyaxihnon jato yohiquin. Jato yohixon, jahuen mepitin betihixon Hahxon tah min jai, Papan, hahquin.

²² Nincacoinnicahax rihbi ta José sca muhuacatsihxon, Egipto mai janinhax jahuen caibo picoyaxihqui hihxon huetsa mai janin jahuen xao mihinti jato yohinishqui.

²³ Nincacoinnicaboxon ta Moisesnin papabaan rihbi sca Moises siri pishca jisxon, quimisha hoxne jaton baquexo pishca jonenishqui quiquin hapon rehthymahon. Nincacoinnicabohax ta hapo qui raqueyamacannishqui.

²⁴ Nincacoinnica hax ta haniscaax Moises sca quiquin hapon haibo baquen baque hiyamascanoxon jahuen caibo betan sca canishqui.

²⁵ Neno pari hohchaquin costantahpan hihxonma bi ta Papan jonibo betan tiroma tenetanpan hihxon jato tenequihnnishqui.

²⁶ Egiptobaan quiquin hapon xoboho jahuabi pishinyamahi, siri siripi jihueta hahpihxon bi ta Criston tenehi quescajaquin tenehah ta hashoan siri qui hihxon tiromabio Moisesn tenenishqui. Papan hinanyaxihqui bihyanoxon hihxon ta tenenishqui.

²⁷ Jistimabo jixson quescajaquin ta Egipto mai potabahinrishqui, noquen Papa nincacoinxon. Nincacoinnica hax ta sinatai quiquin hapo qui raqueyamarihbishqui.

²⁸ Nincacoinnicaxon rihbi ta pascua piti pitijamanishqui, rehtenica yoshiman jaton beboquiha baquebo meheyamanon hihxon rihbi ta nincacoinnicaxon jaton xobo xehqui janin jimin sicanishqui.

²⁹ Non mai potoni nabebacahini cahi quescaribhihi ta nincacoinax joshin hian nabebacahini pohquejaquecannishqui Moises betan. Jato chibani sca ta Egipto rihbi nincayosmabohax pohquejaquecatsihquish bi jenen jato mahponishqui, hahsascanon.

³⁰ Nincacoinax rihbi ta Jericó jema mayaconatani siete neten nihcannishqui, jaa jema chiquebo poxoscanon.

³¹ Nincacoinscaxon copi ta hahresti haibo Rahabanen jahuen jema jisi jahuibo sirijaquin mapemanishqui, jahuen jema janin jihueta nincayosmabo betan muhayamanoxon.

³² Hicha jascapa nincacoinnicabo yohiti jai bi tah hen yohihi hashoan basitihi, Gedeon, Barac, Sanson, Jefté, David, Samuel, Papan joi yohinicabo.

³³ Jaabaan ta nincacoinnicaboxon jaton quiquin rahuiro jaton sontaroboyabi camaxon, pontejauquin jaton jonibo jihuemaxon, Papan jato hahxontijanixon hahxonah bihxon, hinon jana xehponishqui.

³⁴ Johuehihnatai chihin nocajahax ta noque reramis sontarobo quihax jabatax, yosmamax bi coshicahini, coshi sontaroscaxon jaton rahui sontarobo camacannishqui.

³⁵ Jaton haibobaan ta jaton baquebo muhuatax bi hahquirihbi teehihqui hicotancanishqui.

Caibaan rihbi ta Papan joi jato jenemacatsihquin tiromabaan hisinjahah bi tenenishqui, rehtehah bi Papan joi jeneyamabiresquin, hashoan siri jihuue jayanoxon teneresquin.

³⁶ Caibaan rihbi ta hosan hosanah bi tenenishqui, jihuui rishqui rishquihah bi tenequin, cadenanem nexahahbo bi tenequin, sipo xoboho tsahonahbo bi tenequin.

³⁷ Rehtecatsihquin macaman tsacahahbo bi mahuanoxon caman tenequin. Caibaan cahen siran naxtehahbaan bi Papan joi jeneyamaquin. Machitonen rehtehahbo bi jeneyamaquin. Chopax pishinxon carnero bichi chopajaxon sahuehax cahuan cahuan. Chibo bichi chopajaxon sahuequin. Pihan hihcanni. Yomanahcani. Tiromajahah bi teneresquin.

³⁸ Texe jonicaan jisí jaabo tiromabohi, hashoan siribo que bi. Jano tsoa jaitonma ta metisihcanahi cahuan cahuanishqui, mahchi janinbo jonecani, mai xangueman jonecani.

³⁹ Jaabo jatihibichin ta nincacoinnicaboxon bi Papan jato hahxontijani bihyamacanishqui.

⁴⁰ Jaabo res siribo hihnonma bi ta jato betan noque rihbi sirijayanoxon Papan neateman yohinishqui, hihti siri noque hahxontijaquin.

12

Jesusen teneni quescajati

¹ Jaa hen yohihah nincacoinaibo ta hicha qui, nai cohin tsamati quescapi. Jaabaan teneni quescajati ta jaiqui. Coshin bishquihihcananoxon jatihibi hihuebo potabahinquin hahcajaquin noque rahhuehihtaiboh hohchabo potabahinahue. Jato potabahini coshin bi res canon bonahue, noquen Hihbaan noque hinanah babin canoxon yobacahinnahue.

² Noquen Hihbo Jesus qui noquen shinan camahahnhan coshin caquin hahcajaquin tenehue. Teneti shinan hihbo hihxon ta jaan noque hinanxon non hihti shinanyahpa hihnon caman noque hinanbonahiqui. Jaan noque hahxonni shinannahue: jihuui hueonxon rehtehah bi ta noquehon jenimaxon jaan tenenishqui. Tiromajaquin rabinmahahbaan bi ta noquehon jenimaxon jaa rabinmahí hen jahuama quescaxon jaan tenenishqui. Rahma ta Papa Dios patax hihbohi tsahoscaiqui, Quiquin Hihbo sca.

³ Jaan jascapa tiromabio teneni shinannahue. Teneyosmayamanahue Man yobacahinya-mamis.

⁴ Hohchapan mato bihti tenequin bi tah man maton jimi potanoxon caman teneyamaparihi.

⁵ Mato jahuen baquebo jan yohicoinai huisha tah man shinanbehnohi. Jaa huishani joi ta nea qui:

Min Hihbaan mia pontehah nincayosmayamahue, baquen. Jaan mia casticana bi yosmayamahue.

⁶ Hahan queenxon copi ta miin Hihbaan jahuen baquebo pontehihqui. Nincayamahiton ta jahuen baquebo jatihibi jaan rishquihi qui hihqui jan huishani joi.

⁷ Jaan mato haxemanon tenenahue. Jahuen baquebo copi ta Papan mato pontehihqui, mato hanijaquin. Jatihibi baquebo jaton papabaan hanijaquin ponteyamahihqui?

⁸ Caibo pontexon bi mato jaan ponteyama hah tah man jahuen baquema qui. Jahuen nahma sca.

⁹ Noquen papabaan noque hanijaquin pontehah tah non jato nincanihqui. Hashoan sca non noquen naihoh queha Papa non nincatimahin jihuenoxon?

¹⁰ Jaabaan bi shinanai quescajaquin res ta noquen papabaan noque pontenishqui. Noquen naihoh queha Papan ta non hashoan siri hihnon noque pontehihqui, jaa naihoh hihqui quescari non noque rihbi jihuenon, ponte.

¹¹ Noque pontehah tah non bitsayamahi. Pontehah tenequin. Tenehax haxescaax, ponteboscái, jenimascaí.

Noquen Hihbo man nincayamamis hihqui

¹² Jaa copi coshinahue. Meyosmahax bi mecoschinahue. Maton raboxobo yosmascái bi tacoshcahinnahue.

¹³ Nihnoxon bahi pontebo hahnahue cojocanahibo cahax xao rechibo tsequecahinya man. Tarabehquetaxma man rohacananon.

¹⁴ Jatihibi jonibó sirijaquin yohuanquihnahue. Hohchaya jatima queenyoranahue. Hohchatima queenyamahibaan ta noquen Hihbo jisyamayaxihqui qui.

¹⁵ Noquen Papan matohon shinanxon mato jihuemahi bi caibo nincayamahax camis hihxon joni huetsa coirannahue. Mato tocan tiroma shinanyahpa jonin mato jahuen shinan hinanah man jaa chibannis.

¹⁶ Tsiniyamabiresnahue. Esaunen hahni quesa man jamis. Jaan ta huesti coti pinoxon Papan hinantijani jenenishqui, beboquihá baque hihxon jaan bihtihi bi.

¹⁷ Jaa pecaho jan jeneni bihribicatisihqui cahen huaoihhxon yocaxon bi bihyamascanish. Huetsa hihbomascaxon hahquirihbi bichinti hahtipahyamascaquin.

¹⁸ Mequeman meheti mahchi qui cahen noquen xenibo noconish, jano chihi perehihqui, cohiman mahpohah yamecähini, hihti bahquishihpi, raqueticahini. Jascaph qui tah man nocoyamahi.

¹⁹ Jaabaan ta corneta rehue corotai nincaxon, Papa yohuanai nincaxon, nincati teneyamascaxon Noque yohipahiyamahue hahcannishqui.

²⁰ Huesti yohina bocabi joxon nea manan mehehiton tah man macaman jaa rehtetihí Papan jato jaah cahen raque teneti hahtipahyamacannish.

²¹ Hahqui raquetijisish ta Hea tah hen hihti raquetai, raquepahhuani tah hen jai hih Moises janishqui.

²² Jascapha mahchi qui tah man nocoyamahi. Man hahqui nocotai ta Papan manan qui, jahuen jati, jano jaan jihuemahi jahuen naihoh queha Jerusalen, jano jahuen yonotibo tsama jai, topontimahi jano jenimahi tsinquijaquetaibo hichahí.

²³ Naiho jaton Janebo huishapaquenixon jaan tsinquihah, jano Papan beboquihá baquebo tsinquitai, janoxon jatihibi jisxon Papan caibo hahxonxon caibo casticanaí, jano yamanicabo siribó jai, hahqui tah man nocotai.

²⁴ Noque hahxontijanixon jayaxon Papan noque hahxonscái joni jano jai, Jesus; hahan sirijati jimi jano jai, Abelen potani jimi quescayamahi jaa jimi copi Papan noque sirijaquin hahxonai. Jascaph qui tah man nocotai.

²⁵ Jaan mato yohihah, nincayamayamanahue: man nincayosmamis. Jaan jato hihti yohihah bi nincacatsihyamahibó copi ta cahnexonma Papan noquen xenibo muhuanishqui. Jaton casticanti jaabaan xahbanjamati hahtipahyamahiya tah non jan naihohxon noque hihti yohihah hashoan sca noquen casticanti non xahbanjamati hahtipahyamahi.

²⁶ Jan jato yohihah ta mai miuannishqui, xayati. Rahma ta jan yohini quesa sca jatihibi: Huestijaquin sca tah hen mai res ma bi nai rihbi xayanyaxihqui, hihqui jan yohini joi.

²⁷ Huestijaquin jan hihqui bi ta non rahma jisibo naiyahpa mai queyobahinti yohihiqui, xayayosmabo sca janon.

²⁸ Xayayosma jihuematí ta noque hinantijanishqui. Jaa copi Hahxon tah min noque jai Papan hahxon, jaan siri jisi quescajaxon, raquetax bi jahan queenxon, jaa yocanahue.

²⁹ Noquen Papa Dios ta queyomanica chihiyahpa qui.

13

Papa queenai quescajati

¹ Maton huetsabohon shinannahue.

² Huetsa janinhax nocotaibo sirijaquin johue hahnahue. Jascajati pishinyamanahue. Jascajanica hxon ta jato qui Papan yonotibo nocotaiya jascapahbohi honanxonma bi caibaan jato sirijaquin bhnical qui.

³ Hahbe sipojahabo quescajoxo sipo xoboho tsahotaibo yanapanti shinanbehno ya manahue. Tiromajahah tenehi joni yanapannahue, hahbe yorayahpaxon copi jato shinan behno yama qui.

⁴ Jatihibijaquin maton haibo maton bene sirijaquin jihuequihnahue, jaa huesti betan hihqui, huetsa betan hihyamabiresi. Tsinihi haibo, tsinihi bebo, jascapa haibobo, jascapa bebobo ta Papan casticanyaxihqui qui.

⁵ Coriqui queenaxma jihuena hue. Man jai pishca senenscái hihquish jihuena hue, Papan yohini honanax. Jan yohini ta nesca qui: Mia tah hen jeneticahi. Jahuentianbi tah hen mia potabahintimahi, hihqui.

⁶ Noque yohihi jan jascari yohuanni copi tah non jointi siriscá: Hea yanapannicah ta heen Hihbo qui. Jaa copi tah hen raqueyamahi. *Jahueja hea jatihiquin jonibaan, heen hihbaan hea yanapanaiya?* hih tah non jai.

⁷ Mato Papan joi nincamani shinannahue. Nincacoinnicabohax jenquetsahpabo jaabo jacannishquin hihxon jaabaan hahni quescajauin hahnahue nincacoinquin.

⁸ Jesus Cristo ta jascabi qui, jan hihni jascabihi, jan rahma hihqui jascabihi, jan hihyaxi hqui, jascabihi.

⁹ Mesco joibo yohiquin caibaan mato nincamamis hihxon huetsa joibo bihyamanahue noquen Hihbaana res. Noquen Hihbaan hahxonah tah non noquen shinan coshihi. Nea pihue, jaa piyamahue jaibaan bi tah non jascapa joibaan noquen shinan coshiyamahi. Yanca bi res ta jascapa joibo yohicaniqui.

¹⁰ Noquen hohcha copijaxonnica tah non noque jai. Jaan hahan copijaxonai ta Moises-nin yohini quescajacatsihqui baan piti hahtipahyamahiqui.

¹¹ Jaabaan ta hohcha copijacatsihxon, yohina rehtexon Papan xobo janin jahuen jati chiqueho jato yohuanxononica jaa jimiya caxon, hoque jemama qui sca jaa yohinahbo pataxon mapojacantihqui.

¹² Jascajaquin rihibi ta Jesusen jahuen jiminbi noquen hohcha copijaxonnoxon Jerusalen jemama qui cahax mahuanishqui.

¹³ Jaa copi jano Jesus hihqui janin res canon benahue, judiobaan jemama qui. Noquen Jesusen teneni quescabijaquin jaa tenexonnahue, caibaan noque tiromajahah bi tenequin.

¹⁴ Neno tah non queyoyosma jano jihueta yamahi. Noquena ta jayaxihqui qui. Jaa caya tah non manatai.

¹⁵ Hinamehxon noquen Hihbaan noque jascajaxon hihti hahxonni copi sca jascabi jaquin noquen Papa Dios yohinahue, Hahxon tah min noque jai Papan, hahquin. Jascajaquin noquen Hihbaan janen yohinonhue.

¹⁶ Maton huetsabo hahxonquin jeneyamanahue. Pishinax yomanahtaibo jaiya jato hinanresnahue. Jascajaquin tah man noquen Papa Dios hahxonai. Jascahiya ta jenimahiqui.

¹⁷ Maton pastorobaan mato Papan joi nincamaha, jato nincacuin sirijaxon jan yohihi quescajanahue. Jaabo ta maton coirannicahbo qui, noquen Hihbo hahxonquin. Man jato nincacuin sirijayaniquin hah ta Papan jato jayaxihqui qui. Jaa copi jato nincanahue, jenimahan mato nincamanon. Man nincayamahiya ta benáxon mato nincamatihqui. Benáxon mato nincamahiboya cahen Papan mato sirijayamahan.

¹⁸ Hen honanai hen hohcha ta yama bi res qui. Jatihibijaquin tah hen ponte jacatsihqui hean jai. Hea yocaxonnahue, hen hahnon.

¹⁹ Hashoan histon sca hen mato janin hihnon, hea yocaxonnahue. Jaa tah hen hihti queenai.

Jato yocaxonquin jahuen quirica queyohi

²⁰ Noquen Papa Dios ta noque sirijaquin shinanmanicah qui. Jaan ta noquen qui qui coirannica teehihmaribinishqui, noquen Hihbo Jesus, hihqui qui que bi. Papan ta jahuen tibi queyotimajaquin noque hahxontjanishqui, noquen Hihbaan jimi copi noque hahxontjaquin. Jahuen jimi copi ta jaa noquen qui qui coirannicah qui.

²¹ Jatihibi hahxonti coshi Papan mato hinannon tah hen mato yocaxonai, jaa queenai quescajaquin man hahnon. Jahan jaa jenimahibo sca man janon jan maton jointi janin Jesucristo betan teexon mato sirijaxonnon tah hen yocaxonai. Mia tah min Shinan Hihbo qui Hihbon, hihqui non jascabi yohuannon. Jascari rahan.

²² Huishaquin hen mato yohiha nincanahue, hea huetsabaan. Hashoan yohiti hahti-pahxon bi tah hen joi tsamanxonma mato yohihahqui.

²³ Noquen huetsa Timoteo ta sipo xobohoh queha cainmahipicanaxqui. Man honannon hihxon tah hen mato yohihi. Histon jaa jahuiya tah hen hahbetanbi caxon mato jisi cayaxihqui.

²⁴ Maton pastorobo jatihibi hea yohixonnahue, man jascabi jayamahin hahquin, noquen huetsabo jatihibi rihbi. Neno Italia mai janin jaibaan ta mato qui salud raanihqui nea huishayaxon.

²⁵ Papan shinanya jihuenahue. Jascari rahan.

SANTIAGO

Santiagonen huishani joi

Jabisnibo qui Santiagon huishahi

¹ Hea Santiago tah hen Papan joni hihxon, noquen Hihbo Jesucriston joni hihxon, hen mato jatihibi jabisni judiobo yohihi, man jascabi jayamahin, hahquin.

Papan hinanai shinan

² Mesco tiromabo tenehahnhan hihti jenimati shinannahue, hea huetsabon.

³ Moto yosmajacatsihquin maton shinan tanahah bi tenexon man hahan teneti coshi bihihi honanax jenimahue.

⁴ Coshinoxon jatihibi shinanya siri janoxon tenequin jeneyamaxahnahue, jahuabi pishinyamascanoxon.

⁵ Shinan pishinxon noquen naihoh queha Papa yocahue. Mia ta hinantihiqui. Yohuashihxonma ta jatihibi joni jaan hinanresiqui, jahua copi min yocacain hihxonma.

⁶ Bihti shinancoinhue. Hinanyama rah ta jatihiqui hihxonma yocahue. Hinan ra jaquin, hinanyama ra jaquin hihnicah ta hian behchonihcamahi qui, nihuen xotonquin potajaquehacamahi.

⁷ Jascapa joni hihxon noquen Hihbaan mia hinantih shinanyamahue.

⁸ Jascapa rabe shinanyahpaton ta shinan mitisahaquipui, jan hahcatsihqui jatihibi.

⁹ Jahuaborabojomahax sirib Papan mia hinanyaxihqui honanax jenimahue.

¹⁰ Coriquiyahpahax jahuabi min yamacoinai Papan mia jismaha jenimahue, barin hahca huasi joa histon xanahihcamahi miin coriqui queyóyaxihqui honanax jenimahue.

¹¹ Bari queyascaax xana sca jaiya ta huasi xanahihqui. Jahuen joa reocohti. Siriyamascai. Jascaribhibi ta coriquiyahpa queyotihiqui jahuen teeboyabi.

Noque tiromajahahbaan bi teneti

¹² Tenehax tah min hahan jenimati jai. Tanahah bi tenehax tah min jihuecointihi, Papan jihuemahah. Hahan shinanaibo cahen Papan jascajaquin hahxontijanish.

¹³ Hohchamaquin tanahah, Papan ta hea hohchamacatsihquin tanahihqui, hihiyamahue. Tsaoibi ta Papa Dios hohchamatii hahtipahyamahiqui. Jaan rihbi ta tsoabi hohchamajaquin tanayamahihqui.

¹⁴ Miabi queenax tah min hohchacatsihqui, miin queemanbi mia ninihah. Mihmbebi paramehtax queenscrai.

¹⁵ Queen sca jaax jascati shinanax hohcha sca jai. Hohchapan sca ta queyoquin noque mahuamahiqui.

¹⁶ Paramehyamanahue, hea huetsabaan.

¹⁷ Non bichi sirib jatihibi ta Papan noque hinanresiqui, jaan noque hinanah sirib jatihibi. Xaba Hihbo hihxon ta noque hinanresiqui. Jaan ta huetsa huetsajayamahiqui. Mayáxon bahquishjayamaquin.

¹⁸ Jaabi queenxon ta jahuen hihcoinai join noque jonijahiqui, jahuen beboquiha baquebo quesca noque janon.

Nincacoinaibaan shinancoinai

¹⁹ Haxecoinnahue, hea huetsabaan: histon nincati, honaxonbi yohiti, histon rainyamaca-hintima haxenahue jatihibi.

²⁰ Sinaxon tah non Papan ponte shinanai quescajahiht hahtipahyamahi.

²¹ Jaa copi jatihibi rishtaya yohuan potaxon, bonco huenenjaquin hahcajaquin jatihibi tiromahiboo potaxon, shinan man pishinai honanaxon, mato qui niahia joi bihnahue, hahan mato teehihmahai jahuen joi.

²² Paramehxon nincaresquinma bi jaa joi nincacoixon hahnahue.

²³ Jaa joi nincaxon bi hahyamaxon tah non espejonen bejisihiticamaxon jai quescajahi.

²⁴ Noquen bemanan jisish tah non caresscaxon jenquetsahpa hin hihxon bi shinan-behno sca jai histon res.

²⁵ Papan joi coin siri jisish tah non hinabo hihyamascatih. Jaa joi jisquin jeneyamaxon nincaxon shinanbehnoxonma bi jan yohihi quescabijaxon jaax tah non hicha hahan jenimati jai, jan yohihi quescabijaquequin jaax jenimahi.

²⁶ Papa Dios queenai quescajahiht hea jai hihquish bi noquen janan tiromahi yohuan-parihah tah non yanca bi res jaa shinan jai.

²⁷ Papa Dios queenai quescajaquin hahcaibaan ta yononmabo yomanahaiton yanapanxon, papajomabo mamajomabo baquebo yomanahaiton yanapanax, mai mehabaan

rishta shinan bichishma jihuetaqui. Jascapahbo ta Papa Diosen jisí noquen Hihbo queenai quescajahibo qui, hihti siri, tiromayamahi.

2

Coriquiyahpabo hashoan siri hihqui non shinantimahi

¹ Noquen Hihbo Jesucristo ta Nete Hihbo qui. Jaa nincacoinxon coriquiyahpabo hashoan siri hihqui shinanyamanahue, hea huetsabaan.

² Man tsinquijaquetai xoboho rah ta oro mehesetiaypa siri chopaya joni hihcotihiqui. Chopaya payoyaahpa jahuabijoma joni rihbi rah ta jano hihcorihbitihiqui.

³ Jaa siri chopayaahpa jixson, Neno tsahohihnarohahue, hahxon bi jahuaborajoma joni sca, Janobi nihhue hahyamaxon, Taponbi mitsahohue hah ra tah man jai.

⁴ ¿Jascajaquin man mato tocanbi caibo hashoan siri hihqui man jayamahin? ¿Jascajaxon man maton tiroma shinanyahpaxon man joni honanti shinanyamahin?

⁵ Hea nincanahue, hea huetsabaan. ¿Hicha shinanyahpa jaahbo mai meha jahuaborajomabo Papan caisyamanishquin? Papahon shinanaibo jahuen quiquin jihuetahbjanon ta jaan yohinshqui. ¿Janoxon jan jihuemahi hihbobo hihnon jaan jato caisyamanishquin?

⁶ Jahuaborajomabo jahuen jihue hihbobo janon jaan jato cainsi bi tah man jato shinanjomabo quescas jai. ¿Tsoabaan mato maton coriqui bichinlhquin? ¿Coriquiyahpaboma hin? ¿Tsoabaan mato demandaniquin? ¿Coriquiyahpaboma hin?

⁷ Noquen Hihbo siripan ta mato quenahihqui. ¿Hahqui tsoabo tiromahi yohuanhquin? ¿Coriquiyahpaboma hin?

⁸ Noquen Hihbaan huishani joi jai quescajahax man jaiya cahen siri. Miabi min shinamehtai jai quescajaquin mihbe jihuetaibohn shinanhue hah cahen janish.

⁹ Jascajacatsihquin bi caibo joni hashoan siri hihqui quescajaquin jaax cah man hohchayahpa sca jai, Papan huishamani joi jai quescajayamahax copi.

¹⁰ Huesti res noquen Hihbaan joi nincayamahax hohchayahpa sca jai, jatihibi jan yohini nincayamahax quescas sca noquen Hihbo qui hohchayahpa sca jai.

¹¹ Tsiniyamanahue hah noque jaxon ta Joni huetsa rehetyamanahue noque jaribinshqui, noquen Hihbaan. Jaa huestichin rabebi joi yohiquin. Mian cah min tsinixonma bi joni huetsa rehethan. Hohchayahpa sca tah min jatihibi, noquen Hihbo qui hohchat. Jatihibi jan yohini quescabijaxon bi huesti jan yohini nincayamahax tah min hahqui hohchayahpa sca jai, nincayamahax.

¹² Hahan jan noque hinaboma sca hihmahi jahuen joi nincacax non jihuetai ta Papan jisiqui. Siri hin tiroma quin hihxon ta noque yohiyaxihqui. Jaa copi yohuani coiramenahue. Jihuetai coiramenahue jan yohihi quescabinonxon.

¹³ Huetsa yomanahai bi non hahan shinanxon hahxonyamahiya ta jascajaxon rihbi Papan noque casticanyaixihqui, siri hin tiroma quin hihxon. Huetsahon shinanxon hahxonquin tah non noquen casticanti xahbanjamahi.

Nincacoinaibaan hahxonti jai

¹⁴ ¿Hen tah hen hihcoinai shinanai hihxon bi jahuabi hahyamaxon jahua non bihtihin? Jan hihcoinai non shinanai copi res Papan noque hahquirihbi teehihmatihquin?

¹⁵ Chopanma jihuetax piti rihbi yamahax mato janin noque huetsa jaiya, jaa hiyamahiya noquen chocajascari jaiya cah man yanapanymamahan.

¹⁶ Piti hinanxonma, sahueti hinanxonma, pishinaibo hinanxonma bi man Yora xanahax yanihue, siripax cahue hah man jaah ¿siritihquin?

¹⁷ Jascarihbibi tah man hihcoinai shinanxon bi yanapanquin hahxonyamahax man jahuabi shinanjoma quescas sca jai. Mahuatax quescas sca tah man jai.

¹⁸ ¿Mian min noquen Hihbo hihcoinai shinanain? hah ta caibaan jatihiqui. Hean tah hen jato hahxonai. Jahuabi hahxonxonma min hihcoinai shinanai hea jismahue. Jahuabi hahxonxonma min hea jismacatsihqui bi tah hen yanapanquin hahxonquin hean hen hihcoinai shinanai hean mia jismatihi min honannon.

¹⁹ Papa Dios ta huesti qui hah rah tah min jai. Huesti coin tah qui, min tah min hihcoinjaquin shinanai. Tiroma yoshinbaan rihbi ta jaa honanishqui. Jaa honanya jaax ta tastahihcanihqui.

²⁰ Noquen Hihbo ta hihcoiniqui hihxon bi joni huetsa hahxonyamahah ta tiroma bi res qui. ¿Hicon nan hihxon min hen mia jismati min queenain, honanman?

²¹ Jishue. Noquen Papa Dios hinanquin ta jahuen baque Isaac janoxon mapojati janin Abrahamen racannishqui, hinanquin mapojanoxon. Papan yohihi quescabija jan jaiya ta Mia tah min siri qui Papan janishqui.

²² Hihcoinai shinanxon jan hahní tah min jisi. Shinanxon jan shinanai quescabijaquin jaan jaiya tah non jahuen shinan honanai.

²³ Jan jascajahiya ta Papan huishani joi quescabi jaresscanishqui, hihcoinai Abrahanen shinanaiton ta siri joni hihqui Papan jisnishqui hihqui jaa joi. Mia tah min heen hahberabti sca qui hah can Papan janish Abraham yohiquin.

²⁴ Jaa copi honannahue: non hihcoinai shinanai copi res ma bi jan yohihi quescabijahi non jaiya ta Mia tah min siri qui hah Papan noque jaiqui. Jaa honannahue.

²⁵ Hahresti haibo Rahabo rihbi ta jascaja shinan siri jaiton Papan siri jisnishqui. Jaton mai jisi jahibu hihcomaxon ta paxajaxonquin huetsanco jato camanishqui. Jan jato jascajaxonaiya ta siri haibo tah qui hih Papa janishqui.

²⁶ Yoshinjoma yora ta muhuascaiqui. Jascarihibi ta non shinanai quescabija non jayamahiya noquen shinan muhuatai quesa qui.

3

Non tiroma yohuantima

¹ Honanmanicahbo hichayamanahue, hea huetsabon. Honanmanicahbo ta hashoan sirijaquin Papan jisyaxihqui qui non hahnibo siri hin tiroma quin hihxon.

² Jatihxonbi tah non jaamajahi hicha. Hihti shinanyahpaxon pari tah non yohuanquin jaamajayamahi. Jascapahxon pari tah non jatihibijaquin sirijatihi, jaamajayamaquin.

³ Non queenai janin noquen cabacho camanoxon tah non jaton jana janin hahan mayati jarehuinai, jaton mapo mayaxon cabacho yora jatiobi rebibohannoxon.

⁴ Hani nonti cahen jascarihibi. Hani nonti que bi cah non nonti chibicai. Coshin nihuen xotonai bi tah non hanitahma chibicai, non jano cacatsihquiton.

⁵ Noquen jana jascarihibi. Hexti pishcawahax bi hanibo qui yohuani. ¿Hexti pishca chihi requeman non jahuentihopa chihi perehihnnon requenjatihin, hani taxabo maponon?

⁶ Noquen jana ta chihi qui. Nai tana tiromaboya. Noquen yora meha que bi tah non jahan noquen jointi jatiobi tiromajahi. Hihti tiroma chihin quetejaha quesa ta noque tiromajahihqui, non hahcai jatiobi mapojaquin hahcajaquin noque tiromajaquin.

⁷ Jatihibi yohinahbo, hihsabo, ninotaibo, hiaman cahibo, jato jatihibi ta jonibaan raejati hahtipahthiqui. Jato raeja sca ta jacanishqui.

⁸ Jonin jana ta jascayamahihqui. Noquen jana tah non tsoanbi raejati hahtipahyamahi. Noquen jana ta tiromahi tantiyamahihqui. Hahan muhuati pahe bochohi.

⁹ Hahan tah non noquen Hihbo sirijaquin yohihi, hahan tah non noquen Papa rihbi sirijaquin yohihi. Hahan rihbi tah non jonibo rihbi tiromajaquin yohihi, Papa Dios quescapahbo jan jato jonijani que bi.

¹⁰ Jaa jana huesti janinhax ta yohuan siriya yohuan tiromabo cainihqui. Jascatima ta jaiqui, hea huetsabaan.

¹¹ ¿Huesti mai quini chicho quehax jene siriya jene cachani bahihihqui?

¹² ¿Xebon nohue bohro pama sca bimitihiqui? ¿Huaran nishin xebon nohue sca bimitihiquin? Hihyamahi. Jene jahuini janinhax rihbi ta jene siri bahitimahihqui.

Shinanquin sirijahibo

¹³ ¿Mato tocan tsaoabo shinanyahpabo jaiquin? ¿Tsoabo honanbo jaiquin? Jascapahboxon siripi jihuexon sinayosmaxon pishinaibo min hahxoncoinai jismahue.

¹⁴ Caibo qui yohuanax notsi notsihax sina sinatax, Shinanya ta hen qui, hihyamahue. Quesayamahue. Shinancoin tah min yamahi.

¹⁵ Jascapa shinan ta Papan hinanahma qui. Jascapa ta mai meha qui, Dios Yoshimanama bi tiroma yoshimanah.

¹⁶ Notsi notsiti shinanboya queemehtax jaa huesti hihbocatsihqui shinan jano jaiton ta rehtenantti jatihiqui. Jatihibi tiromabo rihbi ta jano jatihiqui.

¹⁷ Naihoh quehax jahui shinanbihxon tah non honchatima shinanscái. Rainyamatima rihbi, honaxonbi yohiti, caibaan yohihah nincati, hihti yanapanti, caibo hahxoncointi, caibo res hahxonpan jatima, hihcoinicamatima. Jascapahbo ta naihoh queha shinan jaiqui.

¹⁸ Rainyamahiboya jato tantimanicahten ta sina tantimahiqui, bimi banaquin hahcabonaquin sirijaquin yohibonaquin.

4

Mai meha shinanya non jatimahi

¹ ¿Jahua copi man caibo rehtenanain? ¿Jahua copi man join bahchinnanain? Man jahuaborabo bichincatsihqui copi, man tsinicasihqui copi, jahuabora man hihbocatsihqui copi, jascapahbohax tah man rehtenanai.

² Costancatsihquin tah man hihti queenax bi man yamahi. Yamaxon tah man retehi. Caibaana jenipahixon bi tah man bihcasmiquahi. Bihcasmiquahax tah man retenanscái, bahchinnanscái. Papa Dios yocayamahax copi tah man yamahi.

³ Yocaxon bi tah man bihyamahi, jaamaquaqin yocaxon copi. Matonbi noitahnoxon res tah man yocacai. Nohuejacatsihxon, hihbocatsihxon rihbi tah man yocacai.

⁴ ¡Tsinibon! ¿Mai mehabaan shinanai quescati ta Papan rahuiti qui, man honanyamahin? Mai mehabo quesca japan hihquish tah man Papan rahuibo sca qui.

⁵ Nea huishani joi ta jaiqui. Noque chicho jan jihuemahí jahuen yoshinhon ta hihti jenipahichihqui hihqui. ¿Yanca res jaa joi jai shinan man Jain?

⁶ Yanca res ma, rahan. Noque ta yanapaniqui hicha. Jaa copi ta nea huishani joi jaiqui: Jaton shinan pishinyamahi shinanaibo pantexon bi ta jaton shinan pishinai honanaibo Papan yanapaniqui.

⁷ Jaa copi noquen naihoh queha Papan yohihi quescanahue. Tiroma yoshin tenenahue. Man tenehiya ta mato janinhax jabascatihqui.

⁸ Papa Dios pataxnahue. Jaatian ta jaan rihbi mato pataxtihqui. Maton mequen rishta potanahue, hohchayahpabon. Maton jointi rishta potanahue, rabe shinanyahpabon.

⁹ Huiniscanahue. Huaonihscanahue. Jiihihsanahue. Bitsapahonish bi benascanahue. Coincoinpahonixon bi masa shinanscanahue.

¹⁰ Papa bebon man shinan hihti pishinai honannahue, jaan mato hicha shinanya hueniyaxahn.

Noquen huetsa qui tiromahi yohuantima

¹¹ Joni huetsa qui tiromahi yohuanyamanahue, hea huetsabaan. Noquen huetsa qui tiromahi yohuanai tah min noquen Hihbaan joi qui tiromahi yohuanai. Noquen huetsa jisquin Jaa ta tiroma qui hihnicahax tah min noquen Hihbaan joi yohihi Jaa ta joi tiroma qui hihnicahqui. Jascajaquin tah min noquen Hihbaan yohihi quescajatosma qui, jahuen joi qui tiromahi yohuanai.

¹² Noquen nincati joi hinannica ta huesti res qui. Noque jisxon Tiromayamahax siri quin hahxon jisnical ta jaa huesti rihbi qui. Jaan ta noque teehihmati hahtipahiqui. Noque queyoti rihbi ta hahtipahiqui. ¿Jahuaxon sca min miin huetsa jisxon tiromayamahax siri quin hah min jatihin?

Nonjanoxihquibo non honanyamahi

¹³ Caibo tah man nescari yohuanai: Rahma cayamahax tah non bahquish hoa jeman catihi, huesti bari janoxon maroxon maromaxon tah non coriqui tsamantihí hih tah man jai. Hen mato yohinon hea nincanahue, hea huetsabaan.

¹⁴ ¿Jahua bahquish jatihquin? ¿Jahua mato huinotihquin? Man tah man honanyamahi. Nete coro quescapahbo tah man qui, basima tahni hihquish yamacahinscái, jihueyamascaí.

¹⁵ Man yohuanai quescahaxma jihuenaahue: Noquen Hihbo queenaiya tah non jihuetahi, hihnahue. Jaa queenaiya tah non nescajatihi, hihnahue. Jaa queenaiya tah non jascajatihi, hihnahue.

¹⁶ Jascajayaquin tah man honanquin hahcajahi yohuanai.

¹⁷ Hohmis hohmisaibo yanapanti honanxon bi hahyamahax tah man hohchascái, hahxonyamahax.

5

Coriquiyahpabo yohiti

¹ Mato sca, coriquiyahpabon. Huaonihnahue. Tiromabo mato qui nocoti jahui honanax saisaihiahnahue.

² Maton jahuequibo ta payoscaiqui, maton chopabo ta mahsaman piha tiromascaiqui.

³ Maton coriqui ta hanitahmaboya hanibo pohiscaiqui. Jaton pohi ta mato qui chanicoinal joi quescapahqui. Hahan ta chihin queyohahcamahi maton yora queyotihiqui.

⁴ Netebo queyotaiya pishinmis hihxon tah man coriqui tsinqui tsinquihi. Maton huai horoxonnicahbo man copijaquin pishinmani ta joi quescas qui, saisaihiahqui. Maton horoxonnicahbaan noquen Papa yoca yocacah ta nincaquihqui.

⁵ Main jihuetax tah man noitahpahoniqui, jatihibiyahpahax. Caibo retehibaan bi tah man pihi yani yaniti jihuahpahonihqui.

⁶ Ponte joni maton hohcha hihbomaxon tah man jaa bahchinai, jan mato cahinemacatsihnonma bi.

Tenexon Papa yocati

⁷ Hen mato yohihi quescua noquen Hihbo jonon caman mananahue, heen huetsabaan. Bero banahax bimi siri janon caman huai hihbo mana manatai shinannahue. Hoi jomenonon manatipish ta chini rihbi hoi benon manatihqui.

⁸ Jascajaribiquin mananahue. Yobacahinnahue. Noquen Hihbo joti ta hochoma qui.

⁹ Joni huetsa qui rerer rerenyamanahue, heen huetsabaan, mato jisxon δ tiromayamahax siri quin? hihxon noquen Hihbaan mato casticanyamanon. Jahuen xehqui janin ta nihressciqui, jocatsihqui.

¹⁰ Papan joi yohinicabaan teneni quescajanahue, hea huetsabaan. Hohmis hohmixson bi jaabaan teneni quescajanahue.

¹¹ Tenequin jeneyamanihbo ta hahan jenimati jaiqui hih tah non jai. Shinannahue. Jooban teneni tah man nincanihqui. Jaa pecaho ta hahxonnicaxon hahan shinannicaxon noquen Hihbaan jaa hihti hahxonnishqui. Jaa tah man honanscrai.

¹² Nea hen mato yohihi ta hihti nincati qui, hea huetsabon. Man hihcoini yohuanai honanahbo jahuabi quenayamanahue. Naihoh queha quenaxonma mai mehabo quenaxonma rihbi honanahbo jahuabi quenayamaquin. Jeenhihcatsihquish jeenhihresnahue. Hihyamahi rahan hihcatsihquish hihyamahi rahan hihresnahue, jahua copi mato casticanti yamanon.

¹³ δ Min hohmis hohmisain? Papa yocahue. δ Min jenimahin? Noquen Hihbo qui behuahue.

¹⁴ δ Min hisinain? Pastoro yanapannicahbo quenamahue. Jaabaan sca noquen Hihbaan janen mia xenin besquixon mia yocaxonnon.

¹⁵ Shinancoinxon mia yocaxonah tah min hisinax bi rohatihhi. Noquen Hihbaan ta mia huenitihqui. Miin hohcha jaiya ta mia sohuaxonrihbithihqui.

¹⁶ Jaa copi maton hohcha yohinannahue. Man rohascanon yocaxonnanannahue. Hohchajomaxon yocaxon tah non hicha hahcai.

¹⁷ El^as ta noque quescapa joni hihpahonishqui, noquen shinanya. Hoi beyamanon jaan yocacah ta quimisha bari seis hoxne main hoi paqueyamanishqui.

¹⁸ Hahquirihbi jan yocacah cahen naihoh quehax hoi quexto paquenish, bimibo jaribiyaxahnnon.

¹⁹ Heen huetsabaan, mato meha huesti bahinma sca cahi quescajaquin Papan joi jenehi bi bahin sca huetsan nihmarihbihya jaa pontenica siri honannahue.

²⁰ Hohchatai joni pontexon bahin sca nihmahi jonin ta jahuen huetsa teehihmahihqui, jan mahuaquehana. Hicha hohcha rihbi ta mahpohiqui.

PEDRO

Pedronen raanni joi

Jabisnibo qui Pedronen joi raanai

¹ Hea Pedro tah hen Jesucriston raanti joni qui. Jahuen raantixon tah hen huishahi, man jabisnibo qui raannoxon. Ponto mai janin, Galacia main, Capadocia main, Asia main, Bitinia main. Man janobo jabisnish Papan baquescaax bi janobo jihuetahbahibo qui tah hen nea raanai.

² Papan ta mato caisnishqui. Mato caisxon ta yohinishqui, Heen baque Jesucristo nincacoainabo janoxihnahue. Jahuen jimin jan mato chocanon heen baquebo janoxihnahue, hahquin. Jascapahbo man janon ta jahuen yoshin siripan rihbi sca mato jahuen shinan siri hinanlhqui.

Jenimahi jihueti

³ Hahxon tah min noque jai Papan hahnahue, noquen Hihbo Jesucriston Papa Dios yohiquin. Noquehon hihti shinanxon ta behnajaquin noque jonijahiqui. Jesucristo hihquipi bi hahquirihbi teehihmaxon ta noque honanmahiqui, noque jihuemanica jihuerrhibsciai non joni behnaxon sca honannon.

⁴ Behnaboxon sca tah non queyoyosma siribo sca bihyaxihqui, payoyosmabo. Jascapa tiromayosma siribo ta Papan mato naihoxon bexojaxonihqui.

⁵ Man nincacoinaiya ta jahuen coshiyaxon mato coiraniqui. Nete queyó sca jaiya ta jahuen jihue mato jismayaxihqui, man janohax queyoyamanox mananon. Rahma jismati siri sca jai bi ta jaatian pari mato jismayaxihqui.

⁶ Jaa copi jenimanahue. Rahma basima tahni mesco tenetibo jaax bi jenimanahue.

⁷ Maton teneti shinan ta oro mentan hashoan hihti copi qui. Oro hashoan mapojaha queyótihi bi ta chihin jaa tanacaniqui, siri hin hihxon. Jascajaribiquin ta maton shinan tanacaniqui. Tana tanahah bi man nincacoinaiya ta noquen Hihbo jahuiya sca hahqui siriaquetax yohuanyaxihcaniqli, jaa siri quen, Nete Hihbo quen, Shinan Hihbo quen.

⁸ Jaa jisnixonma bi tah man hahan shinanai. Rahma jaa jisxonma bi tah man nincacoinai. Nincacoinax res sca tah man hihti jenimahi. Hihti coin coin sca jai.

⁹ Nincacoinax tah man queyoyamanox manati sca jai.

¹⁰ Papan matohon jascajaquin shinayaxihqui ta jahuen joi yohinicabaan yohinishqui. Jaa huishaxon sca ta jenquetsahaxon Papan noque teehihmatihiquin hihxon shinan shinancapahonishqui. Jaton quiricaj jis jisxon bi jisribicanquin.

¹¹ Criston yoshinyaxon ta huishaxon yohicannishqui, Cristo tiromajatibo, jaa pecaho hihti shinan hibbo sca jaa hihtihiqui yohicanquin. Dios Yoshiman yohihah bi ta Tsoa jaa quin, jahuentian Papan jascajatihiquin jacanishqui honanyamahax.

¹² Jaatian ta Papan jato honanmanishqui. Jaabo jihuetai tian ma bi man cain sca jaiya pari jan mato hahxonquin jihuematih jato honanmaquin. Chini sca ta naihoxon jahuen Yoshin raannishqui, jayaxon sca jahuen joi siri yohihahbo. Papan mato hahxonai ta jahuen Yoshinyaxon sca mato yohicaniqui. Jan noque hahxonai hihti jiscatsihquish ta jenquetsahpa jatihiquin hihcaniqli Papan yonotibo.

Non ponte res jihueti jai

¹³ Jaa copi shinan coshijanahue. Shinancoinnahue, Jesucristo jahuiya noquen Papan matohon shinanxon mato hahxontihi honanquin sirijahax jihuolahue manati.

¹⁴ Jahuen siribaquebonahue. Man honanyamahax tiromabopahoni quesgayamas-canahue.

¹⁵ Man japahoni quesgayamascanahue, jatihibi ponte res sca. Jaa mato hihbohi quescar-ihbinahue, ponte res.

¹⁶ Hea ponte hihqui quescarai tah man mato rihbi pontebo hihtihi hih ta Papan huishani joi jaiqui. Jaa copi jascanahue.

¹⁷ Noquen Papan ta jahua copi jahuen shinan huetsajatimaxon jatihibi joni jisiqui, non hahcái siri hin tiroma quin hihxon. Jaa Papan hahxon, hea casticanpaho hihxon shinanquin sirijahax jihuolahue, hahqui noconoxon caman.

¹⁸ Maton xenibo yanca bi res japahoni quescabihai tah man janiqui, jato chibani. Man jascapahbo que bi ta Criston mato bihnishqui. Jaan ta oron mato bihyamanishqui, ni coriquinin bi bihyamaquin. Jaan ta queyoncabo hinanquin mato bihyamanishqui.

¹⁹ Jahuen jimin caya ta mato bihnishqui. Jaton hohcha copi mahuanon ta noquen xenibaan hihti siri carnero caispahonishqui, jahuen yora janin jahuabi cahcoya yamahi,

jahuensi jahuabi tiroma yamahi. Siriresi. Jascarihbibi ta Cristo janishqui, hihti shinanya, jahuabi hohcha yamahi. Jascapahxon ta mato jahuen jiminbi bihnishqui.

²⁰ Naiyahpa mai hahriyamaxon ta Papan jaa mahuayaxihnon yohinishqui. Yohinixon bi ta rahma noquen nete queyoti hochoma sca Papan jaa raannishqui, matohon hihti shinanxon.

²¹ Jaa Cristo nincacoinxon tah man noquen Papa rihbi nincacoinai. Jaa ta Papan hahquirihbi hueninishqui, hihquipi que bi. Jaa huenihihnxon yohiquin, nete hihboscan. Jaa copi tah man Papa Dios nincaxon jan mato hahxonti honanrihbibi.

²² Papan joi nincacoinquin tah man maton jointi rishta potasca jai. Noquen huetsabohon shinancoinpan hihnicabo sca janahue. Jascajaxon maton jointiboyaxonbi joni huetsahon shinannahue.

²³ Papan ta mato hahquirihbi jonijascaiqui, mahuanicama bi mahuayosma Papayah-pabo sca. Jahuen join mato jonijaribiquin. Jaa jahuen joi ta hahan jihuetai qui, queyoyamanoxihqui jihuetai.

²⁴ Papan huishamani joi jai quescia tah qui: Jatihibi yorayahpabo ta huasi quescapi qui jaton rajotibo huasi joa quescapi. Huasi ta pehuahihqui, jahuen joa rihbi paqueti.

²⁵ Papan joi ta jascapahma qui: jaa jahuen joi ta queyoyamanox manatihqui hihqui Papan huishamani joi. Jaa joi ta non mato yohini joi qui.

2

¹ Jaa joi nincacax tiromayamascanahue. Paranyamascanahue, ni pishcabi. Hahxonquin quesajayamascanahue, notsi notsihax joni huetsa qui yohuanyamasca!

² Rahma cainipish baquexo xoma jene queenihcamahi hahan haniti joi queennahue, Criston jihuetahbo sca hanicananoxon.

³ Matohon jaan hihti shinanai tah man honanquin sirijaribisciai.

Cristo noquen hahqui xobojati

⁴ Hahqui xobojati jihuibo caisxon tiromabo potaquin hahcajaquin Cristo potanibho que bi ta siri bi res Papan jaa caisihqui, mohitahpa jihui. Hahquibi sca nocóhinnanahue.

⁵ Mohitahpa hahan jan xobojahi quescapahbo janahue, jahuen xobo sca. Jahuen xobohoxon shinamanicabo jai quescaribibi jahuen joi yohinicabo janahue. Hahan Papa Dios jenimatibo hinanquin hahcajaquin Papa queenai quescajaquin hahxonnahue Jesucristo betan.

⁶ Papan huishamani joi janin ta nea jaiqui: Jise, heen jonibo tocan tah hen hean caisai jihui nichinhihni sca jai, siri bi res hahqui xobojati siri. Jaa nincacoinaibo ta tsoanbi hiitmahmatimahihqui hihqui jaa joi.

⁷ Jaa copi ta jaa hihti siri qui, man nincacoinaibaan jisi. Nincayosmabo yohihi ta huetsa huishani joi jaribiqui:

Xobojahibaan queenyamaxon potani jihui ta hahqui xobojati sca jaiqui hihqui.

⁸ Huetsa rihbi:

Jonibo hahqui joxcorohti jihui tah qui, hahqui jonibo joxcorohti tobiti jihui hihqui. Papan joi nincacatsihyamaxon joxcorohtax paquetihcamajaquin jaamajaquin. Jaabaan jascajayaxihqui ta Papan yohinishqui.

Papan baquebo

⁹ Jaabo jascapahbo que bi ta Papan caisaibo mato qui. Quiquin hapo bebonxon yohuanxonnicahbo sca tah man qui, Papa Dios qui jonibo nocomanoxon. Papan jonibo sca tah man qui, jahuen baquecoinbo sca. Bahquisch chian man jihuetai bi ta mato quenanishqui, jahuen siri xabapan man jihuenon. Noque ta sirijaquin hahxonihqui, hih man janon yohihi.

¹⁰ Jahuama hiphahonish bi tah man Papan baquebosca. Mato bihyamanixon bi ta rahma Papan mato sirijaquin sca bichiqui.

Papan shinanya non jihuetai jai

¹¹ Matohon shinanxon tah hen mato yohihi: Maton main tah man jihuetaiyamahi. Mai mehabaan nahuabo sca tah man qui. Jascapahbohax tah man mai meha shinanbo man queentimascai. Jascapa shinaman ta tiroma yoshiman mato bichiqui, mato hahbetan hiocatsihqui.

¹² Nahua tocan jihuetaibohax sirijaquin shinanax jihuenahue. Jaatian ta mato qui jaabo tiromahi yohuanax bi noquen Hihbo jores sca jaiya sca man joni huetsa yanapanai jisnish, Papa Diosen ta jato jahuen shinan hinannishqui, hihyaxihcanihqui.

¹³ Noquen Hihbaan joniboxon jatihibi hapobo nincanahue.

¹⁴ Quiquin hapo rihbi nincaquin. Jaan raanai tinintibo rihbi nincarihbiquin. Tiromajahibo casticannon ta jaabo raanhiqui. Siribo rihbi yohihi, Jaa ta siribo qui jaahbo hihxon jato raanquin.

¹⁵ Honanyamahax yohuanresaiboxon bi ta honanma jonibaan mato shinancoinyabohi jisish netetihiqui. Jascati ta Papa queenihqui.

¹⁶ Hiná quescapahboma sca janahue. Hinabo hihyamascaxon bi tah man tiromajatimahi. Papan hahxontibo sca jihuenahue.

¹⁷ Jatihibi jonibo yohuanquihnxon nincanahue. Noquen huetsabohon shinannahue, Papa qui tiromati qui raquexon. Noquen quiquin hapo rihbi shinannahue.

Criston teneni quescajaquin non tenethi

¹⁸ Patoroyahpaxon maton patoronen yohihah nincanahue, jato shinanquin. Maton patoro siri jaiya jaa shinanquin sirijaquin. Tiroma patoro jaiya shinanrihbiquin.

¹⁹ Man siripi jihuetai bi tiromajaquin shinanxon caibaan mato casticana bi noquen Papahon shinanxon man teneresaya ta Papan mato siri jisiqui.

²⁰ Man tiromahiboya mato rishqui rishquihambo ta man tenehi que bi noquen Papan mato siri jistimahiqui. Man ponte res jihuetai copi caibaan sca mato tiromajahah bi man shinanquin sirijaxon teneresaya pari ta Papan mato siri jisiqui.

²¹ Matohon shinanxon ta tiromabo Criston tenenishqui. Jaan teneni quescajribiti ta Papan mato yohihiqui.

²² Cristo ta hohchayamanishqui. Jaan ta jahuentianbi paranyamanishqui.

²³ Tiromajaquin joinjahabo bi joi bichinyamaquin. Tiromajahahbaan bi jato tahtijaya-maquin. Sirijaquin shinanxon casticannica noquen Papa jai honanxon jaan teneresquin, Papan jato jisnon.

²⁴ Jihuin hueonahbo hueoxon ta jaanbi noquen hohcha bijnishqui, jahuen yora janin. Mahuascaibo hohchayosma hihqui quescapahbo non hohchayamascanon ta jaa mahuanishqui, sirijahibo sca non jihuemon. Jahuen tsehueyaxon ta mato sohuaxon jihuemahiqui.

²⁵ Carnerobo quescapahbo tah man janiqui, behnoti. Behnonish bi rahma maton coirannicah qui nocorihbiscai, maton jihuemanicah qui nocoscai.

3

Haibo betan bebo jihuetai

¹ Jascajaribinahue, haibobon. Maton benen yohihah quescajaquin hahnahue. Jaatian ta caibaan Criston joi nincacatsihyamaxon bi jaton haibo jascapa shinanyahpa sca jisxon nincascatihiqui, jaton haibaan yohihahma bi.

² Man tsinayamabiresi jihuetai jisxon, man jato nincacai jisxon rihbi ta nincascatihiqui.

³ Caibo haibo ta bemacanya res siripihqui, raotiyahpa, hahan tsiniti bohueketiya, bebobaan jisnon res oro paronohtiya, bebobo queenmati chopayahpa. Jascapahboyamahue.

⁴ Shinan siri ta maton hahan siriti qui, haibobon. Man sinaxonma bi sirijaquin shinanai, man sirijaquin teneresai, jascapah ta Papan jisi hihti siri qui. Jascapah ta queyoyosma hahan siriti qui.

⁵ Jascapah ta Papahon shinanai haibobo japahonishqui, Papa hihcoinai shinanai haibobo. Jaton benen yohihah nincacanquin.

⁶ Saran ta jahuen bene Abraham nincanishqui, jaa quenaquin Hihbon hahquin. Caibaan mato raquejacatsihqui bi tah man raqueyamahax jihuecoinax Saran baquebo sca qui.

⁷ Jascarihibinahue, queeyahpabon. Maton haibohon shinani jihuenahue. Haibo betan bebo man jihuemon ta Papan mato rabebi jihuemahiqui. Haibo hashoan coshijoma copi hahan hihti shinannahue. Man Papa yocacaiya jahuatohonbi maton yocati panteyamanon jascajanahue.

Sirijahibaan teneti jai

⁸ Mato jatihibi sca tah hen yohihi: huesti shinanya janahue. Hahxonnani. Noquen huetsabohon shinanhahnani. Yanapanhanani. Caibo mentan mia hashoan shinanya hihqui shinanyamaquin.

⁹ Caibaan mato tiromajahah bi copiyamanahue, mato tiromajaquin yohihahbaan bi jato copiyamarihbiquin. Copixonma Papa jato yocaxonnahue. Man jato yocaxonti ta Papan yohihiqui, mato shinan siri hinannoxon.

¹⁰ Papan huishamani joi jai quesca:

Basi jihuecatsihquish siririhbihi jihuecatsihquish tiromahi yohuanyamabiresnahue, tsoabi paranyamanahue.

¹¹ Man tiromapahoni jenebahinax ponte sca janahue. Rehtenantima shinan bichish hahan jihuenaheue.

¹² Papan ta pontebo jisiqui. Jaabaan yocacah ta nincaquihqui. Tiromajahibo jaan jascajayaamaquin; jato casticanquin hihqui jaa huishani joi.

¹³ ¿Man sirijati hihti jenipahichaiya tsoan mato casticantihiquin?

¹⁴ Man jihucoinaiya caibaan mato tiromajahi que bi ta Papan mato jaa copi shinan hinantihiqui. Jato qui raqueyamanahue. Masa shinanyamaquin.

¹⁵ Cristo noquen Hihbo jai sirijaquin honannahue, maton jointi janin. Jahua copi min Cristo joi nincacain hahquin yocacaibo jatihibi yohinoxon shinannahue, man jaa copi nincacoinai yohiquin.

¹⁶ Shinanquin sirijaxon tah man jato honaxonbi yohitihi. Jihucoinxon jato yohiquin. Jaatian ta man siripi jihuetai bi tiromahi jihuetai quesca yohanax mato qui quesahibo hohtimahscatihiqui.

¹⁷ Noquen Papa queenaiya ta non jihucoinxon tenehah siri qui. Tiromahax hohmis hohmisah ta sirima qui.

¹⁸ Cristo rihbi ta hohchayabo copi huesti coti mahuanishqui. Jaa ponte hihquish bi noque pontemabo copi mahuati, noquen Papa qui noque hionoxon. Jahuen yora retehipibaan bi ta Dios Yoshiman teehihmaha jihuerehbiscuaiqui.

¹⁹ Dios Yoshiman teehihmaha sca ta mahuanhbo yoshinbo jaan yohitannishqui, Papan xehponihbo. Jato ta joi siri yohinishqui.

²⁰ Jaabaan ta Noen jihuepahoni tian nincayamapahonishqui. Papan jato teneparinon ta Noeman nontijanishqui, hahan sca hicha tahma joni jihuetai piconon. Jenen jato casticanaiya ocho joni res jaa nontin nanetax jihuensi.

²¹ Jascarihibi tah man jenehoh hihquimatanah sca jaa jene copi man jihuerehbibi. Maton yora rishta chocahah copima bi ta Jesucristo noque jihuerehbixona man hohcha yamascai copi jihuerehbibi. Jesucristo copi res sca jihuetai.

²² Jascahue Papan jaah ta Papan yonotibo hihbohax jato yonoxonaibo rihbi hihbohax, coshiyahpbabo rihbi hihbohax, naihoh cahax res sca Papa jato jisxoni sca tsahoscaqui.

4

Papan shinanyaxon non hahxonti jai

¹ Yorayahpaxon ta tiromajahahbo Criston tenenishqui. Jan teneni quescajariquin shinan coshinahue, tenenoxon. Noquen yora tiromajahah bi tenexon tah non hohchati shinanyamascaai.

² Hohchayabo queenai quescajaya mahi bi Papa queenai quescajahi jihuetai shinanscaquin.

³ Neateman tah man nauabaan costanai quescajaquin hicha hahpahoniqui. Joni huetsa betan hohchati res tah man jihuepahonihqui. Tsiniti shinani res jihuetai. Pahen paheni. Cahtimathi. Coro coroti. Papan joi jenebahini tiromabiresi. Jascatima sca ta jaiqui.

⁴ Jato betan man jascabi honanma hihyamascai jisish ta rahtecaniqui. Rahtetax ta mato qui tiromahi yohuancaniqui.

⁵ Jato casticancanoxon ta noquen Hihbaan jato yocayaxihquiqui: Jahua copi man jascanhquin hahquin. Jihuetaiboya mahuataibo casticanicahxon ta siri hin tiroma quin hihxon jatojisresscαιqui, noquen Hihbaan.

⁶ Jaa copi ta mahuanhbo rihbi joi siribo jaan yohinishqui. Jonibo hihqui quesca yorayahpahax jihuetaiton casticanah hihqui bi ta Papa hihqui quesca sca jaton yoshin jihuetai janon hihxon joi siri jato yohinishqui.

⁷ Jatihibi queyoti ta nea pishcascaqui. Jaa copi Papa yocanoxon shinanquin sirijahax jihuenaheue. Hahan hihti shinani jihuenaheue.

⁸ Nea joi ta hashoan hihti nincati qui: Maton huetsabohon shinanquin hahxonquin jeneyamanahue. Joni huetsahon shinanquin hahxonaboya tah non jaton hohcha hicha jai bi jaa shinanyamascaai.

⁹ Yohuani rerer rerenaxma yanapanhanannahue, hocho quehax jahuibo piti hinanxon, xobo rihbi hinanquin.

¹⁰ Papan ta mato shinan hinanpaquehahqui. Papan hinanah mesco shinanyabohax jaa shinaman sca yanapanhanannahue.

¹¹ Yohiti shinanyahpaxon Papan joi man yohixonai honanxon yohinahue. Yanapanquin hahxonti shinanyahpaxon Papan mato hinanai coshin hahxonannahue. Man hahcái jatihibi tah man Criston joniboxon hahtihí, noquen Papa shinan hihbohi honanahbo. Jaa ta shinan

hihbo coin qui, jatihibi joiya. Jaa ta jascabi qui, jahuen shinan queyoyamahi, jahuentianbi jahuen yohuan queyotima.

Papan baqueboxon non teneti jai

¹² Chihin mapojaquin hahcajhabo bi rahteyamanahue, heen huetsabaan. Jascapa tiromabo ta hahan maton shinan tanati qui. Rahteyamanahue.

¹³ Jascapahbo tah man Cristo tenexonai. Man Cristo tenexonai honanax jenimanahue. Jaatian tah man janibi shinanya jaa jahuiya man hihti jenimatihi, coin coinscrai.

¹⁴ Man Criston baquebo copi mato sinajahabo bi shinanquin sirijanahue. Papan yoshiman manahah sirijaquin shinanquin, Papan yoshiman mato manahiya sirijaquin shinanquin.

¹⁵ Joni rehteti shinan tah man jatimahi, tsoanbi. Tsoanbi tah man yometsohti shinantimahi. Tiromajati shinantimahi. Coro coromamis jatimahi. Jascapaboxonma tenenahue.

¹⁶ Man Criston joni copi mato tiromajahahbaan bi hihtimahyamanahue. Hihtimahpaxma Criston joni hax siripi jihuenahue, noquen Papa maton hihbo jai honanahbo.

¹⁷ Noque pontecatsihquin ta siri hin tiroma quin hihxon rahma Papan jahuen baquebojisresscαιqui. ¿Noque pari jascajaxon, jahuen joi nincayosmabo sca jan jahuentiho tiromajatihiquin?

¹⁸ ¿Siri jonibo queyoquin bi rohajaxon shinanyosma hohchataibo jahuentihoja Papan jatihiquin?

¹⁹ Jaa copi honannahue. Man teneti Papa queenaiya siri res jihuenahue. Noquejonjanicahton ta jan yohini quescabijaquin mato hahxonyaxihqui. Jan mato hahbetan jihuemayaxihqui sca honannahue.

5

Noque huetsabo yohiti joi non jai

¹ Jaa copi tah hen mato janin jai pastorobo hen hihti yohihi, hahbe pastoroxon. Tiromajahahbaan bi Criston tenehi jisnixon, jano Papan jihuemayaxihqui janin hea rihbi hihtihihxon rihbi, mato hihti yohiquin.

² Papan mato coiranmahi jahuen baquebo coirannahue. Yonohahma bi queenxon rescoiranquin, Papa queenai quescajaquin. Coriqui bihnoxonma bi hihti hahxoncatsihquin jato coiranquin.

³ Jato yonomicaxonma bi man jihuetai quescapi jaahbo hihxon Papan baquebo coiran-nahue.

⁴ Noquen quiquin coirannica joxon sca ta mato queyoyosma xababo hinanyaxihqui.

⁵ Chini baquebo sca tah hen yohihi: Maton pastorobo nincanahue. Caibo hihqui quescari man mato rihbi shinan pishinai honanax shinanhahnannahue jatihibi sca. Shinanya tah hen qui hihquibo pantexon bi ta jaton shinan pishinai honanaibo Papan jahuen shinan hinanihqui.

⁶ Jaa copi jan mato coshin mehemis hihxon man pishincoinai honannahue, hihti shinancoinya sca jan mato hueniyaxahnon.

⁷ Man hahan masa shinanai jatihibi jaa yocanahue. Matohon ta shinanihqui.

⁸ Pahenaxma coirameti jihuenahue. Maton sinatah yoshin ta hino notsihihamahi nichiqui, tsoa sca pipan hihqui.

⁹ Jaan mato tiromamacatsihquiya jahuen shinan bihyamanahue, Cristo jeneyamaquin. Man tenehi quescajaribiquin ta maton huetsabaan rihbi tenehiqui jatihibi janinxon. Jaa nincaxon tenenahue.

¹⁰ Man basima tahni jascapa tenehiya ta Papan mato coshijatihiqui. Jaa ta jatihibi shinan hihbo qui. Man Criston jihuetahbioxon hahbetan sca jahuen shinanya man jascabi sca jihuayaxihqui hihxon mato quenanixon ta Papanbi mato coshijatihiqui, coshi shinan hinanquin.

¹¹ Jaa ta jascabi Hihbo qui. Jahuentianbi queyotima jahuen yohuan. Jascari rahan.

Hahan quirica queyoti

¹² Silvano ta noquen huetsa siri qui, hean shinanah. Hahbetan tah hen nea quirica pishca mato qui raanai. Papan shinanai joi coin mato sirijaquin yohinoxon tah hen huishahi. Papan shinanai quescabijanahue.

¹³ Babilonia jema janinhah noquen huetsabaan ta Papan caisaiboribixon mato qui joi raanihqui, Man jascabi jayamahin hahquin. Heen baque Marcosnen rihbi ta mato qui jascajaquin joi raanihqui.

¹⁴ Noquen huetsabo behchinani hicocananannahue, jatohon shinani.

Mato Cristonahbo jatihibi man jointi sirinon hihxon tah hen Papa yocacai.

2 PEDRO

Pedronen raanni joi, jahuen rabe coti

Noquen huetsabo qui Pedronen raanai

¹ Hea Simon Pedro tah hen Jesucriston raanti jonixon jahuen yonoti rihbi hihxon mato qui nea joi raanai. Mato man hehbe shinancoinaibo qui tah hen raanai. Noque teehihmanica Jesucriston ta ponte hihxon noque jahuen shinanyahpabo sca noque jisiqui. Papan rihbi ta noque jascajaxonihqui.

² Noquen Papa honanbonaxon noquen Hihbo Jesus rihbi honanbonaxon jahuen shinan bihbonanahue. Hahan jointi sirijaqueti shinan bihbonaquin.

Papan hinanai shinanbo

³ Jahuen coshi shinanyaxon ta noquen Hihbaan noque hahan jihueto jatihibi hinansciqui. Jahuen hihti siri shinanyahpaxon cahen noque yohiquin, jahuen baquebo non janon jahuen hihti coshi shinanyaxon noque yohiquin. Jaa noquen Hihbo non honanaiton ta noque jatihibi hahan jihueto hinanbonahihqui. Noquen Papahon shinanti noque hinanquin.

⁴ Jahuen coshi shinaman ta hihti siri joibo noque yohinishqui, jan noque hahxontibo noque yohiquin. Hicha jan noque hahxonyaxihqui. Jan noque hahxontihibo honanxon tah man jayaxon coshixon tenetih, neno main jai rishta shinanbo mato qui mahnejaqueyamanon. Jaton shinanbo ta tiromabo qui, tiromati queenaibo quen. Jascapa bihxonma tah man Papan shinan bihtihi, jan noque yohihi nincaxon.

⁵ Jascapa rishtajomabonoxon sca nincacinnixon ponte hihti shinanbo sca bihnahue. Ponte jihueto shinanxon honanbo sca janoxon honanti shinan bihbonanahue.

⁶ Honanti shinanbo bihbonaxon jatihibi qui coirameti shinan sca bihnahue. Jascapa shinanbo bihxon shinanquin sirijahanan teneti shinan sca bihnahue. Jascapa bihxon sca Papan shinanai quescajatibo sca bihnahue.

⁷ Jascapa bihxon sca noquen huetsabo yanapanti shinanbo bihnahue. Jascapa bihxon sca joni huetsahon shinanti shinanbo sca bihnahue.

⁸ Jascapa shinanbo hicha jaax tah man noquen Hihbo betan nichish yosmabotimahi, jahubi hahyamahiboma.

⁹ Jascapa shinanjomabo ta benchebo qui. Hocho jisyamaquin hahcajaquin ta jaabo hohchanibo Papan jato sohuaxonai shinanbehnoscacaniqui.

¹⁰ Jahuenaahbo sca man janon Papan mato yohini honanquin sirijanoxon sca hihti nincanahue, hea huetsabaan. Jascabajahax tah man jahuentianbi tiromatimahi.

¹¹ Jaatian sca tah man siri bi res noquen Hihbo Jesucristo qui catihi. Noque jihuemanicanton mato jano jascabi sca jihuemayaxihqui janin tah man siri bi res hahqui nocotahi.

¹² Jaa copi tah hen jascabijaquin mato jascapa jati shinanmacatsihqui. Man jascapa jati honanscrai bi tah hen shinanmahi, man Papan joi texe honanscrai bi.

¹³ Jihuetahxon tah hen shinanmaquin mato siriti queenmatihi. Jascajati ta jaiqui, hean jisi.

¹⁴ Noquen Hihbo Jesucristonen hea yohini quescabih hea mahuati nea pishca jaonahi tah hen honanai. Jaa honanxon tah hen mato shinanmahi.

¹⁵ Shinan siribo bihti man shinanbehnoyamanon hihxon tah hen huishaxon mato yohihi, hea mahuasca jaiya man jaa joi shinanyaxahnon.

Criston coshi jisnibo

¹⁶ Noquen Hihbo Jesucriston coshi mato jismaxon tah non jaa joribiyaxihqui mato yohiniqui. Jasca coin ta jaiqui hihxon tah non honanquin sirijahi. Jahuen xaba jisnixon tah non mato yohiniqui. Paranyamabiresquin.

¹⁷ Jaa hihti shinanya jai noque jismahahnan ta xaba coin janinhax Papa hahqui yohuanishqui: Nea ta heen hahan hen queenai heen baque qui. Hahan tah hen hihti jenimahi, hihqui.

¹⁸ Jaa tah non naihoh quehax yohuanai nincanhqui, noquen Hihbo betan Papan manan manixon nincaquin.

¹⁹ Jaa copi tah non Papan joi yohinicabaan huishani joibo hashoan sirijaquin sca honanai. Yame chian hahan xabatji quescabih tah qui. Jaa joi jisquin sirijanahue, maton jointi janin xaba paquenon caman. Jointinin honancoinnixon caman jisquin sirijanahue.

²⁰ Papan huishani joi jisquin bi nea pari honannahue: Papan huishani joi jisquin tah min mia huestichin shinanxon jan yohihi mian honanquin sirijatimahi. Papan yoshinyaxon pari.

²¹ Hahmebi shinanxon ta jonibaan jaa joi huishayamanishqui. Dios Yoshiman shinanmaha ta Papan joi huishacannishqui.

2

Quesa honanmahibo

(Jud 4-13)

¹ Papan joi yohihiccamahibo ta jonibo tocan janishqui, mato tocan honanmahiccamahibo jaresscatihi quescari. Jonexon ta jaamajaquin yohiyaxihcanihqui, hahan shinan tiromati joibo. Noquen Hihbaan jato hohcha copijaxonni que bi ta jaa yohihi Heen jahuama tah qui jaticaniqui. Jascabibo ta histon bi res Papan tiromajabahintihqui.

² Tiromahi hihresaiboya ta jaabo hihqui quescari caibo rihbi hicha jatihiqui. Jascaraiboya ta Papan joi qui caibo rihbi tiromahi yohuanyaxihqui.

³ Maton coriqui bichincatsihqui ta quesa quesayaxihcanihqui. Mato paran paranquin. Jascaraibo ta Papan jato casticanyanoxon jato jisquin sirijascaiqui. Hahan jato queyoti ta jaresscainiqui.

⁴ Jahuen yonotibo tiromahiton ta Papan jato cahneyamanishqui. Hihti yame chian ta jato potanishqui, quinihuán neminiño jato xehpoquin, jato casticanti nete noconon caman.

⁵ Neateman jihuelpahonihbo rihbi ta Papan cahneyamanishqui. Ponte res jihueta yohinica Noen huesti, siete joniboya jaan xahbanjamaquin. Jene mai mahpomaxon ta texe nincayosmabo rehtenishqui.

⁶ Sodoma betan Gomorra jema rabe rihbi queyocahins canon ta jato mapojanishqui. Nincayosmabaan honannon hihxon jato queyoquin.

⁷ Jano siri jihuelpahoni Loto huesti ta Papan xahbanjamanishqui. Nincayosma tiromabohihi tiromahi jisish ta Loto rahte rahtenishqui.

⁸ Jaabirahax bi jato tocan jihuexon, jaabaan hahcái jisxon nincaxon nete tihibi jahuen jointinin tiromajaquin shinanscaquin, hihti tiromahiboya.

⁹ Jascapa tiromabohihi casticantin bi ta siribo xahbanjamati Papan honanishqui. Tiromabohihi casticanti nete noconon caman hahan jato casticanti Papan bexojaxonai honannahue.

¹⁰ Jaton tiroma shinaman tiromahi hohchati hihresaiboya ta hashoan sca jaan casticanyaxihqui. Jaabaan ta jaton hapobo jistahihmahihqui. Shinanquin sirijahaxma ta hihrescaniqui. Papan coshi yonotibo japhonai ta hichá hichacaniqui.

¹¹ Hihti coshiyahpaxon, hihti shinanyaxon que bi ta Papan yonotibaan bocabi tiroma joi yohiquin jato caheyamahiqui, Papa bebonxon jato yohiquin.

¹² Hoa hihresaiboya ta jascayamahihqui. Honanma yohinahbo quescapahbo tah qui, bixhon rehteti yohina quescapahbo. Jaabaan honanyamahi joiboya tiromahi yohuancani. Jaaboyabi ta texe Papan queyobahinyaxihqui.

¹³ Tiromabojani quen ta Papan jato tiromajarihbixayihqui. Bariyahpan bocabi ta hihtimaphaxma tiromacanihqui. Jascapah ta rishta jaromabó qui. Tiromajati jenipahixon ta mato betambi picaniqui.

¹⁴ Haibó betan hihrescatsihxon ta haibobo jiscaniqui. Hashoan res tiromacatsihqui. Shinanjomabó paranmisbo. Coriqui bichinquin tsamancatsihquish jaa shinanya nichibo. Tiroma yoshiman baquebo.

¹⁵ Ponte bahi potabahinax ta bahinma sca bocaniqui. Beornen baque Balaam sca ta chibancaniqui, jan tiromajaquin coriqui canancatsihqui hihni quescari.

¹⁶ Balaam tiromahiya ta Papan pontequin yohinishqui. Yohinoxon ta yohuanyosma caballo yohuanmanishqui, jonin join yohuanxon jaa tehquehihqui yohinica pontenon.

¹⁷ Hoa hihresaiboya ta expa taraxihamája ibo qui. Nihuen hueranai nete coro quescapah. Bahquisihpahhuán yame chian jato potayahnoxon ta jascapa yamepahhuán Papan bexojascahaniqui.

¹⁸ Honanmácamahax ta honanma joibo coshin yohuancaniqui. Jaamajahi bi rohataibo sca ta jaton yohuaman paranxon haiboya hihresti jato shinanmacaniqui.

¹⁹ Tiroma yoshiman hinábhox bi ta Hináboma sca tah man jatihi, hihcanihqui quesaahi. Hihbojani joni ta hiná qui, hihbojaha copi.

²⁰ Noque teehihmanica noquen Hihbo honanxon ta mai mehabaan rishtabo bixquin bi caibaan rohajacaniqui. Jaatian sca ta jaa rishtabo bixribiha, hahan hihbojarihiha, jaabo hihmenohi mentan hashoan tiroma sca jaticaniqui.

²¹ Papan joi siri honanymahah siri que ma bi ta honanxon bi jenebahinah hihti tiromascatihqui.

²² Hihcoini yohuani janí quesa ta jaabo jaiqui. Jananxon ta jaabi rihbi hochitinin pihiqui. Cochi nashimaha bi ta huaho chian caribihqui, hihqui jaa joi.

3

Noquen Hihbo joti nete

¹ Neayanish ta rabe sca hen mato qui raanai quirica qui, heen huetsabaan. Rabebichin tah hen mato shinanmahi, man shinanquin sirijanon.

² Papan joi yohinicabaan huishaquin jayaxihquo yohini joi shinannahue. Noque teehihmanica noquen Hihbaan raantiboxon non mato yohini joi rihbi shinanquin siri-janahue.

³ Nea pari honannahue: nete queyoti nea pishca sca jaiya ta hosanmisbo jotihiqui. Tiromati jenipahixon ta mato hosan hosanyaxihcanihqui.

⁴ ¿Jan joribiyaxihqui jan yohini cahran? Noquen xenibo mahuani tian ta rahma caman jatihibi jascabi jaiqui, Diesen jato jonijani quescapahbo, hih ta jayaxihcanihqui.

⁵ Nea hen mato yohixihqui ta honancatsihyamacaniqui. Jahuen join ta Papan naijanishqui, neateman bi res. Jahuen join rihbi maijaquin, jene chicho quehax cainnon, jene naponbi sca mai janon maijaquin.

⁶ Jahuen join rihbi ta jene mai mahpomanishqui, jaatian jihuetaibo mahuanon.

⁷ Jaa join rihbi ta rahma caman jai naiyahpa mai manamahiqui jato mapojayanoxon. Casticanquin jan nincayosmabo queyobahinyaxihqui neten caman ta naiyahpa mai manamahiqui.

⁸ Nea shinanbehnoyamanahue, heen huetsabaan. Huesti nete ta huesti mil bari quesa rihbi qui, Papan jisí. Huesti mil bari rihbi huesti nete quesa.

⁹ Jan yohini quescabijaquin ta noquen Hihbaan chiquishbochi bi hahyamahiqui, chiquishbochi bi hahcai caibaan shinanai bi. Matohon shinanib bi ta joriyamahihqui. Tsoabi queyotima bi ta non jatihixonbi noquen shinan ponteti jaa queenihqui.

¹⁰ Yometso sanareneni jahuicamareneni ta histon res jaa joti nete nocoyaxihqui qui. Jaatian ta nai coshin corotax queyocahinyaxihqui qui. Nai naman mehabo rihbi mapohi queyocahini. Jonibaan teeboyabi mai mapohi queyocahini.

¹¹ ¿Jaabo jatihibi queyotihi honanxon man siri jihuetai shinanyamahin? ¿Papa shinani jihuetai siribo man jatimahin?

¹² Papan tiromajati nete nocotaiya ta naibo mapojaha queyocahinyaxihqui qui. Maiboya jenebo rihbi mapohi cohinchahini. Jaa nete noconon mananahue. Jaa joti manati jihu-nahue.

¹³ Jan yohini quescabijaquin tah non nai behna sca bihyaxihqui, mai behna rihbi sca bihquin, jano tsoabi tiroma yamascai. Jaa tah non manatai.

¹⁴ Jaa manahahnan sca rishtajoma siripi jihuetaibo jan mato merahi jonon, jascari jihuetai hihti shinannahue, hea huetsabaan.

¹⁵ Jahuerohahia ta noquen Hihbo joriyamahiqui, hea hihbohue hah non janon, hihnahue. Hahan non queenai noquen huetsa Pablonen rihbi ta jascajaquin mato qui joi raannishqui, Papan shinan hinanah.

¹⁶ Rannoxxon huishaxon tihibi ta jascajaquin jaan yohihiqui. Jan yohihia ta caibo joi histon honantima qui. Shinanjomabaan ta jaa huisha jisxon bi honanyamaxon jaama-jaquin yohihiqui. Texe Papan huishamani joibo jascajaribiquin. Jaa copi ta Papan jato queyoyaxihqui qui.

¹⁷ Hen yohihah tah man honanscrai, heen huetsabaan. Coiramescanahue, jaamajaquin tiromabaan mato paranah man Cristo joi bihquin bi jenebahin jenebahinmis.

¹⁸ Jascapahxonma bi noquen Hihbaan shinanya hichajabonanahue. Jaa noque teehihmanica Jesucristo hashoan sca honanbonaquin. Jaa ta Nete Hihbo qui hihnahue, rahma, jascabihi sca jascari. Jascari rahan.

1 JUAN

Juaman raanni joi

Hahan jihueti joi

¹Jihuemanicah joi mato yohinoxon tah non nea joi huishahi. Jihuemanicah ta janishqui, naiyahpa mai sca jamenonon. Jan jahuex yohuanai sca tah non nincanihqui. Noquen beron rihbi jaa jisquin. Jan hahcaibo noquenbi jisquin. Noquen mequeman rihbi jaa mehequin.

²Jaa jihuemanicah tah non jisniqui. Jisnixon tah non mato yohicoinal. Noquen jihuemanicah ta noquen Papa betan hihquish bi noque janin sca yorayahpa picoti jonishqui. Jaa tah non jisniqui, queyoyamanox jihuemanicah. Mato tah hen yohicoinscrai.

³Jaan hahniboa jisnixon mato yohicoinal. Man noque betan yohuani jihuenon hihxon tah non yohihi. Noquen Papa betan yohuani tah non jihuecoinai, jahuen baque Jesucristo betan rihbi.

⁴Shinanquin sirijahax hihti jenimanoxon tah non huishaquin mato yohihi.

Noquen Papa Xaba Hihbo

⁵Criston ta noque yohinishqui, noquen sca jaa joi rihbi yohinon hihxon. Jaa tah non mato yohihi. Noquen Papa ta Xaba Hihbo qui. Jaa janin ta yame yamahihqui.

⁶Hahbetan tah non yohuani jihuetai hihhanan bahquish chian jihuetahbax tah non quesa sca jai. Hihcoinyamahi jihuescrai.

⁷Noquen Papa hihqui quesvari xaba chian nichish tah non hahbetan yohuani nihresscrai. Jaatian ta jahuen jimi noque copi potanixon jahuen baque Jesusen noquen hohcha jatihibi sohuaxoniqui.

⁸Heen hohcha ta yamahihqui hihquish tah non paramehscrai. Noquen jointi janin jahuen joi yamahi.

⁹Hohcha tah hen jai Papan hih non jaiya ta jaan noquen hohcha noque sohuaxoniqui. Ponte hihxon jan yohihi quescabijaquin noque sohuaxonquin. Noquen rishta jatihibi sohuaxonquin.

¹⁰Papa ta quesa qui hihnicahax pari tah non Hen tah hen hohchayamanihqui hihtihi, noquen jointi janin jahuen joi yamahiya.

2

Cristo noquen yohuanxonnica

¹Man hohchayamanon hihxon tah hen nea huishaquin mato yohihi, heen baquebaan. Non hohchataiya bi ta noquen Papa janin noque yohuanxonnica jaiqui. Jesucristo ta jaa qui, hohchajoma joni.

²Jaabi hinamehquin ta noquen hohcha copijanishqui. Noquena huestima jatihibichina jaan copijaquin.

³Jan noque yohihi quescabijanicahax tah non noquen Hihbo tah hen honanai hih non jatihi.

⁴Jaa tah hen honanai hihxon bi noquen Hihbaan yohihi quescajayanica tah quesi qui. Juhuen jointi janin ta Papan joi yamahihqui.

⁵Noquen Hihbaan noque yohihi quescabijaquin hahcaibo ta noquen Papahon shinancoinnica qui. Jasca coin tah qui. Jascajaquin tah non non hahbetan hihqui non honanai.

⁶Hahbetan tah hen hihqui hihquish tah non jaa jihuetai hihni quescaribiti jai.

Joi behna

⁷Nea hen mato yohihi tah hen mato yohimenoyamahi, heen huetsabaan. Mato yohini joi tah hen mato yohirihbihi, mato nincamamenoquin non mato yohini joibi. Man nincapahoni joi tah qui, man hahnon hihxon non rahma huishahi.

⁸Jaabi ta behna qui, huishaquin hen mato yohihi. Criston raanai joi behna tah qui, maton rihbi man nincacoinscrai joi. Bahquishihyama sca ta jatihibi. Xaba coin ta paquescaiqui.

⁹Xabapan tah hen jihuetai hihxon bi jaton huetsa jistahihmahibo ta bahquish chian jihuetaihqui.

¹⁰Jaton huetsahon shinanaibo ta xabapan jihuetaihqui. Jaa xabapan nichibo ta jahuabi hohcha yamahihqui.

¹¹Jaton huetsa jistahihmahibo ta bahquish chian jihuetaihqui. Yame chian nichi. Jano jaabo cahi honanyamahibo, yamepan jaton bero jistimabajahinah.

¹² Huishaxon tah hen mato yohihi, baquebon, noquen Hihbaan maton hohcha sohuascaibo.

¹³ Huishaxon tah hen mato yohihi, papabon, noquen Hihbo man honanai quen. Jahuabi jariyamanon ta jaa janishqui. Huishaxon tah hen mato yohihi, beronanbon, tiroma yoshin man camahi quen.

Huishaxon tah hen mato yohihahqui, baquebon, noquen Papa man honanscái quen.

¹⁴ Huishaxon tah hen mato yohihahqui, papabon, jahuabi jariyamanon bi janí noquen Hihbo man honanai quen. Huishaxon tah hen mato yohihahqui, beronanbon, man coshiscái copi. Papan joi rihbi maton jointi janin jai quen. Tiroma yoshin rihbi man camahi.

¹⁵ Nea mai queenyamanahue. Nea mai mehabo rihbi queenyamanahue. Nea mai queenaibo ta noquen Papahon queenyamahihqui.

¹⁶ Nea mai mehá shinanbo ta Papanahma rahsi qui. Mai mehabaan costanai quesacati, jahuabora jisxon bihti sca, jahuabora hichahax shinanya hihqui shinanti, jascapa shinanbo ta Papanahma bi nea mai mehabo qui.

¹⁷ Nea mai ta queyocahinyaxihqui qui, jahuen queenboyabi. Jascapa yamacahinyaxi-hqui bi ta noquen Papa queenai quescajahibo queyoyamanox manatihiqui.

Paramehtaibo betan hihcoinaibo

¹⁸ Noquen Hihbo joti nete ta jaonahiqui, baquebon. Criston sinatah ta jahuiqui yohihibo tah man nincanihqui. Moa ta jahuen sinatahbo hicha nocohihnascaiqui. Jaa copi ta nete queyoti nea pishcascaiqui non honanai.

¹⁹ Noque janinhax ta bocannishqui noquen huetsabomahax. Noquen huetsabohax ta banequehancannishqui. Noquen huetsaboma rahsihax ta bocannishqui, jascapahbo non honanon.

²⁰ Jaabo jascapahbo bi ta noquen Hihbaan mato caisnishqui. Jahuen yoshin siri rihbi mato hinanquin. Jatihibichin tah man honanai.

²¹ Papan joi man honanyamahi copima bi man honanscayaia tah hen huishaxon mato yohihi. Quesa joi ta Papanahma qui. Jaa tah man honanrihbih.

²² Jesus ta Papan caisai jonica qui hihnicia ta quesa bi res qui. Jascapha ta Criston sinatah qui. Jaa ta noquen Papama qui, jaa ta jahuen baquema qui, hih ta jahuen rahui jaiqui.

²³ Jesus ta Papan baquema qui hihnicabo ta Papanahma rahsi qui. Jesus ta Papan baque qui hihnicia ta Papan baque rihbi qui.

²⁴ Man nincamenoni joi jascabijaquin binnahue. Jaa joi maton jointi janin jascabihijaiya tah man jascabihijaiya Papan baque betan jihuetahi, Papa betan rihbi jascabihijihuetahi.

²⁵ Jaan ta noque yohinishqui, non queyoyamanox jihuetaxihnon.

²⁶ Mato parancatsihquiboya ta hen jascajaquin huishahi.

²⁷ Hen mato yohihibo tah man honanscaax tsoanbi mato honanmati pishinyamahi. Jahuen Yoshin siri maton jointi janin hihquinish janobi jaiya tah man honanscái. Jahuen siri yoshiman sca ta mato jatihibi honanmahiqui. Jaa ta hihcoiniqui, quesayamahi. Jaan mato honanmanri quesa jascabihijaiya noquen Hihbo betan janahue.

²⁸ Jascabihijaiya sca hahbetan janahue, baquebon. Jaatian ta jan cainquihranscayaia non shinanquin sirijascatihi. Jaa joresscayaia tah non jaa bebon nichish hihtimahpax jahómaho rabejaquetimahi.

²⁹ Ponte jan hihqui honanxon pontejaquin hahcaibo jatihibi jahuen baquebo hihqui honanrihbinahue.

3

Papan baquebo

¹ Noquehon hihqui queenxon ta Papan noque Heen baquebaan hahqui qui. Jaa coin tah non qui. Noquen Papa honanyamaxon copi ta noque rihbi honanyamacaniqui, Papanahmabaan.

² Rahma tah non Papan baquebo qui, heen huetsabaan. ¿Jenquetsahpabo non jayaxi-hquin? Noque ta yohiyamaparihi qui. Jaa honanyamaxon bi tah non nea honanai: noque qui jaa cainquihranaiyahai tah non jaa hihqui quescaribihijaiya noque jatihibi. Jan rahma hihqui quescapahbi tah non jaa jisyaxihqui. Jaa copi tah non honanai.

³ Jaa jopahinon hih non jaibo jatihibi tah non hinamehtax coirametai, Papanahma rahsi, jaa hihqui quescari.

⁴ Hohcharesaibo jatihibi ta noquen nincati joi nincayosmabo qui. Hohchati ta nincayamati qui, jasca rabe.

⁵ Noquen hohcha queyohi ta Cristo jonishqui. Jaa tah non honanai. Jahuen hohcha ta yama bi res qui.

⁶ Hahbetan jihuetaibo ta hohchati jihueyamahihqui. Jatihibi hohchataibaan ta jaa jisyamanishqui. Jaa honanyamaribiquin.

⁷ Mato tsoabi paranmayamanahue, heen baquebaan. Pontejaquin hahcai joni ta ponte joni qui, noquen Hihbo ponte hihqui quescarihbibi.

⁸ Hohchati jihuetaibo jatihibi ta tiroma yoshimana qui. Jaa tiroma yoshin ta hohchamenonish, jascabili hohchatihqui. Tiroma yoshiman hahcai jatihibi queyohi ta Papan baque jonishqui.

⁹ Papan jonijahibo jatihibi ta hohchati jihueyamahihqui, hahan jihuetai Papan hinanah. Behnajaquin Papan jonijaha tah non tiromati shinani jihueyamascai.

¹⁰ Pontema jihuetaibo ta Papan baqueboma qui. Noquen huetsahon shinanyamahibo jahuen baqueboma rihbi. Jaa joi honanxon tah non Papan baquebo honanscrai. Tiroma yoshiman baquebo honanrihbiquin.

Joni huetsahon shinanti

¹¹ Noquen huetsabohon tah non shinantih. Joi siri nincamenoquin tah man jaa joi rihbi nincanihqui.

¹² Caiman hahni quescajatima tah non noque jai. Tiroma yoshiman baquexon ta jaan jahuen huetsa rehtenishqui. Jahuen huetsa siri hihqui bi ta jaabi tiromaxon jahuen huetsabi rehtenishqui.

¹³ Nincayosmabaan mato jistahihmahah bi rahteyamanahue, heen huetsabaan.

¹⁴ Noquen huetsabohon shinanaiboxon tah non noque mahuayaxihquibo hihnish bi jihueyaxihquibo sca non jai non honanai. Noquen huetsahon shinanyamahibo ta mahuayaxihquibo jaiqui.

¹⁵ Jaton huetsa jistahihmahibo ta joni rehtemisbo qui. Rehtemisbo ta queyonox manati-hqui. Jaa tah man honanscrai.

¹⁶ Noque jihuenon hihxon ta noquen Hihbaan hahrí jato rehtemanishqui, noque paxajahi. Jaan noque jascajaxoni honanxon tah non joni huetsahon shinanti honanrihbiscrai. Jihuetahbo hihxon tah non noquen rihbi noquen huetsabo paxajati sca jai, nincayosmabaan noque retehhi que bi.

¹⁷ ¿Jahuaborayahpaxon bi noquen huetsa pishinai jisxon bi non yanapanyamahiya cahran? Jascapahbaan ta noquen Papahon shinanyamahiqui.

¹⁸ Join res tah non noquen huetsahon shinantimahi, janan res hahxonti yohiquin. Hahcoinquin jato hahxonnahue, heen baquebaan, shinancoinxon.

Papa bebon mehax hihtimahtima

¹⁹ Noquen huetsabo hahxoncoinnicaxon tah non Papan baque coin non jai non honantih. Noquen hohcha jai noquen jointinin honanxon bi tah non noquen Papa yocacatsihxon non masa shinantimahi.

²⁰ Jahuen baque coin non jai honanxon tah non sirijaquin sca shinantih. Noquen jointinin non hicha tahma res honanai bi ta Papan jatihibi honanihqui.

²¹ Jaan sohuaxona noquen hohcha yamascai noquen jointinin honanax tah non noquen Papa yocati qui hihtimahyama sca jai, heen huetsabaan.

²² Jahua copi hihtimahtima sca jaxon, jan noque yohihi quescabijaquin hahxon, jaa queenai quescabijaquin hahxon non yocacah ta non yocacaibo jaan noque hinanscainqui.

²³ Noque ta nincacointi yohihiqui, jahuen baque Jesucristo non nincacoinnon, jan noque yohini quescabijaquin non noquen huetsahon shinann.

²⁴ Jan noque yohini quescabijaquin hahcaibo jatihibi ta hahbetan hihqui, jaa rihbi jato betan hihqui. Jan noque hinanni jahuen yoshin noque betan hihqui copi tah non noquen Hihbo rihbi noque betan hihqui non honanai.

4

Dios Yoshin siri betan Papan rahui yoshin

¹ Dios Yoshiman ta hea shinanmahaxqui hihquish yohuanaibo bi hihcoinaibo rahsihi shinanyamanahue, heen huetsabaan. Dios Yoshiman jato shinanmahaxquin hihxon jato honanquin sirijanahue. Tiroma Yoshiman shinanmaha yohuanaibo ta hicha jaiqui, jaan raanah.

² Jesus ta Papan raanni joni qui, yorayahpahax ta joresscanishqui hihnika ta Dios Yoshiman shinanmaha yohuanihqui. Jaa yohuan ta hahan yoshin honanti qui.

³ Jesus ta jaama qui hihnika ta Dios Yoshiman shinanmaha yohuanihqui. Jascapa yoshin ta Criston sinatah qui. Criston sinatah ta jahuiqui chanihibo tah man ninca sca janiqui. Nocotax ta nihniscaiqui.

⁴ Mato tah man Papanah qui, heen baquebaan. Tiroma yoshiman shinanmaha yohuanaibo tah man honanai, mato paranpanan. Nincayosmabo betan hihqui yoshin coshihi bi ta mato betan hihqui Dios Yoshin hashoan hihti coshi qui.

⁵ Jaabo ta tiroma yoshimana qui. Jaa copi ta tiroma yoshiman shinanmaha yohuanicaniqui. Jaabo yohuanaiya ta tiroma yoshiman jonixon jato nincarihbihihqui.

⁶ Noque tah non Papan baquebo qui. Noquen Papa honanaibaan ta noque nincacuuihqui non yohuanai. Papanahmabaan ta noque nincayamahihqui. Tsoa nincacuuihquin hihxon tah non jato honanscrai, caibo cahen Dios Yoshinyahpabo, caibo cahen tiroma yoshinyahpabo.

Noquen Papa noquehon hihti queeni

⁷ Noquen huetsabohon shinannahue, heen huetsabaan. Jascapa shinan ta Papan hinana shinan qui. Noquen huetsabohon shinanaibo ta Papan baquebo qui. Jascapahbo ta noquen Papa honanaibo qui.

⁸ Noquen huetsabohon shinanyamahibaan ta noquen Papa honanyamabiresihqui. Noquen Papa ta jonihon shinanti hihbo qui.

⁹ Non jaa copi jihuuenon hihxon ta jahuen baque jaa huesti Papan raannishqui, yorayah-pahax jonor. Jaa raanquin ta jan noquehon shinanai noque honanmanishqui.

¹⁰ Noquen Papahon tah non hihti shinanyamahi. Jaan caya ta noquehon hihti shinanihqui. Noquehon hihti shinanxon ta jahuen baque raannishqui, noquen hohcha copi mahuati jonor. Jan jascajaquin shinanni ta shinan coin qui.

¹¹ Jascajaquin jan noquehon shinanni quen tah non noquen rihbi shinanhahnantihi, heen huetsabaan.

¹² Tsoanbi ta noquen Papa jisyamanishqui. Non shinanhahnaniya ta noque betanbi noquen Papa hihquiqui. Non sirijaquin noquen huetsahon shinannon ta noque hicha bires hinanihqui.

¹³ Hahbetan tah non hihqui, jaa rihbi noque betan hihqui. Jahuen Yoshin jan noque hinanni quen tah non jan noque betan hihqui non honanai.

¹⁴ Nai naman jihuetaibo teehihmanica hihnon hihxon ta jahuen baque Papan raan-nishqui. Jaa jisnixon tah non yohicoinscrai.

¹⁵ Jesus ta Papan baque qui hihnicah ta hahbetan noquen Papa hihquiqui, jaa rihbi noquen Papa betan hihqui.

¹⁶ Noquen Papan noquehon shinanai tah non honanai, shinancoinquin. Noquen Papa ta huetsahon shinanti shinan hihbo qui. Jaton huetsahon shinani jihuetaibo ta Papa betan hihquiqui, Papa rihbi jato betan hihqui.

¹⁷ Noquen huetsahon shinanti shinan hicha hinanah tah non jointi siriyaxihqui, hohchayahpabo casticani noquen Hihbo jahuiya. Jaa hihqui quescarax tah non jaa bebon mehax sca jointi siriyaxihqui.

¹⁸ Noquen huetsabohon shinanax tah non raquetimascai. Noquen huetsabohon shinan-quin sirijaquin tah non raque potahi. Noque casticanyaxihqui shinanax tah non raquetihi. Jascari raquetaibo ta joni huetsahon shinanxon hahxonti pishininhqui.

¹⁹ Noquen Papan noquehon shinanni quen tah non noquen sca jahan shinanrihbiscrai.

²⁰ Heen Papahon tah hen shinanai hihxon bi noquen huetsa jistahihmahihquish tah non quesa sca jai. Non jisi noquen huetsahon shinanyamanicaxon tah non non jisyamahi noquen Papahon non shinantimarihbibi.

²¹ Noque ta yohinishqui, Papahon shinanaibaan non noquen huetsahon shinannon.

5

Mai mehabaan noque hihbojati hahtipahyamahi

¹ Jesus ta Papan raanni joni qui. Jaa jai nincacoinaibo jatihibi ta Papan baquebo qui. Jahuen Papahon shinanaibaan ta jahuen baquehon shinanrihbihiqui.

² Papahon shinanxon jan noque yohini quescajaquin hahxon tah non jahuen baquebo-hon non shinanai non honanrihbibi.

³ Papahon shinanquin tah non jan yohihi quescabijaquin hahtih. Jan noque yohihi ta teema qui.

⁴ Papan baquebo jatihibi ta tiroma yoshin hihbocatsihqui bi hahtipahyamahiqui. Noquen Papa non nincacoinaiya ta noque hihbojacasquimahihqui. Noque hihbojacasquimahiton tah non jahuen yohuan bichinai.

⁵ Jesus noquen Papan baque jai non honancoinai copi ta noque hihboti tiroma yoshiman hahtipahyamahiqui.

Hahan Papan baque honanti

⁶ Jesucristo ta jeneya jimin jonishqui. Jenen res ma. Jenen, jimin rihbi. Jaa copi tah non tsoa Jesus quin hihxon honanai. Dios Yoshiman rihbi ta noque yohihihqui, hihcoinnicaxon.

⁷ Hahan Jesus honanti ta quimisha qui.

⁸ Jahuen Yoshin, jahuen jene, jahuen jimi. Jaa quimisha jatihibichin ta hahan jaa honanti qui.

⁹ Jonibaan yohihah nincaxon tah non noquen Papan noque yohihah hashoan rihbi non nincatih. Jahuen baque non honanon hihxon ta noque yohicoinnishqui, jaa ta heen baque qui hahquin.

¹⁰ Papan baque nincacoinxon tah non noquen jointinin honancoinscrai, Dios Yoshiman honanmahah. Noquen Papa nincayamahi joni ta Quesa ta jaiqui hihquiqui, noquen Papa yohihi. Jahuen baque non honanon Papan yohihah bi nincayamaxon paranai shinanquin.

¹¹ Papan ta yohicoinhqui, jan noque queyoyamanox jihuemahi non honanon hihxon. Jahuen baquen noque jihuemahi non honanon hihxon noque yohicoinqui.

¹² Jahuen baque bichish tah non queyoyamascanox manatai. Jahuen baque bihyamahax tah non queyonox manatai.

Quirica queyonoxon jan yohihi

¹³ Maton tah man jahuen baque nincacoinscrai. Man queyoyama sca janox manascai man honanon hihxon tah hen mato yohihi.

¹⁴ Noquen Papa nonanscaax tah non jaa yocati qui hihtimahyamahi. Jaa queenai quescapahbo non yocacah ta noque nincaquihqui. Non tah non honanai.

¹⁵ Non yocacai tihibi jaan nincacai honanxon tah non non yocacaibo non bihtihi non honanrihbih.

¹⁶ Hahan mahuatima que bi noquen huetsa hohchatai meraxon tah non Papa yocaxonquin jaa joni jihuematih. Hahan mahuatima hohchataibo yocaxonquin jato jihuemaquin. Hahan mahuati hohcha ta jaribihiqui. Man jascapa yocaxonti tah hen yohiyamahi.

¹⁷ Jatihibi tiroma ta hohcha qui. Hihcax bi hahan mahuatima hohcha jai.

¹⁸ Papan behnajaquin jonijahibo ta hohcha hohchayamahihqui, Papan baquen jato coiranah. Tiroma yoshiman ta jato mehetimascaiqui. Non tah non honanai.

¹⁹ Papan baquebo noque jai tah non honanscrai. Nai naman mehabo ta tiroma yoshiman hihbojahiqui.

²⁰ Noquen Papa coin non honanon ta jahuen baque jonishqui, shinan noque hinani. Jaa noquen quiquin Papa betan tah non hihqui. Jahuen baque Jesucristo betan rihbi tah non hihqui. Non tah non honanai. Noquen Papa ta Dios coin qui. Jaan jihuemaha tah non queyoyamanox manascai.

²¹ Santobo qui coiramenahue, heen baquebaan.

2 JUAN

Juaman raanni joi, jahuen rabe sca

Noquen huetsahon shinanaibo

¹ Pastoro hihxon tah hen mato qui nea quirica raanai, Papan caisai baquebon. Maton baquebo rihbi qui tah hen nea hahxonai. Matohon tah hen shinancoinai. Hea huestichinma bi Papan joi honanaibo rahsichin ta matohon shinancoinlhiqui.

² Papan joi coin ta noque betan hihquish jascabibi sca noque betan hihyaxihquiqui. Jaa copi tah non matohon hihti shinananai.

³ Papan ta noque jahuen shinan hinantihiqui. Noquen jointi rihbi ta sirijabahintihiqui, noquehon shinanxon. Jahuen joi jan yohini quescabijaquin ta noquehon shinanihqui. Jahuen baque Jesucristo betan ta Papan noque jascajaxontihiqui.

⁴ Papan noque yohihi quescabibi caibo maton baquebo jihuetaiton merahax tah hen hihti jenimahi. Papan noque yohini quescabija ta jacanihqui.

⁵ Mato tah hen yohiscai, hea huetsabon. Joi behna mato yohiquin hahcajaxonma bi tah hen non nincamenoni joibi hen mato yohihi: Noquen huetsahon shinannahue.

⁶ Noquen Hihbaan noque yohini quescabijaquin hahnicahboxon tah non joni huetsahon shinanscái. Man nincamenoni quescabibi ta jan noque yohini joi qui, non joni huetsahon shinani jihuonen.

Parannicabo

⁷ Hicha parannmisbo ta nihresscainqui. Jaabo ta Jesucristo ta yorayahpahax jonishqui hihyamahiqui. Jascapahbo ta parannmis qui, Criston sinatahbo.

⁸ Coiramenahue. Maton tee man yohyomis. Jaa yohyoxonma bi noquen Hihbaan mato hinanyaxihqui jatihibi bihyanxon coiramenahue.

⁹ Criston noque honanmani joiya banexonma bi jaa potabahini caresaibo ta noquen Papajomabo qui. Criston honanmani joiya banetaibo ta noquen Papayahpabo qui, jahuen baqueyahpabo rihbi ta jaabo qui.

¹⁰ Mato qui nocoxon bi jaa joi yohiyamahibo maton xoboho mapemayamanahue. Jascapahbo metsonxon tah non tiromajati yanapanai.

Jahuen quirica queyonoxon jan yohihi

¹² Hicha hen mato huishaxon yohiti jai bi tah hen quirica raanxon yohiti queenyamahi. Mato qui nocoti caxon mato yohuanquihnxon yohiti tah hen queenai. Jaatian tah hen jenimacointihi.

¹³ Papan caisai maton huetsabaan ta nenoxon mato man jascabi jayamahin, noque huetsabaan, hahquiqui.

3 JUAN

Juaman raanni joi, jahuen quimisha sca

Gayo qui jan siripi yohuanai

¹ Pastoro hihxon tah hen mihqui nea joi raanai, heen huetsa Gayon. Mihon tah hen shinancoinai.

² Min siripi jihuenon tah hen mihqui yocaxonai, heen huetsan. Min hisinyamanon tah hen yocaribhihi, miin shinan coshiscrai quescaribhihi miin yora jascaribbinon.

³ Neno nocoxon ta noquen huetsabaan hea yohirahsihiqui. Min jihuecoinxon sirijaquin shinanxon hahcai hea yohiquin. Papan joi min nincacoinai hea yohicanquin. Jaa nincacax tah hen hihti jenimahipiqui.

⁴ Papan joi heen baquebaan nincacoinai honanax tah hen hihti jenimahi, heen jointiboyabi hihti jenimahi.

⁵ Noquen huetsabo mihqui nocotaiya min jato yanapana ta hihti siri qui, heen huetsan. Min jisnima noquen huetsabo rihbi mihqui nocotaiya yanapana ta siri qui. Jascajacoin tah min jai.

⁶ Min jatohon shinanai ta neno joxon noquen huetsabo rihbi yohihipicanaxqui. Jas-capahbo mihqui nocoribhihiya jaya cati sca jato hinanrohayaxahnhue, noquen Papa hahxonaibo copi.

⁷ Criston joi yohihi ta bocanihqui. Nincayosmabaan hinanah bi jahuabi bichintima ta shinancaniqui.

⁸ Jaa copi tah non jato hinanti jai, hahbe yohinicabonoxon.

Diótrefes tiromahi jihuetai

⁹ Papahon shinani jano tsinquiaiibo qui tah hen quirica raanhohqui. Hen raanhoh bi ta Diótrefes jato tocan yohuan hihbocatsihxon jato nincamayamahiqui.

¹⁰ Jaa copi tah hen janoxon jan tiromahi hean shinanyaxihqui. Jan hehqui tiroma bi res yohuan yohuanai tah hen jaa shinanmayaxihqui. Tiromahi yohuanax bi ta yohuanti res queenyamahihqui. Noquen huetsabo jano nocotaibo bi ta jato mapemayamahiqui, janohahbo jaanbi Mapemayamanahue hahxon. Tsinquihhnataiboma qui ta jato camahihqui.

¹¹ Tiromabojai quescayamahue, heen huetsan. Sirijaquin shinanax jihuehue. Sirijaquin shinanxon hahcaibo ta Papan baquebo qui. Tiromajaquin shinanxon hahcaibaan ta noquen Papa jisyamanishqui.

Demetrio siripi jihuetai

¹² Demetrio qui ta jatihibi siripi yohuanihqui. Jan Papan joiya hihqui ta honantihbiresi qui. Hea rihbi tah hen hahqui siripi yohuanai. Hen yohuani hihcoinai tah min honanrihbihili.

Hahan quirica queyoti

¹³ Hicha mia yohiti shinanax bi tah hen quirica huishaxon yohiti queenyamahi.

¹⁴ Mia jisi tah hen histon cacatsihqui. Jaatian tah hen mihibetan yohuantihhi.

¹⁵ Min jointi siripax jihuenon tah hen Papa yocacai. Nenoha noquen huetsabaan ta mihqui joi raanhiqui, miin jascabili jayamahin noquen huetsan hahquin. Janoha noquen huetsabo jascajacuin rihbi yohixonhue jatihibi.

JUDAS

Judasen huishani joi

Papan caisaibo qui Judasen joi raanai

¹ Jesucriston joni hihxon tah hen hea Judasen nea joi huishaxon mato qui raanai, noque huetsabaan. Santiagonen huetsa hihxon tah hen mato qui raanai. Noquen Papa matohon hihti queenaibo tah man qui, Jesucristonen quenaxon bexojahabo tah man qui, jahuenah sca.

² Matohon shinanxon Papan mato yanapannon, jahuen shinan siri jan mato hicha hinannon, jan matohon hihti siribojaxonnon, hih tah hen jai.

*Quesajaquin yohihibo
(2 P 2.1-17)*

³ Noquen Hihbaan noque jihuemahi jenquetsahpaquin hihxon mato qui huishati shinanrahsihixon bi tah hen huetsa joi man hashoan pishinaiya jaa huetsa joi huishati hen shinanscái, heen huetsabaan. Jaa copi tah hen mato hihti yohihi, hahan jihueta joi Papan noque huestijaquin yohihah bihxon tenexon tsoabi mato paranmayamanahue, heen huetsabaan.

⁴ Caibo ta nincayosmamax bi noquen huetsahicamahax mato tocan hihquiqui. Jan jato tiromajayaxihqui ta neateman Papan huishanishqui. Noquen hohcha sohuaxon ta Papan noque casticanyamascatihqui, hohchatí hihresnonhue hih ta jacanihqui, Papan shinanjomahax. Jascajaquin ta Papan joi huetsajacanihqui. Jascajaquin rihbi ta noquen Hihbo Jesucristo potacaniqui, jaa huesti noquen Hihbo que bi.

⁵ Hen mato yohihi jatihibi man sirijaquin honanpahonih bi tah hen behnajaquin sca mato shinamacatsihqui. Egipto mai janin hohmis hohmisaiton ta noquen Hihbaan jahuen jonibo picomanishqui, huetsa main jato jihuemanoxon. Hiohah bi nincayosmabiton sca ta jato muahuamanishqui.

⁶ Papan yonotibaan rihbi ta jaton hihboti jenebahini caquin jaton jati jenebahinnishqui. Jaabo ta Papan xehponishqui, pequetima nexá cahen bahquish chian jato potapaquenish, jahuen quiquin casticanti nete noconon caman jato jano bexojaquin.

⁷ Sodoma, Gomorra, jano jai jemabo rihbi ta jascanishqui. Tsinihax cahen cahco shinanya jaax hahbe bebo hihti queenpahonish. Jaton tsiste res banetai ta hahan honanti qui, nocayosma chihi jato manascai non shinanbehnoyamanon.

⁸ Hen yohihah mato janin jaibo ta jascapahbo qui. Namaquen hohchataibojisish ta jascacatsi sca jaax jaton yora qui bi sca hohchacaniqui. Tsoabi nincacatsiyamahax ta xabayahpabo qui tiromahi yohuanrihbicaniqui.

⁹ Papan quiquin yonoti Miguel ta coshihax bi jascayamanishqui. Moisesnin yora Satanasnen bichincatsihquiya ta hahbetan join hihquinannanxon Satanás hichayamanishqui. Heen Hihbaan mia netemanon hahresquin.

¹⁰ Mato tocan jaibo ta jascayama qui. Jaabaan honanyamahibo ta hichacaniqui. Shinanjoma yohinahboxon hahcajaquin jaibo copi ta Papan jato hihti tiromajayaxihqui.

¹¹ Caiman hahní quescapahboja ta jacanihqui, Papan hihti cascantibo sca, Balaaman hahní quescajaquin rihbi ta coriqui queenyoraxon Papan jonibo hohchamacaniqui. Coré hahní quescapahbo ta nincayosmabohax queyocahinyaxihcaniqui.

¹² Man pinoxon tsinquitaiya ta rabinxonma mato betanbi picanihqui, hahan masati sca mato tocan janon. Jaton yora res ta jiscanihqui, caibo hahxonquinma. Hoijomá nai cohin quescapahbo ta jaabo qui, nihuen huieranah caresi. Bimiti tian bimiyosma jihuibo quescapahbo tah qui. Jihui xanascai, mexabahinah quescapahbo, jabiyahpa muahuanicabo.

¹³ Jaabo ta nihuen potajaquehah hian behchonax bacox potohahtanai quescapahbo qui, jaton hahqui rabinti shinanbo potohi. Huishi paquetai quescapahbo tah qui. Jascabi sca bahquish chian baneti cahi.

¹⁴ Adamán chini xohtabo toponah, jahuen siete ta Enoc qui. Jaan ta jascapa tiromabo jayaxihqui yohinshqui, nescajaquin: Jise. Non topontimahi jahuen yonotiboya ta noquen Hihbo jahuiqui.

¹⁵ Jatihibi casticani joxon ta nincayosmabo jatihibi jaan yohihqui, nincayamaxon jaabaan tiromajapahoni jatihibi jato cahepaquequin. Hahqui tiromahi yohuanpahonihbo joi jatihibi ta jato cahepaquehahqui, hihqui.

¹⁶ Reren rereni yohuanaibo tah qui, jahua pishca costanyamahax sinati tiromahi yohuanaibo, mai mehabaan costanai quescajacsihquibo coshi pari pahichax yohuani, paranxon coriqui bichinnoxon pari noque sirijaquin yohuanquihncuin.

Nincacaibo jan hihti yohihi

¹⁷ Noquen Hihbo Jesucriston raantibaan yohini joibo shinanbehnoyamanahue, heen huetsabaan.

¹⁸ Nete queyoti hochoma ta hosanaibo jayaxihqui qui. Papan costanyamahi shinanbo qui ta hinamehyaixihsanahui, tiromati queenyorascui.

¹⁹ Huetsa joibo yohixon ta mato shinan mitisahmacaniqui. Mai meha shinanyahpabo tah qui, Papan yoshin siri jaton jointi janin yamahi.

²⁰ Mato tah man jascatimahi, noque huetsabo coshijanahue, hashoan sca noquen Hihbo nincacoinahbo. Dios Yoshinyaxon noque huetsabo yocaxonnahue.

²¹ Papa Dios queenai quesca jihuena, matohon queenai quescajaquin jan mato hahxonnon. Noquen Hihbo Jesucristonen matohon shinanxon mato queyoyamanox manamahi jonon caman mananahue.

²² Rabe shinanyabo yanapannahue, shinancoinahbo.

²³ Caibo rihbi chihi quiha bihquin hahcajaquin hihti yohinahue, hohchapan jato queyomis hihxon. Caibo rihbi maposcaiton raquexon chihima qui bihbohannahue. Rahninti rishta chopas potamaquin hahcajaquin jaton mai meha shinanbo potamanahue, mato qui mahnemis.

Noquen Hihbo jan yocascai

²⁴ Papan ta mato tenemati hahtipahiqui, man paqueyamanon. Rishtajoma jaa bebonbi man jahuen xabapan jemimahanan nihnon ta mato bexojati hahtipahiqui.

²⁵ Jaa huesti ta Papa Dios qui, noque jihuemanica. Noquen Hihbo Jesucristo betan ta noque jihuemaniqui. Jaa copi tah non Mia tah min xaba hihbo qui, Papan, non jai. Quiquin shinan hihbo tah min qui. Min hihbohi ta jathibhi qui. Min hihboyamahi yamahi. Mia huesti tah min noque yohinica qui. Nete jariyamahi bi tah min jascapa janíqui, rahma jascarihbibi. Jascarihbibi tah min queyoyamanox manatai hih tah non mia yohihi jai, Papan. Jascari rahan.

JAYAXIHQUIBO

Jayaxihquibo Juaman huishani

Jayaxihquibo Jesusen yohi yohihi

¹ Jahua janoxihquiquin noquen jonibo yohihue noquen Papa Diosen jaah ta Jesucristo-n hea yohihipishqui. Jahuuen yonoti hehqui raanxon ta hea yohihipishqui, hea Juan, jahuuen joni.

² Papan joi jan hea yohihah tah hen huishaxon mato yohihi. Jismaxon jaan hea honamahah tah hen Jesucriston joi mato yohiscai.

³ Janoxihquibo ta neno pishca sca jaonahiqui. Jaa copi ta nea Papan quirica jisxon caibo sca nincamaxah man hahan jenimati shinan jaresscrai. Nea hen huishahi joibo nincaquin sirijahax ta mato nincacaibo rihbi jahan jenimati jaresscainqui.

Siete jemabo qui Juaman joi raanai

⁴ Asia mai janin jihuetai noquen huetsabo pari tah hen yohihi, jano siete jemabo jai janin jihuetaibo. Papa Dios ta rahma jihuethqui, neateman rihbi japhonish bi jascabili jihuetai. Hahquirihbi ta jahuiqui. Jahuuen shinan siriya man jihueyamahin? Jaan hahxonah man sirijaquin shinanyamahin? Jano jan tsahoxon yonohi bebonbi ta siete yoshinbo jaiqui, jahuuen hahxonnicabo. Jaabaan rihbi ta nea quiricayaxon man jascabi jayamahin mato jaiqui.

⁵ Jesucriston ta ponte yohinica qui, Papan joi noque nincamaxon ponte yohiquin. Jaa pari ta yamanicahax teehirbinishqui. Main jai quiquin hapobo jatihibi sca ta hihboxon jahiqui. Jaan ta noquehon shinanxon jahuuen jimin noquen hohcha sohuaxoniqui. Hihboxon ta nea quirica huishamaxon mato yohihi, Man Papan shinanya jihueyamahin hahquin, Man siripi jihueyamahin hihxon.

⁶ Noquen hohcha sohuaxon ta noque jahuuen jihuetaibo hihmahihqui, jahuuen Papa Dios yocanicabo sca non janon. Hahxon tah min noque jai, Hihbon. Mia tah min Xaba Hihbo qui hahquin jascabijahi jihuenehue. Jascari rahan.

⁷ Jistaha man. Nai cohiman ta jahuiqui. Jatihxionbi ta jaa jisyaxihcanihqui. Jaa naconibaan rihbi ta jisyaxihquiqui. Jatihibi mai mehabo ta hihti benatax huaohihyaxihquiqui. Jasca ta jayaxihquiqui. Jascari rahan.

⁸ Hea tah hen jatihibi Hihbo qui, jatihibi janon tah hen hean hihmahi, queyotahbo tah hen hean queyohi, hih ta noquen Hihbo Dios jaiqui. Jascabili ta jaa jaiqui, rahma jai, neateman japhonni, joyaxihqui, jatihibi hihbo.

Cristo Xaba Hihbo Juaman jisi

⁹ Hea Juan tah hen maton huetsa hihxon, mato betan tenenica hihxon, mahbe jihuetai hihxon, mahbe Cristo tenexonrica hihquish, Patmos janeya mai tonco pishca janin tsahotai. Papan joi yohixon raquexonma Jesusen joi yohiquin sirijahiton ta nea main hea tsahoncannishqui. Tsoabi hen nincamayamas canon hihxon ta hea neno sipo xoboho tsahoncannishqui.

¹⁰ Papahon shinani non tsinquitai neten ta Dios Yoshin siripan hea hihbojaha namaquen hahcajaquin hean nincaquipiqui, hehchon coshin yohuanai hean nincaquin, corneta rehue coshin corotai quesa coshin yohuanai.

¹¹ Min jisibo huishahue, siete jema janinhahbo qui jaa quirica raannoixon, Efeso, Esmirna, Pergamo, Tiatira, Sardis, Filadelfia, Laodicea, jaa jemabo janinhahbo noquen huetsabo qui raannoixon huishahue –hahquin hea.

¹² Hea yohihi nincacax, tsoa yohuaniquin hihquish rabejaquexon jisí bi siete johue jai, oro johuebo, jaton oro tsahontibo jahuuen tsahotai.

¹³ Jaa johue quetehi tocan cahen noquebaque quescapah nichii, tari chaiya, oro cinturon pextiman pishnexehtax jano nichii.

¹⁴ Jahuuen mapo ta joxo bi res hihquishqui, carnero rani joxojaha hihqui quesca cahen jahuuen boo joxo bi res joxo. Chihhi perehilihquicamahi jahuuen bero.

¹⁵ Jahuuen tahe cahen bronce quesa, pehneni. Chihhi pehnejaha quesa. Jahuuen joi cahen coshin yohuanai, hani huaca coshin paquetihcamahi.

¹⁶ Jahuuen mecyanaho mequeman xecohah cahen siete huishi jai. Jan yohuanaiya cahen jahuuen jana janinhax hoquen behcoin bi quenoya machito bahritan bahritan. Jahuuen bemanan cahen xabati, bari coshin xabatihcama.

¹⁷ Jascapa jisish tah hen jaa taracahrenenipiqui, muhuatax quescapi. Jahuuen mecyanaho mequeman hea mehexon sca, hea yohiquin:

—Raqueyamahue. Jatihibi janon tah hen hean jananihqui. Queyónicabo queyonon tah hen heanbi jato queyohi.

¹⁸ Jihuenica tah hen qui. Hihquipish bi hahquirihbi teehihquish tah hen queyoyamanox manascai, jascabi sca jihuetai. Hea ta hen jatihibichin jato queyonica qui. Mahuataibo tah hen jano jascapahbo potaxon hean xehpohi.

¹⁹ Min jisibo huishaschahue. Rahma jaiboya jayaxihquibo hen mia jismahah huishahue.

²⁰ Nea min jisi heen mecyaho mequeman her siete huishi xecohi tah hen mia yohipar-ih. Nea siete oro johuebo rihbi jahua quin tah hen mia yohiscai. Nea siete huishi ta siete yoshin qui, heen yonotibo, hoa siete jema janin jai noquen huetsabo coirannicah, jema tihibichina huesti. Nea siete johuebo ta tsinquitaibo qui, tsinquitaibo tihibichina huesti.

2

Efeso jema janin Juanan raanai joi

¹ Efeso jema janinha nincacoinaibo coirannicah qui raannoxxon pari nescajaquin huishahue. Jahuen siete oro johue tocan nihnicahxon jahuen mecyaho mequeman siete huishi xecohiton ta mato yohihihqui.

² Jenquetsahpabo man jihuetai tah hen honanai. Jenques man tee teetain honanxon tah hen jenquetsahxon man tenehin honanrihbihi. Tiroma jonibo man hihquihinyamar-ihbihi tah hen honanai. Hea tah hen Papan raanti qui hihquish bi quesahibo tah man tanaxon jato honanscai.

³ Mato tiromajahahbo bi tah man heen joniboxon hea tenexonai. Yobacahinax tah man paxquinyamahi.

⁴ Man jascajaxonai bi tah hen nea mato yohihi: man hehon queenmenoni quescayama sca tah man jai.

⁵ Paqueriyamahax man siripi jihuapehoni shinannahue, jascarihbinoxon. Ponte-jaquin sca shinanxon man hahmenoni quescajanahue. Man hahyamahiya tah hen histon mato qui nocoxon maton johue bichintihi, jahuen tsahonti janin yamascanon. Man pontejaquin shinanyamahiya tah hen mato jascajatihi.

⁶ Jaabi tah man nicolaitobaan hahcai rahninai. Hean rihbi tah hen jascapahbo rahninai.

⁷ Nincacoinaibaan nea honannon hihquish ta Dios Yoshin yohuanihqui. Hahan nincati pabinquiyahpaxon nincacoinnahue. Mai meha shinanyahpabo tenehax chitihiyamahue. Man tenehiya tah hen Papan huai janin jai bimi mato pimatih. Hahan jihuetai jihui quiha queyoyamanox mananon piti tah hen mato pimatih.

Esmirna jema janin jan raanai

⁸ Esmirna jema janinha nincacoinicabo coirannicah qui raannoxxon sca nescajaquin huishahue. Jahuabi jaríyamahi bi janish jatihibi queyotaiya janicah tah hen qui, hihquipish bi hahquirihbi teehihquishxon tah hen mato yohihi.

⁹ Mato tiromajahibio tah hen honanai. Man jahuabi yamahi tah hen honanrihbihi. Jahuaborajomabohax bi tah man hichayahpa qui. Hea tah hen judio qui hihquish bi quesahibo ta mato janin jaiqui, hehqui tiromahi yohuanabo. Satanasnen tsinquitaibo ta jaabo qui, henamahbo.

¹⁰ Mato tiromajayixihquibo qui raqueyamanahue. Caibo ta tiroma yoshiman mato sipo xoboho tsahonyaxihqui, maton shinan jenquetshpa hin honancatsihquin. Chonca neten tah man tiromabo teneyaxihqui. Mato retehibaan bi tenenahue. Man hea tenex-onaiya tah hen mato hahan jihuetai sca hinanyaxihqui, man queyoyamanox mananon.

¹¹ Nincacoinaibaan nea honannon hihquish ta Dios Yoshin yohuanihqui. Hahan nincati pabinquiyahpaxon nincacoinnahue. Mainxon man Cristo tenexonaiya ta mato hahquirihbi mahuamatimahiqui. Quiquin mahuapan sca tiromabo hahquirihbi mahuamaquin bi ta mato hahquirihbi mahuamatimahiqui.

Pérgamo jema janin jan raanai

¹² Pérgamo jema janinha nincacoinaibo coirannicah qui raannoxxon sca nescajaquin huishahue: Hoquen behcoin bi quenoya machitoyahpaton ta mato yohihiqui.

¹³ Jano man jihuetai tah hen honanai. Janoxon ta Satanasnen jahuenahbo yonohihqui. Jascapa jano jai bi tah man tenexon hea jenebahinyamahi. Jano Satanas jihuetai bi heen joni Antipasnen jato heen joi sirijaquin yohihiton jaa retehibaan bi tah man heen joi jeneyahamahi.

¹⁴ Man jascajaquin sirijahi bi tah hen nea costanyamahi: Balaaman haxemani quescajaquin haxemahibio ta mato tocan jaiqui. Balaaman ta Balac yohinishqui, israeli baquebo jan hohchamanon, yoshin rehtexona piti pihábo, tsinibo rihbi jaábo.

¹⁵ Nicolaitobaan ta jascajati yohihiqui. Jascapahbo que bi tah man jato hihquihinai.

¹⁶ Maton shinan pontenahue hih ca hen jai sen. Man ponteyamahiya tah hen mato qui histon nocoxon heen jana janin jai machitonan mato hahtih.

¹⁷ Nincacoinaibaan nea honannon hihqush ta Dios Yoshin yohuanihqui. Hahan nincati pabinquiyahpaxon nincacoinnahue. Jaabo mato chitihihmayamanahue. Man tenehax chitihihyamahiya tah hen tsoan honannihma maná piti mato hinanyaxihqui. Macan bero joxoni pishca rihbi tah hen hinanyaxihqui, maton jane behnaya macanbo, tsoanbi jaa Jane honanahma, jaa macan bichi huestichin honannon.

Tiatirajema janin jan raanai

¹⁸ Tiatirajemina nincacoinaibo coirannicah qui raannoxxon sca nescajaquin huishahue. Papan baquen ta mato yohihhqui. Chihi perehihqui beroyahpaxon, bronce pehnemi taheyahpaxon ta jaan mato yohihhqui.

¹⁹ Jenquetahpabo man jihuetain tah hen honanai. Joni huetsahon tah man shinanai. Papan joi tah man nincacoinai. Nincacoinxon tah man hahxonai. Man tah man tenexonai. Man chini hahxonai ta man hahmenoni mentan hashoan hicha qui.

²⁰ Man jascajaquin sirijaxonah bi tah hen man mato janin jai haibo tiroma man potayamahi copi hen maton jati costanyamahi. Jaa Jezabel haibo ta Papan joi chanihihcamahi yohuanihqui. Paranxon ta heen jonibo tiromajaquin haxemahiqui. Tsinihahbo hixxon haxemaxon ta yoshin rehtexona nami piti rihbi jato haxemahiqui.

²¹ Miin shinan pontehue hahcax hen manatah bi ta jahuen shinan pontecatsihyamahi-hqui. Jahuen tsiniti ta jenecatsihyamahi-hqui.

²² Hani hisiman ta hen jahuen bachiho jaa potayaxihqui. Hahbetan tsinixon bi shinan ponteyamahiboya tah hen jahuen hahbe tsinihibo rihbi jayabi potayaxihqui.

²³ Jahuen baquebo rihbi tah hen mahuamaquin queyobahinyaxihqui. Jaatian ta jatihibi janin tsinquitai nincacoinaibaan honanyaxihqui. Noquen Hihbaan ta noquen shinanboya noquen jointibo honanihqui hih ta jayaxihcanihqui. Jasca tah min janiqui hihxon tah hen siribo hahxoncoinquin bi caibo rihbi sca rishquipaqueyaxihqui.

²⁴ Man Tiatirajemina jaa haibo betan hiyahamibio sca tah hen yohihi. Jaan haxemahi quescajayanahiboxon, nincanahue. Jaabaan jisi jahuen yohuan hihti honan joi hihi qui bi ta Satanasnena qui. Jascapa joi tiroma bihyosmaboxon hean yohihi nincacoinnahue. Mato tah hen jahuabi hashoan joi tsamanyamahi.

²⁵ Nea res tah hen mato yohihi: man jai quescabinahue, hen mato qui canon caman.

²⁶ Tenexon man queyónoxon caman chitihihxonma man hean yohihi quescamai jaiya tah hen mato yohiayaxihqui, maton nahuabo man yonoscanon.

²⁷ Chantiyaxon nincamaquin hahcajaquin tah man jato nincamatih. Quentijanicanton quentiqaquin jahuen mai quenti tiromahi jisxon hahribinoxon moshabahinai quescajquin tah man jato hahtih.

²⁸ Papan ta hea jascajati yohinishqui. Yamequiri xabanica huishi rihbi tah hen mato hinanpaqueyaxihqui.

²⁹ Nincacoinaibaan nea nincanon ta Dios Yoshin yohuanihqui. Hahan nincati pabinquiyahpaxon jan yohuanai nincacoinnahue.

3

Sardis jema janin jan raanai

¹ Sardis janinha nincacoinaibo coirannicah qui raannoxxon sca nescajaquin huishahue: Papan siete yonotiyahpa ta yohuanihqui. Jahuen siete huishi xecoxon ta mato yohihhqui. Jenquetahpabo man jihuetain, hen tah hen honanai. Mohi mohinihcamahax bi tah man jirijomab qui, mahuatahbo.

² Mohinahue. Mohixon, maton shinan queyocahincatsihqui bi coshicahinnahue, mohi-tahpabo sca jihuixonon. Jihuetti man shinancoinaxma hihresai tah hen mato jisi. Heen Papa Dios bebonxon jisxon tah hen hihresai mato jisi.

³ Papan mato hahxonni shinanbehnoyamanahue. Jahuen joi jan mato nincamani shinannahue. Shinanbehnoxonma bihquin sirijaxon maton shinan pontenahue. Man mohiyamahiya tah hen yometsoh nocorenenciamahi mato qui nocorenentih. ¿Jahuentian hen mato qui nocotihin? Man tah man honantimabirestih.

⁴ Man Sardis janin jascapahbo hicha hihqui bi ta mato tocan huestibo res jaiqui, jaton tari rishtajayamahibo. Jaabo caya ta siri chopas joxoni hean sahuemaha sca hehbetan niyayaxihqui, siribo copi.

⁵ Jascajaquin tenehibus tah hen joxo chopas sahuemayaxihqui. Jihuexohiquibo copi tah hen jaton Jane huishaxon jahuentianbi heen quirica janinha jaton Jane tsecatimahi. Heen Papan nincanon, jahuen yonotibaan rihbi nincanon tah hen Jaa ta hena qui hahxon jaton Jane yohipaqueyaxihqui.

⁶ Nincacoinaibaan nea honannon hihquish ta Dios Yoshin yohuanihqui. Hahan nincati pabinquiyahpaxon nincacinnahue.

Filadelfia jema janin jan raanai

⁷ Filadelfia jema janinha nincacoinaibo coirannicah qui raannoxxon sca nescajaquin huishahue. Hihcoinxon ta maton Papan mato yohihihqui. Davidinin jihuetahbco quey-otimajati ta Papan yohinishqui, jato jihuemanicah hinantijaxon. Jaa jihuemanicahxon tah hem johue hahcai. Hean johue hahcaiya ta tsoanbi pantetimahihqui. Hean johue hahyamahiya ta tsoanbi hihcomati hahtipahyamarihbihiqui.

⁸ Jenquetsahpabo man jihuetain hen tah hen honanai. Mato tah hen bahixonai. Hean bahixonai ta tsoanbi xehponti hahtipahyamahihi. Man hicha tahma res coshi jai honanxon tah hen mato yohihi. Heen joi tah man bixhon jeneyamahi. Hea maton hihbo hiltima tah man jahuentianbi yohiyamanihqui.

⁹ Maton jema janin ta Hea tah hen judio qui Papan baque coin tah hen qui hihquibo jaiqui, quesahibo. Jaabo ta Satanasesna baquebo qui. Jaabo tah hen huetsa shinan hinanyaxihqui, mato qui caxon mato tah man noque mentan hashoan shinanya qui mato jaahbo. Matohon hean shinanai ta jaabaan honanyaxihcanihqui. Man honanon hihxon tah hen mato yohihi.

¹⁰ Tenexonnahue hen mato jaah tah man tenexonniqui. Hean rihbi tah hen mato paxajaxonyaxihqui. Jatihibi mai janin jihuetaibo qui tah hen tiromabo paqueyaxihqui. Jato qui tiromabo paquexon bi tah hen mato jaa tiromabo qui paxajayaxihqui.

¹¹ Histon tah hen mato qui canoxihqui. Man hahcai quescajaquin jeneyamaxahnahue, hen mato hinanyaxihquibo tsoanbi mato bichinyamanon.

¹² Hen mato bihnon caman tenexonaibo tah hen heen Papan xoboho jihuemayaxihqui. Siri bi res tah man janoo hihiyaxihqui. Tsoanbi ta potatimahihqui. Xobo janinhax jahuen xobo jihui picoyamahi quescajai tah man janobi siri bi res Papa Dios betan hihiyaxihqui. Mato behuishihi tah hen heen Papa Diosen Jane huishayaxihqui, Papa Diosen jeman Jane rihbi tah hen mato qui huishayaxihqui, naihohxon Papan mato botomaxonai jahuen Jerusalen jema behna. Heen Jane behna rihbi tah hen mato behuishihiyahqui.

¹³ Nincacoinaibaan nincanon hihquish ta Dios Yoshin yohuanihqui. Jahan nincati pabinquiyahpaxon jan mato yohihi nincanahue.

Laodicea jema janin jan raanai

¹⁴ Laodicea jema janinha nincacoinaibo coirannicah qui raannoxxon sca nescajaquin sca huishahue. Hihcoinxon tah hen mato yohihi. Hen yohihi quescajai ta jatihiqui. Papan hahni jatihibi hihboxon ta hen yohihi.

¹⁵ Jenquetsahpabo man jihuetain hen tah hen mato honanai. Jene yoho quesca tah man qui. Matsihaxma bi tah man xanayamarihbih. Matsi hihiyamahax man xanapahinon.

¹⁶ Yoho pishca res tah man qui, matsima, xanayamarihbih. Jaa copi tah hen toshban-hahxon quemero potaquin hahcajaquin mato potatijihi.

¹⁷ Noque tah non coriqui hichahi hih tah man jai. Tsama bi res tah non jai, jahuabi tah non pishinyamahi, hih tah man jai. Huaohihihi bi tah man jascarai. Homisbati tah man jai, hihi jahaujomabon, benchebo. Chopanma hihquibo tah man qui.

¹⁸ Chihin tana oro marohi benahue, coriquiyahpanoxon. Chopra joxoni marohi benahue, sahuexonoxon, hahqui rabintiboo chopanma nichibo hihiyamascanaxon. Bero rahon besquinalahue, jisti hahtipahnoxon.

¹⁹ Hean costanaibo tah hen hean pontehi. Baque hanijaquin hahcajaquin tah hen jato pontehi. Jaa copi maton shinan ponteti queenbiresnahue, pontenoxon.

²⁰ Maton xehqui janin nihxon tah hen quenahui. Hen quenahui nincaxon man quehpenx-onaiya tah hen hihcoxon mato betan pinoxihqui, maton rihbi man hehbetan pinon.

²¹ Hen mato bihnon caman man tenehiya tah hen quiquin hapobo sca mato hihmayaxihqui, hehbe quiquin hapobo man hihnon. Tenenixon heen Papa betan hen hihbojahi quescajaribiqui tah man tenenixon hehbetan hihbojayahihqui.

²² Nincacoinaibo honannon hihquish ta Dios Yoshin yohuanihqui. Hahan nincati pabinquiyahpaxon nea jan yohihi nincanahue.

4

Naihoh quehax betihihpaquetaibo

¹ Jaatian sca hen jisí bi nai janin xehqui xecabohanah quehpemehti. Hen nincamenoha joi sca tah hen nincaribhihipiqui, corneta rehue coshin hahcai quesca.

—Hinahihnaquihranhue. Janoxihquibo sca tah hen mia jismanoxihqui —hea jaquin.

² Jan yohihiya sca cahen heen yoshin hinahihnat. Hinahihnat jisí bi naihoh sca janoxon yonoti jai, quiquin jati. Hen jisí bi Papa Dios janotah, jahuen janoxon yonoti janin.

³ Jahuen jati cahen pehnene, jasper macan pashini hihqui quesca, cornalina macan joshini hihqui quesca. Jano jan hihquiton cahen xabahahtancahuauai jai, yoshin bahi quesca, esmeralda macan joshini pehnene hihqui quesca.

⁴ Jahuen quiquin jati mayahahtancahuauai cahen huetsa tsahotibo jaribibi, veinticuatro tsahot. Hahan tsahotaibo cahen joxo chopasahuehax tsahohahtancahuauai jai, jahuen yonoxonnicaahbo. Oro maitiyahpabo rahsi.

⁵ Jahuen jati coin janinhax cahen cana bacatan bacatanihcamahi. Terenhihqui, coshin bi res toshiti. Jaa bebon cahen siete johue xabati. Jaa siete johue ta Papan siete yonoti yoshinbo qui.

⁶ Hoque jahuen jati bebon rihbi cahen hian quesca jai, nexnani siri.

Jahuen jati tocan cahen chosco noyanica yoshin quescapahbo jai, jahuen quiquin jati mayahahtancahuauaibo yoshinbo. Bero sahuetaibohi, caibo bero cahen bebo quiri, caibo cahen hahchon quiri, hahan jisti berobo bochohi rahsi.

⁷ Bebo quiha yoshin cahen hino quescapah. Jaa hahchon sca cahen toro quescapah. Jaa chini sca cahen jonin bemananyahpa quesca. Jaton chini sca cahen chiqui noyahi quesca.

⁸ Seis pehiyahpabo rahsi ta jaa noyanica yoshinbo qui. Bemacanya bero sahuenon cahen chicho rihbi bero hichahi. Tantihaxma yohuanbahinahax yohuanshinacani:

Hihti shinanya xaba hihbo,
hihti shinanya xaba hihbo,
hihti shinanya xaba hihbo,
hihbobi res tah min qui
noquen Papa Dios.

Jatihibi hihbo,
rahma jacoinal,
neateman jahponi,
joyaxihqui tah min qui
hihcami.

⁹ Papa Dios qui jascari siripi yohuanacani, jaa hihti xabayahpa copi, hihti shinanyaahpa, hihti siri. Papa Dios queyoyamanox mananica copi jahuen chosco yoshin hahqui siripi yohuanaiya cahen jahuen veinticuatro yonoxonnicaahbo hahqui betihihpaqueti.

¹⁰ Jascari yohuanaiboa quiquin Hihbo qui betihihpaquecani. Raboxonen tisquihah-pauehax jaa bebon betihihpaquexon jaton oro maitibon mabiquihnxon jaa taracancanquin. Jaton maitibon janoxon:

¹¹ Hihcoini,
Mia tah min xaba hihbo qui, noquen Hihbon.
Hihti shinanyaahpa tah min qui,
Hihti coshi noquen Papa Dios.
Jatihibi tah min mian hahniqui.
Shinanxon res tah min Jahue hahniqui,
jatihibi sca janon
hahcanquin jaton maitibon taracanxon.

5

Carnero huestichin quehpenti hahtipahi quirica

¹ Hen jisribiha bi Papa Dios quiricayahpa qui, jahuen mecayahome queman jan xecohah. Jahuen quirica cahen chicho huisha janon ramiho huisha jaribibi. Huishaxon xehpoxon boipan besmicha quirica, siete boi toncon taxnahah.

² Hen jisí bi hihti coshi jahuen yonoti coshin bi res yohuani:

—¿Tsoan jaa quirica quehpenti hahtipahiquin? —¿Tsoan jahuen boi pasqueti hahtipahiquin? —hahqui.

³ Jan quenahah bi tsoanbi jaa quirica quehpenti hahtipahyamaquin. Naihoh jaibaanbi, main jaibaanbi, mai chicho jaibaanbi, tsoabi jaa quirica jisnica yamahi.

⁴ Tsoanbi jaa quirica quehpentimahiya tah hen huaoihquipiqui, tsoanbi jaa jisti yamahiya, huaoihscali, hicha.

⁵ —Huaoihyamahue. Judá baquebo hihxon ta Davidin xohtan noquen rahuibo namanjapauexon jaa boi pasqueton jahuen quirica quehpenti hahtipahiqui —huesti yononica-ton hea jaquin.

⁶ Jaatian hen jisí bi jaton tsahoti tocan huesti carnero nichi, nacoxon rehtehah quescapa. Jaa mayahahtancahuanaí cahen jaa yonoxonicahboya hoa chosco noyanica yoshinbo. Jaa carnero cahen siete machanyahpahi, siete beroyahparihbihi. Jahuen siete bero ta Papan siete yoshinbo qui, jatihibi mai janin raanti jahuen yoshinbo.

⁷ Papa qui caxon sca jan xecohi quirica jaa carneronen bihquin.

⁸ Jahuen quirica jan bichiya cahen hoa chosco noyanica yoshinbo raboxonen nichish jaa carnero qui betihipaqueti. Hoa veinticuatro yonoxonicahbo rihbi jascarih. Hahan chimati arpawayhpabo rahsi hihxon chimacanquin. Jaton oro tasonbo rihbi xecohax, raboxonen nihcani, hahan hininti jaton tason bochohi. Jaa hahan hininti cohini ta nincacoinaibaan joibo qui, Papa Dios yocacaibo.

⁹ Behua behna sca behuacani.

Mian tah min jaa quirica bihti hahtipahi.

Bihxon tah min quehpentihu.

Papa Dios bihxonquin tah min miin jimin jatihibi janinhahbo jonibo bilihniqui.

Jatihibi joiyahpabo, jatihibi huaca quiha, jatihibi mai quiha tah min jonibo bilihniqui, miin jimin copijaquin.

¹⁰ Min tah min jato janenihqui, Papan jihuetaħbo jaabo janon, jaa bebonxon yohuanxon-nicahbo jaahbo.

Mainxon ta jano jaibo yonoxonyaxihcаниhqui, Papa Dios hahxonquin
nihcani, behuahi.

¹¹ Henjisribiha bi tsama bi res Papan yonotibo sca jahuen quiquin jati mayahahtancahuani. Jaabo hichabiresax behuahi sca hean nincaquin. Papa betan jahuen noyanica yoshinbo naponbi hihnon, jahuen yonoxonicahbo rihbi jano hihnon, jaya mayahahtancahuanax Papan yonotibo behuahi. Topontimabiresi jaabo tsama bi res tsama.

¹² Naconihbo ta Papan carnero qui.

Hihti siri hihbo,

coshi hihbo,

jatihibi jahuabora hihbo,

honan hihbo,

yonotibo hihbo,

shinan hihbo,

xaba hihbo,

hahqui behuati hihbo siri

nihcani, coshin bi res.

¹³ Naihoh jai jatihibichin jato nincanon, main jai jatihibichin nincaribinon, mai chicho jai jatihibichin nincaribinon, quebíjistima hiaman cahibaán nincaribinon, jeneho cahibaán rihbi jatihxonbi nincacanquin. Nincacax:

Jahuen jati janinxon noque jihuemahi ta hihti siri qui,
jahuen carnero ta hihti siri qui.

Jaabo rabe ta shinan hihbo qui, xaba hihbo,
jatihibi yonoti hihbo.

Jascabi sca quiquin hihbo tah qui
nihcani, behuahibo nincacax.

¹⁴ Jaabo jascaraiya, hoa chosco noyanica yoshin sca:

—Jascari rahan —hihqui. Jaabo jascanon sca jahuen yonoxonicahbo raboxonen nichish quiquin Hihbo qui betihipaquecami.

6

Jahuen siete boi toncobo

¹ Jaatian hen jisí bi carneronen huesti boi tonco pasquescaquin, siete tonco pishca jai bi huesti pasquequin. Jaatian, terenhiihqui coshin corotai quesca sca jahuen noyanica yoshin huestichin quenahi hean nincaquin.

—Johue —hahquin.

² Jan quenahi quiri hen jisí bi cabacho joxoni jahui. Jaa cahtsahotai joni rihbi jai, piyahayahpa. Hapon maiti maimaha sca cahi caresscái, main jaibo namanjaquin hihbojanoxon.

³ Huetsa rihbi sca jahuen rabe sca boi tonco pishca jan pasquehiya cahen yonoti chinin jahuen noyanica quenahi sca hean nincaquin:

—Johue —hahquin.

⁴ Jan quenahah huetsa cabacho sca picoti, cabacho joshini sca. Main jihuetaibo rainyamahi rehtenani jihuescanon cahen joni huetsa betan rehtenanti shinan jato hinanon jaa cabacho cahtsahotai sca hahan joni rehteti machito hinanquin.

⁵ Jahuen quimisha jahuen boi tonco pishca sca jan pasquehiya cahen chinitai huetsa noyanica yoshiman quenahi hean nincarihbiquin.

—Johue —hahquin.

Hen jisí bi cabacho huisoni sca jahui. Jaa cahtsahotaiton hahan hihue toponti xecobenaquin.

⁶Jaa noyanica yoshinbo tocan yohuanai quesca sca jai:

—Trigo ta huesti neten teexon jaa neten piti res jonin canantihiqui. Huesti neten teebahinaxon ta quimisha neten cebada piti cananti qui. Xehatibo tah min tiromajatimahi, hahan pitijati xeni rihbi tiromajayamahue —hihqui.

⁷ Jahuen chosco jahuen boi tonco sca jan pasquehiya, chinitai huetsa noyanica yoshin yohuanscái:

—Johue —hahquin.

⁸ Hen jisí bi pehi quescapa yanconi cabacho sca jahui. Jaa cahtsahotai cahen mahua janeya. Mahuataibo coirannicahbo rihbi hahbetan becani. Sontarobaan jonibo rehtenon, pihan hihquish caibo mahuanon, nahuan pahen hihquish caibo mahuanon, mai meha yohinahbaan piha caibo mahuanon, main sca jato raanquin, hicha mahuatahabo. Quimisha joni cahnexon huesti mahuamaquin, quimisha cahnexon huesti mahuamaquin, jascajabonaxon jato mahuamaquin. Jatihibi jonibo toponpaquenon jaa pehi quescapa yancon cabacho cahtsahotai carneronen raanquin.

⁹ Jahuen pichca jahuen boi tonco jan pasquehiya sca cahen jisí bi jano Papa Dios janaxonti naman yamanicabo hichahi, Papan joi jeneyamahiton rehterasihibo. Cristo joi yohihiton rehterasihibo yamanicabo sca jai.

¹⁰Coshin yohuanai sca hean nincaquin:

—¿Jahuentiho basi pari min copiquin sca noque retehohbo copiyaxihquin, Quiquin Hihbon? Mian tah min sirijaquin shinanai, pontejaquin tah min hahcoinai. ¿Jahuentian min noque retehohbo casticanyaxihquin? —hahcanquin yocaquin.

¹¹Jato tari joxoni hinanpaquexon sca:

—Manátahnahue, mahbe teexonnicahbo pari retehahbo, maton huetsabo rihbi retehahbo, mato rehterasihi quescajaquin senenjahabo manátahnahue —jato jaquin.

¹² Hen jisí bi jahuen seis sca jahuen boi tonco pishca jan pasquehi. Jan quehpenaiya cahen mai coshin bi res mihuani, bari rihbi huirojaquecahinscái, chopá huisón beracoha quescapi. Hoxne rihbi joshinjaquecahinscái, jimi quescacahini joshini.

¹³Naihoh quehax cahen huishi rihbi reocohpaquetax main paqueti, jihui bimibo nihue xayanan reocohticamahi.

¹⁴ Nai rihbi sebibahinah yamascai, non papira sebibahinahcamahi. Main rihbi cahen jatihibi mahchi xequecahuani, quebíjistima hiaman jai mai toncobo rihbi hihcahuani, jano jan tsahopahoni tsahoyamascái.

¹⁵ Mai mehabo quiquin hapobo betan jaton sontaro hapobo jonetí. Patorobo, coshi jonibo, patoro teexonaibo, patorojomabo, jaabo jatihibi jonecani. Mai quinio hihcocahincáni, macan mahchi janin quexba janin hihquicahinax jonecani.

¹⁶—Noque qui paquéhue, mahchin. Noque mahpohue, macaman. Noque qui paquéhue. Noque mahpohue. Quiquin Hihboxon Díosen noque jisyamascán noque mahpohue. Jahuen carneronen noque sinajayamascán noque mahponahue, mananbon.

¹⁷Sinaxon ta noque casticanscái. ¿Tsoan jascapa tenetihiquin? —hihcani.

7

Israeli baquebo honantijahibo

¹ Jaa pecaho sca hen jisí bi chosco yonoti jai, Papan yonotibo. Cahchinancahini cahibo. Huetsa cahen reboqui cahi, huetsa cahen chiponqui, huetsa cahen cahchihi, huetsa cahen ramíhi. Jano nihxon sca jahuenbihax nihue joyamascán nihue pantecanquin. Hian janin xoó hihyamascán, main xoó hihyamascán, nihi rihbi xoópan xayanyamascán nihue pantecanquin.

² Maiboya quebíjistima hianbo tiromajati carneronen jato yohihah cahen maiya hianbo tiromajati jaabaan hahtipahquin. Jaatian hen jisí bi bari cainai quirihax huetsa yonoti sca sanarenenex jaonahi. Jayaxon huishaxon honantijati xecobenahax, jahuen hahbe chosco yonotibaan nincanon coshin bi res nincati yohuaní:

³—Jaton bemanan qui non noquen Papa Díosen jonibo honantijanón caman mai tiromajayamanahue; hianbo, nihi rihbi tiromajayamapariquin —hahquin.

⁴ Jaatian hen nincacah bi jahuentihi non honantijahin hihxon topovah ca ciento cuarenta y cuatro mil honantiyahpabo jai, Israeli baque tihibichina doce mil jonibo.

⁵ Judábo cahen doce mil honantiyahpabo. Rubenbo cahen doce mil, Gadabo cahen doce mil,

⁶ Aserbo cahen doce mil, Neftalibo cahen doce mil, Manasésbo cahen doce mil,

⁷ Simeonbo cahen doce mil, Levíbo cahen doce mil, Isacarabo cahen doce mil,

⁸ Zabulonbo cahen doce mil, Josébo cahen doce mil, Benjaminbo cahen doce mil.

Joxo chopayahpabo

⁹ Toponaibó nincaxon hen jisí bi tsamá jonibo sca jai, hihti caibo, tsoan toponquin queyonihma. Jatihibi mai mehabo, jatihibi jonibaanahbo, jatihibi huean mehabo, jatihibi joiyahpabo. Noquen Papa Dios bebon nichibo sca, jahuen carnero bebon nichibo. Joxo chopá sahuehibo rahsi. Jepe pehi xecohibó rahsi.

¹⁰ Coshin bi res quenacani:

Jatihibi hihbohí ta noque jihuemanicah qui,
jahuen carnero rihbi ta noque jihuemanicah qui
hihcani.

¹¹ Papan yonotibo sca jahuex, Papa Dios, jahuen yonoxonnicahbo, jahuen noyanica yoshinbo, hahqui mayahahtancahuanxon raboxonen nichish jahuen yonotibo jatihibi Papa Dios qui betihihpaquecani.

¹² Betihihpaquetax:

Hihcoini. Jascabihi hihti shinanyahpa tah min qui, Papan.

Xaba Hihbo tah min qui, Shinan Hihbo.

Noque quiquin hahxonnicá. Siri shinanyahpa.

Coshi shinanyahpa.

Jatihibi Hihbo tah min qui, jascabihi, queyotimahi.

Jascari rahan

hihcani.

¹³ Jascaraiboya huesti yonoxonnicanton sca hea yocauin:

—¿Nea joxo chopayahpabo tsoabo hin? ¿Jahuerahnahhbo hin?

¹⁴ —Mian caya tah min honanai, hapon —hahquin hean.

—Nea ta hihti tiromabo netebo huinoquihrami jahuibó qui. Jaton chopá Papan carneron jimin chocaxon joxojahibó ta qui.

¹⁵ Jaa copi ta Papa Dios bebon nihti hahtipahcanihqui. Jahuen xobohoxon ta jaabaan jaa yocati hahtipahiqui, bariyahpan, yame rihbi. Papa Diosen ta jato jihuequihnyaxihqui.

¹⁶ Jahuabi ta pitin pahiyamascanoxihcаниhqui. Xehatinin pahiyamascai. Bari teneyamascaquin. Jahuabi xana teneyamascaquin.

¹⁷ Janoxon Papan yonohi janinxon ta jahuen carneronen jato coirannoixihqui. Hahan jihueta noabo janin xehahahbo ta hionox manatihqui. Papan jato hahxonah ta jahuabi benayamascanoxihcаниhqui.

8

Jahuen siete tonco pasquehiya hinintiyahpa jahui

¹ Jahuen siete jahuen boi tonco pishca carneronen pasquehiya cahen naihoh jatihibi netecahinscái. Poyan tihixonpa jahua nescapi.

² Hen jisí bi Papa bebon nichí jahuen siete yonotibo corneta rehue Papan hinanpaquequin, huesti huestibó jato hinanpaquequin, yonoti tihibichina huesti rehue.

³ Papa Dios bebonbi jano racanxonti jai, oro bi res. Hininjati hahqui nanenoxon oro quenti pishca xecobenahi huetsa jahuen yonoti sca jahuex, jano racanxonti patax nihreneni. Jahuen baquebo rahsichin Papa yocati joiboya jahuen hininti cohinya mesconon cahen hicha hininti jaa yonoti Papan hinanquin. Quetejaxon jano racanah cahen jaton joiboya jahuen hininti cohinya mescoti.

⁴ Papa bebonxon jahuen quenti qui nanexon jan mapojaha cahen jaton joiya cohinhinatí.

⁵ Jahuen quenti pishca bihxon sca jano racanxonti quiha chihi bihxon quenti qui bochojaxon, naihohxon Papan yonotinin mai qui chicopaquequin. Jan potahiya cahen terenihqui, coshin coroti, cana bacahi, mai miuhani.

Jaton rehue hahcaibo

⁶ Jahuen siete rehueyahpa yonotibaan sca jaton rehue hahnoxon sanahihnxon toconcanquin.

⁷ Bebohihton pari jahuen rehue hahresscaquin. Jan hahcaya cahen naihoh quehax matsu toncobaan mai rahtsaquin. Jimiya chihi rihbi mescohah reocohti, main paqueti.

Jahan cahen hicha mai mapohi, quimisha mai tihibichina rabe mai banenon huesti mai mapohi tsistecahini. Nihi jascarihbibi, texe banenon texe cohoti. Jatihibi huasi paxahax cohocabini.

⁸ Huetsan jahuen rehue hahresscaquin. Jan hahcaya cahen mahchi tihopa chihi tonco quebijistima hian qui paqueti. Quebijistima hian qui paquetaiya cahen jene jimicahinscrai. Rabe hian siri banenon huestiboi jimiyahpa hiancanascai.

⁹ Jascahiya cahen jaa jeneho cahi yapabo muhati. Jano cahi nontibo rihbi jene meran cahax queyocahini. Rabe banenon huetsa hihquihi, rabe banenon huetsa hihquihi, jascacanahi hicha queyoti. Yapa jascarihbibi.

¹⁰ Huetsan sca jahuen rehue hahquin. Jan hahcaya cahen naihoh quehax hihihosu huishi cohocabani huacabo qui paqueti. Huetsa janin rabe texpa banenon huetsa qui paqueti, huetsa janin rabe banenon huetsa qui paqueti, huetsa janin jascarihbibi, huetsa janin jascarihbibi, jatihibi janin. Texpabo jascarihbibi.

¹¹ Jaa huishin Jane cahen mocani. Hahqui huishi paquetai cahen jene mocanibohu rahsihi. Jaton jene mocascaiya cahen janu jihuetaibo hicha muhati. Jaa jene xehahax muhati.

¹² Huetsan sca jahuen rehue hahquin, jahuen chosco sca. Jan hahcaya cahen berishquiha ramihoh bari nocascai. Ramihoh rabe xabanon ramihohque huesti nocahi. Hoxne rihbi ramihoh rabe siriparinon ramihohque huesti berishquiha nocahi. Huishiboi jascarihbibi, caibo xabanon caibo rishquihih nocahi. Non topoponpaquexon quimisha huishi toponai tihibichina huesti nocahi. Texe neten bari xabanon texe xabayamahi. Yame jascarihbibi, texe yame hoxneya huishi janon, texe yame jayajoma.

¹³ Jaatian sca hen jisi bi noque huinobohani huesti chiquihuan noyah. Coshin bi res queocanahi noyah:

—Hahrai. Hahrai. Hahrai. Quimishachin pari ta jaton rehue hahnoxihqui. Main jihuetaibo ta hihti tiromabu sca huinonoxihi qui —hihcanahi cahi, chanahi.

9

¹ Huetsa yonotinin sca jahuen rehue hahquin, jahuen pichca sca. Jahuen rehue jan hahcaya cahen naihoh quehax huesti huishi paquetai quescapah hean jisquin. Nemini mai quinihuan jai bi xehpotiyahpa. Jaa huishi cahen hahan quehpenti hinanah, jaa xehpoti quehpenscaquin.

² Jaan quehpentah cahen quinihoh quehax cohin potohi, boyomahhuan janinhax cohin Cainihcamahi. Cohiman mahpohah bari huisojaquecahinscrai. Huee rihbi huisojaquecahinscrai.

³ Cohin mehax picotax sca champobo michabahcanascai. Nibo pahenibohu hihqui quesvari paheyahpa champobo, Papan jato jaa pahe hinanah.

⁴ —Huasibo tiromajayamanahue, champon. Pehiyahpabo tiromajayamanahue, jahuabi nihi tiromajayamaquin. Papan honantijahahmabo rahsi tah man hahtih, jaton bemanan janin jahuen honanti yamahibo rahsi hahnahue.

⁵ Jato rehteti tah hem mato hinanyamahi. Pichca hoxne jaa hisin tenehahbo tah hem mato jatihoxne hisinjati mato hinanah. Jato hahtannahue —hahcá, jonibo hahqui became. Hahca, nibon hahca quescapi hisincani.

⁶ Jaa champion hahca ta Hahrai, teneyama ta jai, hea muhuamahue hihiyaxihi canihqui. Muhati queenxon bi ta hahtipahyamayaxihi canihqui. Hisin tenecasquimahax ta hihti muhuacatsihquish bi muhuayamayaxihi canihqui.

⁷ Rehtenani canoxon sontarobaan jaton cabacho bepaxti sahuemaxon xohpaxti sahuemaha quescapahbo ta jaa champobo qui. Oro maitiyahpabo quescapahbo. Jonin bemananya quescapahbo.

⁸ Haibaan booyabo, boo chayiabo. Hino xetaya quescapahbo.

⁹ Yami xohpaxti quescapa sahuehivo. Noyahiboya cahen cabachonen ninihah tsama bi res sontarobo coshin bi res jaton taramehtinin bocanihcamahi coshin bi res corocanahi, jaton pehin payanah. Sontarobo rehtenani cahicamacanahi coro coroti.

¹⁰ Jaton jina cahen nibon jina quescapahbo, chahchitiyahpabo. Hahan chahchihah cahen pichca hoxne hisintiyahpa.

¹¹ Jaton quiquin hapo cahen jaa quinihuan chicho quehax picotai yoshin. Abadon cahen jahuen Jane, hebreobaan join tiromajanica hihcatsihqui. Griegobaan join cahen Apolion, jahuen Jane.

¹² Jano ta chiqui quenatah hahrai huesti queyóscaini, huetsa hahrai jahuen rabe sca jaresscanon.

¹³ Huetsa yonotinin sca jahuen rehue hahcaya cahen Papan racanxonti patax jahuen yonoti quenatai hean nincaquin:

¹⁴ —Jaton Eufrates janeya paro janin nexá jai yoshinbo pecascanahue jatihibi canon, chosco —jahuen siete jahuen hahbe rehueyahpa jaquin.

¹⁵ Jaa baritian, jaa hoxnepan, jaa neten, jaa horabi cayaxahnon mequeni jahuen chosco yoshin sca bocani, pecahahbo. Boxon jatihibi jonibo toponxon quimisha toponxon tihibi huesti rehtexon rabe texejacanquin. Rabe jihu enon huesti mahuati, rabe jihu enon huesti mahuati, jascacanah.

¹⁶ Cabachon cahi sontarobo toponxon yohihah cahen doscientos millones jai hean nincacuin. Toponaiboa nincacah jatih.

¹⁷ Hen jisi bi cabacho cahtsahotaibo. Cabacho tihibi jaton hihbo hihqui quesvari, chihiyahpa xohpaxtiyahpabo rahsi, yanconibo xohpaxtiyahpabo, polvora coshin mapohi quescapahbo xohpaxtibo. Cabachobo cahen hino mapoyabo. Jaton jana janinhax chihi cainihcama jaibo. Cohin pototani pototani. Toohahti toohihquicamahibo.

¹⁸ Jaton pahe ta quimisha qui. Huetsa cahen chihi, huetsa cahen cohin, huetsa cahen pishiti, jaton jana janinhax chihitan chihitanai pahebo. Jaa quimisha pahan tsama jonibo rehtecanquin, huesti rehtexon tihibi rabe texejabonahibo.

¹⁹ Jaa cabachon pahe ta jaton jana janin qui, jaton jina janin rihbi. Jaton jina cahen rono quescapahbo, ronon mapoya jinayatibo hahan piha joni mahuanon.

²⁰ Jaton pahan rehtequin bi texejahibaan bi jascabi nincayosmabo jonibo jai. Jaton mequemanbi jaton diosbo hahcanquin, caibo oro, caibo plata, caibo bronce, caibo macan, caibo jihui. Jisti hahtipahyamahibo, nincati hahtipahyamahibo, nihti hahtipahyamahibo. Jascapahbo diosbo hahxon raboxonen tisquihahpaquexon jato yocacanquin. Jascapahbo-jaxon jaton shinan ponteyamacanquin.

²¹ Jonibo rehtexon bi jaton shinan ponteyamacanquin. Yobe jaxon, tsini jaxon, yometso jaxon, jascapahboxon bi jaton shinan ponteyamacanquin.

10

Quirica pishca xecohijoni

¹ Hen jisi bi huetsa sca Papan yonoti naihoh quehax botopaqet, hihi coshi jahuen yonoti. Nai cohiman rahcotax bototi. Jahuen mapo machibi yoshin bahi joyotihcamahi. Jahuen bemanan cahen bari quescapai. Jahuen tahe cahen chihi perehinhnatai quescapi.

² Jan xecohi cahen quirica pishca, quehpenah sca. Bototax jahuen mecayahoh taken quebfistima hian benichi, memaho taken main nichí.

³ Nichish res sca coshin bi res quenati, hinubo sinatax coshin queoti quescari. Jan quenataiya, terenhihscai siete coti terenhihqui.

⁴ Terenhihqui tantiscaia hen huishacatsihqui bi:

—Jaa siete coti terenhihqui yohuanai huishayamahue. Tsoabi jaa yohiyamahue —naihoh quehax yohuanaiton hea jaquin.

⁵ Jeneya mai benichi yonotinin sca jahuen mecayahoh mequen bochiquiri sanahihnxion:

⁶ —Jahuentianbi queyoyamanox mananicaxon ta naibo jatihibi naijanicahxon, maiyabi jano jai jatihibi jonijanicahxon, hianbo jatihibi jano jaibo jonijanicahxon Papan yohicoini-hqui. Hashoan ta basitima sca jaiqui.

⁷ Jahuen siete jahuen yonotinin ta jahuen rehue hahresscanoxihqui qui. Jahuen rehue jan hahmenohiya ta Papan joi yohinicabaan yohini quescra sca jaresscatihi qui, Papan jato yohini jayaxihquibo jaresscanon —hahquin jeneya mai benichiton.

⁸ Hean nincacah naihoh quehax yohuanrihbili:

—Hoa jeneya mai benichi yonotinin xecohi bihtanhue, quehpenah quirica pishca —hea jaquin.

⁹ Caxon sca:

—Miin quirica pishca hea hinanhue —hean jaa yonoti jaquin.

—Bihhue. Bihxon piquin queyobahinhue. Miin poco janin cachapi hihnon bi ta min piha hilta batatihiqui, bonajene tiho batapi —hahxon jahuen quirica pishca hea hinanquin.

¹⁰ Hinanah, bihxon pihá bi hihcoini bonajene tiho batapi. Piquin queyobahinhue sca cahen heen poco janin cachascai.

¹¹ —Hicha jonibo, huetsa mai mehabo, huetsa joiyahpabo, jaton quiquin hapoboyabi tah min hicha jonibo pari jato yohiti jai —hea jaquin.

11

Papan joi yohinica rabe

¹ Hahan hen toponnon hahan toponti jihui taxo quescapa hea hinanxon sca:

—Jahuentihopa hin hihxon Papan xobo topontanhue. Jahuen jano racanxontiyabi topontanhue, Papahon shinanax jaho tsinquitai boyabi.

² Jaabo topónxon bi jahuen xobo jemanhití topónyamatanhue. Jaa ta cuarenta y dos hoxne pari nahuabaan jama jamayaxihqui qui, Papan jato hinanah. Jerusalen jemarihbi ta jama jamayaxihcanihqui, jato hinanah.

³ Jaatian tah hen heen joi yohinica rabe raanyaxihqui. Hean raanah ta hahan benáti chopá sahuexon mil doscientos sesenta neten heen joi jato nincamayaxihqui qui, rabebichin.

⁴ Jaabo rabe ta mai Hihbo bebon nichi olivo jihui rabe qui, Hihbo bebon tsahona johue rabe ta jaabo qui.

⁵ Tiromabaan jato tiromajacatsihquiton ta jaton jana janinhax chihitan chihitanxon jaton rahuibo queyobahinyaxihqui qui. Jato tiromajati shinanaibo jatihibi ta jascajaquin queyoyaxihqui qui, chihin.

⁶ Hoi paquetimajati coshi ta Papan jato hinanyaxihqui qui, jaabaan yocacah hoi paquemascanon, Papan joi yohiquin queyonon caman. Texpaboya hianbo rihbi jemicahin scanon ta jascajati coshi jato hinanyaxihqui qui. Queenxon tian res mesco pahen mai rishquinon mesco coshi jato hinanquin.

⁷ Rabebichin Papan joi yohiquin queyoscaya sca ta quinihuán janinhax picotai yohina jato betan rehtenanyaxihqui qui. Jato betan rehtenanxon ta jato rehteyaxihqui qui, rabebi. Jato namanjaxon rehtequin.

⁸ Noquen hani jema janinxon jato rehtexon ta bahinbi jaton yora janibi minchinon tsahonmayamayaxihqui qui. Jaa jema ta janoxon noquen Hihbo rehteni jema qui, Sodoma hahcaibo jema, caibaan cahen Egipto hahquin, tiromaboyahpa copi jascajaquin.

⁹ Jatihibi mai mehabaan ta jaton yora racatai jisyaxihcanihqui, jatihibi nahuabaan, jatihibi joiyahpabaan, jatihibi texpa janin jihuetaibaan jato quisquin, reteha racatai rabe. Quimisha nete racabahinahax racashinahax jahuen chosco sca barin manan tsacanon caman jano racanon ta tsoabi jato tsahonmayamayaxihqui qui.

¹⁰ Jaton yora racataijisish ta mai mehabo coincoinyaxihqui qui, jenimahi. Jaa copi ta beixanboa piti joni huetsa hinanyaxihcanihqui. Jaa joi yohinica rabechin jato tiromajapahonish bi muhuascai copi ta jascajaquin joni huetsa piquihinyaxihcanihqui, jenimaxon.

¹¹ Hen jisí bi cahen jaton chosco neten barin manan tsacascaiya sca jaton yoshin Papan hahquirihi hinanxon Huenínahue jato jaah huenicahuani, rabebi. Nihresscaiton merahax hihti raquepahnhananax tastahihcani, jaa jisibo jatihibi.

¹² Bochiquihax yohuanai sca nincacanquin, coshin bi res yohuanai joi:

—Neno hinahihnaquihrannahue —jato jaah naihoh rabebi cahi. Nai cohiman cahiton jaton rahuibaan namanxon jisnon bi naihoh bocani.

¹³ Jaabo rabe cahiya cahen coshin bi res mai mihuani. Mai miuhanah cahen jaa jema janin xayanah hicha xobo paqueti. Jaton xobonbi jato bishtaxah cahen siete mil jonibo muhuati. Texe jatihibi hihti raqueti. Naihoh queha Diosen ta noque casticaniqui, hihcani raquetax.

¹⁴ Janobi ta jahuen rabe sca jahuen hahrai queyóscaqui. Huesti sca pishini. Jaa sca ta jahuiqui.

Jahuen siete jahuen rehue

¹⁵ Huetsa yonotinin sca jahuen rehue hahquin, jahuen siete sca. Jan hahcaiya, coshin bi res naihoh quehax yohuanai jai.

Noquen Hihbaan jihuematí nete ta nocoscáqui,
jahuen baque Cristo betan jahuen jihuetaibó jan jihuemascanon.
Queyoyamanox manatahbo ta jascabijaquin jato jihuemascatihi qui
hihqui yohuani.

¹⁶ Jascari coshin yohuana joi jaiya cahen Papa Dios bebon tsahoxon yonoxonai jahuen veinticuatro yonoxonnicahbo raboxonen nichish betíhihpaequecani, Papa Dios quiri jisish jaa Nete Hihbo copi jaa naman betihihpaequecani.

¹⁷ Papan, noquen Hihbon,

Mia tah min jatihibi hihbohi,

Neateman japahonish bi tah min jascabibi jai.

Hahxon tah min noque jai, Hihbon.

Miin hani coshiyaxon tah min jatihibi hihbojahi.

¹⁸ Noquen nahuabo sina sinatai bi tah min jato sinajaxon muhuanihbo casticanisci.

Mia hahxonnicabo tah min mianbo sca copiquin hahxoncoinscái.

Miin joi yohinicabo,

miin jonibo,

mia nincacoinnicabo,

haniboya hanitahmabo
tah min jato hahxoncoinscrai.

Mai tiromajanicabo rihbi tah min tiromajascai
hahcanquin.

¹⁹ Hen jisí bi noquen Papan naihoh jati quehpemehscai, janibi sca jahuen bohnanti jano racanon, jahuen jihuetahbó hahxontijaxon huishani joi jaa bohnanti chicho jan bexojani. Jaatian cana bacatan bacatanah terenhihqui. Coshin bi res toshi toshiti. Hani matsu toncobaan rihbi mai tsacaquin.

12

Haibaan baque xehancatsihqui capepahnhan

¹ Hen jisí bi naihoh quehax sca haibo sanareneni, jaa jisxon honanti, non jahueja Papan jaiquin hihxon non honannon. Bari xabapan rahcotax hoxne jamacax nichi. Doce huishiyahpa maiti maihax.

² Tohoyahax baque bihcatsihquish huaohihscrai, camicasquimahax hisini.

³ Hoque sca hen jisí bi naihoh huetsa hahan honanti jaribscrai, capepahhuan sca. Chihiyahpa quescra capepahhuan joshini. Siete mapoyahpa, chonca machanyahpa. Quiquin hapon maiti maihi, mapo tihbi jai jahuen maiti.

⁴ Jahuen jina huinquin huinquin hahxon nai behuasxon hicha huishi potaquin main paquenon. Rabe janin huishi janon huetsanco huishi yamascai, jan nai behuasah. Haibaan jahuen baque bihcatsihqui bi jaa bebonbi capepahhuan nichi manati, cainscaiton jahuen baque pihannoxon.

⁵ Baquexo cainah bi bebo baque, jatihibi nahuabaan quiquin hapo hihxon jato cahnexonma yono yonoyaxihqui bebo baque pishca. Cainaiton bi bochiquixon Papan bihinihniquin, Papa janin hihnon, janoxon jan yonohi janinbi.

⁶ Jahuen baquexo cain sca jaax, haibo jabati, jano tsoa yamahiton cahi nihi naman joneti. Jano jati ta Papan jaa bexojaxonishqui, mil doscientos sesenta neten jano pimaxon coiranalabo.

⁷ Naihoh hen jisribiha bi rehtenannanscacani. Papan quiquin yonoti Miguel jahuen hahbe yonotiboya jahuem jaa capepahhuan betan rehtenani. Jahuen hahbe yoshinboyahpahax capepahhuan coshin rehtenani, Miguelminabo betan.

⁸ Miguelnin coshi betan capepahhuan senenyamahi. Miguelnin jabamaha bi naihoh jahuenbi catimahi.

⁹ Miguelnin potahah main sca jahuen hahbe yoshinbo betan jaa capepahhuan paqueti. Jahuen Jane huetsa cahen rono xeni, huetsa jahuen Jane cahen diablo, huetsa jahuen Jane cahen Satanás, main jihuetaibo rahsi parannica.

¹⁰ Naihoh sca coshin yohuanai hean nincacuin:

—Papan ta noque hihti hahxonscaiqui. Jahuen coshi jismaxon ta jahuen jihuetahbó jihuemascanoxihqui. Jahuen baque Cristo betan ta jahuen jihuetahbó jihuemascanoxihqui. Noquen huetsabo cahenica ta potascaique, Papa bebonxon noquen huetsabo cahebabinaxon cahechinahi yoshin.

¹¹ Noquen carneronen Jimín ta jahuen Jonibaan jaa yoshin namanjahiqui, Papan joi yohixon rihbi jaa namanjaquin. Mahuanoxon caman ta Papan joi jeneyamacannishqui.

¹² Jaa copi jenimanahue naibon. Jenimanahue naihoh quehabon. Huaonihnahue maibon, hianbon. Mato qui ta tiroma yoshin paquetihqui. Sina sina ta jaiqui. Jaa casticanti nea pishca jaonahiqui honanax ta sinatihqui —hihqui.

¹³ Main potahah bochiqui jenquetsahax catima sca jaax, jaa baquexon mama sca benahi cahi, jaa sca rehtecatsihquin.

¹⁴ Jaan rehteyamanon hihxon chiquihhuan pehi rabe hinanscacanquin. Pehiyahpa sca jaax noyacahini cahax Papan jaa bexojaxonai janin cahi. Tiroma yoshiman merayamascanon jano sca coirancanquin. Quimisha bari huinotax huetsa bari pochinicon sca noconon caman piti hinancanquin.

¹⁵ Jaa haibo rehtecatsihquin cahen jaa yoshin janan janani, jahuen jana janinhax jene bahihax huacacahinax haibo quiribahihi. Haiboya jene tejabahti canon hihquish jascari.

¹⁶ Janan jananxon tiroma yoshiman potahi jene haibo quiribahihi bi nocoyamahi. Nocoti pishinai bi mai sca quehpemehtanxon jaa huaca xehaque. Main jascajaquin yanapanah cahen haibo muhuayamahi.

¹⁷ Haibo qui tiroma yoshin hashoanina sinatax haibaan baque texebo betan sca rehtenani cahi. Papan joi nincacoinaibo betan rehtenani, Jesus joi bihcoinaibo betan rehtenani cahi, jato queyocatsihqui.

¹⁸ Cahax, quebijistima hian quexa sca nihreneni.

13

Yoshin yohina rabe

¹ Hen jisí bi quebíjistima hian mehax yohina huesti mapeti, siete mapoyahpa, chonca machanyahpa. Jahuen machan janin chonca quiquin hapon maiti jai, machan tihibi maiti jai. Jahuen mapo qui huishá cahen janebo jai, Papa Diosen jistahihmah Janebo.

² Jahuen yora cahen hahua hino quescapah. Jahuen tahe cahen xahe tahe quescapah. Jahuen jana cahen hinon jana quescapah.

—Heen coshi tah hen mia hinanai, heen yonotibo rihbi mia hinanxon tah hen mia yohihi, min queenai quescsa sca jahue jonibo hihbojaquin —capepahhuan hino jaquin.

³ Jaatian hinon mapo huesti sca tsehueyahpa sca jai, hahan muhati tsehueyahpa. Hahan muhatihi bi rohahi. Rohahi jisish cahen jatihibi mai mehabo rahtexon hahqui sca jaton shinan camacanquin.

⁴ Jahuen coshi jan hino hinanai copi sca raboxonen nichish capepahhuan qui jonibo betihihpaqueti, jaa sca jaton dios quen. Hino qui jascarihbican. Tsoa jaa hino quescapah quin, tsoan jaa teneti hahtipahquin hihquish hahqui betihihpaquecami.

⁵ Tiroma yoshiman yohuanmaha sca hihti tiromabo hino yohuanscái. Hanibo yohuanbo. Cuarenta y dos hoxne jan jascanon cahen tiroma yoshiman jahuen coshi hinanquin.

⁶ Papa Dios qui tiromahi yohuani, Papan xobo qui tiromahi yohuanrihbibi, naihoh jihuetaibo qui tiromahi yohuanrihbibi.

⁷ Tiroma yoshiman coshi hinanah sca Papan baquebo betan rehtenanxon jato rehtescaquin. Jascajahan jatihibi mai mehabo, jatihibi texpa janinhahbo, jatihibi joiyahpabo, jatihibi jonibo, jatihibi main jihuetaibaan quiquin hapo sca hihqui, jaa hino.

⁸ Hahqui betihihpaquenoxon cahen jatihibi main jihuetaibo raboxonen nihpaqueyaxi-hqui, Papan baquen quirica janin jaton Jane huishayamahibro rahsi. Jahuen baquen quirica janin jaton Jane huishá jaibo ta jihueticabo qui. Papan jihuetaibbo ta jaa hino qui betihihpaqueyamayaxihqui, capepahhuan qui betihihpaqueyamarihbibi. Naiyahpa mai jariyamahi bi ta carnero rehtequin hahcajaquin retehahbo jahuen baque muhayaxi-hqui Papan honannishqui, noquen hohcha copi hihqui bi.

⁹ Hahan nincati pabinquiyahpaxon nincanahue.

¹⁰ Sipo xoboho tsahotibo ta sipo xoboho Papan tsahonyaxihqui qui. Nacoxon rehtetibo ta nacoxon Papan rehteyaxihqui qui. Jaa honanxon ta Papan baquebaan teneti hahtipahqui, nincacoinquin jeneyamaquin.

¹¹ Hen jisí bi mai chicho quehax sca huetsa yohina caini. Rabe machanyahpa yohinah, chaxo machan quescapah. Jan yohuanaiya cahen capepahhuan yohuanai quescapi.

¹² Hiaman meha hinon jascahue hahcá, jaan rihbi sca jahuen coshin hahquin, hiaman meha hino hahxonquin. Hiaman meha hino qui betihihpaquenahue hahquin cahen jatihibi mai janin jihuetaibo raboxonen nihti jaan yohiquin. Mahua tsehueyahpahax bi rohahi hino qui betihihpaquenahue jato jaquin.

¹³ Jato nincamanoxon jahuen coshin jaan hahquin, jato rahtequin. Jaton jisnon bi cahen naihoh quehax chihi paquenon jaan paquequin.

¹⁴ Jahuen hahbe yohinanen jascajahnue hahcá, jahan rahtetibojaxon main jihuetaibo jaan paranquin. Jato paranxon:

—Hiaman meha hino quescapahbo santojanahue, rerahah bi jihuetai yohinahbojaquin —jato jaquin.

¹⁵ Jascapah yohina santo yohuanscanon cahen jaan jato yoshin hinanquin, Jascajahnue tiroma yoshiman jaah. Yohuanxon cahen joni rehteti jaton santobaan jato yohiquin.

—Raboxonen nichish hino santo qui betihihpaqueyamahibro jatihibi rehtenahue —jato janon santoba yohuanmaquin, mai meha yohinahnen.

¹⁶ Jascajaxon jonibo honantijati jato yohiquin. Jatihibi jonibo honantijahnue, hanitahmaboya hanibo, coriquiyahpaboya jahuaborabojomaboa, patrojomaboya patrooy-ahpaboa, jatihibi jonibo mequen qui honantijayamaxon bemanan qui honantijahnue hahquin.

¹⁷ Jaa honantijomaxon cahen maroti hahtipahyamascacanquin. Jayajomaxon maromatih hahtipahyamascacanquin. Honantijaquin cahen jaa hinon Jane huishacanquin, jaayahpabonon. Jahuen Jane huishayamaxon cahen jahuen numero sca huishacanquin, caibo mequen qui, caibo cahen bemanan qui.

¹⁸ Honanquin sirijanahue. Shinanxon jaa hinon numero toponnahue. Jonin numero tah qui, seiscientos sesenta y seis.

14*144,000 behuahibo*

¹ Hen hahquirihbi jisí bi Papan mahchi janin jahuen baque nichí. Hahbetan ciento cuarenta y cuatro mil jonibo jano nichí, jaton bemanan qui carneronen jane huisha jaibo rahsi, jahuen Papan jane rihbi jaton bemanan qui huishá.

² Naihoh quehax yohuanai sca hean nincaquin, coshin bi res hani join yohuani. Hicha jene tejabahti paquetihcamahi hean nincaquin. Coshin terenhihqui quescapi. Hichaxon jaton chimati chimahibo quescapi, siri bi res.

³ Behua behna behuahibo hean nincaquin, Papa Dios bebon nichish behuahibo, jahuen chosco noyanca yoshin bebon nichish, jahuen yonoxonnicahbo bebon nichish behuahibo. Jaabo behuahiba tsoabi haxeti hahtipahyamahiqui, jano jai ciento cuarenta y cuatro mil jonibo res jaa behua hexenicabo. Jaabo ta maroquin hahcajaquin Papan bichiqui, jahuen baque copi jato bihquin, main jihuetaibo.

⁴ Jaabo ta haiboya rishtayamahibo qui, haibo honanyamahibo rahsi. Jano carneronen jato hiohi janin canicahbo rahsi. Mai mehabo tocan jihuetaibo ta jahuen jimin copijaquin Papan baquen jato bihnishqui, Papanahbo sca jaábo, carneronahbo jaábo.

⁵ Quesayosmabo ta qui, rishtajomabo.

Quimisha yonotibo yohuanai

⁶ Bejisihinxon hen jisí bi huetsa yonoti noyahí huinobohani cahi. Main jihuetaibo yohihi cahi, jatihibi mai mehabo, jatihibi texpa quehabo, jatihibi joiyahpabo, jatihibi nahuabo yohihi cahi, jatihibi tian yohiti joi siri jato yohihi cahi.

⁷ Cahi coshin bi res chanicanahi:

—Papa Dios qui raquenahue. Hohchayahpabo ta casticanscainqui. Jaa copi Mian tah min pontejaquin hahcai Papan, hahnahue. Jaan ta naibo hahnishqui. Maibo, hianbo, texpabo, jaan ta jatihibi janishqui. Jatihibi hahnica huesti qui raboxonen nichish betihihpae-nahue —hihqui yohuancanahi cahi.

⁸ Huetsa yonoti sca hahchon cahi, yohuancanahi cahi:

—Babilonia jema ta paquescainqui. Paque ta Babilonia jaiqui. Hani jema ta poxotihqui. Haibo tsinixon jatihibi mai mehabo hahmaxon ta jahuen hohcha Babilonianen jato hinanpahonishqui —hihqui yohuancanahi.

⁹ Huetsa yonoti sca jaabo rabe chibani cahi coshin yohuancanahi:

—Jaa yohina yocacaibo, jahuen santo yocacaibo, jahuen honanti jaton bemanan qui jaibo, jano hihiyamahibo jaton mequen qui jaa jaibo.

¹⁰ Jascapahbaan ta Papan mocani xehati xehanolixhqui, sina sinaxon huehaxon jahuen hahan casticanti tason qui bochojaxon ta jaan jato xehamaquin texejamayamanox-ihqui qui. Carneronen jisnon bi, Papan yonotibaan jisnonbi rihbi ta perehinhnatai chihi qui jato potahah hisin tenenoxihcanihqui.

¹¹ Jaabaan tenehi ta jascabi sca cohin potohihnatayaxihqui, queyóyamahi. Tenebahin-naxon teneshinahi tantiyamacani. Jaa hino yocanihbaan, jahuen santo yocanihbaan, jahuen honantiyahpabaan, jahuen janeyahpabaan jaabo jatihibichin ta jascapa coshi hisin teneti jaiqui.

¹² Papan jato jascajatihhi honanxon ta tiroma jonibo Papan nincacoinaibaan teneti hahtipahiqui. Jahuen joi bihcoinxon jahuen baque bihnixon jeneyamahibaan ta tenetihqui.

¹³ Naihoh quehax yohuanai sca hean nincaribiqui:

—Huishahue. Jaton Hihbo qui hinamehtax muhauataibo ta hahan jenimati jaresscainqui. Jahuabi teneti ta yamascatihqui, jahuabi tee teeti yamascai. Papa Dios jaabaan hahxonni quen ta jaton teebo jato betanbi cayaxihqui qui. Jascari rahan hih ta Dios Yoshin siri jaiqui —hihqui bochiquihax yohuani.

Tsinquiquin hahcajaxon casticanaibo

¹⁴ Jaatian hen jisi bi nai cohin joxoni. Jaa nai cohin cahtsahotai cahen noquebaque quescapah. Oro maitiyahpa, quiquin hapon maiti. Jan xecohi cahen tsinquinonox hahan arroz xateti quescapah, híhti queno.

¹⁵ Papan jati janinhax sca huetsa yonoti picoquihrani jahui coshin yohuanjonahi:

—Miin xateti niascahue hoh. Tsinquiscahue hoh. Tsinquiti sca ta jaiqui, main jaibo. Noquen tsinquitit ta choshiscainqui hoh —yonotinin nai cohin cahtsahotai jaquin.

¹⁶ Yohihah cahen jahuen xateti main potaquin. Jan main potahah cahen mai mehabo tsinqui sca jai.

¹⁷ Papan naihoh queha jati janinhax huetsa rihbi sca jahuen yonoti picoti, jaa rihbi tsinquinonox hahan xateti quenoyahpa.

¹⁸ Huetsa rihbi sca Papa racanxonti janinhax picoquihran jahui, chihi hihbomaha joxon, coshin yohuani:

—Miin xateti queno niascahue hoh. Xatexon mai meha bimibo tsinquiscahue hoh. Johue sca ta jaiqui hoh.

¹⁹ Jascajaha, jahuen xateti main niascaquin. Mai meha bimibo tsinquixon Papan bishtaxmati janin jato potaquin, sinaxon casticanquin Papan bishtaxmanon.

²⁰ Jemama qui caxon bishtaxmatinin bishtaxquin jamá jamaca jahuen bishtaxmati janinhax jimi bahiscái, nemin. Joni masohi tiho nemin bahíhi, trescientos kilómetros caman bahíhi.

15

Papan siete pahe xecohibo

¹ Hen jisí bi naihoh sca huetsa hahan honanti jai, hani, hahqui raqueti. Siete yonoti, paheyahpa rahsi, maibo Papan casticanquin queyoxon hahan casticanti paheyahpa rahsi. Jaa pahen casticanquin jaabijaxon Papan casticanquamar.

² Jascapahbojisnoxon cahen hori pari jisí bi hian quescapah sca jai, nexnanihax bi bahrini, chihi quescapi. Jaa hian quexa nichibo hicha jonibo jai, hiaman meha hino tenenihbo, jahuen santo yocaxonma tenenihbo, jahuen Jane número bifyamanib, jaabo jaa hian nexnani quenichi, Papan jato hinanah hahan chimiti arpayahpabo rahsi.

³ Jaa hian quenichi Moises behuaya behuacani, Papa Diosen joi yohinicaxon Moisesnin huishani behua. Carnero qui behuacani nescari:

Mian hahcái ta hanibó qui, Hihbon.

Hahqui raquetiboa min hahcái.

Mia tah min noquen Hihbo Dios qui, jatihibi hihbo.

Miin bahiboa pontebo bahi coinbo qui.

Jatihibi jonibaan quiquin hihbo tah min qui.

⁴ ¿Tsoa mihqui raqueyamahihquin, Hihbon?

Mihqui ta jatihibi jonibo ponte bi res siripi yohuanti jaiqui.

Mia huesti tah min jascapa hilti siri qui.

Ponte bi res min hahcái copi ta jahuex jatihibi nahuabo raboxonen nichish mihqui betihipaqueixhqui qui hihcami behuahib.

⁵ Jaa pecaho sca hen jisí bi Papan naihoh queha xobo janin jahuen jati quehpemehti. Moises huishamaxon jan hahxontijani joiyahpa bohnanti jano jan becoxjani chique quehpemehti.

⁶ Jaa chique quehpemehtaiya jahuen siete yonotibo picoti, jahuen siete paheyahpa hihnoxihqui. Pehneni siri joxo chopasahuehax oro cinturon pishnexehtax picocani.

⁷ Jahuen noyanica yoshin huestichin sca jato oro tason hinanpaquequin. Papan hahan casticanti bochohi rahsi. Jayaxon noquen queyoyosma Papan nincayosmabo casticanti bochohi.

⁸ Papan xaba hihti coshi copi jahuen jati janin cohin quextoti, jahuen coshin jan jato casticanoxihqui copi. Jaa copi cahen jahuen yonotibaan jaton siete pahe chicoquin queyonon caman Papan jati janin tsoabi hihquit hahtipahyamanish.

16

Jaton tason chicohibo

¹ Papan jati chicho quehax yohuanai sca hean nincaquin:

—Botannahue. Maton tason mai qui chicotannahue. Papan jato hahan casticanti jahuen siete pahebo mai qui chicotannahue —hahquin.

² Bebo quiha yonoti caxon sca cahen jahuen tason mai quirí chicoquin. Hahqui chicoah cahen main jihuetaibo nobescái. Hihtiosi tiroma nobebo. Capapehhuansen honantiyahpabo, jahuen santo yocacaibo, jaabo rahsa nobeti.

³ Huetsa sca caxon quebíjistima hian qui jahuen tason chicoquin. Hahqui chicoah cahen hian jímicahinscái, mahuatipi jimi pisíhi. Jaa copi cahen jeneho cahibó jatihibi mahuatí.

⁴ Huetsa rihbi sca cahi jahuen quimisha sca. Caxon huacabo qui jahuen tason chicoquin. Texpabo qui. Jaabo rihbi sca jímicahinscái.

⁵ Jene coirannica Papan yonoti yohuanai sca hean nincaquin:

—Sirijaquin tah min jato casticanai, Papan. Min tah min rahma jai, neateman rihbi tah min japhonihqui.

⁶ Miin jihuetaħbo ta jimi potamacanpahonishqui. Miin joi yohinicabo rihbi ta jimi potamacanpahonishqui. Jimi sca tah min jato xehamahi. Sirijsaqin tah min jato casticanai, ponte bi res –hihqui Papan yonoti.

⁷ Papa racanxonti janinhax huetsa sca yohuanai hean nincaribiquin:

–Jascari rahān, Papan. Mia tah min jatihibi hihbo qui. Hahcoinquen tah min jato casticanai, ponte bi res –hihqui.

⁸ Huetsa sca cahi, jahuen chosco sca. Caxon bari qui jahuen tason chicoquin. Jan hahqui chicoħah sca bari xanascái jonibo mapojati tiho xanapi.

⁹ Barin hahca caħen mapohax jonibo hihti hisini. Barin hahca Papa Dios qui hihti tiromahi yohuancani, jahuen pahe jan jato qui chicoħah copi. Casticana bi jaton shinan ponteyamacanquin. Papan ta noque casticanihqui, pontejaquin shinanscapan, hihyamacani.

¹⁰ Huetsa sca cahi, jahuen pichca sca. Caxon, janoxon capepahhuān yonohi janinbi jahuen tason chicoquin. Hahqui chicoħah tiroma yoshiman shinanyahpabo jaton shinan xehpocahinscái. Hihti hisincani, hisin tenecasquimascaaħ hahri jaton jana rebo piħatax hashoan sca hisincanti.

¹¹ Jaton hisin copi noquen naiħoh queha Papa Dios hichacanquin. Jaton nobebo copi jaa roacanquin. Casticana bi jascabibi tiromacani, jaton shinan ponteyamacanquin.

¹² Huetsa rihbi sca cahi, jahuen seis sca. Caxon Eufrates janeya jaton paro qui jahuen tason chicoquin. Jascajaha taraxcaħinscái. Taraxcaħinaiya caħen bari cainai quirihax jahui hapobo jaton sontaroyabi histon pohqueti sca jai.

¹³ Hen jisí bi capepahhuān jana janinhax jirí quescapah yoshin tiroma caini, hihti jaroma. Jaa hinon jana janinhax sca huetsa rihbi caini, jascapahribi. Hoa huetsa yohinahnen jana janinhax huetsa rihbi jascapa caini. Quimisha yoshin tiromabó caini, jirí quescapahbo.

¹⁴ Yoshin hihxon, hahan rahtetibō hahxon jonibo rahtexon jato jahuen shinan hinanquin. Jatihibi mai janin caxon, janu jai meyayahpabo rehtenanti shinan hinanquin, Papa Dios betan rehtenannoxxon sca jaton hahbe sotarobo betan tsinquitahbo jato shinan hinanquin. Jatihibi hihbo hihxon Papan jato casticanscanon Papa betan rehtenanti bocani.

¹⁵ –Rahma tah hen yometso sanareneni cahi quescapi hen mato qui sanareneni canoxihqui, jisnāħue. Hoxa tenexon maton chopha coiranax tah man hahan jenimati jatihi. Chopanma nihyamanoxon coirannahue, chopanma nichiton mato merayama-hahbo coirannahue –Papan jaiya bi rehtenani bocatsihcandi.

¹⁶ Jaatian yoshiman hioħħah tsinquit bocani. Armagedon janeya main tsinquit bocani, hebreobaan join Janeħħah caħen Armagedon mai.

¹⁷ Huetsa yonoti sca cahi, jahuen siete sca. Caxon hueé qui jahuen tason chicoquin. Jan chicoħiya, Papan jati janinhax cosħin yohuani jai:

–Hen tah hen hahresscái –hihqui.

¹⁸ Cana bacatān bacatanscái. Cosħin rihbi terenħiħqui, toshiti. Mai hihti miħuani. Jahuentianbi jaħi cosħin miħuanyamani, tsoan jisnīma miħuani.

¹⁹ Mai miħuanaħi jaħi ġejha caxque caxqueti, quimisha teque sca banenon. Nahuabaan jemabo caħen poxocahincani. Jaton Babilonia ġejha casticanti caħen Papan shinanbeħno yamaqquin. Jahuen hahan casticanti mocani jato xehamaqquin, sina sinaxon jahān jato casticanti.

²⁰ Mai cosħin miħuanaħi jaħi racatai mai toncobo yamacaħinscái, queyoc-ahħi jene meran cahi. Mahħiħib rihbi xayanah yamacaħinscái, mispanċahini.

²¹ Matisi toncobo rihbi hanibō paqueti. Naiħoh queħax paquexon jonibo tsahħaqin, tsoan jisnīmab, hanibō tonco chahomab. Papan tsacħħah teneti haħtipahyamaxon bi Papa Dios hichārescanquin.

17

Hahresti haibo casticanti

¹ Jaa siete paheyahpa yonoti quiha huesti sca joxon:

–Heħbetan cahi johue. Jan tsinħihi copi hani hahresti haibo Papan casticanscái hen mia jismahli canon johue. Hicha texpa janin nichi haibo tah qui.

² Mai meħa hapobaan hahċá tah qui. Mai meħabo ta hahbetan hihquish pahen pahennishqui –hea jaquin jaa yonotin.

³ Hea jascajaxon caħen jemama qui hoħo sca heen yoshin boquin. Hahbetan caxon hen jisí bi haibo, yohina joshini caħtsahotai haibo. Jaa yohina caħen jahuen yora janin Jane tiromabó huishá hicha jai. Papan jistahihħma Janeħħi. Siete mapoyahpa, chonca machanyahpa yohinah.

⁴ Haibo cahen joshiniya yanconi chopayahpa. Oro tejotiyahpa, hihti copi macan bero romishin morojahax tejotiyahpa, moro copibo joxonihbo jaribhi. Jan xecohi cahen oro tason. Jahuen tason cahen rahnintibo bochohi, jahuen tsini hohchabo nanehah jahuen tason qui bochohi.

⁵ Jahuen bemanqui huishá cahen jahuen jane jai, tsoan honanyamapahoni jane. Hani Babilonia jema, jaa cahen jahuen jane, tsinibaan mama, mai meha rahnintibaan mama.

⁶ Hen jisí bi Papan jihuetaħbaan jimi xehħax jaa haibo paheni, Jesuseñ joi jeneyamahibaan jimi xehħax jaa haibo pahen paheni. Jascapa haibo jisish cahen hea rahte rahtetah.

⁷ –Jahua copi min rahtetain? Jaa haibo jahua quin tah hen mia yohixihqui. Jan cahtsaħotai siete mapoyahpa, chonca machanyahpa yohina jahua quin hen mia yohinon nincahue.

⁸ Hoa min jisi yohina ta japhonish bi yamascaiqui. Mai quinħħuan janinhax ta hahquirihbi picoyaxihqui. Jaa pecaho ta Papan jaa rehteyaxihqui. Main jihuetaħbo ta rahte rahteyaxihqui. Naiyahpa mai jananoxon ta jahuen quirica janin jahuen jihuetaħbaan Janebo Papan huishanishqui jatihibi. Jaa quirica janin jan jaton Jane huishayamanihbo rahsi ta nea yohina jisish rahteyaxihqui. Jaa yohina japhonish bi queyonish, queyonish bi hahquirihbi jaresscāi quen rahte rahtecani.

⁹ Honannoxxon nincahue hen mia yohinon. Jahuen siete mapo ta siete mai qui. Jano jaa haibo jihuetai maibō siete quiquin hapo jai.

¹⁰ Jaa hapobo ta pichca mahuascanishqui, huetsa ta rahma jaiqui. Huetsa rihbi ta joriyamahiqu. Jahuextian rihbi ta basimataħni baneyaxihqui.

¹¹ Jaa japhonish bi yamascai yohina ta huetsa quiquin hapo rihbi qui, jayanish ocho sca. Jaa ta texe jahuen hahbe hapobo xohtayaxihqui. Jaa pecaho cahen Papan jaa rehteyaxihqui.

¹² Hoa min jisi chonca machan ta chonca quiquin hapo qui, jayaxihquibo rahsi. Jaa yohina joribiscaya ta basima tahni res huesti hora res hapoyaxihcanihqui, yohinahnen jato hapomahah.

¹³ Jaa chonca hapobo ta huesti shinanyaxon jaa yohina huesti sca jaton quiquin hapo hihnon hapomayaxihqui, jatiħixonbi jaa yanapanquin.

¹⁴ Carnero betan ta rehtenanyaxihcanihqui. Carnero betan rehtenanax bi ta hahbetan senenyamayaxihcanihqui. Jaan ta jato rehteyaxihqui. Quiquin hapobaan hapo hihxon jatihibi hihbo hihxon jato namanjaquin. Jaa carnero manahibo ta jahuen quenahahbo qui, jahuen caisahbo, jahuen joi nincacoinaibo –hea jaa yonotinin jaquin.

¹⁵ Jaatian sca hea yohirihbiquin:

–Hoa min jisí texpabo ta jonibo qui, janoo jaa haibo tsini nichī. Jahuen jonibo can, mesco mai meha jonibo, mesco texpa quehabo, mesco nahuabo, mesco joiyahpabo.

¹⁶ Jaa yohina, jahuen chonca machanbo min jisí, jaabaan ta jaa hahresti haibo jistahħmayaxihcanihqui. Jistahħħmaxon ta potaxiħħcanihqui, benejoma sca hihnon, chapanma sca nihnon. Jahuen yora nami ta piyaxiħħcanihqui. Piquin texejaxon ta chihin sca mapojayaxiħħcanihqui.

¹⁷ Jascajati shinan jaton jointi janin Papan janahah ta jascajajaxiħħcanihqui. Jaan shinanmaha ta huesti shinanyaxon jaa yohina jaton quiquin hapo sca hihnon jascajati yohiyaxiħħcanihqui. Jasca ta jayaxiħħqu qui hihxon Papan yohini quescabi janon ta jascayaxiħħcanihqui.

¹⁸ Jaa hahresti haibo min jisi ta jaton hani jema qui. Janoxon ta jahuen hapobaan huetsa mai meħaboo yono yonoyaxiħħqu qui –hea jaquin.

18

Babilonia potojaquetanaibo

¹ Jaatian hen jisí bi naiħoh queħax botopaqeti huetsa yonotijahui, Papan coshi hinanah hihti coshi. Coshiyahpahax jahui nihrenenxon cahen mai xabajarenenquin.

² Hihti coshin jaa yohuani, coshin bi res:

–Babilonia janeya quiquin jema ta paquescaiqui. Poxocahin sca ta jaiqui. Tiromha yoshinbo jano jihuetai sca tah qui, Satanashen yoshinbaan jati sca tah qui. Jano risħta hihsbu paichi, rahnintibo jano paiti tah qui.

³ Hea nohueleħħ, Hea nohueleħħ, hahxon ta jatihibi mai meħaboo hahmanishqui, jahuen hahmatiboa sca jaabo hihnon, hahbe tiromabu. Mai meħa quiquin hapobo ta hahbetan tsinħiħshqui. Hicha patorobaan ta jaa tsini haibo rajisti shama copi hicha jonibo hahan queenmaxon tsama cori qui biċċannishqui –hihqui jaa coshi yonotijahue.

⁴ Hen nincacah bi naiħoh queħax yohuani jaribhi:

—Jaa janinhax piconahue, heen jonibaan. Hahbe hohchayahpayamanoxon janohax piconahue. Jaa casticanquin hen matoyabi casticanyamanon piconahue.

⁵ Jahuen hohcha ta nai queya tiha tsamatihqui. Jan tiromani copi ta Papan casticancat-sihscaiqui.

⁶ Jaa jema mehabaan tiromajapahoni quescabijaquin jato hahnahue, copiquin. Jaabaan hahni quescabijaquin hahxon bi rabejaquin sca hahribinahue. Jaa jema mehabaan huetsa janibo tiromajapahoni quescabijaxon bi rabejaquin sca jaa jema tiromajanahue.

⁷ Hea ta rajisti siri qui, jahuan bi tah hen pahiyamahi hih ta japahonishqui. Jan hicha janí quescaribhibi sca tsama hisin tenemanahue. Hihti benamanahue. Hea ta quiquin hapo haibo qui, yonnomma tah hen hihyamahi, jahuentianbi tah hen benatimahi hih ta japahonishqui.

⁸ Jaa copi ta jaa huesti netenbi non rishquihah mahuanoxihcanihqui, benanoxih-canihqui, pihan hihquish mahuanoxihcanihqui, cohahah ta queyocahinyaxihcanihqui. Jascapahbo casticannicah ta Hihbo Dios qui, hihti coshi —hihqui.

⁹⁻¹⁰ Hahbetan hihresax hohchapahoni hapobo ta jaya huaonihnoxihqui, jaya ji-ihhqui. Mapohax hani cohin xohtóhinhatai hochoxon jisish ta huaonihquish jahuen castantic qui raquetax hocho res nihrenennoxihcanihqui.

—Hahrai, noquen hani jema, noquen coshi Babilonia jema. Jaatian huesti ta jatihibi pahen mia merahihqui, Diosen raanah —hih ta janoxihcanihqui, hapobo.

¹¹ Jaton nontin napocohtaibo tsoanbi jato maronyamascaiya ta patorobo rihbi benatax jaya huaonihnoxihcanihqui.

¹² Maromacatsihquin jaabaan bohi oro bero romishin, yami pehnneiyahpa mai, poquinxon nanehah macan copibo, hahan paronohtijati quescapahbo, morobo, joxo chopabo, chopab, yanconinbo, seda chopabo, joshin chopabo, hinini jihuibo, yohina xeta jahuaborabo, quenchabo quescapahbo siribo jihuibo, bronze, yami, macan pehneneibo,

¹³ hahan pitijati canela, yochi, hahan hininjati, yora payotima raho, rasquitax hinintibo, xehatibo, xeni, hatsapoto quescapahbo, trigobo, ganado haniboya hanitahmabo, cabachobo, carrobo, hina janibo rihbi. Jascapahbo tsoanbi jato maronyamascaah:

¹⁴ —Min hihti picatsihpahoni bimibo ta mia janin yamascaqui. Xoapahonish bi tah min jascayamasca, xaba shama hihpahonish bi tah min jascayamasca, jascapa hihpahonish bi tah min jahuentianbi jascayamascatihi —hihcanci.

¹⁵ Jaa jema janinxon hicha coriqui cananpahonibo ta jan mapohi copi raquetax hocho manahiahtax, benatax huaonihyaxihqui.

¹⁶ —Hahrai, noquen hani jema, joxo chopab sahuehi haibo quesa tah min siripahonihqui, yanconiboya joshini rajotiboyaahpa quescapah hihpahonish bi tah min jascayamasca. Oro rajotiboyaahpa quescapahax, siri macan beroya joxoni moroyahpa hihpahonish bi tah min jascayamasca.

¹⁷ Hihti siripahonish bi tah min huestijaquin rishquihah tiromacahinscái —hihquish huaonihscacani.

Nonti hihbobo jatihibi, nontin cahibo jatihibi, nontin teetaibo, hiaman teetaibo jatihibi,

¹⁸ jaabo jatihibichin cahen hocho nihxon jahuen cohin naihoh xohtóhinhatai jisish:

—Jascapa jema hani ta jahuenbi yamanishqui —hihcanci huaonihhhanan.

¹⁹ Bena benatax mai poto hahrí mapocohtax huaonihcanci:

—Hahrai, jano tah non quebjistima hiaman cahi nontiyahpabo jatihibichin hicha coriqui bihniqui, jano hicha coriqui janish bi ta histon res tiromacahinaxqui —hihcanci huaonihqui.

²⁰ Jaa jemahhuan tiromacahinaiya jenimanahue, naihoh quehabon. Jenimanahue, Papan jihuetaahbon. Jenimanahue, Papan raantibon, jahuen joi yohinicabon. Mato copixonquin ta Papan jaa casticanaxqui.

²¹ Jaatian hihti coshi yonotinin hani macan bihxon hian janin potahi hean jisquin. Hani renti tihopa macan. Hiaman potaxon:

—Nescajaquin potahah quesa tah min queyocahinnoxihqui, Babilonia jemahhuan, jahuentianbi jistima sca mia janon.

²² Chimatataibo, rehue hahcaibo, behuahibo, musica hahcaibo jatihibi ta mia janin yamascatihi. Ni jenquetsahpabo mequeman teetaibo ta mia janin yamascatihi. Mia janinxon rentin renhehido ta tsoanbi nincayamascatihi.

²³ Tsoanbi ta mia janinxon johue quetejayamascatihi. Haibo bichish huanohi ta mia janin tsoanbi nincayamascatihi, benohi yohuanai haibobo rihbi ta mia janin jahuentianbi yamascatihi. Mia janin jihuepahoni patorobo ta hanibo patorobo janishqui, caibo muuinquin. Miin yobebaan ta jatihibi mai mehabo paranpahonishqui.

¹⁷ Jaatian hen jisí bi bari namanbi huesti yonoti nihxon coshin quenaquin. Jatihibi hishminbo quenaquin:

—Pihu benahue, Papan mato hichaxon pitijaxonah pihu benahue.

¹⁸ Man pinon ta rehtexoniqui, quiquin hapobo, sontaro hapobo, coshi jonibo, cababobo, jato cahtsahotaibo, patorojomabo jatihibi, patoroyahpabo jatihibi, hanitahmaboya hanibo, nami hichahi pihu benahue —jato jaquin.

¹⁹ Hen jisí bi jaa hen jismenoha hino, mai meha quiquin hapobo, jaton sontaroboya hichahi, jaabo jatihibi tsinquit. Naihoh quehax jahuibo betan rehtenannoxon tsinquicani. Cabacho cahtsahotax jahui rehtenoxon tsinquicani. Jahuen sontarobo rihbi rehtecatsihquish tsinquicani.

²⁰ Rehtenoxon tsinquitaiton bi jaan pari jaton hino yoshin bihquin. Hinon quesa joi yohixonicah rihbi bihquin rabebi. Jaa quesa joi yohixonicahton cahen jahuen coshin hahxon, rahtexon, hinon janeyahpabo paranpahonish, jahuen santo yocacaibo jaan paranpahoni. Mohitahpa jato rabebi bihxon, chihi hianencanya sca jato rabebi potaquin.

²¹ Texebo cahen jahuen jana janinhax picotan picotanaiton reraxon jato rehtepaquequin. Jato pihu sca jatihibi hishminbo yani yanicahini cahi.

20

Mil bari yonohibo

¹ Jaatian hen jisí bi naihoh quehax Papan yonoti huesti botopaqueti. Hihtihosi cadenaya jahuí, hahan xehpoti llave rihbi xecohax.

² Joxon cahen jaa capepahhuan yahtantanqui. Jaa capepan Jane huetsa cahen rono xeni, huetsa jahuen Jane cahen Tiroma Yoshin, huetsa jahuen Jane cahen Satanás. Mil bari jaa tiroma yoshin nexáscanon cahen jahuen cadenanen jaa nexaquin.

³ Nexaxon nemimahhuan qui potaquin. Potaxon jahuen xehpotinin xehpoxon boy-aquin, jahuen mil bari senennon caman. Jaa pecaho ta basima tahni nihnon hahquirihbi quehpentihiqui.

⁴ Jaatian hen jisí bi hahan tsahoxon jonibo yonoti tsahotibo hichahi. Jano cahen tsahotaibo jai, jonibo yononoxon haponahue Papan jato jaah jano tsahocani. Jesusen joi jeneyamahibo copi textenihbo yamanicabo jano jaribhi, Papan joi jeneyamahibo copi textenihbo, hino qui betihihyamanibo, jahuen santo qui betihihyamanibo, jaton bemanan qui tiroma yoshiman Jane huishamayamanibo, jaton mequen qui jahuen Jane huishamayamanibo jaabo rihbi jano jai, textexon rehtenihbo yamanicabo. Hahquirihbi jihuexon cahen Cristo betan mil bari yonocanquin.

⁵ Texe yamanicabo jascayamahi: jaabo cahen mil bari senennon caman jihueyamahi. Hen yohihi Cristo betan yonohibo ta jahuen huenimenonicabo qui.

⁶ Criston huenimenonicabo ta jahuenahbo qui, jaan hahxonah hihti jenimahibo. Jaabo cahen mahuayosmabo sca, jenquetsahax hahquirihbi mahuatimabo, Papa Dios betan yohuanyaxihquibo, Cristo betan yohuanyaxihquibo. Mil bari ta Cristo betan yonoyaxihcanihqui.

⁷ Jahuen mil bari queyoscaya sca ta quehpenxon cainmaha jahuen sipo quinihoh quehax Satanas picoyaxihquiqui.

⁸ Picoxon ta jatihibi mai janin jihuetaibo jaan paranyaxihquiqui, jatihibi texpa janin jihuetaibo paranquin. Gog Janea mai mehaboya Magog Janea mai mehabo. Paranxon ta jato hiyoxaxihquiqui, Papa Dios betan rehtenani bohábo. Jaan paranxon tsinquihah cahen hichahi topontimahi, texpa quexa mashi bero jai tihi.

⁹ Hen jisi bi mai mehabo tsinqui tsinquixon Papan jihuetaibo rehtecatsihquin jano jaabo jai jato bahi xehpohahutanbohancanquin. Papan jihuetaibaan jema janin jaibo jatihibi rehtenoxon cahen hichaxon xehpohahutanbohancanquin. Papan jihuetaibo rehtecatsihscibaan bi naihoh quehax chihi paqueti. Satanas chibanaibo qui paquexon jato queyobahinquin.

¹⁰ Jato parannica yoshin bihxon sca chihi hianencanya Papan potaquin. Jano jan yoshin hinoya jahuen quesa yoshin potani janin Satanás sca potarihbiquin. Jano potahah cahen jascabi mapohi. Chihi tenebahinaxon teneshinaxon jascabijaquin teneti jai, chihi nocayosma.

Yamanicabo tsinquixon noquen Hihbaan jato casticanai

¹¹ Jaatian hen jisí bi haaani tsahoti, hihtihosi tsahoti joxoni. Hahan tsahoxon jonibo casticanti. Noquen Hihbo hahan tsahoscai bi hean jisquin. Jaan yohihah cahen naiyahpa mai yamacahinscái, jahuenbi yamascaí.

¹² Yamanicabo sca hicha hean jisquin, patoroboya jaton jonibo hihpahonibo, Papa Dios bebon nichinah manataibo rahsi. Jato casticannocon cahen hicha huishayahpa quiricabo caxquexon huetsa rihbi noquen Hihbaan caxquehah. Jaa quirica huesti cahen jihuencabaana. Jano nichi yamanicabo tiromabo quen jaabo tiromahi jihuepahoni huishapaquenihxon jaa joi jato nincamapaquexon sca jato casticancaquin.

¹³ Noquen Hihbo bebon nichibon cahen caibo jene meran canish bi jaa bebon sca nichibon, caibo cahen mahuanish bi jaa bebon sca nichibon jaan jato quenahah. Jaabo tiromaphonibon tihoojaquin jato casticanquin: hihti tromanibon hihti casticanxon, hashoan hicha tahma tiromanibon hashoan hicha tahmabojaquein casticanquin.

¹⁴ Casticanquin ta jato jatihibi chihi qui potahihqui. Jaa hian quescapah chihi janin potahihnihabon ta hahquirihbi muhuataibo qui, rabejaquin muhuamaha janon sca bane-taibo.

¹⁵ Jihuencabaan quirica janin jaton Jane yamahi quen chihi janin canicahbo rahsi, Papan jato janon potahah.

21

Naiyabi mai behna

¹ Jaatian hen jisí bi nai behna jaresscái, mai behna rihbi jaresscái. Jamenoni naiyahpa mai cahen yamascaí, queyoní. Quebíjistima hian rihbi yamascaí.

² Bochiquí sca hen jisí bi Papan jema naihoh quehax botopaqetí jahui. Jahuen Jerusalen behna, jaan raanah botopaqetí jahui. Hihti siri, huanomaha jahuen benen bihnon haibaan hihti siri rajotibo sahuehi quescari hahan hihti siritiboya Papan jema botopaqetí.

³ Hen nincacah bi Papan janoxon yonoti janinhaxcoshin yohuani:

—Jinsahue. Jonibo tocan ta Papan jati qui. Jato betanbi ta jihuenoxihqui qui. Jaabo rihbi ta jahuen jihuetahbo hihnoxihqui qui. Papa Díos ena jihuequhnnoxihqui qui.

⁴ Jaan jihuemaha ta tsoabi benayamascatihqui, tsoabi muhuayamascaí, tsoabi huao-hiyamascaí, huiniyamascaí, hisinyamascaí. Jascápahonish bi jascayamascaí —hihqui.

⁵ Noquen Hihbo sca yohuani:

—Jinsahue. Behna sca tah hen jatihibi hahquirihbi janahi —hihqui. Jascaxon hea sca yohiquin:

—Huishihue. Nea hen mia yohihi ta hihcoinai joibo qui. Hen yohihi quescabi ta jatihiqui. Huishihue.

⁶ Hen huishascanon sca yohuanrihbibi:

—Hen tah hen queyoscaí. Hea tah hen jatihibi hibbo qui. Jatihibi jananixon tah hen hean queyoscaí. Jiricatsihqui boho tah hen hahan jihueta jene hean xehamatih, hinanresquin.

⁷ Jascapa tah hen hea tenexonnibo hean hinanai. Hea ta jaton Papa Dios qui, jaabo rihbi heen baquebo.

⁸ Caibo cahen jascapahmabo: teneti qui raquetaibo, nincacatsihyamahibo, rahmanti rishtayahpabo, joni rehthehibo, tsinhibo, yobebo, santo yocacaibo, jatihibi quescabo, jascapahbo tah hen chihi janin potahi, rabejaquin hean muhuamahi rahsi ta chihi janin canicahbo qui —hea jaquin.

Papan Jerusalen jema behna

⁹ Jaatian, hen jisí bi jaton siete tasonya canicahbo huesti hehqui jahuí, Papan jayaxon mai casticanai pahe boxonnica. Joxon sca:

—Johue. Carneronen binoxihqui jahuen haibo mia jismanon johue.

¹⁰ Hea jascajaxon, hani mahchi queya janin heen yoshin boxon, noquen Hihbaan Jerusalen jema hea jismaquin. Papan raanah jaa jema naihoh quehax botopaqetai hea jismaquin.

¹¹ Xabayahpa jema, Papan xabapan xabati. Copi macanbo pehnetihcamahi, jaspe macan non jisquin hoque pecabahinquín jai quescari.

¹² Hani chiqueyahpa, queyani. Jahuen chique cahen doce xehquiyahpa. Xehqui tihibi janin cahen Papan yonoti huesti quenichi, jatihibyanish doce yonotibo quenichi. Jahuen xehqui cahen janeyahpa rahsi, xehqui janinbi huisha rahsi. Jaton Jane ta Israeli doce baquebaan Jane qui.

¹³ Bari cainai quiri quimisha xehqui janon, chiponquiri quimisha rihbi, reboquiri quimisha rihbi, jari bari cahi quiri quimisha rihbi.

¹⁴ Chiquequin macan tsamanhinhinoxon cahen hahqui tsamantibo macanbo jaribibi, doce queco hahqui tsamantibo. Hahqui tsamantibo macan quecobo cahen janeyahpabo rahsi, carneronen raantibaan janeyahpa.

¹⁵ Hehbetan yohuanai yonotinin sca hahan toponti oro taxo xecoxon jaa jema toponscái hean jisquin. Jahuentihopa hin hihxon jema topónxon, jahuen xehquibo topónrhibixon jahuen chiquebo topónpaquequin.

¹⁶ Jaan topónah cahen jahuen nenque jatíhi janon, jahuen queya jatíhi rihbi janon, jahuen naxba jatíhi rihbi. Jahuen nenque hihqui quescaríhbibi ta jahuen naxba qui, jahuen topontin jaan topónah dos mil doscientos kilómetros. Jahuen nenque, jahuen naxba, jahuen queya, jatíhxona rahsi.

¹⁷ Jahuen chique topónah cahen jahuen queya sesenticuatro metro, jonibaan topónai quescajaquin jaan topónah.

¹⁸ Jaspe macaman chiquecah cahen yancon shama. Jema cahen oro bi res, oro pionihax bi non jene nexnanijisquin hoque pecabahinai quescapi.

¹⁹ Hahan chique tsahontibo cahen hihti siribo macan berobo copibo hueonah, hihti siri hihnon. Naman meha queco cahen jaspe. Jaa cahchian tsahotai cahen zafiro. Jaa cahchian tsahotai cahen ágata. Jaa cahchian tsahotai cahen esmeralda.

²⁰ Jaa cahchian tsahotai cahen ónice. Jaa cahchian tsahotai cahen cornalina. Jaa cahchian tsahotai cahen crisólito. Jaa cahchian tsahotai cahen berilo. Jaa cahchian tsahotai cahen topacio. Jaa cahchian tsahotai cahen crisopasa. Jaa cahchian tsahotai cahen jacinto. Jaa cahchian cahen amatista.

²¹ Jahuen xehquibo ta moro qui, xehqui tihibi huesti moropahhuanen xehquijaha, jatihibiyanih doce xehqui. Jema chicho cahen oro bi res, oro que bi jisquin hoque pecabahinquin, hihti siri.

²² Hen jisi bi jema janin janoo tsinquxion Papahon shinanti xobo yamahi. Carnero betan Papa Dios janobi hihqui copi jascapa xobo pishinyamahi. Jatihibis hihbohax bi noquen Papa Dios janobi hihqui.

²³ Bari rihbi janoo pishinyamahi, hoxne rihbi pishinyamahi. Papan xaba janoo xabatai copi bari xabati pishinyamasca. Carnero ta jahuen xaba qui.

²⁴ Jahuen xabapan ta jatihibis janobi niyaxihqui. Mai meha quiquin hapobo ta shinanquin sirijahax Papa qui siripi yohuani hihcoyaxihqui.

²⁵ Jano yame yamasca copi ta jahuen xehquibo jahuentianbi xehpoyamayaxihcanihqui.

²⁶ Noquen quiquin Hihbo qui hihti siripi yohuancatsihquish ta mesco janobi, hicha mai mehabo jano hihcoyaxihqui.

²⁷ Papan jihuetahmabo ta janoo hihcotimahiqui. Papan jihuetahmabo, rishtayahpabo, quesabo, jascapahbo ta jahuentianbi hihcotimahiqui. Carneronen jahuen quirica janin jahuen jihuetahbaan jane huishá cahen jaabo rahsi janoo hihconicabo.

22

¹ Papan yonotinin hea jismahah cahen janoxon Carnero betan Papa Díos jihuemahi janinhax huaca tejabahai hean jisquin. Jahuen jene cahen nexnani siri, jaa jene xehahax non jihuescatih.

² Jema naponbi bahi naxba janon, jaa bahi naponbi sca jaa huaca tejabahit. Huaca quexa nihbecoinai cahen hahan jihueto jihuibo. Doce bimiboyaahpa jihui, hoxne tihbi huetsa bimiyahpa. Jahuen pehi rihbi cahen hahan rahomehti, nauaboo hahan rahomehti.

³ Jahuabi tiromabo ta yamacatihiqui. Jahuen jihuetahbaan ta hahbetanbi hihxon hahqui jaton shinan camayaxihqui.

⁴ Jaton bemanan qui huishá ta Carneronen Jane jayaxihqui. Carnero bejisaibo ta jayaxihcanihqui jahuen jihuetahbo.

⁵ Jano ta yame rihbi yamacatihiqui. Johue quetejati pishinyamasca. Bari xabati rihbi pishinyamasca. Noquen Hihbo Díos betan xabajaha huetsa xaba pishinyamasca. Jahuen jihuetahboxon ta queyoyamanox manaquin jascabijaquin sca yonoxonyaxihcanihqui.

Jesucristo nea pishca sca jaonahi

⁶ —Hihcoin tah hen jai. Hen mia yohihi quescabi ta jayaxihqui. Papan ta jahuen yoshin jato hinanxon jahuen joi chaninicabo yohuanmanishqui, jahuen joi yohihahbo. Hea sca ta raanaxqui, jahuen yonotixon hen jahuen janobi yohinon, janoxihquibo hen jato yohinon.

⁷ Histon tah hen mato qui catihi hih ta jaiqui. Nea hen mia huishamahi joibo bihcoinax ta nincacoinaibo hahan jenimati jaresscainqui —hea jaquin Papan yonotinin.

⁸ Jaan jismahah tah hen nincaxon jisiqui, hea Juaman. Nincaxon jisish tah hen hea yohihi yonoti naman raboxonen nichiqui, hahqui betihipaquenoxon.

⁹ —Jascayamahue. Mihbe hahxonnicaba tah hen qui. Papan joi yohinicabo, jahuen hahxonnicabohihqui quescaribinica tah hen qui, hen mia huishamahi joi nincacoinaibo Papan hahxonnicabohihqui quescaribinica. Papa huesti qui betihipaquehue —hea jaquin, raboxonen nichiton.

¹⁰ Jascajaxon:

—Hen mia huishamaha jatihibi jato yohipaquehue. Hen mia yohihi quescati ta nea pishca sca jaonahiqui.

¹¹ Tiromaparihibo jascabi tiroma janon. Rishtayabo jascabi rishtayabo janon, sirijaquin hahcaibaan jascabijaquin sirijahi jan janon, Papanahbo jascabi Papanahbo janon — hihqui.

¹² Coiramenahue. Histon tah hen mato qui catihi. Hea teexonaibo copijahi tah hen catihi. Hea hahxonpahonibo quescabijaquin tah hen jato hahxontihi, jan hahxonni betan senenjaquin.

¹³ Hea tah hen jatihibi hihbo qui. Jatihibi jananixon tah hen hean queyohi. Hean hihmahah ta jatihibi jaiqui. Heanbi tah hen queyorihbih.

¹⁴ Jaton chopasacaibo ta hahan jenimati jaiqui. Jaabaan ta hahan jihueta jihui quiha piti hahtipahiqui. Jaabo ta jema xehquibo janin hihconicabo qui.

¹⁵ Hihcoyosmabocahen hochiti quescapa jonibo, yobebo, joni rehrehibo, santo yocacibo, quesaahibo, quesaajaquin paranaibo, jascapahbo ta hihcoyosmabo qui.

¹⁶ —Hea Jesusen tah hen heen yonoti mato qui raanai, hen mato yohihi joibo man Papan baquebo nincamanon tah hen raanai. Hea tah hen Davidi xohta qui, hean hihmahah ta jaa janishqui, jahuen chini rihbi sca tah hen joniqui. Quiquin xabaya tah hen qui, Xaba Hihbo.

¹⁷ Johue hih ta Dios Yoshin jaiqui. Johue hah ta Criston bihtibaan jaiqui. Nincaxon Johue hahnahue maton rihbi. Jiricatsihquish benahue. Queenxon hahan jihueta jene bihresnahue, hinanresa tah qui —hah sca noquen Hihbaan hea jaquin.

¹⁸ Nea hen huishahi joi nincaxon huetsajayamanahue. Man honanon hihxon ta hen mato yohihi. Hean huishahi qui huetsa joi sca rechihibo ta Papan rishquiyaxihqui, nea quirica janin jai quescabijaquin.

¹⁹ Nea joi man texe potahiya ta Papan rihbi mato jahuen hahan jihueta jihui bichinyaxihqui. Huishaxon hen mato yohiha jema janin rihbi ta jascapahbo hihcomatimahiqui.

²⁰ Nea joibo huishamanicah ta yohuanahqui. Mato qui tah hen histon catihi hihqui yohuan. Jaa copi tah hen Jascari rahan. Johue Hihbo Jesusen, hen jai.

²¹ Noquen Hihbaan shinanya sca jihuenaahue.